


Dios Chani



New Testament in Chácobo (BL:cao:Chácobo)

Dios Chani

New Testament in Chácobo (BL:cao:Chácobo)

copyright © 2010 Wycliffe Bible Translators, Inc.

Language: Chácobo

Translation by: Wycliffe Bible Translators, Inc.

Chácobo [cao], Bolivia

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chácobo

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022
137aab31-418b-5455-a1a5-99b889cb7cfc

Contents

San Mateo	1
San Marcos	63
San Lucas	102
San Juan	167
Los Hechos	214
Romanos	272
1 Corintios	297
2 Corintios	321
Gálatas	338
Efesios	347
Filipenses	355
Colosenses	361
1 Tesalonicenses	367
2 Tesalonicenses	372
1 Timoteo	375
2 Timoteo	382
Tito	387
Filemón	390
Hebreos	392
Santiago	412
1 San Pedro	418
2 San Pedro	425
1 San Juan	429
2 San Juan	435
3 San Juan	436
San Judas	437
Apocalipsis	439

El Santo Evangelio Según San Mateo

*Jesu naborëquëbo
Lucas 3.23-38*

¹ Jabi chama David yamabo, Abraham yamabo, tihi caba चाहितaxocobo Jesucristo iniquë. Jabi Jesucristo naborëquëbo janë bo tëquë tsi xo naa.

² Abraham baquë Isaac iniquë.

Isaac baquë Jacob iniquë.

Jatsi doce ca baquë bo Jacob yamabá jayanicuë. Jacob jariapari baquë Judá iniquë.

³ Jatsi dos ca baquë bo, naa Fares, Zara, tihi cabo Judá jayanicuë. Jato jahëhua, Tamar ini quiha.

Jatsi Fares baquë Esrom iniquë.

Esrom baquë Aram iniquë.

⁴ Aram baquë Aminadab iniquë.

Aminadab baquë Naasón iniquë.

Naasón baquë Salmón iniquë.

⁵ Salmón baquë Booz iniquë. Jasca, jahuë jahëhua Rahab ini quiha.

Jatsi Booz baquë Obed iniquë. Jasca, jahuë jahëhua Rut ini quiha.

Jatsi Obed baquë Isaí iniquë.

⁶ Isaí baquë David iniquë, naa chama-chamaria inish cato.

David baquë Salomón iniquë. Urías i-ipaonish ca ahui jahuë jahëhua ini quiha.

⁷ Salomón baquë Roboam iniquë.

Roboam baquë Abías iniquë.

Abías baquë Asa iniquë.

⁸ Asa baquë Josafat iniquë.

Josafat baquë Joram iniquë.

Joram baquë Uzías iniquë.

⁹ Uzías baquë Jotam iniquë.

Jotam baquë Acaz iniquë.

Acaz baquë Ezequías iniquë.

¹⁰ Ezequías baquë Manasés iniquë.

Manasés baquë Amón iniquë.

Amón baquë Josías iniquë.

¹¹ Jeconías, jahuë noma bo, tihi cabo Josías saihuanicuë. Naatíyá tsi Babilonia mai qui Israel ca nohiria bohacanicuë.

¹² Jaquirëquë Salatiel Jeconías saihuanicuë.

Jatsí Salatiel baquë Zorobabel iniquë.

¹³ Zorobabel baquë Abiud iniquë.

Abiud baquë Eliaquim iniquë.

Eliaquim baquë Azor iniquë.

¹⁴ Azor baquë Sadoc iniquë.

Sadoc baquë Aquim iniquë.

Aquim baquë Eliud iniquë.

¹⁵ Eliud baquë Eleazar iniquë.

Eleazar baquë Matán iniquë.

Matán baquë Jacob iniquë.

¹⁶ Jacob baquë José iniquë, naa María bënë. Jabi Jesu, naa Cristo icanai ca María comaniquë.

¹⁷ Jabi Abraham bësotiyá quirëquë catorce ca naborëquëbo iniquë. Jatsi chama David yamabo bësotiquë. Jaquirëquë catorce ca naborëquëbo huëtsa bo iniquë. Jatsi Babilonia mai qui Israël cabo bohacanicuë. Jaquirëquë catorce ca naborëquëbo huëtsa bo iniquë. Jatsi Jesu coniquë.

Jesu conina
Lucas 2.1-7

¹⁸ Nêca tsi quiha Jesucristo conina ra. Jabi bënë bipaima jahuë jahëhua María iniquë. Jahuë bënë ti ca José ini quiha. Jama, bënë binox pari tsi quiha María tohoyanicuë Espiritu Santó no. ¹⁹ Jatsi quiha José, naa jahuë bënë ti cató María bicasyamaniquë, joni shinajiaxëni ca ja ini quëshpi na. Jasca, nohiria bësoso xo tsi bëro tsi María ja niacasyamani quiha, bërabihuacasyamaquí na. ²⁰ Jaha tsi jahuë ahui ti ca niahai ca ja shina-shinaniquë. Shinajano tsi quiha ja qui jisiquiniquë Iboba ángel, ja namahai cató no. Jisiquihax José qui ja chaniniquë:

—Jisa José, David yamaba chahitaxocobá. Mi ahui ti ca María biti raquëyamahuë. Espiritu Santó tsi ja tohoyamëquë. ²¹ Baquë comaxëhi quiha. Ja coquë tsi Jesu ja janëhacaxëti xo, jato jocha quima nohiria bo ja xabahamaxëhai quëshpi na. ²² Nêcapi-jayamëquë Iboba Chani jatihuahacano iquish na, naa jahuë Chani yoanish cató quënëni. ²³ Jabi ja quënëni ca tsi xo naa:

“Tohoyaxëhi quiha yoxajahini.

Tohoyaxo tsi baquë comaxëhi quiha.

Comaxo tsi Emanuel ja janëhacaxëti xo”

—nêca tsi quiha José qui ángel nêcaniquë. Noba jói tsi “No bëta xo Dios” ii quiha jahuë janë.

²⁴ Bësoso tsi quiha María José biniquë jahuë ahui iti, naa ángel yoani jascaria. Bixo tsi jahuë xobo qui ja bëniquë racati. ²⁵ Jabi jahuë ahui ya ja jobonayamani quiha jariapari jahuë baquë conox pari no. Baquë coquë tsi quiha Jesu José janënicuë.

2

Joni tiisi bo jonina Jesu jisxëna

¹ Belén tsi quiha Jesu coniquë, naa jodioba maí no. Toa mai rey Herodés yonani quiha. Toatiyá tsi quiha Jerusalén qui tres ca tiisi ca joni bo cahënicuë. Nêama, naa oriente ax ja bécani quiha. ² Cahëhax,

—¿Jahuënia ni jodioba chama-chamaria, naa cobëna cato? Jahuë huishti no jisyamëquë noba maí xo na. Ja iqui tsi ja qui arahi no joquë ra —i nohiria qui naa tres ca tiisi ca joni bo niquë.

³ Jatsi quiha shina-huëjënatsi chama Herodes niquë nicahax na. Shina-huëjëniquë Jerusalén ca nohiria ri. ⁴ Jatsi jodioba arati iboba chama bo, Dios papi cahëxëni cabo, tihi cabo Herodés quënënicuë. Quënëxaxo tsi jato ja nicaniquë:

—¿Jahuënia tsi coxëhi ni mato Cristo, naa mato Xabahamati Ibo ra? — iquiina.

⁵ Jatsi quiha ja quëbicaniquë:

—Jodioba maí tsi, naa Belén yacatá tsi ja coti xo. Tocani quiha Dios Chani yoanish cato, naa ja quënëni cató no:

6 “Jisa Belén ca nohiria bá.

Jodioba maí tsi huëstima tsi xo toa mato oquë ca yaca huëtsa bo.
Jama, oquëhuahacaxëhi quiha mato yaca ri.

Belén tsi coxëhi quiha chama-chamaria.

Noho Israél ca nohiria bo ó bëscoxëhi quiha”

ii quiha ja quënëñina —i Herodes qui jaca niquë.

7 Jatsi quiha johax ca tiisicanaibo qui chani Herodés raaniquë ja qui ja bëcano iquish na. Jamë jato bëta ja chanicasni quiha. Ja bëcaquë tsi quiha Herodés jato nicaniquë:

—¿Jënino tsi ma jisni ca huishti jisiquini? —iquiina.

8 Jatsi quiha Belén qui Herodés jato raaniquë.

—Toa baquë mërahi bocata. Tsayahax jahari ma bëcano ëa yoaxëna. Ja qui cacasquia ëa ri ja qui araxëna —i jato qui ja niquë.

9 Jatsi quiha Belén qui bocatsi quiha tiisi jaya ca joni bo niquë, Herodes nicahax na. Ja bocaquë tsi quiha jisiquitëquëñiquë huishtima, naa jato maí tsi jisiquinish ca huishti jascaria cato. Jisiquixo tsi quiha Belén qui jato ja mëpiniquë. Jatsi Baquë Jesu ini ca iti qui cahëhax huishti niiniquë. 10 Jatsi ja rani-ranicaniquë, huishti jisi na. 11 Ranihax José xobo qui ja jicocaniquë. Jicoxo baquë ico ca María ja jiscaniquë. Jatsi ja mëñicaniquë. Mëñihax ja qui ja aracaniquë. Jaquirëquë quiha jato sota bo ja pëcacaniquë, ja bëcane ca jahuë bo ja qui axëna. 12 Jaquirëquë ja namacanaí cató tsi quiha Diós jato yobaniquë:

—Jahari Herodes qui boyamacahuë —iquiina.

Jaha tsi bahi huëtsa quiha jato país qui ja bocaniquë jahari.

Egipto mai qui José, María jabanina Jesu ya

13 Tiisi ca joni bo bocaquë tsi quiha José qui ángel jisiquiniquë ja namahai cató no.

—Joihuë. Baquë pistia, jahuë jahëhua María, tihi cabo bihuë. Egipto mai qui jabatsicana. Toaparahuë. Mato ë yoano tsi jënimaxëhi quiha ma bacahaina. Mi baquë mërapaima xo Herodes pë, axëna —nëa tsi quiha José qui ángel nëcaniquë.

14 Jatsi quiha José joiniquë. Joixo Baquë, jahuë jahëhua, tihi cabo ja boniquë Egipto mai qui. Baquichá ja jisbayacani quiha. 15 Toá tsi naama tsi quiha ja chifëcaniquë. Jatsi Herodes rësoquë tsi ja bacacaniquë. Nëca tsi Dios Chani yoanish cató quënëni ca jatihuahacani quiha, “Egipto quima noho Baquë ë quënaquë” i Ibo Dios ni quëshpi na.

Herodés soldado bo raanina xocobo ati

16 Jabi tiisi jaya ca joni bá Herodes paraniquë, quinia huëtsa jato mai qui ja bacacani quëshpi na. Jatsi ja paracanaí ca cahëhax Herodes caxarianiquë. Caxaxo tsi jahuë soldado bo ja raaniquë jatiroha ca Belén ca baquë bo ati. Jasca, Belén tahë ca yaca bo qui jato ja raani quiha, toá ca baquë bo ati. Jatiroha ca baquë bo quiha, naa dos años nama cabo ja ani quiha. Jabi ja tocaniquë shinaxo na, siri tsi jahari jato mai qui tiisi jaya cabo bocani nori iqui na. 17 Jato ja quëyoquë tsi quiha Jeremías, naa Dios Chani yoanish cató yoani ca jatihuahacani quiha. Ja yoani tsi xo naa:

18 “Anomaria iqui quiha Ramá ca pacotsa.

Cohuëria xo ja ara-aracanaina ra.

Toá tsi jato xocobo quëshpi tsi arahi quiha yoxa bo.

Ranihuatimaxëni tsi xo toa jahuë nohiria, jato baquë bo acacani iqui na”
tihi tsi ii quiha ja quënëñina.

¹⁹ Jatsi Herodes rësoniquë. Ja rësoquë tsi quiha José qui Iboba ángel jisiquiniquë ja namahai cató no. ²⁰ Jisiquihax,

—Joihuë. Baquë pistia, jahuë jahëhua, tihí cabo jahari Israel mai qui bohuë. Rësoyoniquë Baquë pistia acascanish cabo ra —i José qui ángel niquë.

²¹ Jatsi quiha José joiniquë. Jesu pistia, jahuë jahëhua, tihí cabo bihax Israel mai qui ja bacaniquë. ²² Bacaxo tsi quiha Herodes yamaba baquë Arquelaó yonahai ca ja nicaniquë. Jahuë jahëpa ja ratini quiha yonaxëna. Nicañax tsi quiha José raquë-raquëniquë. Toa mai qui ja cacasyamani quiha racaxëna. Jatsi quiha ángel yobatëquëniquë ja namahai cató no, Galilea mai qui ja cano.

²³ Cahëhax Nazaret icanai ca yaca qui ja caniquë racahi na. Toa xo tsi jahuë xobo ja aniquë. Tocapijani quiha, Dios Chani yonish cató chani jatihuaxëna, naa “Nazareno ja quënahacaxëti xo” i ja ni quëshpi na.

3

Jesu quinia Juán rohahuanina

Marcos 1.1-8; Lucas 3.1-9, 15-17; Juan 1.19-28

¹ Nazarét tsi Jesu racano tsi quiha nohiria ashimanish ca Juan jisiquiniquë jodioba maí no. Xabacha xo tsi quiha Dios Chani ja yoaniquë:

²—Mato jocha quima Dios quiri bësocana. Joti basima tsi xo Diós otohaina ra —i nohiria bo qui Juan niquë.

³ Jabi nëca tsi quiha Juan yoati tsi Dios Chani yoanish ca Isaiás quënëni quiha:

“Xabacha xo tsi quënahëhi quiha joni.

Quënahi tsi ‘Rohahuahacatsicana lbo johai quëshpi na’ ixëhi quiha.

Jasca, ‘Bahí mëstë ca acana ja bax coti’ ixëhi quiha”

nëa tsi quiha ja quënëni ca niquë Juan yoati na.

⁴ Camello raní tsi quiha Juan sahuëti acacanicuë. Bichi cinturón ja chinëxëniquë. Chapo bo, bina bata, tihí cabo ja piniquë. ⁵ Jasca, jodioba maí ca nohiria tëquë Juan qui bocanicuë jahuë chani nicaxëna. Bocani quiha Jerusalén ca nohiria ri. Bocani quiha ani Jordán tapai ca nohiria. ⁶ Jasca, jato jocha ja bërohuacaquë tsi quiha ani Jordán xo tsi jato ja ashimaniquë.

⁷ Jatsi Juan qui huëstima ca jodioba chama bo bocanicuë ashimahacaxëna. Jato jisi tsi jato Juán raahaniquë:

—Jisa, rono ba baquë bá. ¿Tsohuë mato yobaha, Dios johai ca copi quima paxaxëna? ⁸ Jocha pi quima bësoquí tsi mato jabi paxa ca pari noqui jisimahuë. ⁹ Quiniacaxëcahuë. “Dios xocobo yoi bo xo noa” i ma casmitsa,

Abraham yamaba चाहितaxocobo ma nori iqui na. Mahitsa tsi xo toa ra. Jaha pi quëëquí tsi naa maxax bo jahuë xocobo yoi manëmati mëtsa xo Dios, jahuë-na bo iti. ¹⁰ Jaboquí tsi nohiria copihí quiha Dios ra. Bimi jia ca pi jihuí saihuayamano tsi rërahi quiha ibo. Rëraxo tsi chihí qui ni axëhi quiha. Jabi tocaxëqui Dios ri jabi jia ca saihuayamahai ca qui. ¹¹ Jaboquí mato jocha quima pi ma casono tsi mato ashimaxëquia jënë no. Jama, è cho joxëhi quiha èa oquë cato ra. Jahuë yonati iti mëtsama xo èa ra, èa oquëria ca ja nori iqui na. Espiritu Santo, chihí, tihí cabá tsi mato ashimaxëhi quiha ra joquí na. ¹² Nohiria yoi cabo quima jahuë xocobo yoi bo aquëxëhi quiha

Dios, naa ibobá jahuë trigo bëro aquëhai jascaria. Aquëxo jahuë nëpo niahi quiha. Jasca, jahuë xobó tsi jahuë xocobo yoi bo ó bësoxëhi quiha Dios; jama nocatimaxëni ca chihí qui niahacaxëti xo toa nohiria yoi bo, naa nëpo niahacahai jascaria —i Juan niquë.

*Juán Jesu ashimanina**Marcos 1.9-11; Lucas 3.21-22*

¹³ Jatsi ani Jordán qui Jesu joniquë Galilea mai ax na. Johax tsi quiha Juan qui ja caniquë ashimahacaxëna. ¹⁴ Jama, Juán Jesu ashimacasyamani quiha. —¿E qui johai pa? Jishopë, acasyama xo ëa ra. Ea pi mi ashimaxëti xo ra —i Juan niquë.

¹⁵ Jatsi Jesú quëbiniquë:

—Jaboqui ëa mi ashimano. Nëca ca quiniá tsi jaha Dios quëëhai ca jatihuaxëqui noa —i Jesu niquë Juan qui.

Jatsi Juán Jesu ashimaniquë. ¹⁶ Ashima-hacahax tsi quiha jënë quima Jesu tsëquëniquë. Tsëquëjano tsi quiha japëquëniquë naipa. Jatsi nai ax Dios Shina ja qui botëhai ca, naa boto jascaria, Jesú jisniquë. ¹⁷ Jatsi naipá ca joi chaniniquë:

—Noho Baquë tsi xo naa ra. Noiquia. Ja qui raniquia —iquiina.

4*Jesu tanamahacanina**Marcos 1.12-13; Lucas 4.1-13*

¹ Jatsi quiha xaba qui Espiritu Santó Jesu mëpiniquë, Satanás tanamano iquish na. ² Cuarenta bari no tsi quiha ja piyamaniquë. Paxnatsijaniquë.

³ Jatsi ja qui Satanás joniquë, jochati tanamaxëna.

—Dios Baquë pi iqui tsi maxax bo qui chanihuë, mapari ja manëcano —i ja qui Satanás niquë.

⁴ Jatsi Jesú quëbiniquë:

—“Mapari roha tsi bësoyamaxëhi quiha joni; jama Dios Chaní nori” ii quiha Quëñëhacanish cabo —i Jesu niquë.

⁵ Jatsi Jerusalén qui Satanás boniquë. Boxo tsi quiha Dios arati xobo cacha, naa jahuë quëpë tsi Jesu ja nimaniquë. ⁶ Nimahax Satanás chaniniquë:

—Dios Baquë pi iquí tsi mai quiri mimë niahuë. “Jahuë ángel bo raaxëhi quiha Dios, mi noho ja bësocano” ii quiha Quëñëhacanish cabo. Jasca, “Jato mëquënë tsi mia bëcacëceni quiha, maxaxá tsi mi tahë bo tēquëyamano iquish na” ii quiha —nëa tsi Jesu qui Satanás nēcaniquë.

⁷ Jatsi Jesú quëbiniquë:

—Jama xo. “Ibo Dios tanamayamahuë” ii quiha Quëñëhacanish cabo ra —iquiina.

⁸ Jatsi quiha maca tētëca qui Satanás Jesu boniquë maí ca país bo, jato oquë, tihí cabo ja qui jismaxëna. ⁹ Jismahax tsi quiha Jesu qui ja chaniniquë:

—Ea bësojó pi mi mënino tsi, ë qui pi mi arano tsi, naa jahuë bo tēquë mi qui axëquia ra —iquiina.

¹⁰ Jatsi Jesú quëbiniquë:

—Cata, Satanás. “Ibo Dios roha qui aracana. Ja roha nicacana” ii quiha Quëñëhacanish cabo ra —iquiina.

¹¹ Jatsi Jesu Satanás jibyaniquë. Ja caquë tsi quiha ángel bo bëcaniquë Jesu mëbixëna.

*Galilea xo tsi jahuë yonoco Jesú chitahëhuanina**Marcos 1.14-15; Lucas 4.14-15*

¹² Naatiyá tsi quiha preso qui Juan nanëhacaniquë rë. Nicaniquë Jesu. Nicahax tsi quiha jodioba mai Jesú jibyaniquë. Jibaya tsi Galilea maí qui ja bacaniquë, naa jahuë Nazarét ca xobo qui. ¹³ Jama, Nazarét ja chitëyamani quiha. Riquihax Capernaum yaca qui ja cani quiha racaxëna, naa ia Galilea

tapaí cato. Zabolón, Neftalí, tihi ca mai bo basima quiha. ¹⁴ Tocaजाquë tsi Isaiás quënëni ca jatihuahacani quiha. Jabi Isaiás quënëni ca tsi xo naa:

¹⁵ “Jisa Zabolón ca nohiria bá;

Jisa Neftalí ca nohiria bá, naa ia quinia cabo, naa ani Jordán rabëquëx ca nohiria bá.

Jisa mato Galiléa ca carayanabá.

¹⁶ Huëa-huëaria nori ca jixëqui tsëmo ó ca bësohai ca nohiria bo ra.

Rësopaoti basima ca nohiria bo qui huahuaxëhi quiha Huëa nori cato ra”
ii quiha ja quënënina.

¹⁷ Jaquirëquë Dios Chani yoatí Jesú chitahëhuaniquë:

—Mato jocha quima Dios quiri bësocahuë. Jaboqui otocatsi quiha chama-chamaria Dios ra —i nohiria bo qui ja niquë.

Joni bo Jesú quënanina jahuë rabëti bo iti

Marcos 1.16-20; Lucas 5.1-11

¹⁸ Ia Galilea quënipama tsi quiha dos ca joni bo Jesú jisniquë, naa Simón, naa Pedro quënahacani cato, jahuë noma Andrés. Jisi tsi jato ja quënaniquë. Jabi jato sani biti nishi bo niahi ja icani quiha, sani bicanaibo ja icani quëshpi na.

¹⁹ —Nëri bëcahuë. Ea ma banahuano. Joni bo bicanaibo mato manëmaxëquia —i jato qui Jesu niquë.

²⁰ Jatsi bamaxoma tsi quiha jato sani biti nishi bo, jato jahëpa, tihi cabo ja jibëriacanicuë Jesu banahuaxëna.

²¹ Riquicayá tsi quiha ori tsi dos ca joni huëtza bo Jesú jisniquë, naa Zebedeo baquë Jacobo, Jacobo noma Juan. Notí tsi jato jahëp ya ja icani quiha, jato sani biti nishi bo rohahuahi na. Jatsi Jesú jato quënaniquë. ²² Jatsi bamaxoma tsi quiha jato nishi bo, jato jahëpa, tihi cabo ja jibëriacanicuë Jesu banahuaxëna.

Galilea mai xo tsi Dios Chani Jesú yoanina

Lucas 6.17-19

²³ Jatsi quiha Galilea mai tëquë tsi Jesu coniquë, Dios Chani yoahi na. Jodioba catiti xobo xo tsi ja tiisimabonani quiha. “Nohiria bo otocatsi quiha Dios ra” i ja ni quiha Chani jia ca yoahi na. Jasca, iquicanaibo, isicanaibo, tihi cabo ja jënimahuabonanicuë, Dios Chani yoaquí na. ²⁴ Jatsi ja ani iqui tsi chani pacananicuë ja yoati na. Siria maí tëquë tsi toa chani pacanani quiha. Jatsi iquicanaibo, isicanaibo, yoshi jaya cabo, yoyo jaya cabo, mohitimaxëni cabo, tihi cabo Jesu qui nohiria bá bëniquë jënimahuahacacano. Jatsi jato ja jënimahuaniquë ra. ²⁵ Jasca, nohiria miscó Jesu banahuaniquë ra. Galiléa ca nohiria, Diez Yacatá ca nohiria, Jerusalén ca nohiria, jodioba maí ca nohiria, ani Jordán rabëquëx ca nohiria, tihi ca nohiriá banahuani quiha ra.

5

Jesú yobanina

¹ Nohiria misco jisi tsi maca चाहितaxëni Jesu tëmahinanicuë. Tëmahinahax tsi quiha ja tsahoniquë. Jatsi jahuë rabëtiria bo ja qui quëtsoniquë jahuë chani nicaxëna. ² Jatsi jato tiisimati ja chitahëhuaniquë. Ja nëcaniquë:

Shoma ca nohiria

Lucas 6.20-23

³ —Shoma tsi xo toa Dios jabi ja nariscanai ca cahëxëni cabo.

Jató-na xo Dios. Jato otoxëhi quiha.

⁴ Shoma tsi xo toa cohuë cabo.

Jato bēpasimaxēhi quiha Dios ra.

5 ‘Shoma tsi xo toa shinapēnicanaibo.

Naa mai tēquē ibohuacaxēcani quiha.

6 ‘Shoma tsi xo toa Dios mēstē ó quēēcanaibo.

Jato ranihuaxēhi quiha Dios.

7 ‘Shoma tsi xo toa nohiria huētsa bo mēbicanaibo.

Jato mēbixēhi quiha Dios.

8 ‘Shoma tsi xo toa shinajixēni jaya cabo.

Dios jiscaxēcani quiha.

9 ‘Shoma tsi xo toa iquinacasyamacanaibo.

Dios baquē bo quēnahacacaxēcani quiha.

10 ‘Shoma tsi xo toa tēnēmahacacanaibo jia ca ja acanai quēshpi na.

Jató-na xo Dios. Jato otoxēhi quiha.

11 ‘Shoma xo mato, ēa iqui tsi nohiria bá mato ocahuquē no, mato ja yosicaquē no, mato ja quiahuacaquē no. ¹² Rani-ranicana, anomaria ca copi mato bax janahacaxēhai quēshpi na. Jabi toca tsi mato rēquē ca Dios Chani yoanish cabo tēnēmahacani quiha jato ri.

Chopara, huēana, tihí cabo jascaria xo chahahuacanaibo

Marcos 9.50; Lucas 14.34-35

13 ‘Chopara jascaria xo mato, maí ca nohiria bo oquēhuati. Jabi jahué tēē bēnopihí tsi anoma xo toa chopara ra. ¿Jēnahuariaxo ja tēēhuahacatēquēna ra? (Jascaria, mato jabi jia ca pi ma bēnono tsi ¿jēnahuariaxo raca maí ca nohiria bá ēa cahēna?) Chopara yoi ca jascaria ma niahacaxēti xo pē, mahitsa ma nori quēshpi na.

14 ‘Huēa jascaria xo mato, maí ca nohiria bo huēahuati. Jabi jonētimaxēni tsi xo tēmachí ca yacata. Baquichá tsi bēroria tsi xo jahué pēxē bo. ¹⁵ Jascaria, mato pēxē tsamaxo tsi caca namá janayamaqui mato. Jama, mana, naa jahué iti ó janaqui mato, xobó ca nohiria bo tēquē bax huahuati. ¹⁶ Jasca, nohiria bo bēsojó tsi huahuapaima xo mato jabi jia cabo, ma acai ca ja jiscano iquish na. Jisí tsi mato mana ca Jahēpa oquēhuacaxēcani quiha.

Jatihuahacaxēhi quiha Quēnēhacanish cabo

17 ‘¿Quēnēhacanish cabo niahi ē joni pa? Iyamaquia ra. Quēnēhacanish cabo jatihuahi ē joquē ra, niahi mari. ¹⁸ Mato parayamaquia ra. Niahacapistiariayamaxēhi quiha Quēnēhacanish cabo ó ca huēsti ca yoba pistia ra. Jatihuahacaxēhi quiha jahué yoba tēquē. ¹⁹ Quēnēhacanish cabo ó ca yoba iriama ca pi nicayamahi tsi oquēyamaxēhi quiha toa nohiria ra, Dios otohái cató no. Jasca, “Mahitsa tsi xo toa yoba” i pi nohiria huētsa qui ja no tsi chama-chamaria Dios qui yoixēhi quiha ja ocahaina. Mana tsi iriamaxēhi quiha toa ocahái cató ra. Jama, Quēnēhacanish cabo ó ca yoba bo pi nicahi tsi huētsa bo pi nicati tiisimahi tsi, oquē-oquēriaxēhi quiha toa nohiria ra, Díos otohái cató no. ²⁰ Japi mato parayamaquia. Dios Chani cahēxēni cabo, fariseobo, tihí cabo pi mato mēstē huinoyamano tsi Díos otohái ca qui jicopistiayamariaxēqui mato ra.

Caxahaina

Lucas 12.57-59

21 “ ‘Joni bo ayamahuē. Namēhacaxēti xo tsohuēcara ca joni huētsa acaxato” i mato naborēquēbo qui Moisés yoba ni quiha. ²² Jama, mato qui ē yoahai ca tsi xo naa ra: Copihacaxēti xo tsohuēcara ca jabé xatē qui caxahái cató ra. Jabé xatē pi pasomaha chanihi tsi chama, naa juez qui ja bēhacaxēti xo copihacati. Jabi tēnētiya qui niahacati basima tsi xo toa tsohuēcara ca

jabê xatê qui “Yoyoxëni xo mia pë” iquii cato. ²³⁻²⁴ Japi mabê xatê bo ya rabêneparicana, Díos qui arahi bocanox pari. Jama, Díos xobo xo pi mato qui caxa ca xatê shinaquí tsi Díos qui ma acatsai ca jahuê janaparicahuê. Jariapari mato qui caxa ca xatê qui bocata. Mabê xatê ya ma rabêneparino ra, Díos qui aranox pari. Rabênahax jahari Díos xobo qui bocata araxëna, ma bêha ca jahuê ja qui axëna.

²⁵ Tsohuêcara pi mato pasomaha-no tsi mëri tsi ja bêta rabênacana. Bamayamacana. Tocacana, gobierno chama bo qui mato ja mëayamano, copihacati. Tocapijano tsi preso qui ma niahacamitsa ra. ²⁶ Toá quima ma tsëquënox pari tsi toá cuenta pari jatihuaxëqui mato iquia.

Anoma ca jocha

²⁷ “Bënë jaya ca yoxa biyamacahuê” mato rëquëyamabo yoahacani quiha. Jabi toa yoba ma niaquê ra. ²⁸ Jama, jahuê bëro yoi pi bënë jaya ca yoxa tsayahi tsi ja bêta jochahi quiha bicatsai ca nohiria jahuê shina ó no. Ja bêta jobonahai jascaria tsi xo toa ja acaina. ²⁹ Jabi mato oquê ca bëro pi mato jochamano tsi toa bëro tsëcacahuê. Niacahuê. ¿Oquëyamayamahi ni mato bëro pistia bënöhaina, tënëtiya qui mato yora tëquê niahacayamano iquish na? ³⁰ Mato oquê ca mëquënë pi mato jochamano tsi toa mëquê mëxtëquëcahuê. Mëxtëquëxo tsi niacahuê. ¿Oquëyamayamahi ni mato mëquê bënöhaina, tënëtiya qui mato yora tëquê niahacayamano iquish na?

Ahui niahaina

Mateo 19.9; Marcos 10.11-12; Lucas 16.18

³¹ Jasca, “Ahui pi niaquí tsi ja qui niati papi bënë ati xo” ¿i mato naborëquëbo qui Moisés yamayamani? ³² Jama, ë yoahai ca tsi xo naa: Anoma tsi xo bënë jahuê ahui niahaina iquia ra. Mahitsa pi jahuê ahui, naa joni huëtsa ya jobonayamahai ca ahui niaquí tsi jahuê ahui jochamahi quiha pë, bënë huëtsa ja biquê no. Jascaria, jochaxëhi quiha jahuê ahui bichi ca joni ri.

Parayamahai ca chani

³³ Jabi mato naborëquëbo yoahacani ca yoba bo ma nicaniquê iquia. “Dios bax toa axëquia ra” i pi ma no tsi mato chani jatihuacana. “Anomá tsi xo toa ma ayamahaina tocaquí na” ii quiha Díos yoba ra. ³⁴ Jatsi, ë yoahai ca tsi xo naa: Oquê tsi xo toa ma bëpahaina. Jasca, Díos bësojo xo tsi jurar-ayamacana, “Axëquia ra” i nohiria qui ma quê no. Jasca, “Naipá tsi parayamaquia, axëquia ra” i nohiria qui yamacana, ma quëbiquê no. Díos yonahai iti tsi xo toa ra. ³⁵ Jascaria, “Noba maí tsi parayamaquia; axëquia ra” iyamacana, ma quëbiquê no, Ibo Díos mai ja nori iqui na. Jasca, “Jerusalén tsi parayamaquia” iyamacana, noba chama-chamaria yaca ja nori quëshpi na. ³⁶ Jasca, “Noho mapó tsi parayamaquia” iyamacana. ¿Jënahuariaxo mato boo chëquê ma joxohuana? ³⁷ Jama, “Axëquia, ayamaquia” tihí roha ca icana, ma quëbiquê no. Jahuêcara huëtsa pi ma yoano tsi Yoshi quima tsi xo toa ma yoahaina ra.

Jahari nohiria copihaina

Lucas 6.29-30

³⁸ Jabi mato naborëquëbo yoahacani ca yoba ma nicaniquê iquia. “Nohiria huëtsa bëro quëshpi tsi jahuê bëro yoi copihacaxëti xo; jasca, nohiria huëtsa xëta quëshpi tsi jahuê xëta yoi copihacaxëti xo” i mato yoba ni quiha. ³⁹ Jama, ë yoahai ca tsi xo naa: Yoixëni ca joní pi mato yosino tsi jahari iquinayamacana iquia. Tsohuêcaracá pi mato tapaishano tsi caxayamacana. Ja qui mato tamo huëtsa acana tapaishahacati. ⁴⁰ Jasca, mato camisa pi

biriacasquí tsi mato saco ri ja bino. ⁴¹ Jasca, huësti kilómetro pi soldado bá jato sota bo mato papimano tsi kilómetro huëtsa jato bax ma bocano jato mēbixēna. ⁴² Jasca, tsohuēcaracá pi mato jahuēcara bēnariano tsi ja qui acahuē. Tsohuēcaracá pi mato jahuēcara tanacasno tsi ja qui prestahuahacahuē. Tihi tsi xo toa noho yoba ra.

Noqui pasomaha cabo no noihaina

Lucas 6.27-28, 32-36

⁴³ ‘Jabi mato naborēquēbo yoahacani ca yoba ma nicaniquē iquia, naa “Mato rabēti bo noicahuē; jama, mato pasomaha cabo qui caxacahuē” iquiina. ⁴⁴ Jama, mato qui ē acai ca yoba tsi xo naa: Mato pasomaha cabo noicahuē iquia. Jasca, mato yosicanaibo bax bēhoxcana ra. ⁴⁵ Tocapiquí tsi mato naipá ca Jahēpa baquē bo ma nori ca jismaxēqui mato ra. Jatiroha cabo mēbihi quiha Dios. ¿Jiaxēni cabo, yoixēni cabo tēquē, tihi cabo qui huahuayamayamahi ni jahuē bari ra? Jasca, jia ca acanaibo, anoma ca acanaibo, naa jatiroha cabo qui oi paquēmahi quiha. ⁴⁶ Mato rabēti bo roha pi noihi tsi ¿jēnahuarihax nohiria huētsa ma oquēna? Tocapimano tsi ¿mato copixēhi ni Dios pa? ⁴⁷ Jasca, mato rabēti bo roha pi mēbihi tsi ¿nohiria huētsa oquē ni mato pa? Iyamaqui mato ra. Tocacani quiha Dios cahēyamacanaibo ri. ⁴⁸ Jatsi quēsotimaxēni ca jabi ma jayati xo, naa mato naipá ca Jahēpá-na jascaria. Tihi tsi xo toa noho yoba ra.

6

Nohiria ma mēbiquē no

¹ ‘Quiniacaxēcahuē. Nohiria bēsojo xo tsi mato yonoco jia bo ma ayamati xo iquia. Tocapimano tsi mato copiyamaxēhi quiha mato naipá ca Jahēpa. ² Japi noitiria ca nohiria pi mēbiquí tsi no bēpati xo. “Jia tsi xo toa ē acaina ra” iyamacana nohiria bo qui, naa fariseobo jascaria. Anoma quiha. Jabi nohiria bo bēsojo xo tsi tocacani quiha pē, nohiria bá jato oquēhuano iquish na. Jatsi shina-bēnoyamacana. Copihacacahi quiha, nohiria bá jato oquēhuaquē no. Mana ca copi biyamacaxēcani quiha ra. ³ Jama, noitiria ca nohiria pi mēbiquí tsi no bēpaxēti xo, mato rabētiria bá ma acai ca cahēyamano iquish na. ⁴ Jonē tsi mato yonoco jia bo ma ano. Jatsi, mato copixēhi quiha Dios ra, jatiroha ca jahuē bo jisi na.

Dios qui bēhoxhaina

Lucas 11.2-4

⁵ ‘Dios qui bēhoxhi tsi paraxēni ca fariseobo jascayamacana. Nohiria bo bēsojó, naa jodioba catiti xobo bo, bahi bo, tihi cabá tsi Dios qui bēhoxcascani quiha pē, nohiria bá jato jisno iquish na. Jato copi ja bicaquē iquia. Mana ca copi biyamacaxēcani quiha. ⁶ Jama, bēhoxhi tsi mato naquētē qui mamē jicocahuē. Jicohax caiti japacahuē, nohiria bá mato jisyamano iquish na. Toá tsi Dios qui bēhoxcana, mamē no. Jonē pi bēhoxmano tsi mato copixēhi quiha, ma acai ca jonē ca jahuē bo jisquí na. ⁷ Jasca, Dios qui bēhoxhi tsi mahitsa ca chani iroha-irohayamacana. Tocacani quiha Dios cahēyamacanaibo. Jato chani tētēca iqui tsi Diós jato nicahai ca quēscahuacani quiha. ⁸ Jabi jaha ma quēēhai ca cahēhi quiha mato Jahēpa, ma bēnanox pari no. ⁹ Japi nēca tsi bēhoxcana:

“Oquēhuahacaxēti xo mi janē,
noba naipá ca Jahēpá” icana.

¹⁰ “Nohiria bo mi ototsano.

Mai xo tsi mi shina mi ano,
naipa xo mi acai jascaria.

¹¹ Jatiroha ca bari oriquiti noqui ana.

¹² Noba jocha mi shina-bënono,
noqui pasomaha jochacanaiba jocha no shina-bënohai jascaria.

¹³ Jochati no tanamahacayamano.

Yoixëni cato chamá quima noqui mi tsëcano” tihi tsi nëcacana bëhoxhi na.

¹⁴ ‘Huëtsa ba jocha pi ma shina-bënono tsi mato jocha ri shina-bënoxëhi quiha Dios ri. ¹⁵ Jama, huëtsa ba jocha pi ma shina-bënoyamano tsi mato jocha shina-bënoyamaxëhi quiha Dios ri.

Samahai ca jabi Jesu chaninina

¹⁶ ‘Samaquí tsi bëmána cohuëria cabo jayamacana, naa paraxëni ca fariseobo jascaria. Bëcohuëhuacani quiha pë, nohiria bá ja samacanaí jisno iquish na. Shina-bënoyamacana; jato copi ja bicaquë ra. Mana ca copi biyamacaxëceni quiha. ¹⁷ Jama, samahi tsi bëchococahuë. Bohuëxichahuë.

¹⁸ Tocapimano tsi ma samahai ca cahëyamacaxëceni quiha nohiria ra. Cahëxëhi quiha mato Jahëpa roha, jatiroha ca jonë ca jahuë bo cahëquí na. Mato copixëhi quiha.

Mana ca copi

Lucas 12.33-34

¹⁹ ‘Naa mai xo tsi copixëni ca jahuë bo catiayamacana mato bax na. Naamayamacaxëceni quiha naa maí ca jahuë bo ra. Mëri tsi quëyohacacahi quiha, naa raiti jotoró pihai jascaria. Jascaria, ja yomahacacamitsa. ²⁰ Jama, naipá ca jahuë bo ma catiapaima xo. Toá tsi naamacaxëceni quiha. Quëyohacatimaxëni xo toá cabo. Jasca, yama tsi xo toa mana ca yomaxëni cato.

²¹ Japi maí ca jahuë bo pi ó quëërohaquí tsi Dios noiyoiyamaquí mato iquia. Jama, mana ca jahuë bo pi ó quëëquí tsi Dios noiyoiqui mato ra.

Shina jia ca no jayati xo

Lucas 11.34-36

²² ‘Jabi lamparina jascaria xo mato shinana. Mato quinia qui huahuahi quiha mato shinana, jënima ja iquë no. Jaha tsi jabi jiá ca jayaxëqui mato.

²³ Jama, shina yoi pi jayahi tsi tsëmo ó tsi bohoxëqui mato rë. Jabi mato shina jia ca pi tsëmonano tsi anomaria tsi xo toa tsëmo ra. Tsëmo-tsëmoría tsi xo rë.

Dios — Parata

Lucas 16.13

²⁴ ‘Dos ca chama bo jayatimaxëni tsi xo nohiria ra. Huësti chama qui caxaxëhi quiha; chama huëtsa noijahuanori. Huësti chama bax yonocoriaxëhi quiha; chama huëtsa chahahua-yamajahuanori. Japi, ¿jënahuariahax Dios bax ma yonocona, parata noihi na? Dos ca ibo jayatimaxëni xo mato ra — i jato qui Jesu niquë.

Jahuë baquë bo ó bësohi quiha Dios

Lucas 12.22-31

²⁵ Jabi jahuë rabëti bo Jesú yoani tsi xo naa:
—Oriquiti yoati tsi shina-huëjëyamacana. Jasca, mato yora sahuëhai ca sahuëti bo shina-huëjëyamacana. ¿Jabi oriquiti oquë ma ni ma bësohaina? Jasca, ¿sahuëti oquë ma ni mato yora? ²⁶ Naipá ca isa bo tsayacahuë; bëro banayamacani quiha ra. Bëro tësayamacani quiha. Jasca, yama tsi xo toa jato xobo qui nanëhaca ca bimi ra; jama, jari jënima jaca nori. Jato pimahi quiha mato naipá ca Jahëpa ra. ¿Japa? ¿Isa bo oquë ma ni mato ri ra? ²⁷ Jasca,

¿jēnahuariaxo raca ja bēsohai ca año bo joní huinomana, ja shina-huējēhai cató no ra? Jatsi shina-huējēyamacana ma bēsohai yoati na.

²⁸ ‘¿Jēniriahax sahuēti bo shina-huējēcanai ra? Huasi joa jiaxēni cabo qui tsayacahuē. Yonocoyamacani quiha ra. Jasca, sahuēti bo ayamacani quiha ra. ²⁹ Jama, rico inish ca Salomón yamaba sahuēti oquē-oquēria tsi xo naa joa bo sahuēcanaina iquia. ³⁰ Jabi Dios tsi xo toa naa joa bo sahuēmahaina, naa naamayamahi ca joa bo ra. Tocapiquí tsi ¿tonia mato sahuēmamayamaxēhi ni Dios ra? Iriama tsi xo toa ma chitimihaina rē. ³¹ Japi shina-huējēyamacana. “¿Jahuē pixēhi ni noa rē?” iyamacana. “¿Jēnē axēhi ni noa ra?” iyamacana. Jasca, “¿Jahuē sahuēxēhi ni noa rē?” iyamacana. ³² Piti, jēnē, sahuēti, tihí cabo shina-huējēcani quiha Dios cahēyamacanaibo. Jaha quēēriacani quiha. Jama, mato otoi quiha mato Jahēpa, ma narisyamano iquish na. ³³ Jatsi mato Chama-chamaria pari shinacana. Jaha ja quēēhai ca jabi jia ca ó quēēcana. Tocapimano tsi naa jahuē huētsa bo tēquē mato qui axēhi quiha. ³⁴ Japi, shina-huējēyamacana huēaquē yoati na. Huēaquē tsi tobixēhi quiha noqui yosihai ca jahuē huētsa bo tonia. Japi jaboqui tsi huēaquē ca noqui yosihai ca jahuē bo yoati no shina-huējēnyamano.

7

Ranimisyamacana

Lucas 6.37-38, 41-42

¹ ‘Ranimisyamacana, Diós mato raniyamano iquish na. ² Ranipimahuano tsi nohiria ma ranihai jascaria ca quiniá tsi mato ranixēhi quiha Dios ri. Jasca, nohiria pi ma shomahuano tsi jascaria ca quiniá tsi mato shomahuaxēhi quiha Dios. Toa tsi xo toa Dios medida ra. ³ Jama, anoma ca mabē xatē bá acai tsayacasqui mato pē, ja qui quēsocasquí na. Mato qui bēroria tsi xo toa mabē xatē jocha; bēroma mató-na nori. ¿Jocha yama ni mato pa? ⁴ ¿Jēniriahax raca “Mía mēbixēquia, yoi ca mi ayamano iquish na, ēbē xatē bá” i ma na, oquē ca yoi ca ma aquē no? ⁵ Jariapari tsi toa yoi ca ma acai ca niaparicahuē, quiaxēni cabá. Niahax tsi mabē xatē mēbiti mētsaxēqui mato ra.

Dios Chani nicacasyamacanaibo

⁶ ‘Dios Chani ayamacana nicacasyamacanaibo qui. Quiniacaxēcahuē. Ina jascaria tsi mato qui ja tsamicamitsa mato axēna. Jasca, Dios copixēni ca Chani jato qui ayamacana. Aapimahuano tsi yahua jascaria tsi ja yoshihuacamitsa. Yoshihuahax mato quiri ja bēsocamitsa mato axēna.

Bēhoxcana

Lucas 11.9-13; 6.31

⁷ ‘Dios qui bēhoxquí tsi bēnacana; mato qui acacaxēhi quiha. Jasca, mēracana. Mēraquí tsi bixēqui mato ra. Jasca, quēnacana; mato bax japēchacaxēhi quiha jahuē caiti. ⁸ Bēnahai ca qui acacaxēhi quiha. Bixēhi quiha mērahai cato. Jasca, japēchacaxēhi quiha jahuē caiti, tsohuēcara ca quēnahai ca bax na.

⁹ ‘¿Mato baquē qui maxax acaxēcanai pa, mapari ja bēnaquē no? ¹⁰ Jasca ¿rono ja qui acaxēcanai pa, sani mato qui ja bēnaquē no, piti? Ayamaqui mato ra. ¹¹ Mato xocobo qui jahuē jia bo ati cahēxēni xo mato, jochacanaibo ma iquē ri. ¿Jabi toca ma ni mato naipá ca Jahēpa ri? ¿Bēnacanaibo qui jahuē oquē ca jahuē bo ayamamayamaxēhi ni? Axēqui ra.

¹² Jabi mato qui jia tsi xo nohiria mato mëbihaina. Japi mato qui jia ca quinia tsi nohiria ma mëbiti xo mato ri. Toca tsi noqui yobahi quiha Dios Chani ra.

Caiti natsëo cato

Lucas 13.24

¹³ Caiti natsëo nacocahuë. Chahitaxëni tsi xo toa tënëtiya qui mëpihai ca caiti ra. Huëstima cabo tsi xo toa ja qui jicocanaibo rë. ¹⁴ Jama, natsëo ca tsi xo toa bëso-bësopaoti mëpihai ca caiti ra. Bëronoma xo toa quinia. Ichariama tsi xo toa ja qui jicocanaibo rë.

Mahitsa ca chani jaya cabo

Lucas 6.43-44

¹⁵ Mahitsa ca chani yoacanaibo quiniacaxëcahuë. Jia tsi mato qui bëcani quiha, cacatimaxëni ca oveja jascaria; jama, cama jascaria jaca nori.

¹⁶ Jato yoi ca jabi jisquí tsi jato cahëxëqui mato ra. Jabi bimi jia ca saihuatimaxëni tsi xo isnëpa ra. Jascaria tsi, jabi jia ca saihuatimaxëni tsi xo toa jabi yoi ca nohiria ri. ¹⁷ Jabi bimi jia ca saihuahi quiha jihui jia cato. Bimi yoi ca saihuahi quiha jihui yoi cato. ¹⁸ Jascaria tsi, jabi jia ca roha saihuahi quiha joni shinajiaxëni cato. Jënahuariaxo raca jabi jia ca joni shina yoi ca jaya cató saihuana? ¹⁹ Japi bimi jia ca pi jihui saihuayamano tsi toa rërahi quiha ibo. Rëraxo tsi chihi qui niahi quiha. ²⁰ Jabi toca tsi mahitsa ca chani yoacanaibo cahëxëqui mato pë. Jato yoi ca jabi bá tsi cahëhacaxëcani quiha.

Diós otohái ca qui jicoyamaxëhi quiha jatiroha cabo

Lucas 13.25-27

²¹ Jabi Diós otohái ca qui jicoyamaxëhi quiha jatiroha ca “Ibo, Ibo” ëa quënahai cato. Noho naipá ca Jahëpa yoba nicahai ca roha tsi xo toa ja qui jichahaina. ²² Toa copiti barí tsi è qui bëcaxëcani quiha huëstima ca mahitsa ca chahahuacanaibo. Toa barí tsi “Huëtsa bo qui mi chani no yoaniquë, Ibobá” icaxëcani quiha pë. Jasca, “Mi janë tsi yoshi bo no tsëcaniquë, Ibobá” icaxëcani quiha pë. Jasca, “Mí janë tsi huëstima ca jisti bo no aniquë ra” icaxëcani quiha huëtsa bo. ²³ Jama, bëroria tsi jato quëbixëquia, “Mato cahëpistiayamariaquia. Ea basicahuë, anoma ca acanaibá” iquiina.

Dios xobo bo

Lucas 6.47-49; Marcos 1.22

²⁴ Jabi tiisi tsi xo toa tsohuëcara ca noho yoba chahahuahai cato, nicaxo na. Maxax cacha ca xobo rohahuahai ca joni iquiria xo. ²⁵ Poxoyamahi quiha ja aca ca xobo ra. Johi quiha oi-oiria. Baihi quiha jënë. Xotoriahi quiha yoshini. Jahuë xobo pasomaha choshahi quiha. Jama, poxoyamahi quiha jahuë xobo, maxax cacha ja rohahuahacani igui na. ²⁶ Jasca, tobi toa yoyoxëni ca joni ri. Noho yoba chahahuayamahi quiha, nicaxo na. Mashënë cacha xobo acai ca joni jascaria xo. ²⁷ Jatsi johi quiha oi-oiria. Baihi quiha jënë. Xotoriahi quiha yoshini. Xobo pasomaha choshahi quiha rë. Jatsi poxohi quiha. Anomaria tsi xo toa ja poxohaina ra —tíhi tsi Jesú yoaniquë tiisimahi na.

²⁸ Ja chanihai ca Jesú jatihuaquë tsi quiha quëtsonish ca nohiria ratëniquë ja tiisimahi ca qui. ²⁹ Jasca, chama jaya ca joni jascaria tsi jato ja tiisimani quiha, jodioba yoba cahëxëni cabo jasca ja nomari.

8

Leproso ca joni Jesú jënimahuanina
Marcos 1.40-45; Lucas 5.12-16

- ¹ Jabi maca ax Jesu rënichiquë tsi quiha huëstima ca nohiriá banahuaniquë.
² Jatsi ja qui joniquë noitiria ca joni, naa leproso bichi jaya cato. Bonohuaxëni ca joni ja ini quiha. Basimahax Jesu bësojó tsi quiha ja mëniniquë. Mënihax,
 —Aapicatsaii tsi ëa jënimahuati mëtsa xo mia ra, Ibobá —i Jesu qui ja niquë.
³ Jatsi quiha Jesú joni motsaniquë jahuë mëquënë no. Motsahax ja qui ja chaniniquë:
 —Mia jënimahuacasquia ra. Jënima xo mia ra —iquiina.
 Jatsi quiha jahuë bono tapoyotapiniquë ra. Jënima jahuë bichi ini quiha.
⁴ Jatsi Jesú joni yobaniquë:
 —Jënipimiha ca huëtsa bo qui yoayamahuë. Bamaxoma tsi arati ibo qui pari mimë jismata. Moisés yoani ca ja qui ahuë tëpas-hacati, mi bahuëhai quëshpi na. Tocapimino tsi jënima mi nori ca cahëcaxëceni quiha nohiria —nëa tsi quiha Jesu nëcaniquë.

Romanoba capitán yonati Jesú jënimahuanina
Lucas 7.1-10

- ⁵ Jaquirëquë quiha Capernaúm ca yaca qui Jesu jiconiquë. Ja jicoquë tsi quiha ja qui caniquë romanoba capitán. Caxo tsi quiha Jesu ja bënarianiquë:
⁶ —Noitiria tsi xo noho yonati. Xobó raca quiha. Anoma quiha. Mohitimaxëni xo rë —i Jesu qui capitán niquë.

⁷ Jatsi,

—Mi baquë jënimahuahi caxëquia ra —i Jesu niquë ja qui.

⁸ Jatsi quiha capitán quëbiniquë:

—Noho xobo qui mi jicoyamano, taitá, anoma ca ë nori quëshpi na. Jama, nëa ax rohari pi mi chanino tsi jënimaxëhi quiha noho yonati ra. ⁹ Jabi ëa oquë ca chama bo nicati cahëquia ra, ëa ja yobacaquë no. Jasca, ëa nicahi quiha noho soldado bo ri. Jabi huësti soldado qui “Cata” i pi ë no tsi caqui ra. “Johué” i pi huëtsa qui ë no tsi johi quiha. “Tocahuë” i pi noho yonati qui ë no tsi ahi quiha —nëa tsi quiha Jesu qui capitán nëcaniquë.

¹⁰ Jatsi Jesu ratëniquë, capitán quëbihaca nicahax na. Jesu qui jia ini quiha ja chanihaina ra. Jatsi banahuacanaibo qui Jesu chaniniquë:

—Mato parayamaquia. Anomaria tsi xo naa carayana chitimihaina ra. Jodiobá mai tëquë ó yama tsi xo nëca ca jodio chitimihai ca jasca cato rë.

¹¹ Jaroha ca barí tsi bëcaxëceni quiha carayanabo jatiroha ca mai iti ax na. Abraham, Isaac, Jacob, tihí cabo ya tsi tsahocaxëceni quiha jato ri, Diós otohái cato xo tsi pixëna. ¹² Jama, tsëmo qui niahacaxëceni quiha mato Israël cabo, naa Diós otohái ca qui jicoti iquish cabo. Toatsixëhi quiha araconahaina, tënëhaina ra —nëa tsi quiha Jesu nëcaniquë nohiria bo qui.

¹³ Jatsi quiha capitán qui Jesu chaniniquë:

—Cata. Mi chitimihai iqui tsi jënimaxëhi quiha mi yonati —i capitán qui ja niquë.

Jabi toa horá tsi jahuë yonati jënimahua-tapihacani quiha.

Pedro raisi Jesú jënimahuanina
Marcos 1.29-31; Lucas 4.38-39

- ¹⁴ Jatsi quiha Pedro xobo qui Jesu caniquë. Toa xo tsi quiha jahuë raisi ja jisniquë, naa jahuë ahuiní jahëhua. Iquihi quiha. Oxati raca ja ini quiha jahuë huao iqui na. ¹⁵ Jatsi jahuë mëquë Jesú motsaniquë. Janacatapiniquë jahuë iquini ra. Joixo tsi Jesu oriquti ja taaniquë pa.

Huëstima ca iquicanaibo Jesú jënimahuanina
Marcos 1.32-34; Lucas 4.40-41

16 Bari caquë tsi quiha Jesu qui nohiria bëcaniquë. Ja qui yoshi jaya ca nohiria ja bëcani quiha ja jënimahuano. Jatsi jahuë chani roha tsi jato yoshi bo ja tsëcani quiha. Iquicanaibo tëquë ja jënimahuani quiha. 17 Nëca tsi Isaias yamabá yoani ca jatihuahacani quiha, naa “Noqui iquicanaibo jënimahuahi quiha. Noqui noitiria cabo mëbihi quiha” iquiina.

Jesu banahuacascanaibo

Lucas 9.57-62

18 Ja qui nohiria huëstima ca quëtsohai ca jisi tsi quiha jahuë rabëti bo ja yobaniquë, ia rabëquëx ca qui ja bocano. 19 Toá tsi quiha yoba cahëxëni ca joni Jesu qui joniquë. Johax,

—Mia banahuacasquia, ëa ri ra. Jahuëcara qui mi cahai cató tsi mia banahuaxëquia ëa ri —i Jesu qui ja niquë.

20 Jatsi Jesú quëbiniquë:

—Jato quini bo jaya xo bocacamano, racati. Jasca, jato naha jaya xo isa bo ri. Jama, racati xobo yama ca ëa xo naa, naa nai ax johax cato —iquiina.

21 Jatsi Jesu banahuahai ca joni huëtsa chaniniquë:

—Mia banahuacasquia, Ibobá. Jama, jariapari noho jahëpa ë maihuati xo. Rësopaimaria xo ra —i Jesu qui ja niquë.

22 Jatsi quiha,

—Jaboqui ëa mi banahuano ra. Dios cahëyamacanaibá jato nabo maihuano —i ja qui Jesu niquë.

Yoshini, choca, tihi cabo Jesú janacamanina

Marcos 4.35-41; Lucas 8.22-25

23 Jatsi noti qui Jesu jiconiquë. Jicoxo jahuë rabëti bo yaxo ia shitatsi-jahuaniquë. 24 Jatsi quiha xotoriatsi yoshi niquë ra. Anomaria choca ini quiha. 25 Jatsi Jesu bësomahi ja bocaniquë. Bësomahax,

—Noqui mëbihuë, Ibobá. Jëtëquëqui noa ra —i Jesu qui jaca niquë.

26 Jatsi quiha,

—¿Jëniriahax raquëcanai pa? Iriama tsi xo ë qui ma chitimihaina rë —i jato qui ja niquë.

Jatsi quiha Jesu joiniquë. Joihax yoshini, ia, tihi cabo qui ja chaniniquë, ja janacacano. Jatsi ia, yoshini, tihi cabo janacanicuë ra. Pasi ja ini quiha.

27 Jatsi ratënicuë joni bo.

—¿Jahuë joni ni naa sa? Ja qui nicahi quiha yoshini pa. Jasca, ja qui nicahi quiha ia ri ra —i jaca ni quiha Jesu yoati na.

Dos ca yoshi jayanish ca joni bo Jesú jënimahuanina

Marcos 5.1-20; Lucas 8.26-39

28 Ia shitahax tsi quiha Gadara icanai ca mai qui Jesu cahënicuë. Toá tsi quiha dos ca noiti ca joni bo iniquë, naa yoshi jaya cabo. Nohiria maihuahacanicuë ca quini quima ax ja bëcaniquë, Jesu bëchaxëna. Jabi jato yoshi iqui tsi caxaxënicuë naa dos ca joni bo ini quiha. Ja iqui tsi toá tsi jato bahi tsi nohiria bohoyamani quiha, raquëhi na. 29 Jatsi Jesu qui quënatu quiha jahuacanicuë:

—¿Jënixo tsi noqui huënahuahai, Dios Baquë? ¿Noqui copihi mi joha rë? Jari noqui tënëtiya xaba ma xo naa ra. Tonia jari rëquë quiha —i Jesu qui jaca niquë.

30 Jabi basima tsi quiha yahua jinaya pihi ini quiha. 31 Jatsi Jesu bënëariatsi yoshi bá huaniquë toa yahua jinaya qui ja raahacacano.

—Naa joni bo pi jënimahuacasquí tsi toá ca yahua jinaya qui noqui raahuë —iriatsi-janicuë.

³² Jatsi,

—Bocata —i jato qui Jesu niquë.

Tsëquëyoquë yoshi bo ra. Tsëquëhax tsi quiha yahua jinaya qui ja jico-caniquë. Jatsi jabatapitsi quiha yahua tirixëni niquë. Maca ax rënichihax ia qui ja paquëyocaniquë, jabahi na. Ja nëachiyocaniquë ra.

³³ Jatsi yahua jinaya obëso cabo yaca qui jabayoniquë, tsayahax na. Toa xo tsi quiha ja jiscani ca ja yoacaniquë. ³⁴ Jatsi quiha toa yacatá ca nohiria bëyocaniquë, Jesu ini ca qui. Jesu bëchaxo tsi quiha ja bënariacaniquë, jato mai ax ja riqüino.

9

Mohitamaxëni ca joni Jesú jënimahuanina
Marcos 2.1-12; Lucas 5.17-26

¹ Jatsi noti qui Jesu jicoha ca tsi ia ja shitaniquë. Shitahax tsi quiha jahuë yaca yoi qui ja caniquë. ² Yaca qui ja cahëcaquë tsi quiha ja qui toá ca nohiria bá mohiyama ca joni bënëniquë, jahuë oxatí no. Jabi Jesu qui ja chitimiriacani quiha. Ja chitimicanai jisi tsi quiha mohitamaxëni ca qui Jesu chaniniquë:

—Chamahuë baquë. Masahacaquë mi jocha ra —iquiina.

³ Jatsi shinatsi quiha yoba cahëxëni cabá huaniquë. “Dios pasomaha chanihi quiha naa joni ra” i jamë jaca ni quiha. ⁴ Jama, ja shinacanai ca jahuë bo Jesú cahëniquë. Cahëhax jato qui ja nëcaniquë:

⁵ —¿Jënica ni toa, bëroria ca yoatí? “Masahacaquë mi jocha” ¿iti ni? “Niina. Cohuë” ¿iti ni? ⁶ Jasca, nohiria ba jocha masati chama ë jaya ca ma cahëno ra —i jato qui Jesu niquë.

Jatsi mohitamaxëni ca joni qui ja chaniniquë:

—Niina. Mi oxati bihuë. Mi xobo qui cata —iquiina.

⁷ Jatsi niitapiniquë joni. Nihax tsi quiha jahuë xobo qui ja caniquë.

⁸ Ratëyoniquë nohiria, Jesú ani ca jisish na. Jatsi Dios oquëhuatsijahuacaniquë, Jesu qui jahuë chama-chamaria Diós ani iqui na.

Mateo Jesú quënanina
Marcos 2.13-17; Lucas 5.27-32

⁹ Riquiquiria tsi quiha gobierno xobo pistiá ca tsahohai ca joni, naa Mateo icanai ca Jesú jisniquë. Nohiria bo quima gobierno bax parata bicanaibo, jochahuaxëni cabo, tihí cabo bëcaniquë, Jesu, jahuë rabëti bo, tihí cabo yaxëna. ¹¹ Jatsi Jesu ya naa jochahuaxëni cabo iqui ca fariseobá jisniquë. Jisi tsi Jesu rabëti bo qui ja chanicaniquë:

—¿Jëniario gobierno parata bicanaibo, jochahuaxëni cabo, tihí cabo ya xo tsi pihí ni mato maestro pa? —iquiina.

Jatsi Mateo joiniquë. Joixo tsi quiha Jesu ja banahuaniquë.

¹⁰ Jabi Mateo xobo xo tsi Jesu, jahuë rabëti bo, tihí cabá pihí iniquë. Ja picano tsi quiha huëstima ca gobierno bax parata bicanaibo, jochahuaxëni cabo, tihí cabo bëcaniquë, Jesu, jahuë rabëti bo, tihí cabo yaxëna. ¹¹ Jatsi Jesu ya naa jochahuaxëni cabo iqui ca fariseobá jisniquë. Jisi tsi Jesu rabëti bo qui ja chanicaniquë:

—¿Jëniario gobierno parata bicanaibo, jochahuaxëni cabo, tihí cabo ya xo tsi pihí ni mato maestro pa? —iquiina.

¹² Jatsi Jesú quëbiniquë, jato nicaquí na:

—Doctor quënayamaqui jënima cabo ra. Jama doctor quënahai ca tsi xo toa iquicanabo. ¹³ Bocahuë. Dios Chani cahëyamaqui mato ra. “Jaha ë quëehai ca tsi xo toa ëa nohiria noihaina, ja tëpascanai ca jahuë bo nomari” ii quiha Dios ra. Toa ma jabiti xo. Tsayacahuë. Mëstëxëni ca jaca nori ca quëscahuacanaibo quënahi ë joyamaniquë, jochahuaxëni cabo nori, Dios quiri ja bëscano iquish na —nëca tsi jodioba chama bo qui Jesu nëcaniquë.

*Samati jabi yoati Jesu ja nicacanina**Marcos 2.18-22; Lucas 5.33-39*

¹⁴Jatsi ashimanish ca Juan yamabá-na banahuacanaibo Jesu qui bëcaniquë. Bëxo tsi quiha ja nicacaniquë:

—Huëstima tsi xo no samahaina ra. Jasca, samariacani quiha fariseobro ri. Jama, mi rabëti bo tsi xo toa समयamahaina pë. ¿Jënihax समयamacahi ni? —i Jesu qui jaca niquë.

¹⁵Jatsi Jesú jato quëbiniquë:

—Joní ahui yano tsi ¿cohuë ni bëcanish ca rabëti bo? Iyamacani quiha. Ahui yahax ca joni jato bëtano tsi ranicani quiha ra. Jascaria tsi jaboqui समयamahi quiha noho rabëti bo ri, jato bëta ë nori ca iqui na. Jama, tsëquëxëhi quiha bari huëtsa, jato quima ë mëbihacaxëquë no. Toatiyá tsi samacaxëcani quiha noho rabëti bo ri, cohuëhi na.

¹⁶Jasca, quësi paxá tsi raiti siri pishpayamahi quiha nohiria. Anoma quiha. Jabi quësi paxá pi ja pishpacano tsi përesixëhi quiha raiti siri. Përesishi quiha quësi paxa ri, jaha bëquiyamajahai iqui na. (Jascaria, mato arati quinia siri jaha bëquiyamahi quiha noho tiisi paxa cato. Jamëri ca xo.) ¹⁷Jasca, mato bichi ca sota sirixëni qui jënëria paxa ca rëhuiyamaqui mato. Anoma quiha. Ma rëhuipino tsi bichi ca sota poshaxëhi jënëria paxa cato. Jatsi japaquëxëhi quiha jënë rë. Yoshihuahacaxëhi quiha sota ri. Jama bichi ca sota paxa ca qui jënëria paxa ca rëhuihacaxëti xo. (Jascaria, anoma tsi xo arati quinia siri tsi noho tiisi paxa ca tiisimahaina ra. Arati quinia huëtsá tsi ja tiisimahacaxëti xo. Mato arati jabi siri jaha bëquiyamahi quiha noho tiisi paxa) —nëa tsi quiha Jesu nëcaniquë jato qui.

*Jairo jahini jënimahuahacanina, Jesu sahuëti motsanish ca yoxa**Marcos 5.21-43; Lucas 8.40-56*

¹⁸Nohiria bo qui Jesu chanino tsi quiha ja qui jodioba chama joniquë. Johax Jesu bësojó ja mëniniquë.

—Rësoyaquë noho jahi rë. Johuë. Mi mëquënë tsi noho jahi mi motsano. Mi pi jono tsi bësoxëqui tia —nëa tsi quiha johax ca chama nëcaniquë.

¹⁹Jatsi Jesu, jahuë rabëti bo, tihi cabo joiniquë, ja bëta caxëna. ²⁰Jabi ja bocano tsi quiha Jesu cho noitiria ca yoxa básimaniquë, Jesu motsaxëna. Doce año bo no tsi ja jimihacai ini quiha. ²¹Jatsi yoxa shinaniquë. Shinahax, “Jahuë sahuëti pi motsahi tsi jënimaxëquia tia” i jamë ja niquë. ²²Jatsi Jesu bopinaniquë. Bopinaxo tsi quiha yoxa ja jisniquë. Jisi tsi,

—Chamahuë, noho jahiní. Mi chitimihai ca iqui tsi mi jënimahuahacaquë ra —i ja qui Jesu niquë.

Jënimatapiniquë yoxa ra.

²³Jatsi chama xobo qui jicohax tsi quiha música acanaibo Jesú jisniquë. Jahuë jahi maihuapaimaria ja icani quiha. Anomaria ja aracanai ca pacotsa ini quiha. Jatsi jato jisi tsi quiha,

²⁴—Bocahuë. Rësoyamaquë jahi pistia. Oxahi quiha —i nohiria bo qui Jesu niquë.

Jatsi nohiria bá osaniquë, nicahax na. ²⁵Jatsi quiha cache nohiria Jesú raaniquë. Raahax naquëtë qui ja jiconiquë. Jatsi jahi pistia mëquë ja biniquë. Joitapiniquë jahuë jahi ra. ²⁶Jatsi Jesú ani ca nicayoniquë toa maí ca nohiria tëquë.

Dos ca bëco ca joni Jesú jënimahuanina

²⁷Jato xobo Jesu jisbayaquë tsi quiha banahuatsi dos ca bëco cabá huaniquë. Banahuapama tsi ja quënacaniquë.

—Noqui shinahuë ra, David yamaba Baquë —iquiina.

²⁸ Xobo qui Jesu jicoquë tsi quiha ja jicocaniquë jato ri. Jatsi Jesú jato nicaniquë:

—¿Mato jënimahuati mëtsa ni ëa ra? ¿Jahuë shinacanaï? —iquiina.

Jatsi,

—Ati mëtsa xo mia, Ibobá —i jaca niquë.

²⁹ Jatsi jato bëro bo Jesú motsaniquë. Motsapama tsi,

—Ma chitimihai iqui tsi ocapixëhi quiha ra —i jato qui ja niquë.

³⁰ Jatsi quiha ja taistëquëcaniquë. Jënima jato bëro ini quiha. Jatsi Jesú jato yoba-yobaniquë:

—Mato ë jënimahuaha ca yoayamacahuë —iquiina.

³¹ Jama, jisbaya tsi quiha Jesú ani yoati ja yoabonacaniquë toa mai tëquë xo na.

Chanitimaxëni ca joni Jesú jënimahuanina

³² Bëco inish ca joni bo bocaquë tsi quiha Jesu qui chanitimaxëni ca joni nohiria bá bëniquë. Joni jaro quiha. ³³ Jahuë yoshi Jesú tsëcaquë tsi chanitapitsi quiha joni niquë. Jatsi ratëyoniquë nohiria tëquë.

—Anomaria tsi xo naa joní acaina ra. Noqui xërëquë ca nëca ca jahuë bo no jisayama-pistiarianiquë ra —i nohiria bo ni quiha Jesu yoati na.

³⁴ Jama,

—Yoshini chamá tsi yoshi bo tsëcahi quiha naa joni pë. Yoshi tsi xo toa ja qui chama acaina ra —i jodioba chama bo niquë pë.

Nohiria bo Jesú noinina

³⁵ Jabi yaca pistia bo, yaca-yacaria bo, tihí cabo qui Jesu shishoniquë, jato catiti xobo xo tsi tiisimahaina. “Nohiria bo otocatsi quiha Dios ra” i ja niquë Chani jia ca yoabonahi na. Jasca, noitiria cabo, iquicanaibo, tihí cabo ja jënimahuaniquë. ³⁶ Jasca, nohiria huëstima ca tsayapama tsi quiha Jesu cohuënaniquë, noitiria ja icani iqui na, naa jahabëso yama ca ovejá jascaria. Ja shina-huëjënacanaï ca ja cahëni quiha. ³⁷ Jatsi quiha jahuë rabëti bo qui ja chaniniquë:

—Huëstima ca tsi xo toa tësahacati cato ra; jama, ichariama ca tësacanaibo nori. ³⁸ Japi tësati Ibo qui bëhocxana ra, yonati bo ja raano iquish na, tësati —nëa tsi quiha Jesu nëcaniquë.

10

Jahuë doce ca rabëti bo Jesú binina jahuë Chani ja yoacano *Marcos 3.13-19; Lucas 6.12-16*

¹ Jatsi jahuë doce ca rabëti bo Jesú quënaniquë. Quënaxo tsi quiha jato qui chama ja aniquë nohiria quima yoshi bo tsëcati. Jasca, chama jato qui ja aniquë iquicanaibo, isicanaibo, noitiria cabo, tihí cabo jënimahuati.

² Jabi doce ca joni bo quiha Jesú biniquë raaxëna. Jato janë bo tsi xo naa: Jariapari tsi xo Simón, naa Pedro quënahacanih cato. Jaquirëquë, Simón noma Andrés. Jaquirëquë, Zebedeo baquë Jacobo. Jaquirëquë, Jacobo noma Juan. ³ Jaquirëquë Felipe, Bartolomé, Tomás, Mateo, naa gobierno bax impuesto binish cato. Jaquirëquë Alfeo baquë Jacobo, Tadeo, ⁴ Simón, naa gobierno pasomaha inish cato. Jatsi Judas Iscariote, naa soldado bo qui Jesu mëanish cato.

Jahuë rabëti bo Jesú raanina Dios Chani yoati *Marcos 6.7-13; Lucas 9.1-6*

⁵ Naa doce ca rabëti bo Jesú raaniquë Dios Chani ja yoacano. Raaquí tsi quiha jato ja yobaniquë. Ja nëcaniquë:

—Carayanaba maí, samaria caba yaca bo, tihi cabo qui boyamacana Dios Chani yoati. ⁶ Jama, Israel ca nohiria bo qui roha bocahuë. Bënohax ca oveja bo jascaria ca xo ra. ⁷ Capama tsi “Basima tsi xo Diós otohaina ra” itsicana. ⁸ Jasca, iquicanaibo jënimahuacana. Bësoyama cabo bësomacana. Leproso bo bahuëcana. Yoshi bo tsëcacana. Jabi copixoma tsi noho chama ma bichi iqui tsi parata biyamacana nohiria mëbiquí na.

⁹ Caquí tsi parata boyamacana. ¹⁰ Jasca, rabë sahuëti, zapato bo, coti jihui, tihi cabo boyamacana. Jabi mato orihuaxëhi quiha mëbihacahax cabo.

¹¹ Jabi yaca-yacaria, yaca pistia, tihi cabo qui cahëxo tsi toa xo tsi shinajixëni ca joni mëracana. Mërahax jahuë xobo roha tsi chitëcana. Xobo huëtsa qui boyamacana. ¹² Jahuë xobo qui jicoquí tsi jia tsi jato joihuacana. ¹³ Jia pi toá ca nohiria bá mato joihuano tsi jato bax bëhoxcana, Diós jato shomahuano iquish na. Jama, mato pi ja joihuayamano tsi jato shomahuayamacana. ¹⁴ Jasca pi xobó ca nohiria bá mato joihuacas-yamano tsi jato jisbayacana. Jasca pi yacatá ca nohiria bá mato qui nicacasyamano tsi jato jisbayacana. Jisbaya tsi mato tahë ca cospo toj-tojhacahuë jato jocha jismaxëna. Toca tsi jato qui Dios caxa ma jismaxëti xo. ¹⁵ Mato parayamaquia iquia. Anomari-axëhi quiha toa nohiria bá tënëhaina ra nohiria bo copiti barí no. Sodomá ca racanish ca nohiria bo oquë ixëti quiha. Gomorrá ca racanish ca nohiria bo oquëxëhi quiha ja tënëcanaina iquia.

Johai ca tënëhaina Marcos 13.9-13

¹⁶ Jaha bësocapa. Caxaxënia ca lobo jascaria ca nohiria bo qui mato raaquia. Jato xërëquë ca oveja jascaria ixëqui mato. Japi quiniacaxëcahuë, naa rono ma quiniagai jascaria. Jato xërëquëpama tsi ishima ca boto jascariacana. ¹⁷ Jasca, mato pasomaha ca nohiria bo qui quiniacaxëcahuë. Chama bo qui mato mëacaxëceni quiha quësoxëna. Jasca, jato arati xobó tsi rashahacaxëqui mato ra. ¹⁸ Ea tahëxo tsi prefecto bo, chama-chamaria bo, tihi cabo qui mato bëcaxëceni quiha, naa mato jimibo. Jatsi xaba jayaxëqui mato ra, jato qui chaniti ëa yoati na. Jatsi Dios Chani nicacaxëceni quiha carayanabo ri. ¹⁹ Jabi chama bo qui mato jimibá pi mato mëano tsi ma yoati ca yoaxëti ca yoati tsi shina-huëjënayamacana. Toa xaba tsëquëno tsi mato qui acacaxëhi quiha ma yoaxëti cato. ²⁰ Toatiyá tsi ma chanino tsi ma yoaxëti ca mato jismaxëhi quiha Espiritu Santo. Chaniyamayoixëqui mato, Espiritu Santo ja nori.

²¹ Toatiyá tsi jabë xatë yoi mëaxëhi quiha huëtsa, namëhacati. Jahuë baquë pasomahaxëhi quiha jahëpa ri. Jasca, jato nabo qui caxacaxëceni quiha xocobo ri. Caxaquí tsi chama bo qui jato nabo mëacaxëceni quiha rë, ja namëhacacano. ²² Ea tahëhax tsi mato qui cayaxocaxëceni quiha nohiria tëquë. Jama, xabahamahacaxëhi quiha jatiroha ca jahuë rëso qui tënë-tënëcanaibo. ²³ Jatsi huësti ca yacatá ca nohiria bá pi mato tënëmano tsi yaca huëtsa qui jabacana. Jabi bacaxëquia ra, jodioba maí ca yacata tëquë noho Chani ma yoanox pari no.

²⁴ Jabi jahuë maestro oquë ma xo jahuë alumno bo. Jasca, jahuë chama oquë ma xo yonati. ²⁵ Jabi jato maestro pi nohiria bá tënëmano tsi tënëmahacaxëhi quiha jahuë alumno bo ri iquia. ¿Jabi mato maestro ma ni ëa ra? “Satanás” pi ëa nohiria bá quënano tsi oquë ca yoixëni ca janë mato quënacaxëceni quiha ra. ²⁶ Japi mato roacanaibo qui raquëyamacana.

Bërohuahacaxëhi quiha noho Chani ra. Nicaxëhi quiha nohiria bo ra. ²⁷ Jaboqui mato qui baxëxquia quiniahi na. Jama, huëaquë tsi mato ë yoaha ca yoacaxëcahuë huënënë xo na, raquëxoma. ²⁸ Jasca, mato acascanai bo qui raquëyamacana. Mato yora bo roha ati mëtsa ca xo, mato shina ati mëtsa jaca nomari. Jama, Dios qui nohiria raquëxëti xo. Ja tsi xo toa tënëtiya qui nohiria raati ibo-iboria, naa yora, shinana, tihì cabo quëyoti mëtsa cato. ²⁹ Jabi mato ó bësohi quiha Dios ra. Jatiroha ca cahëhi quiha. Huësti ca copiriama ca chorobo pi mai qui paquëno tsi çcahëyama-yamaha ni mato Jahëpa ra? ³⁰ Jasca, mato boo tëquë cahëhi quiha ra. Ja tocachacayocani quiha. ³¹ Japi raquëyamacana. Dios qui copixëni xo mato ra; naa huëstima ca chorobo oquë quiha.

³² Nohiria bo bësojó pi “Cristó-na xo ëa” i nohiria no tsi noho naipá ca Jahëpa bësojó tsi “Nohó-na xo toa” ixëquia ëa ri. ³³ Jama, nohiria bo bësojó pi ëa pasomaha nohiria chanino tsi noho naipá ca Jahëpa qui “Nohó-na ma xo toa” ixëquia ëa ri.

Jesu iqui tsi oquëxnahacaxëhi quiha nohiria

Lucas 12.51-53; 14.26-27

³⁴ “¿Jahuë qui tsi mai qui ë joni? ¿Jia tsi nohiria racanabëquimahi ë joni pa? Tocati ë joyamaniquë. Nohiria oquëxnamahi ë joquë ra, jia tsi jato racanabëquimahi nomari. Oquëxnamahai ca saipi jascaria tsi xo toa ë bëhai ca chani ra. ³⁵ Joquë ëa ra, jahuë jahëpa pasomaha baquë janaxëna, jahuë jahëhua pasomaha jahi janaxëna. (Joquë ëa ra, jahuë raisi pasomaha raisi janaxëna.) ³⁶ Ea tahëhax tsi mato qui caxa-caxariaxëhi quiha mato xobó ca yoi bo ra.

³⁷ “Ea oquë pi jahuë jahëpa, jahuë jahëhua, tihì cabo noihi tsi nohó-natimaxëni ca xo toa nohiria ra. Jasca, jahuë baquë bo, jahuë jahi bo, tihì cabo pi oquë tsi noihi tsi nohó-natimaxëni ca xo ra. ³⁸ Mato cruz yoi pi iayamaha tsi ëa pi banahuayamaha tsi noho rabëti iti mëtsama xo mato iquia. ³⁹ Jabi jahuë shina bënoxëhi quiha jahuë shina xabahamacatsai cato. Jasca, jahuë shina bëboxëhi quiha ëa iqui tsi jahuë shina bënohai cato.

Premio bo Diós noqui acaina

Marcos 9.41

⁴⁰ “Jabi ëa yoi joihuahi quiha mato joihuahai cato. Jasca, ëa pi joihuaquí Dios yoi, naa ëa raanish ca joihuahi quiha. ⁴¹ Dios Chani bëhai ca ma joihuano tsi jia tsi mato copixëhi quiha Dios, Dios Chani bëhai ca ja nori iqui na. Jato copi jascaria ca bixëqui mato iquia. Jasca pi shina jiaxëni cabo joihuahi tsi jia tsi copihacaxëqui mato ra. Jato copi jascaria copihacaxëqui mato ri. ⁴² Ea tahëxo tsi noho rabëti bo pistia roha tsi ma mëbino tsi mato copixëhi quiha Dios iquia —nëa tsi Jesu nëcaniquë.

11

Jahuë rabëti bo Jesu qui Juán raanina

Lucas 7.18-35

¹ Jatsi quiha Jesús jisbayaniquë jahuë doce ca rabëti bo yobaxo na. Jisbaya tsi quiha toa maí ca yaca bo xo tsi ja tiisimaniquë. Dios Chani ja yoaniquë.

² Jabi toatiyá tsi quiha presó Juan yamabo iniquë. Preso xo tsi Cristó acai ca jahuë bo ja nicaniquë. Nicaxo tsi quiha jahuë rabëti bo huësti huësti ca Jesu qui ja raaniquë, Xabahamati Ibo Jesu iqui ca nicaxëna. ³ Jatsi Jesu ja nicacaniquë:

—“Joxëti xo Xabahamati Ibo” i noqui quiha Juan ra. ¿Toa ni mia sa? ¿Joni huëtsa ó pasoxëhi ni noa sa? —i Jesu qui jaca niquë.

⁴Jatsi Jesú jato quëbiniquë:

—Jahari bocata. Ma tsayahana, ma nicahana, tihi cabo Juan yoacata. ⁵Taiscani quiha bëco cabo. Tapicani quiha huico choni jaya cabo. Jënimahuahacahi quiha leproso cabo, naa bonohuaxëni cabo. Pasohi quiha pasoyamacanaibo. Bësotëquëcani quiha bësoyama cabo. Xabahamati Chani nicacani quiha noitiria cabo. ⁶Rani-ranicani quiha ëa chahahuacanaibo ra. Tihi ca tsi yoata —nëa tsi jato qui Jesu nëcaniquë.

⁷Nicahax tsi quiha jahari Juan qui ja bocaniquë. Jaquirëquë nohiria bo qui Jesu chaniniquë Juan yoati na.

—¿Jahuë ó ma pasoni jixsëna, xabachá ca Juan qui boquí na? ¿Cahëtimaxëni ca chamayama ca joni ó ma pasoni pa? ⁸¿Jahuë jisi ma bocani? ¿Copixëni ca raiti sahuë ca joni jisti ó ma pasoni pa? Toca tsi ja iyamani quiha. Jabi xoboboriá tsi racacani quiha copixëni ca sahuëti jaya cabo. ⁹¿Japa? ¿Jahuë ó ma pasoni jixsëna? Ea yoacahuë. ¿Dios Chani yoati ibo ó ma pasoni pa? Mato parayamaquia. Dios Chani yoati ibo oquë ca ma jisyamëquë ra. ¹⁰Jabi Juan yoati tsi Dios chaniniquë Quënëhacanish cabo ó no. Nëcahi quiha:

“Mia bëbo noho Chani bohái ca raaxëquia.

Jariapari mi quinía rohahuaxëhi quiha”

i Dios ni quiha.

¹¹‘Mato parayamaquia ra. Yama tsi xo nohiria xërëquë tsi Juan oquë ca bësohax cato ra. Jama, Juan oquë ca tsi xo toa Diós otohái cato ó ca iriama cato ra —nëa tsi Jesu nëcaniquë Juan yoati na.

¹²‘Jabi jahuë yonoco ati Juan chitahëhuaquë rohari tsi jahuë chani qui caxa xo huëstima cabo. Jaboqui jasca pi xo rë. Ibo Diós nohiria bo otohái ca quinía quëyocascani quiha pë. Anomaria tsi xo toa ja acanaina. ¹³Jabi siri tsi Dios Chani yoahi Juan jonox pari no tsi Quënëhacanish cabá chani-chanipaoniquë Ibo johai ca yoati na. ¹⁴“Joxëhi quiha Elías” i jaca paoni quiha. Jabi Juan tsi xo toa joxëhai ca Elías iquia. ¿Ja quënëcani ca chahahuacanaí? ¹⁵Nicati pi mëtsaquí tsi nicacahuë.

¹⁶‘¿Jënixëhi ni ëa pë, naa jaboqui bësocanaí ca nohiria yoati na? Plazá ca chotëxëni ca xocobo jascaria ca xo rë. I-iquí tsi nëca tsi quënacaqui: ¹⁷“Mato bax pi bisto no ino tsi pabëcasyama xo mato pë. Jasca, mato bax pi no nahuarino tsi aracasyama xo mato pë” iquiina. Jabi naa chotëxëni ca xocobo jascaria tsi xo naa nohiria bo ra. ¹⁸Jabi Juan joquë tsi mato qui yoi quiha jahuë jabi iniquë pë. Johax ja samaniquë. Jënë ja ariayamaniquë. Tocajaquë tsi “Yoyoxëni tsi xo naa joni ra” iyoniquë nohiria tëquëta. ¹⁹Jatsi ë joquë, naa Nohiria Baquë ë nori cato. Ea ti tsi xo origuihaina. Jasca ëa ti tsi xo toa jënë acaina. Tocahëno tsi ë qui yosacaqui pë. “Oriquitinaxëni, pahëxëni ca tsi xo toa” icaqui. “Tsayacapa, impuesto bicanaiibo, jochacanaibo, tihi cabo ya rabënahi quiha pë” ii quiha jatiroha cabo ëa yoati na. Jabi mato qui yoi tsi xo noho jabi, ë acaina, tihi cabo. Jasca, mato qui yoi ini quiha Juan jabi jaa ri pë. Jama, tiisiyoi-canaibo qui jia tsi xo noba jabi bo, no acaina ra —nëa tsi nohiria bo qui Jesu nëcaniquë.

Nicamixëni ca yaca bo

Lucas 10.13-15

²⁰Jatsi yaca bo, naa ja ani ca jisti bo jisnish cabo raahatsi quiha Jesú huaniquë. Jato ja raahani quiha jato jocha quima Dios quiri ja bësoyamacani iqui na. ²¹Ja nëcaniquë:

—Noitirixähēi quiha mato Corazín cabá. Noitirixähēi quiha mato ri Betsaidá cabá. Mato yaca bo xo tsi huéstima ca jisti bo acacani quiha; mahitsa rē. Jabi jochahuaxēni ca Tiro y Sidón yaca bo xo pi jasca ca jisti bo acacarohano tsi naama tsi jato jocha quima Dios quiri ja bēsoquē acani quiha. Bamaxoma tsi moro ja sahuéquē acani quiha cohuéquí na. Jasca, chihi mishpó tsi ja tsahoquē acani quiha jato cohuē jismaxēna. ²² Jabi copiti barí tsi anomariaxähēi quiha mato copi ra; naa Tiro, Sidón, tihi cabo yacatá ca jochahuaxēni ca nohiria oquē nori. ²³ ¿Japa mato Capernaum yacatá cabá? ¿Nai qui bocascanai pa? ¡Maj! Tēnētiya qui botēxéquí mato ra. Mato yacata ax tsi huéstima ca jisti bo acacaniquē ra; mahitsa rē. Jabi jochahuaxēni ca Sodoma xo pi jasca ca jisti bo acacarohano tsi ja chahahuaquē acaniquē ra. Jato yaca potas-hacayamaquē ani quiha ra. ²⁴ Japi shinacahuē. Copiti barí tsi anomariaxähēi quiha mato copi ra. Jochahuaxēni ca Sodoma oquē ixēti quiha —nēa tsi Jesu nēcaniquē toa yaca bo yoati na.

“E qui bēcana joixēna” i Jesu nina

Lucas 10.21-22

²⁵ Naatiyá tsi bēhoxpama tsi Jesu nēcaniquē:

—Mi qui “Gracias” iquia noho Jahēpá, cahēyamacanaibo qui mi chani jia ca mi jismaha quēshpi na. Máí ca tiisi jaya cabo, cahēxēni cabo, tihi cabo cahēmayamaqui mia ra. Jato joma quiha. Ja quēshpi tsi “Gracias” iquia ra.

²⁶ Jabija, tocahi tsi raniqui mia, noho Jahēpá —i Jahēpa quiina.

²⁷ Jatsi,

—Chama ē qui noho Jahēpá aniquē ra jahuē bo tēquē yonati. Jabi yama tsi xo toa ēa, naa Dios Baquē-baquēria ca cahēyoihai cato. Noho Jahēpa roha tsi xo toa ēa cahēyoihai cato iquia. Jasca, yama tsi xo toa Jahēpa Dios cahēxēni cato. Jahēpa Dios cahēxēni ca roha ca ēa xo naa, naa jahuē baquē. Jasca, Jahēpa Dios cahēcani quiha chahahuacanaibo ri. Jato qui noho Jahēpa jisiquimaquia, ja cahęcano iquish na. ²⁸ E qui bēyocana mato joicanaibá. E qui bēcana, ihuē ca jabi papicanaibá. Mato joimaxéquia ra. ²⁹ Ihuē yama tsi xo toa mato qui ē acatsai ca yugo, naa noho yoba. Bicana. Mato ē tiisimano. Ea ti tsi xo ishima. Ea ti tsi xo caxayama. Noho yugo pi bichi tsi joixéquí mato ra. ³⁰ Bēro tsi xo noho yugo papihaina. Ihuē yama tsi xo toa mato qui ē acai ca yoba ra —i nohiria bo qui Jesu niquē.

12

Joiti bari yoati na

Marcos 2.23-28; Lucas 6.1-5

¹ Jaquiréquē trigo huai tsi nacohi quiha Jesu iniquē jahuē rabēti bo ya. Joiti bari ja ini quiha. Jabi paxnaquí tsi quiha jahuē rabēti bá trigo bimi risaniquē piti. ² Jatsi ja acani ca jodiobo chama bá jisniquē, naa fariseobo icanish cabo. Jisi tsi Jesu qui ja quēsocaniquē:

—Tsayapa. Joiti barí tsi anoma ca acani quiha mi rabēti bo ra. Yonococani quiha pé —iquiina.

³ Jatsi Jesú jato quēbiniquē:

—¿Quēnhacanish cabo ó ca noba David yamabá ani ca ma tsayayamayamani, naa jahuē joni bo ya paxnaquí na? ⁴ Dios xobo ja jiconi quiha ra jahuē joni bo ya, arati ibo ba mapari bixēna. Toa xo tsi Dios qui aquéquēmani ca mapari ja pini quiha. Jasca, pini quiha jahuē joni bo ri. Roa toa ja acani ini quiha. Pinoma quiha. Arati ibo ba piti ja ini quiha. ⁵ Jasca, ¿Moisés quēnēni ca ma tsayayamayamani? Jatiroha ca joiti barí tsi yonocohi quiha arati ibo

bo ra. Jënima tsi xo toa joiti barí tsi ja yonococanaina ra. Yonocojacano tsi jato qui quësoyamaqui mato pë. ⁶ Jama, ë qui tsi xo toa ma quësocanaina rë. Jaha quiniacaxëcahuë. Mato xërëquë tsi xo toa mato arati xobo, mato yoba, tihi cabo oquë cato iquia. ⁷ Quënëhacanish cabo pi cahërohahi tsi ë qui, naa anoma ca ayamahai ca qui ma quësoyamaquë aquë ra. “E qui oquë-oquëria tsi xo toa ëa ma noihaina ra, naa ë qui ma acai ca jaca nomari” i Dios ni quiha. ⁸ Jasca, joiti bari ibo-iboria ca ëa xo naa ra, naa Nohiria Baquë ë nori cato —nëa tsi jodiobo chama bo qui Jesu nëcaniquë.

Mëquë choni ca jaya ca joni

Marcos 3.1-6; Lucas 6.6-11

⁹ Jodiobo chama bo Jesú jisbayaniquë. Jisbaya tsi quiha jodioba catiti xobo qui ja jiconiquë. ¹⁰ Jabi toá tsi quiha mëquë choni jayanish ca joni ini quiha. Toá tsi ini quiha Jesu qui quësocascanaí ca joni bo ri. Jatsi Jesu ja nicacanicuë: —¿Jënima ni joiti barí tsi jënimahuahaina? ¿Noba yoba pasomaha ma ni? — iquiiina, ja qui quësocatsi na.

¹¹ Jatsi nëca tsi Jesú jato quëbiniquë:

—Joiti barí pi maiquini qui mato oveja huësti ca paquërohano tsi ¿ma tsëcayamaquë ana? ¹² ¿Jabi oveja oquë ma ni nohiria ra? Japi jënima tsi xo joiti bari tsi jia ca acaina iquia —i jato qui Jesu niquë.

¹³ Jatsi noitiria ca joni qui Jesu chaniniquë:

—Mí mëquë yoi mëtahué —iquiiina.

Jatsi jahué mëquë yoi ja mëtaniquë. Jënimatapiniquë jahué mëquënë ra; jahué mëquë huëtsta jascaria iquiiina. ¹⁴ Jatsi jodiobo chama bá jisbayaniquë caxahi na. Joiti barí tsi ja jënimahuani igui tsi Jesu ja namëcascani quiha. Jabi toca tsi quiha ja shina-shinacanicuë pë, namëti quinia mërahi na.

Isaiás yamabá quënënina Jesu yoati na

¹⁵ Jabi ja namëcascanaí ca Jesú nicaniquë. Nicaxo ja jisbayaniquë. Jatsi huëstima ca nohiría banahuaniquë. Jatsi bëcanish ca iquicanaibo tëquë ja jënimahuanicuë. ¹⁶ Jënimahuaxo tsi quiha jato ja yobanicuë tsohuë ca ja igui ca yoayamati. ¹⁷ Jabi ja ani cató tsi quiha Isaiás yamabá quënëni ca jatihuahacani quiha. Jabi nëca tsi quiha Dios chaniniquë jahué Baquë yoati na.

¹⁸ “Noho yonati tsi xo naa ra.
E biniquë noho yonoco ja ano.
E noihai ca tsi xo naa.

Ja qui raniquia.

Noho shina ja qui axëquia.

Jatiroha ca nohiria bo ó bësoxëhi quiha.

¹⁹ Jasca, johax iquinayamaxëhi quiha.

Joi mërayamaxëhi quiha.

Jahué joi choshayamaxëhi quiha.

²⁰ Noitiria cabo roayamaxëhi quiha.

Jaha pasocanaibo ranihuaxëhi quiha.

Ja pasomaha cabo bëboxëhi quiha, Dios mëstëxëni ca yoba nohiria bá cahëno iquish na.

²¹ Jasca, ja qui chitimicaxëcane quiha maí ca nohiria bo tëquë”
i Dios ni quiha ja quënëni cató no.

Yoshi bëboti chama Jesú jayahaina

Marcos 3.20-30; Lucas 11.14-23

²² Jatsi Jesu qui noiti ca joni nohiria bá bēniquē ja jēnimahuahacano. Bēco ca joni quiha. Jasca, jaro ja ini quiha, yoshi ja jayani iqui na. Jabi naa joni Jesú jēnimahuaniquē. Jaquirēquē chaniti mētsa joni iniquē. Jasca, ja taisniquē ra.

²³ Jatsi ratēyoniquē nohiria tsayahax na.

—Johai ca Xabahamati Ibo, naa David yamaba चाहितaxocobo ma ni naa joni sa? —i jaca niquē ja ani ca tsayahax na.

²⁴ Toca tsi nohiria chanicanai ca nicaxo fariseobá quēbiniquē, naa jodioba chama bo:

—Ja qui Satanás chama aquē ra. Ja tsi xo toa yoshi tsēcati chama jaya xo ra —iquiina.

²⁵ Jama, ja shinacanai ca Jesú cahēniquē. Cahēhax chama bo qui ja chaniniquē:

—Quēyohacaxēhi quiha país ca nohiria bo, ja nianacaquē no. Jasca, quēyohacaxēhi quiha xobó ca nohiria bo, yacatá ca nohiria bo, ja iquinacaquē no. Yonocobēquinatimaxēni ca xo. ²⁶ Jasca, Satanás-na maxo pasomaha pi Satanás maxo huētsa iquinano tsi ¿jēnhuariahax jahuē chama naamana?

²⁷ Jasca, ¿Satanás chamá tsi jahuē yoshi bo natsēcahi ni ēa pa? Jabi Satanás ēa mēbipino tsi ¿tsohuē ni toa mato banahuacanaibo qui chama acax cato, yoshi bo natsēcati? Jabi yoshi bo natsēcani quiha mato banahuacanaibo ri. Mato banahuacanaibá acai cató tsi noqui bēro xo janyama ca ma shinahaina ra.

²⁸ Yoshi bo natsēcati chama ē qui acax ca tsi xo Dios Shinana. Ja tsi xo toa ēa mēbihaina. Jaha tsi ē acai cató tsi bēroria tsi xo toa mato qui Diós yonati chama jaya cato ra. Joquē Cristo, naa nohiria bo Xabahamati Ibo iquia ra.

²⁹ ¿Jēnhuariahax Raca joni chamaxēni cato xobo qui joni jicona yomaxēna? ¿Jariaparí tsi chamaxēni ca joni nēxayamayamaxēhi ni? Nēxaxo jahuē jahuē bo yomati mētsa xo. Jascaria, jahuē yoshi bo niahacanox pari no tsi nēxahacaxēti xo Satanás ri.

³⁰ Jabi ēa pasomaha yoi tsi xo toa ē bētama cato. Jasca, Dios yonoco yoshihuahi quiha ēa mēbiyamahai cato. ³¹ Jasca, jatiroha ca jocha, jatiroha ca chani yoi cato, tihí cabo masaxēhi quiha Dios. Jama, Espiritu Santo pasomaha pi nohiria chanino tsi jahuē jocha masayamaxēhi quiha Dios. ³² Jabi ēa pasomaha pi nohiria chanino tsi iriama tsi xo toa. Jahuē jocha masaxēhi quiha Dios. Jama, Espiritu Santo pasomaha pi nohiria chanino tsi jahuē jocha masayamaxēhi quiha Dios. Masahaca-timaxēni ca jocha tsi xo toa ra.

Jahuē bimi iqui tsi jihui cahēqui noa

Lucas 6.43-45

³³ Jabi jahuē bimi iqui tsi jihui cahēqui noa. Jahuē bimi tsayaqui noa. Jatsi bimi jia ca saihuahi quiha jihui jia cato. Jama, jihui yoi tsi xo toa pinoma ca bimi saihuahaina. Yoi quiha. ³⁴ Jisa rono ba xocobá. ¿Jēnhuariahax jia ca ma chanina, yoixēni cabo imaquē no. Yoixēni ca jahuē bo pi nohiria bá shinano tsi anomaxēhi quiha toa ja chanicanai ri. ³⁵ Jascaria, jahuē chani jia cató tsi bērohuahacaxēhi quiha shina jia cato. Jasca, yoi ca saihuahi quiha joni yoixēni cato, naa jihui jascaria. Jahuē jabi quiha. ³⁶ Jabi huēstima tsi xo mahitsa ca chani rē. Jasca, jaroja ca barí tsi copihacaxēti quiha nohiria jato chani yoi ca tēquē quēshpi na iquia. ³⁷ Toa barí tsi mato chaní tsi copihacaxēqui mato. Jatsi paquēmahacaxēhi quiha chani jia ca chanihai cato. Jama, tēnēmahacaxēhi quiha chani yoi ca chanihai cato ra —nēa tsi chama bo qui Jesu nēcaniquē.

Jisti nohiria bá jiscasnina

Marcos 8.11-12; Lucas 11.29-32

³⁸ Jatsi Moisés yoba cahëxëni cabo, fariseobo, naa jodioba chama bo, tihì cabo chaniniquë Jesu qui. Ja nëcacaniquë:

—Jisti mi ano, maestró. Jisti jiscasqui noa —iquiina, jahuë chama jiscastsi na.

³⁹ Jatsi Jesú quëbiniquë:

—Anomaria tsi xo jaboqui bësocanaibo rë. Jisti ó quëëmishëneria tsi xo naa Dios qui chitimiyamacanaibo ra. Jatsi Jonás jisti roha jato qui acacaxëhi quiha. ⁴⁰ Jabi tres barihani, tres baquicha, tihì cabo tsi Jonás raaniquë sani चाहिता jatoquë no. Jascaria tsi tres barihani, tres baquicha, tihì cabo raaxëquia ëa ri mai xará no. ⁴¹ Jatsi quiniacaxëcahuë. Copiti bari-baririá tsi niixëhi quiha Ninivé ca nohiria bo mato qui quësoxëna. Jato qui Dios Chani Jonás yoaquë tsi quiha jato jocha quima Dios quiri ja bësocani quiha, nicahax na. Jama, jaboqui nëá xo Jonás yamabo oquë cato. Jaha चाहनुयासयामाqui mato pë. Ja tsi xo toa mato qui quësocaxëcani quiha Ninivé ca nohiria bo ra. ⁴² Jasca, copiti bari-baririá tsi mato qui quësoxëhi quiha yoxa chama ri, naa Saba mai ax jonish cato. ¿Nëama ax ja joyamayamani Salomón yamaba tiisi nicaxëna? Jama, jaboqui nëá xo Salomón yamabo oquë cato. Ja qui nicacasyamaqui mato pë. Ja tsi xo toa mato qui quësoxëhi quiha toa yoxa chama ri —nëa tsí chama bo qui Jesu nëcaniquë.

Bacahai ca yoshini

Lucas 11.24-26

⁴³—Jabi joni quima tsëquëhax tsi quiha xabachá tsi co-cohi quiha yoshini, iti huëtsa mërahi na. Jocatsi quiha. Mahitsa mërähax, ⁴⁴ “E jisbëriani ca xobo qui jahari caquia ra” i jamë i quiha. Jatsi quiha jahari cahi quiha. Cahax jahuë iti siri jisi quiha. Jaboqui jënima quiha, bahuëhaca xobo jascaria. ⁴⁵ Jatsi cahi quiha jabë yoshi bo mërahi na. Mëraxo tsi siete ca yoshi oquë ca bëhi quiha ja bëtati. Jatsi pë ja bëta joni qui jicocani quiha yoshi huëtsa bo ri, racaxëna. Japi noiti-noitiria xo toa joni ra. Ja iqui tsi jaboqui oquë tsi xo toa joni yoyo rë. Jabi naa joni jascariaxëhi quiha jaboqui bësocanaí ca yoixëni cabo ri. Oquëriaxëhi quiha ma noitihaina ra —nëa tsi quiha Jesu nëcaniquë toá ca nohiria bo qui.

Jesu jahëhua, jahuë xatë bo

Marcos 3.31-35; Lucas 8.19-21

⁴⁶ Jari nohiria bo qui chanihi quiha Jesu iniquë, jahuë jahëhua, jabë xatë bo, tihì cabo xobo qui cahëquë no. Cahëhax tsi quiha xobo cacha ja niicaniquë. Niihax,

—Jesu ya chanicasqui noa —i jaca ni quiha.

⁴⁷ Jatsi,

—Cacha tsi xo mi jahëhua, mibë xatë bo. Toá tsi niicani quiha. Mi bëta chanicascani quiha ra —i huësti ca nohiria niquë Jesu qui.

⁴⁸ Jatsi quiha,

—¿Tsohuë ni toa noho jahëhua yoi ra? ¿Tsohuë ni toa ëbë xatë yoi bo ra? —i nohiria bo qui Jesu niquë.

⁴⁹ Jatsi quiha jahuë rabëti bo qui ja mëtoniquë.

—Tsayapa. Nëá xo noho jahëhua yoi. Nëá xo ëbë xatë bo. ⁵⁰ Jabi noho noma yoi, noho yoxa ca yoi, noho jahëhua yoi tsi xo toa noho naipá ca Jahëpa ó quëëhai ca acái cato ra —i jato qui Jesu niquë.

13

*Bëro sayanish cato**Marcos 4.1-9; Lucas 8.4-8*

¹ Toa barí roha tsi quiha xobo Jesú jisbayaniquè. Jisbaya tsi quiha ia qui ja caniquè. Caxo tsi quiha toa xo tsi nohiria ja tiisimaniquè tsahoxo na. ² Jatsi quiha ja qui nohiria quètsoniquè. Anomaria ca nohiria ini quiha. Huèstima ca iqui tsi noti qui Jesu jiconiquè. Jatsi noti xo jato ja tiisimani quiha, tsahoxo na. Mai quèmapó tsi mani ini quiha nohiria tèxè. ³ Jatsi huèstima ca jahuè bo jato ja yoaniquè chaniquí na. Bëroria ca chani quiha. Ja nëcaniquè:

—Bëro sayahi huèsti ca joni caniquè. ⁴ Jahuè huai sayajahuano tsi huèsti huèsti ca bëro bahi tapai xapaquèniquè. Jahá ca bëro isa bá pini quiha joxo na. ⁵ Jatsi bëro huètsa maxax mai qui xapaquèniquè, naa iriama ca mai cató no. Toá tsi quiha bëro shinahatapiniquè, oti yama pi mai ini iqui na. ⁶ Bari tsèquèquè tsi quiha ja mèshahaca-caniquè. Tapo mishni quiha. Ja iqui tsi ja chonicaniquè rë. ⁷ Jatsi huèsti huèsti ca bëro masa xèrèquè xapaquèniquè rë. Bëro ya tsi quiha shinahabèquiniquè masara. Jatsi banahaca ca jochai ca ja mapaniquè rë. ⁸ Jama, bëro huètsa quiha mai jiaxèni ca qui xapaquèniquè. Bimi ja saihuacaniquè. Cien ca bëro huèsti ca maxó saihuaniquè. Maxo huètsa setenta. Maxó huètsa treinta —nèa tsi Jesu nëcaniquè.

⁹ Jatsi,

—Ea nicaxèti xo jatiroha cabo ra —i Jesu niquè nohiria bo qui.

*Jonè ca chani yoati na**Marcos 4.10-12; Lucas 8.9-10*¹⁰ Jatsi Jesu qui jahuè rabèti bo bëcaniquè.

—¿Jènixo tsi toca ca chani noqui yoahá sa? Mi chani cahèyamaqui noa rë —i jaca niquè.

¹¹ Jatsi Jesú jato quèbiniquè:

—Mato qui acacaniquè Dios jonè ca tiisi ra, naa Diós othai ca jahuè bo yoati na. Jama, naa chani cahèyamahi quiha nohiria tèxè. Jato qui jonè quiha.

¹² Japi jia pi è qui ma nicano tsi anixèhi quiha ma bichi ca tiisi. Cahèyoixèqui mato ra. Jama, naa ma bichi ca tiisi pistia ca bënnoxèqui mato, nicariayama-piquí na. ¹³ Ja tsi xo toa nëca ca chani nohiria bo qui chaniquia, nicaxo ja cahèyamacano. ¹⁴ Toca tsi jatihuahacaxèhi quiha Isaías yamabá quèñénina jato yoati na. Jabi ja yoani ca tsi xo naa:

“Cahèyamapistiariacaxècani quiha, nicaxo na.

Jasca, tsaya-tsayapama tsi jabija ca jisyamacaxècani quiha.

¹⁵ Quèstoria tsi xo naa nohiria ba shinana.

Nicacasyamacani quiha pè.

Bèpèquèyamacani quiha ra.

Ja tsi xo toa jabija ca jisyamacaxècani quiha rë.

Ja tsi xo toa nicayoiyamacaxècani quiha rë.

¿Jènahuariahax è qui ri ja bèsocana, jènimahuahacaxèna?”

i Isaías yamabo ni quiha jato yoati na.

¹⁶ Jama, shoma xo mato ra. Tsaya-tsayapama tsi jabija ca jisqui mato ra. Jasca jia tsi jabija ca jahuè bo nicahi quiha mato pahoqui. ¹⁷ Jatsi ma shina-bènyomano ra. Jabi èa ma jisquè. Jasca, noho chani ma nicaquè. Jabi ma jisi ca jisti bo, naa è acai ca jisti bo ó quèèni quiha huèstima ca Dios Chani yoanish cabo jisxèna. Jasca, ma nicaha ca chani nicati ó ja quèècani quiha, nicati mètsama jaca nori —nèa tsi jahuè rabèti bo qui Jesu nëcaniquè.

*Ja yoaha ca chani Jesú bërohuana
Marcos 4.13-20; Lucas 8.11-15*

18—Ea nicacana. Jaboqui yoaha ca chani bërohuaxëquia, naa bëro sayanish ca chani yoati na. Ma cahëyoino. 19 Toa bahi tapai ca bëro jascaria tsi xo toa Ibo Dios Chani cahëyamacanaibo, nicaxo na. Ja nicacano tsi quiha johi quiha Satanás. Joxo tsi quiha jato shina ó banaha ca Chani mëbihi quiha rë. 20 Jasca, maxax qui sayaha ca bëro jascaria tsi xo nohiria huëtsa. Ranixo tsi Dios Chani biriacani quiha, nicaxo na. 21 Jama, naamayamahi quiha ja chahahuacanaina rë, tapo yama ca jascaria jaca nori iqui na. Dios Chani pi iqui tsi tënëhi tsi jahari bësotapi-cani quiha pë. 22 Jatsi masa xërëquë sayaha ca bëro jascaria tsi xo nohiria huëtsa. Dios Chani nicacani quiha jato ri; jama, Dios quima jato ninihi quiha mai ca jahuë bo, naa jaha ja quëëcanaina. Mai ca jahuë bo shinacani quiha pë. Jatsi Dios Chani, naa sayaha ca bëro tsihaqui quiha parata ó ja quëëcanaina ra. Jasca, tsihaqui quiha jato ranihuahai ca jahuë bo rë. Ja quëshpi tsi jato shina ó tsi anitimaxëni tsi xo Dios Chani ra. 23 Jama, mai jiaxëni cato ó ca sayahaca ca bëro jascaria tsi xo nohiria huëtsa, naa Dios Chani nicacanaibo. Nicaxo tsi Dios Chani cahëcani quiha ra. Dios bax saihuacani quiha. Huësti ca maxo tsi xo cien ca saihuahaina. Maxo huëtsa tsi xo setenta ca saihuahaina. Maxo huëtsa tsi xo treinta ra —nëa tsi Jesu nëcaniquë, jahuë chani bërohuahi na.

Trigo bimi naxërëquë ca masara chani

24 Jatsi chani huëtsa jahuë rabëti bo qui Jesú aniquë, naa Diós nohiria copixëhai yoati na. Ja nëcaniquë:

—Bëro jia ca jahuë huaí tsi joní sayahai ca jascaria tsi xo Diós otohaina. 25 Jama, ibo oxano tsi baquichá johi quiha ibo qui caxahai cato. Joxo tsi bëro yoi sayahi quiha iboba huaí no pë. Masara ca bëro quiha. Jahuë trigo naxërëquë tsi quiha toa bëro sayahi quiha pë. Sayahax jabahi quiha. 26 Jatsi quiha shinahaniquë trigo. Bimijaquë tsi quiha jisiquiniquë masa ri. 27 Jatsi quiha huaí ibo qui yonati bo bëcaniquë. Johax, “Bëro jia ca roha no bananiquë huaí no pë, taitá. ¿Jahuëniyahax masa joha sa?” i jaca ni quiha. 28 Jatsi ibo nëcaniquë: “Tonía masa bëro bananiquë pë è qui caxahai cato” iquina. Jatsi, “¿Masa mëxaxëhi ni noa ra?” i ibo qui yonati bo niquë. 29 “Ayamacana. Masa pi mëxaquí tsi noho trigo ri ma mëxamitsa rë. 30 Jariapari ja shinahabëquicano. Jatsi tésatiyá tsi ‘Masa pari mëxacana’ ixëquia yonati bo qui. Mëxaxo tsi nëxacana mëshati. Jaquirëquë noho trigo xobo qui bëcahuë, tésaxo na” i noho yonati bo qui xëquia —nëa tsi Jesu nëcaniquë.

*Mostaza bëro chani
Marcos 4.30-32; Lucas 13.18-19*

31 Jatsi chani huëtsa Jesú yoaniquë:

—Huaí tsi bëro mishni quiha, naa mostaza bëro joní bananina. Toa bëro jascaria tsi anixëhi quiha Diós nohiria bo otohaina. 32 Mishni-mishniria tsi xo naa bëro ra. Jama, shinahaquí tsi pistiama tsi xo jahuë jihui ra. Banahaca ca jochai ca huëtsa bo oquë quiha. Shinahacax jihui manëhi quiha. Jatsi jahuë mëshi bo ó tsi paihi quiha isa bo ra —i Jesu niquë tiisimahi na.

*Levadura chani
Lucas 13.20-21*

33 Jaquirëquë chani huëtsa Jesú yoaniquë:

—Harina somo ca ya yoxá tēohacai ca levadura jascaria tsi xo Diós otōhaina. Tres medidá tsi levadura tēohaqui yoxa, harina tēquē shapohuaxēna —i Jesu niquē.

Ejemplo bá tsi Jesu chaninina

Marcos 4.33-34

³⁴ Nohiria bo qui chanipama tsi nēca ca chani bá roha tsi Jesu chaniniquē. Ejemplo bo yama tsi ja chaniyamani quiha. ³⁵ Jabi ejemplo bá tsi ja chanichaniniquē, Dios Chani yoanish cató quēñēni ca jatihuaxēna. Jabi Jesu yoati ja yoani tsi xo naa:

“Chani bo, naa ejemplo bá tsi nohiria bo qui chanixēhi quiha. Chanihax jonē ca jahuē bo bērohuaxēhi quiha, naa mai nēhohuahanitiya rohari ca jahuē bo” iquiina.

Masara chani Jesú bērohuana, naa trigo naxērēquē ó tsi bēro yoi bananina

³⁶ Jatsi toa nohiria huēstima ca Jesú jisbayaniquē. Jisbayá tsi quiha xobo qui ja jiconiquē. Jatsi jahuē doce ca rabēti bo ja qui bēcaniquē.

—¿Jēnihi ni naa trigo huaí ca masara chani sa? Noqui yoahuē —i ja qui jaca niquē.

³⁷ Jatsi quiha toa chani Jesú bērohuanicuē:

—Ea ti tsi xo toa bēro jía ca banahai cato, naa Nohiria Baquē ē nori cato.

³⁸ Jatsi nohiria bo jascaria tsi xo huai. Jatsi, Dios baquē bo tsi xo toa bēro jia cabo. Jato otoxēhi quiha Dios. Jatsi, Satanás baquē bo tsi xo toa bēro yoi bo. ³⁹ Jatsi ē qui caxahai ca, naa bēro yoi sayanish ca tsi xo Satanás. Jatsi tēsatiyá tsi xo toa xaba rēso, naa jaroha ca bari. Jatsi tēsacanaibo tsi xo ángel bo.

⁴⁰ Mēshahacati ca mēxahacahai ca masa jascariaxēhi quiha jaroha ca bari no, ē joxēquē no. ⁴¹ Noho ángel bo raaxēquia. E otohái cato ó ca jochamacanaibo, yoixēni ca nohiria bo, tihí cabo aquēquēmacaxēcani quiha. ⁴² Aquēquēmaxo tsi tēnētíyá jato niacaxēcani quiha, naa chihi qui masa niahai jascaria. Toá tsi araconaxēcani quiha ra. Jatsi, “Erama. Jishopē” icaxēcani quiha tēñēhi na.

⁴³ Jama, bari huahuahai jascariaxēhi quiha Dios nohiria bo. Jahēpa Dios ya icaxēcani quiha, ja otohái cató no —i Jesu niquē.

Jonē ca parata copixēni ca ejemplo

⁴⁴ —Huai maihuaha ca jahuē copixēni cabo jascaria tsi xo Diós otōhaina —i Jesu niquē—. Jabi huai maihuani ca jahuēmishni bo joní bērohuanicuē. Bērohuaxo tsi quiha toa jahuē bo maihuatēquēhi quiha, nohiria bá cahēyamano iquish na. Jatsi rani tsi jahuē jahuē bo tēquē iniahi quiha, parata bixēna. Toa huai copicatsi quiha. Iniaxo tsi quiha huai copihí quiha, maihuahacani ca jahuē copixēniria cabo bixēna —nēa tsi Jesu nēcanicuē Diós otohái ca yoati na.

Perla copixēni ca ejemplo

⁴⁵ —Copixēni ca perla bo mērahai ca comerciante jascaria tsi xo Diós otōhaina —i Jesu niquē—. Jabi copixēni ca perla bo mērahi cahí quiha joni.

⁴⁶ Huēsti ca perla copixēni ca jisi quiha. Jiaria ca perla quiha. Jisi tsi jahari jahuē xobo qui cahí quiha jahuē jahuē bo tēquē iniaxēna. Parata bicatsi quiha, toa perla copixēni ca copixēna. Parata bixo copihí quiha —nēa tsi Jesu nēcanicuē Diós otohái ca yoati na.

Sani biti nishi ejemplo

⁴⁷ —Sani biti nishi jascaria tsi xo Diós otōhaina —i Jesu niquē—. Jabi ia qui jahuē nishi niahi quiha ibo. Niaxo tsi huēstima ca sani jamēri cabo bichi

quilha. ⁴⁸ Jahuë nishi rëamëno tsi mai quëmapo qui nishi xërëhi quiha. Jatsi tsahohi quiha ibo jahuë sani topixëna. Jahuë caca qui sani jia ca nanëhi quiha. Jama, sani yoi ca niahi quiha. ⁴⁹ Jabi tocaxëhi quiha xaba rësö no. Bocaxë-cani quiha ángel bo jochahuaxëni cabo catiaxëna. Mëstëxëni ca xërëquë ó ca yoi cabo aquëquëmacaxëceni quiha. ⁵⁰ Aquëquëmaxo tsi horno chihí qui jato niacaxëceni quiha. Toá tsi xo huëstima ca ara-aracanaína ra. Toá tsi “Erama. Jishopë” icaxëceni quiha tënëhi na —nëa tsi Jesu nëcaniquë.

⁵¹ Jatsi jahuë rabëti bo Jesú nicaniquë:

—¿Naa é yoaha ca jahuë bo tëquë cahëcanaí? —iquina.

Jatsi,

—Jaahuë. Cahëqui noa ra —i jaca niquë.

⁵² Jatsi Jesú jato yoaniquë:

—Rabé ca copixëni ca jahuë bo jaya xo jodioba yoba tiisimacanaibo, naa ëa banahuacanaibo. Jariapari ca copixëni ca jahuë tsi xo toa Dios Chani yoanish cabá quënëhina. Yoahacaxëti quiha toa chani siri ra. Jasca tobi xo é yoahai ca chani. Yoahacaxëti quiha naa chani paxa ca ri. Tihí cabo jayacani quiha yoati —nëa tsi Jesu nëcaniquë.

Jahuë yaca Nazaret qui Jesu shishonina

Marcos 6.1-6; Lucas 4.16-30

⁵³ Jabi naa ejemplo bo yoaxo tsi quiha Jesú jibsayaniquë. ⁵⁴ Jisbaya tsi quiha jahari jahuë yaca qui ja caniquë. Toa xo tsi jato catiti xobo xo tsi ja tiisimanicuë. Ratënicuë jahuë chani nicanish cabo.

—¿Jahuëniá ca naa tiisi ja bini sa? ¿Jënahuariaxo raca naa jisti bo aqui ni pa? —i nohiria bo niquë—. ⁵⁵ ¿Carpintero José baquë ma ni naa ra? Jahuë jahëhua María, jahuë noma bo, naa Jacobo, José, Simón, Judas, tihí cabo cahëqui noa ra. ⁵⁶ ¿Nëá tsi racayamayamahi ni jahuë poi maxco bo ri? ¿Jahuëniá ca naa tiisi ja jabini pa? —i jaca niquë Jesu yoati na.

⁵⁷ Jatsi pë Jesu pasomaha ja bësocanicuë. Jato qui yoi ja ini quiha. Jatsi Jesú jato yoaniquë:

—Mai huëtsá ca Dios Chani yoati ibo pi chanino tsi ja qui nicayoicani quiha toá ca nohiria ra. Jama, jahuë maí ca nohiria bo qui ja chanipino tsi ja qui nicayamahi quiha jahuë yacatá cabo, jahuë xobó cabo ri. Jato qui yoi quiha jahuë chani rë —nëa tsi Jesu nëcaniquë jahuë yacatá ca nohiria bo yoati na.

⁵⁸ Japi jahuë yacata xo tsi jisti huëstima cabo ja ayamani quiha rë, ja qui ja chitimiyamacani igui na.

14

Ashimati ibo Juan nanina

Marcos 6.14-29; Lucas 9.7-9

¹ Toatiyá tsi quiha chama-chamaria Herodés nicaniquë Jesu yoati na. Nicahax,

² —Ashimati ibo Juan yamabo tsi xo toa ra. Tonia ja bësotëquëyamëquë iguia ra. Ja tsi xo toa jisti bo ati mëtsa xo toa joni tia —i Herodes niquë jahuë yoati bo qui.

³ Jabi siri tsi soldado bo Herodés raani quiha Juan qui tsamiti. Tsamixo tsi quiha preso qui ja nanëni quiha, Herodías, naa jahuë noma Felipe ahui tahëxo na. ⁴ Jasca, pasiyamani quiha Juan.

—Anoma tsi xo toa mi noma ahui bichiina, mi ahui iti —i ja qui Juan paoni quiha.

⁵ Ja igui tsi Herodés Juan acasnicuë. Jama, jodiobo qui ja raquëni quiha “Dios Chani yoati ibo-iboria xo Juan” i nohiria bo ni quëshpi na.

⁶ Jatsi Herodes coní bari tséquëquë tsi quiha Herodías jahi pabëniquë quëtsocani ca nohiria bësojó no. Chama Herodes qui jiaría quiha ja pabëhaina.

⁷ Rani tsi quiha jahi pistia qui Herodes nëcaniquë:

—Mia parayamaquia. Jahuëcara ca, naa jaha mi quëëhai ca mi qui axëquia ra—iquiina.

⁸ Jatsi quiha jahuë jahëhua ya pari ja chaninaniquë, jahuë yoba nicaxëna. Nicahax,

—Ashimati ibo Juan mapo ë qui ahuë ra, ratá no —i chama Herodes qui ja niquë pë.

⁹ Jatsi quiha Herodes cohuëniquë nicahax na. Jama, nohiria bo bësojó “Mia parayamaquia ra” i ja ni iqui tsi jahuë yonati bo ja raaniquë Juan mapo biti.

¹⁰ Jatsi quiha Juan mapo ja tëquëësacaniquë rë preso xo na. ¹¹ Tëquëësaxo tsi jahari jahuë mapo ja bëcaniquë ratá no. Xotaco qui ja acani quiha. Jatsi jahuë jahëhua qui ja boniquë. ¹² Jaquirëquë quiha Juan yora jahuë rabëti bá biniquë maihuaxëna. Maihuahax Jesu qui ja bocaniquë yoaxëna.

Cinco mil ca nohiria Jesú pimanina

Marcos 6.30-44; Lucas 9.10-17; Juan 6.1-14

¹³ Juan namëni nicahax Jesú jibayaniquë notí no. Jibaya tsi quiha nohiria yama ca iti qui ja caniquë jamë icatsi na. Cohuë ja ini quiha. Jama, ja cahai ca yoati tsi nohiria bá nicaniquë rë. Nicaxo tsi quiha jato yaca bo ja jibayacaniquë Jesu banahuaxëna. Maí tsi ja bocani quiha. ¹⁴ Jatsi noti ax tëmahinaxo tsi quiha toá ca mani ca nohiria bo Jesú jisniquë. Manahi ja icani quiha. Jato noiquí tsi quiha jato anomaria cabo ja jënimahuaniquë.

¹⁵ Jatsi yata tsi quiha ja qui jahuë rabëti bo bëcaniquë. Bëcanax,
—Caquë bari ra. Yama tsi xo xobo bo nëá no rë. Nohiria bo jahari raahuë, yaca bo xo tsi piti ja copicano iquish na —i Jesu qui jaca niquë.

¹⁶ Jatsi,
—Ja boyamacati xo. ¿Japa mato tsa ni? Jato pimacana —i jahuë rabëti bo qui Jesu niquë.

¹⁷ Jatsi ja quëbicaniquë:

—Cinco ca mapari bo, dos ca sanino, tihí roha jaya xo noa ra piti—iquiina.

¹⁸ Jatsi,

—E qui acahuë —i Jesu niquë.

¹⁹ Jatsi nohiria Jesú tsahomayoniquë huasí no. Tsahomaxo tsi quiha cinco ca mapari bo, dos ca sanino, tihí cabo Jesú biniquë. Bichi tsi quiha mana qui tsayapama tsi “Gracias” i Dios qui ja niquë piti quëshpi na. Jatsi mapari ja tëxënamaniquë. Tëxënamaxo tsi quiha jahuë rabëti bo qui ja méaniquë nohiria bo qui taati. ²⁰ Jatsi piniquë nohiria tëquë. Ja séyacaniquë. Jaquirëquë pihama ca quësi bo ja catiacaniquë. Doce ca caca quiha ja rëacani quiha. ²¹ Jabi cinco mil ca joni bo ini quiha, naa mapari picanaibo. Tocahacayamani quiha yoxa bo, xocobo, tihí cabo ra.

Jënë cacha Jesu conina

Marcos 6.45-52; Juan 6.16-21

²² Jatsi noti qui jahuë rabëti bo Jesú jicomaniquë, ja bëbo ia ja shitacano iquish na. Jasca, nohiria tëquë jahari jato xobo qui ja raaniquë. ²³ Raahax tsi quiha maca bo qui ja caniquë jamë no. Toá tsi ja bëhoxcasni quiha. Cahax toá tsi jamë ja iniquë. ²⁴ Jasca, toá ja no tsi quiha quëmapo basi, naa ia nëpax tsi quiha jahuë rabëti bo iniquë notí no. Toá tsi quiha chocá jato noti niahi iniquë rë, yoshi xotohai ca bëchá ja icani quëshpi na. ²⁵ Jabi patiari quëonox

pari no tsi jato qui Jesu caniquë. Jënë tsi ja coni quiha. ²⁶ Jatsi jënë tsi ja cohai jisi tsi ja raquëcaniquë, bërocamaqui quëscahuahi na.

—Bërocamaqui rë —iria tsi jaca niquë, raquëhi na.

²⁷ Jatsi jato qui Jesú chanitapiniquë:

—Chamacana. Ea yoi xo naa. Raquëyamacana —iquiina.

²⁸ Jatsi Pedro chaniniquë:

—Mia pi yoi no tsi ëa quënahué, Ibobá. Jënë tsi mi qui ë jono ra —iquiina.

²⁹ Jatsi,

—Johué —i Pedro qui Jesu niquë.

Jatsi noti Pedro huajaniquë. Jënë tsi tapitsi quiha ja niquë ra Jesu qui.

³⁰ Capama tsi quiha yoshi xotoriahai ca ja tsaya-tsayaniquë. Tsayahax ja raquëniquë. Jatsi jëtëquëtsijaniquë ra. Jatsi ja quënaniquë:

—Ea mëbihué, Ibobá —iquiina.

³¹ Jatsi quiha jahuë mëquë Jesú bitapiniquë mëbixëna. Mëbihax,

—Iriama tsi xo ë qui mi chitimihaina rë. ¿Jënihax tsi ë qui mi chitimiy-oyamaha? —i ja qui Jesu niquë.

³² Jaquirëquë noti qui ja jicocaniquë. Janacatapini quiha yoshi xotohaina ra. ³³ Jatsi Jesu bësojó tsi noti ca joni bo mëniniquë. Mënihax,

—Dios Baquë yoi xo mia ra —i jaca niquë.

Genesarët ca iquicanaibo Jesú jënimahuanina

Marcos 6.53-56

³⁴ Jatsi quiha ia ja shitacaniquë, naa Jesu, jahuë rabëti bo. Shitaxo tsi quiha Genesaret mai qui ja rërëcaniquë. ³⁵ Toá ca nohiria bá Jesu cahëtapini quiha. Cahëxo tsi quiha bamaxoma tsi chani ja raacaniquë toá ca mai ca nohiria bo qui. Jatsi iquicanaibo, anoma cabo, tihí cabo ja qui bëcaniquë jënimahuahacaxëna. ³⁶ Jasca, jahuë sahuëti quëpë ja motsacascani quiha,

—¿Motsapi? —iquiina.

Jatsi jënimahuahacaniquë jahuë sahuëti motsanish cabo tëquë ra.

15

Nohiria jochamahai cato

Marcos 7.1-23

¹ Jatsi jodioba chama bo, yoba tiisimacanaibo, tihí cabo bëcaniquë Jerusalén ax na. Ja bëcana ca tsi Jesu ja nicacaniquë:

² —¿Jënixo tsi noba rëquëyamaba jabi bo ayamacahi ni mi rabëti bo ra? Mëhocoyamacani quiha pë, oriquinox pari —i Jesu qui jaca niquë.

³ Jatsi Jesú jato quëbiniquë:

—¿Jënixo tsi Dios yoba nicayamacanai ra mato ri? Dios yoba mato qui oquë tsi xo mato jabi bo pë. ⁴ Jabi “Mato jahëpa bo, mato jahëhua bo, tihí cabo noicana” i Dios ni quiha. Jasca, “Namëhacati xo toa jahuë jahëpa jahuë jahëhua ranihai cato” i Dios ni quiha. ⁵ Jama, mato qui jënima tsi xo mato noitiria ca nabo mëbiyamahaina rë. Mato nabo qui nëcaqui mato pë: “Jishopë. Mato mëbitimaxëni xo noa rë, Dios qui mato parata no aquitaha quëshpi na” i mato nabo quii quiha mato ra. Jabi tocaqui mato pë, jato mëbicasyamahi na.

⁶ Jatsi mato nabo mëbiyamaqui mato pë. Mato qui jënima tsi xo toca ca ma chanihaina rë. Anoma quiha. Toca tsi Dios yoba chahahuayamaqui mato ra, mato jabi bo banahuacatsi na. ⁷ Jatsi quiamixëni xo mato iquia. Mato yoati tsi chaniquí tsi Isaiás yamabá parayamani quiha ra.

⁸ “‘Chaniquí tsi jia tsi ëa ocahuacani quiha naa nohiria, jama, ëa basi jato shina norí’ i Dios ni quiha.

⁹ Jasca, ‘Mahitsa ë qui aracani quiha. “Dios yoba tsi xo naa” icani quiha pë, tiisimahi na, jato mahitsa ca yoba nori’ ii quiha Dios”

nëa tsi quiha Isaiás yamabo nëcaniquë mato yoati na —i jodioba chama bo qui Jesu niquë quëbihi na.

¹⁰ Jaquirëquë Jesú nohiria bo quënaniquë. Quënahax,

—Ea nicacana. Ma cahëno ra. ¹¹ Nohiria jochamayamahi quiha ja pihaina ra. Jama, nohiria jochamahai ca tsi xo toa yoi ca ja chanihaina, yoi ca ja shinahaina. Tihi tsi xo toa ja jochamahaina —i jato qui Jesu niquë.

¹² Jatsi quiha jahuë rabëti bo ja qui bëcaniquë. Bëhax tsi,

—Bëcanish ca chama bo mi caxahuaquë pë. Jato qui yoi quiha mi yoahana —i Jesu qui jaca niquë.

¹³ Jatsi quiha Jesú jato quëbiniquë:

—Dios yoba ma xo toa ja tiisimacanina ra; nohiria yoba yoi roha nori. Naa-mayamaxëhi quiha toa ra. Quëyohacaxëhi quiha ja tiisimacanaina. ¹⁴ Jatsi jato qui shina-huëjeyamacana. Bëco ca rëquënitini ibo bo ca xo ra. Bëco ca joni pi bëco ca nohiria mëpino tsi naporuquini qui paquëcaxëcani quiha jato tëquëta ra. Jabi toca tsi ca xo —i Jesu niquë jodioba chama bo yoati na.

¹⁵ Jatsi Pedro chaniniquë:

—No joma mi yoaha ca chani rë. Mi chani bërohuahuë —iquiina.

¹⁶ Jatsi Jesú chaniniquë:

—¿Cahëyamahi ni mato ri pa? ¹⁷ Mato poco ax paquëhi quiha ma pihaina.

¹⁸ Jama, nohiria shina yoi ca quima ax johi quiha yoixëni ca chanihaina. Ja tsi xo toa nohiria jochamahaina ra. ¹⁹ Jasca, nohiria shina ax johi quiha yoi ca shinahai ri. Yoi ca pi shinaquï tsi anoma ca axëhi quiha ra. Shina yoi iqui tsi tobi xo ati ibo bo. Tobi quiha joni huëtsa ahui bichüina. Tobi quiha anoma ca chotahaina, quiahaina, ranimis-haina. ²⁰ Nohiria jochamahai ca tsi xo toa bo iquia ra. Jama, mëchocoxoma pi no pino tsi no jochahai ca quëscahuacani quiha pë. Jama, nohiria yoihuayamahi quiha toa mëchocoyamahaina ra —nëa tsi Jesu nëcaniquë jahuë rabëti bo qui.

Carayana ca yoxa Jesu qui canina

Marcos 7.24-30

²¹ Toa ax riquihax tsi quiha basima ca Tiro, Sidón mai qui Jesu caniquë.

²² Jabi toá ca racanish ca yoxa Jesu qui joniquë. Carayana ja ini quiha; naa cananeabo icanai cato. Johax,

—Ea shinahuë, Ibobá, chama David yamaba चाहितखोकोबा. Noitiria tsi xo noho jahini rë. Yoshi jaya xo ra. Tënëmahi quiha; anoma quiha —i Jesu qui ja niquë.

²³ Quëbiyamaniquë Jesu nicaxo na. Jatsi quiha ja qui jahuë rabëti bo bëcaniquë. Bëhax,

—Naa yoxa raahuë. Jari noqui banahuahi quiha pë. Anoma xo ja pacots-huahaina ra —i Jesu qui jaca niquë.

²⁴ Jatsi quiha yoxa qui Jesú chaniniquë:

—Israël ca nohiria qui roha ë raahacaniquë mëbiti, bënohai ca oveja bo jascaria jaca nori iqui na —iquiina.

²⁵ Ja yoani ca nicahax tsi quiha ja bësojô tsi carayana yoxa mëniniquë johax na. Bënapama tsi,

—Ea mëbihuë ra, Ibobá —i ja qui yoxa niquë.

²⁶ Jatsi quiha yoxa qui Jesu chanitëquëniquë:

—Noba jabi pasomaha tsi xo carayanabo mëbihaina ra; naa noba mapari ina bo qui niahai jascaria nori —iquiina.

²⁷ Jatsi quiha yoxá Jesu quëbiniquë:

—Jabija, Taitá. Yoiria ca carayana ca roha ca ëa xo naa ra, jama, ¿jato chama mesa quima ax paquëhax ca quëxë mishni bo piyamayamahi ni ina bo ra? Jatsi ëa shinahuë ra —i Jesu qui ja niquë.

²⁸ Japi Jesú quëbiniquë:

—Jiaria tsi xo toa ë qui mi chitimihaina, yoxá. Mi bax acacaxëhi quiha jaha mi quëëhaina iquia —iquiina.

Jatsi jënimaritsiniquë jahuë jahini ra.

Huëstima ca noitiria cabo Jesú jënimahuanina

²⁹ Toanahax riquicaya tsi quiha ia Galilea tsi Jesú quëñibonaniquë. Quëñihax maca ja tëmahinaniquë. Jatsi ja tsahoniquë. ³⁰ Jatsi ja qui bëcaniquë nohiria misco. Ja qui huico yoi bo, bëco cabo, yora choni jaya cabo, pasoyamacanaibo, iquicanaibo, tihí cabo quiha ja bëcaniquë. Bëxo tsi quiha Jesu tahë tsi jato ja janacaniquë ja jënimahuano. Jatsi quiha Jesú jato jënimahuaniquë. Chanitsi jaro cabo ni quiha. Jënimahuahacani quiha yora yoi jaya cabo. Tapini quiha huico yoi cabo. Taisni quiha bëco cabo ra. ³¹ Jisi tsi nohiria bo ratëniquë. Jatsi Israel ca Dios nohiria bá ocahuaniquë raniquí na.

Cuatro mil ca nohiria Jesú pimanina *Marcos 8.1-10*

³² Jatsi quiha jahuë rabëti bo Jesú quëñaniquë.

—Noitiria tsi xo naa nohiria bo rë. Tres bari no tsi ë bëta-jacaquë. Yama tsi xo ja picanaina rë. Paxnacani quiha ra. Toca tsi jato xobo qui raacasyamaxo ëa ra, ja rësocana-camitsa iqui na —nëa tsi Jesu nëcaniquë jahuë rabëti bo qui.

³³ Jatsi,

—¿Jënahuariaxo raca jato bax mapari no bina ra? Xobo yama ca iti tsi xo naa ra —i ja qui jahuë rabëti bo niquë.

³⁴ Jatsi quiha,

—¿Jahuë tihí ca mapari jaya ni mato? —i jato qui Jesu niquë.

Jatsi,

—Siete ca mapari, rabë roha ca sani mishni bo, tihí roha jaya xo noa rë —i jaca niquë.

³⁵ Jatsi mai tsi quiha Jesú nohiria bo tsahomaniquë. ³⁶ Tsahomaxo tsi quiha siete ca mapari bo, sani mishni bo, tihí cabo Jesú biniquë. Bichi tsi quiha “Gracias” i Dios qui ja niquë, piti quëshpi na. Jaquirëquë mapari, sani bo, tihí cabo ja tëxënamaniquë. Tëxënamaxo tsi quiha jahuë rabëti bo qui ja aniquë nohiria qui ja mëacano. Jatsi nohiria huëstima ca qui ja mëacaniquë piti. ³⁷ Piniquë nohiria tëquë. Ja sëyayocaniquë. Ja picaquë tsi quiha pihama ca quësi mishni bo ja topiyocaniquë. Jatsi siete ca caca ja rëacaniquë pa. ³⁸ Jabi cuatro mil ca joni bo pimahacani quiha. Tocahama ini quiha yoxa bo, xocobo ri. ³⁹ Jaquirëquë jato xobo qui jahari Jesú raaniquë. Raahax noti qui ja jiconiquë. Jicohax Magdala icanai ca mai qui Jesu caniquë.

16

Mana ca jisti jodioba chama bá jiscasnina *Marcos 8.11-13; Lucas 12.54-56*

¹ Jatsi jodioba chama bo Jesu qui bëcaniquë tanamaxëna. Joi ja mëracascani quiha ja qui quësocatsi na. Ja iquí tsi,

—Jisti no bax mi ano ra. Jisti pi mi ano tsi mia chahahuaxëqui noa ra —i ja qui jaca niquë tanamaxëna.

² Jatsi nëca tsi Jesú jato quëbiniquë:

—Naipá ca jisti bo cahëxëni xo mato ra. “Jiasharihi quiha” ii quiha mato, yata tsi xabaria ca nai jisi na. ³ Jasca, “Jopaima xo oi ra” iqui mato baquishmari tsi tsëmoria ca xabaria ca nai jisi na. Jabi nai tsaya-tsayaquí tsi oi johai ca, yota johai ca, tihí cabo cahëriaquí mato ra; jama, mato xërëquë ó ca jëniphai ca cahëyamaquí mato iquia. ⁴ Anomaria tsi xo naa jaboquí bësocanaibo ra. Dios cahëtimaxëni ca xo ra. “No bax mana ca jisti mi ano” ii quiha mato. Ayamaxëquia ra, ë qui ma chitimiyamahai iqui na. Jama, huësti ca jisti roha mato qui acacaxëhi quiha, Dios chama jaya ca ë nori ca ma cahëno iquish na. Tres bari no tsi mai xara ixëquia. Jaquirëquë tsëquëxëquia Jonás yamabo tsëquëni jascaria —nëa tsi Jesu nëcaniquë jodioba chama bo qui.

Jatsi jato ja jisbayaniquë.

*Jodioba chama bo qui jahuë rabëti bo Jesú quiniamanina
Marcos 8.14-21*

⁵ Jatsi quiha ia rabëquëx ca qui ja shitacanicuë. Shitahax,

—Jishopë. Mapari piti no shina-bënoquë rë —i jahuë rabëti bo niquë.

⁶ Jatsi quiha,

—Jodioba chama bo qui quiniacaxëcahuë; mapari levadura jascaria ca xo pë —i jato qui Jesu niquë.

⁷ Jatsi jato xërëquë tsi chaninatsijacanicuë:

—Toca tsi chanihi quiha pë, mapari no shina-bënoha iqui na —iquina.

⁸ Jabi ja chaninacanai ca Jesú cahënicuë. Cahëhax ja nëcaniquë:

—¿Jënihax joi i-icanai rë, naa ma shina-bënoha ca mapari yoati na? Iriama tsi xo ë qui ma chitimihaina rë. ⁹ ¿Jari cahëyamahi ni mato pa? Shina-paricahuë. ¿Cinco ca maparí tsi cinco mil ca joni bo ë pimayamahitaha? Jaquirëquë, ¿doce ca caca ma rëayamahita? ¹⁰ Jasca, ¿siete ca maparí tsi cuatro mil ca joni bo ë piyamamayëta? Jaquirëquë, ¿siete ca caca ma rëayamayëta?

¹¹ ¿Jëneriahax ë yoahai ca cahëyoyamacanai sa? Mapari yoi yoati chaniyamaquia. Jodioba chama bo qui quiniacaxëcahuë iquia; mapari levadura jascaria ca jaca nori —nëa tsi jato qui Jesu nëcaniquë.

¹² Jatsi jodioba yoiria ca yoba qui ja quiniacaxëti nori ca ja cahëcaniquë; mapari levadura yoati ja chaniyamaha nori.

“Dios Baquë xo mia” i Pedro nina

Marcos 8.27-30; Lucas 9.18-21

¹³ Jatsi quiha Cesareá ca Filipo yaca qui Jesu cahënicuë. Cahëxo tsi quiha jahuë rabëti bo qui nicaniquë:

—¿Tsohuë ni ëa? ¿Jënihi ni nohiria bo ëa yoati na? —iquina.

¹⁴ Jatsi quiha jahuë rabëti bá quëbiniquë:

—“Ashimanish ca Juan yamabo përe xo mia” ii quiha huësti huësti ca nohiria. Jasca, “Elías yamabo xo mia” ii quiha nohiria huëtisa. Jasca, “Tonia Jeremías yamabo; ¿Dios Chani yoanish ca huëtisa ma ni?” ii quiha huëtisa bo —i Jesu qui jaca niquë.

¹⁵ Jatsi jato Jesú nicaniquë:

—¿Japa mato tsa ni? ¿Tsohuë ni ëa yoi? —iquina.

¹⁶ Jatsi,

—Dios raahacanish ca Xabahamati Ibo xo mia ra; Bësohai ca Dios Baquë mi nori —i Pedro niquë.

¹⁷ Jatsi Jesú quëbiniquë:

—Shoma xo mia Simón, Jonás baquë. Jabija tsi xo toa mi yoahana. Dios baquë ë nori ca mia cahëmaquë noho naipá ca Jahëpa. Nohiria bá yoahai

ma xo toa mi shinahaina ra. ¹⁸ Mi yoaha iqui tsi nicaparihuë. Maxamaxaria xo mia Pedró. Jabi tocahi quiha mi janë. Mia cache noho iglesia axëquia. Bëbohacatimaxëni ixëhi quiha ra, naa toa ë qui chitimicaxëcanaibo. Jato bëboyamaxëhi quiha Satanás chama ra. ¹⁹ Jasca, mi qui mana ca chama axëquia, chitimicaxëcanaibo rëquëniniti. Jato yobaxëqui mia ra. Toatiyá tsi, “Jënima tsi xo toa jabi ma acaina” i pi mi no tsi jënimaxëhi quiha ja acanaina mana ca Dios qui. Jasca, “Anoma tsi xo toa acaina” i pi jato qui mi no tsi tocaxëhi quiha Dios ri. Tocaxëti quiha mi yoba —nëa tsi Pedro qui Jesu nëcaniquë.

²⁰ Jatsi jahuë rabëti bo Jesú yobaniquë, nohiria bo Xabahamati Ibo-iboria ja iqui ca ja yoayamacano.

Ja rësoxëhai yoati tsi Jesu chaninina
Marcos 8.31; 9.1; Lucas 9.22-27

²¹ Jaquirëquë quiha bëroria tsi jahuë rabëti bo qui chaniti Jesú chitahëhuaniquë. Ja nëcaniquë:

—Jerusalén qui ë cati xo. Toa xo tsi ëa tënëmacaxëcane quiha yosibo, arati ibo-iboria bo, Dios yoba tiisimacanaibo. Ea namëcaxëcane quiha ra. Jama, tres bari quirëquë bësotëquëxëquia —i jato qui Jesu niquë.

²² Nicaxo tsi quiha Pedró Jesu aquëquëmaniquë, jamë ca ja qui chanixëna. Jatsi Jesu raahatsijahuaniquë.

—Dios qui yoi tsi xo toa mi yoahana ra. Anoma quiha. Mi rësoyamano iquia —i ja qui Pedro niquë.

²³ Jatsi Pedro quiri bësohax tsi,

—Cata, Satanás. Jochati ëa tanamaqui mia pë. Diós shinahai ca jasca ma xo toa mi shinahaina ra, joni shinahai jasca nori —i ja qui Jesu niquë.

²⁴ Jatsi quiha jahuë rabëti bo Jesú yobaniquë:

—Ea banahuapicasquí tsi ma acatsai ca ma shinayamaxëti xo. Mato cruz ma iacano. Iaxo ëa ma banahuano. ²⁵ Jabi xabahamahacayamaxëhi quiha toa jahuë noma jabi ó quëëmíxëni cato. Jama, xabahamahacaxëhi quiha ëa iqui tsi jahuë noma jabi chihohuahai cato. Bëbo-bëboriaxëhi quiha ra. ²⁶ Jabi jatiroha ca maí ca jahuë bo nohiríá bëbomitsa; jama, tënëtiya pi qui caquí tsi ¿jahuë raca ja bëbona? Noitiria ca tsi xo toa. Tocapiquí tsi ¿jénahuarixoxo joni ana, bësotëquëxëna? ²⁷ Jatsi quiniacaxëcahuë. Noho Jahëpá oquë tsi joxëquia ra, noho ángel bo ya. Joxo tsi toa barí tsi jatiroha ca nohiria copixëquia ja acani quëshpi na. ²⁸ Mato parayamaquia. Ma rësonox pari no tsi noho oquë, noho chama, tihi cabo jixxëqui mato huësti huësti cabo, rey jascaria tsi ë joxëquë no —i Jesu niquë jahuë rabëti bo yobahi na.

17

Jahuë oquë Jesú jismanina
Marcos 9.2-13; Lucas 9.28-36

¹ Seis bari quirëquë quiha Pedro, Jacobo, Juan, tihi cabo maca qui Jesú boniquë jato bëta jamëxëna. ² Bohax tsi quiha jahuë jaria rarinaniquë jato bësojó no. Bari jascaria jahuë bëmana huahuani quiha. Jasca, joxonariani quiha jahuë sahuëti, huëa jascaria. ³ Jatsi quiha toá tsi jisiquiniquë Moisés yamabo, Elías yamabo. Tihi quiha. Jesu ya chanihi quiha ja icaniquë. ⁴ Jatsi quiha Jesu qui Pedró chaniniquë:

—Noquí jiaría tsi xo nëa no iquiina. Nëa xo tsi tres ca tapas axëquia ra. Huësti mí-na, huësti Moisés yamabá-na, huësti Elías yamabá-na ra. ¿Mi qui jia ni? —nëa tsi quiha Pedro nëcaniquë.

⁵ Chanijano tsi quiha bajrahai ca tsémó jato mapaniquë. Jatsi tsëmo xërëquë ó ca joi ja nicacanicuë:

—Noho Baquë tsi xo naa ra. Noiquia ra. E qui jia tsi xo toa ja acaina ra. Nicacana ra —i joi niquë jato qui.

⁶ Jatsi quiha jahuë rabëti bo raquënicuë joi nicahax na. Mai qui ja paquëcaniquë jato bëmama mai quiri. ⁷ Jatsi jato qui Jesu caniquë. Caxo tsi jato ja motsanicuë.

—Joicana. Raquëyamacana —i jato qui ja niquë.

⁸ Jatsi bëpëquëquí tsi quiha Jesu roha ja jiscanicuë. Jamëpistia ja ini quiha.

⁹ Jaquirëquë macaná rënichipama tsi jahuë rabëti bo Jesú yobanicuë:

—Bëpacana. Ma jisi ca jahuë bo nohiria bo jari yoayamacana. Jariapari ë bësotëquëxëti xo ra, naa Nohiria Baquë ë nori cato —i jato qui ja niquë.

¹⁰ Jatsi quiha jahuë rabëti bá nicaniquë:

—Xabahamati Ibo jonox pari no tsi joxëti quiha Elías ii quiha noba yoba tiisimacanaibo ra. ¿Jënihi ni? —i Jesu qui jaca niquë.

¹¹ Jatsi Jesú jato quëbiniquë:

—Jabija tsi xo toa ja yoacanaina ra. Jariapari joxëti xo Elías, jatiroha ca rohahuaxëna. ¹² Jama, joniquë Elías iquia ra. Ja joquë tsi nohiria bá cahëyamaniquë rë. Jasca, ja yosicaniquë pë. Jascaria tsi ëa, naa Nohiria Baquë ca tënëmamaxëceni quiha —i jato qui ja niquë.

¹³ Jatsi nohiria ashimanish ca Juan yamabo yoati tsi Jesu chaniha nori ca jahuë rabëti bá cahënicuë.

Yoyo jaya ca baquë Jesú jënimahuanina

Marcos 9.14-29; Lucas 9.37-43

¹⁴ Nohiria misco qui ja cahëcaquë tsi quiha Jesu qui joni joniquë. Johax tsi Jesu bësójó tsi ja mëniniquë.

¹⁵ —Noho baquë shinahuë, Ibobá. Yoyo jaya xo rë. Anomaria tsi xo jahuë pahë. Huëstima tsi chihi, jënë, tihí cabo qui paquëhi quiha rë. ¹⁶ Mi rabëti bo qui noho baquë ë bëquë, ja jënimahuacano. Atimaxëni ca xo rë —nëa tsi Jesu qui joni nëcaniquë.

¹⁷ Jatsi Jesu chaniniquë:

—Chahahuatimaxëniria ca yosaxëni ca nohiria xo mato ra. ¿Jahuë tihí tsi mato qui yosaxëni ni ëa rë? Jahuë baquë nëri bëcana ra —i Jesu niquë.

¹⁸ Jatsi quiha baquë ó ca yoshi Jesú raahaniquë. Raahajahuë tsi quiha baquë químa yoshi tsëquënicuë. Jënimatapiniquë baquë.

¹⁹ Jaquirëquë Jesu jahuë rabëti bá nicaniquë jamë ja iquë no:

—¿Jënixo tsi jahuë yoshi tsëcanoma no iqui rë? —i ja qui jaca niquë.

²⁰⁻²¹ Jatsi Jesu nëcaniquë:

—E qui ma chitimiyamayoicanai iqui na. Mato parayamaquia. Aniyamaahi quiha ë qui ma chitimihaina rë. Jabi banahacanox pari tsi quiha mishni-mishniria tsi xo mostaza bëro. Jama, ani-aniriahi quiha toa jocohai cato. Chahitaxëni manëhi quiha. Jabi mostaza jocohai ca jascaria pi ë qui ma chitimihai ca anino tsi anomariaxëhi quiha ma acaina ra. Jatsi, “Toa tsi cata” i pi naa maca qui ma no tsi caxëhi quiha ra —nëa tsi Jesu jato qui nëcaniquë.

Ja nahai yoati tsi Jesu chanitëquëninina

Marcos 9.30-32; Lucas 9.43-45

²² Jaquirëquë bari huëtsá tsi jahuë rabëti bo catiquë tsi quiha jato qui Jesu nëcaniquë.

—Nohiria caxaxëniria cabo qui ë mëahacaxëti xo. Jatsi ëa, naa Nohiria Baquë nori ca acaxëceni quiha ra. Jama, tres bari quirëquë bësotëquëxëquia ra —i ja niquë.

²³ Jatsi jahuë rabëti bo cohuënaniquë nicahax na.

Arati xobo qui impuesto Jesú copinina

²⁴ Jabi Capernaum mai qui ja cahëcaquë tsi quiha Pedro qui impuesto bicanaibo bëcaniquë jato arati xobo ax na.

—¿Arati xobo qui impuesto copiyamahi ni mato chama sa? —i Pedro qui jaca niquë.

²⁵ Jatsi,

—¿Ocamani? —i jato qui Pedro niquë.

Jatsi quiha xobo qui Pedro jiconiquë Jesu yoaxëna. Jama, ja chaninox pari no tsi Jesu ja qui chaniniquë:

—¿Jahuë shinahai, Simón? ¿Tsohuë quima parata bichi ni maí ca chama bo? ¿Jabë nohiria bo quima ni? ¿Carayanabo quima ni? —i ja niquë.

²⁶ Jatsi,

—Carayanabo tsi xo toa impuesto acaina ra. Jato jabi quiha —i Pedro niquë.

—Jabija tsi xo toa mi yoahana. Jatsi jato qui parata no ayamati xo pa, Diós-na bo no nori iqui na; carayanabo no nomari. ²⁷ Maj. Jato no caxahuayamano. Parata ó pasocani quiha. Japi ia qui cata. Toa xo tsi huëti nishi niahüë. Jariapari ca sani bichi tsi japëcahuë. Toá ca parata copixëni ca jixëqui mia. Bihuë. Impuesto bicanaibo qui toa parata ahuë. Mi impuesto, noho impuesto, tihi cabo mi copino —nëa tsi Pedro qui Jesu nëcaniquë.

18

¿Tsohuë ni toa oquë-oquëria cato?

Marcos 9.33-37; Lucas 9.46-48

¹ Toatiyá tsi Jesu qui bëxo tsi jahuë rabëti bá nicaniquë:

—¿Tsohuë ni toa Diós otohái cató ca oquë cato? —iquiina.

² Jatsi quiha baquë pistia Jesú quënaniquë ja qui ja jono. Quënaxo tsi quiha jato xërëquë tsi baquë pistia ja niimaniquë. ³ Niimahax ja nëcaniquë:

—Mato parayamaquia ra. Xocobo jascaria ma manëti xo ra, Diós otohái ca qui jicocatsi na. Xocobo jascaria pi Dios quiri bësoyamahi tsi jicopistiayamariaxëqui mato iquia. ⁴ Naa xocobo jascaria ma manëti xo. Iriama ca pi ma manëno tsi mato oquëhuaxëhi quiha Diós ja otohái cato xo na. ⁵ Jasca, noho janë tahëxo pi nëca ca baquë joihuaquí tsi ëa ri joihuaqui mato ra —i jahuë rabëti bo qui Jesu niquë—.

Jocha qui paquëhaina

Marcos 9.42-48; Lucas 17.1-2

⁶ Jabi jia tsi ë qui chitimicani quiha naa xocobo ra. Japi noitirixëhi quiha ë quima nëca cabo bësomahai cato iquia. Anomariaxëhi quiha jahuë copi ra. Nëmi ca ia qui tsi tërotamë ca rënëti maxax ya ja niahacaxëti xo iquia. Jama, oquë-oquëria ca copi bixëhi quiha toa joni ra. ⁷ Jabi noitiria tsi xo nohiria tëquë. Dios quima casoti tanamahacacaxëceni quiha ra, jochati. Jama, noitinoitiria tsi xo toa nohiria ë quima casomahai cato. Anomariaxëhi quiha jahuë copi ra.

⁸ Mato mëquënë pi mato jochamano tsi mërëësicahuë. Jasca, mato tahë pi mato jochamano tsi jorëësicahuë. Nëama niacahuë. Oquë tsi xo toa mërëxto jorëxto tsi nai qui cahaina. Noitiria tsi xo toa tënëtiya qui niahacahaina mëquë, tahë, tihi cabo ya. ⁹ Jasca, mato bëró pi mato jochamano tsi bëtsëquëcahuë. Nëama niacahuë. Oquë tsi xo toa huësti ca bëro ya nai qui cahaina. Noitiria tsi xo toa tënëtiya qui rabë ca bëro ya niahacahaina.

*Bënonish ca oveja**Lucas 15.3-7*

¹⁰ ‘Quiniacaxëcahuë. “Anoma tsi xo naa xocobo mishni bo” iyamacana ra. Tobi xo jato ángel bo ra, naa noho Jahëpa bësojó roha mani cabo. ¹¹ Jabi mai qui ë joniquë bëno cabo xabahamaxëna.

¹² ‘Jahuë shinacana? ¿Jënahuaaxëhi ni oveja ibo, naa cien ca oveja jaya cato? Huësti ca oveja pi bënono tsi ¿noventa y nueve cabo jisbayamayamaxëhi ni ibo, jahuë oveja huësti ca mëraxëna? Bënohax ca oveja mëraxëhi quiha ra. ¹³ Bichi tsi rani-ranihi quiha. Naa huësti ca oveja tahëhax tsi anomaria tsi xo toa ja ranihaina. Naa huësti ca oveja quëshpi tsi ranihi quiha; naa noventa y nueve cabo quëshpi oquë ja nori. ¹⁴ Jascaria tsi huësti ca xocobo mishni bënocasyama xo mato naipá ca Jahëpa ri.

*Nobë jochahai ca xatë**Lucas 17.3*

¹⁵ ‘Mato pasomaha pi mabë xatë jochano tsi jamë tsi ja qui bocata, yoi ca ja aca ca jismaxëna. Mato pi ja nicano tsi jia tsi mato bëta rabënoxëhi quiha. ¹⁶ Jama, mato qui pi ja nicayamano tsi huësti huësti ca xatë huëtza bo ja qui cati xo, ja qui ma quësocanaí ca nicaxëna. Japi oquë tsi xo toa huësti huësti ca xatë huëtza jayahaina, ja nicacano jato ri. Jabija pi no tsi ja qui quësocaxëcane quiha jato ri. ¹⁷ Jama, mato qui pi ja nicayamano tsi iglesiá ca nohiria qui yoacahuë. Ja qui ja quësocano jato ri ra. Jabi iglesiá ca nohiria qui pi jari ja nicayamano tsi ja bëta rabënyamacana. Ja bëta chaniyamacana, Dios cahëtimaxënrira ca jochahuaxënrira ja nori iqui na ra.

Dios xocobo yobahaina

¹⁸ ‘Mato parayamaquia. Chama mato qui axëquia nohiria bo yobati. Dios qui jia tsi xo toa mai xo tsi ma yobahaina. Yobahi tsi “Jënima tsi xo toa acaina” i nohiria bo qui ma mitsa. Tocapimano tsi Dios qui jiaxëhi quiha ja acanaina. Jasca, “Anoma tsi xo toa acaina” i pi mano tsi Dios qui anomaxëhi quiha ja acanaina.

¹⁹ ‘Mato parayamaquia. Dios qui jia tsi xo dos ca xatë bo bëhoxhaina, jaharisi shinabëquipihi na. Nicaxo tsi jato bax axëhi quiha noho naipá ca Jahëpa ra. ²⁰ Jabi dos, tres roha pi ë qui aracascanaibo catino tsi jato bëta xo ëa ra —nëa tsi Jesu nëcaniquë jahuë rabëti bo qui.

Shina-bënotimaxëni ca yonati

²¹ Joxo tsi quiha Pedró Jesu nicaniquë:

—Ea pasomaha pi ëbë xatë jochano tsi ¿jahuë tihí tsi ja aca ca shina-bënoxëhi ni ëa sa? ¿Siete ni? —i Jesu qui ja niquë.

²² Jatsi Jesú quëbiniquë:

—Siete roha iyamaquia. Ichariama tsi xo toa. Jama, huëstima tsi ma shina-bënoxëti xo ra, naa setenta veces siete. ²³ Jabi noba naipá ca chama-chamaria Dios qui jia tsi xo toa noqui pasomaha ca jocha shina-bënohaina. Tobi chani quiha, rey yoati na. Nicacana: Jahuë yonati ba cuenta bo réy tsaya-tsayacasni quiha, jahuë parata ó quëëquí na. ²⁴ Jatsi quiha cuenta चाहितaxëni ca jayanish ca yonati rey qui ja bëcaniquë. Millones naa yonati cuenta ini quiha. ²⁵ Copihacatimaxëni jahuë cuenta quiha. Jatsi quiha “Naa joni, jahuë ahuini, jahuë xocobo, jahuë jahuëmishni bo tëquë, tihí cabo iniacana jahuë cuenta quëyoti” i rey niquë. ²⁶ Jatsi rey bësojó tsi yonati mëniniquë cohuëhi na. Rey ja bënariani quiha, “Ea shinahuë, taitá. Huënyamahuhë. Mi parata tëquë mia copixëquia ra” iquiina. ²⁷ Jatsi quiha jahuë yonati réy noiniquë. Noixo tsi quiha jahuë cuenta ja quëyoniquë ra.

Toa joni réy paquëmani quiha. Cuenta yama ja tsëquëni quiha. ²⁸ Jatsi yonati jisbayaniquë. Jisbaya tsi quiha ja bëta yonocobëquihai ca yonati ja bëchaniquë. Jahuë rabëti quiha. Jabi jaha ca cuenta pistia toa rabëti jayani quiha. Ichariama pesos quiha. Jama, bëchahax tsi quiha toa yonati, naa jahuë rabëti qui ja tsaminiquë. Tsamixó tsi quiha tëmósti ja chitahëhuaniquë pë. “Tobi mi cuenta ra. Noho parata bicasquia ra” jahuë rabëti qui toa joni ni quiha. ²⁹ Jatsi ja bëta yonocobëquinish ca yonati mëniniquë ja bësojó no. Ja bënarianiquë jaa ri. “Ea shinahuë ra. Huënyamahuë. Mi parata tëquë mi qui ayoxëquia ra” iquiina. ³⁰ Jama, ja qui ja nicayamani quiha. Noixoma tsi quiha preso qui jahuë rabëti ja nanëniniquë pë. Tsëquënoma ja ini quiha. Jariapari jahuë cuenta copiti nori ja ini quiha. ³¹ Jatsi quiha toa joní acani ca rey yonati huëtsa bá jisniquë. Jisi tsi quiha ja cohuënacanicuë. Jatsi jato rey qui ja bocanicuë yoi ca toa joní aca ca yoaxëna. ³² Jatsi paquëmahanish ca yonati quiha jahari réy quënaniquë. Quënahax, “Yoixëni ca yonati xo mia ra. Mi cuenta चाहितखेंni ca ë quëyohitaquë ra, ‘Ea shinahuë’ i ë qui mi itaha iqui na. ³³ Jascaria tsi mi bëta yonocobëquinahai cato cuenta mi quëyoti nori iquë ra, naa mi cuenta ë quëyohitaha jascaria” nëa tsi quiha ja qui rey nëcaniquë. ³⁴ Jatsi toa joni qui rey caxa-caxanicuë. Preso qui toa joni ja raanicuë. Tsëquënoma quiha toa joni iniquë ra, jahuë cuenta ja copinox pari. ³⁵ Japi mabë xatë bo pi ma noiyamano tsi mato qui tocaxëhi quiha mato naipá ca Jahëpa ri —nëa tsi quiha Jesu nëcaniquë.

19

Jesú tiisimanina ahui niahai yoati na *Marcos 10.1-12; Lucas 16.18*

¹ Naa jahuë bo yoaxo tsi quiha Galilea mai Jesú jisbayaniquë. Jisbaya tsi quiha jodioba mai, naa ani Jordán rabëquëx ca qui ja caniquë. ² Jasca, huëstima ca nohiria banahuaniquë. Jatsi jato Jesú jënimahuaniquë ra.

³ Jatsi quiha ja qui jodioba chama bo huësti huësti ca bëcaniquë tana-maxëna. Ja qui quësocasanaibo ja icani quiha. Nicahi tsi,

—¿Anoma ni joní jahuë ahui niahaina? —i Jesu qui jaca niquë.

⁴ Jatsi Jesú jato quëbiniquë:

—¿Quënhëcanish cabo ó ca ma jisyamani? Jariapari tsi bënë, ahui, tihí cabo Diós bahuaniquë racanabëquiti. ⁵ Ja tsi xo toa jahuë jahëpa, jahuë jahëhua, tihí cabo jisbayati xo bënë, jahuë ahui ya racaxëna. (Jasca, jahuë nabo jisbayati xo ahui ri bënë ya racaxëna.) Toca tsi huëstinacani quiha rabë cato. ⁶ Jaquirëquë rabë ma ca xo; jama, huësti ca jaca nori. Jabi Diós racabëquimaha ca no bëquëxyamano ra —nëa tsi Jesu nëcaniquë.

⁷ Jatsi fariseobo chaniniquë:

—Majia. Jabi jahuë ahui pi joní niacasno tsi “Ahui niati papi ja qui bënë ati xo” ¿i Moisés yamabo yamayamani? —i jaca niquë.

⁸ Jatsi jato qui Jesu nëcaniquë:

—Jabija. Moisés yamabo qui jënima ahui niahai ini quiha rë. Jabi tocajani quiha, tiisimahacatimaxëniiria ca mato jimibo ini iqui na. Jama, toca tsi ja iyamapaoni quiha jariapari no, naa bënë, ahui, tihí cabo Diós nëhohuaniquë no. ⁹ Mato parayamaquia. Ahui jia ca, naa joni mëtsaxëniirama ca ahui pi niahí tsi jochahi quiha toa joni, ahui paxa ca ja biquë no —i Jesu niquë.

¹⁰ Jatsi,

—Jishopë. Tocapino tsi oquë tsi xo ahui biyamahaina ra —i jahuë rabëti bo niquë.

11 Jatsi Jesú quëbiniquë:

—Jabi naa yoba bicasyama xo jatiroha ca joni bo. Jama, bichi quiha Dios qui jia cabo ra. 12 Jabi tobi huësti huësti ahui bicasyamacanaí ca joni bo. Huësti huësti ca tsi xo jobo yama cato, toca tsi ja coní iqui na. Jasca, ahui binoma xo joni huëtsa bo, jato jobo niahacani nori iqui na. Jasca, joni huëtsa bo tsi xo ahui bicasyamahaina, mana ca Dios yonoco ja acascanai iqui na. Jabi naa è tiisimaha ca yoba biti xo nicati mëtsa cato —nëa tsi Jesu nëcaniquë.

Xocobo mishni bo Jesú shomahuanina

Marcos 10.13-16; Lucas 18.15-17

13 Jabi Jesu qui xocobo mishni bo nohiria bá bëniquë, jato ja shomahuano, jato bax ja bëhoxno iquish na. Jama, xocobo bëhai ca nohiria raahati chitahëhuatsi jahuë rabëti bá huaniquë pë. 14 Jatsi Jesú jato raahaniquë:

—Jato chitiayamacana. E qui xocobo bëcano ra. Jato bicatsi quiha mana ca Jahëpa ra —iquiina.

15 Jatsi quiha xocobo Jesú shomahuaniquë, jahuë mëquë jato ó tsi janaquí na. Shomahuaxo ja jisbayaniquë.

Jesu ya shinapayo chaninina

Marcos 10.17-31; Lucas 18.18-30

16 Jatsi shinapayo Jesu jisi caniquë. Caxo tsi quiha ja nicaniquë:

—¿Jahuë jia ca axëhi ni ëa, maestro jiaxëni cató, bëso-bësopaoxëna? — iquiina.

Jatsi Jesu nëcaniquë:

—“¿Jia ca ati ni?” i mi a pa. Huësti roha tsi xo toa jiaxëni cato ra. Dios yoba mi nicati xo, nai qui cacasquí na —i ja qui Jesu niquë.

17 Jatsi,

—¿Jëni ca yoba nicaxëhi ni ëa pa? —i shinapayo niquë.

18 Nëca tsi Jesú quëbiniquë:

—Joni ayamahuë. Joni huëtsa ahui biyamahuë. Yomayamahuë. Quiayamahuë. 19 Mi ipa, mi ihua, tihí cabo noihuë. Jasca, mi tapaní ca nohiria noihuë, naa mimë mi noihai jascaria. Tihí tsi mi ati xo ra —nëa tsi ja qui Jesu nëcaniquë.

20 Jatsi shinapayó quëbiniquë:

—Toa yoba bo tëquë nicaquia ra, xocobo xo na. ¿Jahuë naris-hi ni ëa ati ra? —iquiina.

21 Jatsi Jesu nëcaniquë:

—¿Mëstëxëni ca joni manëcatsi ni mia pa? Cata. Mi jahuëmishni bo iniaparihuë. Parata bixo tsi noitiria cabo qui ahue. Tocapimino tsi mi qui acacaxëhi quiha naipá ca jahuë bo ra. Jato qui acax tsi jahari johue. Ea mi banahuano ra —i ja qui Jesu niquë.

22 Jatsi cohuënarianiquë shinapayo cato nicahax na, rico-ricoria ja ini iqui na.

23 Jatsi jahuë rabëti bo qui Jesu nëcaniquë:

—Bëronoma tsi xo rico ca joni Diós otoihaí ca qui jicohaina ra. 24 Jahuë chama yoi tsi Diós otoihaí ca qui jicotimaxëni xo rico ca nohiria ra iquia — iquiina.

25 Jatsi ratëniquë Jesu rabëti bo, ja yoani ca nicahax na. Ratëhax,

—Tocapino tsi yama tsi xo toa xabahamahacati mëtsa cato rë —i jaca niquë.

26 Jatsi Jesú jato bëisniquë.

—Jamë xabahamatimaxëni tsi xo nohiria ra. Jama, jatiroha ca ahi quiha Dios ra. Xabahamati Ibo tsi xo toa —i jato qui ja niquë.

²⁷ Jatsi,

—Tsayapa. Jatiroha ca no jisbërianiquë mia banahuaxëna. ¿Jahuë noqui copixëhi ni Dios ra? —i Jesu qui Pedro niquë.

²⁸ Jatsi Jesu nëcaniquë:

—Jabi jatiroha ca paxahuahacano tsi noho jiaxëni tsi tsahoxëquia nohiria bo ó bësöxëna, naa Nohiria Baquë ë nori cato. Toa xabacá tsi doce ca trono bo ó tsi tsahoxëqui mato ri, naa ëa banahuacanaibá. Israël ca doce ca maxo bo ó bësöxëqui mato ra. ²⁹ Jasca, ëa iqui pi jahuë xobo, jahuë ahuini, jahuë xatë bo, jahuë jahëpa, jahuë jahëhua tihi cabo jisbëriaquí tsi cien veces huino jahari bixëqui mato. Jasca, bësö-bësopaoxëqui mato ra. ³⁰ Jabi toa barí tsi jarësoxëhi quiha huëstima ca jaboqui jariapari cabo, naa rico cabo, chama bo. Jasca, rëquëxëhi quiha huëstima ca jaboqui jacho cabo, naa noitiria cabo, yonati bo —i jahuë rabëti bo qui Jesu niquë.

20

Jesú tiisimanina

¹ Jabi noba naipá ca chama-chamaria Dios qui jia tsi xo jacho cabo rëquë iquina —i Jesu niquë—. Tobi chani quiha huai ibo yoati na. Nicanana. Baquishmarí tsi joni bo bichi quiha naa huai ibo caniquë, jahuë huai tsi yonocomaxëna. ² “Huësti ca parata quiha, naa bari yonoco sueldo mato qui axëquia ra, mato yonoco quëshpi na” i joni bo qui ibo niquë. Jatsi quiha jahuë huai qui jato ja raaniquë yonocoti. Jato qui jia ini quiha ibobá copihaina. ³ Jatsi quiha mënata bari no tsi yacatá ca plaza qui ibo catëquëniquë joni huëtsa bo mërahi na. Toá tsi niilai ca bamahai ca joni bo ja jisniquë. ⁴ “¿Japa mato tsa ni? Noho huai qui bocata. Jia tsi mato copixëquia ra” i ibo niquë joni bo qui. Jatsi ja bocaniquë yonocoxëna jato ri.

⁵ Jatsi matoroco bari tsi quiha catëquëniquë ibo, joni bo mëraxëna, ja bax ja yonocano. Jatsi a las tres tsi quiha ja catëquëniquë pa, joni huëtsa bo mëraxëna. ⁶ Jatsi quiha yata, a las cinco quiha, joni bo mërahi ibo caniquë. Bohohai ca joni bo ja jisni quiha. “¿Jëniriahax tsi nëbi bama-bamacanai ra?” i jato qui ja niquë. ⁷ “Yama tsi xo toa noqui yonoco amahaina rë” i jaca ni quiha. Jatsi, “Noho huai qui bocata. Jari tobi yonoco ra” i jato qui ibo niquë.

⁸ Bari caquë tsi quiha ibobá jahuë empleado quënaniquë. Quënahax, “Joni bo quënahüë. Jato copicasquia ra. Jacho ca maxo pari tsi copiti mi chitahëhuano” i jahuë empleado qui ibo niquë. ⁹ Jatsi a las cinco chitahëhuanish ca joni bo pari bëcaniquë. Huësti ca parata, naa bari tëtëca sueldo jato qui ja aniquë. ¹⁰ Jatsi huino ca copi biti ó pasoniquë jariapari ca yonocoti chitahëhuanish cabo. Ja bëcaquë tsi quiha huësti roha ca parata, naa bari sueldo ja copihacacaniquë jato ri. ¹¹ Jato parata bichi tsi ibo ja ranicaniquë. Jato qui yoi quiha. ¹² “Huësti hora roha ja yonococaquë pë, naa noqui cho bëcanax cabo. Noqui tsi xo toa bari tëtëca yonocohaina rë. Anomaria bari huao quiha. Jama, huësti ca parata roha noqui mi aquë pë, naa jato qui mi aca jascaria” i ibo qui jaca niquë. ¹³ Jatsi jato ó ca huësti ca qui ibo chaniniquë: “Huashiyamahai ca ëa xo naa ra. ¿Mato qui jia ma ni huësti ca parata bichiina, naa bari tëtëca yonoco quëshpi na? ‘Jënima’ i ë qui ma quë ra. ¹⁴ Japi mato parata bicahuë. Bocata. Mi qui ë aca ca jaharisi ca naa mato cho bëcanax ca joni bo qui acasquia. ¹⁵ ¿Noho parata ma ni naa ë acaina? Tonia ë qui caxaqui mato rë, mato cho ca jaroha ca maxo qui ë huashiyamaha iqui na” nëa tsi jato qui ibo nëcaniquë. ¹⁶ Ja tsi xo toa rëquëxëhi quiha jacho cabo. Jasca, jachoxëhi quiha jariapari cabo —nëa tsi Jesu jahuë rabëti bo qui nëcaniquë.

*Jesú chaninina ja nahai yoati na**Marcos 10.32-34; Lucas 18.31-34*

¹⁷ Jabi Jerusalén qui capama tsi quiha jahué doce ca rabëti bo Jesú catianiquë jamë tsi jato qui chanixëna. Chanipama tsi quiha,

¹⁸ —Jerusalén qui caqui noa ra —i jato qui ja niquë—. Toa xo tsi arati iboba chama bo, yoba tiisimacanaibo, tihi cabo qui mëhaacaxëquia rë. “Ja namëhacaxëti xo” icaxëcane quiha rë. ¹⁹ Jatsi pë carayanabo qui ëa mëacaxëcane quiha mahuahacati, rashahacati, namëhacati. Jama, tres bari quirëquë bësotëquëxëquia ra —i jato qui Jesu niquë.

*Jacobo Juan jahëhuá baanina**Marcos 10.35-45*

²⁰ Jatsi Jesu qui Juan jahëhua joniquë, naa Zebedeo baquë ba jahëhua. Johax tsi quiha Jesu bësojo tsi ja mëniquë. Mënixo tsi quiha ja nicaniquë, jahuëcara ca jia ca jahuë baquë bo bax Jesú ano iquish na.

²¹ Jatsi,

—¿Jahuë ó quëëhai? —i ja qui Jesu niquë.

Jatsi quiha,

—Noho baquë bo shinahuë. Mana xo yonaquí tsi mia tapái tsi noho baquë bo mi tsahomano ra, huësti ca mi mëncayá no, huëtsa mëxojó no —i Jesu qui jahëhua niquë.

²² Jatsi,

—Mi baahai ca cahëyamaqui mia ra —i ja qui Jesu niquë.

Jatsi jahuë baquë bo, naa Jacobo, Juan, tihi cabo qui Jesu chaniniquë:

—¿Tënëti mëtsaxëhi ni mato, naa ë tënëmahacapaimaria jascaria? —iquina.

—Jahuë. Tënëti mëtsa xo noa ra —i jaca niquë.

²³ Jatsi,

—Jabija. Tënëxëqui mato ra. Jama, noho mëncayá ca tsahoti, noho mëxojó ca tsahoti, tihi cabo mato qui ati mëtsama xo ëa ra. Toa tsahoti bo bicaxëcane quiha noho Jahëpa qui jia cabo ra. Jato bax ja rohahuhacane quiha —i Jesu niquë.

²⁴ Jatsi Jacobo, Juan, tihi cabo qui caxaniquë diez ca rabëti huëtsa bo, jaha ja quëëcane ca nichax na. ²⁵ Japi Jesú jato quënaniquë yobaxëna.

—Nohiria yonamixëneria tsi xo país ca chama bo ra. Ja yonayonamiscane ca cahëqui mato. Jasca, jato empleado bo tsi xo yonamixëneria, jato ri. ²⁶ Anoma quiha. Jabi ma tocyamano. Jama, mato yonati manëxëti xo toa oquë ca manëcatsai cato ra. ²⁷ Jasca, mato mëbihai ca yonati manëxëti xo toa mato rëquënicatsai cato, ²⁸ naa mato ë mëbihai ca jascaria. Jabi mai qui ë joyamaniquë, ëa nohiria bá mëbino; jama, nohiria mëbiti nori. Jabi ëmë aquia nohiria bo bax nati, jocha quima huëstima ca nohiria paquëmaxëna —i Jesu niquë.

*Dos ca bëco cabo Jesú jënimahuanina**Marcos 10.46-52; Lucas 18.35-43*

²⁹ Jericó ax Jesu, jahuë rabëti bo, tihi cabo riquino tsi quiha huëstima ca nohiria banahuaniquë. ³⁰ Jabi tobi ini quiha bahi tsi rabë ca bëco ca joni bo. Tsaho ja icani quiha. Jabi Jesu tarabihai nori ca nicaquí tsi quënati ja chitahëhuacanicuë.

—Noqui shinahuë, David yamaba Baquë —iriatsi jaca niquë.

³¹ Jatsi,

—Pasicahuë. Pasicahuë ra —i jato qui nohiria bo niquë.

Jama, oquë tsi quënati ja chitahëhuacanicuë.

—Noquí shinahuë ra, David yamaba Baquë —iria-iriatsi jaca niquë.

³² Jatsi Jesu niiniquë.

—¿Jahuë ó quëëcanai? ¿Jënahuaxëhi ni ëa mato bax na ra? —i jato qui Jesu niquë.

³³ Jatsi,

—Taiscasqui noa ra, Ibobá —i jaca niquë.

³⁴ Jatsi quiha Jesú jato noiniquë. Noixo tsi quiha jato bëro ja motsaniquë. Jatsi taisritsijacanicuë. Jatsi Jesu ja banahuacanicuë jato ri.

21

Jerusalén qui Jesu jiconina

Marcos 11.1-11; Lucas 19.28-40; Juan 12.12-19

¹ Jabi yaca Betfagé, yaca Betania, tihí cabo qui cahëpama tsi quiha rëquë jahuë rabëti bo dos ca Jesú raanicuë. Jerusalén basima ja icani quiha. Raahax,

² —Mato bësojó ca yaca qui jicocana. Jicoxo tsi nëxë ca burro jixxëqui mato. Ja bëta nii xo jahuë baquë. Jato mëriscana. Mërisxo tsi ë qui jato bëcana. ³ Jasca, “¿Jënixo tsi jato mëriscanai?” i pi tsohuëcara no tsi “Bicatsi quiha Ibo” icana. Jatsi jahuë burro bo raatapixëhi quiha ibo ra —nëa tsi jato qui Jesu nëcaniquë.

⁴ Jabi tocapijani quiha Quënëhacanish cabo jatihuahacano iquish na. Jabi nëca tsi Dios Chani yoanish cabá quënënicuë:

⁵ “Sión yacatá ca nohiria qui chanicana:
‘Tsayacahuë. Mato qui johi quiha mato Rey ra.
Ishima chamayama tsi xo.

Burró tsaho johi quiha.

Nohiria carga bëhai ca chaxpá tsi johi quiha pa’ ”
nëa tsi ja quënëni ca nëcani quiha.

⁶ Jatsi jahuë rabëti bo bocanicuë burro baquë mëraxëna, Jesú yoani jascaria. ⁷ Bichi tsi quiha burro, jahuë baquë, tihí cabo jahari ja bëcaniquë. Bëxo tsi quiha jato sahuëti bo ja capohuëcaniquë. Jatsi burro cacha Jesu tsahoniquë. ⁸ Jasca, huëstima ca nohiriá jato sahuëti bo poohabonanicuë bahí no, burro rëquë. Jasca, nohiria huëtsa bá mëshi bo quëësaniquë bahí tsi poohaxëna.

⁹ Jatsi quënëti rëquë bocanaibo, banahuacanaibo, tihí cabá chitahëhuaniquë:

—Chama David yamabá चाहितaxocobo joihuacana ra.
Shomahuahaca ca tsi xo naa Ibobá janë tsi johai cato ra.
Naipá cabá ocahuano ra —nëa tsi nohiria bo nëcaniquë.

¹⁰ Jerusalén qui Jesu jicoquë tsi quiha nohiria quëtsocanicuë.

—¿Tsohuë ni naa johaina sa? —i quiha jaca niquë.

¹¹ Jatsi,

—Galileá ca Nazarét ca Jesu tsi xo naa ra. Dios Chani yoati ibo xo ra —i nohiria bo niquë quëbibi na.

Jodioba arati xoboria qui Jesu jiconina

Marcos 11.15-19; Lucas 19.45-48; Juan 2.13-22

¹² Arati xobo qui Jesu jiconiquë. Jicoxo tsi quiha toá ca iniacanaibo cacha ja raanicuë. Raaquí tsi quiha parata rarinamacanaiba mesa bo ja narabaniquë. Jasca, boto iniacanaiba tsahoti bo ja pacanamanicuë. Jatsi,

¹³ —Bëhoxti xobo quënëhacaxëti xo noho xobo ra; jama, yomacanaibo iti noho xobo manëmaqui mato pë —i jato qui Jesu niquë.

¹⁴ Jabi arati xobó tsi quiha bëco cabo, tapiyamacanaibo, tihi cabo iniquë. Jesu qui ja bëcani quiha jënimahuahacaxëna. Jatsi jato ja jënimahuaniquë ra. ¹⁵ Jatsi quiha Jesu qui arati ibo bo, yoba tiisimacanaibo, tihi cabo caxaniquë, jiarica ca Jesú ani nori jisi na. Jasca, arati xobó tsi ranihai ca xocobo quënahi ini quiha, “Anomaria tsi xo David yamaba चाहितaxocobo ra” iquiina. Jatsi Jesu qui jodioba chama bo caxaniquë toa chani nicahax na. ¹⁶ Caxaxo tsi quiha Jesu ja raahacaniquë:

—¿Xocobá quënahai ca nicayamamai? Anoma quiha —iquiina.

Jatsi Jesú quëbiniquë:

—Jato nicaquia ra. Tonia mato ri tsi xo toa Dios Chani cahëyamacanaina ra. “Xocobo mishni bo, xoma acai ca baquë bo, tihi cabo tiisimaqui mia Diós, jia tsi ja ocahua-ocahuariacano iquish na” ii quiha Quënëhacanish cabo —nëa tsi jodioba chama bo qui ja nëcaniquë.

¹⁷ Jatsi Jesú jato jisbayaniquë. Yaca ax riquihax Betania qui ja caniquë baquicha raaxëna.

Bimiyamamai ca higuera jihui Jesú yoshihuanina

Marcos 11.12-14, 20-26

¹⁸ Huëaquë baquishmarí tsi quiha jahari yaca qui Jesu caniquë. Capama tsi quiha ja paxnaniquë. ¹⁹ Jatsi higuera jihui ja jisniquë. Paxnahi tsi bahi tapai ca higuera jihui qui ja caniquë bimi mëraxëna. Mëquëya ja ini quiha. Pëhi roha quiha. Jatsi quiha higuera jihui qui Jesu chaniniquë:

—Bimitëquëpistiayamariaxëqui mia ra —iquiina.

Jatsi janotapiniquë higuera jihui ra. ²⁰ Jatsi ratëniquë jahuë rabëti bo ocapijani ca jisi na. Ratëhax,

—¿Jënahuarihax jihui janotapiha sa? —i jaca niquë.

²¹ Jatsi Jesú jato quëbiniquë:

—Mato parayamaquia. Dios qui pi chitimiyoiquí tsi higuera jihui qui ë aca ca oquë ca axëqui mato ra. Chitimiyoiipimano tsi mato nicaxëhi quiha naa macana ra, “Tsëquëhuë. Ia qui niahacahuë” i ja qui ma quë no.

²² Chitimipiquí tsi ma bënëhai ca bixëqui mato, ma bëhoxquë no —nëa tsi Jesu nëcaniquë.

Jesu qui yoba cahëxëni cabo caxanina

Marcos 11.27-33; Lucas 20.1-8

²³ Jatsi jahuë arati xoboria qui Jesu caniquë. Toa xo tsi tiisimajahuano tsi quiha ja qui bëcaniquë arati ibo-iboria bo, nohiria yosibo. Bëhax,

—Arati xobo quima iniacanaibo mi niahitaquë pë. ¿Tsohuë mi qui chama ani tocata ra? —i ja qui jaca niquë.

²⁴ Quëbibi tsi,

—Mato nicapariquia ëa ri. Ea pi ma quëbino tsi toa ë qui toca ca ati chama anish ca mato yoaxëquia. ²⁵ ¿Tsohuë Juan yamabo qui chama ani, nohiria bo ashimati? ¿Dios ni? ¿Joni ni? —i jato qui ja niquë.

²⁶ Jatsi ja chaninaparicaniquë:

—“Dios” i pi no no tsi “¿jënixo tsi Juan yamabo ma chahahuayamani?” i noqui xëhi quiha pë. Jama, “Joni quima jahuë chama Juan yamabá biniquë” i pi no no tsi noqui caxaxëhi quiha nohiria bo rë. Jatsi, noqui acaxëcani quiha ra, “Dios Chani yoati ibo xo Juan” i jacana quëshpi na —nëa tsi ja nëcapaniquë.

²⁷ Japi,

—Cahëyamaqui noa ra —i Jesu qui jaca niquë.

Jatsi,

—E qui toca ca ati chama anish ca mato yoayamaxëquia ëa ri —i jato qui Jesu niquë.

Jesu chaninina dos ca baquë yoati na

²⁸ Jatsi jodioba chama bo qui chani Jesu yoaniquë:

—¿Jahuë shinacana, naa chani yoati na? Jabi dos ca baquë quiha joni jayaniquë. Jariapari ca baquë qui jahëpa caniquë chanixëna. Cahax, “Jisa baquë, huai yonocohi cata” i quiha ja qui jahëpa niquë. ²⁹ Jatsi quiha “Jishopë, cayamaquia ra” i baquë ni quiha. Jama, yata ja caniquë ra yonocohi na, shina paxa ca bichish na. ³⁰ Jatsi quiha jahuë noma qui jahëpa caniquë jasca ca nicaxëna. “Caquia ra” i jahuë noma ni quiha; jama, ja cayamaniquë pë. ³¹ Mato nicaquia. ¿Jëni ca baquë ni toa jahuë jahëpa jaha quëeni ca anish cato? —i jato qui Jesu niquë jato nicahi na.

Jatsi,

—Rëquëmë quiha —i jaca niquë.

Jatsi Jesu jato yoaniquë.

—Mato parayamaquia ra. Mato rëquë Diós othai ca qui jicocaxëcani quiha yoixëni ca impuesto bicanaibo, joni mëtsaxëniria cabo ri. ³² Jabi joxo tsi quiha quinia jia ca Juan yamabá mato jismaniquë. Jahuë chani ma chahahuayamaniquë rë. Jama, impuesto bicanaibo, joni mëtsaxëniria cabo, tihi cabá tsi xo toa jahuë chani nicahaina ra. Ja chahahuacana nori ca jisí tsi mato quinia yoi ca ma casoyamaniquë. Juan yamaba chani ma chahahuayamaniquë rë, (naa noma baquë jascaria) —nëa tsi jodioba chama bo qui Jesu nëcaniquë.

Dios Baquë jodiobá niahaina

Marcos 12.1-12; Lucas 20.9-19

³³ —Chani huëtsa nicacano —i jodioba chama bo qui Jesu niquë—. Huai quiha joni aniquë. Axo tsi quiha toa xo tsi uva icana ca bimi ja bananiquë. Jaquirëquë tëamë ca panë ja aniquë. Jatsi quiha maxaxá ca trapichi ja aniquë, jënëria ati. Axo tsi quiha jaha bësoti xobo ja aniquë, naa torre icana cato. Jatsi joni huëtsa bo qui jahuë huai ibobá aquëniquë bimi xatë quëshpi na. Aquëhax tsi quiha jahari jahuë xobo qui ibo caniquë. ³⁴ Tësatiya tsëquëquë tsi quiha jahuë huai obësocanaibo qui jahuë yonati bo ibobá raaniquë jahuë bimi xatë ja bicano. ³⁵ Jama, ja cahëcaquë tsi quiha jahuë yonati bo qui ja tsamicaniquë. Huësti ca yonati ja rashacani quiha. Huëtsa ja acani quiha. Huëtsa qui maxax bo ja niacani quiha axëna. ³⁶ Jatsi maxo huëtsa ibobá raaniquë, naa jahuë yonati bo. Jasca tsi toa maxo ri ja yosicaniquë pë. ³⁷ Jarohari tsi jahuë baquë yoi quiha ibobá raaniquë, “Noho baquë qui nicacaxëcani quiha” iquiina. ³⁸ Jama, jahuë baquë jisi tsi “Iboba baquë tsi xo naa ra, naa huai bixëti ca ibo. ¿Canomani? Jahuë baquë no ano ra. Jahuë bixëti ca mai no bino” i yonococanaibo ni quiha. ³⁹ Jatsi baquë qui ja tsamicaniquë. Huai cacha ni axo tsi ja acaniquë pë.

⁴⁰ ‘Jabi joxo tsi quiha ¿jënahuaxëhi ni huai ibo toa yonococanaibo qui? —i jato qui Jesu niquë.

⁴¹ Jatsi jodioba chamabá quëbiniquë:

—Caxaquí tsi toa yoixëni ca joni bo quëyoaxëhi quiha ibo ra. Jatsi bimi xatë quëshpi tsi yonococanaibo huëtsa bo qui jahuë huai aquëxëhi quiha, ja bax ja yonococano —i jaca niquë.

⁴² Jatsi Jesu jato yoaniquë:

—¿Quënëhacanih cabo ó ca ma jisyamani naa yoati na?
“Oquëanaxëhi quiha yosibá niaha ca Maxaxa ra.
Oquë-oquëria ca manëxëhi quiha ra.
Diós aca ca tsi xo naa ra.

Noqui jia quiha” ii quiha.

⁴³ Ja tsi xo toa jaboqui tsi mato shomahuacasyamaxo Dios ra. Jaboqui nohiria huëtsa, naa ja bax yonocoscanaibo shomahuaxëhi quiha. ⁴⁴ Noitixëhi quiha naa Maxax icanai ca chahahuayamacanaibo tëquë. Toa Maxax icanai cató tsi quëyohacaxëcani quiha ra. Mai mishpo jascaria tsi jato timaxëhi quiha ra —nëa tsi Jesu nëcaniquë.

⁴⁵ Jesu chani nicaxo tsi jato yoati tsi ja chanini nori jodioba chama bá cahëniquë. ⁴⁶ Jatsi Jesu qui ja tsamicascaniquë. Jama, nohiria bo qui ja raquëcani quiha, “Dios Chani yoati Ibo xo Jesu” i nohiria bo ni quëshpi na.

22

Fiesta-fiesta ti chani *Lucas 14.15-24*

¹ Jatsi quiha jodioba chama bo qui chani, naa cuentos Jesú yoaniquë Diós otohái yoati na. Ja nëcaniquë:

²—Naipá ca chama-chamaria Dios qui jia tsi xo toa jahuë joi bichiina. Jabi tobi quiha rey iniquë. Jahuë baquë bax fiesta-fiestaria ja shomahuaniquë; naa jahuë baquë ahui yahai ca fiesta quiha. ³ Jatsi jahuë yonati bo ja raaniquë joi amahacanish cabo quënaxëna. Jama, ja bëcasyamacani quiha.

⁴ Jatsi yonati huëtsa bo jato qui réy raaniquë. “Tsayacahuë. Oriquti ibobá rohahuaquë ra mato bax na. Jahuë toro bo, jahuë vaca mishni bo, naa xënihuaxëni cabo ja aquë ra piti. Shomahuahacaquë oriquti ra. Jahuë baquë ahui yahai ca fiesta qui bëcahuë” i joi amahacanish cabo qui huë” i jahuë yonati bo qui rey niquë. ⁵ Jama, ja bocasyamacani quiha. Jahuë huai qui huësti ca caniquë yonocoxëna. Huëtsa jahuë tienda qui caniquë jahuë jahuë bo iniaxëna. ⁶ Jasca, nohiria huëtsa bá toa rey yonati bo qui tsaminiquë rë. Jato ja yosicaniquë. Yosixo tsi quiha jato ja aniquë pë. ⁷ Jatsi quiha toa nohiria bo qui caxaniquë rey ra. Caxaxo tsi jahuë soldado bo ja raaniquë jahuë yonati bo anish cabo axëna. Axo tsi quiha jato yaca bo ja mëshacanicuë.

⁸ Jatsi jahuë yonati bo réy quënaniquë. Quënahax jato qui ja chanitëquëniquë: “Rohahuahacaquë fiesta ra. No oriquino ra. Jama, toa joi amahacanish cabo jicomayamacana. Anoma ca xo. ⁹ Jama, bahi rëso qui bocata. Toá ca noitiria cabo qui joi amacana, noho fiesta qui ja bëcano” i jahuë yonati bo qui rey ni quiha. ¹⁰ Jatsi quiha bahi rëso qui jahuë yonati bo bocanicuë. Nohiria jisi tsi jato ja catiacanicuë fiesta qui bëxëna. Nohiria jiaxëni cabo, nohiria jiaayama cabo, tihí cabo ja bëcaniquë. Ja bëcaquë tsi quiha nohiria rëamë tsi fiesta xobo iniquë ra.

¹¹ Jatsi fiesta xobo qui rey jiconiquë joi amahacanish cabo jixxëna. Jabi toá tsi huësti ca sahuëti jiaayama ca sahuëhai ca joni ini quiha. Toa joni réy jisnicuë. ¹² Jisi tsi “Yama tsi xo mi fiesta sahuëti pë. ¿Jënahuariahax raca mi jicoha pa?” i joni qui rey niquë. Jatsi pasihi joni ini quiha, raquëhi na. Chaniamahi quiha. ¹³ Jatsi réy jahuë yonati bo yobanicuë: “Jahuë mëquënë, jahuë tahë, tihí cabo nëxacahuë. Cacha tsëmo qui naa joni niacahuë. Toá tsi araxëhi quiha. Toá tsi tënëxëhi quiha” i rey niquë. ¹⁴ Jatsi quiniacaxëcahuë. Huëstima tsi xo toa joi amahacanish cabo. Jama, icharíama tsi xo toa Diós bichiina —nëa tsi Jesu nëcaniquë jodiobá chama bo qui.

Gobierno qui impuesto bo acaina
Marcos 12.13-17; Lucas 20.20-26

¹⁵ Jatsi quiha jodioba chama bá jisbayaniquë shinacatsi na. Jesu ja parascansi quiha. Jabi yoi ca Jesu ja chanimacascansi quiha ja qui quësocasquí na. ¹⁶ Japi jató-na banahuacanaibo, Rey Herodés-na banahuacanaibo, tihí cabo ja raacanicuë Jesu nicati. Ja nëcacanicuë:

—Mia ri tsi xo toa parayamahaina, maestró. Paraxoma tsi Dios quinia tiisimaquí mia ra. Tiisimaquí tsi nohiria shinahai ca chahahuayamaquí mia. Mí qui jaharisi tsi xo nohiria tëquë. ¹⁷ Japi mi shinahai ca noqui mi yoano. ¿Romanoba chama-chamaria qui impuesto bo no ati ni, naa noqui jodiobo? —nëa tsi Jesu qui jodioba chamabo nëcacanicuë tanamaxëna.

¹⁸ Jabi ja shinacanai ca yoi nori ca Jesús cahënicuë. Japi,

—¿Jënixo tsi nëca tsi ëa tanamacanai pë, paramisxëni cabá? ¹⁹ Gobierno impuesto copihacati ca parata ëa jismacahuë —i jato qui Jesu niquë.

Jatsi parata ja qui ja bëcaniquë.

²⁰ —¿Tsohuë bëmana jaria ni naa ra? ¿Tsohuë ni naa quënë ibo? —i jato qui Jesu niquë.

—Romanoba chama-chamaria janë quiha —i jaca niquë.

²¹ Jatsi Jesús quëbiniquë:

—Japi romanoba chama-chamaria qui jahuë jahuë bo tëquë acana. Jasca, Dios qui jahuë jahuë yoi bo acana —i jato qui Jesu niquë.

²² Jesús yoani ca nicahax ja ratëcaniquë. Ratëxo ja jisbayacanicuë. Ja bëta ja chanicasyamacani quiha.

Bësotëquëxëhi quiha rësonish cabo

Marcos 12.18-27; Lucas 20.27-40

²³ Jaquirëquë jaxaba rohari tsi quiha chama huëtza bo, naa saduceobo icanai cabo Jesu qui bëcaniquë jato ri. (“Yama tsi xo nohiria bësotëquëhaina” icanish cabo tsi xo naa.) Bëxo tsi Jesu ja nicanicuë:

²⁴ —“Baquë bo yama pi joni rësono tsi jahuë ahui bixëti xo jahuë noma. Bixo tsi jahuë rëquëmë bax xocobo ja saihuaxëti xo” i Moisés yamabo ni quiha, Maestró. ²⁵ Jabi seis ca noma bo quiha jayapaonicuë joni, naa nëa ca racapaonish cato. Xocobo yama tsi naa joni rësoniquë rë. ²⁶ Jatsi quiha jahuë xachacató jahuë ahui biniquë. Xocobo saihuahaxma tsi ja rësoniquë jaa ri. Jaquirëquë quiha jahuë noma huëtzá jahuë ahui biniquë. Xocobo saihuahaxma tsi ja rësoniquë jaa ri. Toca tsi jahuë noma bo tëquëtá aniquë. Ja rësoyocanicuë. Huësti ca xocobo ja saihuayamacani quiha. ²⁷ Jarohapa tsi rësoniquë yoxa ri. ²⁸ Jabi nohiria bo bësotëquëno tsi ¿tsohuë ahui ni naa yoxa sa? Siete ca bënë ja jayaniquë bësoquí na pa —nëa tsi Jesu qui ja nëcacanicuë tanamaxëna.

²⁹ Jatsi Jesús jato quëbiniquë:

—Janyama xo mato ra. Quënëhacanish cabo, Dios chama, tihí cabo cahëyamaquí mato tia. ³⁰ Bësotëquëxo ahui bo, bënë bo, tihí cabo biyamaxëhi quiha nohiria bo, naipá ca ángel bo jascaria iquiina. ³¹ ¿Quënëhacanish cabo ó ca Díos mato yoani ca ma jisyamani pa, naa nohiria bësotëquëhai yoati na? ³² “Abraham, Isaac, Jacob, tihí caba Dios ca ëa xo naa ra” i Dios ni quiha. “Abraham yamabo, Isaac yamabo, Jacob yamabo” i ja yamani quiha ra, bësocanaiba Dios ja nori iqui na —i saduceobo qui Jesu niquë.

³³ Jatsi nohiria tëquë ratënicuë Jesús tiisimahi ca nicahax na.

Oquë-oquëria ca yoba

Marcos 12.28-34; Lucas 10.25-28

³⁴ Jabi Jesú quëbini iqui tsi saduceobo bërabiniquë. Jaquirëquë Jesu qui fariseobo, naa chama huëtsa bo bëcaniquë nicahax na. ³⁵ Jabi jato maxo huësti, naa yoba cahëxëni cató Jesu nicaniquë tanamaxëna.

³⁶ —¿Jëni ca ni toa Dios yoba oquë-oquëria cato, maestró? —i Jesu qui ja niquë.

³⁷ Jatsi Jesú quëbiniquë:

—“Mato joiti tëquë, mato shina tëquë, tihí cabá tsi mato Ibo Dios ma noiti xo” ii quiha. ³⁸ Oquë-oquëria ca yoba tsi xo naa ra. ³⁹ Jasca, jaquirëquë ca yoba tsi xo naa: “Nohiria huëtsa bo noicahuë, mamë ma noihai jascaria” ii quiha.

⁴⁰ Naa dos ca yoba qui chitimihí quiha Quënëhacanish cabo tëquë —nëa tsi ja qui Jesu nëcaniquë.

David yamaba Ibo

Marcos 12.35-37; Lucas 20.41-44

⁴¹ Jari fariseobo manicano tsi quiha Jesú jato nicaniquë:

⁴² —¿Jahuë shinacanaí, johai ca Xabahamati Ibo yoati na? ¿Tsohuë चाहितaxocobo ni toa? —iquina.

Jatsi quiha,

—David yamaba चाहितaxocobo quiha —i jaca niquë.

⁴³ Jatsi Jesú nicaniquë:

—Dios shina rëamëquí tsi ¿jahuë चाहितaxocobo “Ibo” David yamabá quënyamayamani? ¿Jënihax “Ibo” i ja ni, jahuë चाहितaxocobo yoati tsi chanihi na?

⁴⁴ “‘Noho mënëcayá tsi tsahotsina,

jariapari mia pasomaha cabo ë bëbono,

jato mi yonano iquish na’ i noho

Ibo qui Ibo Dios ni quiha”

nëa tsi David yamabo nëcani quiha ra. ⁴⁵ “Noho Ibo” jahuë Xabahamati Ibo ja quënaniquë ra. “Ibo” pi jahuë चाहितaxocobo no tsi ¿jënahuahax jahuë चाहितaxocobo ii ni Cristo ra? —nëa tsi jato qui Jesu nëcaniquë nicahi na.

⁴⁶ Jatsi fariseobo pasiniquë. Quëbitima-xëni ja icani quiha. Jaquirëquë jodioba chama bá Jesu nicatëquëpistiayamarianiquë tanamaxëna.

23

Fariseobo, yoba cahëxëni cabo, tihí cabo pasomaha Jesu chaninina

Marcos 12.38-40; Lucas 11.43, 46; 20.45-46

¹ Jatsi mani ca nohiria, jahuë rabëti bo, tihí cabo qui Jesu chaniniquë:

² —Jabi nohiria bax Moisés yoba bërohuahi quiha fariseobo, yoba cahëxëni cabo. Jato yonoco quiha. ³ Japi mato ja yoacanaí ca yoba tëquë ma chahahuati xo. Jato nicacana. Jama, jato jabi banahuayamacana ra. Anoma quiha. Ja yoacanaí ca yoba yoi ayamacani quiha pë. ⁴ Nicatimaxëni ca yoba bo nohiria qui acani quiha pë atí, jama ja yoacanaí ca yoba nicacanaíbo jaca nomari. ⁵ Jato jabi quiha pë. Jatiroha ca acani quiha pë, nohiria bá jato tsayano iquish na. Papi mishni bo, naa Dios Chani jaya ca papi sahuëceni quiha pë. Toa papi banëxëceni quiha nohiria jismaxëna. Jato jabi quiha. Jasca, nohiria ba sahuëti bo huino xo jato sahuëti bo pë, nohiria oquë jaca nori quëscahuahi na. ⁶ Nohiria bo oriquino tsi oquë ca tsahoti bo bicascani quiha pë. Jato catiti xobó ca rëquë ca tsahoti bá tsi tsahocascani quiha pë. ⁷ Jasca, bahi xo tsi joihuahacacascani quiha. Jato qui jia quiha “Maestro” quënahacahaina.

⁸ ‘Jama, “Maestro” ma quēnahacayamaxēti xo iquia, huēsti roha ca maestro ma jaya ca iqui na. ⁹ Jasca, mai xo tsi “Jahēpa-jahēparia” joni quēnayamacana. Huēsti roha ca tsi xo toa mato Jahēpa-jahēparia, naa mato naipá ca Jahēpa. ¹⁰ “Maestro-maestroria” ma quēnahacayamati xo, mato huēsti ca Maestro-maestroria roha ca Cristo nori iqui na. ¹¹ Mato yonati iti quiha mato ó ca oquē cato. ¹² Jabi rabihuahacaxēhi quiha jamē oquēhuahai cato. Jama, oquēhuahacaxēhi quiha yonati jascaria ca manēhai cato ra.

¹³ ‘Noitiria tsi xo mato, yoba tiisimacanaibá, fariseobá. Paramisxēni xo mato ra. Ma tiisimahai iqui tsi Diós otohái ca qui jicotimaxēni xo nohiria bo rē. Jasca, jicocasyama xo mato ri. Jabi nohirá pi chahahuacasno tsi jato chitiaqui mato pē.

¹⁴ ‘Noitiria xo mato, yoba tiisimacanaibá, fariseobá. Paramisxēni xo mato ra. Imanish ca yoxa bo paraqui mato pē, jato jahué bo bixēna. Paraquí tsi jato xobo bo mēbiqui mato pē. Mēbihax Dios qui chani tētēca bēhoxqui mato nohiria bo paraxēna. Quēsohacaxēqui mato ra. Oquēxēhi quiha mato copi ri ra.

¹⁵ ‘Noiti xo mato yoba tiisimacanaibá, fariseobá. Paramisxēni xo mato ra. Nēama bocaqui mato pē, nohiria mērahi na, jato jabi bo rarinaamaxēna. Jato jabi bo rarinaamaxo tsi mato oquē tsi jato rohahuaqui mato, tēnētiya qui ja bocano, naa ma bocanaí jascaria.

¹⁶ ‘Noitiria xo mato, mato bēco ca rēquēninicanaibá. Anoma tsi xo toa ma tiisimahaina ra. “Arati xobó tsi axēquia” i nohiria quii tsi jatihuahacayamaxēti ca ma yoaha ca nori ca quēscahuauqui mato pē. Tocaqui mato pē, juraraqui na. (Jatsi ma yoaha ca iqui tsi ma axēhai nori ca quēscahuacani quiha nohiria rē.) Jama, “Arati xobó ca oro ca jahué bá tsi axēquia” i jato quii tsi “Jatihuahacayoixēti xo no yoahaina” iqui mato pa. ¹⁷ Jisna. Cahētimaxēniria ca bēcoxēniria ca xo mato ra. ¿Jēnahuariahax arati xobó ca oro ca jahué bo oquē ina? ¿Oquē ma ni Dios arati xobo ra? Dios roha tsi xo toa oro ca jahué bo oquēhuati ibo cato ra. ¹⁸ Jascaria tsi “Altár tsi axēquia ra” i nohiria quii tsi jatihuahacayamaxēti ca ma yoaha ca nori ca quēscahuauqui mato pē. (Jatsi ma yoaha ca iqui tsi ma axēhai nori ca quēscahuacani quiha nohiria rē.) Jama, “Altar ó ca janahaca jahué bá tsi axēquia ra” i jato quii tsi “Jatihuahacayoixēti xo no yoahaina” iqui mato pa. ¹⁹ Jisna. Bēcoria xo mato ra. ¿Jēnahuariahax altar ó ca Dios qui ma janaha ca oquē ina? ¿Oquē ma ni Dios altar? Dios altar tsi xo toa ma janaha ca oquēhuahaina ra. ²⁰ Jishopē. “Altár tsi axēquia ra” iqui mato pē, nohiria bo paracatsi na. Jama, “Altár tsi axēquia ra” imahai ca tsi xo toa “Altar ó ca janahaca cató tsi axēquia ra” imahai ca jascaria. Jaharisi ca xo. ²¹ Jasca, “Arati xobó tsi axēquia ra” iqui mato pē, nohiria bo paracatsi na. Jama, “Arati xobó tsi axēquia ra” ipii tsi “Jaha ca bēsohai ca Dios janē tsi axēquia ra” iyoiqui mato ra. Jaharisi tsi xo toa dos ca yoahaina ra. ²² Jasca, “Naipá tsi axēquia” iqui mato pē, nohiria bo paraxēna. Jama, “Naipá tsi axēquia” ipii tsi “Naipá ca tronó ca tsaho ca Dios janē tsi axēquia” iyoiqui mato ra. Jaharisi tsi xo toa dos ca yoahaina.

²³ ‘Noitiria xo mato, yoba cahēxēni cabá, fariseobá. Paramisxēni xo mato ra. Jabi ma tēsaha ca yochi bo, naa mato menta, anís, comino, tihí cabo quima décima ca Dios qui aqui mato, mato yoba nicariaxēna. Tocaquí tsi Dios oquē-oquēria ca yoba nicayamaqui mato pē. ¿Japa? ¿Mabē xatē bo mēbicanai? ¿Noiyoicanai? ¿Dios chahahuayoicanai? Toca tsi ma ati nori iquē, mato yoba huētsa bo niaxoma. ²⁴ Bēco ca rēquēniniti ibo bo xo mato pē. Iriama ca yoba bo nica-nicapama tsi Dios oquē-oquēria ca yoba bo mataraqui mato pē.

²⁵ ‘Noitiria xo mato, yoba cahëxëni cabá, fariseobá. Paramixëni xo mato ra. Mëchocoha tsi xo mato mëquë bo. Mëchocoxo piquí tsi mato jabi bo nicariaqui mato; mahitsa quiha. Jahuëmishni bo ó quëëmishëneria xo mato ra. Yoixëni ca xo mato shinana. ²⁶ Jariapari tsi mato shina bahuëcana, bëcoria ca fariseobá. Mato shina pi bahuëhacano tsi jiaxëhi quiha mato jabi ri.

²⁷ ‘Noitiria xo mato, yoba cahëxëni cabá, fariseobá. Paramixëni xo mato. Joxohuahaca ca maihuati xobo bo jascaria xo mato ra. Jiaria tsi xo toa xobo cacha cato; jama, jaxara tsi nohiria xao bo, pisiria ca jahuë bo, tihi cabo jaca nori. ²⁸ Toca xo mato ri. Nohiria bo qui jia jisiria xo mato jabi bo; jama, quiamixëni ca jochahuaxëneria ca mato shina nori.

²⁹ ‘Noitiria xo mato, yoba cahëxëni cabá, fariseobá. Paramixëni xo mato. Jiaria ca maihuati xobo bo aqúi mato, mato Dios Chani yoanish cabo bax na. Toca tsi jato oquëhua-casqui mato pë. ³⁰ Tsayacahuë. Mato naaborëquëbá Dios Chani yoanish cabo aniquë pë. Jama, “Toatiyá pi bësorohaquí tsi jato ayamaquë no aniquë ra” iquí mato pë jaboqui. ³¹ Jabija. Jato ati iboba chahitaxocobo ma nori ca jismaquí mato ra, toca tsi ma chaniquë no. ³² Ma acatsai ca acahuë. Mato naborëquëbá chitahëhuani ca yonoco jatihuacana iquia ra. ¿Jaboqui ëa acasymacanaí?

³³ ‘Rono bá, rono ba xocobá. Tënëtiya qui raahacaxëqui mato iquia. ¿Jënahuariahax toa copi ma paxana? ³⁴ Ja tsi xo toa Dios Chani yoacanaibo, yosibo, yoba cahëxëni cabo, tihi cabo mato qui raaxëquia Dios Chani nica-maxëna. Jatsi jato xatë axëqui mato. Jato xatë cruzó tsi tooxaxëqui mato. Huëtsa bo rashaxëqui mato pë mato catiti xobo xo na. Huëtsa bo chibaxëqui mato, yaca huëtsa, yaca huëtsa jato mërabonaquí na. Tihi tsi axëqui mato pë. ³⁵ Jaha tsi mato qui japahacaxëhi quiha Dios copi ra, jatiroha ca acacanish cabo quëshpi na. Jariapari Abel acacanicuë. Jaquirëquë huëstima ca Dios Chani yoanish ca huëtsa bo acacani quiha. Jarohapa tsi Zacarías, naa Berequias baquë acacanicuë. Jabi altar, arati xobo naxërëquë xo tsi Zacarías ja tēpasanicuë. Tocanoma tsi xo toa acacanish cabo ra, naa Abel tēpas-hacanititiya rohari. ³⁶ Mato parayamaquia. Copihacaxëti xo jaboqui ca bēsocanaibo, jatiroha ca acacanish cabo quëshpi na iquia ra.

Jerusalén ca nohiria Jesú noinina Lucas 13.34-35

³⁷ ‘Jisa Jerusalén, Jerusalén ca nohiría. Jisa, Dios Chani yoanish cabo ati ibobá. Jisa, Diós raani ca Chani bëcanaibo acanaibá. ¡Erama! Mato otocasquia ra, naa jahuë pëhi namá jahuë xocobo patiarí othai jascaria. Jama, ëa biyamaqui mato rë. ³⁸ Iquë ra. Diós mato niabëriaquë rë. Quëyohacaxëqui mato ra. ³⁹ Jasca, ëa jistëquëyamarixëqui mato, “Shoma tsi xo Iboba janë tsi johai cato” i ma xëquë rohari —nëa tsi Jesu nëcaniquë.

24

“Quëyohacaxëhi quiha jodioba arati xobo” i Jesu nina Marcos 13.1-2; Lucas 21.5-6

¹ Jabi jodioba arati xobo Jesú jisbayaniquë. Jisbayajahuano tsi quiha ja qui jahuë rabëti bo bëcaniquë jato arati xobo bo tsayamaxëna. ² Tsayapama tsi jato qui Jesú chaniniquë:

—Jia tsi xo naa ma tsayacanaina. Mato parayamaquia. Potas-hacaxëhi quiha naa arati xobo bo tēquë ra. Matsami matsami niyamaxëhi quiha jahuë maxax bo; huësti ca yama nomari —i Jesu niquë.

*Xaba rëso jisti bo**Marcos 13.3-23; Lucas 21.7-24; 17.22-24*

³ Maca Olivo Ya icanai cató tsi Jesu tsahono tsi quiha ja qui jahuë rabëti bo bëcaniquë. Jahuë rabëti bo roha quiha.

—¿Jënino tsi ocapixëhi ni naa mi yoahaina ra? Noqui yoahuë. ¿Jënahuariaxo tsi cahëxëhi ni noa, naa mi bacahaina, xaba rëso, tihi cabo tsëquëxëquë no? —i Jesu qui jaca niquë.

⁴ Jatsi Jesu nëcaniquë:

—Quiniacaxëcahuë, ma parahacayamano. Joxëhi quiha huëstima ca noho janë tsi chanicanaibo. ⁵ Joxo tsi huëstima ca nohiria paracaxëcani quiha rë, “Cristo xo noa” iquina. ⁶ Jasca, país bo nianahaina, país ca xërëquë ca nohiria iquinahaina, tihi cabo nicaxëqui mato ra. Nicahi tsi raquëyamacana. Ocapixëhi quiha ra; jama, jari xaba rëso ja nomari. ⁷ País huëtsa pasomaha nianaxëhi quiha país huëtsa. Chama huëtsa pasomaha iquinaxëhi quiha chama huëtsa. Jasca, toatiyá tsi oriquiti biniaxëhi quiha nohiria bo rë. Jasca, yajoriaxëhi quiha mai. Toca tsi ja ixëti quiha jamëri ca iti bá no. ⁸ Jama, jariapari ca nohiria bá tënëhai ca chitahë roha tsi xo naa ra. Oquëanaxëhi quiha ra.

⁹ Jatsi mato qui tsamicaxëcani quiha. Chama bo qui mato mëacaxëcani quiha acacati. Ea iqui tsi mato qui caxaxëqui jatiroha ca país ca nohiria.

¹⁰ Toatiyá tsi Dios quima bësocaxëcani quiha huëstima ca nohiria. Jabë xatë bo pasomaha chanicaxëcani quiha rë. Jabë xatë bo qui caxacaxëcani quiha. ¹¹ Jatsi jisiquixëhi quiha huëstima ca mahitsa ca Dios Chani yoacanaibo. Jisiquiquí tsi huëstima ca nohiria paracaxëcani quiha. ¹² Toatiyá tsi pacanaxëhi quiha jochahaina. Janacaxëhi quiha nohiria bá noihaina; ¹³ jama, jahuë rëso qui tënëcanaibo xabahamahacaxëti nori. ¹⁴ Jasca, jatiroha ca mai ca nohiria qui yoahacaxëti xo Dios Chani, naa ja otoiha yoati na. Jabija ca Chani nicaxëhi quiha nohiria bo tëquë. Jaquirëquë tsëquëxëhi quiha jahuë rëso.

¹⁵ “Toatiyá tsi Dios arati xobo, naa iti-itiriá tsi niixëhi quiha quëyomixëni ca yoiria cato, naa Daniel yamabá yoani jascaria. Jabi naa quënëni ca tsayahi cató cahëno ra. ¹⁶ Naa quëyomixëni ca yoiria ca jisi tsi maca bo qui jabaxëti xo jodioba maí cabo. ¹⁷ Jahuë xobo qui jicoyamaxëti xo xobo cacha ca nohiria jahuë jahuë bo bixëna. Ja bamayamano. ¹⁸ Jasca, jahuë sahuëti biti bacayamaxëti xo huaí ca yonocohai cato. Ja bamayamano. ¹⁹ Toatiyá tsi noitixëhi quiha tohoya ca yoxa bo, baquë pistia ico cabo. ²⁰ Dios qui bëhocxana, matsitiyá tsi joiti barí tsi ma jabayamano. ²¹ Jabi mai nëhohuahanitiya rohari tsi huëstima ini quiha nohiria bá tënëhaina. Jama oquë-ouëriaxëhi quiha naatiyá ca ja tënëcaxëcanaina iquia. ²² Jama, toa tënëti xaba pi Diós namahuayama-rohano tsi yama ca nohiria xabahamahacahai quë aqüë. Ja bini ca nohiria bo bax toa xaba namahuaxëhi quiha.

²³ Jatsi “Nëá xo noqui Xabahamati Ibo, tsayapa. Toá xo ra” i pi toshuëcara no tsi jato chahahuayamacana. ²⁴ Toatiyá tsi jisiquixëhi quiha mahitsa ca Cristo bo. Jisiquixëhi quiha mahitsa ca Dios Chani yoacanaibo. Jisiquixo tsi jisti bo acaxëcani quiha pë, Diós bini ca nohiria bo paraxëna. ²⁵ Nicacahuë. Jaboqui mato yobapariquia, ocapijanox pari no. ²⁶ Jasca, “Xabachá xo Cristo” i nohiria no tsi boyamacahuë. “Nëá xo, jonë quiha” i jaca no tsi jato chahahuayamacahuë. ²⁷ Bajrahai ca canapa nai shitahai ca jascariaxëhi quiha Nohiria Baquë johaina. Mëri tsi ixëhi quiha ë johaina ra. ²⁸ Jabi yohina

²³ Jatsi “Nëá xo noqui Xabahamati Ibo, tsayapa. Toá xo ra” i pi toshuëcara no tsi jato chahahuayamacana. ²⁴ Toatiyá tsi jisiquixëhi quiha mahitsa ca Cristo bo. Jisiquixëhi quiha mahitsa ca Dios Chani yoacanaibo. Jisiquixo tsi jisti bo acaxëcani quiha pë, Diós bini ca nohiria bo paraxëna. ²⁵ Nicacahuë. Jaboqui mato yobapariquia, ocapijanox pari no. ²⁶ Jasca, “Xabachá xo Cristo” i nohiria no tsi boyamacahuë. “Nëá xo, jonë quiha” i jaca no tsi jato chahahuayamacahuë. ²⁷ Bajrahai ca canapa nai shitahai ca jascariaxëhi quiha Nohiria Baquë johaina. Mëri tsi ixëhi quiha ë johaina ra. ²⁸ Jabi yohina

²³ Jatsi “Nëá xo noqui Xabahamati Ibo, tsayapa. Toá xo ra” i pi toshuëcara no tsi jato chahahuayamacana. ²⁴ Toatiyá tsi jisiquixëhi quiha mahitsa ca Cristo bo. Jisiquixëhi quiha mahitsa ca Dios Chani yoacanaibo. Jisiquixo tsi jisti bo acaxëcani quiha pë, Diós bini ca nohiria bo paraxëna. ²⁵ Nicacahuë. Jaboqui mato yobapariquia, ocapijanox pari no. ²⁶ Jasca, “Xabachá xo Cristo” i nohiria no tsi boyamacahuë. “Nëá xo, jonë quiha” i jaca no tsi jato chahahuayamacahuë. ²⁷ Bajrahai ca canapa nai shitahai ca jascariaxëhi quiha Nohiria Baquë johaina. Mëri tsi ixëhi quiha ë johaina ra. ²⁸ Jabi yohina

pi rësono tsi catitapicani quiha poico bo. Jahuë pisi quiha. Jascaria tsi, jocha oquë-oquëriano tsi joxëhi quiha Nohiria Baquë jahuë ángel bo ya.

Nohiria Baquë johaina

Marcos 13.24-27; Lucas 21.25-33; 17.26-30, 34-36

²⁹ Anomariaxëhi quiha toa tënëtiya ra. Jaquirëquë tsëmonaxëhi quiha bari. Nai ax paquëxëhi quiha naipá ca huishti bo. Yajohacaxëhi quiha naipá ca jahuë bo. ³⁰ Jatsi naipá tsi jisiquixëquia, naa Nohiria Baquë ë nori cato. Jatsi araxëhi quiha maí ca nohiria bo tëquë. Jatsi tsëmó tsi ë johai ca jisxaxëcani quiha. Noho chama, noho oquë, tihí cabo jisxaxëcani quiha ë joquë no. ³¹ Jasca, xoohacaxëhi quiha trompeta joi pistiamá no. Jatsi jatiroha ca quinia, naa norte, sur, este, oeste, tihí cabo qui noho ángel bo raaxëquia. Noho nohiria, naa ë bini cabo catiacaxëcani quiha.

³² Jabi higuera jihui jisti tsayano. Ja botoxpino tsi basima xo oitiya. Toa cahëqui mato. ³³ Jascaria, ë yoaha ca jahuë bo chitahëno tsi basima tsi xo toa ë johaina. Joti basima xo ëa. ³⁴ Mato parayamaquia. Jabi naatiyá ca bësocanaibo rësonox pari no tsi ocapixëhi quiha ë yoahana. ³⁵ Huinocaxëhi quiha naipa, mai, tihí cabo; jama, huinoca-pistiayamariaxëhi quiha noho Chani ra.

³⁶ Jabi yama tsi xo toa ë johai ca bari hora cahëhaina. Cahëyamahi quiha naipá ca ángel bo. Cahëyamaquia ëa ri, naa Dios Baquë ë nori cato. Toa bari cahëhi quiha Jahëpa Dios roha.

³⁷ Jabi ë jono tsi ë noho pasoyamacaxëcani quiha nohiria rë, naa Noé tiyá jascaria. ³⁸ Toatiyá tsi Dios shinayamaquí tsi jënë ó ja pasoyamacaniquë. Raquëxoma tsi ja picani quiha. Jënë aii ja icani quiha. Ahui yahaii ja icani quiha. Ja tocacanicuë noti chahitaxëni ca qui Noé jiconox pari no. ³⁹ Jënë baihai ca ó ja pasoyamacani quiha. Jarohapa tsi jënë tsi ja quëyohacacanicuë ra.

⁴⁰ Toatiyá tsi yonocobëquihi ixëhi quiha dos ca joni bo huai xo na. Mëbihacaxëhi quiha huëstita. Jisbëriahacaxëhi quiha huëtsta. ⁴¹ Tobixëhi quiha dos ca yoxa bá xëqui timabëquinahaina. Mëbihacaxëhi quiha huëstita. Jisbëriahacaxëhi quiha huëtsta.

⁴² Japi jaha bësocahuë, mato ibo johai ca bari ma cahëyamahai quëshpi na. ⁴³ Yomaxëni ca johai ca hora pi cahërohahi tsi xobo ibo oxayamaquë aquë ra. Yomaxëni ca qui ja tsamiquë aquë ra. ⁴⁴ Japi shomahuahacacana, ë noho ma pasomayamahai ca barí tsi ë joxëhai quëshpi na.

Yoi cayonati

Lucas 12.41-48

⁴⁵ ¿Tsohuë ni toa empleado jiaxëni cato, naa chahahuahacati cato? ¿Tsohuë bixëhi ni chama, jahuë yonati bo ototi, jato orihuati? ¿Jahuë yonati jiaxëni ca biyamayamaxëhi ni? ⁴⁶ Ja qui jahuë chamá aca ca yonoco pi aii tsi ranixëhi quiha toa empleado, jahuë chama joxëquë no. Ja acai ca jisxëhi quiha jahuë chama ra. ⁴⁷ Jatsi jahuë empleado jia ca qui oquë ca yonoco axëhi quiha, naa jahuë jahuë bo tëquë ototi. ⁴⁸ Jama, yonati yoi ca iipihí tsi “Bamaxëhi quiha noho chama” jamë ixëhi quiha. ⁴⁹ Jatsi jahuë chama yonati bo rashati chitahëhuaxëhi quiha pë. Pahëcanaibo ya oriquiti chitahëhuaxëhi quiha. Jënë aii quiha rë. ⁵⁰ Jatsi bacaxëhi quiha jahuë chama, naa jaha ja pasoyamahai ca barí no. ⁵¹ Bacaxo tsi raquëria ca nicamixëni cabá copi toa empleado yoi ca qui axëhi quiha. Toá tsi ara-araxëhi quiha toa empleado nicamixëni cato.

25

Diez ca yoxajahi bo chani

¹ Jabi tsëquëxëhi quiha Diós otohái ca bari ra. (Jaha bësocana.) Toa barí tsi nëcaxëhi quiha nohiria, naa chani jascaria. Jabi tobi quiha diez ca yoxajahi bo iniquë. Baquichá tsi quiha jato lamparina bo ja tsamacaniquë, ahui yahi johai ca joni bëchaxëna. ² Jabi cinco ca yoyoxëni ca yoxajahi bo ya ini quiha, cinco ca tiisi jaya ca huëtsa cabo ri. ³ Jabi yoyoxëni cabá jato lamparina bo boniquë aceite yama. Aceite ja shina-bënocani quiha. ⁴ Jama, tiisi cabá aceite boniquë jato lamparina boquí na. ⁵ Jatsi quiha ahui yahai ca bamaniquë. Manahi tsi yoxajahi ba bëro coshinaniquë. Jatsi oxatsijacani quiha. ⁶ Jatsi baquichá tsi quiha tsohuëcara ca quënëhai ca joi ja nicacanicuë, naa “Jaboqui cahëhi quiha ahui yahai cato ra. Bëchahi bëcahuë” iquiina. ⁷ Jatsi quiha joiniquë yoxajahi bo. Joixo tsi jato lamparina bo ja shomahuacanicuë. ⁸ Jatsi quiha “Aceite pistia noqui ahue. Nocapaima tsi xo noba lamparina bo rë” i tiisi cabo qui yoyoxëni cabo niquë. ⁹ Jatsi quiha, “¿Jënahuariaxo mato qui no ana? No narismitsa. Oquë tsi xo tiendá qui ma bocanaina copixëna” i jato qui tiisi ca yoxajahi bo ni quiha. ¹⁰ Jatsi quiha yoyoxëni ca yoxajahi bo bocanicuë aceite copixëna. Ja copicano tsi quiha ahui yahai ca cahënicuë. Jatsi quiha ja bëta fiesta qui rohahuahacanicish ca yoxajahi bo jiconiquë. Ja jicoyocaquë tsi quiha caiti japahacanicuë. ¹¹ Jaquirëquë ja cho tsi quiha fiesta qui cahëcaniquë yoxajahi bo huëtsa bo. Cahëxo tsi quiha ja quënëcaniquë: “Japëcahuë, taitá. Noqui jicomahuë ra” iquiina. ¹² Jatsi quiha, “Mato cahëyamaquia ra” i jato qui ahui yahai ca ni quiha.

¹³ Japi jaha bësocahuë, ë johai ca bari ma cahëyamahai quëshpi na —nëa tsi Jesu nëcaniquë chani yoahi na—.

*Parata bichish ca yonati chani**Lucas 19.11-27*

¹⁴ Jabi Diós otohái ca tsëquëno tsi copihacaxëhi quiha nohiria bo. Naa chani nicacahuë. Tobi quiha chama iniquë. Nëama país huëtsa qui ja cacasni quiha. Jabi canox pari tsi quiha jahuë yonati bo ja quënënicuë. Quënëxaxo tsi quiha jahuë parata jato qui ja prestahuahanicuë ja bax anihuati. ¹⁵ Huësti ca yonati qui cinco mil ca pesos ja aniquë. Yonati huëtsa qui dos mil ca pesos ja aniquë. Huëtsa qui un mil ca pesos ja aniquë. Jabi oquë ca tiisi jaya ca yonati qui huino ca parata ja ani quiha. Tiisiriamá ca qui nama ca ja ani quiha. Parata axo tsi quiha ja jibayaniquë. ¹⁶ Jabi bamayamaniquë toa cinco mil ca pesos bichish ca yonati. Ja iniahai cató tsi quiha toa parata ja anihuaniquë. Toca tsi quiha cinco mil ca pesos ganancia ja aniquë ra jahuë chama bax na. ¹⁷ Jabi tocaniquë dos mil ca pesos jaya ca ri. Dos mil ca pesos ganancia ja ani quiha jahuë chama bax na. ¹⁸ Jama, un mil ca pesos bichish ca caniquë jahuë parata ya. Caxo tsi quiha maiquiní tsi jahuë chama parata ja maihuaniquë.

¹⁹ Naama tsi quiha, naa xëni huëtsá tsi quiha jato chama bacanicuë. Bacaxo tsi quiha jato qui ja prestahuahani ca parata ja bënënicuë. ²⁰ Jatsi quiha jariapari ca yonati, naa cinco mil ca pesos binish ca jonicuë. Joxo tsi quiha jahuë chama qui jahuë cinco mil ca pesos jahari ja mëanicuë. Chamána quiha. Jatsi quiha chama qui cinco mil ca pesos huëtsa ja mëanicuë. Jahuë ganancia quiha. “Cinco mil ca pesos ë qui mi aniquë, taitá. Tsayahuë. Nëa xo cinco mil ca pesos huino, naa ganancia mi bax ë acana ra” i jahuë chama qui ja niquë. ²¹ Jatsi quiha chama chananicuë: “Jia tsi xo toa mi acana ra, yonati jiaxëni cató. Jia tsi noho parata pistia mi otoquë ra, negocio acaina. Ja iqui tsi oquë ca yonoco mi qui axëquia ati. Noho xobo qui jicohuë. No

raninabëquino ra” i jahuë yonati qui chama niquë. ²² Jatsi quiha dos mil ca pesos binish ca yonati joniquë. Johax, “Dos mil ca pesos é qui mi aniquë. Tsayapa. Nëá xo dos mil ca pesos huino quiha, naa ganancia mi bax é acana ra” i jahuë chama qui ja ni quiha. ²³ Jatsi quiha ja qui jahuë chama nëcaniquë: “Jia tsi xo toa parata pistia tsi negocio mi acana ra. Ja iqui tsi oquë ca yonoco mi qui axëquia ototi. Noho xobo qui jicohuë. No ranibëquinano ra” i ja qui chama ni quiha. ²⁴ Jatsi quiha un mil ca pesos binish ca yonati joniquë. Johax, “Noiyamahai ca joni mi iqui ca é nicaniquë, naa nohiria huëtsa bá banaha ca sayaha ca tihí cabo tēsahaina. ²⁵ Japi é raquë-raquëniquë. Raquëhi tsi mi parata é maihuaniquë bēnoyama-xēna. Tsayapa, nëá xo mi parata ra. Mí-na quiha” i chama qui ja niquë. ²⁶ Jatsi quiha chama chaniniquë: “Yoixēni ca chiquixēniria ca yonati xo mia ra. Noiyamahai ca joni é iqui ca mi cahēniquë. Jabija, noho yonati bá banaha ca sayaha ca, tihí cabo tēsahai ca éa xo naa. ²⁷ Jjēniriexo tsi banco qui noho parata mi ayamani pa, ganancia bixēna? Jatsi joxo tsi noho parata yoi, jahuë banco ganancia, tihí cabo é biquë aquë ra” i toa yonati qui ja ni quiha. ²⁸ Jatsi quiha toá ca mani cabo qui chama chaniniquë: “Jahuë mil ca pesos mēbicahuë. Toa cinco mil ca jaya ca yonati qui acahuë. ²⁹ Jabi huino ca copi bicaxēcani quiha jaya cabo, naa Dios bax yonococanaibo. Biniayamacaxēcani quiha. Jama, jahuë pistia roha ca bēnoxēhi quiha yonocoyamahai cato. ³⁰ Japi cacha tsēmo qui naa chiquixēni ca yonati niacahuë. Toá tsi ara-araxēhi quiha tēnēhi na” i chama ni quiha —nēa tsi Jesu nëcaniquë naa chani yoahi na—.

Jaroja ca copi

³¹ Jabi anomariaxēhi quiha toa barí tsi é joxēhaina. Noho ángel bo ya tsi joxēquia, naa Nohiria Baquë é nori cato. Johax noho trono-tronoriá tsi tsahoxēquia. ³² Jatsi éa tēamē tsi caticaxēcani quiha maí ca nohiria bo tēquë. Jatsi nohiria bēquēxnamaxēquia, naa chibo quima jahuë oveja obeso cató tsēcahai ca jascaria. ³³ Jahuë mēnēcayá tsi oveja bo janahi quiha, chibo jahuë mēxojó no. ³⁴ Jabi tocaxēquia éa ri, naa chama-chamaria é nori cato. Tocahax noho mēnēcayá ca nohiria bo qui chaniparixēquia: “Bēcahuë, noho Jahēpá shomahuani ca ma bino ra. Naama tsi quiha ja rohahuahacani quiha, naa mai nēhohuahacani tiya rohari. ³⁵ E paxnano tsi éa ma pimaniquë ra. E tēshinaquë tsi jēnē éa ma amaniquë ra. E co-coquë tsi mato xobo qui éa ma jicomaniquë. ³⁶ Sahuëti é narisquë tsi éa ma shomahuaniquë. Preso qui é nanēhacaquë tsi é qui ma shishoniquë” nēa tsi jato qui nēcaxēquia. ³⁷ Jatsi, “Jjēnino tsi mia no pimani pa, Ibobá, naa mi paxnaquë no? Jjēnino tsi mia jēnē no amani sa, naa mi tēshinaquë no? ³⁸ JCo-cohi tsi no bēta mi chitēni pa? Jjēnino tsi mia no joihuani pa? Jjēnino tsi sahuëti mi qui no ani, naa tsoboco mi iquë no? ³⁹ Mi iquiquë tsi preso xara mi iquë tsi jjēnino tsi mi qui no shishoni pa?” Tihí tsi i é qui xēhi quiha mēstēhuahacahax cabo, quēbihi na. ⁴⁰ Jatsi, “Nēa xo tsi èbē xatē iriama cabo shomahuaiquí tsi é bax ma tocaquë ra” ixēquia. ⁴¹ Jaquirēquë mēxojó ca nohiria bo qui chanixēquia: “Tori bocaquë. Yoshihuahacati xo mato ra. I-ipaohai ca chíhi, naa Yoshini, jahuë ángel yoixēni bo, tihí cabo bax rohahuahacani ca chíhi qui bocata. ⁴² Paxnahēquë tsi éa ma pimayamaniquë pē. E tēshinaquë tsi é qui jēnē ma ayamaniquë pē. ⁴³ E co-coquë tsi mato xobo qui éa ma jicomayamaniquë pē. Sahuëti é narisquë tsi éa ma mēbiyamaniquë pē” nēa tsi jato qui nēcaxēquia ra. ⁴⁴ Jatsi éa quēbicaxēcani quiha: “Jjēnino tsi mi iquini pa? Jjēnino tsi mia no mēbiyamani pa, naa preso qui mi nanēhacaquë no? Cahēyamaqui noa ra”

tihi tsi i è qui caxëcani quiha pë. ⁴⁵ Jatsi, “Parayamaquia. Ebë xatë iriama cabo pi mëbicasyamaquí tsi ëa yoi ma mëbicasyamaniquë pë” i jato qui xëquia ra. ⁴⁶ Jatsi raahacaxëcani quiha naabo. Tënë-tënëpaocaxëcani quiha. Jama, bëso-bësopaocaxëcani quiha mëstëhuahacahax cabo ra —nëa tsi Jesu nëcaniquë.

26

Jesu qui ja tsamicascanina

Marcos 14.1-2; Lucas 22.1-2; Juan 11.45-53

¹ Nohiria bo tiisimahax tsi quiha jahuë rabëti bo qui Jesu chaniniquë:

² —Dos bari tsi chitahëxëhi quiha pascua fiesta. Toatiyá tsi chama bo qui mëahacaxëquia rë. Cruzó tsi ëa namëcaxëcani quiha —iquiina.

³ Toatiyá tsi quiha Caifás xobo-xoboria tsi jodioba chama bo catiniquë. Toá mani ini quiha arati iboba chama bo, jodioba yosibo. ⁴ Toá tsi ja chaninacani quiha Jesu yoati na. Parahax tsi ja qui ja tsamicascani quiha namëxëna.

⁵ —No quiniati xo ra. Anoma tsi xo fiesta no tsi ja qui no tsamihaina ra. Caxaxëhi quiha nohiria bo tia —i jaca niquë.

Perojomé tsi Jesu tahë ashimahacanina

Marcos 14.3-9; Juan 12.1-8

⁶ Jabi yaca Betaniá tsi Jesu iniquë, naa bonohuaxëni ca Simón xobó no.

⁷ Toá ja no tsi quiha ja qui yoxa joniquë alabastro icanai ca botella ya. Perojome rëamë ja ini quiha. Joxo tsi quiha naa copixëni ca perojome jahuë mapo qui ja japaniquë, ja oriquiquë no. ⁸ Jatsi yoxa qui jahuë rabëti bo caxaniquë ja aca ca jisi na.

⁹ —¿Jëniriexo tsi toa perojome mi yoshihuaha rë? Copixëni quiha. Huëstima ca parata quëshpi tsi naa perojome iniahacati nori iquë rë noitiria cabo qui ati —i jaca niquë.

¹⁰ Jabi ja chanicani nori ca Jesús cahëni quiha. Cahëhax,

—¿Jënixo tsi naa yoxa yosicanai pë? Jiaria tsi xo toa ë bax ja acana ra.

¹¹ Mato bëtarohahi quiha noitiria cabo; jama, ëa ti tsi xo toa mato bëta naamayamahaina. ¹² Noho yora qui perojome ja japahai cató tsi ëa ja rohahuaquë maihuahacati. ¹³ Ja aca ca nicaxëhi quiha maí ca nohiria bo tëquë, naa Dios Chani yoahacahai cató no. Jatsi naa yoxa shinaxëhi quiha nohiria bo, nicaxo na —i Jesu niquë.

Chama bo qui Jesu Judás mëacasnina

Marcos 14.10-11; Lucas 22.3-6

¹⁴ Jatsi arati ibobá chama bo qui Judas caniquë, naa Iscariote yaca ax jonish cato. Jesu doce ca rabëti bo ó ca huësti ca ja ini quiha. Cahax,

¹⁵ —¿Jahuë tihi ca parata ë qui acaxëcanai Jesu quëshpi na? Mato qui mëaxëquia —i jato qui Judas niquë pë.

Jatsi Judas qui treinta ca parata copixëni ca quiha ja acaniquë. ¹⁶ Bixo tsi quiha jato qui Jesu mëati xaba jia ca mërati ja chitahëhuaniquë.

Pascua fiesta

Marcos 14.12-25; Lucas 22.7-23; Juan 13.21-30; 1 Corintios 11.23-26

¹⁷ Jabi pascua fiesta bari bo tsëquëquë tsi quiha naa jariapari ca barí tsi levadura yama ca mapari jodiobá piniquë. Jato jabi quiha. Jatsi toa barí tsi quiha Jesu qui jahuë rabëti bo bëcaniquë.

—¿Jahuënia xo tsi pascua oriquiti rohahuaquëhi ni noa sa, pixëna? —i jaca niquë.

18 —Tobi yacatá ca joni quiha. Ja qui bocata. “ ‘Basima tsi xo noho xabaca’ ii quiha Maestro” i ja qui cana. “Mi xobo xo tsi jahuë rabëti bo yaxo tsi pascua oriquiti picatsi quiha” i ja qui cana —i jato qui Jesu niquë.

19 Jatsi jahuë rabëti bo bocaniquë Jesú yoani ca axëna. Toa xo tsi quiha pascua oriquiti ja rohahuacanicuë.

20 Yata tsi naa bari caquë tsi quiha jahuë doce ca rabëti bo ya Jesu iniquë.

21 Oriquipama tsi,

—Parayamaquia. Jodiobá chama bo qui ëa mëaxëhi quiha mato ó ca huësti cato rë —i jato qui ja niquë.

22 Jatsi quiha ja cohuënacanicuë.

—¿Tsohuë cara ni toa sa? ¿Ea ti ma ni? —i jaca niquë.

23 Jatsi quiha Jesú quëbiniquë:

—E bëtaxo tsi jahuë mapari pitëxti qui nacomabëquihai ca tsi xo toa ëa mëaxëhai cato ra. 24 Rësoxëquia Quënëhacanish cabá yoani jascaria, naa Nohiria Baquë ë nori cato; jama, noiti-noitixëhi quiha toa jodioba chama bo qui ëa mëaxëhai ca joni ra. Ja qui oquë ja iquë aquë ja coyamarohapiquë no —i Jesu niquë.

25 Jatsi,

—¿Ea yoati tsi chanihi ni mia pa? —i Judas niquë, naa Jesu mëanish cato.

—Jaahuë —i Jesu niquë.

26 Jatsi oriquipama tsi quiha mapari Jesú biniquë. Bixo tsi “Gracias” i Dios qui ja niquë ja quëshpi na. Bëquëx-xo tsi jato qui mapari ja aniquë piti.

—Bicahuë. Picahuë. Noho yora tsi xo naa —i jato qui ja niquë.

27 Jatsi copá ca jënë ja biniquë. Bichi tsi “Gracias” i ja niquë. Jatsi jënë jato qui ja aniquë.

—Bicahuë. Ayocana —i Jesu niquë —. 28 Noho jimi tsi xo naa. Dios xabahamati quinia jisti quiha. Huëstima cabo bax japahacahi quiha noho jimi ra, jato jocha masati. 29 Jabi nëa xo tsi naa uva bimi jënë atëquëpistiyamariaxëquia, mato bëta xo tsi quinia paxá tsi ë atëquëxëquë rohari mana xo na, naa noho Jahëpá othai cato xo na —nëa tsi Jesu nëcaniquë.

Jochati tanamahacaxëqui mato

Marcos 14.26-31; Lucas 22.31-34; Juan 13.36-38

30 Quëquëhax tsi quiha Maca Olivo Ya qui ja bocaniquë. 31 Jatsi quiha jato qui Jesú chaniniquë:

—Naa baquichá tsi ëa pasomaha bësoyoxëqui mato rë. Tocaxëti quiha, “Oveja obëso ca tëpasmoxëquia. Pacanamahacaxëhi quiha jahuë oveja” i Quënëhacanish cato ó tsi Dios ni quëshpi na. 32 Jama, bësoxëquëhax mato bëbo Galilea qui caxëquia —i jahuë rabëti bo qui Jesu niquë.

33 Jatsi quiha Pedró quëbiniquë:

—Mi quima tëxë bo bësomitsa. Jama, mi quima casopistiyamariahahi ca ëa xo naa ra —iquiina.

34 Jatsi Pedro qui Jesu chaniniquë:

—Mia parayamaquia. Naa baquichá tsi patiari bënë quëonox pari no tsi tres tsi “Jesu cahëyamaquia” ixëqui mia rë —iquiina.

35 Jatsi quiha,

—Mi bëta pi rësorohahi tsi mi quima casopistiyamariaxëquia ra —i Pedro niquë.

Jatsi toca tsi quiha chaniniquë jahuë rabëti huëtsa bo ri.

Getsemaní tsi Jesu bëhoxnina

Marcos 14.32-42; Lucas 22.39-46

36 Jatsi Getsemaní icanai ca qui Jesu caniquë jahuë rabëti bo ya. Cahax, —Nëbí tsahocana. Toa tsi caapariquia bëhox-xëna —i jato qui ja niquë.

37 Jatsi Pedro, Zebedeo dos ca baquë, naa Jacobo, Juan, tihi roha cabo ja boniquë. Jatsi Jesu cohuënaniquë. Raquëtsijaniquë. 38 Jatsi quiha, —Cohuëria ca ëa xo naa. Rësoti basima xo ëa rë. E bëta chitëcana. E bëta bësocana ra —i jato qui ja niquë.

39 Jatsi ori pistia cahax Jesu mëniniquë, jahuë bëmana mai quiri. Bëhoxtsijaniquë:

—Mi qui pi jia no tsi ë quima naa johai ca tënëtiya mëbihuë, noho Jahëpá. Tënëcasyama xo ëa ra. Jama, jaha ë quëëhai ca mi ayamano; jama, mi shina roha ati nori ra —i Jesu niquë bëhoxhi na.

40 Bëhoxhax jahuë rabëti bo qui ja joniquë. Joxo tsi ja oxacana ca ja jisniquë. Jatsi,

—¿Huësti hora roha ë bëta bësoti mëtsama ni mato rë? 41 Bësocana. Bëhoxcana, jochati ma tanamahacayamana ra. Jabija, mato shina tsi xo toa bëhoxcatsaina; jama, mato yora tsi xo chamayama —i Pedro qui Jesu niquë.

42 Jatsi Jesu catëquëniquë bëhox-xëna.

—Ea shinahuë, noho Jahëpá. Mi qui pi jia no tsi naa tënëtiya mi mëbino. Jama, jaha ë quëëhai ca mi ayamano, mi shina ati nori —i ja niquë.

43 Bëhoxhax ja jotëquëniquë. Oxa ja icani ja jisniquë. Coshiria jato bëro ini quiha. 44 Jisbaya tsi ja bëhoxtëquëniquë, jasca ca yoahaina. 45 Jatsi jahuë rabëti bo qui ja bacaniquë.

—¿Jari oxacana rë? ¿Jari joicana rë? Tsëquëquë ë tënëti hora ra. Jochahuaxëni cabo qui mëahacapaimaria xo ëa, naa Nohiria Baquë ë nori cato. 46 Joicana. ¿Canomani? Nëa johi quiha ëa mëacatsai ca joni rë —i Jesu niquë.

Jesu qui soldado bo tsaminina

Marcos 14.43-50; Lucas 22.47-53; Juan 18.2-11

47 Jabi jari ja chanino tsi Judas joniquë, naa doce ca ó ca huësti cato. Ja bëta bëcaniquë nohiria misco. Saipi bo, jihui bo, tihi cabo jayacani quiha. Ja raahacani quiha Jesu qui tsamiti. Arati ibo bo, yosibo, tihi cabá jato raani quiha. 48 Jatsi nohiria misco qui jisti Judás aniquë.

—Ma bicatsai ca joni tatsoxëquia. Toa joni qui tsamicahuë —i jato qui Judas, naa Jesu mëanish ca niquë pë.

49 Japi cahëhax Jesu qui Judas catapiniquë. Cahax,

—¿Jënimani mia, maestró? —i Jesu qui ja niquë, joihuahi na.

Joihuaxo tsi quiha Jesu ja tatsoniquë pë. 50 Jatsi Jesú quëbiniquë:

—Mi acatsai ca ahüë pë, noho rabëti —iquina.

Jatsi Jesu qui tsamihí ja bëcaniquë. Ja achajahuacaniquë.

51 Jatsi quiha Jesu rabëti huësti cató jahuë saipi tsëcaniquë. Tsëcaxo tsi quiha arati ibo-iboria yonati ja paxtianiquë Jesu paxamacatsi na. 52 Jatsi,

—Jahuë iti qui mi saipi jahari raahuë ra —i ja qui Jesu niquë—. Saipi tsi acacaxëhi quiha saipi iquinacascanaibo ra. 53 ¿Jëniyahai? ¿Dios quënëti mëtsa ca ë nori cahëyamahai? Dios ë quënarohano tsi huëstima ca ángel bo, naa doce ca ángel ejército ja raatapiquë aquë ra. 54 Jama, ángel bo ja raarohano tsi ¿jënahuariaxo Quënëhacanish cabo jatihuahacana? “Jochacanaibo qui ja mëahacati xo” ¿iyamacahi ni? —nëa tsi Jesu nëcaniquë jahuë rabëti bo qui.

55 Jatsi bëcanish ca nohiria misco qui Jesú chaniniquë:

—¿Saipi bo, tëpasti jihui bo, tihi cabo jaya ni mato pa? ¿Yomaxëni ca bichii jascaria ëa bichi bëcanai pa? Jatiroha ca bari mato bëta ë i-ipaoyamëquë arati xobó no. Toa xo tsi ë tiisimaquë tsi ë qui ma tsamiyamayamëquë. 56 Jama,

ocapijaquë naa tëquëta, Dios Chani yoanish cabá quënëni ca jatihuahacano iquish na —nëa tsi jato qui Jesu nëcaniquë.

Jatsi jahuë rabëti bá Jesu jisbërianiquë. Jisbëria tsi ja jabacanicuë.

Jodioba chama bo bësojó Jesu niinina

Marcos 14.53-65; Lucas 22.54-55, 63-71; Juan 18.12-14, 19-24

⁵⁷ Jesu qui tsamixo tsi arati ibo ba chama Caifás qui Jesu ja bocanicuë copihacati. Toá tsi mani ini quiha yoba cahëxëni cabo, jodioba yosibo.

⁵⁸ Jasca, basi quiha Pedró banahuaniquë raquëquí na. Chama xobo huënë qui cahëhax toá tsi ja tooniquë. Jatsi huënë qui jicohax xobo obëso cabo ya Pedro tsahoniquë tsayaxëna. ⁵⁹ Jabi arati ibo bo, nohiria yosibo, tihi cabá Jesu namëcasni quiha. Ja tsi xo toa Jesu pasomaha ca joi ja mëracanicuë. Yama a ra. ⁶⁰ Jama, tobi huëstima ca quiahuacanaibo ini quiha ja qui quësocatsi na. Jarohapa tsi dos ca quiaxëni ca joni niiniquë ja qui quësoxëna.

⁶¹ —“Dios arati xobo potasti mëtsa xo ëa ra” i ja ni quiha. “Jaquirëquë quiha tres barí tsi naa xobo nimatëquëxëquia” i ja ni quiha —i jaca niquë Jesu qui quësocatsi na.

⁶² Jatsi arati ibo ba chama joiniquë Jesu qui chanixëna.

—¿Jënihai, naa jahuë bo yoati na? Mía pasomaha chanicani quiha ra. ¿Jato quëbicasyamahai? —i Jesu qui ja niquë.

⁶³ Quëbiyamaniquë Jesu. Jatsi arati ibo ba chama chanitëquënicuë.

—Bësohai ca Dios janë tsi mi chanino ra. Mi parayamano. ¿Dios Baquë, naa johai ca Xabahamati Ibo ni mia ra? Noqui yoahuë ra —i Jesu qui ja niquë.

⁶⁴ Jatsi,

—Ja tsi xo ëa ra. Jaboqui tsi chamaxëni ca Dios mënëcayá ca Nohiria Baquë tsaho ca jisxëqui mia. Naipá ca tsëmó tsi ja johai ca jisxëqui mia —i ja qui Jesu niquë.

⁶⁵ Jatsi arati ibo ba chamá jahuë sahuëti jaraxanicuë caxaquí na. Jatsi,

—Dios pasomaha ja chaniquë ra. Anoma quiha. ¿Jënirixo ja qui quësocanaibo huëtsa bo no nicacasna? Nëa roha xo tsi jahuë yoixëni ca chani no nicaquë ra. ⁶⁶ ¿Jabija ni? —nëa tsi Caifás nëcaniquë.

Jatsi,

—Yoixëni tsi xo toa ja chanihana ra. Namëhacati xo ra —i jaca niquë.

⁶⁷ Jatsi quiha Jesu bëmana qui coshotsi-jahuacanicuë pë. Ja bëtoxanicuë pë. Ja bëpaishacanicuë rë.

⁶⁸ —Jisa, Xabahamati Ibobá. ¿Tsohuë mia aca? Noqui yoahuë ra —i jaca niquë tocahi na.

Jesu quima Pedro bësonina

Marcos 14.66-72; Lucas 22.56-62; Juan 18.15-18, 25-27

⁶⁹ Toatiyá tsi xobo cacha, naa huënëñë tsi tsaho Pedro iniquë. Toa tsaho ja no tsi ja qui xotaco joniquë. Yonati ja ini quiha. Jatsi ja qui yonati chaniniquë, naa xotaco cato.

—Jesu ya mi iquë, mia ri —i Pedro qui ja niquë.

⁷⁰ Jama,

—Jesu cahëyamahai ca ëa xo naa ra. E joma mi chanihaina —i Pedro niquë ja qui jato bësojo ax na.

⁷¹ Jatsi caiti qui Pedro caniquë, naa huënëñë cato. Toa xo tsi quiha xotaco yonati huëtsá Pedro jisniquë. Jatsi,

—Jesu ya toa joni iquë ra —i toa yonati niquë toá ca manicanaibo qui.

⁷² Jatsi caxahax Pedro ocaniquë:

—Parayamaquia. Toa Jesu cahëyamahai ca ëa xo naa ra —iquiina.

⁷³ Jaquirëquë, yata pistia no tsi quiha toá ca niikai ca joni bo Pedro qui bëcaniquë.

—Tonia Jesu rabëti huësti ca xo mia ra. Jamëri xo mi joi, mi chanihaina ra —i Pedro qui jaca niquë.

⁷⁴ Jatsi Pedro ocatëquëniquë pë:

—Jabija ca pi ë chaniyamarohano tsi ëa Diós copino ra. Parayamaquia. Toa joni cahëyamaquia ra —i jato qui ja niquë rë.

Tocajaquë tsi quiha patiari quëo-quëoniquë. ⁷⁵ Jatsi Jesú yoaha ca Pedró shinaniquë, naa “Patiari quëonox pari no tsi ‘Jesu cahëyamaquia’ ixëqui mia” i ja qui Jesu ni quëshpi na. Jatsi cacha Pedro caniquë. Cahax ja ara-araniquë rabihina.

27

Pilato qui Jesu ja bocanina

Marcos 15.1; Lucas 23.1-2; Juan 18.28-32

¹ Huëaquë tsi arati ibo ba chama bo, nohiria yosibo, tihi cabo chaninaniquë Jesu namëti yoati na. Jesu ja namëcascani quiha.

² Jatsi quiha Jesu ja nëxacaniquë. Nëxaxo tsi quiha romanoba chama, naa Pilato icanai ca qui Jesu ja bocaniquë ja copihacano iquish na. Boxo tsi ja qui ja mëcaniquë ja namëhacano.

Judas rësonina

³ Jabi Jesu ja namëcascani nori ca jisi tsi Judas rabiniquë, naa jato qui mëanish cato. Rabiniquë tsi quiha jahari jodioba chama bo qui jahuë treinta ca parata copixëni ca ja bëniquë. Jaha ja quëëyamani quiha.

⁴ —Jishopë. Jochaquë ëa ra. Shinajiaxëni ca ë mëaquë rë, ja namëcano —i jato qui Judas niquë.

Jatsi,

—Noba shina ri ma xo; mi shina nori —i ja qui jodioba chama bo niquë.

⁵ Jatsi napata qui toa parata ja nianiquë arati xobo xo na. Niabëria tsi jamë tsi ja namëhi caniquë, jamë tënëxëhax na.

⁶ Jatsi arati ibo ba chama bá ja niani ca parata topiniquë. Topihax,

—Anoma tsi xo naa parata ra. Namëti copiti parata quiha. Noba yoba pasomaha tsi xo noba caja qui naa parata yoï nanëhaina. Binoma quiha —i jaca niquë.

⁷ Chaninahax Campo del Alfarero mai ja copicaniquë carayanabo maihuati. ⁸ Ja tsi xo toa “Mai Jimi Ya” toa mai quënahacani quiha. ⁹ Jabi tocapijaquë tsi Dios Chani yoanish ca Jeremías yamabá yoani ca jatihuahacani quiha, naa “Treinta ca parata copixëni ca ja bicaniquë. Joni copi ja ini quiha. Toa precio jodiobá copipaoni quiha joni quëshpi na. ¹⁰ Bixo tsi alfarero mai ja copicaniquë, ëa Ilobá yoani jascaria” nëá tsi quiha ja quënëni ca nina.

Pilato bësojó Jesu niinina

Marcos 15.2-5; Lucas 23.3-5; Juan 18.33-38

¹¹ Romanoba chama bësojó Jesu nimahacaniquë ja copihacano. Jatsi,

—¿Jodioba rey, naa chama-chamaria ni mia ra? —i Jesu qui romanoba chama niquë nicahi na.

Jatsi,

—Jaahuë —i Jesu niquë.

¹² Jama, arati ibo bo, nohiria yosibo, tihi cabo ja qui quësoquë tsi Jesú quëbiyamaniquë. ¹³ Jatsi Pilató nicaniquë:

—Huëstima ca tsi xo toa mi qui ja quësocanaina ra. ¿Jato nicayamahai? —iquiina.

14 Quëbiyamaniquë Jesu. Japi Pilato ratëniquë. Shinati ja cahëyamani quiha.

Nati Jesu copihacanina

Marcos 15.6-20; Lucas 23.13-25; Juan 18.38; 19.16

15 Jabi jatiroha ca fiesta no tsi huësti ca presó ca joni quiha romanoba chamá paquëmapaoniquë nohiria bo qui. Jahuë jabi quiha. Nohiria qui jia ca joni iqui ca ja paquëmapaoni quiha. 16 Jasca, toatiyá tsi ati ibo quiha, naa Barrabás icanai ca preso xara iniquë. Toa joni quiha nohiria tëquëtá cahëniquë. 17 Japi nohiria misco catiquë tsi quiha Pilató jato nicaniquë:

—¿Jënica joni mato bax paquëmaxëhi ni ëa ra? ¿Barrabás ni? ¿Jesu ni, naa Cristo imahaina? —i jato qui ja niquë.

18 Jabi Jesu qui yosaxëni quiha toa jodiobo iniquë. Ja tsi xo toa Pilato qui ja mëacani quiha ja namëno. Jabi ja qui ja yosacana ca Pilató cahëni quiha.

19 Jatsi quiha nohiria copiti tsahoti ja tsahono tsi jahuë ahuini ja qui chani raaniquë. “Toa shinajaxëni ca joni namëyamahuë. E nama-namashinaquë ja yoati na ra” i ja niquë bënë qui.

20 Jama nohiria misco qui arati ibo bo, nohiria yosibo, tihi cabo chaniniquë namëcatsi na. Chanihax,

—Barrabás bënëcana ra. “Nati xo Jesu” icana —nëa tsi nohiria bo qui ja nëcacaniquë.

21 Jatsi Pilato chanitëquëniquë:

—Nëbi dos ca joni bo. ¿Jënica mato qui paquëmaxëhi ni ëa ra? —iquiina.

Jatsi,

—Barrabás —i jaca niquë.

22 Jatsi,

—¿Jënahuaxëhi ni ëa ra Jesu qui, naa Cristo imahaina? —i Pilato niquë.

Jatsi,

—Cruzó tsi tooxahuë —i nohiria tëquë niquë.

23 —¿Jëni ni ra? ¿Jahuë yoi ca ja ani pa? —i Pilato niquë jato nicahi na.

Jatsi jato joi ja choshacaniquë pë:

—Cruzó tsi ja tooxahacati xo ra —iquiina.

24 Jatsi Pilato yosaniniquë. Mahitsa jato qui ja chanini quiha. Caxaxëneria quiha toa nohiria iniquë; iquinacaspaimaria jaca nori. Jatsi jënëpaxa Pilató bënëniquë jato bësojo xo tsi mëchocohaxëna. Mëchocohapama tsi,

—Ja rësopino tsi noho shinari ma xo ra, mato shina nori —i nohiria qui Pilato niquë.

25 Jatsi quiha nohiria tëquëtá quëbiniquë:

—Noqui, noba xocobo, tihi cabo copihacano ra, ja rësohai quëshpi na —iquiina.

26 Jatsi quiha jato qui Barrabás Pilató paquëmaniquë. Jaquirëquë Jesu ja rashaniquë rispichí no. Rashaxo tsi quiha soldado bo qui ja mëaniquë cruzó tsi ja tooxacano.

27 Jatsi soldado bá Jesu biniquë. Bixo tsi quiha Pilato xobo-xoboria qui ja jicomacaniquë. Jatsi Jesu qui quëtsotsi soldado bo tëquë niquë. 28 Quëtsoso tsi jahuë sahuëti ja tsobocaniquë. Tsoboxo tsi quiha sahuëti shini, naa chama sahuëti ja sahuëmacaniquë. 29 Jatsi chaha ja quëcocaniquë moxa ya. Jahuë mapo ó tsi moxachaha janaxo tsi quiha jahuë mënëcaya ca mëquë ó tsi bastón ja janacaniquë. Rey chama-chamaria jisiria ja ini quiha. Jatsi ja bësojó ja mënicanaca tsi ja mahucaniquë.

—¡Viva, viva, jodioba chama-chamariá! —iquiina.

³⁰ Jatsi ja qui ja coshocaniquë. Jahuë mëquë ca bastón bichi tsi ja matoohacanicuë pë. ³¹ Mahuaxo tsi quiha jahuë sahuëti shini ja tsoboniquë. Jahuë sahuëti yoi sahuëmaxo tsi quiha tori Jesu ja bocanicuë cruzó tsi tooxaxëna.

Cruzó tsi Jesu tooxahacanina

Marcos 15.21-32; Lucas 23.26-43; Juan 19.17-27

³² Riquipama tsi mai huëtsa ca joni ja bëchacanicuë, naa Cirene ax jonish cato. Simón jahuë janë ini quiha. Ja qui tsamixo tsi quiha Jesu cruz ja qui ja janacanicuë ja iano.

³³ Toca tsi Gólgota, naa Mapo Xao Ya qui ja cahëcaniquë. ³⁴ Toa xo tsi vino, naa tiahui ya roihacanish ca jënë Jesu qui ja amaniquë ati. Jama, ja xëhayamaniquë tanaxo na. Moca quiha.

³⁵ Jatsi cruzó tsi Jesu ja tooxacanicuë. Tooxaxo tsi quiha jahuë sahuëti bo ja oquëxnamacanicuë i-ihai cató no. ³⁶ Jaquirëquë ja tsahocanicuë toa xo tsi jaha bësoxëna. ³⁷ Jatsi jahuë mapo maxcacha chani ja janacanicuë, naa ja qui ja quësocanina, “Jesu tsi xo naa, jodioba chama-chamaria” iquiina. ³⁸ Jasca, ja bëta dos ca yomaxëni ca joni bo ja tooxacanicuë, huësti jahuë mënëcayá no, huësti jahuë mëxojó no.

³⁹ Jasca,

—Jë, jë —i tarabicanish cabo niquë bëquëhi na.

Jesu ja mahuacanicuë jato ri:

⁴⁰ —Mimë xabahamaquë arati xobo potascatsai cató. ¿Tres barí tsi toa xobo nimati mëtsa ni mia pa? Dios Baquë pi iqui tsi cruz ax botëhuë ra —nëa tsi nohiria bo nëcaniquë.

⁴¹ Jascaria tsi mahuacanicuë arati ibo bo, yoba tiisimacanaibo, jodioba yosibo, tihí cabo ri:

—Huëtsa bo ja xabahamaquë; jama, jamë xabahamati mëtsa ja nomari —i jaca niquë—. ⁴² ¿Noba Israel rey, naa noba chama-chamaria ni naa joni pa? Jaboqui cruz ax ja botëno ra. Tocapino tsi chahahuaxëqui noa ra. ⁴³ ¿Dios qui chitimihí ni naa joni pa? Díos jahuë Baquë mëbino ra noipiquí na. “Dios Baquë xo ëa” ¿i ja yamayamani? —nëa tsi jodioba chama bo nëcaniquë.

⁴⁴ Jasca, ja bëta tooxahacanish ca yomaxëni cabá Jesu mahuanicuë jato ri.

Jesu nanina

Marcos 15.33-41; Lucas 23.44-49; Juan 19.28-30

⁴⁵ Matoroco barí tsi quiha tsëmonanicuë toa mai. Naama tsi quiha ja tsëmonina. Tres hora bo quiha. ⁴⁶ Jatsi a las tres tsi quiha joi pistiamá tsi Jesú quënaniquë:

—Elí. Elí. ¿Lama sabactani? naa “¿Jënixo tsi ëa mi jisbëriaha rë, noho Díos, noho Díos?” —i ja niquë.

⁴⁷ Tocajaquë tsi quiha,

—Eliás, naa Dios Chani yoanish ca quënahi quiha tonia —i jaca niquë, naa toá ca niicanaibo.

⁴⁸ Nicahax tsi quiha huësti ca joni jabaniquë tatë bixëna. Bixo tsi quiha vinagre jënë nopí ca qui ja moosanicuë. Moosaxo tsi tahua rëbiquirihaxo tsi Jesu ja amaniquë. ⁴⁹ Jama,

—Huënyamaxëhuë. Eliás jomitsa mëbixëna. No tsayaparino —i ja qui tēxë bo niquë.

⁵⁰ Jatsi Jesú quënatëquënicuë. Quënahax ja nanicuë. ⁵¹ Ja naquë tsi quiha arati xobó ca rotamë ca quëbëti raiti jaxcahacanicuë. Mana ax napata quiri ja jaxcahacani quiha. Jasca, yajoniquë mai. Mapëxënicuë macaná ca maxax

bo. ⁵² Japëquëniquë rësonish caba maiquini bo ra. Toá ca Dios qui chitiminish ca rësonish ca huëstima cabo bësomahacani quiha. ⁵³ Jatsi, jato maiquini ax ja tsëquëcaniquë. Jatsi Jesu bësotëquëquë tsi quiha Jerusalén qui ja jicocaniquë jato ri. Toa xo tsi huëstima ca nohiriá jato jisniquë.

⁵⁴ Jabi mai yajoquë tsi quiha soldado bá capitán, Jesu obëso cabo, tihi cabo raquëniquë ocapijani ca jisi na. Jisi tsi,

—Jabija xo ra. Dios Baquë yoi ja iquë ra —i jaca niquë raquëhi na.

⁵⁵ Jasca, basima xo tsi huëstima ca yoxa bá tsayahi iniquë. Galilea ax Jesu ja banahuacani quiha mëbixëna. ⁵⁶ Toa mani ini quiha María Magdalena, Jacobo José jahëhua María, Juan Jacobo jahëhua, naa Zebedeo baquë bo.

Jesu maihuahacanina

Marcos 15.42-47; Lucas 23.50-56; Juan 19.38-42

⁵⁷ Bari caquë tsi quiha Arimatea yacata ax rico ca joni joniquë, naa José icanai cato. Jesu banahanish ca ja ini quiha jaa ri. ⁵⁸ Cahëhax Pilato jisi ja caniquë. Caxo tsi quiha Jesu yora ja bënaniquë maihuati. Jatsi chani Pilató raaniquë, José qui Jesu yora ja acano. ⁵⁹ Jahuë yora bichi tsi quiha sabana paxa cató tsi ja yaboniquë. ⁶⁰ Jaquirëquë jahuë maiquini qui jahuë yora ja nanëniquë. Huëyohaca ca quini paxa ca ja ini quiha. Nanëxo tsi quiha maxax chahitaxëni caiti qui ja taraniquë. Taraxo tsi quiha ja jibyaniquë. ⁶¹ Jabi toá tsi maiquini bësójó María Magdalena, María huëtza, tihi cabo tsaho ini quiha.

Maiquini bësójó ca ó bësohai ca soldado bo

⁶² Huëaquë tsi, naa jodioba joiti bari tsi quiha arati ibo bo, fariseobo, tihi cabo Pilato jisi bocaniquë. Bohax,

⁶³ —Quiaxëni toa joni iquë ra bësohi na, taitá —i Pilato qui jaca niquë—. “Tres bari tsi bësotëquëxëquia” i ja ni quiha ra. ⁶⁴ Japi soldado bo jahuë maiquini qui mi raano jaha ja bësocano. Huinocaxëti quiha tres bari. Mi tocapiyamano tsi jahuë yora yomahi jahuë rabëti bo jomitsa ra. Yomahax “Ja bësotëquëquë ra” icaxëcani quiha pë. Jatsi Jesu quiahai ca oquëxëhi quiha ja quiacanaina ra —nëa tsi Pilato qui ja nëcacaniquë pë, naa jodioba chama bo.

⁶⁵ Jatsi,

—Soldado bo bihuë. Jia tsi jahuë maiquini ó bësocana —i jato qui Pilato niquë.

⁶⁶ Jatsi ja bocaniquë. Maiquini ca maxax ja rohahuacanicuë, bahama ja tarahacayamano iquish na. Jaquirëquë soldado bo ja nimacanicuë jaha ja bësocano.

28

Jesu bësotëquëniina

Marcos 16.1-8; Lucas 24.1-12; Juan 20.1-10

¹ Jodioba joiti bari huinocaquë tsi quiha baquishmari tsi, naa domingó tsi María Magdalena, María huëtza, tihi cabo bocaniquë Jesu mai jisi na. ² Jatsi mai yajo-yajoniquë, nai ax ángel botëni quëshpi na. Botëxo tsi quiha bahama maxax ja taraniquë. Tori tarahax maxax cacha ja tsahoniquë. ³ Canapa bajra-bajrahai jascaria tsi quiha jahuë jaria ini quiha. Joxoria quiha jahuë sahuëti ini quiha, naa nieve jascaria. ⁴ Jatsi raquë-raquëniquë jaha bësohai ca soldado bo jisish na. Ja rëso-tapicaniquë raquëhi na. ⁵ Jatsi quiha yoxa bo qui ángel chaniniquë:

—Raquëyamacana. Jesu, naa tooxahacahitahax ca ma mërähai ca cahëquia.
⁶ Yama xo ra. Ja bësotëquëquë ra, ja yoani jascaria. Nëri bëcahuë. Ja janahacahitaha ca ma tsayano. ⁷ Mëri, jaboqui jahuë rabëti bo yoata. “Ja bësotëquëquë” i jato qui cana. “Mato bëbo Galilea qui cahi quiha. Toa xo tsi Jesu jisxëqui mato” i jato qui cana. Jabi mato ë yoaha ca ma shina-bënoyamano —i yoxa bo qui ángel niquë.

⁸ Jatsi maiquini jisbaya tsi quiha rani tsi jahari yoxa bo jabaniquë jato rabëti bo yoaxëna. Jasca ja raquëceni quiha. ⁹ Jisbayajahuacano tsi quiha jato bësojò Jesu jisiquitapiniquë. Jisiquixo tsi jato ja joihuaniquë. Jatsi quiha ja bësojò tsi ja mënicaniquë jahuë tahë acha. Ja qui aratsijacaniquë.

¹⁰ Jatsi quiha,

—Raquëyamacana. Ebë xatë bo qui ma chanino. “Galilea qui bocata. Toa xo tsi ëa jisxaxëceni quiha” icana —nëa tsi yoxa bo qui ja nëcaniquë.

Soldado bá yoanina

¹¹ Jabi jahari yoxa bo bohono tsi quiha maiquini ó bësohai ca soldado bo yaca qui cahëniquë jato ri. Ocapijani ca aratí ibo bo qui ja yoacaniquë.

¹² Nicachax arati ibo bo bocaniquë nohiria yosibo yoaxëna. Jënahuati ja cahëyamacani quiha. ¹³ Japi soldado bo qui ja chanicaniquë jato quiamaxëna.

—“Yomahacashinaquë jahuë yora” i nohiria bo qui cana. “Baquichá no oxano tsi jahuë yora jahuë rabëti bá yomashinaquë pë” icana. ¹⁴ Jatsi Pilató pi ma yoahai ca jahuëcara nicano tsi “Jabija” i ja qui xëqui noa. Ma raquëyamano —i soldado bo qui jodioba chama bo niquë.

¹⁵ Jatsi quiha soldado bo qui parata chama bá aniquë quiamaxëna. Jatsi soldado bo jisbayaniquë, ja yoahacacani ca yoaxëna. Jabi jodiobo xëréquë tsi quiha toa quiahai ca chani pacananiquë pë. Toatiyá rohari no tsi jari chahahuahacahi quiha toa chani pë.

Jahuë rabëti bo Jesú raanina

Marcos 16.14-18; Lucas 24.36-49; Juan 20.19-23

¹⁶ Jaquirëquë Jesu once ca rabëti bo bocaniquë Galileá ca maca qui, naa Jesú yoaha ca qui. ¹⁷ Jesu jisi tsi ja bësojò tsi quiha ja mënicaniquë; jama, Jesu ja iqui ca huësti huësti cabá chahahuayamaniquë. ¹⁸ Basimahax tsi quiha jato qui Jesu chaniniquë:

—Naipá cabo, maí cabo, tihi cabo yonati chama tëquë ë qui acacaniquë.

¹⁹ Jatsi nohiria bo tëquë qui bocata. Ea banahuacanailbo jato amacana. Jahëpa, jahuë Baquë, Espíritu Santo, tihi cabá janë tsi jato ashimacana.

²⁰ Jasca, mato ë yoani ca jahuë bo tëquë jato tiisimacana. Mato bëtapaoxëquia ra, xaba rëto qui. Toa ma shina-bënoyamano —nëa tsi jahuë rabëti bo qui ja nëcaniquë.

EL Santo Evangelio Según San Marcos

*Xaba xo tsi ashimati ibo Juán Dios Chani yoanina
Mateo 3.1-12; Lucas 3.1-9, 15-17; Juan 1.19-28*

¹ Jesucristo Chani jia ca tsi xo naa, naa Diós raani ca Baquë yoati na. ²Jariapari tsi quiha jahuë Baquë yoati tsi Dios chaniniquë; naa Isaías yamabá quënëni cató no.

“Mia bëbo noho Chani bëhai ca raapariquia,
mi quinia rohahuati’ i jahuë Baquë qui Dios ni quiha.

³ Jasca xabachá racaxëhi quiha mia bëbo cahai cato.
Toa xo tsi quënaçëhi quiha.

Quënahax, ‘Mamë rohahuacana,

Ibo johai quëshpi na’ ixëhi quiha nohiria bo qui.

‘Mato jabi mëstëhuacana, naa bahi mëstëhuahai jascaria’ ixëhi quiha”
nëa tsi Dios nëceni quiha Isaías yamabá quënëni cató no.

⁴ Jabi naa Chani bëhai ca ashimati ibo Juan ini quiha. Xabachá tsi quiha ja jisiquiniquë, Dios Chani yoahi na. Jatsi,

—Mato jocha quima Dios quiri bësocana. Bësoxo ma ashimahacati xo. Jatsi masahacaxëhi quiha mato jocha ra —i nohiria bo qui Juan niquë. ⁵ Jatsi quiha jodioba maí cabo, Jerusalén cabo, tihí ca nohiria bocaniquë, Juan chani nicacascani na. Nicaxo tsi quiha jato jocha ja bërohuacaniquë. Jatsi quiha Juan yamabá jato ashimaniquë ani Jordán xo na.

⁶ Jabi camello rani tsi Juan sahuëti acacani quiha. Bichi cinturón ja chinëxëni quiha. Chapo bo, nihí ca bata, tihí cabo ja pini quiha. ⁷ Jabi Juán yoani ca chani tsi xo naa:

—E cho joxëhi quiha ëa oquëria cato. Jahuë yonati iti mëtsama xo ëa ra, ëa oquëria ca ja nori iqui na. ⁸ Jënë tsi mato ashimaquia; jama, Espiritu Santó tsi mato ashimaxëhi quiha naa johai cato —i Juan niquë.

Jesu ashimahacanina — Jochati ja tanamahacanina

Mateo 3.13; 4.11; Lucas 3.21-22; 4.1-13

⁹ Jaquirëquë toatiyá tsi Nazaret, naa Galileá ca yaca ax Jesu joniquë. Ja joquë tsi quiha ani Jordán xo tsi Juán Jesu ashimaniquë. ¹⁰ Jatsi quiha jënë ax tsëquëpama tsi nai japëquëhai Jesú jisniquë. Jatsi ja qui Espiritu Santo botëniquë; boto botëhai jisiria iquiina. ¹¹ Jatsi quiha naipá ca joi chaniniquë:
—Noho Baquë yoi xo mia. Mí qui raniquia —iquiina.

¹² Jaquirëquë xaba qui Espiritu Santó Jesu raatapiniquë. ¹³ Cuarenta bari no tsi ja ini quiha xabachá no. Toá ja no tsi quiha Satanás tanamaniquë jochamaxëna. Jasca, toá tsi yohina bo ini quiha jato ri; jama, ángel bo bëcaniquë Jesu mëbixëna.

Cuatro ca joni bo Jesú quënanina

Mateo 4.12-22; Lucas 4.14-15; 5.1-11

¹⁴ Jabi preso qui Juan nanëhacaquë tsi quiha Galilea mai qui Jesu caniquë. Caxo tsi quiha Dios Chani jia ca ja yoaniquë. ¹⁵ Yoahax,

—Tsëquëquë xaba-xabatiya ra. Basima tsi xo Diós otohaina ra. Mato jocha quima casocana. Casoxo Dios Chani jia ca chahahuacana —i ja niquë.

16 Ia Galilea quënipama tsi quiha rabë ca joni Jesú jisniquë, naa Simón, jahuë noma Andrés. Sani bicanaibo ja icani quiha. Jabi jato nishi bo niahi ja icani quiha Jesu cahëquë no. Jatsi,

17 —E bëta bëcana. Joni bo biti mato tiisimaxëquia —i jato qui Jesu niquë.

18 Jatsi quiha jato nishi bo ja janatapicaniquë Jesu banahuaxëna.

19 Ori pistia caxo tsi quiha rabë ca joni huëtza bo ja jisniquë, naa Zebedeo baquë Jacobo, Jacobo noma Juan. Jato notí tsaho ja icani quiha, jato nishi bo shomahuacainaina. 20 Jato tsayapama tsi Jesú jato quënaniquë. Jatsi quiha jato jahëpa Zebedeo, jahuë yonati bo, tihí cabo ja jisbëriatapicaniquë. Jisbëria tsi quiha Jesu ja banahuacanicuë.

*Yoshi jaya ca joni
Lucas 4.31-37*

21 Jatsi Capernaum yaca qui ja cahëcaniquë, naa Jesu, jahuë rabëti bo ya. Jodioba joiti barí tsi quiha jato catiti xobo qui Jesu jiconiquë. Jicoxo tsi quiha tiisimatsijahuaniquë. 22 Jabi ja tiisimani ca quinia qui nohiria bo ratënicuë. Jato yoba tiisimati maestro bo quirima ja ini quiha, chama ya jato ja tiisimani nori quëshpi na.

23 Jatsi quiha yoshi jayanish ca joni jiconiquë catiti xobo qui. Pistiama ca jói tsi ja quënaniquë:

24 —Noqui yosiyamahuë, Nazarét ca Jesú. Tonia noqui quëyohi mi joquë pë. Mia cahëquia. Mia ri tsi xo toa Dios Baquë jiaxëni cato ra —i ja qui yoshi niquë.

25 Jatsi Jesú yoshi raahanicuë:

—Pasihuë. Joni quima ax natsëquëhuë —iquiina.

26 Jatsi pë yoshiní joni rasëbimanicuë. Rasëbimahax ja sai-sainiquë, natsëquëhi na. 27 Jatsi quiha ratëyoniquë nohiria tsayahax na. Chaninatsi-jacanicuë:

—¿Jëniria ni sa? ¿Tiisimahai ca paxa ni naa sa? Jisí. Chama jaya xo naa joni ra. Jisí. Jahuë chani qui nicahi quiha yoshi bo ri pa —iquiina.

28 Jatsi Galilea maí tsi chani pacananiquë Jesú ani yoati na.

*Huëstima ca nohiria Jesú jënimahuanina
Mateo 8.14-15; Lucas 4.38-39*

29 Jquirëquë catiti xobo jisbaya tsi quiha Simón, Andrés, tihí caba xobo qui ja bocanicuë. Bocanicuë Jacobo, Juan, jato ri. 30 Jabi raca Simón raisi ini quiha. Ja iquini quiha. Xobo qui Jesu cahëquë tsi,

—Iquihí quiha —i Jesu qui jaca niquë.

31 Jatsi jisí Jesu caniquë. Caxo tsi quiha jahuë mëquë ja biniquë joimaxëna. Jatsi janacatapinicuë jahuë iquini ra. Joixo oriquiti taatsijahuaniquë pa.

*Huëstima ca anomaria cabo Jesú jënimahuanina
Mateo 8.16-17; Lucas 4.40-41*

32 Bari chixabano tsi quiha iquicanaibo, anomaria cabo, yoshi jaya cabo, tihí cabo nohiria bá bënicuë Jesu qui. 33 Jasca, xobo bësojó tsi yacatá ca nohiria tëquë quëtsoniquë. 34 Jatsi huëstima ca anomaria cabo ja jënimahuaniquë. Yoshi bo ja natsëcaniquë. Natsëcapama tsi yoshi bo ja pasimanicuë, ja chaniyamacano iquish na. Dios Baquë ja iqui ca ja cahëcani quiha.

*Galilea mai xo tsi Dios Chani Jesú yoanina
Lucas 4.42-44*

³⁵ Huëaquë, jari mitsëmono tsi Jesu joiniquë. Xobo jisbaya tsi quiha nohiria yama ca iti qui ja caniquë jamë no. Toá tsi ja bëhoxni quiha. ³⁶ Jatsi Jesu yopaxo tsi Simón, jahuë rabëti bo, tihí cabá mërähi bocaniquë. ³⁷ Jisi tsi,

—Mia mëracani quiha nohiria tëquë ra —i ja qui jaca niquë.

³⁸ Jama,

—Nëá ca yaca huëtäsa bo qui no cati xo. Jato qui Dios Chani ë yoaxëti xo ra. Ja tsi xo toa ë raahacanicuë —i jato qui Jesu niquë.

³⁹ Jatsi Galilea mai tëquë xo tsi Dios Chani ja yoabonaniquë, jato catiti xobo xo na. Yoshi bo ja natsëcaniquë jaa ri.

Leproso ca joni Jesú jënimahuanina

Mateo 8.1-4; Lucas 5.12-16

⁴⁰ Jatsi lepra jaya ca joni Jesu qui joniquë jënimahuahacaxëna. Bonohuaxëni ca joni ja ini quiha. Mënihax,

—Mi aapicatsai tsi ëa jënimahuati mëtsa xo mia ra —i Jesu qui ja niquë.

⁴¹ Jatsi quiha Jesu cohuënaniquë tsayahax na. Noitiria ca joni ja ini quiha. Jatsi Jesú joni motsanicuë. Motsahax,

—Acasquia ra. Bahuëhacahuë —i ja qui Jesu niquë.

⁴² Jatsi tapotapinicuë jahuë bono bo. Jënima ja ini quiha.

⁴³ Jatsi jahuë xobo qui raanox pari tsi Jesú yobanicuë:

⁴⁴ —Quiniahuë. E aca ca yoayamahuë. Jama, jaboqui arati ibo qui caaparita, mia ja tsayano iquish na. Jatsi Moisés yobani ca ja qui ahüë tëpas-hacati, nohiria bo qui mi jënimahuahacaha jismaxëna —i ja qui Jesu niquë.

⁴⁵ Jama, cacuü tsi quiha Jesú ja bax aca ca ja yoabonaniquë pë. Jatsi quiha chani pacanatapinicuë Jesu yoati na. Jaha tsi pë bëro tsi yaca qui jiconoma Jesu ini quiha, naa tihiria ca quëtsohai ca nohiria iqui na. Jaha tsi quiha yaca basi, naa xobo yama cató tsi quiha ja chitënicuë.

2

Mohitimaxëni ca joni Jesú jënimahuanina

Mateo 9.1-8; Lucas 5.17-26

¹ Ichariama ca bari tsi quiha Jesu chitënicuë xobo yama cató no. Jaquirëquë Capernaum qui jahari ja joniquë jahuë xobo qui. Jatsi quiha jahari ja johai ca nohiria bá nicaniquë. ² Jaha tsi quiha jahuë xobo qui huëstima ca nohiria quëtsoniquë. Jahuë xobo ja rëamëcani quiha. Jasca, caiti cacha xëa yama ini quiha niiti. Jatsi quiha jato qui Jesú chaniniquë, Dios Chani yoahi na.

³ Yoajahuano tsi quiha nohiria maxo xobo qui cahënicuë, mohitimaxëni ca joni bëhaina. Cuatro ca joni bá bëni quiha. ⁴ Xobo qui cahëhax Jesu qui basimanoma ja icanicuë rë, naa huëstima ca nohiria iqui na. Jaha tsi quiha xobo mapasti tsëcatsijahuacanicuë. Quinihuaxo tsi quiha noitiria ca joni ja botëmecanicuë, jahuë oxatí no. ⁵ Jabi Jesu qui ja chitimiriacani quiha toa joni ja jënimahuano. Jabi ja chitimicanai ca jisí tsi mohitimaxëni ca joni qui Jesu chaniniquë:

—Masahacaquë mi jocha, noho baquë —iquiina.

⁶ Jabi toá tsi jodioba yoba tiisimacanaibo tsaho ini quiha. Jesú yoaha ca ja nicanicuë. Nicahax,

⁷ —¿Jënihax tsi toca tsi chanihi ni naa joni sa? Dios pasomaha chanihi quiha pë. Yama tsi xo jocha masati mëtsa cato ra; jaroha tsi xo Dios —i jamë jaca niquë.

⁸ Jabi ja shinacanai ca Jesú cahëtapinicuë. Japi jato qui ja chaniniquë.

—¿Jëneriahax toca tsi shinacanai rë, ëa yoati na? ⁹ ¿Jëni ca ni toa bëroria ca yoati, naa mohitimaxëni ca qui? “Masahacaquë mi jocha” ¿iti ni? “Niina.

Cohuë” žiti ni? ¹⁰ Jabi jocha masati chama Nohiria Baquë jaya ca ma cahëno ra. Tsayacahuë —i jato qui Jesu niquë.

Jatsi mohitimaxëni ca joni qui Jesu chaniniquë:

¹¹ —Joihuë. Mi oxati topihuë. Mi xobo qui cata —iquiina.

¹² Jatsi joitapiniquë joni ra. Joixo tsi quiha jahuë oxati ja topiniquë. Jatsi quiha xobo ja huajaniquë jato bësojã no. Jaha tsi quiha ja ratëyocaniquë tsayahax na. Tsayaxo tsi Dios ocahuatsijahuacaniquë:

—Anomaria tsi xo naa no tsayahana ra —iquiina.

Mateo Jesú quënanina

Mateo 9.9-13; Lucas 5.27-32

¹³ Jatsi Galilea qui jahari Jesu catëquëniquë. Caxo tsi quiha ja qui quëtsohai ca nohiria tiisimatijahuaniquë. ¹⁴ Ia quënipama tsi quiha gobierno bax nohiria quima parata biti ibo-iboria ca joni Jesú jisniquë, naa Alfeo baquë Mateo. Jahuë oficina xara tsaho ja ini quiha. Jatsi,

—Ea banahuahuë —i ja qui Jesu niquë.

Jatsi quiha Mateo joiniquë. Joixo tsi Jesu ja banahuaniquë. ¹⁵ Jaquirëquë Mateo xobo qui Jesu caniquë oriquixëna. Jabi impuesto biti ibo-iboria bo, jochahuaxëni cabo, tihì cabo qui joi Mateo amani quiha Jesu ya oriquiti. Jabi Jesu ja banahuacascani quiha jato ri. ¹⁶ Jatsi quiha yosananiquë jodioba chama bo, naa jodioba yoba tiisimacanaibo, jochahuaxëni cabo ya Jesu oriquihai tsayahax na. Jatsi jahuë rabëti bo qui ja chanicaniquë:

—Žjënixo tsi impuesto biti ibo bo, jochahuaxëni cabo, tihì cabo ya oriquihì ni Jesu pë? —iquiina.

¹⁷ Jatsi quiha Jesú jato quëbiniquë nicaxo na:

—Doctor qui cayamahi quiha jënima cabo. Jama, doctor ó quëëhai ca tsi xo naa anoma cabo. Jasca, shïnajiaxëni cabo quënahi ë joyamaniquë, jato jocha quima bësomati jochacanaibo quënati nori —nëa tsi jato qui Jesu nëcaniquë.

Samati jabi

Mateo 9.14-17; Lucas 5.33-39

¹⁸ Toatiyá tsi quiha ashimati ibo Juan banahuacanaibo, fariseobo banahuacanaibo, tihì cabo samahi iniquë. Japi huësti huësti ca nohiria Jesu qui bëcaniquë nicaxëna. Johax,

—Žjënihax tsi samahi ni Juan banahuacanaibo, fariseobo banahuacanaibo? Mi rabëti bo tsi xo toa समयamacanaina pa —i ja qui jaca niquë.

¹⁹ Jatsi Jesú quëbiniquë:

—ŽJoní ahui yano tsi samahi ni ahui bichish cato rabëti bo pa? Iyamacani quiha ra. Cohuëti xaba ma xo ra. Jabi ahui bichish ca jato bëtano tsi oriquicani quiha ra. ²⁰ Jama, tobixëhi quiha bari huëtta, naa ahui bichish ca mëbihacaxëhai ca bari. Toa barí tsi quiha samacaxëceni quiha jahuë rabëti bo cohuëhi na. (Jabi tocaxëhi quiha noho rabëti bo ri ë caquë no) —nëa tsi Jesu nëcaniquë.

Arati quinia siri jatihaina

Mateo 9.16-17; Lucas 5.36-39

²¹ Jatsi quiha Jesu chaniniquë nohiria bo qui jahuë arati quinia paxa ca yoati na.

—Quësi paxá tsi quiha raiti siri pishpayamahi quiha nohiria. Anoma quiha. Jabi quësi paxá tsi ja pishpapicano tsi përesixëhi quiha raiti siri. Përesixëhi quiha quësi paxa ri, jaha bëquiyamahai iqui na. (Jascaria, mato arati quinia siri jaha bëquiyamahi quiha noho tiisi paxa cato. Jamëri xo.)

²² Jasca, jënë bichi ca sota sirixëni qui jëësihai ca jënë paxa ca rëhuiyamahi

quiha nohiria. Rēhuijahuacano tsi poshixēhi quiha jēnē bichi ca sota ra. Jatsi japaquēxēhi quiha jēnē. Yoshihuahacaxēhi quiha sota ra. Jama, jēnē bichi ca sota paxa ca qui jēnēria paxa ca rēhuihacati xo. (Jascaria, anoma tsi xo toa arati quinia sirí tsi noho tiisi paxa ca tiisimahaina ra. Arati quinia huētsá tsi ja tiisimahacaxēti xo. Mato arati jabi sirí jaha bēquiyamahí quiha noho tiisi paxa cato) —nēa tsi nohiria bo qui Jesu nēcaniquē.

Joiti barí tsi Jesu rabēti bá trigo bimi risanina

Mateo 12.1-8; Lucas 6.1-5

²³ Joiti barí tsi quiha harina trigo huai bo nacohi Jesu iniquē jahuē rabēti bo ya. Bohopama tsi quiha jahuē rabēti bá trigo bimi risaniquē piti. ²⁴ Jatsi quiha ja qui jodioba chama bo chaniniquē tsayahax na.

—Tsayapa. Anoma ca acani quiha mī rabēti bo ra. Anoma tsi xo toa joiti barí tsi yonocohaina ra —i ja qui jaca niquē.

²⁵ Jatsi Jesú quēbiniquē:

—¿Quēnhacanish cabo ó tsi noba David yamabá ani ca ma tsayayamaya-mani, naa jahuē joni bo ya ja paxnaniquē no? ²⁶ Dios xobo qui ja jiconi quiha jahuē joni bo ya, arati ibo ba mapari bixēna. Jabi toatiyá tsi quiha arati ibo bo chama Abiatar i-ipaoni quiha. Jicoxo tsi quiha Dios qui aquēquēmani ca mapari David yamabá bini quiha, pixēna; naa pinoma ca mapari quiha. Jatsi quiha ja bēta inish ca joni bo qui toa roa ca mapari ja ani quiha piti —nēa tsi Jesu nēcaniquē jato qui.

²⁷ Jatsi,

—Joiti bari Diós ani quiha joni mēbixēna ra. Joni acacayamani quiha joiti bari bax na. ²⁸ Jatsi jēnima tsi xo toa noho rabēti bá acaina, joiti bari Ibo-iboria ca ē nori iqui na —i jato qui Jesu niquē.

3

Mēquē choni jaya cato

Mateo 12.9-14; Lucas 6.6-11

¹ Catiti xobo qui Jesu jicotēquēniquē. Toá tsi mēquē choni jayanish ca joni ini quiha. ² Jatsi quiha nohiria bá Jesu tsaya-tsayamisniquē ja qui quēsocasquí na. Joiti barí tsi joni ja jēnimahuaxēti ó ja pasocani quiha. ³ Jatsi mēquē choni jayanish ca joni qui Jesu chaniniquē:

—Niihuē. Nēri johuē —iquiina.

⁴ Jatsi nohiria bo Jesú nicaniquē:

—¿Yoi ni, jia ni joiti barí tsi jia ca acaina? ¿Naa joni mēbixēhi ni noa? ¿Mēbiyamaxēhi ni noa? ¿Xabahamaxēhi ni noa; quēyoxēhi ni noa? —i jato qui ja niquē.

Quēbiyamaniquē nohiria pē. Ja pasicaniquē. ⁵ Jatsi caxaxo tsi quiha Jesú jato bēisniquē. Cahētimaxēni ca nohiria ra. Jato shina yoi iqui tsi Jesu cohuēnaniquē. Jatsi noitiria ca joni qui Jesu chaniniquē:

—Mi mēquē yoi mētahuē —iquiina.

Jatsi quiha joni jahuē mēquē mētaniquē. Jēnimahuahacani quiha jahuē mēquēnē. ⁶ Jatsi bamaxoma tsi jodioba chama bá jisbayaniquē. Jisbaya tsi maxo huētsa ya, naa Herodes yonati bo ya ja caticaniquē chaninaxēna, Jesu acasani na.

Ia quēmapó ca nohiria misco bo

⁷ Jatsi ia qui Jesu caniquē jahuē rabēti bo ya. Ja caquē tsi quiha bahahuacaniquē Galileá ca nohiria misco ra. ⁸ Jisti bo Jesú acai ca nicahax bēcani quiha jodioba maí ca nohiria. Jasca, Jerusalén, Idumea, ani Jordán

rabëquëxë, Tiro, Sidón mai, tihi cabo ax ja bëcani quiha Jesu jixsëna. ⁹ Jatsi quiha quëtsohai ca nohiria iqui tsi jahuë rabëti bo ja yobaniquë ja bax noti rohahuati. Nohiria quima paxati quiha. ¹⁰ Jabi huëstima ca ja jënimahuaniquë toa barí no. Ja tsi xo toa ja qui nohiria quëtsoni quiha Jesu motsaxëna. ¹¹ Jasca, ja bësoj tsi yoshi jaya ca nohiria mëni-mëniniquë, Jesu tsayahax na. Mënihax yoshi bá quënaniquë:

—Dios Baquë xo mia ra —iquina.

¹² Jama, jato ja yobarianiquë tsohuë ja iqui ca yoayamati.

Doce ca rabëti bo Jesú binina

Mateo 10.1-4; Lucas 6.12-16

¹³ Nohiria bo jënimahuahax tsi tëmachi Jesu tëmahaniquë. Tëmahinaxo tsi quiha ja bicasni ca joni bo ja quënaniquë ja bëtati. Jatsi ja qui ja bëcaniquë.

¹⁴ Doce ca joni bo ja bini quiha ja bëtati, raahacati, Dios Chani yoati. ¹⁵ Jasca, chama jato qui ja aniquë yoshi bo tsëcati. ¹⁶ Jabi doce ca ja bini ca tsi xo naa: Simón, naa Pedro ja janëni cato,

¹⁷ Jacobo, naa Zebedeo baquë,

Jacobo noma Juan, (Boanerges ja quënahacacani quiha, “Tërëhai cato baquë bo” iquina.)

¹⁸ Andrés,

Felipe,

Bartolomé,

Mateo,

Tomás,

Alfeo baquë Jacobo,

Tadeo,

gobierno pasomaha ca Simón,

¹⁹ Judas Iscariote, naa jodioba chama bo qui Jesu mëanish cato.

Tihi cabo Jesú biniquë ja bëtati.

Yoshi bëboti chama Jesú jayahaina

Mateo 12.22-32; Lucas 11.14-23; 12.10

Jaquirëquë xobo qui Jesu jiconiquë jahuë rabëti bo ya. ²⁰ Ja qui nohiria miscó quëtsohtëquënicuë pa. Jabi nohiria iqui tsi pinoma quiha ja icanicuë rë.

²¹ Jatsi quiha Jesú nohiria jënimahuahai ca jahuë noma bo, jahuë jahëhua, tihi cabá nicaniquë. Nicaxo tsi quiha Jesu bichi ja bocanicuë, yoyo jayahai ca quëscajahuahi na.

²² Jasca, jahuë xobo qui cahënicuë Jerusalén ca maestro bo, naa Dios yoba cahëxëni cabo. Cahëhax tsi quiha ja nëcacanicuë:

—Jahuë ibo tsi xo Satanás ra. Yoshi bo ibo-iboria tsi xo toa Jesu mëbihai cato. Ja tsi xo toa yoshi tsëcati chama jaya xo ra —i jaca niquë pë, ja yoati na.

²³ Jatsi nohiria Jesú quënaniquë chani bo jato qui yoaxëna. Ja nëcani quiha:

—¿Jënahuarixo raca Satanás Satanás natsëcana? ²⁴ Jabi iquinapihi tsi quëyohacaxëhi quiha país ca nohiria ra. Chama yama xo toca ca gobierno ra. ²⁵ Jasca, quëyohacaxëhi quiha xobó ca nohiria ra, ja iquinacaquë no. Yonocobëquitimaxëni ca xo rë. ²⁶ Japi jamë pasomaha iquinapihi tsi quëyohacaxëhi quiha Satanás chama. Tocapijano tsi basima xo jahuë rëso ra. Jabi tocyamahí quiha Satanás ra.

²⁷ ¿Jënahuariahax raca joni chamaxëni cato xobo qui joni jiconi, jahuë jahuë bo yomaxëna? ¿Jariapari tsi quiha chamaxëni ca joni nëxayamayamaxëhi ni? Nëxaxo tsi jahuë jahuë bo yomahi quiha.

²⁸ ‘Mato parayamaquia. Nohiria jocha tēquē masaxēhi quiha Dios ra. Masahacaxēhi quiha ēa pasomaha ca chani ri. ²⁹ Jama, Espiritu Santo pi nohiriá ocahuano tsi jahuē jocha shina-bēnoyamaxēhi quiha Dios. Quēsohacapaoxēhi quiha toa nohiria ra —i Jesu niquē nohiria bo qui chanihi na.

³⁰ Jabi toca tsi quiha Jesu chaniniquē:
—Yoshi jaya —i jaca ni quēshpi na.

Jesu jahēhua, jahuē noma bo
Mateo 12.46-50; Lucas 8.19-21

³¹ Jatsi xobo qui jahuē jahēhua, jahuē noma bo, tihī cabo bēcaniquē. Xobo cacha nūi ja icani quiha. Jatsi chani ja qui ja raacanicuē, cacha ja jono iquish na.

³² Jatsi,
—Cacha tsi xo mi ihua, mi noma bo. Mia mēracani quiha —i Jesu tēamē ca nohiria niquē.

³³ Jatsi Jesú jato nicaniquē:
—¿Tsohuē ni toa noho jahēhua yoi ra? ¿Tsohuē ni toa ebē xatē yoi bo? —iquiina.

³⁴ Jatsi ja tēamē ca tsaho ca nohiria qui tsayahax,
—Nēá xo noho jahēhua yoi. Nēá xo ebē xatē yoi bo. ³⁵ Ebē xatē, noho yoxa cato, noho jahēhua tihī ca tsi xo toa Dios shina acai cato iquia —iquiina.

4

Bēro sayanish cato
Mateo 13.1-9; Lucas 8.4-8

¹ Ia Galilea quēmapo xo tsi quiha nohiria bo tiisimati Jesú chitahēhuaniquē. Anomaria nohiria iniquē ra, naa ja qui quētsocanaibo. Nohiria misco quiha. Ja tsi xo toa ianē ca notī qui Jesu jiconiquē nohiria quima paxaxēna. Jichohax tsi quiha ja tsahoniquē. Quēmapó tsi quiha nohiria tēquē mani ini quiha. ² Jatsi quiha huēstima ca jahuē bo jato ja yoanicuē chanicuī na. Bēroria ca jahūē chani ini quiha. Ja nēcaniquē:

³ —Bēro sayahi quiha huēsti ca joni caniquē. ⁴ Jahuē huai sayajahuano tsi quiha huēsti huēsti ca bēro bahi tapai xapaquēnicuē. Toá ca bēro isa bá piniquē joxo na. ⁵ Jasca, bēro huētsa quiha maxax mai qui xapaquēnicuē, naa iriama ca mai cató no. Toá tsi quiha bēro shinahatapiniquē, oti yama pi mai ini iqui na. ⁶ Bari tsēquēquē tsi quiha ja mēshahacanicuē. Tapo mishni quiha. Ja iqui tsi ja chonicanicuē rē. ⁷ Jatsi huēsti huēsti ca bēro masa xērēquē tsi xapaquēnicuē rē. Bēro ya tsi shinahabēquiniquē masara pē. Banaha ca ja mapani quiha. ⁸ Jama, bēro huētsa mai jiaxēni ca qui xapaquēnicuē. Jochohax jia tsi quiha ja shinahaniquē. Huēstima ca bimi ja saihuacanicuē. Cien ca bēro huēsti ca maxó saihuani quiha. Maxo huētsa tsi quiha setenta. Maxo huētsa ri treinta —nēa tsi quiha Jesu nēcaniquē.

⁹ Jatsi,
—Ea nicaxēti xo jatiroha cabo ra —i Jesu niquē nohiria bo qui.

Jonē ca chani yoati na
Mateo 13.10-17; Lucas 8.9-10

¹⁰ Jamē pistia ja no tsi quiha jahuē rabēti bo, toá ca banahuacanaibo huētsa bo, tihī cabá nicaniquē ja yoaha ca chani yoati na. Jato qui bēronoma ini quiha ja yoahana. ¹¹ Jatsi jato ja quēbiniquē:

—Mato qui tiisi acacaniquë, Diós otohái ca yoati tsi jonë ca jahuë bo cahëti. Jama, naa jonë ca jahuë bo cahëyamahi quíha éa pasomaha cabo. Nëca ca chani tsi, naa ejemplo bá tsi nohiria qui chaniquia, nicaxo ja cahëyamacano iquish na. ¹² Dios quiri ja bësoyamacano, jato jocha masahacayamano iquish na.

Bëro sayanish ca ejemplo Jesú bërohuana
Mateo 13.18-23; Lucas 8.11-15

¹³ Jatsi Jesú jato nicaniquë:

—¿E yoaha ca chani ma cahëyamaha pa? Cahëyapiquí tsi çjënahuariaxo raca ë yoaxëhai ca ejemplo huëtisa bo ma cahëna? ¹⁴ Bëro sayahai ca tsi xo toa Dios Chani yoahai cato. ¹⁵ Huësti huësti ca nohiria tsi xo toa bahi tapái ca bëro jascaria. Dios Chani nicacani quíha. Ja nicacano tsi johi quíha Satanás, jato shina ó ca sayaha ca chani tsëcaxëna. ¹⁶ Nohiria huëtisa tsi xo toa maxax mai qui sayaha ca bëro jascaria. Ranixo tsi Dios Chani biriacani quíha nicaxo na. ¹⁷ Jama, jato shina ó tsi tapoyamahi quíha Dios Chani rë. Naamayamahi quíha ja chahahuacanaina rë. Dios Chani iqui tsi nohiria bá jato yosino tsi ja tënëmapihacacano tsi Dios quinia quima casotapicani quíha. ¹⁸ Jatsi nohiria huëtisa tsi xo toa masa xërëquë sayaha ca bëro jascaria. Dios Chani nicacani quíha jato ri; ¹⁹ jama, Dios quima jato ninihi quíha maí ca jahuë bo, naa jaha ja quëëcanaina. Maí ca jahuë bo shinacani quíha pë. Jatsi Dios Chani, naa sayaha ca bëro tsihaquí quíha parata ó ja quëëcanaina ra. Tsiihaquí quíha toa jato ranihuahai ca jahuë bo rë. Ja quëshpi tsi jato shina ó tsi anitimaxëni tsi xo Dios Chani ra. ²⁰ Jama, tobi quíha Dios Chani bicanaibo, nicaxo na. Mai jiaxëni cato ó ca sayaha ca bëro jascaria ca xo. Dios bax saihuacani quíha. Huësti ca maxo tsi xo cien ca saihuahaina. Maxo huëtisa tsi xo setenta ca saihuahaina. Maxo huëtisa tsi xo treinta ra —nëa tsi Jesu nëcaniquë, jahuë chani bërohuahi na.

Lamparina ejemplo
Lucas 8.16-18

²¹ Jatsi quíha jahuë chani Jesú rëtsaniquë:

—¿Paiti nama, oxati nama, tihí cabo nama jahuë lamparina janahi ni ibo pa, tsamaxo na? Tocayamahi quíha ibo ra. Jahuë ití tsi janahi quíha. ²² Jabi bërohuahacaxëhi quíha jaboquí jonë ca tëquë. ²³ Ea nicati xo jatiroha cabo ra —i Jesu niquë.

²⁴ Jaquirëquë ja nëcaniquë:

—Nicaquí tsi chahahuacana. Jia pi ma nicano tsi Dios Chani pi ma jabino tsi mato tiisi anihuaxëhi quíha Dios. ²⁵ Oquë ca tiisi bixëhi quíha tiisi jaya cabo; jama, jahuë tiisi pistia roha bënnoxëhi quíha nicasyamacanaibo ra —i Jesu niquë.

Shinahacai ca bëro ejemplo

²⁶ Jaquirëquë Jesu nëcaniquë:

—Chani mato qui yoaquia Diós otohái ca mato cahëmaxëna. Tobi quíha huai ibo. Jahuë bëro sayahi cahí quíha. ²⁷ Sayaxo jibbayahi quíha. Jatsi huinocahi quíha bari bo. Ibo yamano tsi jocohi quíha toa ja sayahana. Jia tsi shinahai quíha; jamë no. ²⁸ Jabi mai tsi xo toa bëro jocomahaina. Jariapari tsi xo jahuë joco. Jaquirëquë jahuë pëhi. Jarohari tsi xo jahuë bimi shini cato. ²⁹ Jahuë bëro shiniquë tsi tésaqui ibo ra. Tsëquëquë tésatiya —i Jesu niquë tiisimahi na.

*Mostaza bëro ejemplo**Mateo 13.31-32; Lucas 13.18-19*³⁰ Jaquirëquë chani huëtsa Jesú yoaniquë:

—¿Jënahuariaxo Diós otohái ca mato cahëmaxëhi ni ëa sa? ¿Jëni ca ejemplo yoaxëhi ni ëa sa, mato cahëmati? ³¹ Jabi mostaza bëro chani mato yoaxëquia ra. Toca xo Diós otohaina ra. Jabi mishni-mishniria tsi xo toa banaha ca mostaza bëro. ³² Jama, shinahacax pistiama quiha. Tëtëcaria tsi xo jahué mëshi bo. Planta huëtsa bo oquë quiha. Jasca, mëshi naxërëquë xo tsi jato naha acani quiha isa bo, tëbaquishí racaxëna —i jato qui Jesu niquë, tiisimahi na.

*Ejemplo bá tsi Jesu chaninina**Mateo 13.34-35*

³³ Nëca tsi quiha huëstima ca ejemplo bo Jesú yoaniquë, Dios Chani nohiria bo tiisimaquí na. Cahëti mëtsa pi ja icano tsi ja tocani quiha. ³⁴ Jabi ejemplo bo ja yoarohaniquë tiisimaquí na. Jahué jabi quiha. Jama, jahué rabëti bo roha yaquí tsi quiha jahué chani bo ja bërohuapaoniquë.

*Yoshini, choca, tihí cabo Jesú janacamanina**Mateo 8.23-27; Lucas 8.22-25*³⁵ Yata, bari caquë tsi quiha jahué rabëti bo Jesú yobaniquë:

—¿Ia rabëquëx ca qui canomani? —iquiina.

³⁶ Jatsi Jesu tsaho ca noti qui jahué rabëti bo jiconiquë. Jicoxo tsi quiha nohiria bo ja jisbayacaniquë. Jisbaya tsi quiha ia ja shitacanicuë. Jatsi jato noti ya noti huëtsa bo shitaniquë jato ri. ³⁷ Jatsi iané tsi cosporiatsi yoshi niquë rë. Rëamëtsi quiha jato noti niquë choca iqui na. Jëtëquëpaimaria ja icani quiha. ³⁸ Jama, noti chipojó Jesu iniquë. Oxa quiha. Tëpasamëti raca. Jatsi jahué rabëti bá Jesu bësomaniquë.

—Noqui shinahuë, Maestró. Rësopaima xo noa rë —i ja qui jaca niquë.

³⁹ Jatsi Jesu niiniquë. Niixo tsi quiha yoshi, choca, tihí cabo ja raahaniquë: —Pasihuë. Janacahuë ra —iquiina.

Jatsi yoshi xotohai ca janacanicuë. Pasi roha ja ini quiha ra. ⁴⁰ Jatsi jahué rabëti bo qui Jesu chaniniquë:

—¿Jëniriahax raquëcanai ra? ¿Jëniriahax ë qui ma chitimiyamaha? —iquiina.

⁴¹ Raquëhax,

—¿Tsohuë cara ni naa sa? Ja qui nicahi quiha yoshini, choca, tihí cabo ra —i jaca niquë.

5*Yoshi jayanish ca jënimahuahacanina**Mateo 8.28-34; Lucas 8.26-39*

¹ Ia Galilea shitahax tsi quiha Gadara mai qui ja rërëcaniquë. ² Rërëhax noti ax Jesu botënicuë. Jatsi maihuati quini bo, naa cementerio icanai ca ax joni joniquë, ³ naa yoshi jaya cato. Toá tsi quiha ja racanicuë, rësonish caba maí no. Anomaria jahué yoyo ini quiha. Nëxanoma quiha. Jasca, mëchichó nëxanoma ja ini quiha. ⁴ Jasca, huëstima tsi jahué mëquënë, jahué tahë, tihí cabo nëxahacanicuë; mahitsa. Mëchichó toa joni ja nëxacaquë tsi quiha mëri tsi ja tésanicuë. Jasca, jahué tahë ahati manë bo ja choshapaoniquë. ⁵ Jasca, barihani, baquicha, rësonish caba maí tsi quiha ja cocohi iniquë. Maca bo nacopama tsi ja sai-saini quiha. Quënoxëni ca maxa bá tsi quiha jamë ja quëësani quiha. ⁶ Jabi basi xo tsi Jesu jisi tsi quiha ja qui ja jabaniquë. Jabahax ja bësojó tsi quiha ja mëniniquë. ⁷ Jatsi joi pistiamá tsi quiha ja quënaniquë:

—Ea huēnahuayamahuē Jesú, mana ca Dios Baquē. Dios jané tsi éa shinahuē. Ea tēnēmayamahuē ra iquia —iquiina.

⁸Jabi toca tsi quiha ja chaniniquē Jesú yoaha iqui na,

—Naa joni quima natsēquēhuē ra —i ja qui ja ni quēshpi na.

⁹Jatsi,

—¿Jahuē ni mi jané ra? —i quiha Jesu niquē.

—Seis Mil xo éa —i ja niquē huēstima ca yoshi bo ja jayani quēshpi na.

¹⁰Jatsi Jesu ja bēnarianiquē, toa mai quima jato ja raayamano iquish na.

¹¹Jabi toá tsi, basima quiha, huēstima ca yahua jinaya iniquē. Macana xo tsi pihi ja icani quiha. ¹²Jatsi yoshi bá bēnaniquē:

—Toa yahua jinaya qui noqui raahuē. Jato qui no jicono ra —iquiina.

¹³Jatsi,

—Bocata —i jato qui Jesu niquē.

Jatsi joni quima ax yoshi bo natsēquēniquē. Natsēquēhax tsi quiha yahua jinaya qui ja jicocaniquē. Jatsi jabatsi yahua tirixēni niquē. Dos mil ca yahua quiha. Maca ax rēnichihax ia qui ja jabayocaniquē. Ja nēachiyocaniquē ianē no.

¹⁴Jatsi yahua jinaya obēso cabo jabayocaniquē, ratēhi na. Yacatá ca nohiria, xabachá ca nohiria, tihi cabo yoahi ja bocani quiha. Jatsi nohiria bo bēcaniquē oca pi ja ni ca jisi na. ¹⁵Jesu ini ca qui cahēxo yoshi jayapaonish ca joni ja jiscaniquē. Jaboqui tsaho ja ini quiha. Raiti sahuē quiha. Yoyo yama, jēnima ja ini quiha. Tsayahax ja raquēcaniquē. ¹⁶Jabi yoyoxēni ca joni jēnimahuahacani ca quinia jisnish cabá yoaniquē bēcanish cabo qui. ¹⁷Jatsi Jesu bēnatsi jahuacaniquē jato mai jisbayati.

¹⁸Jatsi jahuē noti qui Jesu jiconiquē jisbayaxēna. Jicojano tsi quiha,

—Mi bēta cacasquia ra —i yoshi jayapaonish ca niquē.

¹⁹Jama, noti qui Jesú jicomayamaniquē. Jicomayamaxo tsi quiha ja qui ja chaniniquē:

—Jahari mi xobo, mi nabo, tihi cabo qui catá. Mi bax Ibobá acana, mia ja shomahuahana, tihi cabo jato mi yoano ra —iquiina.

²⁰Jatsi pē joni jisbayaniquē. Jisbaya tsi quiha Decápolis icanai ca yaca bo xo tsi Jesú ja bax ani ca ja yoabonaniquē. Ratēniquē jahuē chani nicanish cabo tēquē.

Jairo jahini, jimihai ca yoxa jēnimahuahacanina

Mateo 9.18-26; Lucas 8.40-56

²¹Jahari ia rabēquēx ca qui Jesu cahēquē tsi toá tsi quiha nohiria misco mani iniquē. Quēmapó nii ja icani quiha. ²²Jatsi quiha ja qui joni joniquē, naa Jairo icanai cato. Jodioba catiti xobo chama quiha. Jesu jisi tsi quiha Jesu tahē tsi Jairo mēniniquē. ²³Mēnihax ja bēnarianiquē:

—Anoma xo noho jahini rē. Noho xobo qui johuē. Noho jahi mi motsano ra, ja jēnimanano iquish na, ja rēsoyamano —iquiina.

²⁴Jatsi Jairo ya Jesu caniquē. Banahuaniquē nohiria misco ri, ja qui quētsocanaina. ²⁵Jabi nohiria xērēquē tsi quiha noitiria ca jimi acai ca yoxa ini quiha. Doce ca año no tsi quiha jimi ja ani quiha. ²⁶Jasca, huēstima ca doctor bo qui ja cani quiha jēnimahuahacaxēna. Quēyohacani quiha jahuē parata; jama, jari jasca pi ja ini quiha rē. Oquēnahi ja jimi acai ini quiha. ²⁷Jesu yoati tsi nicahi tsi nohiria xērēquē tsi Jesu cho ja basimaniquē. Basimaxo tsi quiha Jesu sahuēti ja motsaniquē. ²⁸Jabi jamé ja nēcani quiha: “Jahuē sahuēti roha pi motsahi tsi jēnimaxēquia ra” iquiina. ²⁹Jatsi tocapijaniquē. Bismatapiniquē ja jimihaina ra. ³⁰Jarohari tsi quiha jahuē chama natsēquēha ca Jesú cahētapiniquē. Nohiria naxērēquē bopinaxo tsi quiha ja nicaniquē:

—¿Tsohuë noho sahuëti motsaha? —iquiina.

³¹ Jatsi jahuë rabëti bá quëbiniquë:

—Tsayahuë. Anomaria tsi xo toa nohiria mia tijhacanaina. ¿Jëneriahax raca, “¿Tsohuë ëa motsaha?” i mi a pa? —iquiina.

³² Jama, motsahax ca jari Jesú mëraniquë, nohiria tsayaquí na. ³³ Jatsi raquëtsi yoxa niquë. Ja jënimahuahacaha ca ja cahëni quiha. Japi mëmë tsi Jesu qui ja joniquë. Johax Jesu tahë tsi quiha ja mëniniquë. Ja jënimahuahacaha ca ja yoaniquë, parayamaquí na. ³⁴ Jatsi Jesu ja qui chaniniquë:

—Mi jënimahuahacaquë cai, mi chitimihai ca iqui na. Bëpasi tsi cata. Jaboqui jënima xo mia —iquiina.

³⁵ Jari Jesu ja qui chanino tsi quiha huësti huësti ca nohiria bëcaniquë Jairo xobo ax na, naa jodioba catiti xobo chama. Cahëhax,

—Rësoquë mi jahini rë. Maestro jari huënhuayamahuë. Iquë rë —i jahini jahëpa qui jaca niquë.

³⁶ Ja yoacana ca chahuayamahi tsi jodioba catiti xobo chama qui Jesu chaniniquë:

—Raquëyamatsina. E qui roha mi chitimino ra —iquiina.

³⁷ Jatsi jahari nohiria bo Jesú raaniquë, jamë cacatsina. Pedro, Jacobo, Juan, Jacobo noma, tihi ca roha ja boniquë. ³⁸ Jairo xobo qui cahëxo tsi quiha pacots-huahai ca nohiria, naa araconacanaibo, huini-huincanaibo, tihi cabo ja jisniquë. ³⁹ Xobo qui jicopama tsi quiha,

—¿Jënahuariahax raca nëca tsi araconacana? Anomaria xo ma pacots-huahaina ra. Rësoyamahi quiha naa baquë. Oxa roha —i nohiria bo qui Jesu niquë.

⁴⁰ Jatsi ja osacaniquë. Jatsi xobo cacha nohiria tëquë ja raaniquë. Raaxo tsi quiha jahëpa, jahëhua, ja bëta bëcanish cabo, tihi roha ca ja bëniniquë jahi ini ca qui. ⁴¹ Jatsi jahini mëquë Jesú biniquë. Bichi tsi,

—Talita, cumi, naa joihuë cai, iquia —i jahi pistia qui Jesu niquë.

⁴² Jatsi joitapiniquë jahini. Tapiti mëtsa ja ini quiha ra. Jabi doce ca año ja jayani quiha naa xotaco. Jatsi ratëniniquë nohiria tëquë tsayahax na. ⁴³ Jama, nohiria bo Jesú yobaniquë, ja aca ca ja yoayamacano Jasca, jato ja yobaniquë jahi pistia pimati.

6

Nazaret qui Jesu shishonina

Mateo 13.53-58; Lucas 4.16-30

¹ Jaaquirëquë toa mai Jesú jisbayaniquë. Jisbaya tsi quiha jahari jahanahax ja coní yacata, naa Nazaret icanai ca qui ja bacaniquë jahuë rabëti bo ya.

² Joiti barí tsi quiha ja cahëcaniquë. Cahëxo tsi quiha jodioba catiti xobo xo tsi tiisimatsi quiha Jesú huaniquë. Jabi toá tsi quiha huëstima ca nohiria iniquë araxëna. Jesu chani nicahi tsi quiha ja ratëyocaniquë.

—¿Jahuënia ca naa tiisi ja bini sa? ¿Jënahuariaxo raca naa jisti bo aqui ni pa?

³ ¿Carpintero roha tsi xo naa ra? Maria baquë yoi tsi xo naa pë. Jahuë noma bo tsi xo Jacobo, José, Judás, Simón ra. ¿Nëá tsi racayamayamahi ni jahuë yoxa cabo ri? ¿Jënahuariahax raca noqui ja oquëna? —nëa tsi nohiria bo nëcaniquë Jesu yoati na.

Ja iqui tsi pë jahuë chani ja nicacasyama-caniquë rë. ⁴ Jatsi Jesú jato yoaniquë:

—Jabi Dios Chani yoati ibo qui nicahi quiha jatiroha ca nohiria ra. Jama, nicacasyamacanaibo tsi xo toa jahuë yacatá ca nohiria, jahuë jimi bo, jahuë

xobó cabo pë. Tihi cabo tsi xo toa jahuë chani nicacasyamacanaibo —i jato qui ja niquë.

⁵ Jatsi toa xo tsi jisti bo ati mëtsama Jesu iniquë, ja qui ja chitimiyamacani iqui na. Huësti huësti ca iquicanaibo roha ja jënimahuani quiha, jato ó tsi jahuë mëquë tsi janaquí na. ⁶ Ratëni quiha Jesu, ja qui ja chitimicasyamacani iqui na. Jaquirëquë yaca huëtsa bo qui ja caniquë Dios Chani tiisimahi na.

Jahuë doce ca rabëti bo Jesú raanina Dios Chani yoati

Mateo 10.5-15; Lucas 9.1-6

⁷ Jaquirëquë jahuë doce ca rabëti bo ja qui Jesú catianiquë. Catiaxo tsi quiha rabë rabë tsi jato raatsijahuaniquë Dios Chani yoati. Jasca, chama jato qui ja aniquë yoshi bo tsëcati. ⁸ Jatsi jato ja yobaniquë:

—Mëquëya bocana. Coti jihui roha bocana. Sota, mapari, parata, tihi cabo boyamacana. ⁹ Jënima tsi xo chinela sahuëhaina; jama, rabë ca camisa bo ma sahuëyamano —nëa tsi Jesu nëcaniquë, jato yobahi na.

¹⁰ Nëca tsi ja rëtsaniquë:

—Yaca qui cahëhax mato qui joi amahai ca nohiria xobó tsi chitëcana. Shishohi tsi xobo huëtsa rarinayamacana. ¹¹ Yacatá ca nohiriá pi mato joi-huayamano tsi mato chani pi ja nicacasyamacano tsi jato bëta chitëyamacana. Jisbaya tsi mato tahë ca cospo toj-tojhacahuë jato jocha jismaxëna. Toca tsi jato qui Dios caxa ma jismañi xo —i jahuë rabëti bo qui ja niquë.

¹² Jatsi ja bocaniquë. Dios Chani ja yoabonacaniquë:

—Dios quiri mató quinia yoi ca quima bësocana ra —iquiina.

¹³ Jasca, yoshi huëstima ca ja tsëcacaniquë. Iquicanaibo ó tsi xëni ja japacanicuë, jato ja jënimahuaquë no. Tihi tsi ja acanicuë, Dios Chani yoaquí na.

Juan yamabo yoati Herodés nicanina

Mateo 14.1-12; Lucas 9.7-9

¹⁴ Jabi Jesu yoati tsi chama Herodés nicaniquë, nëama Jesú ani ca chani pacanani quëshpi na. Nichahax tsi quiha,

—Tonia bësotëquë xo Juan yamabo ra. Ja tsi xo toa jisti ati chama jaya xo ra —i Herodes niquë Jesu yoati na.

¹⁵ Jasca,

—Dios Chani yoanish ca Elías yamabo tsi xo naa tonia —i nohiria huëtsa bo niquë.

Jama,

—Dios Chani yoati ibo-iboria tsi xo naa, naa noba Dios Chani yoanish cabo jascaria —i huëtsa bo niquë.

¹⁶ Nohiria bá yoahai ca nichahax tsi quiha chama Herodes nëcaniquë:

—Juan yamabo xo ra. Jahuë mapo ë tëquëësaniquë rë; jama, jaboqui bëso ja nori —iquiina.

¹⁷ Jabi siri tsi soldado bo chama Herodés raani quiha Juan qui tsamiti. Juan nëxati ibo chama Herodes ini quiha. Jabi ja bichi ca ahui Herodías iqui tsi quiha preso qui Juan nanëhacani quiha rë. Jabi jahuë noma Felipe ahui chama Herodés bini quiha rë, naa Herodías icanai cato. ¹⁸ Jabi jahuë noma ahui ja biquë tsi,

—Binoma tsi xo mi noma ahui ni ra. Anoma quiha —i ja qui Juan i-ipaoni quiha.

¹⁹ Ja tsi xo toa Juan qui jahuë ahui paxa ca Herodías caxa iniquë. Juan ja acasni quiha pë; jama, ati mëtsama ja ini quiha jahuë bënë Herodes iqui na. ²⁰ Shina jiaxëni ca mëstë ca joni Juan iqui ca chama Herodés cahëni quiha. Ja tsi xo toa Juan ja acasyamani quiha, raquëquí na. Japi Juan ó

ja bēsoniquē. Jasca, ja qui jia quiha Juan chanini ca ini quiha. Nicach ja shina-huējēnapaoni quiha. ²¹ Jama, jahuē ahui qui tsēquēni quiha Juan namēti xabaca, naa jahuē bēnē Herodes conī bari no. Toa barī tsi quiha jahuē nohiria chama bo, jahuē capitán bo, Galileá ca yosibo, tihī cabo qui joi Herodés amaniquē, jahuē fiesta qui ja bēcāno. ²² Ja oriquicano tsi quiha Herodías jahi jiconiquē jato bax pabēxēna. Jabi ja pabēhai ca qui raniniquē Herodes, ja bēta oriquicanaibo. Ranihax xotaco qui Herodes chaniniquē:

—¿Jahuē ó quēēhai? Ea nicamahūē. Jaha mi quēēhai ca mi qui axēquia ra —i ja qui ja niquē.

²³ Jatsi ja jurar-aniquē:

—Mia parayamaquia ra. Jahuēcara mi bēnahai ca mi qui axēquia ra, naa ē yonahai ca bēquēx tana —iquiina.

²⁴ Jatsi xotaco caniquē jahuē jahēhua nicaxēna.

—¿Jahuē bēnaxēhi nī ēa sa? —i jahuē jahēhua qui ja niquē.

Jatsi,

—Ashimati ibo Juan mapo bita —i ja qui ja niquē.

²⁵ Bamahaxma tsi chama Herodes qui jahari ja joniquē. Johax,

—Ashimati ibo Juan mapo ē qui ahūē, ratá no —i chama qui ja niquē rē.

²⁶ Jatsi Herodes cohuēniquē nicahax na. Jama, nohiria bēsojō tsi “Mia parayamaquia” i ja ni iqui tsi jaha ja quēēhai ca xotaco qui ja aniquē. ²⁷ Jatsi soldado ja raaniquē Juan mapo biti. ²⁸ Jatsi preso qui soldado caniquē. Caxo jahuē mapo ja tēquēēsaha ca tsi jahari ja bēniquē ratá no. Joxo xotaco qui ja aniquē. Jatsi jahēhua qui jahuē mapo ja aniquē.

²⁹ Jabi Herodés ani ca nicahax Juan banahuacanaibo bēcāniquē jahuē yora bixēna. Bixo tsi quiha ja maihuajahuacāniquē.

Cinco mil ca nohiria Jesú pimanina

Mateo 14.13-21; Lucas 9.10-17; Juan 6.1-14

³⁰ Jatsi Jesu rabēti bo bacāniquē, naa Dios Chani yoatí raahacānish cabo. Jesu ya catixo tsi quiha jatiroha ca ja acanina, ja tiisimācanina, tihī cabo tsi quiha Jesu ja yoacāniquē.

³¹ Jatsi Jesu cacāsniquē.

—¿Nohiria yama ca qui nomē canomani? Naa nohiria misco no jisbayano, no joiparino iquish na —i jahuē rabēti bo qui Jesu niquē.

Jabi huēstima ca nohiria ini quiha ja qui bēcānaina, bocānaina. Nohiria iqui tsi quiha piti xaba ja nariscāniquē. Jatsi ja yosanacani quiha. ³² Ja quēshpi tsi iti huētsa qui ja bocāniquē notí no, jamējacano iquish na. ³³ Jama ja bocānai ca huēstima cabá jisniquē. Tsohuē cara ja icani ca ja cahēcana ca tsi rēquē ja jabacāniquē ja rērēcanai ca qui. Ja quēnibonacani quiha. Quēnihax Jesu bēbo ja cahēcani quiha. Jasca basima ca yaca bo ax ja jabacani quiha. ³⁴ Jatsi tēmāhinapama tsi quiha naa nohiria misco Jesú jisniquē. Jato ja noini quiha, jaha bēsōhamaca oveja jascaria ja icani quēshpi na. Japi huēstima ca jahuē bo jato tiisimatsi quiha Jesú huaniquē. ³⁵ Yata tsi quiha ja qui jahuē rabēti bo bēcāniquē yobaxēna.

—Caquē bari tia —i Jesu qui jaca niquē—. ³⁶ Basima ca yaca bo, huai bo, tihī cabo qui nohiria raatsana. Toa xo tsi jahuēcara ca ja copicano piti. Yama tsi xo piti nēá no —i jaca niquē.

³⁷ Jatsi Jesú nēca tsi jato quēbiniquē:

—¿Mato tsani? Jato pīmacana —iquiina. Jatsi ja chānicāniquē:

—¿Jēnahuariaxo raca tihiria ca mapari no copina, naa nohiria tēquē pīmaxēna? Copixēniria quiha —iquiina.

³⁸ Jatsi Jesú jato yoaniquë:

—¿Jahuë tihi ca mapari jayahi ni nohiria bo ra? Tsayata —iquiina.

Cahëhax,

—Cinco ca mapari, dos ca sanino, tihi cabo jayacani quiha —i Jesu qui jaca niquë.

³⁹ Jatsi nohiria bo Jesú tsahomaniquë huasí no. ⁴⁰ Maxo cincuenta, maxo cien, toca tsi jato ja tsahomani quiha. ⁴¹ Tsahomaxo tsi quiha cinco ca mapari, dos ca sanino, tihi cabo Jesú biniquë. Bichi tsi quiha mana nai qui tsayahax tsi “Gracias” i Dios qui ja niquë piti quëshpi na. Jatsi mapari bo ja tēxēnamaniquë. Tēxēnamaxo jahuë rabëti bo qui ja aniquë nohiria bo taati. Jaquirëquë sani ja tēxēnamaniquë nohiria bo taaxëna. ⁴² Piniquë nohiria tēquëta. Ja sēyayocaniquë. ⁴³ Jaquirëquë mapari quësi bo, sanino, naa pihama ca quësi bo jahuë rabëti bá catianiquë. Doce ca caca rēahacaniquë ra. ⁴⁴ Jabi toá tsi cinco mil ca mapari picanai ca joni bo ini quiha ra.

Jënë cacha Jesu conina

Mateo 14.22-27; Juan 6.16-21

⁴⁵ Nohiria bo pimaxo tsi noti qui jahuë rabëti bo Jesú jicomaniquë, jabëbo Betsaida qui ja shitacano iquish na. Jasca, nohiria tēquë jahari jato xobo qui ja raaniquë. ⁴⁶ Jahuë rabëti bo raahax maca bo qui ja caniquë bēhox-xëna. ⁴⁷ Bari caquë tsi quiha ia nēpax tsi jari noti ini quiha; jamë pistia maí tsi Jesu iquiina. ⁴⁸ Jatsi noiyamaria tsi ja huasha-huashacanaí ca ja jisniquë, yoshi xotohai ca bëcha ja icanaí quëshpi na. Jatsi patiari quëonox pari no tsi quiha jato qui Jesu caniquë, jënë cacha cohi na. Copama tsi jato ja tarabicasni quiha. ⁴⁹ Jatsi jënë tsi Jesu cohai ja jiscaniquë. Bërocamaqui ja iqui ja quëscahuajahuacaniquë. Jatsi ja sai i-icaniquë raquëhi na. ⁵⁰ Jabi ja jiscaniquë jato tēquëta. Jisi tsi ja ratēyocaniquë. Jatsi Jesu jato qui chanitapiniquë:

—Chamacana. Ea yoi xo naa. Raquëyamacana —iquiina.

⁵¹ Jatsi noti qui Jesu jicoquë tsi quiha pasiniquë yoshi xotohaina ra. Jatsi ratēyoniquë jahuë rabëti bo. Shinati ja cahëyamacani quiha. ⁵² Quëstoria ini quiha jato shinana. Jasca, mapari ja tēxēnamaquë tsi quiha tsohuë yoi ja iqui ca ja cahëyamayoicani quiha.

Genesarët ca iquicanaibo Jesú jënimahuanina

Mateo 14.34-36

⁵³ Jatsi ia ja shitacaniquë. Shitaxo tsi quiha Genesaret mai qui ja rërëcaniquë. Toá tsi jato noti ja nēxacaniquë. ⁵⁴ Ja tēmahinacaquë tsi quiha nohiria bá Jesu cahëtapiniquë. ⁵⁵ Jatsi toa maí tsi pacanayocaniquë nohiria, iquicanaibo ja iqui ca qui bëxëna. Jato oxatí tsi anoma cabo ja qui ja bëceni quiha jënimahuahacati. ⁵⁶ Jasca, jatiroha ca Jesu cani ca qui, naa yaca bo, jihuëta bo, tihi cabo xo tsi jato anoma cabo ja janacaniquë bahí no. Jatsi Jesu ja bënariacaniquë jënimahuahacati, jahuë sahuëti quëpë roha motsacatsi na. Jabi jënimahuahacani quiha jahuë sahuëti motsanish cabo tēquëta ra.

7

Nohiria jochamahai cato

Mateo 15.1-20

¹ Jatsi jodioba chama bo, jato yoba tiisimacanaibo, tihi cabo cahëniquë Jerusalén ax na, Jesu tsayacascani na. ² Jabi jahuë rabëti bo tsayapama tsi quiha chöchohama ca mēquënë tsi ja picanai ca ja jiscaniquë. Jodioba jabi, jato yoba, tihi cabo pasomaha ini quiha ja acanaina. Ja quëshpi tsi jodioba chama bo ranimisniquë. ³ Jabi jodioba yoba, naa jato naboyamaba yoba siri

bo ja aria-ariacani quiha. Pinox pari tsi quiha ja mëchococani quiha. Jato jabi quiha. ⁴Jasca, jato yoba iqui tsi mercadó ca copini ca jahuë bo ja chocohacani quiha pinox pari. Jato jabi quiha. Jasca, jato canico bo, jato olla bo, jato rato bo, tihi cabo ja chocohacani quiha. Jato naboyamabá ani ca yoba quiha. ⁵Jatsi bëcanish ca jodioba chama bá Jesu nicaniquë:

—¿Jënixo tsi noba naboyamabá noqui ani ca yoba ayamahi ni mi rabëti bo? Mëchocoxoma tsi picani quiha pë. Anoma quiha —iquiina.

⁶Jatsi Jesú jato quëbiniquë:

—Quiaxëni xo mato ra. Parayamaniquë Isaiás yamabo, mato yoati tsi ja quënëquë no:

“Jato janá tsi jia tsi ëa ocahuacani quiha naa nohiria; jama, ëa basi jato shina nori.

⁷Mahitsa ë qui aracani quiha.

“Dios yoba tsi xo naa” icani quiha, jato mahitsa ca yoba nori”

nëa tsi quiha Isaiás yamabo nëcani quiha Quënëhacanish cabo ó no.

⁸Tsayacahuë. Dios yoba niaqui mato pë, mato joni bá tiisimahai ca yoba banahuaxëna —nëa tsi Jesu nëcаниquë jodioba chama bo qui.

⁹Jatsi Jesú rëtsaniquë, chanihi na:

—Mato jabi bo, mato yoba bo, tihi cabo banahuaquí tsi Dios yoba-yobaria niaqui mato pë. ¹⁰Jabi Dios yoba Moisés yamabá mato qui aniquë: “Mato jahëpa, mato jahëhua noicana” iquiina. Jasca, “Namëhacati xo tsohuëcara ca jahuë jahëpa, jahuë jahëhua, tihi cabo ocahuahai cato” i ja ni quiha. ¹¹Jama, mato qui jënima tsi xo mato noitiria ca nabo nicayamahaina rë. “Jishopë. Mato mëbitimaxëni xo ëa rë, Dios qui noho parata ë aquitaha quëshpi na” iqui mato pë, jato mëbicasyamahi na. ¹²Jatsi mato nabo mëbiyamaqui mato rë. Mato qui jënima xo toca ca chanihaina pë. Jabi toca tsi Dios yoba niaqui mato ri, ma ani ca yoba ó bësocatsi na. ¹³Jabi tobi huëstima ca toca ca mahitsa ca jabi bo ma acaina rë —nëa tsi Jesu nëcаниquë bëcanish ca jodioba chama bo qui.

Nohiria jochamahai ca jahuë bo

Mateo 15.10-20

¹⁴Jatsi nohiria bo quënatëquëhax tsi quiha Jesu chaniniquë:

—Ea nicayocana. Ma cahëno ra. ¹⁵Nohiria jochamayamahi quiha toa ja qui jicohaina. Jama, nohiria jochamahai ca tsi xo toa yoi ca ja shinahai ca ja chanihaina ra. ¹⁶Jabi naa chani nicaxëti xo jatiroha cabo —i Jesu niquë.

¹⁷Jatsi nohiria bo jisbëria tsi quiha xobo qui Jesu jiconiquë. Toa xo tsi jahuë rabëti bá nicaniquë ja yoaha ca chani yoati na. Jatsi Jesu chaniniquë:

¹⁸—¿E yoaha ca cahëyamahi ni mato ri ra? ¿Jënahuariaxo raca ma pïhai cató mato shina yoshihuana? ¹⁹Shina qui cayamahi quiha piti ra, jahuë poco qui nori. Cahax jahuë poco ax huajahi quiha —nëa tsi Jesu nëcаниquë.

Jabi ja yoaha cató tsi jatiroha ca piti jënima iqui ca Jesú jismani quiha.

²⁰Jatsi ja nëcаниquë:

—Nohiria jochamahai ca tsi xo toa ja shinahaina ra. ²¹Ja xara, naa jahuë shina quima ax johi quiha ja shinahai ca yoi cato. Yoi ca shinaquí tsi anoma ca jahuë bo aqui quiha rë. Jahuë shina yoi iqui tsi yomahi quiha nohiria ra. Ja quëshpi tsi tobi tobi joni acaina, joni huëtasa ahui bichiina, ²²yoi ca ó quëëmis-haina. Jasca, jato yoi ca shinahai iqui tsi tobi quiha yoi ca acaina, paramis-haina, ranomis-haina, ranimis-haina, jamë shinamis-haina, yoyohaina. ²³Jabi joni xara, naa jahuë shina quima ax johi quiha naa

yoi ca tēquēta. Ja tsi xo toa nohiria bo jochamahai cato, ja picanai ca nomari —nēa tsi Jesu nēcaniquē.

Carayana ca yoxa Jesu qui canina

Mateo 15.21-28

²⁴ Toa ax riquicaya tsi quiha mai huētsa, naa yaca Tiro y Sidón basima ca qui Jesu caniquē. Xobo qui jicoxo tsi quiha ja racahi iqui ca Jesú cahēmacyamaniquē. Jama, mēri tsi quiha jahuē iti nohiria bá cahēniquē. Jonēnoma ja ini quiha. ²⁵ Toatiyá tsi ja racani ca huēsti ca yoxá nicaniquē, naa yoshi jaya ca jahi jayanish cato. Nicahax ja qui ja joniquē. Jatsi Jesu bēsojō tsi quiha ja mēnitapiniquē. ²⁶ Jabi carayana naa yoxa ini quiha, naa Sirofenicia maí conish cato. Mēnixo tsi quiha Jesu ja bēnarianiquē jahuē jahi ó ca yoshi natsēcati. ²⁷ Jatsi quiha Jesu ja qui chaniniquē:

—¿Jēnahuariaxo mia ē mēbina? Jodiobo qui roha ē raahacani quiha shomahuati. Jato ē mēbipariti xo ra. Noba jabi pasomaha tsi xo toa carayanabo mēbihaina. Noba xocoba mapari ini bo qui niahai jascaria xo —i ja qui Jesu niquē.

²⁸ Jatsi yoxá quēbiniquē:

—Jabija, Taitá. Yoiria ca carayana roha ca ēa xo naa ra; jama, ¿jato chama quima ax paquēhax ca quēxē mishni bo piyamamayahi ni ina bo ra? Shomahuahacaqui ina bo ri ra —iquiina.

²⁹ Jatsi Jesu yoxa qui chanitēquēniquē:

—Jia tsi xo toa mi quēbihana. Ja iqui tsi mi jahi ē jēnimahuaquē ra. Cata. Natsēquēquē mi jahi ó ca yoshini ra —iquiina.

³⁰ Jatsi jahari jahuē xobo qui yoxa caniquē. Jēnima, oxati raca ja ini quiha, xobo qui ja cahēquē no. Yama jahuē yoshi ini quiha.

Jaro ca joni Jesú jēnimahuanina

³¹ Tiro mai riquicaya tsi quiha Sidón mai Jesu naconiquē Ia Galilea qui caxēna. Decápolis icanai ca yaca bo ja tarabiniquē caquí na. ³² Toa xo tsi quiha patoxi ca jaro ca joni nohiria bá bēniquē ja qui. Bēxo tsi quiha Jesu ja bēnariacanicuē, jahuē mēquē jaha ja janano. ³³ Japi nohiria misco quima Jesú joni boniquē, jamē pistia ja bētati. Jatsi joni pahoqui quini tsi jahuē mētsis Jesú pahostanicuē. Pahostaxo tsi quiha coshoxo tsi jahuē jana ja mōtsanicuē. ³⁴ Jaquirēquē nai qui tsayapama tsi quiha ja ēēsanicuē. Jatsi,

—Papēquēhuē ra —i ja qui Jesu niquē.

³⁵ Jatsi nicatapiniquē joni. Bēro tsi quiha ja chaniniquē ra. Jēnima quiha jahuē pahoqui, jahuē jana, tihi cabo iniquē. ³⁶ Jatsi nohiria bo qui Jesu chaniniquē:

—E aca ca yoayamatsacana —iquiina.

Jato ja pasimacasnī quiha; mahitsa. Jato ja pasima-pasimaquē tsi quiha oquē tsi ja ani ca ja pacanamacanicuē rē. ³⁷ Jatsi ratēyoniquē nohiria tēquē, ja ani ca nicahax na.

—Anomaria tsi xo toa ja acaina ra. Patoxi cabo pasomahi quiha ra. Jaro cabo chanimahi quiha pa —nēa tsi nohiria bo nēcaniquē Jesu yoati na.

8

Cuatro mil ca nohiria Jesú pimanina

Mateo 15.32-39

¹ Jaquirēquē toatiyá tsi quiha nohiria misco catitēquēniquē, Jesu jiscatsi na. Jatsi jato piti ja quēyocaquē tsi quiha jahuē rabēti bo Jesú quēnanicuē:

²—Noitiria tsi xo naa nohiria. Tres ca bari no tsi ë bëta ja icaquë. Jaboqui yama tsi xo ja picanaina rë. ³Paxnacanaï ca jato xobo qui jato ë raapino tsi bahí tsi rësocanaxëcani quiha tonia. Basi-basiria tsi xo toa huësti huësti ca bëcanana —i jahuë rabëti bo qui Jesu niquë.

⁴Jatsi jahuë rabëti bá quëbiniquë:

—¿Jënahuariaxo raca jato bax mapari bo no bina rë? Xobo yama ca iti tsi xo naa ra —iquiina.

⁵Jatsi Jesú nicaniquë:

—¿Jahuë tihi ca mapari yani mato? —iquiina.

—Siete ca mapari roha —i jaca niquë.

⁶Jatsi nohiria misco ca ja tsahomaniquë maí no. Mapari bichi tsi quiha “Gracias” i Dios qui ja niquë. Jatsi mapari ja tëxënamaniquë. Tëxënamaxo tsi quiha jahuë rabëti bo ja mëaniquë nohiria misco bo taati. Jatsi mapari nohiria bo qui ja mëacanicuë. ⁷Jasca, huësti huësti ca sani mishni ja jayacanicuë. Naa sani bixo tsi quiha “Gracias” i Dios qui Jesu niquë. Jatsi jahuë rabëti bo qui sani ja mëaniquë nohiria bo taati. ⁸Piniquë nohiria tëquëta. Ja sëyayocanicuë. Jabi tobi cuatro mil ca nohiria ini quiha picanaina. ⁹Ja picaquë tsi quiha pihama ca quësi mishni bo ja topicanicuë. Jaquirëquë jato xobo qui nohiria bo ja raanicuë. ¹⁰Raahax noti qui ja jiconiquë jahuë rabëti bo ya. Jicoxo ia ja shitacanicuë.

Jisti jodioba chama bá jiscasnina

Mateo 16.1-4

¹¹Jatsi jodioba chama bo Jesu qui bëcaniquë ja qui joi mëraxëna. Jesu tanamacasquí tsi quiha Jesu ja nicacanicuë:

—Mana ca jisti mi ano ra. Jisti pi mi ano tsi mia chahahuaxëqui noa ra —iquiina.

Jabi ja tocacanicuë ja qui quësocastsi na pë. ¹²Jato qui yosanahi tsi quiha jato qui Jesu nëcaniquë:

—Jisti-naxëni xo mato pë. Mato bax ayamaxëquia ra —iquiina.

¹³Jato jisbaya tsi quiha noti qui ja jiconiquë. Jatsi ia ja shitanicuë rabëquëx ca qui.

Jodioba chama bo, chama Herodes, tihi cabo ó jahuë rabëti bo Jesú quinia-manina

Mateo 16.5-12

¹⁴Ia shitapama tsi quiha,

—Jishopë. Mapari piti no shina-bënoquë rë —i Jesu qui jaca niquë.

Jabi huësti ca mapari roha ja jayacani quiha notí no.

¹⁵Jatsi Jesú jato yobanicuë:

—Jodioba chama bo, Herodes, tihi cabo ó tsi quiniacaxëcahuë, mapari levadura jascaria jaca nori iqui na. Mëri tsi pacanahi quiha jato yoi cato ra —iquiina.

¹⁶Jatsi jato xërëquë tsi chaninatsijacanicuë.

—¿Jënjaha sa? Toca tsi chanihí quiha pë, mapari no shina-bënoha iqui na, tonia —i jaca niquë.

¹⁷Jabi mapari yoati tsi ja chaninacanaï ca Jesú cahëni quiha. Cahëni tsi,

—¿Jënihax tsi joi i-icanai rë, naa ma shina-bënoha ca mapari yoati na? —i jato qui Jesu niquë—. Ma shina-bënoha ca mapari shinayamaquia ra.

¿Jari cahëyamacanaï? Quëstoria xo mato mapo rë. ¹⁸¿Bëro yama ni mato sa? Jatsi tsayacahuë. ¿Pahoqui jaya ni mato? Jatsi nicacahuë. ¹⁹¿Cinco mil ca nohiria jaboqui ë pimayamaha? Jasca, ¿cinco ca maparí roha tsi jato tëquë

ë pimayamaha? Jaquirëquë çjahuë tih ca caca ma rëaha, naa mapari pihama cató no? —i jato qui Jesu niquë.

Jatsi,

—Doce ca cacano —i jaca niquë.

²⁰ Jatsi,

—Jasca, siete ca mapari tsi cuatro mil ca nohiria ë pimahitaquë ra. Toatiyá tsi çjahuë tih ca caca ma rëahitaha, pihama ca mapari no? —i Jesu niquë.

Jatsi jahuë rabëti bá quëbiniquë:

—Siete ca caca no rëahitaquë —iquiina.

²¹ Jatsi,

—çJari tsohuë ë nori ca cahëyamacanaí? çJari ma pihai ca mapari shinahi ni mato ra? —iquiina.

Betsaidá ca bëco ca joni Jesú jënimahuanina

²² Betsaida yaca qui ja cahëcaquë tsi quiha bëco ca joni Jesu qui nohiria bëcaniquë. Bëxo tsi quiha Jesu ja bënariacanicuë, joni jënimahuati. ²³ Jatsi yaca cacha Jesú joni mëpiniquë. Mëpixo tsi quiha jahuë bëro qui Jesu coshohanicuë. Jatsi jahuë mëquë jahá janaxo Jesú nicaniquë:

—çJahuë tsayahai? —iquiina.

²⁴ Jatsi taisniquë joni. Tais-hax tsi quiha,

—Nohiria bo jisquia. Jama, ë qui bohohai ca jihui bo jisiria ca xo rë —i Jesu qui joni niquë.

²⁵ Jatsi joni bëro Jesú motsatëquënicuë. Ja bëpëquëquë tsi quiha jënima jahuë bëro iniquë. Bëroria quiha jatiroha ca ini quiha. ²⁶ Jatsi Jesú joni raanicuë jahuë xobo qui. Raahax,

—Yaca qui mi jicotëquëyamano. Mi bax ë aca ca nohiria bo mi yoayamano ra —i joni qui Jesu niquë.

—Xabahamati Ibo xo mia —i Pedro nina

Mateo 16.13-20; Lucas 9.18-21

²⁷ Jaquirëquë jahuë rabëti bo ya Jesu caniquë Cesareá ca Filipo mai ó ca yaca bo qui. Bahí copama tsi quiha jahuë rabëti bo Jesú nicaniquë:

—çTsohuë ni ëa? çJënihi ni nohiria bo ëa yoati na? —iquiina.

²⁸ Jatsi jahuë rabëti bá quëbiniquë:

—“Ashimanish ca Juan yamabo përe xo mia” ii quiha huësti huësti ca nohiria. “Elías yamabo xo mia” ii quiha nohiria huëtsa bo. “Tonia Dios Chani yoanish ca xo mia” ii quiha tëxë bo —i Jesu qui jaca niquë.

²⁹ Jatsi Jesú jato nicaniquë:

—çJënihi ni mato ëa yoati na? çTsohuë ni ëa yoi? —iquiina.

Jatsi,

—Dios raahacanish ca Xabahamati Ibo xo mia ra —i ja qui Pedro niquë.

³⁰ Jatsi Jesú jato yobanicuë, Cristo, naa Xabahamati Ibo ja iqui ca yoayamati.

Ja rësoxëhai yoati tsi Jesu chaninina

Mateo 16.21-28; Lucas 9.22-27

³¹ Jatsi ja rësoxëhai yoati tsi chanitsi Jesu niquë:

—Tënë-tënëxëquia ra, naa Nohiria Baquë ë nori cato. Ea niacaxëcani quiha jodioba yosibo, jato arati ibo ba chama bo, jato yoba tiisimacanaibo rë. Ea namëcaxëcani quiha ra; jama, tres ca bari huinocaquë tsi bësotëquëxëquia ra —nëa tsi jahuë rabëti bo qui Jesu nëcaniquë.

³² Jabi bëro tsi ja rësoxëhai yoati tsi Jesu chaniniquë. Jatsi ori tsi Jesu Pedró boniquë jamë tsi ja qui chanixëna.

—Anoma tsi xo toca tsi mi chanihaina ra —i Jesu qui ja niquë, raahahi na.

³³ Jama, Jesu bopinaniquë. Bopinaxo tsi quiha Pedro ja raahaniquë, jahuë rabëti bo tsayaquí na.

—Ea basihuë, Satanás. Dios shinahai ca jasca ma xo toa mi shinahaina, nohiria bá shinahai jascaria nori —i Pedro qui ja niquë.

³⁴ Jatsi jahuë rabëti bo, nohiria misco, tihi cabo Jesú quënaniquë yobati.

—Ea pi banahuacasquí tsi ma acatsai ca ma shinayamati xo. Jaquirëquë mato cruz iacana. Iaxo ëa banahuacahuë. ³⁵ Jabi xabahamahacayamaxëhi quiha jahuë noma jabi ó quëemixxëni cato. Jama, xabahamahacaxëhi quiha jahuë noma jabi chihohuahai cato, ëa, noho chani, tihi cabo quëshpi na.

³⁶ Jabi jatiroha ca maí ca jahuë bo nohiriá bëbomitsa; jama, tënëtiya qui caapiquí tsi ¿jahuë raca ja bëbona? ³⁷ Jabi jahuë shina pi bënoquí tsi ¿jahuë raca Dios qui nohiriá ana ra, jahuë shina bitëquëxëna? ³⁸ Jabi anoma ca jochahuaxëni tsi xo naa jaboqui bësocanaibo iquia. Jabi ëa, noho chani, tihi cabo qui naa nohiria bo rabino tsi jato qui rabixëquia ëa ri, xaba huëtsá tsi ë joxëquë no. Toa barí tsi ángel bo ya tsi joxëquia ra, noho Jahëpa chamá no ra, naa Nohiria Baquë ë nori cato —nëa tsi nohiria bo qui Jesu nëcaniquë.

9

¹ Jatsi jahuë chani Jesú rëtsaniquë:

—Mato parayamaquia. Chamá tsi joxëhi quiha Díos otohaina ra. Jasca, ja johai ca jisxëqui mato huësti huësti cabo ra, ma rësonox pari —i jato qui ja niquë.

Jesu jabitinina

Mateo 17.1-13; Lucas 9.28-36

² Jatsi seis bari quirëquë, Pedro, Jacobo, Juan, tihi cabo maca qui Jesú boniquë jato bëtarohaxëna. Toá tsi quiha jahuë jaria jabitiniquë jato bësojó no. ³ Joxonariani quiha jahuë sahuëti; huëa jascaria quiha. ¿Tsohuë raca toca tsi raiti joxohuana? ⁴ Jatsi Elías yamabo, Moisés yamabo, tihi cabo jisiquiniquë. Jesu ya chanihi ja icani quiha. ⁵ Jatsi Jesu qui Pedro chaniniquë:

—Noqui jia tsi xo nëa no iquiina. Nëa xo tsi tres ca tapas axëqui noa ra; huësti mi-na, huësti Moisés-na, huësti Elías yamabá-na —nëa tsi Pedro nëcaniquë.

⁶ Jabi jahuëcara chaniti Pedró cahëyamani quiha raquëquí na. ⁷ Jatsi tsëmo joniquë. Joxo tsi quiha jato ja mapaniquë. Jatsi tsëmó ca joi chaniniquë:

—Noho Baquë yoi tsi xo naa ra. Noiquia. E qui jia tsi xo toa ja acaina ra. Ja qui nicacana —i joi niquë.

⁸ Jatsi nëjo nëjo taistapipama tsi quiha yama ca ja jiscaniquë. Jesu roha jato bëta ini quiha.

⁹ Jatsi maca ax botëjacano tsi quiha jato Jesú yobaniquë:

—Ma jisi ca nohiria bo jari yoayamacana. Jariapari tsi rësohax bësetëquëxëquia ra, naa Nohiria Baquë ë nori cato. Jaquirëquë jënima tsi xo nohiria bo ma yoahaina ra —iquiina.

¹⁰ Jatsi ja bëpacaniquë. Jama, ja yoaha ca ja cahëyamacani quiha. Jaha tsi,

—¿Jënihax tsi “Bësetëquëxëquia” i ja a sa? —i jaca niquë chaninahi na.

¹¹ Cahëcasquí tsi quiha Jesu ja nicacaniquë:

—“Xabahamati Ibo jonox pari no tsi joxëhi quiha Elías chama jaya ca pari” ii quiha noba yoba tiisimacanaibo. ¿Jabija ni toa ja yoacanaina? —i Jesu qui jaca niquë.

¹² Jatsi Jesú jato quëbiniquë:

—Jariapari joxëhi quiha Elías, naa Dios chama jaya cato. Joxo tsi jatiroha ca paxahuaxëhi quihã. Jabija tsi xo toa ja yoacanaina. Jama, “Tënëxëhi quihã Nohiria Baquë ri. Niaxëhi quihã nohiria bo rë” ¿i Dios Chani yoanish cabo yamayamani? ¹³ Jabi joniquë Elías ra, naa Dios chama jaya cato. Ja joquë tsi ja qui nohiria bá yosiniquë rë, mato Quënëhacanish cabá yoani ca jascaria —nëa tsi jahuë rabëti bo qui Jesu nëcaniquë.

*Yoyo jaya ca baquë Jesú jënimahuanina
Mateo 17.14-21; Lucas 9.37-43*

¹⁴ Jatsi maca ax botëxo tsi quihã nohiria misco ja jiscaniquë. Jesu rabëti bo yaxo joi mërahi jodioba chama ini quihã. Jato téamë tsi nohiria misco mani ini quihã. ¹⁵ Jatsi Jesu jisi tsi nohiria bo shina-risiquiniquë. Ja qui ja jabayocaniquë joihuaxëna. ¹⁶ Jatsi Jesú jahuë rabëti bo nicaniquë:

—¿Jënixo tsi joi mëracanai? —iquiina.

¹⁷ Jatsi toá ca nohiria xërëquë ca joní quëbiniquë:

—Mi qui noho baquë ë bëquë ra, jënimahuahacati. Yoshi jaya xo rë. Jaro quihã. ¹⁸ Noho baquë qui tsamiquí tsi mai qui niahi quihã rë. Jatsi jabacoxhi quihã noho baquë. Xëta mayëquërëhi quihã. Jatsi huishta-huishtahi quihã ra. Anoma quihã. Jabi, “Noho baquë ó ca yoshi tsëcacahuë” i mi rabëti bo qui ë quë. Tsëcatimaxënicana rë —nëa tsi Jesu qui joni nëcaniquë.

¹⁹ Jatsi Jesú quëbiniquë:

—Chitimitimaxëni ca yosaxëni ca nohiria xo mato pë. ¿Jahuë tihí tsi mato tënëxëhi ní ëa ra? Mi baquë nëri bëhuë —nëa tsi joni qui Jesu nëcaniquë.

²⁰ Jatsi Jesu qui jahuë baquë ja bëcaniquë. Jatsi pë Jesu jisi tsi quihã yoshiní baquë caxo amaniquë. Paquëniquë baquë. Maí tsi ja robi-robiniquë, ja bacoxhaina. ²¹ Jatsi pë Jesú jahuë jahëpa nicaniquë:

—¿Jahuë tihí tsi nëca tsi ja ini?

—iquiina.

Jatsi jahuë jahëpa chaniniquë:

—Baquë pistia ax rohari. ²² Huëstima tsi chihí, jënë, tihí cabo qui yoshiní noho baquë niani quihã axëna. Japi noqui shinahuë ra. Noqui mëbihuë ra. Mia roha tsi xo toa ati chama jaya cato ra —i jahëpa niquë.

²³ Jatsi,

—“Ati chama jaya xo mia” ¿i mi a pa? Acacati xo jatiroha cato, Dios qui chitimihai ca bax na iquia —i jahëpa qui Jesu niquë.

²⁴ Jatsi quihã jahëpá quëbitapiniquë:

—Dios qui chitimiquía ra. Jama, ëa chamahuahuë ra, oquë tsi ë chitimino iquish na —iquiina.

²⁵ Jatsi ja qui quëtsohai ca nohiria misco anihai ca jisi tsi quihã baquë ó ca yoshi Jesú raahaniquë:

—Natsëquëhuë ra, yoshi jaro patoxí cató. Baquë qui jicotëquëpistiayamariaxëhuë iquia —nëa tsi quihã Jesu nëcaniquë yoshi qui.

²⁶ Jatsi yoshiní jahuë baquë sai i-imaniquë. Caxo amahax tsi quihã ja natsëquëniquë ra. Jabi toa tsi pë chaparoha baquë ini quihã maí no. Ja rësoni nohiria bá quëscahaniniquë. Jaha tsi quihã,

—Naquë baquë ra —i jaca niquë.

²⁷ Jatsi pë Jesú jahuë mëquë achaniquë. Achaxo tsi quihã baquë ja joimaniquë. Niiniquë baquë ra. Jënima quihã ja iniquë ra.

²⁸ Jaquirëquë, xobo qui Jesu jicoquë tsi,

—¿Jënixo tsi jahuë yoshi tsëcanoma no iqui? —i Jesu qui jahuë rabëti bo niquë.

²⁹ Jatsi Jesú jato yoaniquë:

—Bëronoma tsi xo nëca ca yoshi natsëcahaina ra. No bëhoxhai cató tsi ja natsëcahacaxëti xo ra. Yama xo quinia huëtisa —i quilha jato qui Jesu niquë.

Ja nahai yoati tsi Jesu chanitëquëninina

Mateo 17.22-23; Lucas 9.43b-5

³⁰⁻³¹ Toa mai ax riquibaya tsi quilha Galilea mai ja nacocaniquë. Nohiria bo basi Jesu chitëniquë jahuë rabëti bo tiisimacatsi na. Chanihit si,
—Nohiria bo qui ë mëahacaxëti xo. Jatsi ëa acaxëcani quilha. Jama, tres bari quirëquë bësotëquëxëquia ra —i jato qui Jesu niquë.

³² Jabi Jesú yoaha ca jahuë rabëti bá cahëyamaniquë. Jama,

—¿Jënihit si mi yoahaina? No joma —iyama jaca nit quilha raquëhit si na.

¿Tsohuë nit toa oquë cato?

Mateo 18.1-5; Lucas 9.46-48

³³ Jatsi Capernaum yaca qui ja cahëcaniquë. Xobo qui jicoxo tsi quilha Jesú jahuë rabëti bo nicaniquë:

—Bahí bohopama tsi ¿jahuë yoati tsi joi mëranahit ma iquit? —iquiina.

³⁴ Jatsi ja bëpacaniquë, yoacasyamaquí na. Ja bërabicani quilha jato xërëquë ca oquë ca iquit ca yoati tsi chaninahit ja icanit quëshpit na. ³⁵ Jatsi Jesu tsahoniquë. Tsahoxo tsi quilha jahuë doce ca rabëti bo ja quënaniquë. Chanihit si,

—Ja cho ixëti quilha tsohuëcara ca rëquë icatsait cato. Jatiroha cabo ja mëbixëti xo —i jato qui Jesu niquë.

³⁶ Jatsi baquë pistia jato nëpax tsi Jesú jananiquë. Baquë icohax ja rëtsaniquë. Chanihit si,

³⁷ —Jabit ëa joihuahit quilha tsohuëcara ca noho janë tsi nëca ca baquë joihuahait cato. Jasca, ëa raanish ca rit joihuahit quilha ëa joihuahait cato ra —i jahuë rabëti bo qui Jesu niquë.

Jesu rabëti yoi bo

Lucas 9.49-50

³⁸ Jatsi Juan chaniniquë:

—Mit janë tsi yoshi natsëcahait ca jonit no jisitaquë ra. “Ayamahuë ra” it ja qui nit itaquë; noba maxo quirimait ja iquit iquit na —iquiina.

³⁹ Jatsi,

—Toa jënëyamacana —i it ja qui Jesu niquë—. Ea ocahuatimaxënit tsi xo toa noho janë tsi jistit acait cato ra. ⁴⁰ Noba rabëti tsi xo toa noqui pasomahamait cato iquia. ⁴¹ Mato parayamaquia. Copihacaxëhit quilha chahahuacanaibo mëbihait cato ra, ëa iquit tsi jënëpaxa rohait jato qui ja aquë nit.

Jochatit tanamahacahaina

Mateo 18.6-9; Lucas 17.1-2

⁴² Jabit jia tsi ë qui chitimicani quilha naa xocobo mishnit bo. Japit noitirixëhit quilha nëca ca chahahuabëna cabo ë quimait bësomahait cato ra. Anomariaxëhit quilha jahuë copit ra. Ja acait quëshpit tsi tërotamë ca rënëti maxax yalit nëmit ca ita qui ja niahacait xo iquia. Jama, oquërit ca copit bixëhit quilha ra, ja aca ca yoit ca quëshpit na. ⁴³ Mato mëquënë pit mato jochamacasno tsi mërëësicahuë. Oquë tsi xo toa mërëxto tsi nit qui cahainait. Noitirit tsi xo toa tënëtiyait qui niahacahainait mëquë yalit. ⁴⁴ Nocatimaxënit tsi xo toa tënëtiyait chihit ra. ⁴⁵ Jasca, yoit ca qui mato tahë pit mato bono tsi jorëësicahuë. Oquë tsi xo toa jorëxto tsi nit qui cahainait. Noitirit tsi xo toa tënëtiyait qui cahainait tahë yalit. ⁴⁶ Nocatimaxënit tsi xo toa tënëtiyait chihit ra. ⁴⁷ Jochait quirit pit mato bëró mato bësomano tsi bëtsëquëcahuë. Oquë tsi xo Diós othait ca qui huëstit

ca bëro ya roha jicohaina. Noitiria tsi xo toa rabë ca bëro ya tënëtiya qui niahacahaina ra. ⁴⁸ Nocatimaxëni tsi xo toa tënëtiya chihira ra.

⁴⁹ ‘Tënëhai cató tsi rohahuahacaxëti xo jatiroha cabo. ⁵⁰ Chopara jia ca jascariacana. Jia tsi xo chopará tēēhuahaina. Jama, jahuë tēē bēnopiqui tsi çjēnahuariaxo ja tēēhuana? —nēa tsi Jesu nēcāniquē nohiria bo tiisimahi na.

10

Ahui niahai yoati tsi Jesú tiisimanina

Mateo 19.1-12; Lucas 16.18

¹ Jatsi toa ax riquiquiria tsi, jodioba mai qui Jesu caniquë, naa Jordán rabëquëx cato. Ani Jordan ja shitaquë tsi quiha ja qui nohiria misco quëtšotëquëniquë. Jatsi tiisimatsi Jesú huaniquë. Jahuë jabi quiha.

² Jatsi ja qui huësti huësti ca jodioba chama bo bēcāniquë tanamaxëna. Ja qui joi mērātsijahuacani quiha. Jatsi,

—¿Anoma ni joní jahuë ahui niahaina? —i Jesu qui jaca niquë, ja qui quēsocascani na.

³ Quëbihi tsi,

—¿Jēni Moisés ni? ¿Jahuë yoba mato qui ja ani? —i jato qui ja niquë.

⁴ Jatsi jodioba chama bá quëbiniquë:

—Moisés qui jēnima ja ini quiha. Jariapari tsi quiha ahui niati papi joni ja huishamani quiha ahui mēati. Ahui qui toa papi mēajahuāquë tsi quiha jēnima Moisés qui ini quiha toa jahuë ahui joní niahaina ra —i Jesu qui jaca niquë.

⁵ Jatsi,

—Majia —i Jesu niquë—. Mato jochahuaxëni ca quēstoria ca shina iqui tsi toa yoba mato qui Moisés yamabá ani quiha ra. ⁶ Dios quinia ma xo toa ahui niahaina ra. Jariapari tsi quiha joni, yoxa, tihí cabo Diós nēhohuaniquë racanabëquiti. ⁷ Ja tsi xo toa jahuë jahëpa, jahuë jahëhua, tihí cabo jisbayahi quiha joni, jahuë ahui qui riiti. (Jasca, jahuë nabo jisbayahi quiha yoxa ri, jahuë bënë qui riiti.) Jatsi racanabëquicani quiha. ⁸ Toca tsi huëstinacani quiha dos cabo, naa ahui bënë tēquëta. ⁹ Jabi Diós racanabëquimaha ca nohiria bá bēquëxyamano ra —nēa tsi jodioba chama bo qui Jesu nēcāniquë.

¹⁰ Jatsi xobo qui jicoxo tsi quiha jahuë rabëti bá Jesu nīcatēquëniquë, naa joní ahui niahai ca yoati na. ¹¹ Quëbihi tsi,

—Jahuë ahui pi niaquí tsi ahui pasomaha jochahi quiha joni, ahui paxa ca ja biquë no. ¹² Jascaria jahuë bënë pi niaquí tsi ja pasomaha jochahi quiha yoxa ri, bënë paxa ca ja biquë no —i jato qui Jesu niquë.

Xocobo mishni bo Jesú shomahuanina

Mateo 19.13-15; Lucas 18.15-17

¹³ Huësti huësti ca nohiria bá jato xocobo Jesu qui bēniquë, jato ja shomahuano iquish na. Jama, jato nabo raahatsi jahuë rabëti bá huaniquë pë.

¹⁴ Jatsi jato ja raahacahai ca jisi tsi quiha jahuë rabëti bo qui Jesu caxaniquë. Chanihí tsi,

—Nēri è qui xocobo bēcāno ra. Jato chitiyamacana. Nēca cabo otocatsi quiha Dios. Ja qui jia quiha. ¹⁵ Mato parayamaquia. Bēroria tsi Diós jato othai ca bichi quiha xocobo ra. Jabi xocobo jascaria pi Diós othai ca biyamahi tsi Diós othai ca qui jicoyamaxëhi quiha mato ra —i nohiria bo qui Jesu niquë.

¹⁶ Jatsi xocobo icoxo tsi jato ja shomahuaniquë. Jahuë mēquë jato ó tsi ja janani quiha.

Rico ca ya Jesu chaninina
Mateo 19.16-30; Lucas 18.18-30

¹⁷ Bahí tsi Jesu cano tsi quiha ja qui joni jabaniquë. Ja bësojó tsi ja mëniquë. Mënihax ja chaniniquë:

—¿Jënahuaxëhi ni ëa ra, Maestro jiaxëni cató, bëso-bësopaaxëti? —iquiina.

¹⁸ Jatsi Jesu ja qui chaniniquë:

—¿“Jiaxëni cató” ëa mi quënahä pa? Yama tsi xo jiaxëni cato ra. Ja huësti ca tsi xo Dios. ¹⁹ Jabi Moisés yoba bo cahëqui mia tonia. “Nohiria ayamahuë” ii quiha. Jasca, “Joni huëtsa ahui biyamahuë; yomayamahuë; quiayamahuë; parayamahuë; mi ipa, mi ihua, tihí cabo noiuhë,” tihí ca tsi ï quiha jahuë yoba —nëa tsi Jesu nëcaniquë joni qui.

²⁰ Jatsi,

—Toa yoba bo tëquë ë nicaquë xocobo xo rohari, Maestró —i Jesu qui joni niquë.

²¹ Jatsi noixo joni Jesú bëisniquë. Chanihi tsi,

—Huësti roha tsi xo toa mi naris-haina ati. Cata. Mi jahuëmishni bo tëquë iniahuë. Iniaxo toa parata noitiria cabo qui ahuë. Toca pi mi no tsi mana ca rico ca jahuë bo jayaxëqui mia naipá no. Jaquirëquë johuë. Ea mi banahuano ra —i joni qui Jesu niquë.

²² Jatsi joni cohuënaniquë Jesú yoaha ca nicahax na. Cohuë tsi quiha ja bacaniquë, rico-ricoria ja iqui iqui na.

²³ Jatsi nëjo nëjo tsi quiha jahuë rabëti bo Jesú tsaya-tsayaniquë. Chanihi tsi,

—Bëronoma tsi xo toa rico ca joni Diós otoiha ca qui jicohaina ra —i jato qui ja niquë.

²⁴ Jatsi ratëniquë Jesu rabëti bo, ja yoani ca nicahax na. Jama, jari jasca pi Jesu chaniniquë:

—Bëroma tsi xo Diós otoiha ca qui jicohaina ra, noho xocobá. ²⁵ Jahuë chama yoi tsi bëronoma tsi xo Diós otoiha ca qui rico ca jicohaina iquia, naa sopiri quini camelló nacohai jascaria nori —nëa tsi jahuë rabëti bo qui Jesu nëcaniquë.

²⁶ Jatsi ratëyorianiquë jahuë rabëti bo ja yoani ca nicahax na. Chaninahi tsi, —¿Yama tsi xo toa xabahamahacati mëtsa cato rë? —i jaca niquë.

²⁷ Jatsi Jesú jato yoaniquë:

—Jabija. Jamë xabahamatimaxëni tsi xo nohiria. Dios roha tsi xo toa nohiria xabahamahaina. Jatiroha ca ati mëtsa xo ra —iquiina.

²⁸ Jatsi Pedró quëbiniquë,

—Tsayahuë. Jatiroha ca no jisbërianiquë mia banahuaxëna —iquiina.

²⁹ Jatsi,

—Mato parayamaquia —i Jesu niquë—. Copihacaxëhi quiha ëa banahuahai cato ra. Ea, xabahamati chani, tihí cabo iqui tsi jahuë xobo, jahuë xatë bo, jahuë jahëpa, jahuë jahëhua, jahuë ahui, jahuë xocobo, jahuë mai, tihí cabo pi jisbëriaquí tsi ³⁰ cien ca veces huino bixëqui ëa banahuahai cato, jaboqui bësohi na. Xobo bo, xatë bo, jahëhua bo, xocobo, mai bo, tihí cabo bixëhi quiha tënëpiquí na. Jasca, mana ca copi bixëhi quiha bësoti paxa ca tsëquëxëquë no. Jatsi bëso-bësopaaxëqui toa. ³¹ Jishopë. Toa barí tsi jachoxëhi quiha huëstima ca jaboqui rëquë cabo. Jasca, rëquëxëhi quiha huëstima ca jaboqui jacho cabo.

Jesu chaninina ja nahai yoati na
Mateo 20.17-19; Lucas 18.31-34

³² Jerusalén qui jahuë rabëti bo ya capama tsi quiha jato bëbo Jesu cohi iniquë. Shina-huëjë jahuë rabëti bo ini quiha. Jasca, shina-huëjëni quiha

bachai ca nohiria bo ri. Capama tsi quiha jahuë rabëti bo ya roha Jesu chanicaniquë ja rësoxëhai ca yoati na. Chaníhi tsi,

³³—Nicapa. Jerusalén qui caqui noa rë. Toa xo tsi arati iboba chama bo, yoba tiisimacanaibo, tihí cabo qui mëahacaxëquia rë. Jatsi ë qui quësocaxëcani quiha, “Namëhacati xo” iquiina. Jaquirëquë ë qui quësoso tsi carayanabo qui ëa mëacaxëcani quiha acacati. ³⁴Jatsi ëa mahuacaxëcani quiha naa carayanabo. Rispichí tsi ëa rashacaxëcani quiha. Rashaxo tsi ëa namëcaxëcani quiha. Jama, tres bari quirëquë bësotëquëxëquia ra —i jahuë rabëti bo qui Jesu niquë.

Jacobo, Juan, tihí cabá bënánina

Mateo 20.20-28

³⁵Jatsi Jesu qui Juan, Jacobo, tihí cabo bëcániquë, naa Zebedeo baquë bo.

—Tobi jahuëcara ca no bax mi ano ra, Taitá —i Jesu qui jaca niquë.

³⁶Jatsi,

—¿Jahuë mato bax axëhi ni ëa? —i Jesu niquë.

³⁷Jatsi Jesu ja quëbicaniquë:

—Mana xo tsi mi yonano tsi mia tapái tsi tsahocasqui noa, huësti ca mi mëncayá no, huëtsa mi mëxojó no —iquiina.

³⁸Jatsi Jesú quëbiniquë:

—Ma bënahai ca cahëyamaqui mato ra. ¿Tënëti mëtsa ni mato ra, naa ë tënëmahacapäimaria ca jascaria? Anomariaxëhi quiha noho cohuë. Jasca, anomariaxëhi quiha ë tënëhaina ra —i jato qui Jesu niquë.

³⁹Jatsi,

—Jaahuë. Mia jascaria tsi tënëti mëtsa xo noa ra —i Jesu qui jaca niquë.

Jatsi,

—Tënë-tënëxëqui mato ra, naa ë tënëmahaca-xëhai jascaria. ⁴⁰Jama, noho mëncayá ca tsahoti, noho mëxojó ca tsahoti, tihí cabo mato qui ati mëtsama xo ëa ra. Dios tsi xo toa tsahoti bo acai cato. Ja shomahuaha cabo qui axëhi quiha ra —i jato qui Jesu niquë.

⁴¹Jabi jaha ja quëëcana ca nicahax Jacobo, Juan, tihí cabo qui jahuë rabëti bo tëxëbo caxaniquë. ⁴²Japi Jesú jato catianiquë jato qui chanixëna.

—¿Jato nohiria yonamisyamayamacahi ní país ca chama bo rë? Chama jayaca xo jato nohiria yonariati ra. ⁴³Anoma tsi xo toa ja yonamiscanaina; jama, ma tocayamaxëti xo ra. Mato yonati pari ixëti quiha mato ó ca chama manëcatsai cato ra. ⁴⁴Yonati manëxëti xo toa nohiria bo rëquënicatsai cato. Jatiroha cabo ja mëbixëti xo iquia. ⁴⁵Jabi mai qui ë joyamaniquë mëbihacati; jama, nohiria bo mëbiti nori. Jabi ëmë aquia nohiria bo bax nati, jocha quima huëstima ca nohiria paquëmaxëna —nëa tsi Jesu nëcániquë.

Bëco ca inish ca Bartimeo Jesú jënimahuanina

Mateo 20.29-34; Lucas 18.35-43

⁴⁶Jatsi Jericó icanai ca yaca qui ja cahëcániquë. Ja riquicano tsi quiha nohiria misco banahuahi iniquë. Jabi toá tsi naa bahi tapái quiha Bartimeo, naa Timoteo baquë tsaho iniquë. Bëco ja ini quiha. Toa xo tsi parata bënahi ja iniquë. ⁴⁷Jesu tarabihai ca nicaquí tsi quiha quënantsijahuaniquë. Joi pistiamá tsi quiha,

—Ea shinahuë, David yamaba Baquë Jesú —i ja niquë.

⁴⁸Jatsi raahatsi nohiria bá huaniquë;

—Pasihuë, pasihuë —iquiina.

Jatsi oquë tsi ja quëna-quënaniquë:

—Ea shinahuë ra, David yamaba Baquë —iquiina.

⁴⁹ Jatsi Jesu niiniquë. Niihax,
—“Nëri johuë” i ja qui cana —i Jesu niquë.

Japi bëco ca ja quënacaniquë.

—Chamahuë. Joihuë. Mia quënahi quiha —i ja qui jaca niquë.

⁵⁰ Jatsi jahuë capa, naa pocho jasca ca niahax ja niiniquë. Niihax Jesu qui ja joniquë.

⁵¹ Jatsi,

—¿Jënahuaxëhi ni ëa mi bax na? —i ja qui Jesu niquë.

—Taistëquëcasquia ra —i bëco ca niquë.

⁵² Jatsi,

—Cata. E qui mi chitimihai iqui tsi taisqui mia iquia —i ja qui Jesu niquë.

Jatsi taistapiniquë joni. Bahí tsi Jesu ja banahuaniquë jaa ri.

11

Jerusalén qui Jesu jiconina

Mateo 21.1-11; Lucas 19.28-40; Juan 12.12-19

¹ Jabi yaca Betfagé, yaca Betania, naa Maca Olivo Ya quiri bëso ca yaca qui cahëpama tsi quiha rëquë dos ca rabëti bo Jesús raaniquë. Jerusalén basima ja icani quiha. ² Jato raanox pari tsi quiha jato ja yobaniquë:

—Mato bëbo ca yaca qui jicocana. Jicoxo tsi nëxë ca burro jixëqui mato, naa masohuahama ca burro quiha. Mëriscana. Mërisxo tsi nëri bëcahuë. ³ Jabi, “¿Jënixo tsi burro mëriscanai?” i tsohuëcara pi no tsi “Bicatsi quiha Ibo. Tanaxo tsi jahari raaxëhi quiha” i jato qui cana —nëa tsi Jesu nëcaniquë jato raanox pari.

⁴ Jatsi ja bocaniquë. Bahí ca burro baquë ja tsayacaniquë. Nëxë ja ini quiha. ⁵ Mërisjahuacano tsi quiha,

—¿Jënahuaruqui burro baquë mëriscanai ra? —i jato qui toá ca nii ca joni bo niquë.

⁶ Jatsi joni bo ja quëbicaniquë, naa Jesús yoaha ca jato yoahahi na. Jatsi,

—Bicahuë —i jaca niquë.

⁷ Jatsi Jesu qui burro baquë ja bëcaniquë. Bëxo tsi quiha jato sahuëti bo ja capohuëcaniquë. Jatsi burro catcha Jesu tsahoniquë. ⁸ Jatsi rëquë huëstima ca nohiria bá jato sahuëti bo poohabonaniquë bahí no. Jasca, mëshi bo nohiria huëtsa bá quëësaniquë bahí tsi poohaxëna.

⁹ Jatsi quënatsi rëquë bocanaibo, ja cho bocanaibo, tihi cabá huaniquë. —Joihuacana ra.

Shomahuahaca ca tsi xo naa Iboja janë tsi johai cato ra.

¹⁰ Shomahuaha ca tsi xo noba chama David yamaha chamá tsi johai cato.

Jia tsi ja yonano ra.

Naipá cabá oahuano ra —nëa tsi nohiria bo nëcaniquë.

¹¹ Toca tsi Jerusalén qui Jesu jiconiquë. Jicohax templo qui Jesu caniquë, naa jodioba arati xobo-xoboria. Jicohax ja nëjo nëjo taisniquë, jatirohá ca tsayahi na. Tsayahax Betania qui ja caniquë, jahuë rabëti bo ya. Caniquë bari ra.

Bimiyamahai ca higuera jihui Jesús yoshihuanina

Mateo 21.18-19

¹² Huëaquë Betania ax riquiquiria tsi quiha paxnahi Jesu iniquë. ¹³ Bacapama tsi quiha ori pistia ca higuera bimi jihui ja jisniquë. Japi jihui qui ja caniquë bimi mëraxëna. Yama quiha, jahuë pëhi roha. Jari bimitiya ma quiha. ¹⁴ Jatsi higuera jihui qui ja chaniniquë pa:

—Mi bimi pitëquëpistiayamariaxëhi quiha nohiria ra —i jihui quiina.

Jabi ja yoaha ca jahuë rabëti bá nicaniquë.

Templo ca iniacanaibo Jesú jabamanina
Mateo 21.12-17; Lucas 19.45-48; Juan 2.13-22

¹⁵Jerusalén qui cahëhax templo, naa jodioba arati xobo-xoboria qui Jesu jiconiquë. Jicoxo tsi quiha cache toá ca iniacanaibo raatsijahuaniquë. Raaqui tsi quiha parata rarinamacanaiba mesa bo ja narabaniquë. Boto iniacanaibo tsahoti bo ja pacamaniquë. ¹⁶Jasca, nohiria, naa jato jahuëmishni bo iniacanaibo ja quëtianiquë, templo qui ja nacoyamacano iquish na. Tih tsi ja ani quiha ra. ¹⁷Jaquirëquë jato ja tiisimaniquë. Tiisimahi tsi,

—“Bëhoxti xobo quënahacati xo noho xobo” çiyamayamahi ni Quënëhacanish cabo? “Nëá tsi bëhoxti quiha jatiroha ca pais ca nohiria” ii quiha. Jama, yomacanaiba iti Dios xobo manëmaqui mato pë —i jato qui Jesu niquë.

¹⁸Jatsi Jesú aca ca nicaxo tsi quiha jodioba chama bo Jesu qui tsamicasniquë, naa arati iboba chama bo, jato yoba yoacanaibo. Ja qui caxa ja icani quiha. Japi Jesu ati quinia mëratsijahuacaniquë. Jama, jari ja qui ja tsamiyamacani quiha nohiria misco iqui na. Jari nohiria qui jia Jesú tiisimahai ca ini quiha.

¹⁹Jatsi quiha yata yaca Jesú jisbayaniquë jahuë rabëti bo ya.

Janonish ca higuera jihui
Mateo 21.20-22

²⁰Huëaquë tsi bahí tsi bohopama tsi quiha higuera jihui ja jiscaniquë. Jano tëquë ja ini quiha; bëso yama. ²¹Jatsi Jesú yoahitaha ca Pedró shinaniquë. Shinahax,

—Tsayapa, Maestró. Naquë mi yoshihuahitaha ca jihui ra —i Jesu qui Pedro niquë.

²²Jatsi quiha Jesú jato quëbiniquë:

—Dios qui chitimicana. ²³Mato parayamaquia. Dios qui chitimiyoipihí tsi “Tsëquëhuë. Ia qui mimë niahacahuë” iti mëtsaxëqui mato naa maca qui. Chitimiyoipimano tsi mato qui nicaxëhi quiha macana ra. Ocapixëhi quiha mi yoahana iquia. ²⁴Ja tsi xo toa “Chitimiyoicana” mato qui iquia, ma bëhoxquë no. Chitimiquí tsi ma bënëhai ca bixëqui mato. ²⁵⁻²⁶Jasca, Dios qui bëhoxquí tsi mia ocahuahai cató aca ca shina-bënocana. Jato qui caxayamacana. Tocapimano tsi mato jocha shina-bënoxëqui Dios ri. Mato qui caxayamaxëqui —nëa tsi quiha jahuë rabëti bo qui Jesu nëcaniquë.

Jesu qui jodioba chama bo caxanina
Mateo 21.23-37; Lucas 20.1-8

²⁷Jatsi Jerusalén qui Jesu bacaniquë jahuë rabëti bo ya. Templo, naa jodioba arati xobo-xoboriá tsi ja cono tsi quiha ja qui jodioba chama bo bëcaniquë. Bëcani quiha arati iboba chama bo, jato yoba tiisimacanaibo, jodioba yosibo. ²⁸Bëxo tsi quiha Jesu ja nicacaniquë:

—çTsohuë mi qui chama aquitaha, templo quima iniacanaibo cache niati pë? —i ja qui jaca niquë.

²⁹Jatsi Jesú jato quëbiniquë:

—Mato nicapariquia ëa ri. Ea pi ma quëbino tsi ë qui toca ca ati chama anish ca mato yoaxëquia. ³⁰Jatsi, çtsohuë Juan yamabo qui chama ani, jahuë yonoco ati? çDios ni? çJoni ni? Toa nicaquia ra —i jato qui ja niquë.

³¹Jatsi joi i-ibëquitsijacaniquë:

—çJënihi ni noa rë? “Dios” ipinono tsi jatsi “çJënixo tsi Juan yamabo ma chahuayamani?” i noqui xëhi quiha pë. ³²Jasca, çJëniyahax raca “Joni” i nona rë? —nëa tsi quiha ja nëcaniquë chaninahi na.

Nohiria bo qui ja raquëcani quiha, “Dios Chani yoati ibo Juan yamabo iniquë nori” i nohiria bo ni quëshpi na. ³³Ja quëshpi tsi,
—Cahëyamaqui noa —i jaca niquë quëbïhi na.

Jatsi,

—E qui toca ca ati chama anish ca mato yoayamaxëquia ëa ri —i jato qui Jesu niquë.

12

Dios Baquë jodiobá niahaina

Mateo 21.33-46; Lucas 20.9-19

¹Jatsi chani huëtsa Jesú yoaniquë nohiria bo tiisimaquí na. Jahuë jabi quiha. Ja nëcaniquë:

—Huai joní ani quiha. Axo tsi quiha toa xo uva icanai ca bimi ja bananiquë. Jaquirëquë tëamë ca panë ja aniquë. Jatsi maxaxá ca trapichi ja aniquë jënëria ati. Axo tsi quiha jaha bësoti xobo ja aniquë, naa torre icanai cato.

‘Jaquirëquë joni huëtsa bo qui jahuë huai ja aquëniquë bimi xatë quëshpi na. Aquëhax jahari xobo qui ja cani quiha. ²Jatsi tésatiya tsëquëquë tsi quiha jahuë huaí ca yonococanaibo qui jahuë yonati ja raaniquë, jahuë bimi xatë biti. ³Jama, ja cahëquë tsi quiha jahuë yonati qui ja tsamicaniquë pë. Tsamixo jahuë yonati ja sëtianani quiha. Sëtiahax tsi quiha mëquëya jahari jahuë yonati ja raacani quiha. ⁴Jatsi quiha yonati huëtsa ibobá raaniquë. Ja macoashacani quiha. Bërabihuajahuacani quiha. ⁵Jatsi yonati huëtsa ibobá raaniquë. Toa yonati ja acaniquë. Huëtsa bo ja raaquë tsi quiha ja jascapijahuacaniquë. Huësti huësti ca ja sëtianani quiha. Huëtsa bo ja tēpascani quiha.

⁶Jama, tobi ini quiha huësti ca raahama cato ra; naa jahuë baquë yoi quiha. Jabi jahuë baquë ja noini quiha. Jarohari tsi jahuë baquë yoi ja raaniquë, “Noho baquë yoi roha chahahuacaxëcani quiha tonia” iquiina.

⁷Jama, jahuë baquë jisi tsi, “Iboba baquë tsi xo naa johaina ra. ¿Ai canomani? Axo jahuë huai ibohuaxëqui noa ra” i jaca ni quiha. ⁸Jatsi baquë qui tsamixo tsi quiha ja acaniquë. Axo tsi quiha jahuë huai cacha jahuë yora ja niacaniquë.

⁹Jatsi toa cabo Jesú nicaniquë:

—¿Jënahuaxëhi ni huaí ibo, joxo na? Joxo tsi ¿toa joni bo ayamayamaxëhi ni? Axo tsi joni huëtsa bo qui jahuë huai aquëxëhi quiha ra. ¹⁰Jasca, ¿Quënehacanish cabo ó ca ma jisyamani naa yoati na?

“Oquënahëhi quiha yosibá niaha ca Maxaxa ra” ii quiha.

“Oquë-oquëria ca tsi manëxëhi quiha ra.

¹¹Díós aca ca tsi xo naa ra.

Noqui jia tsi xo toa ja acana” ii quiha.

¹²Jatsi jodioba chama bo Jesu qui tsamicasniquë, jato yoati tsi ja chaniha ca ja cahëcani quëshpi na. Jama, ja qui tsami-yamajacani quiha nohiria bo qui raquëhi na. Japi jibaya tsi quiha ja bocaniquë.

Impuesto bo gobierno qui acaina

Mateo 22.15-22; Lucas 20.20-26

¹³Jatsi jodioba chama bo, Herodes yonati bo, tihí cabo Jesu qui raahaniquë tanamati. Yoi ca chani ja amacasjahuacani quiha ja qui tsamixëna.

¹⁴Jatsi Jesu qui ja bëcaniquë. Chanipama tsi,

—Shina jiaxëni ca parayamahai ca joni tsi xo mia ra, maestró. Nohiria shinahai ca chahahuayamaqui mia. Mi qui jaharisi tsi xo nohiria tēquëta.

Dios quiniá roha tsi tiisimaqui mia. Japi mia nicacasqui noa: ¿Romanoba chama-chamaria qui impuesto bo no ati ni, naa noqui jodiobo? ¿Mi qui jia ni? ¿Jato qui axèhi ni noa ra? —i Jesu qui jaca niquè.

¹⁵ Jama, ja paracascanaì ca Jesú jisniquè. Ja tsi xo toa, —¿Jènixo tsi èa tanamacascanaì ra? Parata nèri bècahuè. Jiscasquia —i jato qui Jesu niquè.

¹⁶ Jatsi parata ja qui ja bècaniquè. Jatsi, —¿Tsohuè bèmana jaya ni naa parata ra? ¿Tsohuè ni naa janè ibo? —i jato qui Jesu niquè.

Jatsi,

—Romanoba chama-chamaria bá-na —i jaca niquè.

¹⁷ Jatsi,

—Romanoba chama-chamaria quiha jahuè jahuè bo tèquè acana. Jasca, Dios qui jahuè jahuè yoi bo acahuè —nèa tsi jato qui Jesu nècaniquè.

Jatsi ja ratècaniquè ja yoahaha ca qui.

Bèsotèquèxèhi ni nohiria

Mateo 22.23-33; Lucas 20.27-40

¹⁸ Jatsi Jesu jisi bocaniquè maxo huètsa, naa saduceobo icanai cabo. “Yama tsi xo nohiria bèsotèquèhaina” inish ca maxo tsi xo naa. Jesu ja nicacanicuè jato ri tanamaxèna.

¹⁹ —“Baquè bo yama pi joni rèsone tsi jahuè ahui bixèti xo jahuè noma. Bixo tsi jahuè rèquèmè bax xocobo ja saihuati xo” i Moisés yamabo ni quiha, Maestró. ²⁰ Jabi seis ca noma ba jayapaoni quiha joni. Jatsi ahui naa joni bini quiha. Jatsi xocobo yama tsi ja rèsonequè. ²¹ Ja rèsonequè tsi quiha jahuè xachacató jahuè ahui biniquè, ja bax xocobo saihuaxèna. Xocobo saihuahaxma tsi quiha ja rèsonequè jaa ri. Jaquirèquè jahuè nomá jahuè ahui biniquè. Xocobo saihuahaxma tsi quiha ja rèsonequè jaa ri. Toca tsi jahuè noma bo tèquétá toa jasca ca yoxa bini quiha ahui iti. ²² Xocobo ja saihuapistia-yamariacani quiha. Jarohari tsi quiha rèsonequè yoxa ri. ²³ Jabi nohiria bo bèsotèquèno tsi ¿tsohuè ahui ixèhi ni naa yoxa sa? Siete ca bènè ja jayani quiha bèsonequè na —nèa tsi quiha Jesu qui ja nècanicuè tanamaxèna.

²⁴ Jatsi Jesú jato quèbiniquè:

—Janyama xo mato ra, Quènèhacanish cabo, Dios chama, tihi cabo ma cahèyamahai iqui na. ²⁵ Jabi Diós nohiria bèsotèquèmano tsi naipá ca ángel bo jascaria icaxècane quiha ra. Ahui bo, bènè bo biyamacaxècane quiha.

²⁶ Jabi, “Bèsotèquèxèhi quiha nohiria” ¿ii ni mato sa? ¿Tonia Moisés yamabá quènèni ca ma jis yama-yamani, naa mèshohai ca pètoro ó ca Dios chanini ca ja quènèni cató no? Toca tsi Moisés qui Diós yoani ca quènèhacane quiha. “Abraham, Isaac, Jacob, tihi cabá-na Dios ca èa xo naa ra” i Moisés qui Dios ni quiha. Jabi “Abraham yamabo, Isaac yamabo, Jacob yamabo,” iyama ja ni quiha ra, bèsonequè jaca nori iqui na. ²⁷ Bèsonequè cabo Dios ma xo Dios ra; jama, bèsonequè na nori. Japi janyama xo mato ra —nèa tsi Jesu nècanicuè jato qui, naa “Bèsotèquèyamaxèhi quiha nohiria” inish cabo qui.

Oquè-oquèria ca yoba

Mateo 22.34-40

²⁸ Jabi toá tsi nii quiha maestro iniquè, naa jodioba yoba tiisimahai cato. Saduceobo ya Jesu chaninahai ca ja nicane quiha. Jasca, jia tsi quiha Jesú jato quèbini ca ja jisni quiha. Jisi tsi Jesu qui ja joniquè jaa ri nicaxèna.

—¿Jèni ca yoba ni toa oquè-oquèria cato sa? —i Jesu qui ja niquè.

²⁹ Jatsi quiha Jesú quèbiniquè:

—Oquëria ca yoba tsi xo naa, Israel cabá. Nicacahuë. Huësti roha tsi xo nohiria ba Ibo ra. Noba Ibo Dios qui no arahai ca tsi xo naa ra. ³⁰ Jatsi mato joiti tēquëta, mato shina tēquëta, mato coshi tēquëta, tihi cabá tsi mato Ibo Dios yoi ma noiti xo iquia. ³¹ Jaquirëquë tobi yoba huëtsa. Oquëria ca yoba tsi xo toa ri. Mabë xatë yoi bo ri ma noixëti xo, mamë ma noihai jascaria. Jabi yama tsi xo toa naa dos ca yoba bo oquë cato ra —nëa tsi Jesu nëcaniquë naa maestro qui.

³² Jatsi jodioba yoba tiisimahi ca joní quëbiniquë:

—Jia tsi xo toa mi yoahana, Maestró. Jabija tsi xo. Yama tsi xo Dios huëtsa. Ja huësti ca tsi xo Ibo Dios ra. ³³ Jabija ra. Jasca, noba joiti tēquëta, noba shina tēquëta, noba coshi tēquëta, tihi cabá tsi Dios no noixëti xo. Jasca, nobë xatë yoi bo no noixëti xo ra. Yama tsi xo toa dos ca yoba oquë cato ra. Dios qui altar ó ca yohina no mēshahaina, jahuëcara huëtsa Dios qui no acaina, tihi cabo no acai ca oquë-oquëria tsi xo toa dos ca yoba no nicahaina ra —nëa tsi quiha Jesu qui joni nëcaniquë.

³⁴ Jabi jia tsi toa joní quëbini quiha. Nicahax,

—Diós otohax ca qui basima xo mia ra —i ja qui Jesu niquë.

Jaquirëquë nohiria bá Jesu nicacasyamani quiha ja qui raquëquí na.

David yamaba Ibo Cristo inina

Mateo 22.41-46; Lucas 20.41-44

³⁵ Arati xobo-xoboria xo tsi tiisimapama tsi quiha Jesú nohiria bo nicaniquë:

—“David yamaba चाहितखोकोबो ixëti xo Cristo, naa nohiria bo Xabamati Ibo” ¿iyamayamacahi ni mato yoba tiisimacanaibo? ¿Jënihax tocacahi ni? ³⁶ Espíritu Santo rëamëhax tsi ¿David yamabo nëcayamayamani?

“ ‘Mia oquëhuanox pari tsi,

jariapari mia pasomaha cabo bëboxëquia,

jato mi yonano’ i noho Ibo qui Dios ni quiha”

i David yamabo niquë pa. ³⁷ “Noho Ibo” ¿i David yamayamani, Cristo yoati tsi chanihi na? Jatsi, ¿jënahuahax jari jahuë चाहितखोकोबो ii ni ra? —nëa tsi Jesu nëcaniquë, jato nicahi na.

Yoba tiisimacanaibo pasomaha Jesú chaninina

Mateo 23.1-36; Lucas 20.45-47

Jabi tobi quiha huëstima ca nohiria mani iniquë. Ja rani-ranicanicuë jahuë chani nicahax na. ³⁸ Jatsi jato tiisimatsi quiha Jesú huaniquë:

—Yoba tiisimacanaibo qui quiniacaxëcahuë. Jato sahuëti tëtëcaria bá tsi bohocani quiha pë. Nohiria bá jato joihua-joihuahai ca ó pasocani quiha ra nicaxëna. ³⁹ Jasca, nohiria bo oriquirequinapino tsi oquë-oquëria ca tsahoti bicascani quiha pë. Jasca, catiti xobo qui jicoxo tsi oquë ca tsahoti bo ó quëëcani quiha tsahoti. ⁴⁰ Jabi naa joni bo tsi xo toa imanish ca yoxa ba jahuë bo yomacanaibo ra. Yomapama tsi quiha nohiria bo bësojó tsi bëhox-bëhoxcani quiha pa. Anomariaxëhi quiha Diós jato copixëhaina iquia —nëa tsi quiha Jesu nëcaniquë.

Imanish cató Dios qui ofrenda anina

Lucas 21.1-4

⁴¹ Arati xobo tahë tsi tsahopama tsi quiha nohiria bá jato parata caji qui nanëhai ca Jesú tsaya-tsayaniquë. Bëcaniquë huëstima ca rico cabo jato parata axëna. Huëstima ca parata ja acani quiha. ⁴² Jatsi, noitiria ca bënë imanish ca yoxa joniquë. Joxo tsi quiha dos ca parata roha ja nanënicuë. Copiriama ca parata quiha. ⁴³ Tsayaxo tsi quiha jahuë rabëti bo Jesú quënaniquë.

—Anomaria tsi xo toa bënë imanish ca yoxá Dios qui acana ra. Jatiroha ca nohiria huëtsa bá aca ca oquë tsi xo toa ja acana iquia. ⁴⁴ Jari huëstima ca parata jayacaxo tēxē bo ra. Narisyamacani quiha. Pistia roha tsi xo toa ja acanana ra. Jama xo naa yoxa iquia. Jatiroha ca ja aquë ra; naa jahuë oriquiti copiti parata quiha —i jahuë rabëti bo qui Jesu niquë.

13

“Quëyohacaxëhi quiha jodioba arati xobo” i Jesu nina

Mateo 24.1-2; Lucas 21.5-6

¹ Arati xobo Jesú jisbayano tsi quiha ja qui chaniniquë jahuë rabëti huësti cato.

—Tsayapa, Maestró. Anomaria tsi xo naa xobo ra. Tio bo ria ca jahuë maxax bo ra —i Jesu qui ja niquë.

² Jatsi quiha Jesú quëbiniquë:

—Jabija. Naa xobo tsayacahuë. Jaboqui nii xo. Jama, potas-hacaxëhi quiha naa arati xobo tēquë iquia. Matsami matsami niyamaxëhi quiha huësti ca maxaxa ra —i Jesu niquë.

Xaba rëso jisti bo

Mateo 24.3-14; Lucas 21.7-19

³ Jabi arati xobo bëbo, naa Maca Olivo Ya tsi tsaho quiha Jesu iniquë. Tshojano tsi quiha Pedro, Jacobo, Juan, Andrés, tihi cabo ja qui bëcaniquë nicaxëna. Yama nohiria huëtsa jato bëta ini quiha. Jatsi,

⁴ —¿Jënixo tsi ocapixëhi ni naa mi yoahana rë? ¿Jahuë jisti jisxëhi ni noa ra naa mi yoaha ca jatiyoxëquë no? —i Jesu qui jaca niquë.

Jatsi Jesu nëcaniquë:

⁵ —Quiniacaxëcahuë, ma parahacayamano. ⁶ Jariapari tsi noho janë tsi bëcaxëcani quiha huëstima ca mahitsa ca joni bo. “Ea ti tsi xo nohiria bo Xabahamati Ibo-iboria” i nohiria bo qui xëhi quiha. Toca tsi huëstima ca nohiria bo paracaxëcani quiha.

⁷ Jatsi país ca nianahaina, nohiria huëtsa iquinacatsai ca chani, tihi cabo nicaxëqui mato. Nichahi tsi raquëyamacana. Ocapixëhi quiha ra. Jama, jari tobi jahuë rëso. ⁸ Jariapari huësti ca país pasomaha nianaxëhi quiha país huëtsa. Jasca, chama huëtsa pasomaha iquinaxëhi quiha chama huëtsa. Jasca, toatiyá tsi binicaxëcani quiha huëstima ca nohiria. Jasca, huëstima ití tsi yajoriaxëhi quiha mai. Jariapari ca nohiria bá tënëhai ca chitahë roha tsi xo naa ra, naa yoxá jahuë baquë comahai ca pahë jascaria.

⁹ Quiniacaxëcahuë. Mato qui tsamicaxëcani quiha. Tsamixo tsi policia bo qui mato bocaxëcani quiha quësoxëna. Jasca, catiti xobo xo tsi mato rshacaxëcani quiha. Jasca, chama bo, presidente bo, tihi cabo bësoj tsi niixëqui mato ëa iqui na. Jatsi jato qui Dios Chani ma yoaxëti xo. ¹⁰ Jasca, jatiroha ca nohiria qui yoahacaxëti xo Dios Chani. ¹¹ Jabi mato qui ja tsamipicano tsi policia bo qui mato ja bocano tsi jato qui ma chanixëti ca yoati shina-huëjënayamacana. Toa xaba tsëquëno tsi mato qui acacaxëhi quiha ma yoaxëti cato. Toatiyá tsi ma chanino tsi ma yoaxëti ca mato jismaxëhi quiha Espíritu Santo. Chaniamayoixëqui mato, Espíritu Santo nori. ¹² Toatiyá tsi jahuë xatë yoi mëaxëhi quiha huëtsa, namëhacati. Jasca, jahuë baquë pasomaha ixëhi quiha jahëpa ri. Jasca, jato nabo qui caxacaxëcani quiha xocobo ri. Caxaquí tsi chama bo qui jato nabo mëacaxëcani quiha namëhacati. ¹³ Ea tahëhax tsi mato qui caxayocaxëcani quiha nohiria tēquëta. Jama, xabahamahacaxëhi quiha jahuë rëso qui tënëyocanaibo, naa bamayamacanaibo.

*Quëras ca joni jisiquixëhaina**Mateo 24.15-28; Lucas 21.20-24*

¹⁴ “Toatiyá tsi “Quëyomixëñiria ca Yoixëni ca” jisxëqui mato ra. Raquëria ixëhi quiha. Jahuë iti ma tsi niixëhi quiha ra. Jabi naa quënëni ca tsayahai cató cahëno ra. Jatsi naa quëyomixëñiria ca yoixëni ca jisi tsi maca bo qui jabaxëti xo jodioba maí cabo. ¹⁵ Toatiyá tsi jato xobo qui jicoyamaxëti xo cacha ca nohiria, jato jahuë bo bixëna. Ja bamayamacano. ¹⁶ Jasca, jahuë sahuëti biti bacayamaxëti xo huaí ca yonocohai cato. Ja bamayamano. ¹⁷ Toatiyá tsi noitixëhi quiha tohoya ca yoxa bo, baquë pistia jaya cabo ri. ¹⁸ Dios qui bëhoxcana, matsitiyá tsi ja ocapiyamano iquish na. ¹⁹ Toatiyá tsi anomariaxëhi quiha nohiria bá tënëhaina. Mai nëhohuahacaquë rohari tsi nëca tsi tënëpistia-yamariani quiha nohiria bo ra. Toatiyá tsi oquë-oquëriaxëhi quiha naa nohiria bá tënë-tënëhaina. ²⁰ Jama, toa tënëti xaba Diós chitiyamaro-hapino tsi yama ca nohiria xabahamahacaquë aquë ra. Ja bini ca nohiria bo bax toa xaba chitixëhi quiha.

²¹ Jatsi, “Nëá xo noqui Xabahamati Ibo; toá xo ra” i tsohuëcara pi no tsi jato chahahuayamacahuë. ²² Toatiyá tsi jisiquixëhi quiha mahitsa ca xabahamati ibo bo. Jasca, jisiquixëhi quiha naa mahitsa ca Dios Chani yoacanaibo ri. Jisiquixo tsi jisti bo acaxëcani quiha pë, Diós bini ca nohiria bo paraxëna tonia. ²³ Jatsi quiniacaxëcahuë. Mato yobapariquia ja tocapinox pari.

*Nohiria Baquë johaina**Mateo 24.29-31; Lucas 21.25-28*²⁴ “Toatiyá tsi anomariaxëhi quiha toa tënëtiya ra.

Jaquirëquë tsëmonaxëhi quiha bari.

Jasca, huahuayamaxëhi quiha oxë.

²⁵ Nai ax paquëxëhi quiha naipá ca huishti bo.

Yajohacaxëhi quiha mai. ²⁶ Jatsi naipá tsi jisiquixëquia, naa Nohiria Baquë ë nori cato. Jatsi araxëhi quiha maí ca nohiria bo tëquëta. ²⁷ Jatsi jatiroha ca quinia, naa norte, sur, este, oeste, tihi cabo qui noho ángel bo raaxëquia. Toca tsi noho nohiria bo, naa ë bini cabo catiacaxëcani quiha.

*Higuera jihui jisti**Mateo 24.32-35; Lucas 21.29-33*

²⁸ Jabi higuera jihui jisti tsayano. Ja botoxno tsi basima xo oitiya; toa cahëqui mato. ²⁹ Jascaria, ë yoaha ca jahuë bo ocapiti chitahëno tsi basima tsi xo toa ë johaina. Joti basima xo ëa. ³⁰ Mato parayamaquia. Jabi naatiyá ca bësocanaibo rësonox pari no tsi ocapixëhi quiha ë yoahana. ³¹ Huinocaxëhi quiha naipa, mai, tihi cabo; jama, huinoca-pistiyamariaxëhi quiha noho Chani ra.

*Jesu johai ca hora**Mateo 24.36-44*

³² Jabi yama tsi xo toa ë joxëhai ca bari hora cahëhaina. Cahëyamahi quiha naipá ca ángel bo. Cahëyamaquia ëa ri, naa Dios Baquë ë nori cato. Toa bari cahëhi quiha Jahëpa Dios roha. ³³ Jatsi quiniacaxëcahuë. Jaha bësocahuë, mato ibo johai ca bari ma cahëyamahai quëshpi na. ³⁴ Jabi joni jahuë xobo qui bacahai ca jascaria tsi xo toa ë joxëhaina. Canox pari tsi çjahuë xobo ó jahuë yonati bo bësomayamaxëhi ni ibo? Jato yonoco yoi jaya xo jahuë yonati bo tëquëta. Jasca, “Caiti ó bësohuë” i quiha jahuë caiti obëso ca qui. ³⁵ Jatsi jaha ma bësocano mato ri. Ibo johai ca hora cahëyamaqui mato ra. çJëningo

cara ca tia? ¿Yata ma ni? ¿Baquichá ma ni? ¿Huëatisca ma ni? ¿Baquishmari ma ni? ³⁶ Mëri joquí tsi ma oxahai ca ja jisyamano ra. ³⁷ Ja tsi xo toa jaha bësocahuë. Bacaxëquia ra. “Jaha bësocahuë” iquia jatiroha cabo qui —nëa tsi Jesu nëcaniquë.

14

Jesu qui ja tsamicascanina

Mateo 26.1-5; Lucas 22.1-2; Juan 11.45-53

¹ Jabi tsëquëpaimaria tsi quiha jodioba pascua fiesta iniquë. Dos ca bari roha quiha. Toatiyá tsi levadura yama ca mapari ja pi-pipaocani quiha. ² Jasca, toatiyá tsi jodioba chama bo, naa arati ibo bo, yoba tiisimacanaibo, tihí cabo Jesu qui tsamicasniquë. Tsamicasquí tsi quinia mërahi quiha ja icaniquë Jesu ati.

—Fiesta no tsi achanoma quiha. Caxanaxëhi quiha yacatá ca nohiria rë —i quiha jaca niquë.

Perojomé tsi Jesu tahë ashimahacanina

Mateo 26.6-13; Juan 12.1-8

³ Jabi yaca Betaniá tsi quiha Jesu iniquë, naa bonohuaxëni ca Simón xobó no. Oriquijano tsi quiha ja qui yoxa joniquë. Alabastro icanai ca botella ja jayani quiha. Copixëneria ca perojome rëamë ca botella quiha. Joxo tsi quiha ja tërëjëhaniquë. Tërëjëhaxo tsi quiha Jesu mapo qui ja japaniquë. ⁴ Jatsi caxanatsi toá ca nohiria huësti huësti ca niquë tsayahax na.

—Jishopë. ⁵ Iniarohapixo tsi huëstima ca parata, naa huësti ca año sueldo no jayaquë aquë rë. Toa parata noitiria cabo qui ati no iquë aquë rë —i jaca niquë.

Jatsi yoxa ja raahacaniquë.

⁶ Jatsi,

—Iquë. Iquë. ¿Jënirixoxo tsi raahacani? Jiaria tsi xo toa ë bax ja acana ra.

⁷ Mato bëtarohaxëhi quiha noitiria cabo. Xaba huëstima ca jayaxo mato jato mëbiti. Jama, ëa ti tsi xo toa mato bëta naamayamahai cato. ⁸ Ati mëtsa iqui ca naa yoxá aquë ra. Jiaria quiha. Noho mapo qui perojome ja japaquë ra, maihuahacati noho yora shomahuaxëna. ⁹ Mato parayamaquia. Ja aca ca nicacaxëcani quiha maí ca nohiria bo tëquëta, naa Dios Chani yoahacahai cato xo na. Jatsi naa yoxa shinaxëhi quiha nohiria bo, nicaxo na —nëa tsi quiha Jesu nëcaniquë.

Chama bo qui Jesu Judás mëacasnina

Mateo 26.14-16; Lucas 22.3-6

¹⁰ Jatsi arati iboba chama bo qui Judas Iscariote, naa Jesu rabëti bo ó ca huësti ca caniquë jato qui mëacatsi na. ¹¹ Jahuë chani nicahax ranitsi quiha jodioba chamá bo ni quiha. Jatsi,

—Jesu quëshpi tsi parata mi qui axëqui noa —i jaca niquë ja qui.

Japi jato qui Jesu mëati xaba jia ca mëratsi quiha Judás huaniquë.

Pascua fiesta

Mateo 26.17-29; Lucas 22.7-23; Juan 13.21-30; 1 Corintios 11.23-26

¹² Jabi pascua fiesta chitahë ca barí tsi quiha oveja bo tēpas-hacani quiha nohiria ba jocha quëshpi na. Jatsi,

—¿Jahuënia tsi caxëhi ni noa sa, mi bax pascua oriquiti shomahuaxëna piti? —i quiha Jesu qui jahuë rabëti bo niquë.

¹³ Jatsi jahuë rabëti bo dos ca ja raaniquë. Raahax,

—Yaca qui bocata. Toá xo joni, naa chomó ca jënë bëhai cato. Toa xo tsi bëchaxëqui mato. Toa joni banahuacana. ¹⁴ Banahuahax jahuënia cara ca qui ja jicohai ca xobo ibo qui chanicana. “Noqui raaquë Maestro ra, naa shomahuahaca ca naquëtë jisti. ¿Jahuënia tsi pascua oriquiti pixëhi ni?” i ja qui cana. ¹⁵ Jatsi pistiama ca naquëtë mato jismaxëhi quiha xobo ibo, naa mesa, tsahoti bo, tihí cabo jaya cato. Toa xo tsi pascua oriquiti shomahuacana no bax na —i quiha jato qui Jesu niquë.

¹⁶ Jatsi quiha dos ca rabëti bo bocaniquë yaca qui. Ocapirijani quiha Jesú yoani jascaria. Xobo qui cahëxo tsi quiha oriquiti ja shomahuacaniquë.

¹⁷ Jatsi quiha yata, bari cacuë tsi quiha xobo qui Jesu cahëniquë jahuë rabëti bo ya. ¹⁸ Jatsi ja oriquicano tsi quiha Jesu chaniniquë:

—Mato parayamaquia ra. Jodioba chama bo qui ëa mëaxëhi quiha mato ó ca huësti cato rë, naa ë bëta oriquihai cato —i Jesu niquë.

¹⁹ Jatsi quiha ja cohuënananiquë:

—¿Tsohuë cara ni toa sa? Ea ma xo toa ra —i jaca niquë huësti huësti.

²⁰ Jatsi quiha Jesú quëbiniquë:

—E bëtaxo tsi pitëxti ca jahuë mapari nacombëquihai ca tsi xo toa ëa mëaxëhai cato rë. ²¹ Rësoxëquia Quënëhacanish cabá yoani jascaria, naa Nohiria Baquë ë nori cato. Jama, noiti-noitixëhi quiha toa jodioba chama bo qui ëa mëahai ca joni ra. Ja coyamarohapino tsi shoma ja iquë aquë rë —i Jesu niquë.

Jaroha ca shiati Jesú nëtohaina

²² Jatsi oriquipama tsi quiha mapari Jesú biniquë. Bixo tsi quiha “Gracias” i Dios qui ja niquë ja quëshpi na. Bëquëx-xo tsi quiha jato qui mapari ja aniquë piti. Jatsi,

—Bicahuë. Picahuë. Noho yora tsi xo naa —i jato qui ja niquë.

²³ Jatsi quiha copá ca jënë ja biniquë. Bichi tsi “Gracias” i ja niquë. Jatsi jënë jato qui ja aniquë. Ja ayocaniquë.

²⁴ Jatsi shiati acax Jesu nëcaniquë:

—Noho jimi tsi xo naa. Dios xabahamati quinia jisti quiha. Huëstima cabo bax japahacaxëhi quiha, jocha masati. ²⁵ Mato parayamaquia. Naa uva bimi jënë mato bëta xo atëquëpistiayamariaxëquia nëa mai xo na, Diós yonahai cato xo tsi ë atëquëxëquë rohari mana xo na, quinia paxá no —i quiha jato qui Jesu niquë.

“Jochati tanamahacaxëqui mato” i Jesu nina Mateo 26.30-35; Lucas 22.31-34; Juan 13.36-38

²⁶ Jatsi quiha ja quëquëcaniquë. Quëquëhax jisbaya tsi Maca Olivo Ya qui ja bocaniquë. ²⁷ Jatsi quiha jato qui Jesu chaniniquë:

—Naa baquichá tsi ë quima casoxëqui mato rë, “Oveja obëso ca tēpasmāxëquia. Pacanamahacaxëhi quiha jahuë oveja” i Quënëhacanish cabo ó tsi Dios ni quëshpi na. ²⁸ Jama, bësotëquëhax mato bëbo Galilea qui caxëquia —i quiha jahuë rabëti bo qui Jesu niquë.

²⁹ Jatsi Pedró quëbiniquë:

—Mi qui tēxë bo casomitsa. Jama, mi quima casopistiayamariahā ca ëa xo naa ra —iquiina.

³⁰ Jatsi Pedro qui Jesu chaniniquë:

—Mia parayamaquia. Naa baquichá tsi patiari bënë quëonox pari no tsi tres tsi “Jesu cahëyamaquia” ixëqui mia rë —iquiina.

³¹ Jatsi quiha Pedro yosaniquë:

—Mi bëta rësorohapihi tsi mi quima casopistiyamariaxëquia ra —i Pedro niquë.

Jatsi toca tsi chaniniquë Jesu rabëti bo tëquëta.

Getsemani tsi Jesu bëhoxnina

Mateo 26.36-46; Lucas 22.39-46

³² Jatsi Getsemani icanai ca qui Jesu caniquë jahuë rabëti bo ya. Cahax, —Nëá tshocana. Bëhoxpariquia ra —i quiha jato qui ja niquë.

³³ Jatsi Pedro, Jacobo, Juan, tihì cabo ja boniquë ja bëtati. Jatsi Jesu cohuënaniquë. Raquëtsijani quiha. Jatsi,

³⁴ —Cohuëria ca ëa xo naa ra. Rësoti basima xo ëa rë. E bëta bësocana ra —i quiha jato qui ja niquë.

³⁵ Jatsi ori pistia cahax Jesu mëniniquë. Mënihax bëhoxtsijaniquë. Jatsi jahëpa ja nica-nicaniquë tënëtiya ja nacomahacayamano iquish na.

³⁶ —Ea shinahuë, noho jahëpa-jahëpariá. Mi qui jia pi no tsi naa johai ca tënëtiya mëbihuë ra, ë tënëyamano. Jama, jaha ë quëehai ca mi ayamano; jama, mi shina roha mi ano ra —i quiha Jesu niquë bëhoxhi na.

³⁷ Bëhohax tsi quiha jahuë rabëti bo qui ja bacaniquë. Bacaxo tsi ja oxacanaì ca ja jisniquë.

—¿Huësti ca hora roha ë bëta bësoti mëtsa ma ni mato rë? ³⁸ Bësocana. Bëhoxcana, jochati ma tanamahacayamano ra. Jabija, mato shina tsi xo toa bëhoxcatsaina; jama, mato yora tsi xo chamayama rë —i quiha Pedro qui Jesu niquë.

³⁹ Jatsi Jesu catëquënikuë bëhox-xëna. Jasca ca ja bëhoxtëquënikuë.

⁴⁰ Bëhoxhax ja bacatëquënikuë. Oxahi ja icani ca ja jisniquë. Coshiria ini quiha jato bëro. Bërabiquì tsi quëbiti ja cahëyamacani quiha. ⁴¹ Tres tsi quiha toca tsi Jesu bacani quiha. Jarohari tsi,

—¿Jari oxacanaì? ¿Jari joi-joicanaì? Iquë ra. Tsëquëquë hora ra. Jochahuaxëni cabo qui mëhacapaimaria xo ëa, naa Nohiria Baquë ë nori cato.

⁴² Joicana. ¿Canomani? Tsayacapa. Nëbi johi quiha ëa mëacatsai ca joni rë —i quiha Jesu niquë.

Jesu qui soldado bo tsaminina

Mateo 26.47-56; Lucas 22.47-53; Juan 18.2-11

⁴³ Jabi jari ja chanino tsi quiha Judas jotapiniquë rë, naa doce ó ca huësti cato. Ja bëta bëcaniquë nohiria misco. Saipi bo, jihui bo, tihì cabo ja jayacani quiha. Jabi arati ibo bo, nohiria yosibo, tihì cabo ini quiha toa jato raati ibo bo ra. Jabi ja raahacacani quiha Jesu qui tsamiti. ⁴⁴ Jatsi quiha nohiria misco qui jisti Judás aniquë:

—Ma bicatsai ca joni tatsoxëquia ra. Toa joni qui tsamicaxëcahuë. Bicahuë. Jia tsi jaha bësocahuë —i jato qui Judas ni quiha.

⁴⁵ Jatsi jato iti qui cahëhax Jesu qui Judas catapiniquë. Cahax,

—“Maestró” i Jesu qui ja niquë joihuahi na.

Joihuaxo tsi quiha Jesu ja tatsoniquë. ⁴⁶ Jatsi Jesu qui joni bo tsaminiquë. Tsamixo tsi quiha achajahuacaniquë. ⁴⁷ Jatsi quiha Jesu tapai ca nii cató jahuë saipi tsëcaniquë. Tsëcaxo tsi quiha arati ibo-iboria yonati ja paxtianiquë, Jesu paxamacatsi na. ⁴⁸ Jatsi quiha jato qui Jesu chaniniquë:

—¿Saipi bo, tëpasti jihui bo, tihì cabo jaya ni mato pa? ¿Yomaxëni ca bichii jascaria ëa bichi bëcanaì pa? ⁴⁹ Jatiroha ca bari mato bëta ë i-ipaoyamëquë ra arati xobó no. Toa xo tsi ë tiisimano tsi ¿jënihax tsi ë qui ma tsamiyamamëta sa? Jama, jatihuahacaxëti xo Quënhëhacanish cabo ra —nëa tsi quiha jato qui Jesu nëcaniquë.

⁵⁰ Jatsi jahuë rabëti bo jabayoniquë raquëhi na. ⁵¹ Jama, huësti ca shi-napayó Jesu banahuaniquë. Sabana rabanaca ja ini quiha. Jatsi toa joni qui soldado bo tsamicasniquë jaa ri. ⁵² Ja tsamicaquë tsi quiha toa joni paxaniquë. Jahuë sabana niabëria tsi ja jabaniquë ra. Tsoboco ja ini quiha rë.

Jodioba chama bo bësojó Jesu niinina

Mateo 26.57-68; Lucas 22.54-55, 63-71; Juan 18.12-14, 19-24

⁵³ Jesu qui tsamixo tsi quiha jato arati ibo ba chama-chamaria qui Jesu ja bocaniquë. Toá tsi quiha mani iniquë jodioba yoba cahëxëni cabo. ⁵⁴ Jabi basi quiha Pedró banahuaniquë. Banahuahax chama xobo huënë qui ja jiconiquë. Jicohax tsi quiha toá ca jaha bësohai ca soldado bo ya ja tsahoniquë, chihí tsi yohohi na.

⁵⁵ Jatsi quiha arati ibo bo, nohiria yosibo, tihí cabá Jesu namëcasniquë pë. Ja tsi xo toa ja pasomaha ca joi ja mëracaniquë. Yama a ra. ⁵⁶ Jama, tobi huëstima ca quihuacanaibo iniquë, ja qui quësocatsi na. Jamëri jamëri ini quiha ja quiacanaina. Jaharisi iyamani quiha ja quësocanaina ra. ⁵⁷ Jarohapa tsi quiha dos ca joni niiniquë, mahitsa ja qui quësoxëna. Quiaxëni ca joni bo ja icani quiha.

⁵⁸ —“Dios arati xobo potasti mëtsa xo ëa ra” i ja ni quiha. Jatsi, “Jaquirëquë tres barí tsi naa xobo nimatëquëxëquia” i ja ni quiha pë —i yosibo qui toa joni bo niquë, Jesu qui quësohi na.

⁵⁹ Jama, jamëri jamëri naa dos ca joni bo quësohai iniquë ra. Jaharisi ma quiha ra.

⁶⁰ Jatsi quiha jato arati ibo ba chama-chamaria joiniquë naxërëquë no. Niixo tsi quiha Jesu ja nicaniquë:

—¿Jënihai naa jahuë bo yoati na? Mia pasomaha chanicani quiha ra. ¿Jato quëbicasyamahai? —i Jesu qui ja niquë.

⁶¹ Pasi quiha Jesu iniquë. Ja quëbiyamaniquë. Jatsi quiha arati ibo ba chama-chamaria nicatëquëniquë:

—¿Dios Baquë, naa johai ca Xabahamati Ibo ni mia ra? —i ja niquë.

⁶² Jatsi,

—Jaahuë. Ja tsi xo ëa ra —i Jesu niquë—. Jasca, chamaxëni ca Dios mënëcayá ca Nohiria Baquë tsaho ca jisxëqui mia ra. Naipá ca tsëmo bá tsi ja joxëhai ca jisxëqui mia ra —i ja qui Jesu niquë.

⁶³ Jatsi arati ibo ba chamá jahuë sahuëti jaraxaniquë caxaquí na. Jatsi,

—¿Jënirixao tsi ja qui quësocanaibo huëtsa bo no nicacasna? ⁶⁴ Dios ja ocahuaha ca ma nicaquë ra. ¿Jabaja ma ní? —i jato qui ja niquë.

Jatsi Jesu qui ja quësocaniquë, “Ja nati xo” iquiina.

⁶⁵ Jatsi quiha Jesu bëmana qui coshotsijacaniquë. Jatsi ja bëmapacaniquë raití no. Bëmapaxo tsi ja bëtoxacaniquë. Tocahi tsi,

—¿Tsohuë mia aca? —i ja qui jaca niquë pë.

Jatsi toá ca soldado bá sëtianiquë jato ri, bixo na.

Jesu quima Pedro bësonina

Mateo 26.69-75; Lucas 22.56-62; Juan 18.15-18, 25-29

⁶⁶ Xobo huënëni tsi Pedro niino tsi arati ibo chama yonati jiconiquë. Xotaco ja ini quiha. ⁶⁷ Jicoxo tsi quiha toá ca chihi tapái ca Pedro yohohai ca ja jisniquë. Bëis-hax tsi quiha,

—Naa Nazarét ca Jesu ya mi iquë mia ri —i Pedro qui ja niquë.

⁶⁸ Jatsi,

—Jesu cahëyamahai ca ëa xo naa ra. E joma toa mi yoahana ra —i Pedro niquë quiahi na.

⁶⁹ Quiahax tsi quiha Pedro huajaniquë caiti qui. Jatsi quiha xotacó Pedro tsayatëquëniquë, cache ja niiquë no. Tsayahax,

—Jesu rabëti tsi xo toa ra —i ja niquë toá ca mani cabo qui.

⁷⁰ Jatsi,

—Jahuë rabëti ma xo ëa ra —i Pedro tëquëniquë.

Jaquirëquë,

—Jabija. Jahuë rabëti xo mia. Galileá ca joni xo mia ra. Jamëri tsi xo mi joi, mi chanihaina ra —i Pedro qui toá ca manicanaibo niquë.

⁷¹ Jatsi ocahuatsi Pedró huaniquë rë.

—Jabija ca pi ë chaniyamrohano tsi Diós ëa copino ra. Parayamahai ca ëa xo naa. ¿Tsohuë cara ni naa Jesu imahaina ra? Toa joni cahëyamaquia —nëa tsi Pedro nëcaniquë rë.

⁷² Tocajaquë tsi quiha ja qui Jesús yoaha ca ja shinaniquë, naa “Dos tsi patiari quëonox parí no tsi tres tsi ‘Jesu cahëyamaquia’ ixëqui mia” i ja qui Jesu nina. Shinahax aratsijaniquë.

15

Pilato qui Jesu ja bocanina

Mateo 27.1-2, 11-14; Lucas 23.1-5; Juan 18.28-38

¹ Huëaticano tsi quiha arati ibo ba chama bo, nohiria yosibo, tihí cabo chaninaniquë Jesu namëti yoati na. Jesu ja namëcasni quiha pë. Jatsi quiha Jesu ja nëxacaniquë. Nëxaxo tsi quiha Pilato qui ja mëpijahuacaniquë. Mëpixo tsi quiha ja qui ja mëacaniquë namëhacati.

² Jatsi,

—¿Jodioba rey, naa chama-chamaria ni mia ra? —i quiha ja qui Pilato niquë nicañi na.

Jatsi quiha,

—Jaahuë —i Jesu niquë.

³ Jabi anomaria ini quiha toa ja qui arati ibo ba chama bo quësohaina ra. Mahitsa quiha. ⁴ Jatsi quiha Pilató nicatëquëniquë.

—¿Tsayahai? Huëstima tsi xo toa mi qui ja quësocanaina rë. ¿Jato quëbiyamahai pa? —iquiina.

⁵ Quëbicasyamaniquë Jesu ra. Jatsi quiha Pilato ratëniquë.

Nati Jesu copihacanina

Mateo 27.15-31; Lucas 23.13-25; Juan 18.38; 19.16

⁶ Jabi jatiroha ca jodioba fiesta no tsi quiha huësti ca presó ca joni Pilató paquëmapaoni quiha nohiria bo qui. Jahuë jabi quiha. ⁷ Toatiyá tsi cárcel xara gobierno pasomaha ca joni ini quiha, naa Barrabás icanai cato. Iquinaquí tsi nohiria naa joní ani quiha. ⁸ Jatsi quiha nohiria bëcaniquë Pilato nicaxëna, huësti ca ja paquëmano iquish na, naa ja a-apaoni jascaria. ⁹ Jatsi quiha,

—¿Mato jodioba rey paquëmaxëhi ni ëa ra? —i quiha jato qui ja niquë.

¹⁰ Jabi Jesu qui yosaria arati ibo bo iqui ca Pilató cahëniquë. Ja iqui tsi ja qui Jesu mëahacani quiha acacati. ¹¹ Jato qui yoi ini quiha toa Jesu ja paquëmacatsaina. Jatsi quiha arati ibo bá nohiria bo raji-rajimaniquë, Barrabás Pilató paquëmano iquish na. ¹² Jatsi quiha Pilató nicatëquëniquë:

—¿Jënahuaxëhi ni ëa ra Jesu qui, naa jodioba chama-chamaria ma quënahana? —iquiina.

¹³ Jatsi quiha nohiria bá quënaraniquë:

—Cruzó tsi tooxahuë —iquiina.

14 —¿Jëni ni ra? ¿Jahuë yoi ca ja aca? —i quiha jato qui Pilato niquë.

Jama, jato joi ja choshacaniquë quëbihi na:

—Cruzó tsi ja tooxahacati xo ra —iquiina.

15 Jatsi quiha Pilató Barrabás paquëmaniquë nohiria bo ranihuacatsi na. Paquëmanox pari tsi quiha soldado bo qui pari Jesu ja mëaniquë rispichí tsi rashahacati. Jaquirëquë jodioba chama bo qui Jesu ja mëaniquë cruzó tsi tooxahacati.

16 Jatsi quiha palació ca huënë qui soldado bá Jesu boniquë. Boxo tsi quiha soldado bo tëquë ja quënacaniquë catiti. 17 Jatsi quiha sahuëti shini, naa chama-chamaria sahuëti ja sahuëmacaniquë. Jasca, nishi moxá tsi quiha chaha ja quëcocaniquë ja bax na. Quëcoxo tsi quiha ja mahuajahuacaniquë pë. 18 Jaquirëquë joihuatsijahuacaniquë:

—¡Viva, viva, jodioba chama-chamariá! —iquiina.

19 Jatsi quiha ja bësojó tsi ja mënicaniquë ja qui araxëna. Mahitsa quiha. 20 Mahuaxo tsi quiha sahuëti shini ja tsobocaniquë. Jatsi jahuë sahuëti yoi sahuëmaxo tsi quiha Jesu ja bocaniquë tori, cruzó tsi tooxaxëna.

Cruzó tsi Jesu tooxahacaniina

Mateo 27.32-44; Lucas 23.26-43; Juan 19.17-27

21 Riquipama tsi quiha tarabihai ca joni, naa Cirene mai ax jonish ca ja bicaniquë Jesu cruz papiti. Simón jahuë janë ini quiha, naa Alejandro, Rufo, tihí caba jahëpa. 22 Jatsi quiha Gólgota, naa Mapo Xao Ya icanai ca qui Jesu ja bocaniquë. 23 Toa xo tsi vino, naa tiahui ya roihaicanish ca jënë Jesu qui ja amacaniquë ati. Ayamajahuaniquë. 24 Jaquirëquë quiha cruzó tsi Jesu ja tooxacaniquë. Tooxaxo tsi quiha jahuë sahuëti bo ja oquëxnacaniquë i-ihacató no. Toca tsi jahuë jahuëcara ca biti ja cahëcani quiha.

25 Baquishmari mënata barí tsi quiha Jesu tooxahacaniquë cruzó no.

26 Jasca, papi ó tsi ja qui ja quësocani ca quënëhacaniquë; naa “Jodioba chama-chamaria” iquiina. 27 Jasca, ja bëta dos ca yomaxëni ca joni bo tooxahacaniquë jato ri; naa huësti ca jahuë mënëcayá no, huëtza ja mëxojó no. 28 Nëca tsi quiha Quënëhacanihí cabo jatihuahacani quiha, naa “Yoixëni cabo ya ja tochacaniina” ini cato.

29-30 Jatsi Jesu mahuatsi quiha tarabinish cabá huaniquë. Bëquë-bëquëhi tsi quiha ja nëcacaniquë.

—Jë, jë. Mimë xabahamahuë arati xobo potascatsai cató. ¿Tres barí tsi toa xobo nimati mëtsa ni mia pa? Cruz ax botëhuë iqui noa —nëa tsi ja nëcacaniquë pë.

31 Jascaria tsi quiha arati ibo ba chama bo, yoba tiisimacanaibo, tihí cabá Jesu mahuaniquë jato ri:

—Huëtza bo ja xabahamaquë; jama, jamë xabahamati mëtsama xo ra.

32 ¿Noba Israél ca rey, naa noba chama-chamaria ni naa joni pa? Jaboqui cruz ax ja botëno ra. Jatsi chahahuaxëqui noa ra noqui ri —i quiha jaca niquë jato ri chaninahi na.

Jasca, toá ca ja bëta tooxahacanihí cabá Jesu ocahuaniquë jato ri. Anoma jato chani ini quiha.

Jesu nanina

Mateo 27.45-56; Lucas 23.44-49; Juan 19.28-30

33 Matoroco barí tsi quiha tsëmonaniquë toa mai. Naama ini quiha ja tsëmonina. Tres hora bo quiha. 34 Jarohapa tsi a las tres quiha joi pistiamá tsi Jesú quënaniquë:

—Eloi, Eloi, ¿lama sabactani?, naa “¿Jënixo tsi ëa mi jisbëriaha rë, noho Diós, noho Diós?” —i ja niquë.

³⁵ Toca tsi ja quënaquë tsi quiha,

—Elías, naa Dios Chani yoanish ca quënahi quiha tonia —i jaca niquë toá ca niicanaibo.

³⁶ Jatsi quiha huësti ca joni jabaniquë jahuë chani nicahax na, tatë bixëna. Bixo tsi quiha vinagre, naa jënë nopi ca qui ja moosaniquë. Moosaxo tsi rëbiquirihaxo tsi Jesu ja amaniquë. Amapama tsi,

—No manaparino ra. No tsayano. Elías jomitsa botëmaxëna —i quiha ja niquë.

³⁷ Jatsi quiha Jesú quënatëquëniquë. Quënahax ja naniquë. ³⁸ Ja naquë tsi quiha arati xobó ca rotamë ca quëbëti raiti jaxcahacaniquë. Mana ax napata quihi ja jaxcahacani quiha. ³⁹ Jasca, Jesu bësojó ca nii ca soldado ratëniquë ja nahai ca jisi na. Ratëhax,

—Jabija xo ra. Dios Baquë yoi naa joni iquë rë —i ja niquë.

⁴⁰ Jasca, basima xo tsi Jesu nahai ca yoxa bá tsyaniquë. Toá tsi quiha mani iniquë María Magdalena; Jacobo, José, tihí caba jahëhua María; Salomé.

⁴¹ Jabi naa yoxa bá Jesu banahuapaoni quiha mëbicasquí na, naa Galilea maí tsi ja iniquë no. Jasca, toá tsi quiha mani iniquë yoxa huëtza bo ri, naa Jerusalén qui ja bëta bëcanish cabo.

Jesu maihuahacanina

Mateo 27.57-61; Lucas 23.50-56; Juan 19.38-42

⁴² Capaima quiha bari iniquë. Chitahë-paimaria ini quiha jato joiti bari.

⁴³ Ja tsi xo toa mëri tsi José, naa Arimateá ca racanish ca Pilato qui caniquë Jesu yora baaxëna, maihuacatsi na. Cahí tsi ja raquëniquë. Jabi jodiobá chama shinajixëni ca naa joni ini quiha. Jasca, Diós nohiria bo otoxëhai ca ó pasohai ca ja ini quiha jaa ri. ⁴⁴ Jatsi quiha jahuë yora José baaquë tsi quiha Pilato ratëniquë ja rësoha quëscahua-yamaha na. Jatsi capitán quiha ja quënaniquë.

—¿Japa Jesu; ja rësoha? —i quiha ja qui ja niquë.

⁴⁵ Ja rësoha ca nicaxo tsi quiha José qui jahuë yora ja mëaniquë maihuahacati. ⁴⁶ Jatsi quiha sabana jiaxëni ca José copiniquë. Jahuë yora botëmaxo tsi quiha ja yaboniquë sabana paxá no. Yaboxo tsi quiha maiquini ó tsi jahuë yora ja jananiquë. Huëyohaca ca quini paxa ca quiha. Janaxó tsi quiha maxax चाहितaxëni caiti qui ja taraniquë japaxëna. ⁴⁷ Jabi ja bëta iniquë María Magdalena, José jahëhua María, tihí cabo. Tihí cabá Jesu maihuahaca ca iti jisni quiha.

16

Jesu bësotëquëni

Mateo 28.1-10; Lucas 24.1-12; Juan 20.1-10

¹ Jodioba bari huinocaquë tsi quiha María Magdalena, Jacobo jahëhua María, Salomé, tihí cabá perojome copiniquë, Jesu yora chëxaxëna. ² Copihax tsi quiha domingo baquishmarí tsi quiha Jesu mai jisi ja bocaniquë.

³ Capama tsi,

—Jishopë. ¿Tsohuë ni toa no bax caití ca maxax bahama tarahaina rë? —i jaca niquë chaninahi na.

Pistiamá ca maxax ja ini quiha. ⁴ Jama, taisquí tsi nii ca maxax ja jiscaniquë ra. Bahama ja tarahacani quiha. ⁵ Jatsi quiha maiquini qui ja

jicocaniquë. Jicoxo tsi quiha jato mënëcayá ca joni shinapayo ja jiscaniquë. Sahuëti joxo sahuë tsaho ja ini quiha. Jatsi, ja raquëcaniquë tsayahax na. ⁶ Jatsi quiha yoxa bo qui ángel chaniniquë.

—Raquëyamacana. Jesu, naa tooxahacahitahax ca ma mërakai cahëquia. Yama xo ra. Ja bësotëquëquë ra, ja yoani jascaria. Nëri bëcahuë. Ja janahacahitaha ca ma tsayaparino. ⁷ Jatsi bocahuë. Pedro, jahuë rabëti bo, tihí cabo yoata. “Mato bëbo Galilea qui cahi quiha. Toa xo tsi Jesu jisxëqui mato, mato ja yoani jascaria” icana jato qui —nëa tsi quiha yoxa bo qui ángel nëcaniquë.

⁸ Jatsi jisbaya tsi quiha ja jabariacanicuë raquëhi na. Ja mëmë-mëmëcananicuë. Raquëhi tsi huëtsa bo qui ja chaniyamacani quiha.

María Magdalena qui Jesu jisiquinina

Juan 20.11-18

⁹ Semana jariapari ca barí tsi quiha Jesu bësotëquënicuë. Bësotëquëhax tsi María Magdalena, naa siete ca yoshi jayapaonish ca qui ja jisiquiniquë. Jahá ca yoshi bo ja niani quiha. ¹⁰ Jatsi quiha María jisbayaniquë Jesu rabëti bo yoaxëna. Arahi jahuë rabëti bo ini quiha, cohuëhi na. ¹¹ Ja yoaha ca nicaxo tsi ja chahahuayamacanicuë pë. Jatsi,

—Bëso xo Jesu ra. Jisquë ëa ra —i jato qui ja niquë.

Dos ca banahuacanaibo qui Jesu jisiquinina

Lucas 24.13-35

¹² Jaquirëquë quiha jamëri ca quiniá tsi dos ca xabachá ca cocohai ca joni bo qui Jesu jisiquiniquë. Jato xobo qui cahi ja icani quiha. ¹³ Jato xobo qui cahëxo tsi quiha Jesu ja jiscana ca ja yoacanicuë huëtsa bo qui. Jama, ja yoacana ca ja chahahuayamacanicuë pë.

Jahuë rabëti bo qui Jesu jisiquinina

Mateo 28.16-20; Lucas 24.36-49; Juan 20.19-23

¹⁴ Jarohari tsi quiha jahuë rabëti yoi bo oriquino tsi jato qui Jesu jisiquiniquë. Jisiquixo tsi quiha jato ja raahaniquë. Quëstoria ca chahahuatimaxëni ja icani quiha. Jabi bëso Jesu iqui ca jisnish cabo ja chahahuayamacani quiha pë jato chani nicaxo na. ¹⁵ Jatsi quiha,

—Jatiroha ca mai qui bocana, jatiroha ca nohiria qui chani jia ca yoati —i jato qui ja niquë —. ¹⁶ Xabahamahacaxëti xo tsohuëcara ca ë qui chitimihai ca ashimahacahax cato. Jama, quësohacaxëti xo tsohuëcara ca ë qui chitimiyamahai cato ra. ¹⁷ Jasca, jisti bo ati mëtsaxëhi quiha ë qui chitimicanaibo. Jariapari tsi yoshi bo natsëcacaxëceni quiha noho janë no. Jatsi joi jamëri bo chanicaxëceni quiha. ¹⁸ Jasca, jato mëquënë tsi quiha rono bo topiti mëtsacaxëceni quiha. Jasca, veneno pi ahi tsi rësoyamacaxëceni quiha. Jasca, iquicanaibo jënimahuacaxëceni quiha jato ó tsi mëquë ja janacanaí cató no. Tihí ca ati mëtsaxëhi quiha ë qui chitimicanaibo ra —nëa tsi quiha jato qui Jesu nëcaniquë.

Nai qui Jesu tërohacanina

Lucas 24.50-53

¹⁹ Jaquirëquë jahuë rabëti bo qui chanixo tsi quiha nai qui Jesu tërohacanicuë. Jatsi quiha jahuë iti Jesú bini quiha Dios mënëcayá no. ²⁰ Jatsi quiha jahuë rabëti bá jisbayaniquë, jatiroha cato xo tsi Dios Chani jia ca yoaxëna. Jato bëta xo tsi Ibo Dios yonocobëquini quiha. Dios Chani ja yoacaquë tsi quiha anomaria ca jisti bo acanicuë. Toca tsi jahuë Chani Diós oquëhuani quiha ra.

El Santo Evangelio Según San Lucas

¹ Jabi Jesú ani ca jahuë bo yoati tsi huëstima cabá quënëniquë. Noqui xërequë xo tsi ja ani ca ja quënëcani quiha. ² Jesu rabëti bo, toatiyá jishish cabo, tihí cabá yoani ca ja quënëcaniquë no tsayano iquish na. ³ Jabi ja quënëcani ca tēquë ë tsayarianiquë ëa ri ra. Tsayariaxo tsi jaboqui jatiroha ca rēquë rohari ca jahuë bo yoati tsi quënëbonacasquia ëa ri, Teofiló. ⁴ Nēca tsi Jesu yoati mi bax quënëcasquia, jabija ca tēquë mi cahēno, mi parahacayamano iquish na. Jia tsi mia ja tiisimacani ca jahuë bo mi cahēyoino ra.

Zacariás qui ángel jonina

⁵ Jabi jodioba mai xo tsi chama Herodés yonano tsi quiha tobi arati ibo iniquë, naa Zacariás icanai cato. Abías icanai ca maxo ya tsi quiha ja yononiquë arati xobó no. Jabi Elisabet jahuë ahuini janë ini quiha. Jasca, arati ibo bo jahuë ahuini jimi bo ini quiha jato ri. Arati ibo ba चाहितaxocobo ja ini quiha. ⁶ Jabi Zacariás, Elisabet, tihí cabá Dios noirianiquë. Quëstimaxëni ca shinajiaxëni ca ja icaní quiha. Jasca, Dios yoba bo tēquë ja nicacani quiha ra. ⁷ Jasca, baquë yama ja icaniquë rë, tohyatimaxëni Elisabet ini quëshpi na. Jasca, sirixëni ja icaní quiha.

⁸ Huësti barí tsi quiha jahuë maxo ya Zacariás iniquë arati xobó no. Arati iboba yonoco aqú ja ini quiha. ⁹ Toatiyá tsi ja raahacanicuë iboba iti qui jicoti, altar xo tsi incienso mëshati. ¹⁰ Jabi incienso mëshajahuano tsi quiha nohiria bo bëhoxhi iniquë cacha. ¹¹ Jatsi Zacariás qui ángel jisiquiniquë, naa Ibo quima jonish cato. Incienso ya ca altar mënëcayá nii ángel ini quiha. ¹² Jatsi ángel jisi tsi Zacariás shina-risiquiniquë. Raquëria ja ini quiha.

¹³ Jatsi,

—Raquëyamana, Zacariás —i ja qui ángel niquë—. Nicahacaquë mi bëhoxhaina ra. Mi bax baquë comaxëhi quiha mi ahuí Elisabet ra. Juan ja janëhacaxëti xo. ¹⁴ Ja iquí tsi ranirixëqui mato ra. Jasca, ranixëhi quiha huëstima cabo, ja coquë no. ¹⁵ Jasca, Dios bësojó tsi oquë ca joni ixëhi quiha mi baquë. Vino, jënë shapo, tihí cabo ja ayamano. Espíritu Santo rëamëxëhi quiha ja coquë no. ¹⁶ Huëstima ca Israél ca nohiria jato Ibo Dios qui jahari bëxëhi quiha. ¹⁷ Jasca, Ibo bëbo caxëhi quiha mi baquë, nohiria shomahuahi na. Elías yamaba jabi, jahuë chama, tihí cabo jayaxëhi quiha ja caquë no. Jatsi jahëpa bo, jahëhua bo, jato xocobo, tihí cabo noinamaxëhi quiha. Jasca, nicamisxëni cabo Dios qui bacamaxëhi quiha, mëstëxëni ca jahuë bo jato shinamaxëna. Toca tsi nohiria bo shomahuaxëhi quiha, Ibo johai ca quëshpi na —nëa tsi quiha ángel nēcaniquë Zacariás qui.

¹⁸ Jatsi,

—¿Jëniria pi raca ja na? Joni sirixëni xo ëa ra. Sirixëni xo noho ahuí ri —i ángel qui Zacariás niquë.

¹⁹ Jatsi angél quëbiniquë:

—Gabriel xo ëa ra. Dios tapaí nii ca ëa xo naa. E raahacaquë mi qui chaniti, chani jia ca mi qui bëti. ²⁰ Jatihuahacaxëhi quiha ë yoahana ra. Noho chani mi chahahuamaha iquí tsi jaro, chaniti mëtsama ixëqui mia ra, mi baquë coquë rohari —nëa tsi ja qui ángel nēcaniquë.

²¹ Jabi Zacariás ó pasohi nohiria bo iniquë tsëquëti. Yama a. Yopahi tsi,

—¿Jëniriahax bamahi ni sa? —itsi jaca niquë.

²² Jatsi Zacarías tsëquëniquë. Tsëquëhax tsi quiha nohiria bo qui chaniti mëtsama ja iniquë. Jaro quiha. Jatsi ja tënämëha nori nohiria bá cahëniquë. Japi Zacarías jato qui bëëbëëniquë, chaniti mëtsama ja iqui ca jismaxëna.

²³ Jaquirëquë arati xobó tsi ja yonocohai ca xaba jatiquë tsi quiha jahuë xobo qui Zacarías caniquë. ²⁴ Jaquirëquë jahuë ahui Elisabet tohoyaniquë. Jatsi cinco oxë no tsi xobó tsi ja chitëniquë.

²⁵ —Nëca tsi ëa Diós shomahuaquë ra. Jaboqui pi nohiria yahi tsi bërabiyamaxëquia, baquë ë jayaxëhai quëshpi na —i Elisabet niquë.

María qui ángel jonina

²⁶ Oxë huëtza huinocaquë tsi quiha Diós jahuë ángel Gabriel raaniquë Nazaret icanai ca yaca qui. Jabi Galilea maí tsi naa yaca ini quiha. ²⁷ Jabi Gabriel raahacani quiha María icanai ca yoxajahi qui Dios Chani bëti. Jari bënë yama María ini quiha. Jasca, jahuë bënë ti ca José ini quiha, naa David yamaba chahitaxocobo huësti ca iquiina.

²⁸ Xobo qui jicohax tsi quiha,
—Shoma xo mia ra; yoxa bo huëtza oquë quiha. Mi bëta xo Ibo ra —i María qui Gabriel niquë.

²⁹ Angel chani nicahax shinati pi María cahëymaniquë.

—¿Jënihi ni sa? —i ja niquë jahuë shinaná no.

³⁰ Jatsi,

—Raquëyamatsihuë, Mariá —i ángel niquë—. Diós mia shomahuaquë ra.

³¹ Tohoyaxëqui mia. Baquë comaxëqui mia ra. Comaxo tsi Jesu mi janëno.

³² Jasca, oquëxëhi quiha mi baquë. Dios-diosria Baquë ja quënahacaxëti xo. Jahuë jahëpa David yamaba yonati chama ja qui axëhi quiha Ibo Dios, jahuë nohiria yonati. ³³ Jabi Israel ca nohiria yona-yonapaaxëhi quiha. Jatiyamaxëhi quiha ja yonahaina —nëa tsi María qui ángel nëcaniquë.

³⁴ Jatsi ángel Mariá nicaniquë:

—Yoxajahi xo ëa ra. ¿Jënahuariaxo raca baquë ë comana? —iquiina.

³⁵ Jatsi ángel quëbiniquë:

—Mi qui joxëhi quiha Espíritu Santo. Tsëmo jascaria tsi mia mapaxëhi quiha Dios chama. Ja quëshpi tsi Dios Baquë jiaxëni ca quënahacaxëti xo mi Baquë, ja coquë no.

³⁶ “Mi rëquëmë Elisabet tsayahuë. “Tohoyatimaxëni xo” i nohiria bo paoni quiha mi rëquëmë yoati na. Jama, seis oxë no tsi ja tohoyaquë, sirixëni ja iqui ri. ³⁷ Tsayahuë. Jatihuahacaxëti xo Diós yoahai tëquë. Jatiroha ca ati mëtsa xo ra —nëa tsi quiha María qui ángel nëcaniquë.

³⁸ Jatsi Mariá quëbiniquë:

—Ibo yonati xo ëa ra. Jabija xo toa mi yoahana ra —iquiina.

Jatsi ángel jisbayaniquë.

Elisabet qui María shishonina

³⁹ Toatiyá tsi bamahaxma tsi quiha Elisabet yaca qui María caniquë. Jabi jodioba mai maca bo xërëquë ó tsi jahuë yaca ini quiha. ⁴⁰ Cahëhax Zacarías xobo qui María jiconiquë. Jicoxo tsi quiha Elisabet ja joihuaniquë.

⁴¹ Jatsi María joihuahai ca Elisabët nicaquë tsi quiha jahuë xamá ca baquë mohiniquë. Jatsi Espíritu Santo Elisabet chanimaniquë:

⁴² —Yoxa huëtza bo oquë tsi mi shomahuahacaquë ra. Shomahuahacaquë mi baquë ri —itsi María qui Elisabet niquë joi pistiama cató no—. ⁴³ E qui shishohi noho Iboja jahëhua joquë pa. Shoma xo ëa ra. ⁴⁴ Jabi mi joihuahai ca

ë nicaquë tsi rani tsi ëa xara ca baquë mohiquë ra. ⁴⁵ Mi qui angél yoahitaha ca jatihuaxëhi quiha Ibo Dios ra. Raniria xo mia ra, Dios qui mi chitimihai ca quëshpi na —i María qui Elisabet niquë.

⁴⁶ Jatsi María chaniniquë:
—Oquë xo Dios ra iquia.

⁴⁷ Noho Xabahamati Ibo Dios tahëhax tsi raniquia.

⁴⁸ Ea, naa jahuë yonati nori ca ja noiquë ra.

Jaboqui “Shomahuahaca ca tsi xō toa” ixëhi quiha nohiria bo ëa yoati na.

⁴⁹ Jiaria tsi xo ë qui Chamaxëni cató acana.

Jiaxëni xo jahuë janë ra.

⁵⁰ Jasca, ja qui aracanaibo noi-noipaohi quiha.

⁵¹ Anomaria tsi xo Diós acana jahuë chamá no.

Jamë shinamixëni cabo,
oquë ca manëcascanaibo,
tihi cabo pacanamahi quiha.

⁵² Nohiria chama-chamaria bo niahi quiha,

jato oquë ja bënëcano.

Noitiria cabo oquëhuahi quiha.

⁵³ Jasca, jahuë jahuë jia bá tsi paxnacanaibo sëyamaxëhi quiha.

Jama, jahuëmishni jayaria cabo mëquëya tsi raaxëhi quiha.

⁵⁴ Jahuë Israël ca nohiria mëbihi johi quiha,

jato noihi na.

⁵⁵ Jabi noba rëquëbo yamabo qui ja yoani ca shina-bënoyamahi quiha Dios ra,

“Mato shomahuaxëquia” i Abraham,
jahuë चाहिताखोको,

tihi cabo qui ja ni quëshpi na —nëa tsi quiha María

nëcaniquë.

⁵⁶ Jatsi tres oxë no tsi quiha Elisabet ya tsi María chitëniquë. Jaquirëquë jahari jahuë xobo qui ja caniquë.

Juan conia

⁵⁷ Tsëquëniquë Elisabet comati xabaca ra. Jatsi baquë ja comaniquë. ⁵⁸ Jabi

Elisabet Diós shomahuani nori ca jahuë yacatá ca nohiria, jahuë jimibo, tihi

cabá nicaniquë. Ja raniyocani quiha jato ri, nicaax na. ⁵⁹ Jatsi ocho bari

huinocaquë tsi quiha jahuë baquë jibirishahi jahuë jimibo bëcaniquë. Jato

jodioba jabi quiha. Jatsi jahuë jahëpa janë, naa Zacarias janë baquë qui ja

acacanicquë toatiyá no. ⁶⁰ Jatsi jahuë jahëhuá quëbiniquë:

—Juan ja quënahacaxëti xo ra —iquiina.

⁶¹ —Majia. Yama tsi xo mi jimibo xërëquë ó ca toa janë jaya cato ra —i ja qui jaca niquë.

⁶² Jatsi jato mëquë bá tsi jisti bo ja acacanicquë baquë jahëpa qui. Toca tsi

Zacarias ja nicanicquë:

—¿Jahuë janë mi baquë qui axëhi ni noa ra? —iquiina.

⁶³ Jatsi jahuë mëquënë tsi Zacarias bëëbëëhaniquë papi ja qui ja acano. Jatsi,

“Jahuë janë tsi xo Juan” i ja quënëni ca ni quiha. Jatsi quiha ja ratëyocanicquë.

⁶⁴ Jarohapa tsi chaniti mëtsa Zacarias iniquë pa. Chanitsijanicquë. Dios

ocahuatsijahua-niquë. ⁶⁵ Jatsi yacatá ca nohiria bo shina-risiquiniquë

jënipijani ca nicaax na. Jatsi Juan conia chani pacanani quiha, jodioba maí

ca maca ó ca nohiria bo qui. ⁶⁶ Nicaax ja shina-shinanicquë.

—¿Oquë ca ixëhi ni naa baquë sa? —i jaca ni quiha.

Jasca, ja bëta Ibocha chama iqui ca ja jiscanicquë.

Jia tsi Dios Zacarías ocahuanina

⁶⁷ Jabi Espiritu Santo rëamë tsi Juan jahëpa Zacarías iniquë. Jatsi ja qui Díos ani ca chani yoatsijahuaniquë.

⁶⁸ —Oguë xo Ibo, Israël caba Dios.
Jahuë nohiria mëbihi ja joquë ra,
jocha quima noqui paquëmaxëna.

⁶⁹ Jabi David yamaba चाहितखोकोबो noqui raahi quiha,
noqui Xabahamati Ibo-iboria iti.

⁷⁰ Naama tsi quiha jahuë Chani yoanish cabo Díos chanimani quiha.

⁷¹ “Mato qui caxacanaibo quima mato xabahamaxëquia”
i ja ni quiha.

⁷²⁻⁷³ Jabi noqui shomahuacatsi quiha Dios ra,
naa noba rëquëbo yamabo ja shomahuariani jascaria.

Tobi quiha jato qui ja yoanina,
tobi quiha noba rëquëbo yamaba Abraham qui ja yoanina.
Tih ca tsi shina-bënoyamahi quiha Dios.

⁷⁴ Noqui caxacanaibo quima noqui xabahamacatsi quiha ra,
raqüehaxma tsi Dios bax no yonocono iquish na.

⁷⁵ Ja bësojó tsi jocha yama,
mëstë, tih tsi no i-ipaoxëti xo,
ja bax yonocohi na —nëa tsi quiha Zacarías nëcaniquë
Dios Chani yoahi na.

⁷⁶ Jatsi,
—Dios-diosria Chani yoati ibo mi quënahacaxëti xo,
noho baquë.
Ibo bëbo caxëqui mia,
Ibo johai ca quëshpi nohiria bo shomahuahi na.

⁷⁷ Nohiria xabahamati quinia yoaxëqui mia ra,
“Mato jocha mëbixëqui Dios” i jato quiina.

⁷⁸ Toca tsi ahi quiha Dios,
noqui noiquí na.

Ja quëshpi tsi mana ca Huëa nori ca noqui raaxëhi quiha,

⁷⁹ tsëmó cabo,
bënorica ca rësoti basima cabo,
tihu cabo qui huahuaxëti.

Bëpasimati quinia ó tsi noqui rëquëninixëhi quiha —nëa tsi Zacarías nëcaniquë.

⁸⁰ Toatiyá tsi Zacarías baquë Juan shinahaniquë. Dios ja noiriani quiha. Shinahacax tsi quiha xabachá tsi Juan racaniquë. Toá tsi ja ini quiha, Dios Chani yoahi canox pari. Jaquirëquë Israël mai ca nohiria bësojó tsi quiha ja jisiquiniquë, naa jahuë yonoco chitahëhuaxëna.

2*Jesu conina**Mateo 1.18-25*

¹ Toatiyá tsi quiha romanoba chama-chamaria Augustó jahuë chani raaniquë nohiria tëquë qui.

—Tocahacati xo nohiria tëquë —i quiha ja niquë.

² Jabi jariapari ca nohiria tocani ca xaba tsi xo naa. Jasca, toatiyá tsi quiha Siria mai xo tsi chama Cirenio yonani quiha. ³ Jatsi jahanahax ja cocani ca yaca qui jatiroha cabo bocaniquë tocahacati. ⁴ Caniquë José ri. Jahuë Galileá

ca maí ca yaca Nazaret ja jisbayaniquë Belén yaca qui caxëna. Jabi Belén, naa jahuë David yamaba coní ca yaca qui ja caní quiha tocahacati, David yamaba chahitaxocobo huësti ca ja ini quëshpi na. ⁵ Jasca, ja bëta caniquë María ri, naa jahuë ahui ti cato. Jabi tohoya tsi María ini quiha. ⁶ Belén tsi jacano tsi quiha jahuë baquë comati xaba tsëquëniquë. ⁷ Jatsi jahuë jariapari ca baquë Mariá comaniquë. Comaxo tsi quiha raití tsi Mariá yaboniquë. Yaboxo tsi quiha yohina piti caja ó tsi jahuë Baquë ja jananiquë. Yama ini quiha racati xobó ca xëa rë.

Oveja obësocanaibo

⁸ Jabi yaca basima tsi quiha oveja obëso caba oxti iniquë. Baquicha quiha. Jato oveja ó bësóhi ja icaní quiha. ⁹ Jatsi jato bësójo tsi iboba ángel jisiquiniquë. Jasca, jato tëamë tsi quiha Iboba oquë bajra-bajraniquë. Raquëriatsijacanicuë tsayahax na. ¹⁰ Jatsi jato qui ángel chaniniquë:

—Raquëyamacana. Chani jia ca mato qui bëquia. Nohiria tëquë ranihuaxëhi quiha é yoahaina. ¹¹ Jaboqui David yacatá tsi coyaquë Xabahamati Ibo ra. Mato Cristo, naa Diós raaha ca Ibo tsi xo naa. ¹² Yabohaca ca baquë jisxëqui mato. Yohina piti cajá tsi raca ixëhi quiha. Tocatsixëhi quiha, noho quiayama ca chani ma cahëno iquish na ra —nëa tsi quiha jato qui ángel nëcaniquë.

¹³ Jatsi quiha ángel ya tsi jisiquitapiniquë huëstima ca naipá ca ángel bo. Misco quiha. Dios ocahuahi ja icaní quiha. Jabi ja yoacani ca tsi xo naa:

¹⁴—Mana ca Dios oquëhuahacano ra.

Ja qui jia cabo,

naa jahuë maí ca nohiria xërëquë ó ca rabëti bo bëpasimacatsi quiha —i jaca niquë.

¹⁵ Jatsi quiha nai qui ángel bo bocaniquë. Ja bocaquë tsi quiha oveja obëso cabo chaninanicuë:

—¿Belén jisi canomani? Jënipijaha ca no jisno. Jia tsi xo naa Ibobá noqui yoahana ra —i jaca niquë.

¹⁶ Jatsi quiha Belén qui ja jabacaniquë baquë mërahi na. María, José, piti cajá ca racahai ca Baquë, tihi cabo ja jiscaniquë. ¹⁷ Baquë jisi tsi quiha ángel jato yoaha ca ja yoacanicuë. ¹⁸ Jatsi oveja obëso cabá yoani ca qui ratëyoniquë nicanish cabo tëquë. ¹⁹ María qui jia ini quiha ja yoacanina. Jënipijacani ca tëquë ja shina-shinani quiha. ²⁰ Jatsi quiha oveja obëso cabo bacaniquë. Bacahi tsi ja quëquëcananicuë. Jia tsi Dios ja ocahuacanicuë, naa ja jiscanina, ja nicacanina, tihi cabo quëshpi na.

Arati xobo qui jahuë nabá Jesu bënina

²¹ Huësti ca semana huinocaquë tsi quiha jato baquë jibirishahacanicuë. Toatiyá tsi Jesu jato baquë ja janëcani quiha. Jabi toa janë baquë qui ángel aní quiha, siri, naa María tohoyanox pari no. ²²⁻²⁴ Jatsi quiha tsëquëniquë aratí xobo xo tsi María bahuëhacati ca xabaca. Jatsi Jerusalén qui José ya María caniquë, Moisés yamabá yoba jatihuaxëna. Cahëxo tsi quiha arati ibo qui jato yobá yoani ca jahuë bo ja acaniquë bahuëhacati. “Tëpas-hacati xo rabë ca botocoa. Jama, toa pi ati mëtsama jaca no tsi tēpas-hacati nori rabë ca corobisa iquë” nëa tsi jato yoba nëcani quiha. Jasca, toa barí tsi Jerusalén qui jato baquë Jesu ja bëcaniquë Dios qui mëaxëna. Jato jodioba jabi quiha. Ja tocacani quiha Iboba yoba quëñeni ca tahëhax na, naa “Dios qui mëahacaxëti xo jariapari ca cohax ca baquë” i Dios yoba ni quëshpi na.

²⁵ Naatiyá tsi quiha Jerusalén tsi joni iniquë, naa Simeón icanai cato. Joni shinajiaxëni ca naa joni ini quiha, Dios qui aranish ca iquiina. Israël cabo

Xabahamati Ibo johai ó ja pasoni quiha. Jasca, Espíritu Santo rëamë tsi ja ini quiha. ²⁶ Jasca, rësoti ó ja pasoyamani quiha, Ibobá raahai ca Xabahamati Ibo jisquë rohari. Toca ca Espíritu Santó jismani quiha.

²⁷ Jatsi quiha arati xobo qui Simeón caniquë, Espíritu Santó mëpíhacahax na. Jabi toá tsi ja ini quiha, jahuë nabo ya Jesu cahëquë no. Jasca, Moisés yoba jatihuahi quiha José, María, tihí cabo bëcaniquë jato baquë Jesu ya. ²⁸ Jatsi jato baquë pistia quiha Simeón iconiquë jisish na. Icoxo tsi quiha jia tsi Dios ja ocahuaniquë. Ja nëcani quiha:

²⁹ —Jarohari tsi ëa mi yoani ca jatihuahacaquë ra.
Jaboqui ranihax tsi rësoti mëtsa xo ëa ra.

³⁰ Noho bëro yoí tsi Xabahamati Ibo ë jisquë ra.

³¹ Nohiria bo tëquë qui naa baquë mi raaquë.

³² Carayanabo qui ja raahacaquë ra,
mia ja cahëcano iquish na jato ri.

Mi Israél ca nohiria qui ja raahacaquë ra,
jato oquëhuaxëna —nëa tsi quiha

Simeón nëcaniquë.

³³ Jatsi Jesu nabo ratëniquë toca tsi jato baquë yoati Simeón chaniquë no.

³⁴ Jatsi María, José, jato baquë, tihí cabo bax Simeón bëhoxniquë, Diós jato shomahuano. Bëhoxhax tsi quiha Jesu jahëhua qui ja chaniquë:

—Mi Baquë Diós biniquë ra. Ja iqui tsi bënoxëhi quiha huëstima ca Israél cabo. Jasca, ja iqui tsi rani-ranixëhi quiha huëstima cabo. Jabi Dios quima ca jisti ixëhi quiha mi Baquë. Ja pasomaha chanixëhi quiha huëstima cabo rë. Jasca, Dios quinia nohiria bo jismaxëhi quiha. ³⁵ Toca tsi nohiria bá shinhai ca jonë ca jahuë bo jisiquimaxëhi quiha mi Baquë. Jasca, cohuëriaxëqui mia ri, naa mi shina saipí nacohai jascaria —nëa tsi quiha María qui Simeón nëcaniquë.

³⁶ Jasca, tobi quiha arati xobó tsi yoxa iniquë, naa Ana icanai cato. Dios Chani yoanish ca yoxa ja ini quiha. Fanuel jahi ja ini quiha, naa Aserbo icanai ca maxo quima conish cato. Jabi sirixëni Ana iniquë. Siete año roha no tsi bënë ja jayani quiha. ³⁷ Rësoni quiha jahuë bënë. Jaquirëquë ochenta año no tsi Dios arati xobo ja jisbayayamani quiha. Toá tsi barihani, baquicha, tihí ca tsi Dios qui ja ara-arani quiha. Jasca, toá tsi samapama tsi ja bëhoxni quiha. Jahuë jabi quiha. ³⁸ María, José, tihí cabo ya Simeón chaninano tsi Ana joniquë. Johax Dios qui “Gracias” itsijaniquë jaa ri, baquë tsayahax na. Jatsi Israél cabo Diós xabahamati ó pasocanaibo qui chanitsi quiha Ana niquë baquë Jesu yoati na.

Nazaret yaca qui ja bacacanina

³⁹ Jaquirëquë ja yoahacani ca ati jahuë bo tëquë María, José, tihí cabá jatihuaniquë, naa Ibobá yobá yoani cato. Jatihuahax jahari Galilea mai qui ja bocaniquë jato Nazaret yaca qui. ⁴⁰ Toatiyá tsi quiha jato baquë Jesu shinhaniquë. Ja coshinani quiha. Ja tiisinani quiha. Jabi jato Baquë Jesu quiha Diós shomahuaniquë.

Arati xobó tsi Jesu inina

⁴¹ Jabi jatiroha ca xënipá tsi quiha Jerusalén qui Jesu nabo bocaniquë pascua fiesta axëna. Jato jabi quiha. ⁴² Jatsi doce año bo jatihax jahuë nabo ya Jerusalén qui Jesu caniquë jaa ri. ⁴³ Toa fiesta huinocaquë tsi quiha jato xobo qui bacatsi María, José tihí cabo niquë. Jama, Jerusalén tsi chitëhi Jesu iniquë pa. Yopayamani quiha jahuë nabo. ⁴⁴ Jahuë rabëti bo ya tsi bacahai ja

iqui ca ja quëscahuajahuacani quiha. Toca tsi huësti bari ja raacanicuë bahi no. Jatsi yata tsi jato rabëti bo, jato jimibo, tihi cabo xërëquë xo tsi Jesu mëratsijahuacanicuë. Yama a ra. ⁴⁵ Mahitsa ja mëracanicuë rë. Jarohari tsi quiha jahari Jerusalén qui José, María, bocanicuë mëraxëna.

⁴⁶ Tres bari tsi ja raacanicuë Jesu mërahi na. Jarohari tsi arati xobó ca jato baquë ja jiscanicuë. Yoba tiisimacanaibo ya tsaho ja ini quiha. Jato bëta chaninahi Jesu iniquë Quënëhacanish cabo yoati na. ⁴⁷ Jabi Jesu tiisi, ja quëbihaina, tihi cabo qui ja ratëyocanicuë, naa nicacanish cabo. ⁴⁸ Jato bëta ja iqui ca jisi tsi quiha jahuë nabo ratënicuë jato ri. Jatsi quiha ja qui jahuë jahëhua chaniniquë:

—¿Jëniriahax noqui mi nëcaha pa? Noba shina jii-jiiquë rë mia mërahi na. Mahitsa mia no mëra-mëraquë ra —i María niquë.

⁴⁹ Jatsi Jesú jato quëbiniquë:

—¿Jëniriexo tsi ëa mëracanai pa? ¿Noho Jahëpa xobó tsi ë iti nori ca ma cahëyamaha? —iquiina.

⁵⁰ Jama, ja quëbini ca jahuë nabá cahëyamaniquë. Jato joma quiha. ⁵¹ Jatsi quiha jahari Nazaret qui Jesu caniquë jahuë nabo ya. Jato ja nica-nicaniquë ra. Jabi jënipijani ca jahuë jahëhua shina-shinanicuë. Ja shina-bënoyamani quiha.

⁵² Jatsi shinahaniquë Jesu. Shinahacax ja tiisinanicuë. Dios, nohiria, tihi cabá toa baquë noiniquë.

3

Dios Chani Juán yoanina xabacha xo na
Mateo 3.1-12; Marcos 1.1-8; Juan 1.19-28

¹ Jabi quince año bo jatiquë tsi quiha romanoba chama-chamaria Tiberió nohiria bo yonanicuë jaa ri. Jasca, ja namá tsi jodioba mai Poncio Pilató yonani quiha ja bax na. Jasca, chama Tiberio bax Galilea mai Herodés yonani quiha jaa ri. Jasca, Iturea, Traconite, tihi cabo yonani quiha Herodes noma Felipe. Chama Lisaniás Abilinia mai yonani quiha. ² Jasca, arati ibo-iboria bo Anás, Caifás tihi cabo ini quiha. Jatsi toatiyá tsi quiha Zacariás baquë Juan qui Dios Chani joniquë. Xabachá tsi racahi Juan ini quiha. ³ Jatsi ani Jordán tapai ca racahai ca nohiria bo qui Dios Chani Juán yoabonaniquë. Yoabonahax jato qui ja nëcanicuë:

—Ashimahacaxëti xo nohiria bo. Mato jocha quima Dios quiri bësocana, mato jocha masahacano ra —i nohiria bo qui ja ni quiha.

⁴ Jabi Juán acai ca yoati tsi Isaías yamabo chaniniquë ja quënëni cató ó no. Jabi siri tsi ja quënëni ca tsi xo naa:

“Xabacha xo tsi quënaxëhi quiha.

Quënahax,

‘Rohahuahacacana, Ibo johai ca quëshpi na’ ixëhi quiha.

‘Bahi mëstë ca acana ja bax coti.

⁵ Rëahacaxëti quiha qui ni bo.

Michorohacaxëti quiha tëmachi bo.

Mëstëhuahacaxëti quiha yoro ca iti bo.

Parahuahacaxëti quiha bahi yoi cabo.

Toca tsi rohahuahacaxëti quiha mato shinana ra,

Ibo johai ca quëshpi na.

⁶ Jasca, Dios xabahamati quinia jixxëhi quiha carayanabo ri, naa nohiria tëquë’ nëcaxëhi quiha”.

Jabi nëca tsi Isaías yamabá quënëni quiha Juan yoati na.

⁷ Jatsi huéstima ca nohiria Juan qui bëcaniquë ashimahacaxëna. Jato ja yoani ca tsi xo naa:

—Quiaxëni caba xocobo xo mato ra. Tsëquëti basima tsi xo nohiria qui Dios caxahai ca bari ra. ¿Tsohuë mato yobani, Dios caxa quima ax jabati?

⁸ ¿Mato jocha quima Dios quiri ma bësoha pa? No tsayano. Jariapari tsi jabi paxa ca ma jismaxëti xo. “No xabahamahacaxëti xo, Abraham yamaba चाहितaxocobo no nori quëshpi na” iyamatsicana. Mato mëbiti mëtsama xo Abraham yamabo ra. Tsayacahuë. Naa maxax bo biti mëtsa xo Dios, Abraham xocobo yoi bo axëna iquia ra. ⁹ Jatsi quiniacaxëcahuë. Mato copipaimaria xo Dios ra. Bimi jia ca pi jihuí saihuayamano tsi toa jihuí rëraxëhi quiha ibo. Rëraxo tsi chihi qui niahi quiha. Jatsi jabi paxa ca ma saihuaxëti xo —nëa tsi nohiria bo qui Juan nëcaniquë.

¹⁰ Jatsi,

—¿Jënahuaxëhi ni noa ra? —i Juan qui nohiria niquë.

¹¹ Jatsi Juán jato quëbiniquë:

—¿Dos ca sahuëti jaya ni mato? Dos ca pi jayaquí tsi noitiria ca qui huësti ca acana. ¿Huéstima ni mato oriquiti? Huéstima pi jayahi tsi huëtsa bo ya xatënacana —i quiha jato qui Juan niquë.

¹² Jatsi impuesto bicanaibo, naa nohiria qui anoma cabo bëcaniquë ashimahacaxëna.

—¿Jënahuaxëhi ni noa, maestró? —i Juan qui jaca niquë jato ri.

¹³ Jatsi,

—Gobierno qui nohiriá mëati ca parata roha bicana. Huino ca biyamacahuë —i jato qui Juan niquë.

¹⁴ Jatsi soldado bá nicaniquë:

—¿Jënahuaxëhi ni noa ra? —iquiina.

Jato ja quëbiniquë:

—Nohiria roayamacana parata bixëna. Mato sueldo quëshpi tsi ranicana —iquiina.

¹⁵ Toatiyá tsi Xabahamati Ibo ó nohiria bo pasohi ini quiha. Ja quëshpi tsi jato Cristo Juan iqui ca ja quëscahuajahuacani quiha. ¹⁶ Japi jato tëquë qui Juan nëcaniquë:

—Jënë tsi mato ashimaquia. Jama, joxëhi quiha ëa oquëria cato ra. Ea tsi xo oquë yama cato. Espiritu Santó tsi, naa chihi iquiria cató tsi mato ashimaxëhi quiha. ¹⁷ Joxo tsi jahuë-na bo tsëcaxëhi quiha, ja otohái ca qui ja jicocano iquish na. Jama, trigo xaca jascaria tsi nocatimaxëni ca chihi qui yoixëni cabo niaxëhi quiha mëshoxëna —nëa tsi Juán nëcaniquë Jesu yoati na.

¹⁸ Dios Chani yoapama tsi huéstima tsi nohiria Juán yobaniquë, Dios quiri ja bësocano iquish na. ¹⁹ Jasca, chama Herodes pasomaha Juán chanipaoniquë, jahuë noma ahui ja bini iqui na. Jabi jahuë noma ahui, naa Herodías icanaí ca ja bini quiha, jahuë ahui iti. Jasca, huéstima ca yoi ca Herodés ani quiha. Jahuë jabi quiha. ²⁰ Jatsi pë preso qui Herodés Juan nanëniquë. Anoma toa joni iniquë ra.

Jesu ashimahacanina

Mateo 3.13-17; Marcos 1.9-11

²¹ Nohiria tëquë ashimahacayoquë tsi quiha Jesu ashimahacanicuë jaa ri. Bëhojano tsi quiha nai japëquëniquë. ²² Jatsi ja qui Espiritu Santo botëniquë; boto jisiria ja nori. Jatsi,

—Noho Baquë yoi xo mia. Mia noiquia. Ea ranihuaqui mia ra —i quiha naipá ca joi niquë.

*Jesu rëquëbo yamabo**Mateo 1.1-17*

²³ Jabi treinta año bo quiha Jesú jayaniquë, jahuë yonoco ja chitahëhuaquë no. Jabi José baquë ja nori ca quëscahua nohiria bá huaniquë.

²⁴ José jahëpa Elí iniquë.

Eli jahëpa Matat iniquë.

Matat jahëpa Leví iniquë.

Leví jahëpa Melqui iniquë.

Melqui jahëpa Jana iniquë.

Jana jahëpa José iniquë.

²⁵ José jahëpa Matatías iniquë.

Matatías jahëpa Amós iniquë.

Amós jahëpa Nahum iniquë.

Nahum jahëpa Esli iniquë.

Esli jahëpa Nagai iniquë.

²⁶ Nagai jahëpa Maat iniquë.

Maat jahëpa Matatías iniquë.

Matatías jahëpa Semei iniquë.

Semei jahëpa José iniquë.

José jahëpa Judá iniquë.

²⁷ Judá jahëpa Joana iniquë.

Joana jahëpa Resa iniquë.

Resa jahëpa Zorobabel iniquë.

Zorobabel jahëpa Salatiel iniquë.

Salatiel jahëpa Neri iniquë.

²⁸ Neri jahëpa Melqui iniquë.

Melqui jahëpa Adi iniquë.

Adi jahëpa Cosam iniquë.

Cosam jahëpa Elmodam iniquë.

Elmodam jahëpa Er iniquë.

²⁹ Er jahëpa Josué iniquë.

Josué jahëpa Eliezer iniquë.

Eliezer jahëpa Jorim iniquë.

Jorim jahëpa Matat iniquë.

³⁰ Matat jahëpa Leví iniquë.

Leví jahëpa Simeón iniquë.

Simeón jahëpa Judá iniquë.

Judá jahëpa José iniquë.

José jahëpa Jonán iniquë.

Jonán jahëpa Eliaquim iniquë.

³¹ Eliaquim jahëpa Melea iniquë.

Melea jahëpa Mainán iniquë.

Mainán jahëpa Matata iniquë.

Matata jahëpa Natán iniquë.

Natán jahëpa David iniquë.

³² David jahëpa Isaí iniquë.

Isaí jahëpa Obed iniquë.

Obed jahëpa Booz iniquë.

Booz jahëpa Salmón iniquë.

Salmón jahëpa Naasón iniquë.

³³ Naasón jahëpa Aminadab iniquë.

Aminadab jahëpa Aram iniquë.

Aram jahëpa Esrom iniquë.

Esrom jahëpa Fares iniquë.

Fares jahëpa Judá iniquë.

³⁴ Judá jahëpa Jacob iniquë.

Jacob jahëpa Isaac iniquë.

Isaac jahëpa Abraham iniquë.

Abraham jahëpa Taré iniquë.

Taré jahëpa Nacor iniquë.

³⁵ Nacor jahëpa Serug iniquë.

Serug jahëpa Ragau iniquë.

Ragau jahëpa Peleg iniquë.

Peleg jahëpa Heber iniquë.

Heber jahëpa Sala iniquë.

³⁶ Sala jahëpa Cainán iniquë.

Cainán jahëpa Arfaxad iniquë.

Arfaxad jahëpa Sem iniquë.

Sem jahëpa Noé iniquë.

Noé jahëpa Lamec iniquë.

³⁷ Lamec jahëpa Matusalén iniquë.

Matusalén jahëpa Enoc iniquë.

Enoc jahëpa Jared iniquë.

Jared jahëpa Mahalaleel iniquë.

Mahalaleel jahëpa Cainán iniquë.

³⁸ Cainán jahëpa Enós iniquë.

Enós jahëpa Set iniquë.

Set jahëpa Adán iniquë.

Adán jahëpa Dios iniquë.

4

Jesu tanamahacanina jochamaxëna

Mateo 4.1-11; Marcos 1.12-13

¹ Jatsi quiha ani Jordán Jesú jisbayaniquë. Espiritu Santo rëamë ja ini quiha. Jatsi cuarenta bari no tsi xabaca ax tsi ja mëpihacanicuë Espiritu Santó no. ² Jabi xabacá ja no tsi quiha Satanás Jesu tanamaniquë jochamaxëna. Cuarenta bari no tsi Jesú piyamani quiha. Ja paxnani quiha. ³ Jatsi ja qui Satanás chaniniquë:

—Dios Baquë iipiquí tsi naa maxax yohuë mapari ja manëno —iquiina.

⁴ Jatsi Jesú quëbiniquë:

—“Maparí roha tsi bësoyamaxëhi quiha joni, jama, Dios Chaní tsi ja nori” ii quiha Quënëhacanish cabo —iquiina.

⁵ Jatsi quiha mana Satanás Jesu boniquë tëmachí no. Boxo tsi quiha maí ca chama bá yonahaina, jato oquë, tihi cabo Jesu ja jismaniquë. ⁶ Jismahax ja nëcaniquë:

—Naa nohiria bo yonati chama tëquë, ja yonacanai ca oquë, tihi cabo mi qui axëquia, ë qui ja acacani nori quëshpi na. Jabi tsohuëcara, naa ë qui jia ca qui naa tëquë ati mëtsa xo ëa ra. ⁷ Japi ë qui mi arapino tsi jatiroha ca mina-xëhi quiha —i Satanás niquë.

⁸ Jatsi Jesú quëbiniquë:

—“Mato Ibo Dios roha qui ma arano ra. Mato chama roha ca tsi xo toa” ii quiha Quënëhacanish cabo —iquiina.

⁹ Jaquirëquë Jerusalén ca arati xobo qui Satanás Jesu boniquë. Boxo tsi quiha jodioba arati xobo cacha, naa jahuë quëmápo tsi Satanás niimaniquë. Niimahax ja qui ja chaniniquë:

—“Dios Baquë iipiquí tsi mai qui mimë niahacahuë. ¹⁰ Mato qui jahuë ángel bo raaxëhi quiha Dios, mato ó ja bësocano” ii quiha Quënëhacanish cabo.

¹¹ Jasca, “Jato mëquënë tsi mia bëcaxëcani quiha ángel bo, mi paquëyamano, mi tahë tëquëyamano iquish na” ii quiha —nëa tsi quiha Jesu qui Satanás nëcaniquë.

¹² Jatsi Jesú quëbiniquë:

—“Mi Ibo Dios tanamayamahuë” ii quiha Quënëhacanish cabo —iquiina.

¹³ Jabi huëstima ca quiniá tsi Satanás Jesu tanamaniquë jochamaxëna; mahitsa quiha. Jochamati mëtsaxoma tsi quiha ja jisbërianiquë, oquë ca xaba huëtsa manaquí na.

Galileá ca mai xo tsi Jesú jahuë yonoco chitahëhuanina

Mateo 4.12-17; Marcos 1.14-15

¹⁴ Jatsi quiha Galilea mai qui Jesu bacaniquë. Espíritu Santo chama jayani quiha. Jabi toa maí tsi quiha chani pacaniquë ja acai ca yoati na. ¹⁵ Jasca, jato catiti xobo xo tsi Jesú tiisimaniquë.

—Anomaria tsi xo toa joni ra —i nohiria bo niquë jahuë chani nicahax na.

Nazarét cabá Jesu nianina

Mateo 13.53-58; Marcos 6.1-6

¹⁶ Jatsi quiha Nazaret qui Jesu joniquë, naa jahá ja shinahani ca yacata. Jabi toa barí tsi jato catiti xobo qui ja caniquë tiisimahi na. Jahuë jabi quiha. Jatsi quiha Jesu niiniquë Quënëhacanish cabo nicamaxëna. ¹⁷ Isaías yamabá quënëni ca libro Jesu qui acacani quiha. Japëcaxo tsi quiha Dios Chani jato ja nicamaniquë.

¹⁸ —“E bëta xo Ibobá Shinana ra.

Ea ja raaquë, Chani jia ca noitiria cabo qui ë yoano.

Ea ja raaquë, ‘Paquëmahacaxëqui mato’ i achiqúi cabo qui ë no,

‘Jistëquëxëqui mato’ i bëco cabo qui ë no.

Ea ja raaquë cohuë cabo ë mëbino.

¹⁹ ‘Ibobá nohiria bo xabahamati xaba tsi xo naa’ ë iti xo” —nëa tsi Jesu nëcaniquë Dios Chani nicamahi na.

²⁰ Nicamaxo tsi quiha libro Jesú mapaniquë. Jatsi ibo qui axo tsi quiha ja tsahoniquë. Jatsi xobó ca nohiria tëquëtá tsaya-tsayaniquë ratëquí na.

²¹ Jatsi,

—Jaboqui mato bësojó tsi jatihuahacaquë Isaías yamabá quënëhina ra —i jato qui Jesu niquë.

²² Jatsi Jesú yoani ca qui nohiria bo shina-risiquiniquë.

—Anomaria tsi xo toa ja chanihaina ra. ¿José baquë ma ni naa sa? —itsi quiha nohiria bo niquë.

²³ Jatsi quiha Jesú jato quëbiniquë:

—Mato yosiba yoba ëa yoacasqui mato tia, naa “Noqui pari mëbihuë, nohiria huëtsa bo mi mëbinox pari” iquiina. Jasca, “¿Jënahuariaxo raca mi coní yacata xo tsi jisti bo ayamahai rë, naa Capernaum mai xo tsi mi aquitaha jascaria?” itiari ë qui xëqui mato ra. ²⁴ Jama, jaha ja coní ca yaca qui Dios Chani yoati ibo jono tsi jahuë chani bicasyamahi quiha jahuë yacatá ca nohiria bo pë iquia ra. Jascaria, ëa bicasyama xo mato rë. ²⁵ Ea nicaparicana.

Mato parayamaquia. Jabi Elías yamabo bēsono tsi quiha huēstima ca bēnē imanish cabo racapaoniquē jodioba maí no. Toatiyá tsi quiha tres año y medio no tsi yama oi iniquē. Jasca, oriquiti binianiquē nohiria tēquē rē. ²⁶ Jama, toa nohiria bo qui Elías yamabo raahacayamaniquē mēbiti. Jama, noitiria ca bēnē imanish ca, naa carayana qui Elías yamabo raahacanicuē ra, naa Sidón basima ca Sarepta yacatá ca racanish ca yoxa qui. Tocapianiquē ra, Elías yamabo qui jahuē nohiria bá nicacasyamani iqui na. ²⁷ Jasca, Eliseo yamabo bēsono tsi quiha huēstima ca leproso bo, naa bonohuaxēni cabo iniquē jodioba maí no. Jama, ja jēnimahuahacayama-canicuē, Eliseo yamabo qui ja chitimiyamacani iqui na. Jama, carayana ca Naamán yamabo jēnimahuahacanicuē ra —nēa tsi Jesu nēcaniquē.

²⁸ Jatsi Jesu qui caxarianiquē toa catiti xobó ca nohiria tēquē jahuē chani nicahax na. ²⁹ Ja niitapicaniquē ja qui tsamixēna. Niixo tsi quiha yaca cache Jesu ja xērēcaniquē. Xērēxo tsi quiha tēmachi cache ja bocanicuē, naa jato yaca rohahuahacani cató no. Toa quēmapo xo tsi rēnichi Jesu ja nijahuacascani quiha axēna. ³⁰ Jama, toa nohiria misco Jesu naconiquē pa, jato jisbēriacuē na.

Yoshi jayanish ca joni *Marcos 1.21-28*

³¹ Jaquirēquē quiha Capernaum yaca qui Jesu caniquē, naa Galileá ca yacata. Toa xo tsi nohiria bo tiisimatsi quiha Jesú huaniquē joiti barí no. ³² Jabi ja tiisimani ca qui nohiria bo ratēnicuē, chama ya ja tiisimani quēshpi na.

³³ Toa catiti xobó tsi quiha yoshi jayanish ca joni iniquē. Joi pistiamá tsi quiha ja quēnaniquē:

³⁴—Jishopē. Noqui jisbayahuē ra, Nazarét ca Jesú. Noqui quēyohi mi joquē pē. Mia cahēquia. Dios Baquē jiaxēni ca xo mia ra —i ja qui yoshi niquē.

³⁵ Jatsi quiha Jesú raahaniquē:

—Pasihuē. Joni quima ax natsēquēhuē —iquiina.

Jatsi pē nohiria bo bēsojó tsi yoshini joni nianiquē mai qui. Niahax joni quima ja natsēquēnicuē. Jatsi jēnima toa joni ini quiha. ³⁶ Jatsi nohiria ratēyoniquē.

—¿Jahuē chani ni naa sa? Chamá tsi yoshi bo qui ja chaniquē pa. Natsēquēquē jahuē yoshi bo ra —i nohiria bo niquē.

Toca tsi ja chaninacani quiha ratēhi na. ³⁷ Jatsi quiha toa maí tsi chani pacananiquē, Jesú ani ca yoati na.

Simón raisi jēnimahuahacarina *Mateo 8.14-15; Marcos 1.29-31*

³⁸ Catiti xobo jisbaya tsi quiha Simón xobo qui Jesu caniquē. Iquihi quiha Simón raisi iniquē rē. Jatsi quiha Jesu qui ja chanicaniquē yoaxēna. ³⁹ Jatsi jahuē naquētē qui Jesu jiconiquē. Jicohax jahuē oxati tapaí ja niiniquē. Jatsi quiha jahuē iqui qui Jesu chaniniquē ja janacano. Jatsi ja janacatapiniquē ra. Bamahaxma tsi ja niiniquē. Jēnima ja ini quiha. Niixo tsi jato qui oriquiti ja taaniquē pa.

Iquicanaibo Jesú jēnimahuanina *Marcos 1.35-39*

⁴⁰ Bari chixabano tsi quiha isicanaibo, iquicanaibo, anomaria cabo, tihí cabo nohiria bá Jesu qui bēnicuē ja jēnimahuahacacano. Jatsi bēcanish cabo tēquē ja motsanicuē jahuē mēquēnē no. Jato tēquē ja jēnimahuani

quilha. ⁴¹ Jasca, huëstima ca yoshi bo natsëcahacani quilha nohiria bo quima. Natsëquëhax ja quënacaniquë:

—Dios Baquë xo mia ra —iquina.

Jatsi quilha yoshi bo Jesú raahaniquë. Jato ja pasimani quilha, Dios raahacanish ca Xabahamati Ibo ja iqui ca ja cahëcani quëshpi na. ⁴² Jaquirëquë huëaquë tsi yaca Jesú jisbayaniquë xobo yama ca iti qui caxëna. Jatsi quilha nohiria bá yopaniquë. Yopaxo tsi quilha Jesu mëratsijahuacaniquë. Jisi tsi,

—Jari cayamahuë rë. No bëta mi chitëno ra —i ja qui nohiria bo niquë.

⁴³ Jama,

—Yaca huëtisa bo qui ë cati xo, “Nohiria bo otocatsi quilha Dios” ixëna. Ja tsi xo toa ë raahacanina —i Jesu jato qui niquë.

⁴⁴ Jatsi quilha jodioba mai xo tsi Dios Chani Jesú yoabonaniquë jato catiti xobo xo na.

5

Jesú jahuë rabëti bo quënanina *Mateo 4.18-22; Marcos 1.16-20*

¹ Huësti barí tsi quilha Genesaret ia quëmapó tsi nii Jesu iniquë, Dios Chani yoahi na. Ja qui nicapama tsi ja qui nohiria bo quëtsoniquë. ² Jatsi dos ca rërënish ca noti bo Jesú jisniquë. Mëquëya quilha. Basima tsi jato ibo bo ini quilha, jato nishi bo chocohacaina. ³ Jatsi nohiria misco iqui tsi quilha noti qui Jesu jiconiquë jabaxëna. Jabi Simón noti ja ini quilha. Jicohax,

—Tori pistia noti chishtëquirimahuë —i Pedro qui ja niquë.

Jatsi noti xo tsi nohiria bo ja tiisimaniquë tsahoxo na. ⁴ Jahuë chani jatihuahax Pedro qui ja chaniniquë:

—Tori pistia noti rëboohahuë, naa paxnëmi ca qui. Toa xo tsi mato nishi niacahuë sani bixëna —i Jesu niquë.

⁵ Jatsi Simón quëbiniquë:

—Mahitsa no tanashinaquë rë. Yama a. Jama, “Niahuë” i pi mi no tsi aqui noa tia —i Pedro niquë.

⁶ Jatsi quilha jato nishi bo ja niacaniquë. Ja niacaquë tsi quilha nishi qui huëstima ca sani rëoconiquë. Tihiria ca racana. Rërëtsë-paimaria jato nishi ini quilha. ⁷ Jaha tsi quilha jato rabëti bo qui jato mëquënë tsi ja bëëbëëhacaniquë ja bëcano jato mëbixëna. Jatsi jato rabëti bo bëcaniquë mëbixëna. Jato noti ja rëacani quilha. Huëstima ca sani iqui tsi jëtquëpaimaria jato noti bo ini quilha.

⁸ Tocapijani ca jisi tsi Jesu bësojó tsi Pedro mëniniquë.

—Noqui jisbayahuë, Taitá. Ea tsi xo jochahuaxëni cato ra. E bëtacasyama xo mia tia —i ja qui Pedro niquë.

⁹ Jabi ratëniquë Pedro, ja bëtanish cabo, naa tihiria ca sani ja bicani tahëhax na. ¹⁰ Jasca, ratëniquë Jacobo, Juan ri, naa Zebedeo baquë bo. Jabi Pedro ya yonoconabë-quinish cabo ja icani quilha. Jatsi,

—Raquëyamahuë, Pedro. Jaboqui rohari tsi joni bo bixëqui mia. Dios quinia jato qui jismaxëqui mia —i ja qui Jesu niquë.

¹¹ Jatsi jato noti bo rërëhaxo tsi jatiroha ca ja jisbëriacaniquë Jesu bahuaxëna.

Leproso inish ca Jesú jënimahuanina *Mateo 8.1-4; Marcos 1.40-45*

¹² Jabi jahuëcaraca yaca shishopama tsi quilha lepra jaya ca joní Jesu bëchaniquë. Bonohuaxëni ca joní ja ini quilha. Jesu jisi tsi ja bësojó ja mëniniquë.

—Aapicatsi tsi ëa jënimahuati mëtsa xo mia, Taitá —iriatsti ja niquë.

13 Jatsi quiha Jesú joni motsaniquè. Motsahax,

—Mia jënimahuacasquia ra. Jënima xo mia —i ja qui ja niquè.

Jatsi quiha jahuè bono tapoyotapininiquè ra. 14 Jatsi joni Jesú yobaniquè:

—Jënipimiha ca huëtisa bo yoayamaxëhuè. Bamaxoma tsi arati ibo qui mimè jismata. Moisés yoani ca jahuè ja qui ahuè tēpasti, naa mi bahuèxèhai ca quèshpi na. Tocapimino tsi jënima mi nori ca cahècaxècani quiha nohiria bo.

15 Jaquirèquè quiha Jesu yoati tsi chani pacanarianiquè. Ja igui tsi ja qui huèstima ca nohiria quètsoniquè jahuè chani nicaxèna. Jasca, ja bèceni quiha jënimahuahacaxèna. 16 Jama, Jesú jato jisbërianiquè nohiria yama ca iti qui caxèna. Jaha tsi quiha Dios qui ja bèhoxniquè.

Jesú mohitimaxèni ca jënimahuanina

Mateo 9.1-8; Marcos 2.1-12

17 Jesú nohiria bo tiisimano tsi quiha ja tahè tsi fariseobo, yoba tiisimacanaibo, tihi cabo tsaho iniquè. Jabi huèstima ca yaca bo ax ja bèceni quiha. Galileá ca yaca bo, jodioba maí ca yaca bo, Jerusalén, tihi cabo ax ja bècaniquè Jesu nicaxèna. Jabi Ibo Dios chama Jesú jayani quiha nohiria jënimahuati. 18 Jatsi quiha joni bá mohiyama ca bëniquè jahuè oxatí no. Xobo qui cahèhax ja jicocas-caniquè, Jesu bësójó noitiria ca joni janaxèna.

19 Jicotimaxèni ja icani quiha nohiria misco igui na. Jatsi quiha xobo mapasti qui ja bocaniquè. Jaha xo tsi quiha teja bō ja tsécacanicuè quinihuaxèna. Quinihuaxo tsi quiha naxèrèquè tsi joni ja botèmaniquè jahuè oxatí no. Jesu bësójó tsi ja botèmajahuacani quiha. 20 Jabi mohiyama ca jënimahuati mètsa ca Jesu igui ca joni bá cahèni quiha. Jasca, ja chahahuacanaí ca jisi tsi, —Masahacaquè mi jocha, noho baquè —i joni qui Jesu niquè.

21 Jatsi quiha jamè xèrèquè tsi chaninatsi fariseobo, yoba tiisimacanaibo, tihi cabo niquè. Shinahax,

—Quiaxèni ca joni tsi xo naa ra. Dios pasomaha chanihi quiha pè. ¿Jënahuariaxo raca jocha ja masana? Jaroha xo Dios —i jaca niquè Jesu yoati na.

22 Jama, ja shinabèquicanai ca jahuè bo Jesú cahènicuè. Cahèhax,

—¿Jëniriahax toca tsi shinacanaí pa? 23 ¿Jënica ni toa bëroria ca yoati?

“Masahacaquè mi jocha” ¿iti ni? “Niina. Cohuè” ¿iti ni? 24 Nohiria ba jocha masati chama è jaya ca ma cahèno ra —i quiha jato qui Jesu niquè.

Jatsi mohitimaxèni ca qui Jesu chaniniquè:

—Niina. Mi oxati bihuè. Mi xobo qui cata —iquiina.

25 Jatsi niitapininiquè joni jato bësójó no. Jatsi jahuè oxati ja bitapininiquè. Bichi tsi quiha jahuè xobo qui ja caniquè. Jia tsi Dios ja ocahuaniquè ra. 26 Jasca, shina-risiquiniquè nohiria. Ja ratèyocani quiha. Jatsi Dios ocahuatsijahuacanicuè jato ri:

—Anomaria tsi xo naa jaboqui no jisina ra —iquiina.

Jesú Levi quènanina

Mateo 9.9-13; Marcos 2.13-17

27 Jaquirèquè quiha xobo jisbaya tsi gobierno bax parata binish ca joni Jesú bèchaniquè, naa Leví icanaí cato. Jahuè parata biti xobó tsi tsaho ja ini quiha. Jatsi,

—E bèta mi jono —i Leví qui Jesu niquè.

28 Jatsi Leví niiniquè. Niixo tsi quiha jatiroha ca ja jisbërianiquè Jesu banahuaxèna.

29 Jatsi quiha jahuè xobo xo tsi Jesu Leví orihuacasniquè. Toá tsi ini quiha nohiria misco, naa gobierno bax parata bicanaibo, Leví rabèti huëtisa bo.

³⁰ Jasca, toá tsi fariseobo, yoba tiisimacanaibo, tihi cabo ini quiha jato ri tsaya-tsayaxëna. Jatsi Jesu pasomaha ocahuatsijahuacanicuë jahuë rabëti bo qui:

—¿Jënihax tsi gobierno bax parata bicanaibo, jochahuaxëni cabo, tihi cabo ya tsi oriquicanai pa? —i jaca niquë.

³¹ Jatsi quiha Jesú jato quëbiniquë nicaxo na:

—Doctor qui bocani quiha anoma cabo roha. Jënima cabo tsi xo cayamahaina. ³² Jasca, jamë shinamixëni cabo quënahi ë joyamaniquë; jama, noitiria ca jochacanaibo jato jocha quima Dios quiri bësomahi nori —nëa tsi quiha jato qui Jesu nëcaniquë.

Samati jabi

Mateo 9.14-17; Marcos 2.18-22

³³ Jatsi quiha nëca tsi Jesu qui nohiria bo chaniniquë:

—Huëstima tsi xo Juan rabëti bo samacanaina. Jasca, huëstima tsi xo Dios qui ja bëhoxcanaina ra. Tocacani quiha fariseoba jabi acanaibo ri. Jama, mi rabëti bo tsi xo tocayamahaina pa. Mi rabëti bo tsi xo picanaina, jënë acaina re —i Jesu qui jaca niquë.

³⁴ Jatsi quiha Jesú quëbiniquë:

—¿Joní ahui yano tsi samahi ni ahui yahax cato rabëti bo pa? Iyamacani quiha ra. Cohuëti xaba ma xo. Toa barí tsi ja bëta oriquicani quiha. Jascaria, jaboqui samayamahi quiha noho rabëti bo ri jato bëta ë iquë no. ³⁵ Jama, jato quima ë mëbihacano tsi samacaxëcane quiha. Jatsi toa barí tsi cohuëcaxëcane quiha. Jatsi samacaxëcane quiha toatiyá no —i Jesu niquë.

³⁶ Jatsi joxëhai ca arati quinia paxa ca yoati tsi Jesu chaniniquë nëca cató no:

—Jahuë sahuëti paxa ca quima quësi quëësayamahi quiha nohiria, jahuë sahuëtixëni pishpaxëna. Tocapiquí tsi jahuë sahuëti paxa ca yoshihuahi quiha. Jasca, tsocoxëhi quiha quësi, jaha bëquiyamahai quëshpi na. (Jascaria tsi noho tiisi paxa cató tsi mato arati jabi siri shomahuatimaxëni xo mato. Jaharisi ma xo.) ³⁷ Jasca, mato jabi ma xo toa bichi ca sota sirixëni qui jënëria paxa ca rëhuihaina. Anoma quiha. Ma rëhuipino tsi bichi ca sota poshaxëhi quiha naa jënëria paxa cato. Ja poshiquë tsi japaquëxëhi quiha naa jënë rë. Yoshihuahacaxëhi quiha bichi ca sota ri. ³⁸ Jama, bichi ca sota paxa ca qui jënëria paxa ca rëhuihacaxëti xo. Toca tsi yoshihuahacayamaxëhi quiha sota. Jasca, japaquëyamaxëhi quiha jënë. (Jascaria tsi arati quinia huëtsá tsi noho tiisi paxa ca tiisimahacaxëti quiha. Mato arati jabi siri jaha bëquiyamahi quiha noho tiisi paxa cato ra.) ³⁹ Jama, noho tiisi paxa ca bicasyamaxo nohiria bo rë. Jato arati jabi siri bo noiyocani quiha pë. “Oquë tsi xo noba arati jabi siri bo” icani quiha rë. Jato arati jabi rarinamacasyamacani quiha ra —nëa tsi Jesu nëcaniquë jahuë tiisi paxa ca yoati na.

6

Joiti bari Ibo

Mateo 12.1-8; Marcos 2.23-28

¹ Joiti barí tsi quiha jahuë rabëti bo ya huai bo nacohi Jesu iniquë. Nacopama tsi jahuë rabëti bá bimi bëro risaniquë. Risaxo tsi quiha jato mëquënë tsi ja huërocanicuë pixëna. ² Jatsi quiha huësti huësti ca fariseobá Jesu nicaniquë:

—¿Jënixo tsi yoba pasomaha ca acanai? Anoma tsi xo yonocohaina joiti barí no ra —i Jesu qui fariseobo rabëroha niquë.

³ Jatsi quiha Jesú jato quëbiniquë:

—¿Quënëhacanish cabo ó ca David yamabá ani ca ma tsayayamayamani, naa Dios arati xobo qui ja jicoquë no? ⁴ Jicoxo tsi quiha Dios bësojó ca janani ca mapari ja bini quiha pixëna. Piniquë quiha jahuë joni bo ri. Jabi arati ibo bá mapari ja picaniquë pa. Roa quiha. Jabi noba jabi pasomaha ja picanai ca iniquë ra; jama, ja jochayamacaniquë iquia. ⁵ Jascaria, jënima tsi xo toa no acaina iquia, joiti bari Ibo ë nori quëshpi na —nëa tsi fariseobo qui Jesu nëcaniquë.

Mëquë choni jaya cato
Mateo 12.9-14; Marcos 3.1-6

⁶ Joiti bari huëtsá tsi quiha catiti xobo qui Jesu jiconiquë. Jicoxo tsi nohiria bo ja tiisimaniquë. Jabi toá tsi quiha tsaho iniquë mëncëcayá ca mëquë choni jayanish ca joni. ⁷ Jatsi quiha Jesu tsayatsi fariseobo, yoba tiisimacanaibo, tihì cabá huaniquë. Joiti bari pi Jesú joni jënimahuaxëhai ca ja jiscasani quiha, ja qui quësocatsi na. ⁸ Jama, ja shinacanaì ca Jesú cahëni quiha. Jaha tsi mëquë choni jayanish ca joni qui ja chaniniquë:

—Niihuë. Nëri johuë —iquiina.

Jatsi joni joiniquë. Joihax toá tsi ja niiniquë. ⁹ Jatsi quiha fariseobo, yoba tiisimacanaibo, tihì cabo qui Jesu chaniniquë:

—¿Yoi ni, jia ni, naa joiti barí tsi jia ca acaina? ¿Yoi ca axëhi ni noa? ¿Naa joni mëbixëhi ni noa? ¿Mëbiyamaxëhi ni noa? —i jato qui ja ni quiha.

¹⁰ Bëro boho-bohoquí tsi quiha jato Jesú jisniquë. Jatsi,

—Mi mëquë mëstëhuana —i joni qui ja niquë.

Jahuë mëquë ja mëstëhuajahuquë tsi quiha ja jënimahuahacanicuë. ¹¹ Jatsi quiha Jesu qui fariseobo, yoba tiisimacanaibo, tihì cabo caxarianiquë, joiti barí tsi toa joni ja jënimahuani iqui na. Jatsi chaninatsijacanicuë:

—¿Jënhuariaxëhi ni noa sa Jesu qui? —iquiina.

Jesu doce ca rabëtiria cabo
Mateo 10.1-4; Marcos 3.13-19

¹² Jaquirëquë quiha maca bo qui Jesu caniquë bëhoxhi na. Toa xo tsi quiha baquicha ja raanicuë Dios qui bëhoxquí na. ¹³ Huëaquë tsi jahuë rabëti bo ja biniquë. Doce ca joni bo ja bihaca tsi jahuë chani chitahëhuati ibo bo jato ja manëmaniquë. Jabi ja bini ca tsi xo naa:

¹⁴ Simón, naa Pedro ja janëni cato.

Pedro noma Andrés,

Jacobo,

Juan,

Felipe,

Bartolomé,

¹⁵ Mateo,

Tomás,

Alfeo baquë Jacobo,

gobierno pasomaha ca Simón,

¹⁶ Jacobo baquë Judas,

Judas Iscariote, naa jodioba chama bo qui Jesu mëanish cato.

Tihì cabo Jesú bini quiha jahuë Chani chitahëhuati ibo bo iti.

Huëstima ca jënimahuahacanina
Mateo 4.23-25

¹⁷ Maca bo ax jahuë rabëti bo ya botëhax mai para ca ití tsi Jesu niiniquë chanixëna. Toá tsi quiha huëstima ca banahuacanaibo ini quiha jahuë chani nicaxëna. Misco quiha. Jodioba mai, Jerusalén, ia quëpë ca Tiro, Sidón

yaca bo, tihi ca iti bo ax huëstima ca nohiria bëcani quiha jënimahuahacaxëna. ¹⁸ Jatsi jënimahuahacani quiha yoshi jayanish cabo. ¹⁹ Jasca, nohiria bá Jesu motsani quiha, ja quima jato jënimahuati chama tsëquëni iqui na. Jabi toca tsi jënimahuahacacani quiha ja motsacanaí cató no.

Ranicanaibo — Cohuë cabo

Mateo 5.1-12

²⁰ Jahuë rabëti bo bëis-hax tsi jato qui Jesu chaniniquë:

—Shoma xo mato noitiria cabo, Diós otohái ca qui ma jicoxëhai quëshpi na.

²¹ ‘Shoma xo mato paxnacanaibo. Sëyahuahacaxëqui mato. Shoma xo mato aracanaibo. Ranixëqui mato.

²² ‘Ea tahëhax pí mato qui nohiria caxano tsi mato bëta pí ja rabënacasyamacano tsi shoma xo mato ra. Jasca, shoma xo mato, nohiria bá mato ocahuaquë no, ëa ma chahahuahái ca tahëxo na. ²³ Jabi ë bacano tsi ranirixëqui mato, huëstima ca mato naipá ca copi jiaxëni cabo ma jayaxëhai quëshpi na. Toa barí tsi anomariaxëhi quiha mato copi ra. Jabi Dios Chani yoanish cabo tënëmahacani quiha jato ri, naa jaboqui ma yosihacahái jascaria.

²⁴ ‘Jama, noitiria xo toa jahuëmishni bo jayaria cabo. Nëá roha tsi ranicani quiha rë.

²⁵ ‘Noitiria tsi xo toa jaboqui sëyacanaibo. Paxnacaxëcani quiha.

‘Noitiria tsi xo toa jaboqui shiracanaibo. Toa barí tsi araconacaxëcani quiha, cohuë iquiina.

²⁶ ‘Noitiria xo mato, paraxo tsi jia tsi nohiria bá mato ocahuaquë no. Jabi toca tsi mato mahitsa ca Dios Chani yoanish cabo mato rëquëbo yamabá oquëhuaní quiha jato ri. Jato qui jia jato mahitsa ca chani iniquë pë —nëa tsi Jesu nëcانيquë jahuë rabëti bo yobahi na.

Noqui caxacanaibo no noino

Mateo 5.38-48; 7.12

²⁷ ‘Jabi ëa nicanaibo qui naa yoba aquia: Mato qui caxacanaibo noicana. Jato mëbicana. ²⁸ Mato ocahuacanaibo shomahuacana. Mato ranimixëni cabo bax bëhoxcana. ²⁹ Tsohuëcaracá pí mato tapaishano tsi ja qui mato tamo huëtisa acana tapaishahacati. Mato sahuëti pí joní bino tsi ja bëta iquinayamacana. Toa joni qui mi camisa ri acana. ³⁰ Mato jahuë bo pí joní bënano tsi ja qui acana. Acax, “Jahari bicasquia ra” iyamacana jahari bixëna. ³¹ Jia tsi nohiria huëtisa shomahuacana, naa mamë ma shomahuahacatsai jascaria.

³² ‘Jabi bëroria tsi xo mato noicanaibo noihaina. Iriama tsi xo toca ca ma noihaina iquia. Jabi jato noicanaibo noihi quiha chahahuayamacanaibo ri.

³³ Bëroria tsi xo mato mëbicanaibo ma mëbihaina. Iriama tsi xo toca ca ma mëbihaina ra. Toca tsi acani quiha chahahuayamacanaibo ri. ³⁴ Jabi bëroria tsi xo toa mato jahuë bo prestahuahacaina, mato qui nohiria bá parata aquë no. Tocacaqui chahahuayamacanaibo ri parata bixëna. ³⁵ Tocayamacana. Jabi nëcacana: Mato qui caxacanaibo noicana. Jato mëbicana. Mato jahuë bo prestahuahacana, jahari jahuëcara biti ó pasoyamaquí na. ¿Jabi “Gracias” iyamacanaibo, yoixëni cabo, tihi ca nohiria bo mëbiyamamayahi ni Dios ra? Jato mëbihi quiha. Japi tocacana mato ri. Tocapiquí tsi copi jiaxëni ca bixëqui mato ra. Mana ca Dios baquë bo ixëqui mato. ³⁶ Jabi noi-noiriahí quiha mato Jahëpa Dios. Japi noicana, ja noihi ca jascaria.

Ocahuayamacana

Mateo 7.1-5

³⁷ Huëtsa bo raniyamacana. Jatsi mato raniyamaxëhi quiha Dios ri. Huëtsa bo qui quësoyamacana, mahitsa. Quësoyamapimano tsi mato qui quësoyamaxëhi quiha Dios ri. Jasca pi nohiria mato pasomaha jochano tsi jato jocha shina-bënocana. Tocapimano tsi mato jocha shina-bënoxëhi quiha Dios ri. ³⁸ Jasca, huëtsa bo qui acana. Huashiyamacana. Tocapimano tsi mato qui axëhi quiha Dios. Jatsi huëstimaria ca bixëqui mato. Ma acai ca huino quiha. Oquë ca ixëhi quiha. Jia pi nohiria huëtsa bo ma mëbino tsi mëbihacaxëqui mato ri. Jama jia pi huëtsa bo ma mëbiyamano tsi iriamaxëhi quiha ma shomahuahacahai ca ri.

Mahitsa ca maestro bo yoati Jesú yobanina

³⁹ Jatsi chani Jesu jato qui yoaniquë:

—¿Jënahuariaxo raca bëco ca joní, bëco ca joni huëtsa mëpina? ¿Naporo quini qui paquëyamayamacaxëcahi ni jato tëquëta? Jabi jasca xo mahitsa ca maestro bo ri. Janyama bocani quiha ra. Janyama mëpihacahi quiha jato alumna bo ri rë. ⁴⁰ ¿Jënahuariaxo raca jato mahitsa ca maestro oquë tsi alumno bá cahëna? Jama, maestro jia cató pi jahuë alumno bo tiisima-tiisimano tsi ¿jaharisi iyamayamacaxëcahi ni? Jato maestro jascacaxëcani quiha jahuë alumno bo ra. ⁴¹ Jabi mabë xatë bá janyama ca acai ca tsayaxëni xo mato pë. Jato tsaya-tsayaquí tsi yoi ca ma acai ca jisyamaqui mato ra. ⁴² Anoma tsi xo toca ca ma acai ri. ¿Jënriahax raca “Anoma xo mi acaina, ëbë xatë bá” i ma na? ¿Jënriahax, “Mia ë mëbino ra” i ma na, oquë ca jocha ma aquë no mato ri pë? Jariapari mato shina ó ca jocha tsayaparicana, quiaxëni cabá. Mato oquë ca jocha niahax mabë xatë bo mëbiti mëtsa ixëqui mato ra, jahuë jocha niamaxëna.

Bimi jihuí saihuahaina

Mateo 7.17-20; 12.34-35

⁴³ Jabi bimi jia ca saihuatimaxëni tsi xo jihui yoi cato. Jascaria, bimi yoi saihuyamahahi quiha jihui jia cato. ⁴⁴ Ja saihuacanai ca bimí tsi cahëhacahi quiha jatiroha ca jihui. ¿Jënahuariaxo bimi jia ca ronoxë saihuana? Bimi jia ca saihuatimaxëni quiha. ⁴⁵ Jascaria, jabi jia ca saihuahi quiha joni jiaxëni cato. Jia tsi xo toa ja acaina, shina jia ca ja jaya ca iqui na. Jascaria, jabi yoi ca saihuahi quiha joni yoi cato. Anoma tsi xo toa ja acaina, shina yoi ca ja jaya ca iqui na. Jabi yoi ca jahuë bo pi jahuë shina rëamëno tsi chani yoi ca chanixëhi quiha ra.

Jabi jia ca jaya cato — Jabi yoi ca jaya cato

Mateo 7.24-27

⁴⁶ ‘¿Jënihax tsi “Ibobá” ëa quënacanaí pë, noho yoba ma ayamaquë no? ⁴⁷ Tobi ë qui bëcanaibo. Tobi ëa nicacanaibo, naa noho yoba acasanaibo. ⁴⁸ Xobo rohahuahai ca joni iquiria ca xo. Jariapari tsi mai huëyohi quiha, maxax bërohuaxëna. Jatsi maxax cacha jahuë xobo rohahuahi quiha. Jatsi jënë baino tsi xobo qui tocaxqui jënë chama; mahitsa. Poxoyamahahi quiha xobo, maxax cacha ja rohahuahacani iqui na. ⁴⁹ Jama, mai cacha xobo rohahuahai ca joni iquiria tsi xo noho yoba ayamahai cato. Noho yoba nichax ja qui yoi quiha. Jabi jënë baino tsi ja qui tocaxqui jënë chama. Jatsi poxohi quiha xobo rë, maxax cacha ja rohahuahacayamani iqui na. Poxoyoxëhi quiha toa xobo ra — i jato qui Jesu niquë.

7

Romano ca capitán

Mateo 8.5-13

¹ Jahuë chani jatihuahax tsi quiha jahari Jesu caniquë Capernaum yaca qui. ² Toá tsi quiha romanoba capitán racaniquë, naa yonati jayanish cato. Jabi iquihí quiha jahuë yonati iniquë; rësopaimaria. Jabi jahuë yonati naa capitán noini quiha. ³ Jatsi quiha Jesu yoati tsi capitán nicaniquë. Nicaxo tsi quiha jodioba yosibo rabëroha ca Jesu qui ja raaniquë, jahuë xobo qui joti nicamaxëna, jahuë baquë ja jënimahuano iquish na. ⁴ Jatsi quiha Jesu qui naa yosibo bocaniquë. Boxo tsi quiha Jesu ja nicacaniquë:

—Capitán bax jahuë yonati mi jënimahuano ra, shinajiaxëni ca joni ja nori ca quëshpi na. ⁵ Jasca, noba jimibo noihi quiha naa joni ra. Noba catiti xobo ja aniquë no bax na ra —nëa tsi quiha Jesu qui jodioba yosibo nëcaniquë.

⁶ Jaha tsi jato bëta Jesu caniquë. Jahuë xobo ja basimano tsi quiha jahuë rabëti bo capitán raaniquë chani ya.

—Mimë huënahuyamana, Ibobá. Noho xobo qui mi jicoyamano, anoma ca joni ë nori quëshpi na. ⁷ Ja tsi xo toa ë joyamahaina, noho jocha iqui na ra. Mi niñhai cató pi mi chanino tsi jënimahuahacaxëhi quiha noho yonati ra. ⁸ Jënima xo mi chani ra. Jabi ëa oquë ca chama bo nama xo ëa. Jato nicati cahëquia. Jasca, ëa nama xo soldadó bo ri. Ea nicacani quiha jato ri. “Bocata” i pi ë no tsi bocani quiha. “Bëcahuë” i pi ë no tsi bëcane quiha. Jabi “Jënimahuë” i pi mi no tsi jënimaxëhi quiha noho yonati iquia —nëa tsi capitán raani ca chani nëcaniquë.

⁹ Jatsi quiha Jesu shina-risiquiniquë jahuë chani nichahax na.

—Anomaria tsi xo naa joni ë qui chitimihaina ra. Jia tsi xo. Israél cabo chitimihai ca oquë quiha —i Jesu niquë.

¹⁰ Jesu jisbaya tsi jahari jato capitán xobo qui yosibo bocaniquë. Jënima quiha capitán yonati iniquë ra.

Shinapayo Jesú bësomanina

¹¹ Jisbëria tsi quiha yaca huëtsta, naa Naín icanai ca qui Jesu caniquë. Jasca, jahuë rabëti bo, nohiria misco, tihi cabo ja bëta bocaniquë. ¹² Jatsi yaca qui ja basimacano tsi quiha rësohax ca shinapayo ca joni yaca cacha nohiria bá bohi iniquë. Noitiria ini quiha jahuë jahëhua; bënë imanish ca quiha. Jasca, yama ini quiha jahuë baquë huëtsta rë. Jabi jahuë baquë maihuahi bocahi ja icani quiha. Jasca, ja bëta huëstima ca yacatá ca nohiria ini quiha jato ri.

¹³ Jatsi quiha Jesu cohuënaniquë yoxa jisi na. Jatsi,

—Arayamahuë, caí —i ja qui ja niquë.

¹⁴ Jatsi quiha joni nanëhacani ca caja qui Jesu caniquë. Cahax caja ja motsaniquë. Jatsi niiniquë caja iahai ca joni bo. Jatsi,

—Bësohuë, shinapayó —i Jesu niquë.

¹⁵ Jatsi quiha bësoyama ca joni tsahoniquë pa. Ja chanitapiniquë. Jatsi quiha jahuë jahëhua qui jahari baquë Jesú aniquë. ¹⁶ Ratëniquë nohiria tëquë. Jia tsi Dios ja ocahuacaniquë:

—Noqui xërëquë tsi xo Dios Chani yoati Ibo-iboria ra. Jahuë nohiria yoi bo mëbicansi quiha Dios ra —i jaca niquë.

¹⁷ Jabi toa barí tsi quiha Jesú ani ca huëstima ca nohiria bá nicaniquë. Nëama pacanani quiha toa chani. Jodioba mai, jato tëamë ca mai bo, tihi cabá tsi Jesú ani ca nichahacani quiha.

Juán dos ca joni raanina Jesu nicati

Mateo 11.2-19

¹⁸ Jabi Jesú ani ca jahuë bo yoati tsi ashimanish ca Juan rabëti bá nicaniquë. Nicaxo tsi quiha Juan ja yoacanicuë. ¹⁹ Jatsi quiha dos ca joni, naa jahuë

rabēti bo Juán quēnaniquē Jesu qui raaxēna. Jabi Xabahamati Ibo Jesu iqui ca ja cahēcasni quiha jaa ri, Jatsi,

—“¿Johai ca Xabahamati Ibo ma ni mia? ¿Joni huētsa ó pasoxēhi ni noa?” i Jesu qui cahuē —nēa tsi quiha Juan jato qui nēcaniquē.

Jatsi quiha jahuē rabēti bo Juán raaniquē nicaxēna. ²⁰ Jesu qui bēhax,

—Noqui Juán raaquē. ¿Johai ca Xabahamati Ibo ni mia? ¿Joni huētsa ó pasoxēhi ni noa? Cahēcatsi quiha Juan ra —i Jesu qui jaca niquē.

²¹ Jabi ja bēcaquē tsi quiha nohiria bo jēnimahuahi Jesu iniquē. Huēstima ca nohiria jēnimahuahacani quiha, naa iquicanaibo, yoshi jayanish cabo. Jasca, huēstima ca bēco cabo taismahacani quiha jato ri. ²² Jatsi Juán raani ca joni bo Jesu quēbiniquē:

—Jahari bocata. Ma tsayahana, ma nicahana, tihī cabo Juan yoacata. Taiscani quiha bēco cabo. Tapicani quiha huico choni jaya cabo. Pasohi quiha pasoyamacanaibo. Bēsotēquēcani quiha bēsoyama cabo. Jasca, xabahamati Chani nicacani quiha noitiria cabo. ²³ Jabi ranixēhi quiha ē qui chitimicanaibo ra —nēa tsi Jesu nēcaniquē Juan rabēti bo qui.

²⁴ Jatsi quiha Juán raani ca joni bá Jesu jisbērianiquē. Jisbēriajahuacaquē tsi quiha nohiria bo qui chanitsi Jesu niquē Juan yoati na.

—¿Jahuē ó ma pasoni jisxēna, naa xabachá ca Juan qui ma bocaquē no? ¿Shinapayo cato, naa yoshiní tētohuahacahai ca huasi jascaria ca joni ó ma pasoni? ²⁵ ¿Jahuē jisi ma bocani? ¿Copixēni ca raiti sahuēhaca joni jisti ó ma pasoni? Toca tsi ja iyamani quiha. Xobo-xoboriá tsi racacani quiha copixēni ca sahuēti jaya cabo. ²⁶ Mato nicaquia. ¿Jahuē ó ma pasoni jisxēna, ja qui cahi na? ¿Dios Chani yoati ibo ó ma pasoni? Jabi Dios Chani yoanish cabo oquē ca ma jisniquē iquia, naa Juan ma jisquē no. ²⁷ Jabi nēca tsi ii quiha Dios Quēnhacaniish cabo ó cato Juan yoati na:

“Mia bēbo noho Chani bēhai ca raaxēquia.

Mia bēbo mi quinia rohahuaxēhi quiha” ii quiha Dios Chani

—nēa tsi nohiria bo qui Jesu nēcaniquē Juan yoati na.

²⁸ Jatsi quiha Jesu jari nēcaniquē Juan yoati na.

—Yama tsi xo Juan oquē ca conish cato ra. Jama, Juan oquē ca tsi xo Díos otohái cato ó ca iriama cato ra. ²⁹ Jabi Juan chani nicahi quiha nohiria tēquē. Jasca, nicahi quiha impuestos bicanaibo ri. Jabi naa nohiria bo tsi xo toa Dios quinia jia ca banahuacanish cabo. Ja tsi xo toa ja ashimahacacanina.

³⁰ Jama, Dios quinia jia ca fariseobo, yoba tiisimacanaibo, tihī cabá nianiquē pē. Jato qui yoi quiha. Ja ashimahacacasyamacani quiha —nēa tsi quiha Jesu nēcaniquē Juan yoati na.

³¹ Jatsi Jesu nēcaniquē toa nohiria bo yoati na:

—¿Jahuē jasca ni naa jaboqui bēsocanai ca nohiria ra? ¿Jahuē quiri ni naa nohiria pē? ³² Plazá ca ihihai ca ranihuatimaxēni ca xocobo jascaria ca xo. “Bisto no ino” i pi huēsti ca maxo no tsi “Pabēcasyama xo noa ra” ii quiha yosahai ca maxo huētsa, cohuēcatsi na. Jama, “No nahuarino. No cohuēno” i pi jaca no tsi “Tsrircasqui noa” icani quiha pē. Jabi naa ranihuahacatimaxēni ca xocobo jascaria xo naa nohiria bo ri. ³³ Jabi Juan joquē tsi jato qui yoi quiha jahuē jabi iniquē pē. Joxo tsi Juan samaniquē. Jēnē ja ayamaniquē. Tocajano tsi “Yoshi jaya xo” iqui mato ja yoati na pē. ³⁴ Jatsi ē joniquē. Ea ti tsi xo oriquihaina. Ea ti tsi xo jēnē acaina. Tocahēno tsi “Oriquití-naxēni, jēnē-naxēni tsi xo toa. Jasca, jochacanaibo ya rabēnahi quiha pē” iqui mato pē ēa yoati na. ³⁵ Jabi mato qui yoi xo noho jabi ē acaina. Jasca, mato qui yoi tsi xo Juan jabi ri. Jama, tiisiyoí-canaibo qui jia tsi xo noba jabi ra.

Jochahuaxëni ca yoxá Jesu tahë ashimanina

³⁶ Huësti ca fariseobá quiha Jesu qui joi amaniquë ja bêta ja oriquino. Jatsi quiha jahuë xobo qui Jesu caniquë. Cahax ja tsahoniquë oriquixëna. ³⁷ Jabi toa yacatá tsi racani quiha jochahuaxëni ipaonish ca yoxa ri. Fariseoba xobó tsi oriquihi Jesu ini nori ca ja peronish quiha. Nicahax toa tsi quiha ja caniquë jisi na. Botiá ca copixëni ca perojome ja bëniquë. ³⁸ Jicohax Jesu tahë tsi ja mëniniquë. Toá tsi quiha ja aracona-niquë. Jatsi jahuë bêho yaxo tsi quiha jahuë tahë bo ashimatsijahuaniquë. Jatsi jahuë boó tsi jahuë tahë ja shinahuaniquë. Shinahuaxo tsi quiha ja tatsoniquë. Jaquirëquë jahuë tahë qui perojome ja japaniquë ra. ³⁹ Jasca, yoxá ani ca fariseobá, naa Jesu qui joi amanish cató jisi quiha. Jisi tsi ja shinaniquë, “Jochahuaxëni ca naa yoxa nori ca cahëyamahi quiha tonia. Dios Chani yoati ibo yoi pi irohaquí tsi motsahai ca yoxa ja cahëquë aquë ra. Jochahuaxëni ca yoxa tsi xo naa” i ja niquë jamë no. ⁴⁰ Jatsi Jesú quëbiniquë:

—Jahuëcara mia yoacasquia ra, Simón—iquiina.

—Ihuë, Maestró—i Simón niquë.

⁴¹ Jatsi quiha ja qui chani Jesú yoaniquë:

—Tobi quiha dos ca joni bo iniquë. Jato qui chamá parata prestahuananiquë. Jariapari ca joni qui quinientos ca parata ja aniquë. Naa copixëni ca parata quiha. Jasca, joni huëtsa qui nama, naa cincuenta ca parata ja qui ja aniquë. Prestamo quiha. ⁴² Jatsi quiha jahari toa parata ibo qui ati mëtsama ja icani quiha, naa dos ca joni bo rë. Noitiria ca joni bo quiha. Jatsi jato noíquí tsi quiha jato cuenta bo chamá nianiquë ra. Shinajiaxëni ca chama ja ini quiha. Jabi jato cuenta bo chamá niaquë tsi quiha ¿jëni ca joni oquë tsi jahuë chama noini? ¿Cuenta chahitaxëni ca jayanish ca ni? ¿Cuenta pistia ca jayanish ca ni? Ea yoahuë —nëa tsi quiha Simón qui Jesu nëcaniquë.

⁴³ —Tonía oquë tsi noiniquë cuenta chahitaxëni ca jayanish cato ra —i Simón niquë.

—Oca xo ra —i Jesu niquë.

⁴⁴ Jatsi yoxa quiri bësohax Simón qui Jesu chaniniquë:

—Mi xobo qui ë jicoquë ra. Jënëpaxa ë qui mi ayamaquë rë, tachocohati; jama, jahuë bêho yaxo tsi noho tahë ja chocoquë ra. Jaquirëquë jahuë boó tsi noho tahë ja shinahuacuë. ⁴⁵ E jicoquë tsi ëa mi joihuayamaquë rë, tatsohai cató no. Jama, naa yoxa tsayahuë. E jicoquë rohari tsi noho tahë huëstima tsi ja tatsoquë ra. ⁴⁶ Noho boo qui xëni mi ayamaquë rë. Jama, noho tahë bo qui copixëni ca perojome ja japaquë ra. ⁴⁷ Jaha tsi masahacuë jahuë huëstima ca jocha iquia ra, ja noiriaha ca quëshpi na. Jama, ichariama ca masaha ca jocha jaya ca tsi xo toa noiymariahai cato ra —nëa tsi Simón qui Jesu nëcaniquë.

⁴⁸ Jatsi quiha,

—Masahacuë mi jocha ra —i yoxa qui Jesu niquë.

⁴⁹ Jatsi chaninatsi mesa tsahonish cabo niquë:

—¿Tsohuëcara ni naa joni sa, naa jocha masahai cato? —iquiina.

⁵⁰ Jatsi quiha yoxa qui Jesu chaniniquë:

—Mi xabahamahacuë ra, mi chitimihai cató no. Bëpasi tsi cata—iquiina.

8

Galiléa ca yaca bo qui Jesu shishonina

¹ Jaquirëquë quiha yaca huëtsa, yaca huëtsa qui Jesu caniquë. Dios Chani yoahi ja caniquë Díos othai ca yoati na. Jasca, ja bêta bocaniquë doce ca

banahuacanaibo ri. ² Bocaniquë ichariama ca yoxa bo ri, naa ja jënimahuani ca yoxa bo. Jasca, caniquë María Magdalena, naa siete ca yoshi jayanish cato. ³ Jasca, jato bëta caniquë Juana, Chuza ahuini, naa Herodes empleado. Bocaniquë Susana, yoxa huëtsa bo ri. Jabi Jesu, jahuë rabëti bo, tihí cabo naa yoxa bá orihuapaoni quiha jato parata yoí no.

Bëro sayanish cato

Mateo 13.1-9; Marcos 4.1-9

⁴ Toatiyá tsi Jesu qui huëstima ca nohiria bëcaniquë. Huëstima ca yaca bo ax ja bëcani quiha jahuë chani nicaxëna. Jatsi bëroria ca chani Jesu jato qui yoniquë jato tiisimaxëna. Ja nëcaniquë:

⁵ —Bëro sayahi quiha joni caniquë. Bëro sayajahuano tsi quiha huësti huësti ca bëro bahi tapái xapaquëniquë. Jahá tsi ja jamahacani quiha. Jasca, jahá ca bëro isa bá piniquë. ⁶ Jasca, bëro huëtsa maxax mai qui xapaquëniquë. Jabi shinahacax ja chonini quiha jënë yama pi ja ini iqui na. ⁷ Jatsi bëro huëtsa masa xërëquë tsi xapaquëniquë. Bëro ya shinahabëquiniquë quiha toa masara pë. Jatsi banahaca ca mapahacani quiha. ⁸ Jatsi bëro huëtsa mai jiaxëni ca qui sayahacaniquë. Shinahaxo tsi huëstima ca bimi ja saiuaniquë. Tihiria ca bimi saini quiha —nëa tsi Jesu nëcaniquë nohiria bo qui.

Chanipama tsi,

—Ea nicati xo jatiroha cabo ra —i ja niquë.

⁹ Jabi Jesú yoani ca chani jahuë rabëti bá cahëyamaniquë. Ja quëshpi tsi,

—¿Jënihi ni naa noqui mi yoahana sa? —i ja qui jaca niquë.

¹⁰ Jatsi quiha Jesú quëbiniquë:

—Mato qui tiisi acacaniquë, naa Diós otohái ca yoati na. Jonë ca jahuë bo ma cahëxëti xo. Jama, naa jonë ca jahuë bo cahëyamaxëhi quiha tēxë bo. Ja tsi xo toa nëca ca chani jato qui chaniquia, nicaxo ja cahëyamacano iquish na.

Jahuë chani Jesú bërohuana jahuë rabëti bo bax na

Mateo 13.18-23; Marcos 4.13-20

¹¹ Jatsi quiha jahuë chani Jesú bërohuaniquë:

—Jabi Dios Chani tsi xo toa sayahaca ca bëro. ¹² Toa bahi tapái cabo tsi xo toa Dios Chani nicahai ca nohiria bo. Chani ja nicacano tsi johi quiha Satanás. Joxo tsi jato shina ó ca chani tsëcahi quiha rë, ja chahahuayamacano xabahamahacaxëna. ¹³ Jabi maxax mai qui sayahaca ca bëro jascaria tsi xo nohiria huëtsa. Ranixo tsi Dios Chani biriacani quiha nicaxo na. Jama, jato shina ó tsi tapoyamahi quiha Dios Chani rë. Naamayamahi quiha ja chahahuacanaina rë. Dios Chani tahëhax pi tēnëmahacaqui tsi Dios Chani niacani quiha pë. ¹⁴ Jabi masa xërëquë sayahaca ca bëro jascaria tsi xo nohiria huëtsa. Dios Chani nicacaquë jato ri. Jama, Dios quima jato ninihi quiha maí ca jahuë bo. Toa jahuë bo shina-shinacani quiha pë. Jatsi Dios Chani tsihaqui quiha toa parata ó ja quëëcanaina. Jasca, tsihaqui quiha toa jato ranihuahai ca jahuë bo pë. Ja quëshpi tsi jato shina ó ca tsi anitimaxëni tsi xo Dios Chani rë. ¹⁵ Jama, mai jiaxëni sayahaca ca bëro jascaria xo nohiria huëtsa. Dios Chani nicacanaibo tsi xo naa. Nicahax jato qui jia quiha jahuë Chani ra. Chahahuacani quiha ra. Chahahuaxo tsi anomaria tsi xo toa Dios bax ja acanaina.

Yoahacati xo Jesu chani

Marcos 4.21-25

¹⁶ ¿Caca nama, oxati nama jahuë lamparina janahi ni ibo pa, tsamaxo na? Tocayamahi quiha. Bëroria tsi janahi quiha, naquëtë ja huëano jicocanaibo bax na. ¹⁷ Jascaria tsi bërohuahacaxëti xo nohiria bo qui yoahama ca tēquë.

¹⁸ Jatsi quiniacaxëcahuë. Jia tsi Dios Chani nicatsacana. Jia pi ma nicano tsi anixëhi quiha mato tiisi. Jama, ja bichi ca tiisi pistia bënoxëhi quiha nicacasyamãcanaibo —nëa tsi quiha Jesu nëcaniquë jahuë chani bërohuahi na.

*Jesu jahëhua, jahuë noma bo
Mateo 12.46-50; Marcos 3.31-35*

¹⁹ Jabi jahuë jahëhua, jahuë noma bo, tihi cabo Jesu qui bëcaniquë. Jama, ja qui basimatimaxëni quiha ja icaniquë ja qui quëtsoni ca nohiria bo iqui na.

²⁰ Jatsi quiha Jesu qui nohiria bo chaniniquë:

—Bëcaquë mi ihua, mi noma bo ra. Xobo cacha niicani quiha. Mia jiscasani quiha —iquiina.

²¹ Jatsi quiha Jesú quëbiniquë:

—Noho jahëhua yoi, noho noma yoi bo, tihi cabo tsi xo toa Dios Chani nicacanaibo. Tihi cabo tsi xo toa jahuë yoba acanaibo —iquiina.

*Yoshini, choca, tihi cabo Jesú janacamanina
Mateo 8.23-27; Marcos 4.35-41*

²² Toatiyá tsi quiha noti qui Jesu jiconiquë jahuë rabëti bo ya. Jicohax,

—¿Ja rabëquëx ca qui canomani? —i jato qui ja niquë.

Jatsi shitatsijacanicuë. ²³ Shitajacano tsi quiha notí tsi oxa Jesu iniquë. Jatsi ianë tsi cosporiatsi yoshi niquë. Jato noti rëamëtsi quiha jënë iniquë rë. Jëtëquëpaimaria jato noti ini quiha. ²⁴ Jatsi Jesu bësomahi ja bocanicuë.

—Jisa Maestró. Jëtëquëpaima xo noa ra —i jaca niquë.

Jatsi quiha Jesu joiniquë. Joixo tsi quiha yoshini, choca, tihi cabo ja raahaniquë. Jatsi quiha janacanicuë yoshini. Pasiniquë ia ri. ²⁵ Jatsi Jesú jato nicaniquë:

—¿Yama ni ë qui ma chitimihaina ra? —iquiina.

Raquëhax,

—¿Tsohuë cara ni naa sa? Ja qui nicahi quiha yoshini, choca pa —i jaca niquë.

Jatsi ja ratëyocanicuë.

*Yoshi jayanish ca jënimahuahacanina
Mateo 8.28-34; Marcos 5.1-20*

²⁶ Galilea mai jisbaya tsi quiha ia rabëquëx ca qui ja shitacanicuë Gadara icanai ca mai qui. ²⁷ Rërëhax Jesu tëmahinanicuë. Toa xo tsi quiha yoshi jaya cató jato bëchaniquë. Tsoboco ja ini quiha. Siri tsi sahuëti ja sahuëyamani quiha. Jasca, jahuë xobó tsi ja racayamani quiha, rësonish caba maí tsi ja chitëcasni iqui na. ²⁸ Jatsi Jesu tsayahax ja sainiquë. Saihax ja bësojó tsi ja mëniniquë. Jatsi,

—Ea huënhuayamahuë Jesú, mana ca Dios Baquë. Ea tënëmayamahuë iquia —i Jesu qui joni niquë joi pistiamá no.

²⁹ Jabi nëca tsi quiha ja chaniniquë, “Ja quima tsëquëcahuë” i yoshi bo qui Jesu ni nori quëshpi na. Jabi huëstima tsi quiha yoshi bá naa joni qui tsaminiquë rë. Jatsi jahuë yoshi iqui tsi quiha nohiria bá jahuë mëquë bo, jahuë tahë bo, tihi cabo nëxapaoni quiha mëchichó no, ja paxayamano iquish na. Jama, mëchicho ja tësapaoni quiha. Jasca, xabaca, nihi, tihi cabo qui ja jabapaoni quiha yoshi iqui na. ³⁰ Jatsi quiha,

—¿Jahuë ni mi janë ra? —i toa joni qui Jesu niquë.

—Seis Mil —i quiha joni niquë, huëstima ca yoshi ja qui jiconi nori iqui na.

³¹ Jatsi yoshi bá Jesu bënarianiquë, tënëtiya qui jato ja raayamano.

³² Jabi basima xo tsi quiha yahua jinaya cabá pihi iniquë. Yahua tirixëni quiha. Jatsi quiha,

—Japa toa yahua jinaya cabo qui noqui raatsana. Jato qui no jicono ra — iriatsi jaca niquë Jesu qui.

Jatsi,

—Bocata —i jato qui Jesu niquë.

³³ Jatsi quiha joni quima ax ja natsëquë-caniquë. Natsëquëhax yahua qui ja jicocaniquë. Jatsi quiha jabatsi yahua tirixëni niquë. Maca ax rënichihax ia qui ja jabayocaniquë. Ja nëachiyocaniquë. ³⁴ Jatsi yahua obëso cabo jabaniquë

yaca qui. Jënipijani ca ja yoabonacani quiha. ³⁵ Jatsi nohiria bocaniquë ocapijani ca jisi na. Jesu qui ja bëcaniquë. Toá tsi quiha yoshi jayanish ca joni ja jiscaniquë. Jesu tapaí tsaho ja ini quiha. Sahuëti sahuë ja ini quiha. Jënima ja ini quiha. Jatsi ja raquëyocaniquë tsayahax na. ³⁶ Jatsi yoyoxëni ca

joni jënimahuahacani nori ca quinia jisnish cabá yoaniquë bëcanish cabo qui.

³⁷ Jatsi pë Jesu bënatsi quiha Gadara maí ca nohiria tëquëtá huaniquë jato ja jisbayano. Ja raquëyocani quiha. Jatsi noti qui ja jicohaca tsi quiha Jesu caniquë. ³⁸ Jabi yoshi jayanish ca joni Jesu ya cacasniquë jaa ri,

—Mi bëta cacasquia —iquiina.

Jama, jahari jahuë xobo qui Jesú raaniquë.

³⁹ —Mi xobo qui cata. Mi bax Diós aca ca yoata —i ja qui Jesu niquë.

Jisbaya tsi quiha toa yacata xo tsi ja bax Jesú ani ca ja yoabonaniquë ra.

Jairo jahini, jimihacai ca yoxa, tihí cabo jënimahuahacani

Mateo 9.18-26; Marcos 5.21-43

⁴⁰ Ja rabëquëx ca ax Jesu bacaquë tsi quiha rani tsi nohiria bá joihuaniquë, ja manacanaí ca quëshpi na. ⁴¹ Jatsi quiha catiti xobo chama joniquë, naa jairo icanai cato. Jesu tahë tsi ja mënihaca tsi,

—Noho xobo qui johuë ra —iriatsi ja qui ja niquë.

⁴² Jabi rësopaimaria quiha jahuë jahi iniquë rë. Doce ca año bo jayani quiha. Jatsi ja bëta Jesu caniquë. Ja cano tsi quiha ja qui nohiria quëtsojahuacaniquë. Huëstima ca nohiria quiha.

⁴³ Jabi nohiria xërëquë tsi quiha jimihacai ca yoxa iniquë. Doce ca año no tsi ini quiha ja jimihanina rë. Jasca, jahuë parata tëquë doctor bo qui ja mëani quiha jënimahuahacaxëna. Jënimahuahacatimaxëni ja ini quiha. ⁴⁴ Jabi Jesu cho quiha naa yoxa basimaniquë. Basimaxo tsi quiha jahuë sahuëti quëpë ja motsaniquë. Jatsi jënëtapiniquë ja jimihacaina ra.

⁴⁵ Jatsi quiha,

—¿Tsohuë ëa motsaha? —i Jesu niquë.

—Yama tsi xo toa mia motsahaina ra —i quiha nohiria bo niquë.

Jatsi pasi quiha nohiria bo iniquë. Jatsi,

—Tsayahuë. Mi qui quëtsoyani quiha nohiria bo ra, Maestró. Mia tijihacani quiha. ¿Jënhuarihax “¿Tsohuë ëa motsaha?” i mi na ra? —i Jesu qui Pedro niquë.

⁴⁶ Jatsi Jesú quëbiniquë:

—Ea motsayaquë nohiria iquia. E quima ax noho chama tsëquëquë ra —iquiina.

⁴⁷ Jatsi mëmëriatsi quiha yoxa niquë.

—Cahëhi quiha rë —i jamë ja niquë.

Jatsi Jesu qui johax tsi quiha ja bësojó yoxa mëniniquë. Mënixo tsi nohiria bo bësojo xo tsi ja ani ca ja yoaniquë.

—Mia ë motsaquë jënimahuahacaxëna ra. E jënimahuahacatapiquë ra —i Jesu qui yoxa niquë.

48 Jatsi,

—Mi jënimahuahacaquë caí, mi chitimiha ca quëshpi na. Bëpasi cata —i ja qui Jesu niquë.

49 Chanijano tsi quiha chama Jairo xobo ax chani bëhai ca cahëniquë. Cahëhax,

—Rësoquë mi jahi pistia rë. Maestro jari huënahuyamahuë —i Jairo qui ja niquë.

50 Jama, nicahax Jesu chaniniquë:

—Raquëyamatsina. E qui mi chitimiti xo. Jënimaxëhi quiha mi jahini ra —iquiina.

51 Jatsi xobo qui ja cahëniquë. Cahëhax,

—Nohiria ë bëta jicoyamano —i ja niquë.

Jatsi quiha Pedro, Juan, Jacobo, jahini jahëpa, jahuë jahëhua, tihi cabo roha Jesu ya jiconiquë. 52 Jahi tahëhax tsi araconahi nohiria tëquë ini quiha. Jatsi,

53 —Arayamacana. Bëso xo ra. Oxa roha —i jato qui Jesu niquë.

Jatsi quiha nohiria bá osaniquë, ja rësoni nori ja cahëcani quëshpi na. 54 Jatsi xotaco mëquë Jesú biniquë. Bichi tsi,

—Bësohuë, caí —i ja qui ja niquë.

55 Jatsi ja bësotëquëniquë. Ja niitapiniquë. Jatsi quiha,

—Pimahuë —i jahuë nabo qui ja niquë.

56 Ratëniquë jahuë nabo, rani-ranihi na. Jatsi,

—Jënipijaha ca yoayamacana —i jahuë nabo qui Jesu niquë.

9

Jahuë doce ca rabëti bo Jesú raanina

Mateo 10.5-15; Marcos 6.7-13

1 Jesú jahuë doce ca rabëti bo quënaniquë ja caticano. Quëna xo tsi quiha chama jato qui ja aniquë yoshi bo tsëcati, noitiria cabo jënimahuati.

2 Jatsi quiha jato ja raaniquë Diós otoiha ca chani ja yoacano, isicanaibo, iquicanaibo, tihi cabo ja jënimahuacano. 3 Yobapama tsi Jesu nëcaniquë:

—Mëquëya bocana. Coti jihui, sota, oriquiti, parata, tihi cabo boyamacana.

Rabë ca sahuëti boyamacana; huësti ca roha. 4 Tsohuëcaracá xobo qui jicohax toá tsi chitëcana. Chitëquí tsi xobo rarinyamacana. 5 Jasca nohiria bá pi mato joihuayamano tsi toa yaca jisbayacana. Jisbaya tsi mato tahë ca cospo totohacahuë jato jocha jismaxëna. Toca tsi jato qui Dios caxa ma jismati xo —i quiha jato qui Jesu niquë.

6 Jatsi quiha ja bocaniquë. Yaca bo ja nacocani quiha, Dios Chani yoahi na. Jasca, jatiroha ca iti xo tsi quiha noitiria cabo ja jënimahuacaniquë.

Juan yamabo yoati Herodés nicanina

Mateo 14.1-12; Marcos 6.14-29

7 Jatsi quiha chama Herodés nicaniquë jatiroha ca Jesú ani ca yoati na. Nicahax ja shina-risiquiniquë. Shinati pi ja cahëyamani quiha “Bëso xo Juan yamabo ra” i nohiria bo ni quëshpi na.

8 Jasca,

—Elías yamabo tsi xo naa jisiquihaina tonia —i huëtša bo niquë.

—Bësoquëquë Dios Chani yoanish ca huësti cato —i quiha huëtša bo niquë.

9 Jatsi Herodes nëcaniquë:

—Juan mapo ë quëesayamëquë ra. ¿Tsohuëcara ni naa joni sa? Anomaria tsi xo toa nohiria bo chanihai ca ja yoati na —iquiina.

Nohiria bo iqui tsi Herodés Jesu jiscasni quiha.

Cinco mil ca joni bo Jesú pimanina
Mateo 14.13-21; Marcos 6.30-44; Juan 6.1-14

¹⁰ Jatsi quiha Jesu rabëti bo bacaniquë. Bacaxo tsi quiha ja acani ca tëquë Jesu ja yoacanicuë. Jaquirëquë jahuë rabëti bo Jesú boniquë Betsaida yaca quiri. Jato bëta ja icasni quiha jamëpistiá no. ¹¹ Jabi ja bocaquë tsi quiha nohiria bá nicaniquë. Nicaxo tsi quiha ja banahuacanicuë jato ri. Jatsi nohiria Jesú joihuaniquë. Joihuaxo tsi quiha Díos otohái ca yoati jato ja yoanicuë. Jasca, noitiria cabo ja jënimahuanicuë.

¹² Jaquirëquë yata tsi quiha ja qui jahuë rabëti bo bëcaniquë. Caquë quiha bari. Bëhax tsi jahuë rabëti bo ja qui chaniniquë:

—Basima ca yaca bo, huai bo, tihi cabo qui nohiria raatsana. Oxati bo, piti, tihi cabo ja bicano ra. Yama tsi xo nëá ca racati ra —i Jesu qui jaca ni quiha.

¹³ Jatsi quiha,

—Jato pamacana —i jato qui Jesu niquë pa.

Jatsi,

—Yama tsi xo nëá ca piti ra. Cinco ca mapari, dos ca sanino, jaroja tsi xo rë. ¿Naa nohiria tëquë bax mapari copihí caxëhi ni noa pa? —i ja qui jaca niquë.

¹⁴ Jabi toá tsi quiha cinco mil ca joni bo mani ini quiha. Huëstima quiha. Jatsi,

—Maxo cincuenta, maxo cincuenta, nëca tsi nohiria tsahomatsacana —i jahuë rabëti bo qui Jesu niquë.

¹⁵ Jatsi toca tsi ja acanicuë. Nohiria tëquë ja tsahomacanicuë. ¹⁶ Jaquirëquë cinco ca mapari, dos ca sanino, tihi cabo Jesú biniquë. Bixo tsi quiha mana nai qui tsayahax tsi “Gracias” Díos qui i ja niquë piti quëshpi na. Jatsi mapari ja tëxënamanicuë. Tëxënamaxo tsi jahuë rabëti bo qui ja aniquë nohiria bo qui ja taacano. ¹⁷ Piniquë nohiria tëquëta. Ja sëyayocanicuë. Jaquirëquë mapari quësi bo, sanino, naa pihama ca quësi bo ja catiacanicuë ra. Doce ca caca ja rëacani quiha.

—Xabahamati Ibo xo Mia —i Pedro nina

Mateo 16.13-19; Marcos 8.27-29

¹⁸ Xaba huëtsá tsi Jesu bëhoxno tsi quiha ja bëta jahuë rabëti bo iniquë. Jatsi jato ja nicaniquë:

—¿Tsohuë ni ëa? ¿Jënihi ni nohiria bo ëa yoati na? —i jato qui Jesu niquë.

¹⁹ Jatsi jahuë rabëti bá quëbiniquë:

—“Ashimanish ca Juan yamabo përe xo mia” ii quiha huëstima cabo. “Elías yamabo” ii quiha huëtsa bo. Jasca, “Dios Chani yoanish cabo ó ca huësti cato, naa rësonish cabo quima ax tëronoyamëtax cato” ii quiha tëxë bo —nëa tsi Jesu qui ja nëcanicuë.

²⁰ Jatsi jato ja nicaniquë:

—¿Japa mato tsa ni? ¿Tsohuë ë nori ca icanai? —i Jesu niquë.

Jatsi quiha,

—Dios raahacanish ca Xabahamati Ibo xo mia ra —i Pedro niquë.

Ja rësohai yoati tsi Jesu chaninina

Mateo 16.20-28; Marcos 8.31-9.1

²¹ Jatsi jahuë rabëti bo Jesú yobanicuë, tsohuë ja iqui ca ja yoayamacano iquish na. ²² Yobapama tsi ja nëcanicuë:

—Tënë-tënëxëquia naa Nohiria Baquë ë nori cato ra. Jasca, ëa niacaxëcani quiha yosibo, arati ibo-iboria bo, Díos yoba tiisimacanaibo rë. Tihi cabá ëa

namëcaxëcani quiha. Jama, tres bari huinocaquë tsi bësotëquëxëquia ra —i jahuë rabëti bo qui ja niquë.

²³ Jaquirëquë Jesu nëcaniquë:

—Ea pi banahuacasquí tsi ma acatsai ca ma shinayamaxëti xo. Jatiroha ca barí tsi mato cruz ma iano ra. Iaxo ëa ma banahuano. ²⁴ Jabi xabamahacayamaxëhi quiha toa jahuë noma jabi ó quëëmíxëni cato. Jama, xabamahacaxëhi quiha jahuë noma jabi chihohuahai cato ëa tahëxo na.

²⁵ Jatsi jatiroha ca maí ca jahuë bo joní bëbomitsa, ricoria ca iquiina. Jama tënëtiya qui pi caquí tsi çjahuëcara ca ja bëbona? ²⁶ Jasca pi ëa, noho chani, tihí cabo qui jaboqui nohiria bërabino tsi jato qui bërabixëquia ëa ri, xaba huëtsa ë joxëquë no. Toa barí tsi Rey jascaria tsi, naa noho ángel bo ya tsi joxëquia ra, noho jahëpa chamá no. ²⁷ Mato parayamaquia, “Díós otohai ca oquë jisxëqui mato ichariama cabo” iquia. Rësonox parí tsi ja otohái ca oquë jisxaxëcani quiha —nëa tsi quiha Jesu nëcaniquë.

Jahuë oquë Jesú jismanina

Mateo 17.1-8; Marcos 9.2-8

²⁸ Nëca tsi chanixo tsi Pedro, Jacobo, Juan, tihí cabo maca qui Jesu boniquë oquëri ca semaná no. Jaha tsi Díos qui ja bëhoxcasni quiha. ²⁹ Díos qui bëhoxjano tsi quiha jahuë bëmana jaria jabitiniquë. Jasca, joxonaria-niquë jahuë sahuëti. ³⁰ Jatsi jisiquitapiniquë rabë ca joní bo. Ja bëta chaníhi ja icani quiha. Moisés yamabo, Elías yamabo, tihí cabo jisiquini quiha. ³¹ Jabi mana ca oquë ca ja jayacani quiha jato ri. Anomaria jato jaria iní quiha. Jabi chaninahi ja icaniquë, naa Jerusalén tsi Jesu nahai ca yoati na. ³² Jabi coshi iní quiha Pedro, Jacobo, Juan, tihí caba bëro. Jatsi ja bësocaniquë. Bësoxo tsi quiha Jesu, ja bëta rabë ca niíhai ca joní bo, tihí cabo ja jisicaniquë. ³³ Jatsi nai qui Moisés yamabo, Elías yamabo, tihí cabá jisbayano tsi Pedro chaniniquë:

—Noquí jia tsi xo nëá no iquiina. Tres ca tapas no ano ra. Huësti mí-na, huësti Moisés yamabá-na, huësti Elías yamabá-na —i ja ni quiha.

Jabi toca tsi Pedro chaniniquë, ratëhi na. ³⁴ Jari chanijano tsi quiha tsëmo joniquë. Joxo tsi jato ja mapaniquë. Jatsi tsëmo qui Moisés yamabo, Elías yamabo, tihí cabo jicoquë tsi quiha ja raquëcaniquë. ³⁵ Jatsi tsëmó ca joi ja nicacaniquë:

—Noho Baquë tsi xo naa. E bini ca tsi xo naa noho yonoco ati. Ja qui nicatsacana —i joi niquë.

³⁶ Jatsi joi pasiquë tsi quiha toá tsi Jesu iniquë. Jamëpístia quiha. Toatiyá tsi ja jiscani ca jahuë bo jahuë rabëti bá yoayamani quiha. Ja bëpacani quiha jënipijani ca yoati na.

Yoshi jayanish ca baquë Jesú jënimahuanina

Mateo 17.14-21; Marcos 9.14-29

³⁷ Maca químa ax botëxo tsi quiha nohiria huëstima ca ja bëchacanicuë huëaquë no. ³⁸ Jatsi nohiria xërëquë ó ca joní Jesu quënaniquë:

—Anoma tsi xo noho baquë ra, Maestró. Noho baquë yoi ra. Tsayapa. ³⁹ Noho baquë qui yoshini tsamihaca tsi sai-saihitapíhi quiha noho baquë rë. Jatsi noho baquë caxo amahi quiha. Jatsi bacoxhi quiha rë. Natohuahi quiha. Natohuaxo tsi jisbayahi quiha ra. ⁴⁰ Jasca, “Noho baquë ó ca yoshi tsëcacahuë” i mí rabëti bo qui ë quë. Tsëcatimaxëni ca xo rë —nëa tsi Jesu qui joní nëcaniquë.

⁴¹ Jatsi Jesú quëbiniquë:

—Chitimitimaxëni ca yosaxëni ca nohiria xo mato pë. Çjahuë tihí tsi mato tënëxëhi ní ëa pë? Mi baquë nëri bëhuë —nëa tsi Jesu nëcaniquë.

⁴² Jatsi baquë basimano tsi yoshini mai qui baquë nianiquë. Caxo ja amahacani quiha. Jatsi yoshi Jesú raahaniquë. Raahaxo tsi quiha ja jënimahuaniquë. Jaquirëquë jahuë jahëpa qui jahari ja aniquë. ⁴³ Jatsi Dios chama-chamaria qui nohiria tëquë ratëyoniquë tsayahax na.

Jarësoxëhai yoati tsi Jesu chaninina

Mateo 17.22-23; Marcos 9.30-32

Jari Jesú ani ca yoati tsi nohiria chaninano tsi quiha jahuë rabëti bo qui Jesu chaniniquë:

⁴⁴ —Jia tsi ëa nicacana, ma shina-bënoyamano iquish na. Nohiria caxëniiria cabo qui ë mëahacaxëti xo —i ja niquë.

⁴⁵ Jama, Jesú yoani nori ca ja cahëyamacani quiha. Jato joma quiha. Jari jato qui jonë ini quiha ja yoanina. Jama, Jesu ja nicayama-caniquë ja yoaha ca ja bërohuano, raquëqui na.

¿Tsohuë ni oquë cato?

Mateo 18.1-5; Marcos 9.33-37

⁴⁶ Jatsi chaninatsi Jesu rabëti bo niquë, tsohuë jato oquë ca ixëti iqui ca yoati na. ⁴⁷ Jabi ja chaninacana nori ca Jesú cahëni quiha. Cahëxo tsi quiha baquë pistia ja biniquë. Bixo tsi ja tapai ja nimaniquë. ⁴⁸ Nimahax, —Ea joihuahi quiha tsohuëcara ca noho janë tsi naa baquë pistia joihuahai cato. Jasca, ëa raanish ca ri joihuahi quiha ëa joihuahai cato. Nicapariana. Oquë-oquëriaxëhi quiha mato xërëquë ó ca iriama cato ra, naa baquë pistia jasca cato —nëa tsi jato qui Jesu nëcaniquë.

Jesu rabëti yoi bo

Marcos 9.38-40

⁴⁹ Jatsi Juan chaniniquë:

—Jisa, Maestró. Mi janë tsi yoshi tsëcahai ca joni no tsayahitaquë ra. Tsayaxo toa joni no jënëmacas-hitaquë noba maxo quirim ja iqui iqui na —i Jesu qui Juan niquë.

⁵⁰ Jatsi Jesú quëbiniquë:

—Jënëmayamacana. Noba rabëti tsi xo toa noqui pasomahama cato ra — iquiina.

Jacobo, Juan, tihì cabo Jesú raahanina

⁵¹ Jabi basima quiha nai qui Jesu tërohacati xaba iniquë. Toatiyá tsi raquëhaxma tsi Jerusalén qui ja cacasni quiha. ⁵² Jatsi rëquë tsi joni bo ja raaniquë jahuë quinia ja rohahuacano. Jatsi, Samariá ca yaca qui ja jicocaniquë, chitëti iti Jesu bax mëraxëna. ⁵³ Jama, jato yaca qui Jesu cahëquë tsi quiha samariabá jato chitëmacasyamani quiha, Jerusalén qui ja bocana ca ja jiscani quëshpi na. ⁵⁴ Jatsi samariabo qui Jacobo, Juan, tihì cabo caxaniquë. Caxahax,

—¿Naipá ca chihì baaxëhi ni noa, Ibobá, jato mëshati, naa Elías yamabá ani jascaria? —i Jesu qui jaca niquë.

⁵⁵ Jatsi Juan, Jacobo, tihì cabo quiri bësoxo tsi quiha Jesú jato raahaniquë.

⁵⁶ Jatsi yaca huëtsa qui ja bocaniquë chitëxëna.

Mahitsa ca banahuacanaibo

Mateo 8.19-22

⁵⁷ Bahí tsi bohocanajacano tsi,

—Jahuëniacara qui mi caxëhai ca mia banahuaxëquia —i huësti ca joni Jesu qui niquë.

⁵⁸ Jatsi Jesú quëbiniquë:

—Jato quini bo jaya xo tsaca bo. Jasca, naha jaya xo isa bo. Jama, ëa, naa mana ax johax ca tsi xo toa racati xobo yama cato —iquiina.

⁵⁹ Jatsi joni huëtsa qui Jesu chaniniquë:

—Ea banahuahuë —iquiina.

Jama,

—Mi bëta cacasquia ra. Jama, jaboqui canoma xo ëa ra. Rësopaimaria xo noho jahëpa. E maihuaparixëti xo —i joni niquë.

⁶⁰ Jatsi Jesú quëbiniquë:

—Jato nabo Dios chahahuayamacanaibá maihuano. Mi yonoco tsi xo toa Dios Chani yoahi cati, naa Diós otoiha ca yoati na —iquiina.

⁶¹ Jatsi,

—Mi bëta caxëquia, Taitá. Huënyamaxëhuë. Jahari noho xobó cabo qui ë caapariti xo jato joihuaxëna —i joni huëtsa niquë.

⁶² Jama, ja qui Jesu chaniniquë:

—Noho yonoco pi chitahëhuaquí tsi jahari mi jahuë bo qui mi bacayamano. Ibo Dios bax yonocoyoiti mëtsama xo toa jahari bacacatsai cato ra —iquiina.

10

Setenta ca joni bo Jesú raanina

¹ Jaquirëquë setenta ca joni bo Ibo Jesú biniquë. Bixo tsi quiha rëquë tsi dos, dos, dos tsi jato ja raaniquë ja shishocatsai ca yaca tëquë qui.

² Raapama tsi ja nëcaniquë:

—Huëstima tsi xo toa tësahacati cato ra, ichariama yonococanaibo nori. Ja quëshpi tsi Ibo Dios nicacana, yonati bo ja raano ja bax yonocoti. ³ Jatsi, bocata. Mato raaquia. Cama xërëquë ó ca oveja xocobo jascaria ixëqui mato. ⁴ Jatsi parata, sahuëti, zapato bo, tihí cabo boyamacana. Jasca, bahí tsi bamayamacana, nohiria joihuaxëna. ⁵ Jasca, xobo qui jiconox pari tsi “Dios mato shomahuano” icana ibo qui. ⁶ Jabi toá pi rabënacatsai ca joni racano tsi toá tsi chitëxëhi quiha ma shomahuahaina. Jama, xobo ibo pi rabënacasyamano tsi ma joihuahai ca jahari bicana. ⁷ Jasca, xobo qui jicohax xobo rarinyamacana. Huësti ca ití tsi chitëcana. Toa xo tsi ma taahacahai ca jahuë bo picana. Jabi jahuë yonoco quëshpi tsi orihuahacaxëti xo yonati. ⁸ Jabi yacatá ca nohiria bá mato joihuano tsi mato qui ja taacanai ca jahuë bo picana ra. ⁹ Jasca, toá ca iquicanaibo jënimahuacana. Jënimahuahax, “Mato basima tsi xo Diós otoihaína” icana jato qui.

¹⁰ ‘Jama, yacatá ca nohiria bá pi mato joihuayamano tsi jato calle bo qui bocata. ¹¹ Toá tsi “Mato yacatá ca cospo jaya xo noba tahë bo pë. Bicasyama xo noa. Bitá” i jato qui cana. Jasca, “Mato parayamaqui noa. Jaboqui mato qui basimaria Diós otoiha ca joquë ra” i jato qui cana. ¹² Parayamaquia. Copiti barí tsi anomariaxëhi quiha naa yacatá ca nohiria copi ra; naa jochahuaxëni ca Sodoma yaca oquë ja ití quiha.

Nicamixëni ca yaca bo

Mateo 11.20-24

¹³ Noitirixëhi quiha mato Corazín cabá. Noitirixëhi quiha mato ri, Betsaidá cabá. Mato yaca bo xo tsi huëstima ca jisti bo acacani quiha; mahitsa rë. Jabi jochahuaxëni ca Tiro y Sidón yaca bo xo tsi jasca ca jisti bo acacarahapino tsi naama tsi jato jocha quima Dios quiri ja bësoquë acaniquë ra. Bamaxoma tsi moro ja sahuëquë acaniquë cohuëquí na. Jasca, chihi mishpó tsi ja tsahoquë acaniquë, jato cohuë jismaxëna. ¹⁴ Nicaparicana. Copiti barí tsi anomariaxëhi quiha mato copi ra; Tiro y Sidón yacatá ca

jochahuaxëni ca nohiria oquë ja iti quiha. ¹⁵ ¿Japa mato Capernaum yacatá cabá? ¿Nai qui bocascanai pa? Maj. Tënëtiya qui botëxëqui mato iquia —nëa tsi Jesu nëcaniquë jochahuaxëni ca yaca bo yoati na.

¹⁶ Jatsi Jesú jahuë rabëti bo yobaniquë:

—Ea nicayoihi quiha mato chani nicacanaibo. Jasca, ëa niahi quiha mato chani nicacasyamacanaibo. Jasca, ëa raanish ca niahi quiha ëa bicasyamacanaibo —i ja niquë.

Setenta cabo bacanina

¹⁷ Jatsi rani tsi setenta ca raahacanish cabo bacaniquë.

—Noqui nicahi quiha yoshi bo pa, Ibobá, naa mi janë tsi jato qui no chaniquë no —i jaca niquë.

¹⁸ Jatsi Jesu jato qui chaniniquë:

—Dios Chani ma yoaquë tsi Satanás jahuë chama bënohai ca ë jisitaquë ra. Ja bëbohacahitaquë ra. ¹⁹ Jabi chama mato qui aquia noqui pasomaha cato chama bëboxëna. Rono, nibo, tihí cabo xërëquë tsi coti mëtsaxëqui mato. Mato ayamacaxëcani quiha ra. ²⁰ Jasca, yoshi ma natsëcahai ca iqui tsi ranixëqui mato. Jama, oquë tsi ma ranixëti xo, naipá ca libro ó tsi mato janë bo quënëhacani iqui na —nëa tsi Jesu nëcaniquë jahuë bëcanish ca rabëti bo qui.

Jesu raninina

Mateo 11.25-27; 13.16-17

²¹ Espíritu Santó tsi Jesu rani-ranitapaniquë. Ranihax ja chaniniquë:

—Oquë-oquëria ca xo mia ra, Jahëpá. Mia tsi xo naipa, mai, tihí cabo yonati Ibo-iboria. Mi qui “Gracias” iquia, tiisi jayamacabo qui mi Chani jia ca mi jisiquimahaí quëshpi na. Jia tsi xo ra. Jasca, maí ca tiisi jaya cabo quima mi tiisi-tiisiria jonëmahacaquë ra, ja cahëyamacano iquish na. Jabi toca tsi mi acai ca quëshpi tsi “Gracias” mi qui iquia, Jahëpá. ²² Jasca, nicaparicana, joni bá. Chama ë qui noho Jahëpá aniquë, jahuë bo tèquë yonati. Jabi yama tsi xo toa ëa, naa Dios Baquë-baquëria cahëyoihaina. Noho Jahëpa roha tsi xo toa ëa cahëyoihai cato. Jasca, yama tsi xo Jahëpa Dios cahëxëni cato. Jahëpa Dios cahëxëni ca roha ca ëa xo naa, naa jahuë baquë yoi. Jasca, Jahëpa Dios cahëcani quiha chahahuacanaibo ri, naa ë quënëni cabo. Jato qui noho jahëpa jisiquimaquia ja cahëcano iquish na —nëa tsi jahuë rabëti bo qui Jesu nëcaniquë.

²³ Jatsi jahuë rabëti bo quiri Jesu bësoniquë. Bësohax jato qui ja chaniniquë:

—Shoma xo mato ra. Jia tsi xo ma jisina. ²⁴ Jabi ë acai ca jahuë bo huëstima cabá jiscasniquë, naa Dios Chani yonish cabo, rësonish ca chama bo ri. Ja jisyamacani quiha rë. Jasca, ë yohai ca jahuë bo ja nicacas-caniquë, jaboqui ma nicahai jascaria. Jama, nicati mëtsama ja icani quiha —i Jesu niquë.

Jabi jiaxëni ca jayanish ca samariabo

²⁵ Jatsi jodioba yoba bo cahëxëni ca joni Jesu qui joniquë tanamacatsi na. Johax,

—¿Jënhuaxëhi ni ëa, Maestró, bëso-bësopaoxëna? —i ja niquë.

²⁶ Jatsi Jesú quëbiniquë:

—¿Jënihi ni Moisés quënënenina? ¿Jahuë ja quënëni? —iquiina.

²⁷ Jatsi yoba cahëxëni cató quëbiniquë:

—“Mato joiti, mato shinana, mato coshi, tihí cabá tsi Dios ma noixëti xo. Jasca, mato rabëti bo ma noixëti xo, mamë ma noihai jascaria” ii quiha —i joni niquë Jesu qui.

²⁸ Jatsi,

—Jabija tsi xo toa mi yoahana. Tocapihi tsi bësöxëqui mia ra —i ja qui Jesu niqüë.

²⁹ Jama, tocacasyamani quiha yoba cahëxëni cato rë. Jatsi parahax, —¿Tsohuë ni toa noho rabëti cato sa? —i joni niqüë Jesu qui.

³⁰ Jatsi naa chani Jesú yoaniquë ja cahëno iquishi na.

—Jabi joní Jerusalén jisbayaniquë. Jericó yaca qui cahi ja ini quiha. Bahí tsi ja co-cono tsi yomacanaibo ja qui tsaminiquë rë. Jahuë sahuëti, jahuë parata, tihi cabo ja yoma-cani quiha. Ja sëtiajahuacani quiha. Sëtiaxo tsi quiha bahí tsi ja jisbëriacanicuë rësoti. ³¹ Toatiyá tsi quiha toa bahí tsi co-cohi arati ibo iniquë. Noitiria ca joni ja jisnicuë ra. Jisi tsi tëtiaquiria tsi bahí qui ja riiniquë.

³² Jaquirëquë joni huëtisa jonicuë. Levita ja ini quiha, naa Dios xobó tsi yonocohai cato. Jóni tsayaxo ja tëtianiquë jaa ri, mëbicasyamaquí na.

³³ Jaquirëquë jonicuë samariabo, naa jodiobo qui yoixëni ca nohiria. Copopama tsi noitiria ca joni ja jisnicuë jaa ri. Jisi tsi, “Noitiria tsi xo naa jóni ra” i ja ni quiha. ³⁴ Ja qui caxo tsi quiha jahuë quësi bo ja chëxanicuë. Chëxaxo tsi ja yabonicuë. Jatsi jahuë burro qui noitiria ca jóni ja jananicuë. Janaxo tsi quiha jahuë oxati xobo qui ja boniquë. Jaha xo tsi jóni ja shomahuaniquë ra.

³⁵ Jatsi huëaquë tsi quiha dos ca parata copixëni cabo xobo ibo qui samariabá aniquë. “Naa noitiria ca jóni ó bësóna” i ibo qui ja ni quiha. “Naa parata mi narisno tsi mia copixëquia jahari ë joquë nó” i ja ni quiha —nëa tsi Jesu nëcaniquë toa chani yoahi na. ³⁶ Chani yoahax,

—¿Jahuë shinahai, naa tres ca jóni yoati na? ¿Jëni ca ni toa sëtiahacanish ca jóni qui rabëti jascaria cato? —i yoba cahëxëni ca qui Jesu niqüë.

³⁷ Jatsi joní quëbiniquë:

—Shomahuanish ca samariabo quiha —iquina.

—Cata. Ja ani jasca ca mi ano miã ri ra —i Jesu ja qui niqüë.

Marta, María, tihi cabo qui Jesu shishonina

³⁸ Jahuë rabëti bo ya capama tsi yaca qui Jesu cahënicuë. Jahá tsi quiha racanicuë yoxa, naa Marta icanai cato. Jabi Jesu qui joi ja amani quiha jahuë xobó tsi ja chitëno. ³⁹ Jabi noma Martá jayani quiha, naa María icanai cato, naa Jesú tiisimahai ca nicacatsai cato. Jesu tahë tsi quiha ja tsahonicuë nicaxëna. ⁴⁰ Jama, nicatimaxëni Marta ini quiha shishocanaibo ja taahai ca igui na. Jahuë yonoco shina-shinahi ja ini quiha. Jatsi Jesu qui Marta caniquë. Cahax,

—Ea shinahuë, Ibobá. Noho nomá ëa jisbayaquë pë. Emë pistia xo taahai ca ëa xo naa rë. “Mi rëquëmë mëbihuë” ina ja qui —nëa tsi Marta nëcaniquë jahuë noma yoati na.

⁴¹ Jatsi Jesú quëbiniquë:

—Huëtima ca jahuë bo yoati tsi shina-huëjënahi quiha mia rë. Jënima tsi xo mi acaina. ⁴² Jama, huësti ca jahuë narisqui mia axëna. Oquë tsi xo Mariá acaina, noho chani nicacastsi na. Mëbihacatimaxëni tsi xo toa ja nicahana —i ja qui Jesu niqüë.

11

Jahuë rabëti bo Jesú tiisimanina bëhoxti ja cahëcano

Mateo 6.9-15; 7.7-11

¹ Jabi Dios qui bëhoxhi Jesu iniquë. Ja jatiquë tsi quiha,

—Bëhoxti noqui ri tiisimana, Ibobá, naa Juan yamabá jahuë rabëti bo tiisimani jascaria —i jahuë rabëti bo ó ca huësti ca niqüë.

² Jatsi jato Jesú yoani tsi xo naa:

—Bëhoxhi tsi nëcacana:
 “Oquë xo mi janë ra, Jahëpá.
 Nohiria mi ototsano ra” icana.

³ Jasca,

“Jatiroha ca barí tsi piti noqui ana” icana.

⁴ Jasca,

“Noba jocha mëbina, naa noqui yosicanaibo tëquë no noihai ca quëshpi na.
 Jochati no tanamahacayamano” icana

—nëa tsi jahuë rabëti bo qui Jesu nëcaniquë.

Dios qui bëhoxcana

⁵ Jatsi nëca tsi Jesu chaniniquë jahuë rabëti bo qui:

—Shinaparcana. Rabëti bo jaya xo mato tëquëta. Jabi mato rabëti xobo qui ma camitsa huëaticano tsi mapari baaxëna. Cahax, “Tres ca mapari ë qui prestahuahahuë, noho rabëti. ⁶ Noho xobo qui cahëyaquë noho rabëti. Paxnahi quiha. Yama tsi xo ja qui ë ati cato rë” i ja qui ma mitsa. ⁷ Jatsi xobo xara nëca tsi ja quëbimitsa, “Jishopë. Quëbëhacaquë caiti rë” iquüna. “Oxati xo noa, naa ëa, nohó-na bo. Joinoma xo ëa ra, mapari mi qui axëna” i mato qui ja mitsa quiha. ⁸ Jabi mato rabëti joicasyamamitsa mato qui mapari axëna, mato rabëti ja iquë ri. Jama, naama pi xobo ibo ma quënano tsi joixëhi quiha mapari mato qui axëna iquia ra. ⁹ Jascaria, Dios qui bëhoxpiquí tsi bënëcana iquia ra. Mato qui acacaxëhi quiha. Mëracana. Mërapiquí tsi bixëqui mato. Mato bax japëcahacaxëhi quiha jahuë caiti. ¹⁰ Bënëhai ca qui acacaxëhi quiha. Bixëhi quiha mërahai cato. Japëcahaca-xëhi quiha caiti tsohuëcara ca quënëhai ca bax na. ¹¹ Shinaparicahuë. “Sani picasquia” i pi mato xocobo no tsi ¿ja qui rono acaxëcanai pa? ¹² “Bachi picasquia” i pi ja no tsi ¿ja qui nibo acaxëcanai pa piti? ¹³ Jabi mato xocobo qui jahuë jia cabo ati cahëxëni xo mato, jochacanaibo ma iquü ri. Tocapimano tsi ¿bënëcanaibo qui oquë tsi Espiritu Santo ayamamaxëhi ni mato naipá ca Jahëpa ra? —nëa tsi jahuë rabëti bo qui Jesu nëcaniquë.

Yoshi pasomaha ca chani

Mateo 12.22-30; Marcos 3.19-27

¹⁴ Jabi joni quima yoshi niahi quiha Jesu iniquë. Yoshi iqui tsi jaro naa joni ini quiha. Jama, yoshi Jesú tsëcaquë tsi quiha chanitsi joni niquë ra. Jatsi ratëniquë nohiria bo ra tsayahax na. ¹⁵ Jama, Jesu pasomaha chanitsi nohiria huësti huësti ca niquë pë.

—Naa joni mëbihi quiha Satanás, naa yoshi bo ibo-iboria ra. Satanás chamá tsi yoshi bo tsëcahi quiha tia —i jaca niquë Jesu yoati na.

¹⁶ Jatsi,

—Naipá ca jisti-jistiria ahue ra —i Jesu qui huëtsa bo niquë pë tanamaxëna.

¹⁷ Jama, ja shinacana ca cahëquí tsi jato Jesú quëbiniquë:

—Jabi quëyohacaxëhi quiha país ca nohiria bo, ja nianacaquë no ra. Jasca, quëyohacaxëcani quiha xobó ca nohiria ri, ja iquinacaquë no. ¹⁸ Jasca jamë pasomaha pi Satanás iquinano tsi ¿jënahuariahax jahuë chama naamana? Nëcaquia ra, ëa mëbihi quiha Satanás, yoshi bo tsëcati i ma ai quëshpi na.

¹⁹ Yoshi bo tsëcati pi Satanás ëa mëbino tsi ¿tsohuë ni toa mato nohiria yoi mëbiti ibo-iboria? Yoshi bo tsëcacani quiha jato ri. ¿Tsohuë ni toa jato tsëquëmati ibo ra? ¿Satanás ma ni? Ja tsi xo toa mato qui quësoxëhi quiha mato nohiria yoi bo iquia. ²⁰ Jabi Dios chamá tsi yoshi bo ë tsëcaquë ra, Satanás chamá tsi nomari. E aca cató tsi bëro tsi xo toa mato qui Diós ototai ca johana ra.

²¹ ‘Jabi chamaxëni ca joní jahuë xobó ca jahuë bo ó bësono tsi jënima ca xo jahuë jahuëmishni bo. Yomahacatimaxëni ca xo. ²² Jabi toca xo Satanás ri. Jënima xo jahuë jahuë bo. Jama Satanás oquë ca pi jono tsi bëbohacahi quiha Satanás ra. Joxo tsi Satanás iquinati jahuë bo mëbihi quiha. Jaquirëquë, jahuë jahuë bo bichi quiha.

²³ ‘Jabi ëa pasomaha yoi tsi xo ë bëtama cato. Jasca, noho yonoco pasomaha tsi xo toa ëa mëbiyamahai cato.

Bacahai ca yoshini
Mateo 12.43-45

²⁴ ‘Jabi joní quima yoshi tsëchacano tsi xaba qui cahi quiha. Caxo tsi iti huëtsa mërahi quiha chitëxëna. Mahitsa mërahax, “E jisbëriani ca xobo qui jahari caxëquia ra” ii quiha yoshini rë. Jatsi bacahi quiha pë. ²⁵ Bacaxo tsi joní tsayahi quiha. Jaboqui jënima xo joní, bahuëhaca ca xobo jascaria. ²⁶ Ja jisbëriani ca joní tsayahax catëquëhi quiha pë, naa jabë yoshi huëtsa bo mërahi na. Jatsi siete ca yoshi yoixëni cabo bëhi quiha ja bëtati. Jatsi joní qui jicocani quiha jato tëquëta racaxëna. Jariapari iriama joní iniquë, jama jaboqui noititiria nori —nëa tsi jato qui Jesu nëcaniquë.

Jesu nicacana
Mateo 12.38-42; Marcos 8.12

²⁷ Nëca tsi Jesu chanino tsi quiha nohiria xërëquë ó ca yoxá quënaniquë: —Shoma xo mi ihua, naa mia comanish cato ra. Shoma xo mia chocho amanish cato ra —iquiina.

²⁸ Jatsi,
—Jama xo. Shoma tsi xo Dios Chani nicacanaibo. Shoma tsi xo Dios Chani acanaibo iquia —i ja qui Jesu niquë.

²⁹ Tocajano tsi quiha ja qui quëtsotsi nohiria misco niquë. Jatsi jato qui ja nëcaniquë:

—Anomaria tsi xo no bëta jaboqui bësobëqui-canaibo rë. E acai ca jisti-jistiria roha jiscascani quiha pë, ë qui chitiminox pari. Maj. Jonás jisti roha jato qui axëquia. ³⁰ Jabi sani chahita jatoquë quima Jonás xabahamahacaquë tsi quiha jahuë chani Nínive yacatá ca nohiria bá chahahuaniquë ra. Jato qui jisti Jonás ini quiha jato chahahuamaxëna. Jascaria, naa xaba ó ca bësocanaibo qui jisti ixëquia ëa ri, naa Nohiria Baquë ë nori cato. ³¹ Copiti barí tsi bësetëquëxëhi quiha yoxa chama, naa Shiba mai ax jonish cato. Bësetëquëcaxëceni quiha naa xabacá ca nohiria bo ri. Jatsi toa barí tsi jato qui quësoxëhi quiha naa yoxa chama, ëa ja chahahuayamacana iqui na. Naa yoxa chama tsayacana. Nëama ja caniquë chama Salomón yamaba tiisi nicaxëna. Jama, nëá ca Salomón oquë ca jisqui mato ra. Jisi tsi nicayamaqui mato pë. ³² Jasca, bësetëquëcaxëceni quiha Nínive yacatá ca nohiria bo ri, copiti barí no. Naa xabacá ca nohiria qui quësocaxëceni quiha jato ri. Jabi jato qui Dios Chani Jonás yoaquë tsi quiha jahuë chani qui ja chitimicaniquë. Jama, nëá ca tsi Jonás oquë ca jisqui mato ra. Toa jahuë chani chahahuayamaqui mato pë.

Noba quinia bërohuahi quiha noba shinana
Mateo 5.15; 6.22-23

³³ ‘Jabi lamparina tsamaxo tsi ¿caca nama janahi ni ibo pa? Jahuë ití tsi janahi quiha ra. Jatsi naquëtë qui jicoxo tsi huëa jisxëhi quiha nohiria.

³⁴ Jascaria tsi mëbihacaxëhi quiha nohiria, shina jia ca jayapiqui na. Mato quinia bërohuaxëhi quiha mato shinana, ja jënimacaquë no. Jatsi jabi jia ca jayaxëhi quiha mato ra. Jama shina yoi pi jayahi tsi tsémó tsi coxëqui mato

rë. ³⁵ Jatsi quiniacaxëcahuë, mato shina ó ca huëa nocahuahacayamano, ja yoinayamacano iquish na. ³⁶ Mato shina pi jënimano tsi, tsémó pi ma bohoyamano tsi, huahuaxëhi quiha mato jabi jia cato ra, naa lamparina huahuahai jascaria —tihi tsi quiha Jesu niquë nohiria bo qui chanihí na.

Fariseobo, yoba cahëxëni cabo, tihi cabo pasomaha Jesu chaninina
Mateo 23.1-36; Marcos 12.38-40; Lucas 20.45-47

³⁷ Jabi jahuë chani Jesu jatihuaquë tsi quiha fariseobá ja qui joi amaniquë jahuë xobó tsi ja oriquino. Jatsi jahuë xobo qui Jesu caniquë. Cahax ja tsahoniquë ja bêta oriixëna. ³⁸ Jabi Jesu mëchocoyamani quiha pinox pari. Ja quëshpi tsi fariseobo ratëniquë, jodioba jabi pasomaha ja iqui iqui na. ³⁹ Japi ja qui Jesu chaniniquë:

—Yobá-naxëni xo mato fariseobo ra. Mato mëquë chocoharia xo mato. Jodioba jabi bo nicariaqui mato. Jama, mato shina tsi xo toa jahuë bo ó quëemixëñiria ra. Yoixëni ca xo. ⁴⁰ Jatsi, cahëtimaxëni xo mato ra. ¿Mato shina Dios, naa noba yora nëhohuanish cató ayamayamani? ⁴¹ Jariapari mato shina Ibo Dios qui acahuë. Jaquirëquë jiaxëhi quiha mato jabi tëquë.

⁴² Noiti xo mato fariseobo ra. Ma tësaha ca yochi bo, naa mente, ruda, tihi cabo quima xatë pistia ca, naa decima ca Dios qui aqui mato, mato yoba bo nicaxëna. Jënima quiha. Jama, mabë xatë yoi bo mëbicasama xo mato pë. Dios noiyamayoiqui mato iquia. Jabi Dios yoba ma nicaxëti xo ra, yoba huëtsa bo shina-bënoxoma.

⁴³ Noiti xo mato fariseobo ra. Catiti xobo qui jicoxo tsi oquë ca tsahoti bo bicasqui mato pë. Jasca, yacatá ca bahí tsi bohoquí tsi nohiria bá mato joihuahai ca ó pasoquí mato pë.

⁴⁴ Noiti xo mato ra. Mato tsaya-tsayacani quiha nohiria, shina jiaxëni ca ma nori ca quëscahuaquí na. Jama, mato shina tsi xo yoixëñiria. Jato qui jonë tsi xo toa mato jabi yoi bo ra —nëa tsi quiha fariseobo qui Jesu nëcaniquë.

⁴⁵ Jatsi Moisés yoba cahëxëni cabo huëstitá quëbiniquë:

—Jishopë. Noqui ri ocahuaqui mia pë, Maestró, toca tsi mi chaniquë no. Noqui anoma quiha —i Jesu qui joni niquë.

⁴⁶ Jatsi Jesú quëbiniquë:

—Noiti tsi xo mato ri, yoba cahëxëni cabá. Nicahacatimaxëni ca yoba bo nohiria bo qui aqui mato pë. Jama, jato qui ma acai ca yoba bo nicayamahai ca mato xo naa ra.

⁴⁷ Noiti xo mato ra. Mato naborëquëbá Dios Chani yoanish cabo tëpasniquë pë. Jatsi jato bax maihuati xobo aqui mato pa, nohiria bo jato shinamaxëna.

⁴⁸ Jama, mato qui jia tsi xo toa mato naborëquëbá anina iquia. Dios Chani yoanish cabo ja acani quiha. Jaquirëquë jato bax maihuati xobo aqui mato pë, nohiria bo quima mato jabi yoiria ca jonëmaxëna.

⁴⁹ Jabi mato yoati tsi Díos yoani ca tsi xo naa ra: “Jato qui noho Chani yoati ibo bo, noho Chani chitahëhuati ibo bo, tihi cabo jato qui raaxëquia. Huësti huësti ca tëpasaxëceni quiha pë. Tëxë bo tënëmacaxëceni quiha” i Dios ni quiha jahuë tiisí no. ⁵⁰ Jabi toca ja iquë ra. Rëquë rohari tsi tëpas-hacani quiha huëstima ca Dios Chani yoati ibo bo rë. Jabi naa tëpas-hacani cabo tëquë quëshpi tsi mato copixëhi quiha Dios ra. ⁵¹ Jabi Abel pari acacani quiha. Jaquirëquë huëstima ca Dios Chani yoati ibo huëtsa bo acacani quiha. Jarohari tsi Zacarías ja acaniquë. Altar, naa arati xobo naxërëquë xo tsi Zacarías ja tëpasacani quiha. Mato parayamaquia. Ja tëpas-hacacani quëshpi tsi copihacaxëti xo naa jaboquí ca bësocanaibo.

⁵² ‘Noiti xo mato yoba cahëxëni cabá. Mahitsa ca ma tiisimahai ca iqui tsi Dios Chani cahëyamahi quiha nohiria bo ra. Jasca, jabija ca chani cahëcasyama xo mato ri. Jasca, ë qui bëcascanaibo quëtiaqui mato pë, Dios Chani ja chahahuayamacano iquish na —nëa tsi fariseobo, yoba cahëxëni cabo, tihi cabo qui Jesu nëcaniquë.

⁵³ Chanixo tsi quiha jato xobo Jesú jisbayaniquë. Jatsi ja qui caxatsi yoba tiisimacanaibo, fariseobo, tihi cabo niquë. Caxaquí tsi huëstima ca jahuë bo yoati tsi ja nica-nicacanicuë tanamacasquí na. Mahitsa ja nica-nicacani quiha. ⁵⁴ Jatsi ja tsayamisria-canicuë ja qui quësoxëna.

12

Fariseobo pasomaha Jesú yobanina

¹ Jabi huëstima ca nohiria bo Jesu qui quëtsoniquë. Tihiria ca inish ca racana. Yama xëa ini quiha tapiti. Jasca, jato huëtša jamahi ja icani quiha xëa yama iqui na. Jatsi jahuë rabëti bo qui chanitsi Jesu niquë.

—Fariseobá tiisimahai ca qui quiniacaxëcahuë. Paramisxëni ca xo. ² Bërohuahacaxëti xo jato jabi yoi ra. Jonëma quiha.

Nohiria qui no raquëyamano *Mateo 10.28-31*

³ Jabi raquëxo tsi Dios Chani ma yoa-yoapaoniquë. Jama, jaboqui tsi mato nicacaxëcane quiha nohiria. Jasca, Dios Chani yoahi tsi ma baxëxpaoniquë. Jama, jaboqui bëro-bëroria tsi noho Chani ma yoaxëti xo, raquëxoma. ⁴ Jabi mato acascanaibo qui raquëyamacana, noho rabëti bá. Mato yora roha tsi ati mëtsa ca xo. Mato aapiquí tsi jaroha tsi xo toa mato ja acanaina. ⁵ Jama, Dios qui ma raquëxëti xo iquia ra. Tënëtiya qui nohiria niati chama jaya xo, jato ati. Parayamaquia. Dios qui raquëcana iquia.

⁶ ¿Mahitsa, naa dos ca parata quëshpi tsi cinco ca chorobo iniayamayamacahi ni? Copiyamaria ca xo. Jabi copiyama ca chorobo shina-bënoyamahi quiha Dios ra. ⁷ Jascaria, mato boo tëquë tocacacani quiha ra. Jatsi raquëyamacana, huëstima ca chorobo oquë ma nori quëshpi na —nëa tsi Jesu nëcaniquë.

Nohiria bësojo ax tsi Cristo ti chanihaina *Mateo 10.32-33; 12.32; 10.19-20*

⁸ ‘Nohiria bësojó pi “Cristó-na xo ëa” i nohiria no tsi Dios ángel bo bësojó tsi “Nohó-na xo toa” ixëquia ëa ri, naa Nohiria Baquë ë nori cato. ⁹ Jama, nohiria bësojó pi ëa pasomaha nohiria chanino tsi Dios ángel bo bësojó tsi “Nohó-na ma xo toa” ixëquia ëa ri, naa Nohiria Baquë ë nori cato.

¹⁰ Jabi ëa pasomaha pi nohiria chanino tsi iriama tsi xo toa. Jahuë jocha masaxëhi quiha Dios. Jama Espíritu Santo pasomaha pi nohiria chanino tsi masahacayamaxëhi quiha jahuë jocha ra.

¹¹ Jabi catiti xobó ca chama bo, nohiria chama bo, tihi cabo qui mato ja bocamítsa mato qui quësoxëna. Tocapijahuacano tsi shina-huëjénayamatsicana ma quëbixëhai ca yoati na. ¹² Toatiyá tsi mato tiisimaxëhi quiha Espíritu Santo ra. Ma yoaxëti ca mato jismaxëhi quiha. Chaniamaxëqui mato, Espíritu Santo inori —nëa tsi jahuë rabëti bo qui Jesu nëcaniquë.

Jahuëmishni bo ó quëëmishëni cato

¹³ Jatsi nohiria xërëquë ó ca joni chaniniquë:

—Noho rëquëmë qui mi chanino, maestró. Huashicoxëni quiha. Noho jahëpa yamaba jahuëmishni bo ë bëta xatënyamahi quiha pë —i Jesu qui ja niqüë.

¹⁴ Jatsi Jesú quëbiniqüë:

—Iyamaquia ra, joní. Nohiria jahuëmishni bo tsi yobati ë raahacayamaniquë ra —iquiina.

¹⁵ Jatsi,

—Quiniacaxëcahuë. Anoma tsi xo jahuëmishni bo ó quëëmis-haina ra. Huëstima ca pi ma jayano ri tsi çjënahuariaxo raca toa jahuë bá mato raniyoihuana? —i Jesu niqüë.

¹⁶ Jatsi naa chani Jesú nohiria bo qui yoaniquë ja cahëcano iquish na:

—Huai jiaxëni ca rico ca joni jayani quiha. Anomaria ja tésani ca bëro ini quiha. ¹⁷ Ja iqui tsi “çjënahuaxëhi ni ëa sa? Bimi janati ca xobo narisquia rë” i jamë ja niqüë. ¹⁸ Jarohari tsi, “Noho bimi janati xobo pistia bo poxaxëquia ra. Jaquirëquë xobo चाहिताxëni cabo axëquia noho bimi, noho jahuë bo, tihi cabo quëshpi na. ¹⁹ Acax, ‘Mi yonoco jënëna. Huëstima ca año no tsi naamaxëhi quiha mi nanëha ca jahuë bo ra. Shoma xo mia. Oriquihuë. Jënë ahuë. Ranitsihuë’ i ëmë xëquia ra” —nëa tsi rico ca joni nëcani quiha. ²⁰ Jatsi ja qui Dios chaniniquë: “Naa baquichá tsi rësoxëqui mia, yoyoxëni cató. Mi rësoquë tsi çtsohuë ni toa mi janaha ca jahuë bo bichiina ra?” iquiina. ²¹ Jabi toca xo parata, jahuëmishni bo, tihi cabo ó quëëmixëni cabo. Mëquëyariayoi ca xo, Dios shinayamahi na.

Dios no चाहahuati xo

Mateo 6.25-34

²² Jatsi jahuë rabëti bo qui chanitëquëtsi Jesu niqüë:

—Oriquiti, sahuëti, tihi cabo ti tsi shinayamacana ra. ²³ Mato oriquiti oquë tsi xo ma bësohaina. Jasca, mato sahuëti oquë tsi xo mato yora. ²⁴ Isa bo tsayacahuë. Bëro banayamacani quiha. Bimi tésayamacani quiha. Jasca, yama tsi xo toa jato xobo qui nanëhaca ca bimi ra. Jama, jari jënima ca xo. Jato pimahi quiha Dios ra. Jabi çisa bo oquëyama-yamahi ni mato ra? ²⁵ Jasca, çjënahuariaxo raca ma bësohai ca año bo ma huinomana, ma shina-huëjënahai cató no? ²⁶ Inoma xo mato ra. Japi oriquiti, sahuëti, tihi cabo yoati tsi shina-shinayamatsacana.

²⁷ Jasca, huasi joa jiaxëni cabo qui tsayacahuë. Yonocoyamacani quiha oriquiti quëshpi na. Jiaria tsi xo ja jiscanaina. Salomón yamaba raiti oquë-oquëria ca xo iquia ra. ²⁸ Jabi jiaria tsi naa naamayamahi ca joa, naa mëri tsi nahai ca joa sahuëmahi quiha Dios ra. Tocapiquí tsi çmato ri sahuëmacas-yamayamaxëhi ni Dios ra? Iriama tsi xo toa ma chitimihaina iquia. ²⁹ Jaha tsi oriquiti, jënë, tihi cabo ó quëëmisyamacana. Jasca, nëca ca jahuë bo yoati tsi shina-huëjënayamacana. ³⁰ Jabi ja picanai ca shina-shinacani quiha Dios cahëyamacanaibo. Jama, mato ó bësohi quiha mato Jahëpa, ma narisyamano iquish na. ³¹ Jatsi, mato Chama-chamaria pari shinacana. Tocapimano tsi mato qui acacaxëhi quiha, oriquiti, jënë, tihi cabo ma narisyamano iquish na. ³² Raquëyamacana, noho xocobá. Jahuë mana ca jahuë bo mato qui acatsi quiha Dios ra.

Mana ca jahuë bo

Mateo 6.19-21

³³ Mato jahuë bo iniacana, noitiria cabo qui parata axëna. Tocapimano tsi oquëxëhi quiha mato mana ca jahuë bo ra. Oquë-oquëria ca jahuë bo

quëyotimaxëni tsi xo jotoro ri. ³⁴ Jabi maí ca jahuëmishni bo pi noiquí tsi toa jahuë bo shinrohaxëqui mato pë. Jama, Dios noiquí tsi Dios jahuë bo shinaxëqui mato ra.

Rohahuahacati xo Diós-na bo

³⁵⁻³⁶ Ma rohuahacaxëti xo iquia. Jato chama manacanai ca yonati bo jascariacana. Raiti sahuë ca xo. Jasca, chama bax ririhí quiha jato lamparina bo. Jatsi ahui yahai ca joni fiesta ax jato chama bacano tsi ja bax caiti japëcatapicani quiha. ³⁷ Jatsi ranicani quiha yonati bo, ja manacanai ca nori ca jato chamá jisquë no. Ja manacanai nori iqui tsi ranixëhi quiha chama ri. Ja quëshpi tsi jahuë yonati bo tsahomaxëhi quiha pimaxëna. Jahuë sahuëti rarinamaxo tsi jato taaxëhi quiha chama ra. ³⁸ Jabi baquicha, baquishmari, tihi pi no tsi chama jono tsi ranicaxëcani quiha yonati bo, ja rohuahacacani quëshpi na. Jabi manahai ca yonati bo jisxëhi quiha chama, joxo na. ³⁹ Jasca, shinaparicana. Yomaxëni ca johai ca xaba pi cahërohahi tsi jahuë xobo ó ibo bësoquë aquë ra. Jahuë xobo qui jicoti mëtsama yomaxëni ca iquë aquë ra. ⁴⁰ Jascaria tsi ma rohuahacaxëti xo mato ri. Jabi bacaxëquia, naa Nohiria Baquë ë nori cato. Bacaxëquia jaha ma pasoyamahai ca xabacá no —nëa tsi Jesu nëcaniquë.

Chiquishxëni ca yonati

Mateo 24.45-51

⁴¹ Jatsi Pedró nicaniquë:

—¿Tsohuë qui naa chani mi yoaha? ¿Jatiroha cabo qui mi yoaha sa? ¿Noqui roha quëshpi ma ni? —iquiina.

⁴² Jatsi Jesú quëbiniquë:

—¿Tsohuë ni toa empleado jiaxëni cato, naa chahahuahacati cato? ¿Jënica nohiria bixëhi ni chama, jahuë yonati bo obësoti empleado iti, jato orihuati? ¿Jahuë yonati jia ca biyamamayamaxëhi ni? ⁴³ Jahuë chamá ja qui aca ca yonoco aapihi tsi ranixëhi quiha empleado, jahuë chama joquë no. Ja acai ca jisxëhi quiha jahuë chama ra. ⁴⁴ Jisi tsi jahuë empleado qui jatiroha ca axëhi quiha, jahuë jahuë bo tëquë obësoti. ⁴⁵ Jama, “Bamaxëhi quiha noho chama” i pi toa yonati no tsi, jahuë chama yonati bo pi ja rashano tsi ¿jënahuariaxëhi ni jahuë chama ra, nicaxo na? Jasca, oriquihaina, jënë acaina, pahëhaina, tihi cabo pi empleadó ano tsi ¿jënahuaxëhi ni chama ra, nicaxo na? ⁴⁶ Ja quiniaxëti xo ra. Jabi jaha ja pasoyamahai ca barí tsi bacaxëhi quiha toa chama ra. Bacaxo tsi ¿jahuë yonati yoí ca tēpasamayamaxëhi ni? Nicamixxëni caba copi ja qui axëhi quiha ra.

⁴⁷ Jasca, huëstima tsi rashahacaxëhi quiha jahuë chama shina cahëhai ca yonati, ja yoaha ca ayamapiquí na. ⁴⁸ Jama, iriama tsi rashahacaxëhi quiha jahuë chama shina cahëyamahax cato, janyama ja aquë no. Jabi huëstima ca tiisi pi joni qui acacarohano tsi huëstima ca ó pasohacaxëhi quiha. “Ariaxëhi quiha” ii quiha nohiria bo ja yoati na. Joni qui pi huëstima ca ati yonoco acacarohano tsi oquë ca yonoco ja ati ca ó pasocaxëcani quiha nohiria bo —i Jesu niquë.

Jesu iqui tsi oquëxnamahacaxëhi quiha nohiria

Mateo 10.34-36

⁴⁹ Jabi maí qui ë joniquë maí ca nohiria oquëxnamaxëna. Ea iqui tsi iquinacaxëcani quiha nohiria ra, cacaxi na. Jaboqui pi ja oquëxnacano tsi ë raniquë aquë. Ja oquëxna-tapicano ra. ⁵⁰ Jasca, anomariaxëhi quiha ë tēnētēnhaina rë. Ja iqui tsi shina-huëjēnaquia. Mëri tsi ja jatino ra. ⁵¹ Jasca, nohiria bëpasimahi ë joyamaniquë. Toca tsi quëscahuayamacana. Jama, nohiria

iquinamati, nohiria oquëxnamati, tihi ca aqui ë joniquë. ⁵² Ea iqui tsi oquëxnahehi quiha xobó ca cinco cabo. Dos ca pasomahaxëhi quiha tres cabo; tres ca pasomahaxëhi quiha dos cabo. ⁵³ Ea iqui tsi jahuë baquë pasomahaxëhi jahuë jahëpa ré. Jasca, jahuë jahëpa pasomahaxëhi quiha jahuë baquë ri. Ea iqui tsi jahuë jahi pasomahaxëhi quiha jahëhua. Jasca, jahuë jahëhua pasomahaxëhi quiha jahuë jahini. (Jasca, ëa iqui tsi jahuë raisi pasomahaxëhi quiha jahuë raisi ri) —nëa tsi quiha Jesu nëcaniquë.

Copiti Ibo-Iboria bësojó niixëhi quiha nohiria

Mateo 16.1-4; 5.25-26; Marcos 8.11-13

⁵⁴ Jatsi nëca tsi nohiria bo qui Jesu chaniniquë:

—“Joqui oi” iqui mato, yota tsëmo chëquë johai ca ma jisquë no. Jatsi oi tsi xo. ⁵⁵ Jasca, xototsi yota no tsi “Matsinaxëhi quiha ré” iqui mato. Jabija tsi xo toa ma iquiina. ⁵⁶ Jabi nai tsaya-tsayaquí tsi oi johai, yota johai, tihi cabo cahëxëni xo mato, paramisxëni cabá. Jama, jaboqui no bësohai ca xaba cahëtimaxëni xo mato ra.

⁵⁷ ¿Jia ca jahuë ati mëtsama ni mato sa? ⁵⁸ Jabi mato pasomaha ca joni pi mato qui caxano tsi bamahaxma tsi ja bëta rabënacana, gobierno chama bo qui mato ja bonox pari. Jabi policia qui chamá mato mëamitsa ra. Jaquirëquë cárcel qui ma nanëhacamitsa. ⁵⁹ Jatsi tsëquëyamaxëqui mato ré. Jariapari tsi mato mólta copi ma jatihuaxëti xo. (Jascaria tsi bamayamacana rohahuahacaxëna. Joxëhi quiha Dios copiti bari ra) —nëa tsi Jesu nëcaniquë.

13

¹ Toatiyá tsi huësti huësti ca nohiria bo Jesu qui bëcaniquë Pilató ani ca yoaxëna. Jabi Galiléa ca joni bo Pilató tēpasni quiha. Tēpasxo tsi quiha yohina jimi ya jato jimi ja jaxcamënamani quiha pë, Jerusalén ca arati xobo xo na. Toa yohina jimi Dios qui acacati ini quiha nohiria ba jocha quëshpi na. ² Nicachax Jesu quëbiniquë:

—¿Jahuë shinacana? ¿Galiléa ca nohiria oquë ni naa tēpas-hacanish ca joni ba jocha ra? ³ Iyamahi quiha. Jatsi quiniacaxëcahuë. Mato jocha quima pi Dios quiri bësoyamahi tsi rësoxëqui mato ri. ⁴ ¿Japa Siloé ca namëhacanish ca joni bo? Toa ax tsi quiha dieciocho ca joni bo acacanicuë jato ri, jato cacha xobo tētëca poxoniquë no. ¿Ja acacani iqui tsi Jerusalén cabo oquë jato jocha ini? ¿Jahuë shinacana? ⁵ Dios copi ja nomari iquia. Jama, mato quinia pi raninamayamahi tsi rësoxëqui mato tēquë ri —i jato qui Jesu niquë.

Bimiyamahai ca jihui ti chani

⁶ Jatsi naa chani nohiria bo qui Jesu yoanicuë:

—Bimi jihui jayaniquë joni ra, jahuë huái cato. Jahuë bimi bichi ja cani quiha. Yama a ra. ⁷ Japi jahuë yonati qui ibo chaniniquë: “Tsayahuë. Tres año no tsi naa jihui qui é joquë bimi bixëna. Yama xo pë. Rërahuë. Anoma quiha. Noho mai xëa biqui ra” iquiina. ⁸ Jama, jahuë yonati quëbiniquë: “Jari huësti ca año no tsi ja niino. Ja tēamë tsi mai huëyoxëquia. Jahuë mai jiahuaxëquia. ⁹ Oquëri ca xënipá tsi ja bimimitsa ra. Ja bimiyamapino tsi rëraxëquia ra” i yonati ni quiha ibo qui —nëa tsi Jesu nëcaniquë.

Joiti barí tsi yoxa Jesú jënimahuanina

¹⁰ Jabi jodioba catiti xobo xo tsi tiisimahi Jesu iniquë. ¹¹ Jaha tsi quiha noitiria ca yoxa iniquë. Dieciocho año no tsi tapitimaxëni ja ini quiha. Jabi yoshi iqui tsi tēto ja ini quiha, mëstë niitimaxëni iquiina. ¹² Jisi tsi Jesú quënaniquë:

—Mi jënimahuahacaquë, caí —iquiina.

¹³ Jatsi yoxa ja motsaniquë jahuë mëquënë no. Ja joitapiniquë ra. Joixo tsi quiha Dios ja ocahuaniquë “Gracias” iquiina. ¹⁴ Jama, catiti xobo chama caxaniquë, joiti barí tsi Jesú jënimahuani nori quëshpi na. Jatsi,

—Seis tsi xo toa yonocoti barí ra. Toa barí tsi bëcahuë jënimahuahacaxëna. Anoma tsi xo toa joiti barí tsi jënimahuahacahaina ra —i nohiria qui chama niquë.

¹⁵ Jatsi Jesú quëbiniquë:

—Jisa, mato paracanaibá. ¿Japa mato huëyë bo, mato burro bo? ¿Joiti barí tsi jato mërisyamayamacanai, jënë qui jato mëpixëna? ¹⁶ ¿Japa naa yoxa ra? Abraham yamabo चाहितaxocobo xo ra. Huëyë, burro, tihi cabo oquë quiha. Jabi dieciocho año no tsi Satanás iqui tsi mëstë niitimaxëni ja iquë ra, tëto iquiina. ¿Mato qui yoi ni naa tëtöhai ca yoxa jënimahuahaina pa? —i nohiria bo qui Jesu niquë.

¹⁷ Nëca tsi Jesu chaniquë tsi quiha ja qui caxahai ca chama bo bërabiniquë. Jama, rani-raniquë nohiria tëxë. Jato qui jia ini quiha Jesú ani ca tëquë.

Mostaza bëro, levadura, tihi cabo jascaria tsi xo Diós otohaina
Mateo 13.31-32; Marcos 4.30-32

¹⁸ Jatsi Jesú nicaniquë:

—¿Jahuë jasca ni Diós otohaina? ¿Jahuë qui Diós otohái ca jaharisihuaxëhi ni noa? ¹⁹ Bëro mishni, naa joní banahai ca mostaza bëro jascaria xo iquia. Shinahaqui quiha mostaza bëro. Shinahacax jihui manëhi quiha. Jaquirëquë toa xo tsi jato naha aqúi quiha isa bo —i Jesu niquë.

²⁰ Jatsi Jesú jato nicatëquëniquë:

—¿Jahuë qui Diós otohái ca jaharisihuaxëhi ni noa? ²¹ Levadura jascaria xo iquia. Jariapari tsi harina somo ca ya tëtöhai quiha yoxa. Toca tsi harina xara pacanahi quiha jahuë shapo —i Jesu niquë.

Natsëo ca caiti
Mateo 7.13-14, 21-23

²² Jatsi yaca bo xo tsi Jesú tiisima-bonaniquë. Huësti ca yaca jisbaya tsi yaca huëtisa qui ja caniquë Jerusalén quinia ca bahí no. ²³ Jatsi,

—¿Xabahamahacaxëhi ni ichariama cabo roha, Taitá? —i nohiria niquë. Jatsi Jesú quëbiniquë:

²⁴ —Naipá ca caiti tsi xo natsëo. Jatsi ariacana ja qui jicoxëna. Ja qui jicoti mëtsama icaxëcani quiha huëstima ca jicocas-canaibo ra. ²⁵ Jabi xobo ibobá caiti japano tsi jicotimaxëni-xëhi quiha mato ra. Jatsi, “Noqui jicomahuë, Ibobá” ixëqui mato, cacha niilhax na. Jatsi, “Mato cahëyamaquia” i mato qui xëhi quiha Ibo ra. ²⁶ Jatsi jahari quëbixëhi quiha mato. “Mi bëta no oriquipaoniquë ra. Jasca noba yacata xo tsi noqui mi tiisimapaoniquë ra” ixëqui mato, mahitsa. ²⁷ Jatsi, “Mato cahëyamaquia. Bocata, mato jochahuaxëni cabá” i mato qui xëhi quiha. ²⁸ Jatsi, araconaxëqui mato ra. “E ra ma. Jishopë” ixëqui mato, cacha ax na. Toá ca Diós otohái cató ca Abraham, Isaac, Jacob, Dios Chani yoanish cabo, tihi cabo jisxëqui mato. Jato bëtayamaxëqui mato ra. ²⁹ Toatiyá tsi maí ca iti bo tëquë quima ax bëcaxëcani quiha nohiria bo. Diós otohái cató tsi oriquicaxëcani quiha carayanabo ri. ³⁰ Tsayacahuë. Toa barí tsi mato qui quërasria ca carayanabo pari bixëhi quiha Dios ra. Jama, noitixëhi quiha mato jariapari ca Dios Chani binish cabo. Jachoxëqui mato iquia —nëa tsi jato qui Jesu nëcaniquë.

*Jerusalén ca nohiria Jesú noinina**Mateo 23.37-39*

³¹ Jatsi ja qui huësti huësti ca fariseobo bēcāniquē.

—Nēa chitēyamatsihuē. Jabahuē ra. Mia acatsi quiha Herodes ra —i Jesu qui jaca niquē.

³² Jatsi Jesú quēbiniquē:

—Jahari toa quiaxēni ca qui bocata. “Jaboqui, huēaquē, jari yoshi bo tsēcaxēquia ra. Toa dos ca bari no tsi nohiria bo jēnimahuaxēquia. Jama, oquēri ca bari jatixēhi quiha noho yonoco ra” icana ja qui. ³³ Jari noho quiniá tsi ē caxēti xo ra. Jaboqui, huēaquē, oquēri ca bari, tih tsi xo ē cahaina. Jasca, Jerusalén tsi ē namēhacaxēti xo, naa Dios Chani yoanish ca huētsa bo acacani jascaria.

³⁴ Jisa Jerusalén ca nohiria bá. Dios Chani yoati ibo jari aqui mato rē. Mato qui Diós raahai ca Chani bēcānaibo aqui mato maxaxá no. Jabi mato noiquí tsi mato otocasquia, naa jahuē pēhi namá jahuē xocobo patiarí othai jascaria. Jama, ēa niacasqui mato rē. ³⁵ Diós mato niabayaquē iquia. Tsayahuē. Jabi ēa jistēquēnox pari tsi “Shoma tsi xo toa Ibobá janē tsi johai cato” ixēqui mato ra —nēa tsi Jesu nēcāniquē.

14*Iquihai ca joni Jesú jēnimahuanina*

¹ Huēsti ca joiti barí tsi quiha fariseobo chama xobo qui Jesu caniquē ja bēta oriquihi na. Jasca, tobi ini quiha Jesu qui tsayamixēniria ca jodioba jabinaxēni cabo ri. ² Jabi Jesu bēsojó tsi noitiria ca joni tsaho ini quiha, naa bai ca yora, poyamē, huico, tih cabo jayanish cato. ³ Jaha tsi jodioba yoba cahēxēni cabo, fariseobo, tih cabo Jesú nicaniquē:

—¿Mato qui jēnima ni joiti barí tsi jēnimahuahaina? —iquiina.

⁴ Ja quēbiyamacanicuē. Jatsi Jesú joni biniquē. Bixo tsi joni ja jēnimahuanicuē. Jatsi jaharí jahuē xobo qui jēnima ja raanicuē. ⁵ Raahax jato qui Jesu chanitēquēnicuē:

—¿Mato baquē, mato vaca, tih cabo pi jēnē maiquini qui paquērohano tsi bamaxoma tsi ma tsēcayamaquē ana? —iquiina.

⁶ Jatsi quēbitimaxēni quiha ja icanicuē ra, naa jodioba yoba cahēxēni cabo.

Fiesta qui joi binish cabo

⁷ Jabi toá ca oquē ca tsahoti bo fariseobá bicasni quiha. Ja acanai ca jisi tsi naa chani jato qui Jesú yoanicuē:

⁸ —Ahuí yahai cato fiesta qui pi mato qui nohiríá joi amano tsi toá ca oquē ca tsahoti bo biyamacana. Quiniacaxēcahuē. Mato oquē ca nohiria jomitsa ra. ⁹ Jatsi mato qui joxēhi quiha fiesta ibo tia. Johax, “Mi tsahoti joni huētsa qui acasquia rē” i mato qui xēhi quiha. Tocapijano tsi bērabixēqui mato tia. Jatsi ibo nēama ca tsahoti yoi ca bixēqui mato ra. ¹⁰ Jama, mato qui joi amahacano tsi nēama ca tsahoti pari bicana. Jatsi johax, “Ea tahē tsi mi tsahono, noho rabētí” i mato qui fiesta ibo mitsa. Toca tsi fiesta qui bēcānish cabo bēsojo ax tsi oquēhuahacaxēqui mato. ¹¹ Jatsi quiniacaxēcahuē. Noitihuahacaxēhi quiha jamē oquēhuacatsai cato. Jama, oquēhuahacaxēhi quiha iriama cato, naa oquē bicasyamahai cato —nēa tsi Jesu nēcānicuē oquē ó quēcānaibo yoati na.

¹² Jatsi oriquiti ja qui joi amati ibo qui Jesu chaninicuē:

—Oriquiti taaquí tsi mi rabēti bo, mi xatē bo, mi jimi bo, mi rico ca rabēti bo, tih cabo qui oriquiti joi amayamahuē. Jato qui oriquiti joi pi mi amano

tsi jahari mi qui oriquiti joi amacaxēcani quiha jato ri. Toca tsi copihacaxēcqui mia. ¹³ Jama, oriquiti taaquí tsi noitiria cabo, yora choni jaya cabo, tapiyamacanaibo, bēco cabo, tihí cabo qui oriquiti joi mi amaxēti xo. ¹⁴ Tocapihi tsi shomahuahacaxēhi quiha mia ra, jahari mia copitimaxēni ja icanaí iqui na. Jatsi mia copixēhi quiha Dios ra, mēstēxēni cabo bēsotēquēxēquē no —nēa tsi ibo qui Jesu nēcaniquē.

Fiesta-fiestaria ti chani

¹⁵ Jabi Jesú yoaha ca toá ca oriquihai ca joni huēsti cató nicaniquē. Nicahax,

—Rani-ranixēhi quiha Diós otohái cato ó ca oriquicanaibo tēquē —i quiha Jesu qui ja niquē.

¹⁶ Jatsi Jesu ja qui naa chani yoaniquē:

—Oriquiti, chariquiti, tihí cabo joní ani quiha. Axo tsi quiha huēstima cabo qui oriquiti joi ja amaniquē. ¹⁷ Jatsi jahuē oriquiti bari tsēquēquē tsi quiha jahuē yonati ja raaniquē nohiria bo qui joi amati. “Bēcahuē, rohahuahacaquē oriquiti ra’ icana jato qui” i jahuē yonati qui ibo ni quiha. ¹⁸ Jama, nohiria bo bēcasyamacani quiha. “Huai copiyaquē ēa ra. E jisi caxēti xo” i jariapari ca joni niquē jahuē yonati qui. ¹⁹ Jatsi, “Cinco ca huēyē bo ē copiquē. Jato tanamahi caquia ra. Canoma xo ēa rē” i huētsa ni quiha. ²⁰ Jatsi, “Jaboqui ē ahui yaquē ra. Canoma xo ēa rē” i joni huētsa ni quiha. ²¹ Jatsi yonati bacaniquē jahuē ibo qui. Bacahax, “Bēcasyamacani quiha pē” i ja qui ja niquē. Jatsi ibo caxaniquē. “Yacatá ca bahi tēquē qui cata. Noitiria cabo, yora choni jaya cabo, bēco cabo, tapitimaxēni cabo, tihí cabo nēri bēhuē” i jahuē yonati qui ibo ni quiha. ²² Jatsi bacahax, “Jato ē bēquē ra, mi yoaha jascaria; jama, jari tobi xēa pa” i jahuē chama qui ja ni quiha. ²³ Jatsi ibo jahuē yonati qui chanitēquēniquē. “Bahí ca nohiria bo, nēama ca nohiria bo, tihí ca nohiria nēri bēhuē, noho xobo rēamēno iquish na. ²⁴ Noho oriquiti piyamaxēhi quiha ra toa jariapari ca noho joi binish cabo ra” iquiina —nēa tsi joni qui Jesu nēcaniquē toa chani yoahi na.

Copixēni tsi xo Cristo banahuahaina

²⁵ Jabi huēstima ca nohiria Jesu qui bēhi iniquē. Jato quiri bēsohax ja chaniniquē:

²⁶ —Ea noixēti xo tsohuēcara ca ēa banahuacatsai cato. Jahuē jahēpa, jahuē jahēhua, jahuē ahuihi, jahuē xocobo, jahuē xatē bo, tihí cabo oquē tsi ēa ja noixēti xo ra. Jasca, jamē ja noiyamano. Toca pi ēa noiyamahi tsi noho rabēti manētimaxēni-xēhi quiha. ²⁷ Jahuē cruz yoi pi iayamahi tsi ēa pi banahuayamahi tsi noho rabēti iti mētsama xo toa ra. ²⁸ Jabi ¿jēnahuahi ni joni, xobo paxa ca acatsi na? Tсахoxo tsi ¿jahuē xobo pari ati copinaca shinayamayamahi ni? Toa shinaparihi quiha, parata narisyamaxēna. ²⁹ Parata pi narisquí tsi jahuē xobo jatihuayamaxēhi quiha. Tocapijano tsi osacaxēcani quiha nohiria. ³⁰ “Jahuē xobo naa joní chitahēhuaniquē. Chitahēhuahax jatihuatumaxēni xo ra” i caxēcani quiha. ³¹ Jascaria, ¿shinayamayamaxēhi ni chama, ja pasomaha ca país huētsa iquinacasquē no? Jabi veinte mil ca soldado bo pi chama huētsá jayano tsi jahuē diez mil ca soldado bo yoi bēbohacamitsa. Japi jato iquinati chama cahēparicatsi quiha iquinanox pari. Shinaparihi quiha chama. ³² Jatsi bēbotimaxēni pi jahuē soldado bo no tsi toa chama huētsa qui chani raaxēhi quiha, ja bēta rabēnaxēna. ³³ Jascaria, shina-shinaparihana. Mato jahuē bo tēquē pi jishēriyamahi tsi noho rabēti bo itimaxēni xo mato ra —nēa tsi Jesu nēcaniquē.

*Chopará jahuë tée bēnohaina**Mateo 5.13; Marcos 9.50*

³⁴ —Jabi chopara tée tsi xo jënima. Jama jahuë tée pi bēnohi tsi çjēnahuariahax ja tēēnatēquēna? ³⁵ Mahitsa tsi xo chopara tēēyama cato. Anoma quiha. Ja niahacaxēti xo. Japi pahoqui jayaquí tsi nicacana ra —i Jesu niquē nohiria bo qui.

15*Bēnonish ca oveja**Mateo 18.10-14*

¹ Jabi gobierno impuestos bicanaiho, jochacanaibo, tihi cabo Jesu qui bēcaniquē jahuë chani nicacatsi na. ² Ja bēcaquē tsi quiha fariseobo, yoba tiisimacanaibo, tihi cabo yosananiquē.

—Jochahuaxēni cabo joihuahi quiha naa Jesu pa. Tsayacapa. Jato bēta xo tsi pihí quiha ra —i jaca niquē.

³ Jatsi naa chani Jesús jato yoaniquē:

⁴ —Shinaparicana. ¿Cien ca oveja bo pi jayarohaquí tsi jato ó ma bēsoquē ayamana? Huēsti ca oveja pi bēnono tsi çnoventa y nueve cabo jisbayayamayamacanaí, toa huēsti ca mēraxēna? Toa bēnohai ca oveja ma mēraquē aquē tia. ⁵ Bichi tsi rani-raniqui mato. Icoxo tsi jahari xobo qui bēqui mato raniquí na. ⁶ Jatsi mato xobo qui cahēxo tsi mato tapaí ca racacanaibo quēnaqui mato, jato yoaxēna, “E bēta ranicana. Noho bēnohax ca oveja jahari è biquē ra” iquiina. ⁷ Jascaria tsi, noventa y nueve ca mēstēxēni ca nohiria bo, naa janyama boyamacanaibo quēshpi tsi ranihi quiha naipá cabo. Jama, oquēria tsi xo ja ranicanaina, huēsti ca bēnohax ca jochahai ca jahari Dios qui joquē no —i Jesu niquē.

Bēnohacanih ca parata

⁸ —Shinaparicana. Diez ca parata jayaquí tsi huēsti ca parata yoxá bēnomitsa. Bēnoxo tsi çjahuë lamparina tsamayamayamaxēhi ni, toa huēsti ca parata mēraxēna? ⁹ Mēraxo tsi jahuë xobo tahē ca racacanaibo, jahuë rabēti bo, tihi cabo quēnahi quiha jato yoaxēna, “E bēta ranicana. E bēnoha ca parata è biquē ra” iquiina. ¹⁰ Jascaria tsi rani-ranixēhi quiha Dios ángel bo ri, jocha quima Dios quiri huēsti ca jochahai ca bēsoquē no —nēa tsi Jesu nēcaniquē.

Bēnonish ca baquë

¹¹ Jaquirēquē chani huētsa Jesús yoaniquē. Ja nēcani quiha:

—Dos ca baquë joní jayaniquē. ¹² Baquë nomá jahuë jahēpa jisbayacasni quiha. Canox pari tsi quiha “E bixēti ca jahuë bo xatē jaboquí è qui ahuë, noho jahēpá” i ja qui ja ni quiha. Jatsi jahuë jahuēmishni bo, jahuë parata, tihi cabo jahuë jahēpá oquēxnamaniquē, jahuë baquë noma qui ati. ¹³ Jatsi ichariama bari huinocaquē tsi jahuë jahuë bo, jahuë parata, tihi cabo sota qui baquë nomá nanēniquē. Nanēhax nēama ca mai huētsa qui ja caniquē. Toá tsi jahuë parata ja raaniquē. Ja pahēni quiha. Ja yoyoni quiha. Mēri tsi jahuë parata quēyohacani quiha. ¹⁴ Toca tsi jahuë parata tēquē ja raaniquē pē. Jatsi biniatsi toá ca maí ca nohiria bá huaniquē, oi yama ca quēshpi na. Paxnatsi joni niquē rē jaa ri. ¹⁵ Paxnaxo tsi quiha yonoco mērahi ja caniquē. Jatsi chancho obēso ca ja manēni quiha. Ja raahacani quiha jato pimati. ¹⁶ Paxnaquí tsi quiha chancho bá pihai ca xēqui xēbo ja picasni quiha. Yama jahuë poco ini quiha. Huashicoxēni jahuë chama ini quiha. ¹⁷ Jatsi jahuë jahēpa xobo shinatsijahuaniquē. “Shomaria tsi xo toa noho jahēpa yonati bo ra. Paxnayamacani quiha. Huēstima tsi xo jato oriquiti ra. Jama, rēsopaimaria

xo ëa rë, paxnahi na” nëa tsi ja nëcani quiha jamë no. ¹⁸ Jatsi “Noho jahëpa qui jahari caquia ra. Cahax ‘Mia, Dios, tihì cabo pasomaha ë jochaquë rë” ixëquia noho jahëpa qui. ¹⁹ ‘Mi baquë ë quënahacayamati xo. Mi yonati jascaria ëa mi ano ra’ ixëquia” nëa tsi baquë nëcani quiha jamë no. ²⁰ Jatsi joihax jahuë jahëpa xobo qui catsijaniquë.

‘Jabi nëama ja no tsi quiha jahuë jahëpá jahuë baquë jisniquë. Jisi tsi quiha jahuë baquë qui ja jabaniquë. Jahuë baquë ja tatsoniquë noiquí na. ²¹ Jatsi jahuë jahëpa qui baquë chaniniquë: “Dios, mia, tihì cabo pasomaha ë jochaquë ra. Mi baquë ë quënahacayamati xo ra. Mi yonati jascaria ëa mi ano” i jahuë jahëpa qui baquë ni quiha. ²² Jama, jahuë jahëpá jahuë yonati bo quënaniquë. “Saco, naa oquë ca sacco nëri bëcana. Noho baquë sahuëmacana. Jasca, jahuë mëquënë tsi mëquëraati amacana. Jaquirëquë zapato bo sahuëmacana. ²³ Sahuëmaxo tsi vaca baquë चाहितखेंनि ca bëcana tēpas-hacati. No oriquino ra. No pabëno ra. ²⁴ Rësonish ca jascaria noho baquë iniquë, jama jaboqui bëso ja nori ra. Bëno tsi ja iniquë, jaboqui no bëta ja nori. Jahari ja joquë ra” nëa tsi jahuë jahëpa nëcانيquë. Jatsi oriquitsijacaniquë.

²⁵ ‘Jabi huaí tsi jahuë baquë rëquëmë iniquë, jahuë noma bacaquë no. Xobo qui jopama tsi quiha música, pabëcanaina, tihì cabo ja nicaniquë ra. ²⁶ Nicaxo jahuë yonati ja quënaniquë. “¿Jënahucachi ni xobó cabo pa?” i ja qui ja ni quiha. ²⁷ Jatsi, “Jahari joquë mi noma ra. Vaca baquë चाहितखेंनि ca mi ipá aquë ra piti, jënima mi noma nori quëshpi na. Jia tsi jahari ja joquë ra” i ja qui yonati niquë. ²⁸ Jatsi caxaniquë jahuë rëquëmë. Xobo qui ja jicoyamani quiha. Jatsi cacha jahuë jahëpa caniquë ja qui, “Jicohuë, jicohuë” iquiiina. ²⁹ Jatsi jahuë jahëpa qui baquë nëcانيquë: “Huëstima ca año no tsi yonati jascaria mi bax ë yonocoquë ra. Mi yoba tēquë ë nicaquë ra. Toatiyá tsi chibo pistia roha ë qui ayamaqui mia pë, noho rabëti bo ya ë pabëno. ³⁰ Jama, noho noma bacatapiquë tsi vaca चाहितखेंनि ca aqui mia pë ja bax na. Mëtsaxëñiria ca yoxa quëshpi tsi mi parata quëyoria ca baquë tsi xo naa ra” nëa tsi jahuë jahëpa qui baquë rëquëmë nëcانيquë. ³¹ Jatsi jahëpa chaniniquë: “Jatiroha ca bari tsi ë bëta xo mia ra. Nohó-na jatiroha ca xo mí-na ra. ³² Jaboqui no oriquino ra. Jaboqui no raniti xo, mi noma bëso nori quëshpi na. Rësonish ca jascaria ja iniquë ra. Bëno tsi ja iniquë ra, jaboqui no bëta ja nori. Jahari ja bacaquë ra” i ja qui jahuë jahëpa ni quiha —nëa tsi Jesu nëcانيquë naa chani yoahi na.

16

Yomaxëni ca empleado

¹ Jabi naa chani Jesú jahuë rabëti bo qui yoaniquë:

—Jabi tobi ini quiha rico inish ca joni. Empleado jayani quiha jahuë yonoco ati. Jabi jahuë empleado yomahai ca yoati tsi ja yoahacani quiha. ² Nicaxo tsi quiha jahuë empleado ja quënaniquë. “¿Jahuë ni naa rë, ë nicañana mia yoati na? Mi libro bo, mi cuenta bo, tihì cabo mi jatihuano. Jaboqui rohari tsi noho empleado inoma xo mia ra” i ja qui jahuë chama ni quiha. ³ Jatsi shinatsi empleado huaniquë: “¿Jënahuariaxëhi ni ëa rë? Ea tsi xo toa chamayama, huai xëxëti. Jasca, parata bënati bërabipiquia” i jamë ja ni quiha. Shinahax, ⁴ “E axëti ca cahëquia ra. Noho yonoco jatiquë tsi huëstima ca rabëti bo jayaxëquia tia. Jato xobo qui ëa joihua-caxëcani quiha ra” i jamë empleado ni quiha. ⁵ Japi jahuë chama ó ca cuenta jaya cabo ja quënaniquë. Quënahax, “¿Jahuë tihì ni toa mi cuenta?” i ja niquë jariapari ca jonish ca qui. ⁶ Jatsi joní quëbiniquë: “Noho cuenta tsi xo cien ca aceite lata bo rë” iquiiina. Jatsi empleado nëcانيquë: “Nëa xo mi cuenta siri. Bamayamatsihuë.

Cuenta paxa ca mi ano. Cincuenta lata bo huishana” i joni qui ja niquè pè, jahuè chama parahi na. ⁷ Jaquirèquè huètsa ja nicaniquè: “¿Jahuè tihi ni mi cuenta?” iquiina. “Cien ca medida trigo moto” i joni niquè. Jatsi, “Mi cuenta siri bihuè. Ochenta roha huishana” i joni qui ja niquè pè, jahuè chama parahi na. ⁸ Jatsi chamá toa empleadó paraxèni cató ani ca nicaniquè. Nicahax, “Anomaria tsi xo toa empleadó acana ra. Nohiria, parata, tihi cabo mèquixèni ca joni tsi xo naa. Cahèxèni quiha” i chama niquè. Jabi Dios xocobo oquè tsi xo toa chahahuayamacanaibá jato jahuè bo, jato parata, jato yonoco, tihi cabo ó ja bèsocanaina ra.

⁹ Jabi bérوريا tsi xo toa paratá tsi anoma ca acaina ra. Jama, mato paratá tsi noitiria cabo mèbicana. Tocapiquí tsi rabèti-rabètiria bo jayaxèqui mato ra. Jatsi ma rèsono tsi mato joihuariaxèhi quiha Dios, i-ipaohai ca qui ma cahèxèquè no.

¹⁰ Jabi jia pi jahuè ichariama ca jahuè bo otoquí tsi jia tsi huèstima ca jahuè bo otòxèhi quiha nohiria. Chahahuahacati ca nohiria tsi xo naa. Jama, jia pi jahuè ichariama ca jahuè bo otoyamaquí tsi çjènahuariaxo oquè ca jahuè bo ja otóna? Chahahuahacatimaxèni ca nohiria tsi xo naa. ¹¹ Jabi parata, nohiria jahuè bo, tihi cabo pi ó bèsoti cahèyamaquí tsi çjènahuariaxo raca mana ca jahuè bo ó bèsoti ma cahèna? ¹² Jasca pi nohiria huètsa jahuè bo ó bèsoti mètsama ma ino tsi çjènahuariaxo raca mana ca jahuè bo mato qui Diós ana, jaha ma bèsono?

¹³ Jabi dos ca chama bo bax yonocotimaxèni xo nohiria. Huèsti ca chama qui caxaxèhi quiha; chama huètsa noijahuanori. Huèsti ca chama nicaxèhi quiha; chama huètsa nicacasyama-jahuanori. Japi, çjènahuariahax raca Dios bax ma yonocona, parata noihi na? ¿Mato yonayamayamaxèhi ni parata ra? Dos ca ibo jayatimaxèni xo mato ra —nèa tsi Jesu nècaniquè jahuè rabèti bo qui, tihi ca chani bo yoahi na.

¹⁴ Jabi Jesu chanihai ca toa paratá-naxèni ca fariseobá nicaniquè. Nicaxo tsi quiha Jesu ja osacanicuè parata noiquí na. ¹⁵ Jatsi Jesu jato qui chaniquè: —Paraguí tsi nohiria bèsójó tsi mamè mèstèhuaqui mato pè. Jama, mato shina yoi bo cahèhi quiha Dios ra. Ma parahai ca iqui tsi jia tsi nohiria bá mato ocahuamitsa. Jama, mahitsa tsi xo toa mato yoati ja shinacanaina. Dios qui quèrasria xo toa nohiria bo ma parahaina iquia ra —i jato qui Jesu niquè —.

Dios yoba-yobaria

¹⁶ Jabi Moisés quènenina, Dios Chani yonish cabá quènenina, tihi cabo nohiria bo yoahacanicuè Juan yamabo jonox pari no. Ja joquè tsi quiha chitahènicuè chani paxa cato, naa Diós nohiria bo otóhai ca yoati na. Jaha tsi jato chamá tsi Diós otóhai ca qui jicocascani quiha jatiroha cabo.

¹⁷ Jabi jatihuahacanicuè Moisés yoba. Jama, naama-naamapaoxèhi quiha Dios yoba-yobaria. Jatihuahacayamaxèhi quiha.

Ahui niahaina

Mateo 19.1-12; Marcos 10.1-12

¹⁸ Jabi jocha ó tsi bèsóhi quiha ahui niahax ca joni, ahui huètsa ja biquè no. Jascaria, jocha ó tsi bèsóhi quiha niahacahax ca yoxa bichi cato ra.

Rico inish ca joni — noitiria ca Lázaro

¹⁹ Jabi tobi iniquè quiha rico-ricoria ca joni, naa sahuèti copixèni ca sahuèhai cato. Xobo jiaxèni ca ja jayani quiha. Jasca, jatiroha ca barí tsi jia tsi ja piniquè. Ja paxnayamani quiha. ²⁰ Jabi jahuè panè caiti ó tsi janahacani

quilha joni, naa Lázaro icanai cato. Bonohuaxëni ca naa joni ini quilha. Jasca, yonocotimaxëni ja ini quilha. ²¹Jabi joni rico cato mesa quima ax paquëhax ca quësi mishni bo ja picasni quilha, paxnaquí na. Jasca, ja qui ina bo bëcanaca tsi jahuë bono bo ja taxocani quilha. ²²Jarohari tsi noitiria ca Lázaro rësoniquë. Ja rësoquë tsi quilha mana, naa Abraham iti icanai ca qui ángel bá boniquë. Jaquirëquë rësoniquë rico ca ri. Rësohax ja maihuahacanicuë. ²³Jatsi tënëtiyá tsi ja bëpëquëniquë tënëhi na. Jaha xo tsi quilha nëama ca Abraham, ja tapai ca Lázaro, tihi cabo ja jisni quilha. ²⁴Jisi tsi quilha Abraham ja quënaniquë: “Ea shinahuë, noho jahëpa Abrahám. Nëri Lázaro mi raano ra. Jënë qui jahuë mëtsis ja raano, noho jana matsihuaxëna. Naa chihí tsi tënëquia rë” i ja ni quilha. ²⁵Jatsi Abrahám quëbiniquë: “Shinaparihuë, noho baquë. Huëstima ca jahuë jia bo mi jayapaoni quilha bësoquí na. Toatiyá tsi noitiria Lázaro ini quilha. Jama jaboqui nëá xo Lázaro. Shoma xo ra. Jaboquí mia ri tsi xo toa tënëhaina. ²⁶Jasca, noqui naxërëquë tsi xo xëa चाहितaxëni ra. Shitanoma quilha. Tori canoma xo nëá ca shitacascanaibo. Jasca, yama tsi xo toa nëri bëcanaibo toa nahax na” i ja qui Abraham ni quilha. ²⁷Jatsi rico inish ca chaniniquë: “Jishopë. Jatsi noba jahëpa xobo qui Lázaro raahuë, noho jahëpa Abrahám. ²⁸Cinco ca noma bo jaya xo ëa ra. Naa tënëtiya iti yoati tsi Lazaró jato yobano ra. Nëri ja bëcamitsa jato ri rë ja rësoquë no” i Abraham qui ja ni quilha. ²⁹Jatsi Abrahám quëbiniquë: “Moisés quënëniina, Dios Chani yoanish cabá quënëniina, tihi ca libro bo jayacani quilha. Jato yoba qui ja nicacano ra” iquiina. ³⁰Jatsi rico cató quëbitëquëniquë: “Iriama tsi xo jato yoba, noho jahëpa Abrahám. Oquë tsi xo rësonish cabo iti quima ax tërohacahax ca nohiria jato qui shishohi cahaina, jato yobaxëna. Jatsi jato jocha quima Dios quiri bësocaxëcane quilha ra nicahax na” i ja ni quilha. ³¹Jatsi ja qui Abraham chanitëquëniquë: “Moisés, Dios Chani yoanish cabo, tihi caba yoba pi nicayamaquí tsi jënahuariaxo rësonish caba iti quima ax tërohacahax ca ja nicacascana ra?” i Abraham ni quilha —nëa tsi Jesu nëcaniquë nohiria bo qui chanihina.

17

Jochamahaina

Mateo 18.6-7, 21-22; Marcos 9.42

¹Jahuë rabëti bo qui Jesu chaniniquë:

—Jochati tanamahacarahaxëhi quilha nohiria ra. Jama, noiti-noitixëhi quilha nohiria jochamahai cato. ²Anoma tsi xo naa चाहahuabëna cabo jochamahaina ra. Ja acai ca quëshpi tsi tërotamë ca rënëti maxaxa jaya tsi ia qui ja niahacarahapino tsi “Anomaria tsi xo toa copi” i no quë aquë. Jama, oquë ca copi bixëhi quilha toa nohiria huëtsa jochamahai cato iquia. ³Japi quiniacaxëcahuë. Mabë xatë pi jochano tsi raahacana. Jahuë jocha quima Dios quiri pi ja bësono tsi jahuë jocha shina-bënocana. ⁴Jasca, huësti barí pi siete tsi mato pasomaha ja jochano tsi, siete tsi “Jochaquë ëa rë” i pi mato qui ja no tsi jari jahuë jocha ma shina-bënoxëti xo iquia —i Jesu niquë.

Chama jayaxo chitimihaina

Mateo 17.20

⁵Jatsi lbo qui jahuë Chani chitahëhuati ibo bo chaniniquë:

—No chitimihai ca mi anihuano —iquiina.

⁶Jatsi,

—Mostaza bëro tsayacana. Mishni-mishniria ca bëro tsi xo toa ra. Jama, चाहितaxëni ca planta manëhi quilha toa bëro banahacahax na. Jabi mostaza

planta jascaria pi ma chitimihai ca anino tsi anomariaxëhi quiha ma acaina. Jatsi “Mimë tsëquëhuë. Ia qui cata” i pi toá ca jihui qui ma no tsi mato bax caxëhi quiha ra —i jato qui Jesu niquë.

Yonati yonoco

⁷Jatsi Jesu nëcaniquë:

—Shinaparicana. Yonati mato ó ca huësti cató jayamitsa, naa mato huai xëxëhai cato, vaca ó bësöhai cato. Huai ax ja joquë tsi zjënicanai ja qui? “Tsaohuë. Piiparihuë” ¿i ja qui canai pa? ⁸Iyamaqui mato ra. Jama, “Noho oriqiti rohahuahuë. Shomahuahacahuë. Jaboqui piquia. Ea mi taano. Ea taaxo tsi piqui mia” iqui mato ra. ⁹Pihax ja qui “Gracias” iyamaqui mato, yonati roha ja nori quëshpi na. ¹⁰Jabi yonati bo xo mato ri. “Yonati bo roha xo noa. No ati ca yonoco roha no aquë ra” i ma ti xo, Diós mato yoaha ca tëquë jatihuahax na. Jatsi mamë oquëhuayamacana —nëa tsi jahuë rabëti bo qui Jesu nëcaniquë.

Diez ca lepra bo, naa bonohuaxëni cabo

¹¹Jerusalén qui cahí tsi Samaria, Galilea, tihí ca mai bo Jesu naconiquë.

¹²Jëni ca yaca qui ja cahëquë tsi quiha ja qui diez ca lepra jaya cabo bëcaniquë. Noitiria ca joni bo quiha. Bonohuaxëni cabo ja icani quiha. Ja bëcanaca tsi basi xo tsi Jesu ja quënananiquë:

¹³—Noqui shinahuë, taita Jesús —i quiha jaca niquë.

¹⁴Jatsi Jesús jato jisniquë. Jisi tsi quiha,

—Arati ibo bo qui bocata. Jato qui mato yora bo jismacana —i jato qui ja niquë.

Capama tsi quiha ja jënimahuahacanicuë. ¹⁵Jatsi huësti ca joni jahari joniquë, ja jënimahuahacani nori jisish na. Jopama tsi Dios oquëhuahi ja ini quiha “Jia xo Dios” iquiina. ¹⁶Johax Jesu tahë tsi ja mëniniquë. Mënihax “Gracias” i Jesu qui ja niquë ranihi na. Jabi Samariá ca carayana ca joni, naa “Gracias” inish ca ini quiha, naa jodiobo qui quëras ca nohiria. ¹⁷Jatsi Jesu chaniniquë:

—¿Diez ca joni jënimahuahacayamayamaha? ¿Jahuënia ni toa nueve ca tëxë bo rë? ¹⁸¿Jaroha ca “Gracias” iqui ca ni naa carayana pa? ¿Bëyamacahi ni tëxë bo rë, “Gracias” ixëna? —i Jesu niquë.

¹⁹Jatsi bacanish ca qui Jesu chaniniquë:

—Joihuë. Cata. Mi chahuahai cató mi jënimahuahacaquë ra —iquiina.

Diós otohaina

Mateo 24.23-28, 36-41

²⁰—¿Jënino tsi nohiria bo otoxëhi ni Dios ra? —i Jesu qui fariseobo niquë.

Jatsi Jesús jato quëbiniquë:

—Nohiria bo ototi Diós chitahëhuano tsi mato bëró tsi jisyamaxëqui mato. Jisnoma quiha. ²¹Ja tsi xo toa yamaxëhi quiha toa “Nëá xo ra. Toá xo ra” iti mëtsa cato, mato xërëquë ó tsi Diós othai nori ca quëshpi na —i jato qui Jesu niquë.

Jesu bacahaina

Mateo 24.23-28, 36-41

²²Jatsi jahuë rabëti bo qui Jesu chanitëquënicuë:

—Tsëquëxëhi quiha ma tënëti xabaca ra. Toatiya tsi Nohiria Baquë bari, naa ë bacahai ca bari jiscasxëqui mato iquia. Jama, mato ri tsi xo toa bari jisyamaxëhaina. ²³Toatiya tsi quiacaxëcane quiha nohiria, “Toá xo Cristo, nëá xo Cristo” iquiina. Tocajacano tsi boyamacana. Jato qui nicayamatsacana.

²⁴ Toa barí tsi joritsixèhi quiha Nohiria Baquë, naa bajra-bajrahai ca canapa nai shitahai jascaria. Nohiria qui bëroriaxèhi quiha ra. ²⁵ Jama, ë bacanox pari tsi ë tènëparixèti xo. Jariapari ëa niacaxëceni quiha naa nohiria, ë qui caxaquí na. ²⁶ Jasca, ë bacano tsi ë noho pasoyamacaxëceni quiha nohiria rë. Noé tiyá jascariaxèhi quiha. ²⁷ Dios shinayamaquí tsi oi ó ja pasoyamacani quiha. Jënë aqúi ja icani quiha. Ahui yahi ja icani quiha. Ja tocacani quiha, jahuë noti चाहितखेनि ca qui Noé jicoquë rohari. Jatsi jënë bainiquë. Jatsi ja quëyohacanicuë jato tëquëta. ²⁸ Jasca ca ja ini quiha Lot tiyá ca nohiria bo ri. Jocha copi ó ja pasoyamacani quiha jato ri. Toatiyá tsi oriquihi nohiria bo ini quiha, raquëhaxma. Jënë aqúi ja icani quiha. Tobi copihaina, iniahaina, banahaina, xobo acaina, tihí cabo aqúi ja icani quiha. ²⁹ Jama, yaca Sodoma ax Lot tsëquëquë tsi quiha nai ax chihí, mëshohai ca azufre, tihí cabo xapaquënicuë oi jascaria. Quëyohacani quiha toa nohiria tëquë. ³⁰ Jasca, tocatsixèhi quiha Nohiria Baquë jisiquihai ca barí no ra. Toa bari ó pasoyamacaxëceni quiha nohiria pë.

³¹ “Toa bari tsëquëno tsi bamahaxma tsi xobo cacha cabo jabano. Xobo qui ja jicoyamano jato jahuëmishni bo bixëna. Jasca, jato xobo qui huaí ca yonococanaibo bacayamano. ³² Lot ahui shina-bënoyamacana. Ja copihacani quiha yaca qui ja bacacasni igui na. ³³ Jabi rësoxèhi quiha tsohuëcara ca jahuë shina xabahamacatsai cato. Jama, bëscoxèhi quiha tsohuëcara ca jahuë shina chihohuahai cato. ³⁴ Parayamaquia. Toa baquichá tsi huësti ca oxatí tsi oxa ixèhi quiha dos ca joni bo. Mëbihacaxèti xo huëstita iquia. Jisbëriahacaxèhi quiha huëtsa rë. ³⁵⁻³⁶ Toa barí tsi yonoconabëquixèhi quiha dos ca yoxa bo, jato moto acaina. Mëbihacaxèhi quiha huësti cato. Jisbëriahacaxèhi quiha huëtsa rë —nëa tsi Jesu nëcaniquë.

³⁷ Jatsi,

—¿Jahuënia tsi ocapixèhi ni naa ra, Ibobá? —i jahuë rabëti bo niquë.

Jatsi ja quëbiniquë:

—Jatiroha ca iti xo naa. Poico catihai jascaria catixèhi quiha Dios ángel bo, jochacanaibo copixëna —nëa tsi Jesu nëcaniquë.

18

Copiti ibo-iboria — bënë imanish ca yoxa

¹ Jatsi naa chani jahuë rabëti bo Jesú yoanicuë, bëhoxti jato tiisimaxëna, ja shina-huëjënayamacano iquish na. ² Ja nëcaniquë:

—Huësti ca yacatá tsi juez, naa copiti ibo-iboria ini quiha. Dios cahëcasyamahai ca ja ini quiha. Jasca, nohiria bo qui ja raquëyamani quiha.

³ Toa yacatá tsi racani quiha bënë imanish ca yoxa ri. Jabi juez, naa nohiria bo copiti ibo-iboria qui naa noitiria ca yoxa caroha-carohaniquë. Cahax, “Ea mëbihuë. Ea yosihai ca mi copino ra” i ja qui yoxa paoni quiha. ⁴ Jabi naama tsi naa noitiria ca yoxa juéz mëbicasyamani quiha. Jarohari tsi yoxa qui ja yosananicuë. Yosannahax, “Toa yoxa mëbixëquia pë” i jamë ja ni quiha. “Dios, joni, tihí cabo qui raquëyamaquia. ⁵ Jama, yosaria tsi xo naa yoxa ë qui joroha-jorohahaina. Japi ë mëbiyamano tsi jari joroha-jorohaxèhi quiha pë. Toa yoxa mëbixëquia ra, ëa ja yosanamayamano ra” i jamë juez ni quiha —i Jesu niquë naa chani yoahi na.

⁶ Jatsi Jesu chanitëquënicuë:

—Naa juez yoi cato chani nicacana. “Mia mëbixëquia” ¿i yoxa qui ja yamayamani? ⁷ Nicacana. ¿Jahuë nohiria yoi bo mëbiyama-yamaxèhi ni Dios ri? Baquicha, barihani, tihí cató tsi mëbixèhi quiha, “Ea mëbihuë ra”

i ja qui nohiria quë no. Bamayamaxëhi quiha ra. ⁸ Bamaxoma tsi jato mëbixëhi quiha Dios iquia ra. Jama, ëa, naa Nohiria Baquë mai qui bacano tsi ichariama ixëhi quiha toa chahahuacanai ca bëhoxcanaibo iquia —nëa tsi Jesu nëcaniquë.

Fariseobo — impuestos biti ibo bo

⁹ Jabi tobi ini quiha mëstëxëni ca jaca nori ca quëscahuacanaibo. Jato qui naa chani Jesu yoaniquë, naa nohiria huëtsa bo oquë jaca nori ca jascahuacanaibo qui.

¹⁰ Ja nëcaniquë:

—Dios arati xobo qui dos ca joni bo bocaniquë bëhox-xëna. Caniquë fariseobo, naa nohiria huëtsa bo oquë ja nori ca quëscahuahai cato. Jasca, bëhoxhi caniquë impuestos parata biti ibo ri, naa nohiria bo qui yoixëni cato. ¹¹ Jabi arati xobó tsi fariseobo niiniquë jamë bëhox-xëna. Ja nëcani quiha: “Paratá-naxëni ma ca ëa xo naa ra, Diós. Jasca, ëa ti tsi xo nohiria parayamahaina. Yoxa mëtsaxëni ca ma ca ëa xo naa. Mi qui ‘Gracias’ iquia, Diós, nohiria huëtsa jascama ë nori quëshpi na. Jasca, mi qui ‘Gracias’ iquia, naa nëca ca impuesto bichii ca yoixëni ca jascama ë nori quëshpi na.

¹² Jasca, jatiroha ca semaná tsi dos bari no tsi samaquia ra. Jasca, mi qui noho parata xatë, naa décima ca mi qui aquia ra” tihi ca tsi fariseobo ini quiha, bëhoxhi na. ¹³ Jama, ori pistia tsi nii quiha impuesto biti ibo iniquë. Nai qui ja tsayacasyamani quiha rabihí na. Cohuëqui tsi jahuë shipati ja toxtoxhaniquë jahuë jocha iqui na. “Ea shinahuë, Diós, jochahuaxëni ca ë nori quëshpi na” i ja ni quiha bëhoxhi na. ¹⁴ Jabi masahacaquë toa joni jocha iquia ra. Jia tsi jahari jahuë xobo qui ja cani quiha. Jama, toa fariseobo rë. Ja bëhoxhai ca Diós nicayamaniquë. Masahacayamani quiha jahuë jocha. Jatsi quiniacaxëcahuë. Jamë oquëhuamixënicabo tëquë noitihuaxëhi quiha Dios. Jasca, oquëhuahacaxëhi quiha jato jocha bërohuacanaibo tëquë —nëa tsi Jesu nëcaniquë.

Xocobo Jesú shomahuanina

Mateo 19.13-15; Marcos 10.13-16

¹⁵ Jatsi Jesu qui baquë mishni bo nohiria bá bëniquë, jato ja shomahuano iquish na. Jama, jato jisi tsi jahuë rabëti bá raahaniquë;

—Xocobo bëyamacahuë —iquiina.

¹⁶ Jatsi xocobo Jesú quënaniquë:

—E qui xocobo bëcano ra. Jato chitiayamacana. Nëca cabá-na tsi xo Diós otohaina ra. ¹⁷ Mato parayamaquia. Bëroria tsi Chama Dios qui chahahuacani quiha xocobo ra. Jabi xocobo jascaria pi chahuayamahi tsi nai qui jicoyamaxëqui mato ra —i Jesu niquë.

Rico inish ca jonina

Mateo 19.16-30; Marcos 10.17-31

¹⁸ Jatsi huësti ca jodioba chamá Jesu nicaniquë:

—¿Jënahuaxëhi ni ëa, maestro jiaxëni cató, bëso-bësopaoxëna? —iquiina.

¹⁹ Jatsi Jesú quëbiniquë:

—¿Jënixo tsi jiaxëni ca ëa mi quënahá? Yama tsi xo jiaxëni cato. Jaroha ca jia ca tsi xo Dios. ²⁰ Tonia Moisés yoba cahëqui mia tia. “Joni huëtsa ahui biyamahuë; joni ayamahuë; yomayamahuë; quiahuayamahuë; mi ipa, mi ihua, tihi cabo noihuë” tihi ca tsi ii quiha jahuë yoba —i ja qui Jesu niquë.

²¹ Jatsi chama chaniniquë:

—Xocobo xo rohari tsi toa yoba bo tëquë ë nicaniquë ra —iquiina.

²² Jatsi Jesú quëbiniquë joni nicaxo na.

—Jari huësti ca jahuë narisqui mia axëna. Mi jahuë bo tēquē iniahuë. Iniaxo tsi noitiria cabo qui toa parata mëahuë. Tocapimino tsi naipá ca jahuë bo bixëqui mia ra. Jaquirëquë johuë. Ea mi banahuano —i joni qui Jesu niquë.

²³ Nicahax cohuënaniquë chama, rico ja ini quëshpi na. ²⁴ Cohuë ja ini ca Jesu jisniquë. Jatsi,

—Bëroma tsi xo toa rico cabo Diós othai ca qui jicohaina ra. ²⁵ Jato chama yoí tsi Diós othai ca qui jicocascani quiha; toa quiniá tsi ja jicocanomari —i Jesu niquë.

²⁶ Jatsi,

—Yama tsi xo xabamahacati mëtsa cato rë —i nicanish cabo niquë.

²⁷ Jatsi Jesú jato yoaniquë:

—Jamé xabahamatimaxëni tsi xo nohiria. Dios roha tsi xo toa nohiria xabahamahaina —iquiina.

²⁸ Jatsi Pedro chaniniquë:

—Noba jahuë bo tēquë no jisbërianiquë mia banahuaxëna —iquiina.

²⁹ Jesú jato quëbiniquë:

—Mato parayamaquia. Ibo Diós othai ca iqui pi jahuë xobo, jahuë ahuini, jabë xatë bo, jahuë nabo, jahuë xocobo, tihí cabo jisbëriaquí tsi huëstima ca huino ca jahari bixëqui mato. ³⁰ Jaboqui bësoquí tsi oquë ca copi bixëqui mato ra. Jasca, mato bëso-bësopaomaxëhi quiha Dios ra, toa tsëquëxëhai ca xaba paxá no —i Jesu niquë.

Jesu chaninina ja tënëhai ca yoati na

Mateo 20.17-19; Marcos 10.32-34

³¹ Jatsi jahuë doce ca rabëti bo Jesú biniquë jato qui chanixëna.

—Jaboqui Jerusalén qui caqui noa. Toá tsi jatihuahacaxëhi quiha Dios Chani yoanish cabá quënëniina ëa yoati na. ³² Carayanabo qui ëa mëacaxëceni quiha. Mëaxo ëa mahuacaxëceni quiha pë. Ea yosicaxëceni quiha rë. E qui coshocaxëceni quiha. ³³ Jatsi ëa rashacaxëceni quiha. Jaquirëquë namëhacaxëquia. Jama, tres barí tsi bësotëquëxëquia —i Jesu niquë.

³⁴ Jama, Jesú yoani ca jahuë rabëti bá cahëyamani quiha. Jato joma quiha. Cahëtimaxëni ja icani quiha.

Bëco inish ca joni

Mateo 20.29-34; Marcos 10.46-52

³⁵ Yaca Jericó qui tsi Jesu basimano tsi quiha bahi quëpé tsi bëco ca joni tsaho iniquë. Parata bënëhi ja ini quiha. ³⁶ Tsahoxo tsi nohiria misco tarabihai ca ja nicaniquë. Nicahi tsi,

—¿Tsohuë ni toa ëa tarabihaina ra? —i ja niquë.

³⁷ Jatsi,

—Tarabihi quiha Jesu, naa Nazarét conish cato —i ja qui nohiria bo niquë.

³⁸ Jatsi Jesu quënënsijahuaniquë:

—Ea shinahuë, David yamabá Baquë —iquiina.

³⁹ Jatsi,

—Pasihuë. Pasihuë —i ja qui rëquë ca nohiria bo niquë.

Japi oquë tsi ja quënëatëquëniquë:

—Ea shinahuë, David Baquë —iquiina.

⁴⁰ Jatsi Jesu niiniquë. Niihax,

—Nëri toa joni bëcana —i ja niquë.

Jatsi joni joniquë.

⁴¹ —¿Jahuë ó quëëhai? ¿Jënahuaxëhi ni ëa mi bax na? —i ja qui Jesu niquë.

Jatsi,

—Taiscasquia, Ibobá —i joni niquë.

⁴²—Taishuë. E qui mi chitimihai cató tsi mi jënimahuahacaquë ra —i ja qui Jesu niquë.

⁴³Jatsi taisritsijaniquë ra. Taisxo tsi quiha banahuatsijahuaniquë, Dios qui “Gracias” iquiina. Jatsi jia tsi nohiria bá Dios ocahuaniquë, jënima ja iqui jisish na.

19

Jesu — Zaqueo

¹Jatsi yaca Jericó qui Jesu jicohaca tsi nacohi ja iniquë. ²Toá tsi racani quiha joni rico cato, naa Zaqueo icanai cato. Impuesto bo bicanaibo obëso ca ja ini quiha. ³Tsohuëcara Jesu iqui ca ja jiscasni quiha. Nohiria misco iqui tsi jisnoma ja iniquë rë, joni pistia ja ini quëshpi na. ⁴Japi rëquë ja jabaniquë jihui inaxëna, Jesu jiscatsi na. Jabi ja quiri johi Jesu ini quiha toa bahí no. ⁵Toa iti qui joxo tsi quiha mana Jesú tsayaniquë. Tsayahax,

—Botëtsihuë, Zaqueó. Jaboqui mi xobó tsi ë chitëti xo —i Zaqueo qui ja niquë.

⁶Jatsi ja botëtapiniquë. Botëhax rani tsi Jesu qui joi ja amaniquë jahuë xobó tsi ja chitëno. ⁷Jatsi nohiria bo ranimisniquë ocapijani ca jisi na. Jato qui yoi quiha.

—Jochahuaxëni cato xobó tsi chitëhi ja caquë pë —i jaca niquë ranimis-hi na.

⁸Jatsi Zaqueo niiniquë. Niihax,

—Jisa, Ibobá. Noitiria cabo qui noho jahuë mishni bo bëquëx ca axëquia ra. Huëstima cabo ë paraniquë rë, jato parata bichi na. Jaboqui cuatro veces huino jahari jato copixëquia ra —i Zaqueo niquë.

⁹Jatsi Jesu nëcaniquë Zaqueo yoati na.

—Jaboqui naa xobó cabo qui joquë Diós xabahamahai ca chama ra. Abraham yamaba चाहिताखोबो yoi tsi xo naa joni ra. ¹⁰Nëca ca bënëcanaibo mërahi ë joniquë. Jato xabahamacasquia, naa Nohiria Baquë ë nori cato.

Diez ca parata ti chani

¹¹Jahuë chani nohiria bá nicano tsi quiha chani huëtza jato qui ja yoaniquë. Jerusalén qui cahëpaima ja ini quiha. Jasca, Diós otoiha ca ó nohiria bo parata tsi quiha chitahëti. Ja quëshpi tsi naa chani jato qui Jesú yoaniquë.

¹²—Nëama ca mai huëtza qui chama caniquë oquë ca chama bixëna. Rey manëhax jahari ja joniquë. ¹³Jama, canox pari tsi quiha jahuë diez ca yonati bo ja quënapariniquë. Quënaxo tsi quiha jato qui huësti ca parata copixëni ca ja aniquë jato tëquë qui. Acax tsi quiha, “Naa paratá tsi iniatsacana. Yama ë no tsi ganancia bo ma ano ra” i jato qui ja ni quiha. ¹⁴Jabi toa maí ca nohiria bá jato chama noiyanani quiha. Ja qui caxa ja icani quiha. Jabi jato chama caquë tsi quiha comisión ja raacaniquë, “Naa joni bicasyama xo noa ra, noba rey iti” iquiina. ¹⁵Jama, rey toa joni manëni quiha. Manëhax ja bacaniquë. Bacaxo tsi quiha jahuë yonati bo ja quënaniquë, naa jahuë parata binish cabo. “Ma anihuani ca parata bo, naa mato ganancia bo jiscasquia ra” i jato qui ja ni quiha. ¹⁶Jatsi jariapari ca yonati ja qui joniquë. Johax, “Nëá xo mi ganancia. Jaboqui diez ca parata tsi xo ra, Ibobá” i yonati niquë. ¹⁷Jatsi, “Jia tsi xo toa mi acana ra, yonati jiaxëni cató. Diez ca yaca bo mi yonano ra” i ja qui jahuë chama niquë. ¹⁸Jaquirëquë joniquë yonati huëtza. Johax, “Nëá

xo mi ganancia. Jaboqui cinco ca parata tsi xo” i ja niquë. ¹⁹ Jatsi, “Cinco ca yaca bo yonaxëqui mia ra” i ja qui jahuë chama niquë. ²⁰ Jaquirëquë ja qui joniquë yonati huëtsa. Johax, “Pañuelo qui mi parata huësti ca è nanëniquë jaha bësoxëna. ²¹ Mi qui è raquëniquë, shinacoshi mi nori igui na. Jabi mi parata pi è bënorohano tsi è qui mi caxaquë aquë ra. Ja tsi xo toa mi parata ó è bësoquë, mi parata yoi jahiri mi qui axëna” i yonati huëtsa niquë. ²² Jatsi chamá toa yonati raahaniquë: “Mi yoaha cató tsi mi qui quësoxëquia, yonati yoixëni cató. Joni shinacoshi è nori ca cahëqui mia ra. Jabija. Raahacai ca joni ca ëa xo naa. ²³ ¿Jënirioxo tsi banco qui noho parata mi ayamani, ganancia biti? Joxo tsi noho parata, jahuë ganancia, tihi cabo è biquë aquë ra” i yonati yoixëni ca qui ja niquë. ²⁴ Jatsi, “Jahuë jahuësti ca parata mëbichahuë. Diez ca parata jaya ca joni qui acahuë” i chama-chamaria niquë toa mani cabo qui. ²⁵ Jatsi toá ca mani cabá quëbiniquë: “Majia. Diez ca parata jaya xo pa” iquina. ²⁶ “Jabija” i chama niquë. “Huino ca copi bicaxëcani quiha jaya cabo, naa Dios bax yonococanaibo. Jasca, jahuë pistia roha ca bënoxëhi quiha chiquixëni cató. Mëbihacaxëhi quiha jahuë pistia roha cato ra. ²⁷ Japi è qui caxacanaibo, naa ‘Noho chama-chamaria ma xo toa’ iquii cabo neri bëcana. Bëxo tsi ëa bësojo xo tsi jato tēpascana ra” nēa tsi chama-chamaria nēcani quiha —i Jesu niquë, naa chani nohiria bo yoahi na.

Jerusalén qui Jesu jiconina

Mateo 21.1-11; Marcos 11.1-11; Juan 12.12-19

²⁸ Chanihax, jato bëbo ca Jerusalén quinia ca bahí tsi Jesu caniquë. ²⁹ Jabi yaca Betfagé, yaca Betania, tihi cabo qui cahëpaima ja ini quiha, naa Maca Olivo Yá tahë ca yaca bo. Basimapama tsi quiha jahuë rabëti bo dos ca ja raaniquë rëquë.

³⁰ —Mato bësojó ca yaca qui jicocana. Jicoxo tsi nëxë ca burro baquë jisxëqui mato. Jaha jari tsahohama ca burro quiha. Mërisxo tsi è qui bëtsacana. ³¹ “¿Jënixo tsi mëriscanai?” i pi tsohuëcara no tsi “Bicatsi quiha Ibo” i jato qui cana —nēa tsi quiha jato qui Jesu nēcaniquë.

³² Jatsi raahacanish ca joni bo bocaniquë. Burro ja jiscani quiha Jesú yoani jascaria. ³³ Ja mëriscano tsi quiha,

—¿Jënahuariacana ra? —i jato qui ibo bo niquë.

³⁴ Jatsi,

—Bicatsi quiha Ibo —i jato qui jaca niquë.

³⁵ Japi burro baquë Jesu qui ja bëcaniquë. Bëxo tsi quiha jato sahuëti bo ja capohëcanaca tsi cacha Jesu ja tsahomacanicuë. ³⁶ Jerusalén qui ja ccono tsi quiha jato sahuëti bo nohiria bá poohaniquë bahí no. ³⁷ Maca Olivo Yá ca bahi rënichihai ca iti qui ja cahëquë tsi quiha Dios ocahuatsi nohiria bá huaniquë. Jerusalén cacha ja icani quiha. Ja rani-raniani quiha. Jisti bo tēquë ja jiscani ca quëshpi tsi joi pistiamá tsi Dios ja ocahuacanicuë:

³⁸ —Shomahuahaca ca tsi xo Ibobá janë tsi johai ca chama-chamaria ra. Naipá ca ángel bo ranicano ra. Jia tsi xo manariá ca Dios ra —iquina.

³⁹ Jatsi nohiria bo xërëquë ó ca huësti huësti ca fariseobo Jesu qui chaniniquë.

—Mia banahuacanaibo pasimahuë, Taitá. Anoma tsi xo toa ja chanicana ra —iquina.

⁴⁰ Jatsi,

—Mato parayamaquia. Ja pasirohapicano tsi naa bahi quëpë ca maxax bá quënaquë aquë ra —i jato qui Jesu niquë, quëbihi na.

⁴¹Jerusalén basimapama tsi aratsi Jesu niquè jisish na. ⁴²Arahax ja nēcani quiha:

—Jishopë. Dios xabahamati quinia cahëyamayoi qui mato rë. ¿Jënahuariaxo mato ë cahëmana rë? Mato qui jonë xo rë. ⁴³Tsëquëxëhi quiha xaba yoi ra, naa mato qui caxacanaibo mato qui quëtsoxëquë no. Mato paxati bahi bo quëtiacaxëceni quiha. Jatiroha ca quëpë xo tsi mato tëpascaxëceni quiha rë. ⁴⁴Jasca, mato yacata panë, mato xobo bo, tihì cabo potascaxëceni quiha rë. Jasca, mato ri quëyocaxëceni quiha rë. Matsamí, matsamí niyamaxëhi quiha mato yacata panë maxax bo ra. Mai qui niahacayocaxëceni quiha jato tëquë, Dios xabahamati quinia ma niani iqui na —nëa tsi Jesu nēcaniquë Jerusalén ca nohiria yoati na.

Jodioba arati xoboria qui Jesu jiconina
Mateo 21.12-17; Marcos 11.15-19; Juan 2.13-22

⁴⁵Jatsi arati xobo qui Jesu jiconiquë. Jicoxo tsi quiha toá ca iniacanaibo cacha raatsijahuaniquë. ⁴⁶Raapama tsi,

—“Dios qui chaniti xobo quënahacati xo noho xobo” ii quiha Quënëhacanish cabo ra; jama, yomacanaiba iti manëmaqui mato pë —i jato qui Jesu niquë.

⁴⁷Jatsi jatiroha ca barí tsi quiha arati xobo xo tsi nohiria tiisimahi ja iniquë. Jabi arati ibo ba chama bo, yoba tiisimacanaibo, nohiria chama bo, tihì cabá Jesu acasni quiha. ⁴⁸Jari anoma ja icani quiha, jahuë chani nohiria bá nicacasni quëshpi na.

20

Jesu qui jodioba chama bo caxanina
Mateo 21.23-27; Marcos 11.27-33

¹Arati xobo xo tsi nohiria bo Jesús tiisimano tsi quiha ja qui arati ibo ba chama bo, yoba tiisimacanaibo, yosibo, tihì cabo bëcaniquë. Dios Chani jia ca yoahi Jesu ini quiha. Bëhax,

²—Noqui yoahuë. ¿Tsohuë mi qui chama aquitaha, arati xobo quima iniacanaibo niati? ¿Tocati chama jaya ni mia ra? —i ja qui jaca niquë.

³Jatsi Jesús quëbiniquë:

—Mato nicapariquia ëa ri. Ea yoacahuë. ⁴¿Tsohuë Juan yamabo qui chama ani, nohiria ashimati? ¿Dios ni? ¿Joni ni? —iquiina.

⁵Jatsi ja chaninariacanicuë:

—“Dios” ipinono tsi “¿Jënixo tsi Juan ma chahahuayamani?” i noqui xëhi quiha pë. ⁶Jama, “Joni quima jahuë chama ja biniquë” ipinono tsi maxaxá tsi noqui axëhi quiha nohiria bo rë —i jaca ni quiha, joi i-iqui na.

⁷Japi,

—¿Tsohuëcara ni sa? Jahuënia tsi jahuë chama ja bini ca cahëyamaqui noa ra —i Jesu qui jaca niquë, quëbìhi na.

⁸Jatsi,

—Mato quëbiyamaxëquia ëa ri ra —i jato qui Jesu niquë.

Dios Baquë jodiobá niahai ca chani
Mateo 21.33-44; Marcos 12.1-11

⁹Jatsi naa chani nohiria bo qui Jesu yoanicuë:

—Huai joní aniquë. Axo tsi quiha toa xo tsi uva icanai ca bimi ja bananicuë. Banaxo tsi quiha joni huëtsa bo qui jahuë huai ja aquënicuë bimi xatë quëshpi na. Aquëhax tsi naama tsi quiha ja caniquë. ¹⁰Jatsi bimitiyá tsi jahuë yonati ja raanicuë jahuë huaí ca bimi xatë bitì. Jatsi pë huaí ca yonococanaibá jahuë yonati rashanicuë. Jahari mëquëyá ja raacani quiha.

11 Jaquirëquë yonati huëtsa ibobá raaniquë. Ja rashahacani quiha jaa ri. Jahuë yonati ja yosicani quiha. Jahari mëquëyá ja raacani quiha. 12 Jatsi yonati huëtsa ibobá raaniquë. Ja tsacahacani quiha rë. Cacha ja niahacani quiha. 13 Jatsi, “¿Jënahuaxëhi ni ëa rë?” i huai ibo niquë. Jatsi, “Noho baquë yoi jato qui raaxëquia, naa ë noihai ca baquë. Ja qui nicacaxëcani quiha tia” i ibo niquë. 14 Jama, jahuë baquë jisi tsi quiha “Iboba baquë tsi xo naa ra” i jaca niquë. “No ano ra, jahuë bixëti ca mai mëbixëna” i huai ca yonococanaibo niquë pë. 15 Japi ibobá baquë ja acaniquë. Axo tsi quiha huai cacha jahuë yora ja niacanicuë. Jatsi, ¿Jënahuarixëhi ni huai ibo toa yonococanaibo qui? 16 Toa joni bo quëyohi joxëhi quiha ra. Quëyoxo tsi yonococanaibo huëtsa bo qui jahuë huai axëhi quiha —nëa tsi Jesu nëcaniquë toa chani yoahi na.

Jatsi,

—Jishopë! Ocapijayamano ra —i nicanish ca jodiobo niquë.

17 Jatsi Jesú jato tsayaniquë. Tsayahax tsi quiha ja nicaniquë:

—¿Jënihi ni naa Quënëhacanicabo ó ca chani ra?

“Oquënaixëhi quiha yosibá niaha ca Maxaxa ra.

Oquë-oguëria ca manëxëhi quiha ra” ii quiha.

18 Nicacahuë. Noitixëhi quiha naa Maxax icanai ca chahahuayamacanaibo tëquë. Toa Maxax icanai cató tsi quëyohacacaxëcani quiha ra —nëa tsi quiha jato qui Jesu nëcaniquë.

19 Jatsi Jesu qui ja tsamicascaniquë, naa yoba tiisimacanaibo, arati ibo bo. Jato yoati ja chanihai nori ca ja cahëcani quiha. Jama, jari ja qui ja tsamiyamacani quiha nohiria bo qui raquëhi na.

Jesu qui ja quësocascanina

Mateo 21.45-46; 22.15-22; Marcos 12.12-17

20 Jatsi jodioba yoba tiisimacanaibo, arati ibo bo, tihi cabá Jesu tsayatsayaniquë acasqui na. Japi Jesu qui joni bo ja raacanicuë ja yoahai ca nicati. Jabi joni shinajiixëni jisiria cabo ja raacani quiha; yoixëni cabo jaca nori. Romanoba chama-chamaria qui Jesu ja mëacacani quiha, ja namëhacano.

21 Ja tsi xo toa naa bëcanish ca joni bo nëcaniquë:

—Jia tsi xo mi chanihaina, maestró. Janyama ca tiisimayamaqui mia ra. Jasca, jatiroha cabo mëbicasqui mia ra. Paraxoma tsi Dios quinia tiisimaqui mia ra. 22 ¿Japa? ¿Romanoba chama-chamaria qui impuesto bo no ati ni, naa noqui jodiobo? —i ja qui jaca niquë tanamaxëna.

23 Jama, ja paracascanaí ca Jesú cahëni quiha. Cahëhax,

24 —Parata ëa jismacana. ¿Tsohuë bëmana jaria ni naa ra? ¿Tsohuë ni naa quënë ibo? —i jato qui ja niquë.

Jatsi,

—Romanoba chama-chamaria janë quiha —i jaca niquë.

25 —Japi romanoba chama-chamaria qui jahuë jahuë bo tëquë acana. Jasca, Dios qui jahuë jahuë yoi bo acahuë —i jato qui Jesu niquë.

26 Jabi jia tsi Jesú quëbini quiha nohiria bo bësojo xo na. Ja quëshpi Jesu qui quësotimaxëni ja icaní quiha. Jatsi ja pasicaniquë jiaria tsi ja quëbini iqui na.

¿Bësotëquëxëhi ni rësonish cabo?

Mateo 22.23-33; Marcos 12.18-27

27 Jaquirëquë saduceobo Jesu qui bocanicuë jato ri. “Yama tsi xo nohiria bësotëquëxëhaina” icanish cabo tsi xo naa. Jabi Jesu ja tanamacascani quiha jato ri. Ja nëcanicuë:

28 —“Baquë yama pi joni rësono tsi jahuë ahui biti xo jahuë noma. Bixo tsi jahuë rëquëmë bax xocobo ja saihuati xo” ii quiha Moisés yamabá quënëhina,

maestró —i Jesu qui jaca niquë—. ²⁹ Jabi seis ca noma bo jayanish ca joni ini quiha. Xocobo saiuhahaxma tsi naa joni rësoniquë rë. ³⁰ Jatsi jahuë ahui jahuë xachacató biniquë. Xocobo saiuhahaxma tsi ja rësoniquë jaa ri. ³¹ Jaquirëquë jahuë ahui jahuë noma huëtsá biniquë. Xocobo saiuhahaxma tsi ja rësoniquë jaa ri. Toca tsi jahuë noma bo tëquë aniquë. Ja rësoyocaniquë, xocobo saiuhahaxma. ³² Jarohari tsi rësoniquë yoxa ri. ³³ ¿Jabi nohiria bo bësotëquëno tsi tsohuë ahui ixëhi ni yoxa sá? Siete ca bënë jayani quiha bësocuí na —nëa tsi Jesu qui ja nëcacaniquë.

³⁴ Jatsi Jesú jato quëbiniquë:

—Naa mai xo tsi ahui bo yacani quiha joni bo. Bënë bicani quiha yoxa bo ri. ³⁵ Jama, mana xo tsi ahui bo, bënë bo, tihí cabo jayamaxëhi quiha shom-ahuahaca cabo, naa bësotëquëxëcanaibo. ³⁶ Rësotëquëpistia-yamariacaxëcani quiha, ángel bo jascaria iquína. Dios xocobo ca xo, jahuë rësó tsi ja bësotëquëcaxëcanai quëshpi na. ³⁷ Jatsi, “Bësotëquëxëhi ni nohiria bo” ¿icanai pa? Jabi Moisés yoani cato ó ca tsi bëroria tsi xo nohiria bo bësotëquëhaina ra. Toa noqui ja jismani quiha. “Abraham Dios, Isaac Dios, Jacob Dios” i Dios qui Moisés yamabo ni quiha, naa nihi pëtoro mëshohai cato ó tsi ja qui Dios jisiquiniquë no. ³⁸ “Abraham yamába Dios, Isaac yamába Dios, Jacob yamába Dios” iyama Moisés yamabo ni quiha, bëso jaca nori quëshpi na. Bësoyamacaba Dios ma xo Dios; jama, bësocanaiba Dios ja nori. Bëso xo Dios jaya cabo tëquë —i saduceobo qui Jesu niquë.

³⁹ Jatsi,

—Jabija tsi xo mi quëbihana, maestró —i yoba tiisimacanaibo huësti huësti cabo niquë. ⁴⁰ Jaquirëquë ja nicacasyamacani quiha raquëquí na.

David Ibo Cristo

Mateo 22.41-46; Marcos 12.35-37

⁴¹ Jatsi Jesú toá ca yoba cahëxëni cabo nicaniquë:

—“Johai ca Xabahamati Ibo tsi xo David Baquë” ii quiha nohiria bo. ¿Jënahuariahax nëcati mëtsacahi ni? ⁴²⁻⁴³ Jabi nëca tsi libro Salmos ó tsi David yamába quënëniquë Cristo yoati na,

“ ‘Mía oquëhuanox pari tsi, jariapari mia pasomaha cabo bëboxëquia, jato mi yonano’ i noho Ibo qui Ibo Dios ni quiha”

nëa tsi David yamabo nëcani quiha. ⁴⁴ ¿Jënahuariahax David baquë Cristo ii ni ra? “Noho Ibo” ¿i David yamabo yamayamani, Cristo yoati chanihi na? —nëa tsi jato qui Jesu nëcacaniquë jato nicahi na.

Yoba cahëxëni cabo pasomaha Jesú yobanina

Mateo 23.1-36; Marcos 12.38-40; Lucas 11.37-54

⁴⁵ Nohiria tëquëtá nicano tsi quiha jahuë rabëti bo qui Jesu chaniniquë:

⁴⁶ —Yoba tiisimacanaibo qui quiniacaxëcahuë. Sahuëtiria tëtëcaxëni cabo sahuëcascani quiha. Toca tsi bohocascani quiha pë. Jasca, mercado xo tsi nohiria bá jato joihuahai ca ó pasocani quiha pë. Jasca, jato catiti xobó ca rëquë ca oquëria ca tsahoti bá tsi tsahocascani quiha. Jasca, nohiria oriquiti catino tsi oquë ca tsahoti bá tsi tsahocascani quiha pë. ⁴⁷ Jasca, bënë imanish ca yoxa bo paracani quiha, jato jahuë bo mëbixëna. Paraquí tsi jato xobo bo mëbicaní quiha pë. Mëbihax Dios qui chani tëtëca tsi bëhoxcani quiha ra, nohiria bo paraxëna. Quësohacaxëcani quiha ra. Oquëxëhi quiha jato copi ra —i jahuë rabëti bo qui Jesu niquë.

21

Dios qui bënë imanish ca yoxá anina
Marcos 12.41-44

¹ Arati xobó tsi niipama tsi parata biti caja qui nohiria rico cabá jato parata nanëhai ca Jesú tsaya-tsayaniquë. ² Tsayajahuano tsi quiha noitiria ca bënë imanish ca yoxá dos ca parata copiriama cabo nanëniquë. ³ Jisniquë Jesu. Jisi tsi,

—Nohiria huëtsa bá nanëhaca parata huino tsi xo naa noitiria ca yoxá acana ra. ⁴ Narisxoma tsi parata ja acana quiha. Jama naa yoxa ra. Noitiria xo. Jatiroha ca ja jaya ca ja aquë ra; naa jahuë oriquiti copiti parata —i Jesu niquë.

“Potas-hacaxëhi quiha jodioba arati xobo” i Jesu nina
Mateo 24.1-2; Marcos 13.1-2

⁵ Templo, naa jato arati xobo yoati tsi chanihi quiha huësti huësti ca rabëti bo iniquë. Jahuë maxax jiaria cabo, templó ca jianati jahuë bo, naa nohiria bá anina, tihí cabo yoati tsi chanihi ja icani quiha. ⁶ Jatsi Jesu jato qui chaniniquë:

—Tsëquëxëhi quiha xabaca ra, naa ma tsayahai ca potas-hacaxëquë no. Poxahacaxëhi quiha jahuë maxax bo tëquë. Yamaxëhi quiha matsami matsami niilai ca maxax bo iquia ra —iquina.

⁷ Jatsi,

—¿Jënino tsi potas-hacacaxëcahi ni? ¿Jënahuariaxo tsi cahëxëhi ni noa, ocapijaxëquë no, Maestró? —i Jesu qui jaca niquë.

⁸ Jatsi Jesú yoaniquë:

—Quiniacaxëcahuë, ma parahacayamano. Joxëhi quiha huëstima ca noho janë tsi chanicanaibo. “Cristo xo ëa” icaxëcani quiha pë. “Tsëquëpaimaria xo jaroha ca bari ra” icaxëcani quiha. Jato banahuayamacana ra. ⁹ Jasca pi país bo nianahaina, país ca xëréquë ca nohiria iquinahaina, tihí cabo nichahi tsi raquëyamatsicana. Toca tsi ja ixëti xo. Ocapijano tsi jari basi tsi xo toa jahuë rëso. ¹⁰ Jariapari tsi país huëtsa pasomaha nianaxëhi quiha país huëtsa. Chama huëtsa pasomaha iquinaxëhi quiha chama huëtsa. ¹¹ Yajoriaxëhi quiha mai. Oriquiti narisxëhi quiha nohiria bo. Iquicaxëcani quiha huëstima cabo. Jasca, raquëriaxëhi quiha nai qui tsaya-tsayahaina. Jahá tsi jisiquixëhi quiha mana ca jisti-jistiria bo ra. ¹² Jama, ja tocapinox pari no tsi mato qui pari tsamicaxëcani quiha ra. Mato tënëmacaxëcani quiha. Arati ibo bo qui mato mëacaxëcani quiha. Preso qui mato nanëcaxëcani quiha. Tihí ca tsi acaxëcani quiha noho janë tahëxo na. ¹³ Jatsi, toatiyá tsi xaba jayaxëqui mato jato qui Dios Chani yoaxëna. ¹⁴ Tocapijano tsi jato bësojo ax tsi ma chanixëti ca yoati tsi shinayamatsacana. ¹⁵ Toatiyá tsi chani-chaniti chama, tiisi, tihí cabo mato qui axëquia. Ja iqui tsi pasimahacaxëhi quiha toa mato qui caxacanaibo. ¹⁶ Jasca, chama bo qui mato mëaxëhi quiha mato nabo, mabë xatë bo, mato jimibo, mato rabëti bo. Jatsi, mato ó ca huësti huësti ca namëcaxëcani quiha ra. ¹⁷ Noho janë tahëhax tsi mato qui caxacaxëcani quiha jatiroha cabo. ¹⁸ Jama, mato ó bësoxëquia mato ja motsayamacano iquish na. ¹⁹ Chamatsicana. Xabahamahacaxëhi quiha mato naamapihi na —i jato qui Jesu niquë.

Soldado bá Jerusalén potasxëhaina

²⁰ —Soldado bo Jerusalén tēayohai ca jisi tsi quëyohacati basima ja nori ca cahëxëqui mato. ²¹ Jatsi maca bo qui jodioba maí cabo jabaxëti xo. Jisbayaxëti xo Jerusalén cabo. Xabachá cabo yaca qui bacayamaxëti xo ra. ²² Nohiria

bo copiti xaba tsi xo naa. Toatiyá tsi jatihuahacaxêhi quiha Quênêhacanish cabo iquiina. ²³ Noitixêhi quiha tohoya cabo, baquê pistia ico cabo rê. Anomariaxêhi quiha toa maí ca nohiria bá tênêhaina iquia. Anomariaxêhi quiha jato qui Dios caxahaina. ²⁴ Saipí tsi tēpas-hacaxêhi quiha huéstima cabo. Nêxahacaxêhi quiha huéstima cabo, país bo tēquê qui ja bohacacano. Jasca, Jerusalén tsi bohocaxêceni quiha carayanabo jato xaba jatiquê rohari.

Jesu johaina

Mateo 24.29-35, 42-44; Marcos 13.24-37

²⁵ Naipá tsi jisiquixêhi quiha jisti bo ra. Yoyoxêhi quiha bari, oxê, huishti bo. Shina-huêjênaxêhi quiha maí ca nohiria tēquêta. Jasca, raquêria ixêhi quiha ia bo ri. Jahuê pacotsa, jahuê yoyohai ca choca bo, tihi cabo qui raquêcaxêceni quiha. ²⁶ Toatiyá tsi rēsocaxêceni quiha nohiria raquêhi na. Jahuêcara ó pasoti cahēyamacaxêceni quiha, naipá ca jahuê bo yajohacaxêhai iqui na. ²⁷ Jatsi tsémó tsi Nohiria Baquê johai ca jiscaxêceni quiha. Noho chama, noho oquê, tihi cabo jiscaxêceni quiha ê joxêquêno. ²⁸ Naa jahuê bo tēquê ocapiti chitahêno tsi chamacana. Jaha bēsocahuê. Joti basima tsi xo ma xabahamahacahaina —i Jesu niquê.

²⁹ Jatsi naa chani Jesú yoaniquê jato cahēmaxêna:

—Higuera jihui, jihui huêtsa bo, tihi cabo qui tsayacahuê. ³⁰ Ja botoxpicano tsi basima oitiya nori ca cahêqui mato. ³¹ Jascaria, ê yoaha ca jahuê bo ocapiti chitahêno tsi basima Díos otohái nori ca cahêxêqui mato ri. ³² Mato parayamaquia. Naa bēsohai ca nohiria bo rēsonox pari no tsi ocapixêhi quiha ê yoahaina iquia. ³³ Huinocaxêhi quiha naipá ca jahuê bo, naa maí ri, jama, huinoca-pistiyamariaxêhi quiha noho Chani. Jabija tsi xo naa ê yoahaina.

No rohahuhacati xo

³⁴ Quiniacaxêcahuê. Pabêhaina, jênê acaina, maí ca jahuêmishni bo, tihi cabo tsi shina-shinayamacana. Tocapimano tsi mato ratiaxêhi quiha toa bari, jaha ma pasoyamahai iqui na. ³⁵ Jatiroha ca maí ca nohiria bo ratiaxêhi quiha ê johaina ra. ³⁶ Japi rohahuhacacahuê. Bêhoxrohadana, chama ma jayacano iquish na, naa jahuê bo tēquê paxaxêna, Nohiria Baquê bēsojó tsi niixêna —i jato qui Jesu niquê.

³⁷ Toa bari bo Jesú raaniquê arati xobó no, toa xo tsi nohiria bo tiisimahaina. Jama, Maca Olivo Yá tsi baquicha ja raaniquê. ³⁸ Jabi baquishmarí tsi nohiria bocani quiha arati xobo qui Jesu nicaxêna.

22

Jesu qui ja tsamicascanina

Mateo 26.1-5, 14-16; Marcos 14.1-2, 10-11; Juan 11.45-53

¹ Tsêquêti basima quiha jodioba pascua fiesta iniquê. Toatiyá tsi levadura yama ca mapari ja picani quiha. Jato jabi quiha. ² Jasca, Jesu ati quinia mērahi ini quiha arati iboba chama bo, jato yoba tiisimacanaibo ri. Nohiria bo qui raquêquí tsi quiha bēroxo tsi Jesu ja acasyamacani quiha.

³ Jatsi Judas qui Satanás jiconiquê, naa Iscariote icanai cato. Jesu doce ca rabêti bo huêsti ca ja ini quiha. ⁴ Jatsi arati ibo bo, arati xobo obêso cabo, tihi cabo qui Judas caniquê chanixêna. Jato qui Jesu ja mēacasní quiha. Cahax, jato bēta ja chaniniquê. ⁵ Jatsi ja ranicaniquê ja yoani ca nichax na. Ranihax,

—Parata mi qui axêqui noa ra —i Judas qui jaca niquê.

⁶ Jatsi,

—Jënima —i Judas niquë.

Japi Jesu qui tsamiti xaba mëratsi-jahuaniquë, nohiria bá cahëyamano iquish na.

Pascua fiesta

Mateo 26.17-29; Marcos 14.12-25; Juan 13.21-30; 1 Corintios 11.23-26

⁷ Jatsi jato levadura yama ca mapari piti fiesta tsëquëniquë, naa oveja baquë acacaquë no. ⁸ Japi Pedro, Juan, tihi cabo Jesú raaniquë. Raahax, —Bocata. Pascua oriquiti ma rohahuano piti —i jato qui ja niquë.

⁹ Jatsi,

—¿Jahuëniaxo tsi rohahuaxëhi ni noa? —i jaca niquë.

¹⁰ Jatsi,

—Yaca qui jicocana. Toa xo tsi chomó ca jënë bëhai ca joni bëchaxëqui mato. Toa joni banahuacana, ja jicohai ca xobo qui. ¹¹ Jatsi toa xobo ibo qui chanicana. “¿Jahuënia ni naquëtë?” ii quiha Maestro” i ja qui cana. “Nëa xo tsi jahuë rabëti bo yaxo tsi pascua oriquiti picatsi quiha” icana. ¹² Jatsi mana ca naquëtë chahitaxëni ca mato jismaxëhi quiha; tsahoti bo, mesa, tihi cabo rohahuahaca ca naquëtë quiha. Toa xo tsi oriquiti rohahuacana —i jato qui Jesu niquë.

¹³ Jatsi Pedro, Juan, tihi cabo bocaniquë. Ja bocanaca tsi naquëtë qui ja cahëcaniquë Jesú yoani jascaria. Cahëxo tsi quiha pascua oriquiti ja rohahuacaniquë.

¹⁴ Jatsi tëxë bo ya tsi Jesu joniquë. Tsahohax oriquitsijacanicuë.

¹⁵ Oriquipama tsi Jesu jato qui chaniniquë:

—Naa pascua oriquiti mato bëta oriqui-casquia rësonox pari. ¹⁶ Jabi nëa xo tsi naa pascua oriquiti pitëquëpistiayamariaxëquia Diós otohahi cato xo tsi ja jatihuahacaxëquë rohari. Jaquirëquë pitëquëxëquia ra —iquiina.

¹⁷ Jatsi copá ca jënë ja bihaca tsi “Gracias” i Dios qui ja niquë.

—Bicahuë. Ayocana. ¹⁸ Nëa xo tsi uva bimi jënë atëquëyamaxëquia Diós otohahi joxëquë rohari —i Jesu niquë.

¹⁹ Jatsi mapari Jesú biniquë. Bichi tsi quiha “Gracias” i ja niquë. Bëquëx-xo tsi jato qui ja aniquë ja picano.

—Noho yora tsi xo naa. Picahuë, ëa shinaquí na —i quiha ja niquë.

²⁰ Oriquixo tsi quiha copá ca jënë jato qui ja aniquë ja acano. Acax,

—Noho jimí tsi Dios xabahamati quinia paxa ca jismahi quiha naa jënë. Mato bax japahacaxëhi quiha noho jimí ra. ²¹ Tsayacahuë. No bëta tsaho tsi xo toa ëa pasomaha cato rë, naa chama bo qui ëa mëacatsai cato. ²² Jabi rësoxëti xo Nohiria Baquë ë nori cato. Diós yoani ca tsi xo naa ra. Jama, noitirixëhi quiha toa ëa chama bo qui mëaxëhai cato iquia —nëa tsi Jesu nëcaniquë.

²³ Jatsi chaninatsi jahuë rabëti bo niquë:

—¿Tsohuë cara ni toa no nohó ca Jesu pasomaha cato sa? —iquiina.

¿Tsohuë ni toa oquë cato?

²⁴ Jatsi joi i-ibëqui tsi quiha Jesu rabëti bo niquë, naa jato xërëquë ó ca oquë ca ixëti nori ca yoati na. ²⁵ Jatsi jato qui Jesu chaniniquë:

—Jato nohiria bo yonahi quiha maí ca chama bo. Yonahi tsi “Nohiria Rabëti bo xo noa” icani quiha pë, jato rabëti bo jaca nomari. ²⁶ Jabi toca ma xo noa ra. Yonati jascaria manëxëti xo mato xërëquë ó ca oquë cato. Tëxë bo ja mëbixëti xo. ²⁷ Mato nicaquia. ¿Tsohuë ni toa oquë cato? ¿Tsaho ca pihai ca ni? ¿Taahai ca ni? Tsayacahuë. Jato yonati bá tsi taahacahai ca ó pasocani

quilha tsahohai ca chama bo. Jama, nëá xo ëa, mato xërëquë ó no. Ea ti tsi xo toa mato taahaina ra.

²⁸ Mato tsi xo toa ë qui chitimihax cabo, naa ë tënëtiyá no. ²⁹ Jaboqui yonati chama-chamaria mato qui aquia, noho jahëpa ë qui ani jascaria. ³⁰ Noho mesa ax oriquiti tsahoxëqui mato ë yonahai cató no. Jasca, trono bo xo tsi Israël ca doce ca xatë bo ó bësoxëqui mato ra —nëa tsi quilha jahuë rabëti bo qui Jesu nëcaniquë.

*“Jochamati tanamahacaxëqui mia” i Pedro qui Jesu nina
Mateo 26.31-35; Marcos 14.27-31; Juan 13.36-38*

³¹ —Ea nicahuë, Simón —i Jesu niquë—. Jochati mato tëquë tanamacatsi quilha Satanás ra. ³² Jama, mi bax ë bëhoxquë, Simón, mi chahahuahai ca quima mi casoyamano. Jasca, jahari ë quiri bësoxo tsi mibë xatë bo mi chamahuano —i ja qui Jesu niquë.

³³ Jatsi Pedró quëbiniquë:

—Mia jisbëriapistiyamaxëquia ra. Preso qui pi mia ja nanëcano ri tsi mi bëta cahai ca ëa xo naa ra. Mi bëta rësoti qui raquëyamaquia ra —iquiina.

³⁴ Jatsi,

—Mia parayamaquia, Pedró. Ea pasomaha chaniti basima xo mia rë. Jaboqui patiari quëonox pari no tsi trës tsi “Jesu cahëyamaquia” ixëqui mia ra —i ja qui Jesu niquë.

³⁵ Jatsi jahuë rabëti bo qui Jesu nëcaniquë:

—Mato ë raaquë tsi ¿jahuë ma narisni? Mëquëya ma raahacani quilha. Parata, sota, zapato bo, tihí cabo yahaxma tsi ma bocani quilha —iquiina.

Jatsi,

—No narisyamahitaquë ra —i jahuë rabëti bo niquë.

³⁶ Jatsi Jesú quëbiniquë:

—Jaboqui pi parata jayaquí tsi bocahuë. Sota pi jayaquí tsi bocahuë. Saipi pi jayamaquí tsi mato sahuëti iniacahuë copixëna. ³⁷ Mato parayamaquia. Jatihuahacaxëti xo Quënëhacanish cabo, naa “Caxaxëniria ca jascaria ja tocahacaxëti quilha” iquiina. Parayamaquia. Jatihuahacaxëhi quilha jatiroha ca ëa yoati Quënëhacanish cabo ra —nëa tsi Jesu nëcaniquë.

³⁸ Jatsi jahuë rabëti bo nëcaniquë:

—Tsayapa, Ibobá. Nëá xo dos ca saipi bo ra —iquiina.

Jatsi,

—Iquë pë —i Jesu niquë.

Getsemaní Jesu bëhoxnina

Mateo 26.36-46; Marcos 14.32-42

³⁹ Xobo jisbaya tsi quilha Maca Olivo Ya qui Jesu caniquë bëhoxhi na. Jahuë jabi quilha. Jasca, ja bëta bocani quilha jahuë rabëti bo ri. ⁴⁰ Cahax, —Bëhoxcana, jochati ma tanamahacayamano ra —i jato qui Jesu niquë.

⁴¹ Jatsi ori pistia jamëpistia tsi Jesu caniquë bëhoxhi na. Basima quilha. Mënihax Dios qui chanitsijaniquë:

⁴² —Mí qui pi jia no tsi naa johai ca tënëtiya mëbihuë, noho Jahëpá. Tënëcasyamaxo ëa ra. Jama, jaha ë quëëhai ca mi ayamano. Mi shina mi ano ra —i Jesu niquë bëhoxhi na.

⁴³ Jatsi ja qui naipá ca ángel jisiquiniquë chamahuaxëna. ⁴⁴ Shina jii-jiitsi Jesu niquë bëhoxhi na. Jatsi ja bëhox-bëhoxrianiquë. Niscatsijani quilha. Jimi tioihai jascaria ja niscani quilha. ⁴⁵ Bëhoxhax ja joiniquë. Joihax jahuë rabëti bo qui ja bacaniquë. Oxa ja icani quilha cohuëhi na. ⁴⁶ Jatsi,

—¿Jënihax oxacanaï rë? Joicana. Bëhoxcana, jocha qui ma paquëyamano —i jato qui Jesu niquë.

Jesu qui soldado bo tsaminina

Mateo 26.47-56; Marcos 14.43-50; Juan 18.2-11

⁴⁷ Jahuë rabëti bo ya jari chanihi Jesu iniquë. Chanijano tsi quiha nohiria misco bëcaniquë. Jato bëta Judas, naa doce ó ca huësti ca iniquë jaa ri. Jato mëpihi ja ini quiha Jesu qui. Cahëhax Jesu qui ja basimaniquë tatsoxëna.

⁴⁸ Jatsi ja qui Jesu chaniniquë:

—¿Ea tatsohai pa? ¿Toca tsi soldado bo qui ëa mëaxëhai rë, naa Nohiria Baquë ë nori cató? —i Judas qui ja niquë.

⁴⁹ Ocapijahai ca jisi tsi,

—¿Noba saipí tsi jato tëpasxëhi ni noa, Ibobá? —i ja bëtanish ca rabëti bo niquë.

⁵⁰ Jatsi jato ó ca huësti cató toá ca arati ibo-iboria yonati paxtianiquë. Jahuë mëncayá ca pahoqui paxtiahacani quiha.

⁵¹ Jatsi,

—Iquë ra. Iquë ra. Iquinayamacana —i Jesu niquë.

Jatsi yonati pahoqui motsaxo tsi ja jënimahuahax. ⁵² Jënimahuahax arati ibo bo, arati xobo obëso ca capitán bo, yosibo, tihí ca bëcanish cabo qui Jesu chaniniquë:

—¿Saipí bo, tëpasti jihui bo, tihí cabo jaya ni mato pa? ¿Yomaxëni ca bichii jascaria ëa bichi na bëcana pa? ⁵³ Jatiroha ca barí tsi mato bëta ë i-ipaoyamëquë, arati xobó no. ¿Jëniñaxo tsi ëa ma biyamahita, toá tsi ë iquë no? Jishopë. Jaboqui mato xaba tsi xo naa rë. Jaboqui bëroria tsi yonahi quiha Satanás pë —i jato qui ja niquë.

⁵⁴ Jatsi Jesu qui ja tsamicaniquë. Tsamixo tsi ori ja bocaniquë arati ibo ba chama xobo qui.

“Jesu cahëyamaquia” i Pedro nina

Mateo 26.57-58, 69-75; Marcos 14.53-54, 66-72; Juan 18.12-18, 25-27

Jesu basi tsi Pedró banahuaniquë raquëquí na. ⁵⁵ Arati ibo ba chama xobo qui cahëxo tsi quiha soldado bá chihí maponiquë huënëñë xo na. Tsamahax ja tsahocaniquë yohoxëna. Jasca, jato xëréquë tsi Pedro tsahoniquë jaa ri.

⁵⁶ Chihí tapái tsahojano tsi quiha xotacó Pedro jisniquë, naa toá ca yonati cató. Pedro ja tsaya-tsayani quiha.

—Jesu ya naa joni iquë ra —i xotaco niquë.

⁵⁷ Jatsi Pedró quëbiniquë:

—Jesu cahëyamahai ca ëa xo naa ra, caí —iquiina.

⁵⁸ Jaquirëquë joní tsayaniquë. Tsayahax,

—Tonia Jesu rabëti huësti ca xo mia ra —i Pedro qui ja niquë.

Jatsi,

—Jahuë rabëti ma xo ëa ra, joní —i Pedro niquë rë.

⁵⁹ Jaquirëquë huësti ca hora huinocaquë tsi,

—Tonia Jesu ya naa joni iquë ra. Nicacapa. Galileá joi jaya xo ra —iriatsi joni huëtsa niquë.

⁶⁰ Jatsi Pedró quëbiniquë:

—E joma mi chanihaina ra, joní —iquiina.

Jari Pedro chanino tsi quiha patiarí quëo-quëoniquë. ⁶¹ Jatsi Pedro quiri bësohax Jesú bëisniquë cohuëquí na. Jatsi Ibobá yoaha ca Pedró shinaniquë, naa “ Tres tsi cahëyamaquia’ ixëqui mia rë, patiarí quëonox pari no” i Jesu quë no. ⁶² Jatsi cacha Pedro caniquë. Cahax ja ara-araniquë rabihí na.

*Jesu qui jodioba yosibo quësonina**Mateo 26.59-68; Marcos 14.55-64; Juan 18.19-24*

⁶³ Jatsi Jesu mahuatsi jaha bëso cabá huaniquë. Ja sëtianiquë.

⁶⁴ Bëmaphax,

—¿Tsohuë mia aca? Noqui yoahuë ra —itsi quiha jaca niquë nicahi na.

⁶⁵ Huëstima tsi Jesu ja ocahuacani quiha pë. ⁶⁶ Huëaquë tsi baquishmarí tsi quiha nohiria yosibo, arati ibo ba chama bo, yoba tiisimacanaibo, tihi cabo catiniquë chaninaxëna. Jato bësojó tsi Jesu mëpíhacani quiha toá tsi ja niino. Jatsi,

⁶⁷ —¿Díós noqui raani ca Xabahamati Ibo ni mia ra? Noqui yoahuë ra —i Jesu qui chama bo niquë.

Jatsi Jesú quëbiniquë:

—“Jaahuë” i pi ë no tsi ëa chahahuayamaxëqui mato rë. ⁶⁸ Jasca pi mato ë nicano tsi quëbiyamaxëqui mato tia. ⁶⁹ Jama, basima tsi xo toa Dios chama ë bixëhaina ra, naa Nohiria Baquë ë nori cato. Chamaxëni ca Dios mënëcayá tsi tsahoxëquia ra —i jato qui Jesu niquë.

⁷⁰ Jatsi,

—¿Japa? ¿Dios Baquë ni mia ra? i jaca niquë jato tëquëta.

Jatsi,

—Jaahuë. Ja xo ëa ra —i Jesu niquë quëbihi na.

⁷¹ Jatsi ja nëcacaniquë:

—Jahuë chani yoi ca no nicaquë ra. Jamë quësohi quiha ra. Ja pasomaha ca chanihai ca huëtza no nicatima xo ra —i toá ca chama bo niquë.

23*Pilato qui Jesu ja bocanina**Mateo 27.1-2, 11-14; Marcos 15.1-5; Juan 18.28-38*

¹ Jatsi jodioba chama bo tëquë joiniquë. Joixo tsi quiha Pilato qui Jesu ja bocaniquë. ² Boxo tsi quiha Jesu qui quësotsijacanicuë pë:

—Janyama noba nohiria mëpihi quiha naa joni ra. Gobierno pasomaha xo ra. “Romanoba chama-chamaria qui impuestos parata ayamacahuë” i nohiria bo qui quiha. Jasca, “Nohiria Xabahamati Ibo, naa nohiria ba chama xo ëa” ii quiha pë —nëa tsi quiha Pilato qui jodioba chama bo nëcaniquë.

³ Jatsi Pilató Jesu nicanicuë:

—¿Jodioba chama-chamaria ni mia? —iquiina.

Jatsi,

—Jaahuë —i Jesu niquë.

⁴ Jatsi arati iboba chama bo, nohiria misco, tihi cabo qui Pilato chaniniquë:

—Yama tsi xo naa joni yoi ca anina iquia —iquiina.

⁵ Jama, jari Jesu ja ocahuacanicuë pë:

—Jodioba mai tëquë xo tsi tiisimapama tsi romanobo pasomaha nohiria bo caxahuahi quiha ra. Galilea mai pari tsi ja chitahëhuaniquë tiisimaxëna. Jaquirëquë jodiobá mai qui ja cani quiha. Jarohapa tsi nëa tsi ja johitaquë pë —i jaca niquë.

Herodes bësojó Jesu niinina

⁶ Jato nicahax,

—¿Galilea mai quima ax naa joni joni? —i Pilato niquë.

⁷ —Jaahuë —i nohiria bo quë tsi chama Herodes qui Pilató Jesu raanicuë, Galileá ca nohiria bo Herodés yonani quëshpi na. Jabi naatiyá tsi Jerusalén tsi Herodes ini quiha jaa ri. ⁸ Jatsi Herodes raniniquë Jesu jiscatsi na. Jistiria

Jesú acai ca ja jiscasni quiha. ⁹Japi Jesu ja nica-nicarianiquë. Mahitsa quiha. Quëbiyamaniquë Jesu. ¹⁰Jabi Herodes ya tsi quiha arati iboba chama bo, yoba tiisimacanaibo, tihi cabo mani iniquë jato ri. Jesu qui ja quëso-quësocaniquë pë. Anomaria ini quiha ja qui ja quësocanaina. ¹¹Jatsi jahuë soldado bo yaxo tsi Jesu mahuatsi Herodés huaniquë. Mahuaxo tsi quiha sahuëti copixëni ca Jesu ja sahuëmacaniquë, chama-chamaria jisiria ca manëmaxëna. ¹²Jabi naama tsi Herodes, Pilato, tihi cabo caxanapaoni quiha. Jaquirëquë tsi quiha ja rabënacani quiha.

Jesu ja namëcascanina

Mateo 27.15-26; Marcos 15.6-15; Juan 18.39; 19.16

¹³Jatsi arati iboba chama bo, rëquëninicanaibo, nohiria bo, tihi cabo Pilató quënaniquë catiti.

¹⁴—E qui naa joni ma bëquë ra, “Romanoba gobierno pasomaha nohiria bo mëpilai ca tsi xo naa” iquiina. Jama, ë nicaquë mato bësojo xo na. Mahitsa ja qui quësoqui mato pë. Yama tsi xo toa janyama ca ja acana iquia. ¹⁵Jascaria, ja qui quësoyamahi quiha Herodes ri, jahari noqui ja raaha quëshpi na. Ja namëhacatima xo ra. Yama tsi xo toa janyama ca ja anina ra, namëhacati.

¹⁶Japi rashaxëquia. Rashaxo tsi paquëmaquia —i jato qui Pilato niquë.

¹⁷Jabi Pascua fiestá tsi huësti ca achiqui ca ja paquëmapaoni quiha.

¹⁸Jatsi quënatsi nohiria tëquëtá huaniquë:

—Jesu ahuë ra. Barrabás paquëmahuë —iquiina.

¹⁹Jabi preso qui Barrabás nanëhacani quiha, yacata xo tsi gobierno pasomaha nohiria bo ja mëpini iqui na. Iquinaxo nohiria bo ja ani quiha. ²⁰Jama, Pilató Jesu paquëmacasni quiha. Mahitsá nohiria bo qui ja chani-chaniniquë rë.

²¹—Cruzó tooxahuë. Cruzó tooxahuë —iriatsi nohiria bo niquë.

²²Jatsi nohiria bo qui Pilato chanitëquëniquë:

—¿Jëni ni ra? ¿Jahuë janyama ca ja ani? Ja namëhacayamati xo ra iquia. Yama tsi xo toa janyama ca ja anina ra. Japi ë rashano. Rashaxo tsi paquëmaxëquia —i jato qui ja niquë.

²³Jama, bamayamaniquë nohiria bo pë. Joi pistiamá tsi quiha,

—Cruzó tsi tooxahuë. Cruzó tsi tooxahuë —i jaca niquë.

Jarohapa tsi jato joi pacotsa iqui tsi jato qui Jesu ja mëaniquë ja acano. Jatsi,

²⁴—Ja namëhacati xo —i Pilato niquë, jaha ja quëëceni jascaria.

²⁵Jatsi jato qui gobierno pasomaha inish ca Barrabás, naa nohiria ati ibo preso quima ja paquëmaniquë. Jama, Jesu jato qui ja mëaniquë ja namëhacano.

Cruzó tsi Jesu tooxahacanina

Mateo 27.32-44; Marcos 15.21-32; Juan 19.17-27

²⁶Ori cruz Jesu mëpipama tsi quiha joni, naa Simón Cirene icanai ca qui ja tsamicaniquë Jesu cruz iati. Jerusalén qui jicohi ja ini quiha, ja tsamicaquë no. Jabi jahá cruz ja janacani quiha Jesu cho iati. ²⁷Jabi huëstima ca nohiria bá Jesu banahuaniquë. Jato xërëquë tsi araconacanai ca yoxa bo iniquë jato ri noihi na. ²⁸Jatsi jato quiri Jesu bësohaca tsi ja chaniniquë:

—Ea iqui tsi arayamacahuë, Jerusalén ca jahi bá. Tënëxëqui mato ri. Jasca mato xocobo ri. Ja tahëhax aratsicahuë. ²⁹Joxëh quiha tënëti xabaca rë. Toatiyá tsi “Shomaria tsi xo baquë yama ca yoxa bo ra” icaxëceni quiha nohiria. ³⁰Toatiyá tsi maca bo qui quëanaxëhi quiha nohiria, “Noqui maxëni paquëcahuë. Noqui mapacahuë” iquiina. ³¹Jabi nëca pi ëa, naa mëstëxëni ca

ja tēnēmacano tsi çjēnahuariaxēhi ni Dios chahahuayamacanaibo qui? —nēa tsi Jesu nēcāniquē.

³² Jasca dos ca caxaxēniria ca joni bo ri ja bēcāniquē Jesu ya namēxēna.

³³ Mapo Xao Ya icanai ca qui cahēxo tsi quiha cruzó tsi Jesu ja tooxacāniquē. Jasca, ja bēta dos ca caxacanaibo tooxahacani quiha jato ri. Huēsti ca jahuē mēncayá no; huēsti ca jahuē mēxojó no. ³⁴ Jatsi Jesu chaniniquē:

—Jato jocha shina-bēnohuē, noho Jahēpá. Ja acanai ca cahēyamacani quiha rē —i Jesu niquē.

Jatsi jahuē sahuēti bo soldado bá biniquē. Bixo tsi quiha jato xērēquē xo tsi jahuē sahuēti bo ja oquēxhuacāniquē i-ihai cató no. ³⁵ Jasca toá tsi nohiria bo niiniquē tsayahi na. Toá tsi ini quiha jodioba chama bo jato ri, mahuahi na. ³⁶ Ja qui mahuni quiha soldado bo ri. Ja qui ja bēcānaca tsi mocaria ca jēnēria ja qui ja acāniquē ati. Jatsi,

³⁷ —Jodioba chama-chamaria pi iqui tsi mimē xabahamahuē —i jaca niquē.

³⁸ Jatsi jahuē mapo maxcacha naa chani janahacāniquē: “Jodioba chama-chamaria xo naa” iquiina.

Jesu quiri yomaxēni ca bēsonina

³⁹ Jatsi Jesu tapai ca tooxahacānish ca huēstitá ocāhuaniquē jaa ri. Mahuahax,

—çXabahamati Ibo ni mia? Mimē xabahamahuē. Jaquirēquē noqui xabahamahuē ra —i Jesu qui ja niquē.

⁴⁰ Jama, tooxahacānish ca joni huētsá raahāniquē:

—çDios qui raquēyamahai? Nēa rēsohi quiha mia ra, naa joni jascaria. ⁴¹ No copihacaquē, no ani ca yoi ca quēshpi na. Jama xo naa joni ra. Yama tsi xo toa janyama ca ja anina ra —i ja qui ja niquē.

⁴² Jatsi Jesu qui ja chaniniquē:

—Ea shina-bēnoyamahuē, Jesú, naa mi othai ca qui mi jicoquē no —iquiina.

⁴³ Jatsi ja qui Jesu chaniniquē:

—Mia parayamaquia. Jaboqui ē bēta-xēhi quiha mia ra tērohama caba ití no —iquiina.

Jesu nanina

Mateo 27.45-56; Marcos 15.33-41; Juan 19.28-30

⁴⁴ Jabi matoroco bari tsi ja iniquē, mai tēquē tsēmōnaquē no. Tres hora no tsi ja baquishni quiha. ⁴⁵ Jisiquiyamaniquē bari ra. Jasca, arati xobó ca rotamē ca quēbēti raiti jaxchacāniquē. ⁴⁶ Jatsi Jesú quēnāniquē:

—Mi qui noho shina aquia, noho Jahēpá —iquiina.

Chanihax ja nāniquē. ⁴⁷ Ocapijani ca jisi tsi quiha toá ca niilai ca capitán Díos oquēhuaniquē,

—Mēstēxēni ca joni ja iquē tia —iquiina.

⁴⁸ Jesu namēhai ca jisi tsi jahari jato xobo qui quētsonish ca nohiria bocāniquē. Cohuē ja icani quiha. ⁴⁹ Jasca, basi tsi quiha Jesu rabēti bo tēquē mani niquē. Toá tsi ini quiha Galilea ax ja bēta bēcānish ca yoxa bo ri. Basi xo tsi naa jahuē bo tēquē ja tsayacani quiha raquēhi na.

Jesu maihuahacānina

Mateo 27.57-61; Marcos 15.42-47; Juan 19.38-42

⁵⁰ Tobi joni shinajiaxēni ca iniquē, naa José icanai cato. Jodioba yobahai ca yosibo xatē ja ini quiha. ⁵¹ Jabi Jesu toa jodioba chama bá acasquē tsi

quilha jato ati yoba pasomaha ja chanini quiha. Jasca, yaca Arimateá tsi ja raca-racani quiha jodioba maí no. Jabi Diós nohiria bo otohái ca ó pasohi ja ini quiha jaa ri. ⁵² Jabi Pilato qui José caniquë. Caxo tsi quiha Jesu yora ja bēnaniquë maihuati. ⁵³ Jatsi Jesu yora ja botēmaniquë. Botēmaxo tsi quiha ja yaboniquë raiti miro cató no. Yaboxo tsi quiha maxax ó ca quini ó tsi, naa huëyohaca ca quini ó tsi ja jananiquë. Maihuati quini paxa ja ini quiha. Jari jaxara janahacayamani quiha yora. ⁵⁴ Jabi pascua fiesta rohahuati bari ja iniquë, Jesu ja maihuacaquë no. Jodioba joiti bari chitahēpaimaria ini quiha.

⁵⁵ Jabi José ya bocani quiha yoxa bo ri, naa Jesu ya Galilea ax bēcanish cabo. Jahuë mai ja jiscani quiha. ⁵⁶ Jaquirëquë jato xobo qui ja bacacaniquë perojome, yora chēxati, tihí cabo rohahuaxēna. Jama, jahari jahuë yora rohahuahi canoma ja icani quiha, jato joiti bari chitahēni nori iqui na. Japi toa barí tsi quiha ja joicaniquë jato jodioba yoba tahēhax na.

24

Jesu bēsotēquēnina

Mateo 28.1-10; Marcos 16.1-8; Juan 20.1-10

¹ Domingó tsi Jesu maiquini qui yoxa bo bacaniquë. Baquishmari ja ini quiha. Perojome bo ja jayacaniquë, naa ja rohahuahacanih ca perojome yora chēxati. ² Jahuë maiquini qui cahēxo tsi quiha jahuë maiquini quēbēti maxax चाहिताxēni ca ja yopacaniquë. Bahama ja tarahacani quiha ra. ³ Maiquini qui jicoxo tsi quiha lboba yora ja yopacaniquë. ⁴ Yama a. Jatsi, —¿Jahuēnia cara ca jahuë yora sa? —i jaca ni quiha yopahax na.

Shinajahuacano tsi quiha jato tapai niitapiniquë dos ca ángel bo. Joni jisiria ca ja icani quiha. Bajra-bajrani quiha jato raiti, canapa jascaria. ⁵ Jatsi raquēniquë yoxa bo tsayahax na. Raquēhax jato bēsojō ja rēnicaniquë.

Jatsi jato qui ángel bo chaniniquë:

—¿Jēniria xo tsi maiquini xo tsi bēsohai ca mēracanai pa? ⁶ Yama xo ra. Ja tēronojaquë ra. ¿Jahuë mato ja yoani, Galileá tsi mato bētaquí na? ⁷ “Jochacanaibo qui mēahacaxēti xo Nohiria Baquë, cruzó tsi ja tooxahacano” ¿i ja yamayamani? “Tres bari quirëquë bēsotēquëxēquia” ¿i ja yamayamani? —nēa tsi yoxa bo qui ángel bo nēcaniquë.

⁸ Jatsi Jesú yoani ca yoxa bá shininiquë. ⁹ Shinaxo tsi quiha jahuë maiquini ja jisbayacaniquë. Jahari jato xobo qui ja bocani quiha. Xobo qui cahēxo tsi ángel jato yoani ca tēquë ja yoacaniquë Jesu once ca rabēti bo qui. Tēxē bo tēquë yoahacani quiha jato ri. ¹⁰ Jabi Dios Chani chitahēhuati ibo bo yoanish ca yoxa bo tsi xo naa: María Magdalena, Juana, Jacobo jahēhua María, jato bēta ca yoxa huētsa bo, tihí cabo ini quiha, naa jahuë maiquini qui bocanish cabo. ¹¹ Jama, yoxa bo nicaxo tsi quiha Jesu rabēti bá chahahuayamaniquë, ja paracanaí ca quēscahuaquí na.

¹² Jama, Pedro joiniquë jisi caxēna. Jahuë maiquini qui ja jabaniquë. Maiquini qui cahēhax ja tētoniquë jaxara tsayahaxēna. Yabohaca ca raiti roha ja jisniquë. Yora yama. Jatsi xobo qui jahari ja caniquë jēnipijani ca qui ratēhi na.

Emaús yaca quinia ca bahi

¹³ Toa barí tsi Emaús icanaí ca yaca qui dos ca joni, naa Jesu banahuacanaibo cahi iniquë. Basiriama, naa once kilómetros Jerusalén quima toa yaca ini quiha. ¹⁴ Jerusalén ocapijahitaha ca tēquë yoati chanihi ja icani quiha. ¹⁵ Jabi ja chanicano tsi jato qui Jesu riiniquë. Riiahax jato bēta

cotsijaniquë. ¹⁶ Jesu tsayaquí tsi jahuë bëmána ja cahëyamacani quiha. ¹⁷ Jatsi jato qui Jesu chaniniquë:

—¿Jahuë chanibonacanai? —iquiina.

Jatsi ja niicaniquë. Cohuë jato bëmána ini quiha. ¹⁸ Jatsi jato ó ca huësti cató quëbiniquë, naa Cleofás icanai cato.

—¿Naa bari no tsi Jerusalén ca jënipijahitaha ca jahuë bo mi nicayamahitaha pa, toá tsi shishoquí na? Tonia mia roha tsi xo toa nicayamahaina ra —i Jesu qui ja niquë.

¹⁹ Jatsi,

—¿Jahuë jahuë bo ni? —i Jesu niquë.

Jatsi ja quëbicaniquë:

—Nazarét ca Jesu yoati jahuë bo ra. ¿Toa jahuë bo mi nicayamahitaha pa? Dios Chani yoati ibo-iboria naa joni iquë ra. Anomaria ca jisti bo ja ani quiha. Jasca, Dios, nohiria tëquë, tihi cabo qui jiaría ja yoahai ca chani ini quiha. ²⁰ Jama, noba arati ibo bo, noba chama bo, tihi cabá mëaniquë romanobo qui, ja namëhacano iquish na. Japi cruzó tsi ja tooxahacahitaquë rë. ²¹ “Tonia noqui Israel cabo xabahamahi ca tsi xo naa ra” i no paoniquë. Noqui Israel cabo mëbìhi jonish ca ja iqui ca quëscahuanohuahitaquë ra. Jatsi ja nahitaquë rë. Jasca, huinocaquë tres bari. ²² Jama, jaboqui noqui xatë ca yoxa bá noqui ratiaquë. Naa baquishmarí tsi quiha jahari jahuë maiquini qui yoxa bo huësti huësti cabo bocaquë. ²³ Jahuë yora ja yopacana quiha. Yama a. Yopahax jahari ja bëcaquë noqui yoaxëna. “Angel bo no jisquë ra. ‘Bëso xo ra’ icani quiha” i noqui toa yoxa bo quë pa. ²⁴ Japi jahuë maiquini qui huësti huësti ca joni bo bocaniquë jato ri, jiscatsi na. Yama a ra; naa yoxa bá yoaha jascaria —nëa tsi Jesu qui ja nëcacaniquë.

²⁵ Jatsi jato qui Jesu chaniniquë:

—Cahëtimaxëni ca joni xo mato rë. Dios Chani yoanish cabá yoani ca tëquë chahahua-pëniría ca mato xo naa. ²⁶ ¿Naa jahuë bo tëquë tënëti nori Xabahamati Ibo iyamayamani? Toca tsi jahuë oquë ja biquë ra —iquiina.

²⁷ Jatsi jamë yoati tsi Quënëhacani cabá yoani tëquë bërohuatsi Jesú huaniquë. Jariapari tsi jamë yoati Moisés yamabá quënëni ca jahuë bo ja bërohuaniquë. Jaquirëquë jamë yoati Dios Chani yoanish cabá quënëni ca jahuë bo ja bërohuaniquë. ²⁸ Jatsi yaca qui ja cahëcaniquë. Ori Jesu cahai ca quëscahuahi tsi,

²⁹ —No bëta mi chitëno ra. Caquë bari —i Jesu qui jaca niquë.

Jatsi jato xobo qui Jesu jiconiquë jato bëta chitëxëna. ³⁰ Jatsi jato bëta Jesu oriquiniquë. Oriquiquí tsi quiha mapari ja biniquë. Ja quëshpi tsi “Gracias” ixo tsi ja bëquëxniquë. Bëquëx-xo tsi quiha jato qui ja mëaniquë piti. ³¹ Tocaquë tsi quiha Jesu ja iqui ca ja cahëtapicaniquë. Jatsi Jesu yamatapiniquë. ³² Jatsi chaninatsijacanicuë:

—Anomaria iquí quiha jahuë chani ra, naa bahi xo tsi noqui ja yoahana. Dios Chani noqui ja bërohuano tsi ¿noba shina huahanayamaha pa? —iquiina.

³³ Jatsi ja joitapicaniquë. Jerusalén qui bacatsijacanicuë. Jesu once ca rabëtiría bo, Jesu banahuacanaibo huëtsa bo, tihi cabo jìsi ja bocani quiha jato yoaxëna. Cahëhax tsi quiha,

³⁴ —Jabija. Bëso xo ra. Simón qui ja jisiquiquë ra —i jato qui jaca niquë.

³⁵ Jatsi bahi ó ca jënipijaha ca ja yoacanicuë jato ri, naa dos ca joni bo. Yoahax,

—Mapari ja bëquëxquë tsi Jesu ja iqui ca no cahëtapiquë ra —i jato qui jaca niquë.

*Jahuë rabëtiria cabo qui Jesu jisiquinina naquëtë no
Mateo 28.16-20; Marcos 16.14-18; Juan 20.19-23*

³⁶ Ocapijani ca jahuë bo yoati ja chanicano tsi jato xërëquë tsi Jesu niitap-
iniquë. Nihax,

—Raquëyamacana —i jato qui ja niquë.

³⁷ Bërocamaqui ja iqui ca ja quëscahuajahuacani quiha raquëquí na.
Mëmëtsijacanicuë ra. ³⁸ Jatsi jato qui Jesu chaniniquë:

—¿Jënihax tsi ratëcanai pa? ¿Jënixo tsi ëa yoi ja nori ca shinayamacanai?

³⁹ Noho mëquënë, noho tahë, tihi cabo tsayacahuë. Ea yoi xo naa ra. Ea
motsacahuë. Nami, xao, tihi cabo jayama xo bërocamaqui ra. Nami ë jaya ca
jisqui mato ra. ⁴⁰ Toca tsi chanipama tsi jahuë mëquënë, jahuë tahë, tihi cabo
jato ja jismaniquë. ⁴¹ Jatsi ja ranicaniquë ra. Jari shinati pi ja cahëyamacani
quiha. Ja ratëcaniquë. Jatsi,

—¿Jahuë ya ni mato piti? —i jato qui Jesu niquë.

⁴² Jatsi ja qui imaha ca sani ja acanicuë piti. ⁴³ Bichi tsi jato bësojo xo tsi ja
piniquë. ⁴⁴ Pihax jato qui Jesu chaniniquë:

—Mato bëtapama tsi ëmë yoati tsi Quënëhacanish cabo tëquë ë yoayamëquë.
“Jatihuahacati iqui quiha ëmë yoati Quënëhacanish cabo tëquë” i mato qui ë
yamëquë —iquiina.

⁴⁵ Jatsi bëroria tsi Quënëhacanish cabo jato ja tiisimaniquë ja cahëyoicano
iquish na. ⁴⁶ Jatsi ja chaniniquë:

—Jabi ëa yoati ja quënëcani ca tsi xo naa: “Tënëti nori quiha johai ca
Xabahamati Ibo” i jaca ni quiha. “Tres bari quirëquë rësonish cabo quima
ja tëronoti nori quiha” i jaca ni quiha. ⁴⁷ Jatsi, “Nohiria bo tëquë qui jahuë
xabahamati Chani yoahacaxëti xo, ja quiri bësocanaiba jocha masahacano” i
jaca ni quiha. Jabi Jerusalén pari tsi naa chani yoahacaxëti xo. ⁴⁸ Jabi naa
ma jisxëhai ca jahuë bo ma yoaxëti xo. ⁴⁹ Jabi jaboqui Espiritu Santo mato qui
raaxëquia, noho Jahëpá yoani jascaria. Yacatá tsi chitëcana, mato qui mana ca
chama joxëquë rohari. Toa chama ma jayano —nëa tsi jato qui Jesu nëcaniquë.

*Mana Jesu tërononina
Marcos 16.19-20*

⁵⁰ Jquirëquë Jerusalén quima jahuë rabëti bo Jesú boniquë, yaca Betania
quiri. Toa xo tsi quiha jahuë mëquë Jesu tëroniquë jato shomahuaquí na.

⁵¹ Chanipama tsi nai qui tëronotsijanicuë. Jato quima ja bichiquiniquë nai
qui. ⁵² Jatsi ja mënicanaca tsi Jesu ja ocahuacanicuë. Ocahuahi tsi rani tsi
jahari Jerusalén qui ja bocanicuë. ⁵³ Arati xobó tsi ja i-ipocani quiha Dios
oquëhuahi na.

El Santo Evangelio Según San Juan

Bësomatí Chani

¹ Jariapari tsi Cristo, naa Chani icanai ca iniquë. Toatiyá tsi yama mai iniquë. Jabi Dios ya ja iniquë. Jasca, Dios ja iniquë ra, naa Chani inish cato. ² Jariapari tsi Dios ya ja iniquë. ³ Jatiroha ca ja nëhohuayoniquë ra. Jasca, yama tsi toa ja ayamanina. ⁴ Jatiroha ca ja bësomaniquë ra, Bësomati Ibo-iboria ja nori quëshpi na. Jasca, jatiroha ca nohiria qui huahuahi quiha jahuë Chani, jabija ca jismahi na. ⁵ Tsémó ca nohiria bo jabija ca Chani jismahai ca Huëa ca tsi xo naa ra. Jabi naa Huëa nocabuayama-pistiariaxëhi quiha tsëmo ra.

Dios Chani chitahënina

⁶ Jatsi jahuë Chani bēhai ca Diós raaniquë, naa Juan icanai cato. ⁷ Jesucristo, naa Huëa inish ca yoati tsi nohiria bo yoahi quiha Juan joniquë. Joxo tsi quiha Dios Chani ja yoaniquë, Huëa inish ca qui nohiria chitimino iquish na. ⁸ Jabi Huëa inish ca Juan iyamaniquë. Jama, Huëa inish ca yoati chanihi quiha ja joniquë. ⁹ Jabija ca Huëa-huëaria ca tsi xo toa mai qui jonish cato. Joxo tsi quiha jatiroha cabo qui jabija ca huahuahi quiha, nohiria bá Dios cahëno iquish na.

¹⁰ Noba maí tsi quiha Chani icanai ca racaniquë; naa noba mai nëhohuanish cato. Jama, tsohuë ja iqui ca nohiria bá cahëyamaniquë rë. ¹¹ Jasca, jahuë maí ca nohiria bo, naa jodiobo qui ja joniquë. Ja joquë tsi quiha jahuë jimibá biyamaniquë pë. Jato qui yoi ja ini quiha. ¹² Jama, nohiria bá Chani icanai ca biquë tsi jato qui chama ja aniquë Dios baquë bo manëti. Jahuë baquë bo manëcani quiha Xabahamati Ibo ja nori ca ja chahahuacaquë no. ¹³ Jatsi cotëquëhi quiha chahahuahi na. Jamëri tsi xo naa cohaina ra. Noba jahëhuá comahai ca jascaria ma xo ra. Nohiria jaha quëéhaina, bënë bá saihuacatsaina, nëca tsi quiha Dios baquë bo manëyamacani quiha. Jama, Dios tsi xo toa jato Comati Ibo-iboria.

Joni Jesu manënina

¹⁴ Jabi joni naa Chani icanai ca manëniquë. Joni manëhax noqui xërëquë tsi quiha ja racaniquë. Jatsi jahuë oquë no jisniquë, naa ja qui jahuë Jahëpá acacanish ca oquë jiaxëni cato. Jasca, Dios baquë huësti ca ja iqui iqui tsi anomaria jahuë oquë ini quiha ra. Ja quëshpi tsi nohiria bo noiti cahëxëni ja ini quiha. Jasca, jabija ca chaniti cahëxëni ca ja ini quiha. ¹⁵ Jabi Cristo yoati tsi Juan nëcaniquë:

—E cho joxëhi quiha ëa oquë cato. E conox pari no tsi ja iniquë. Jasca, mato qui ë yoani ca joni tsi xo naa —i Juan niquë Jesu yoati na.

¹⁶ Anomaria tsi xo noqui Cristó noihaina ra. Ja noihai iqui tsi no shomahuariahacanicuë ra, naa noqui tëquëta. ¹⁷ Jabi jariapari tsi quiha noqui jodiobo qui Moisés yamabá yoba aniquë. Noqui quësohi quiha toa yoba rë. Jama, maí qui Jesucristo joni iqui tsi Diós noqui noihaina, jahuë jabija ca Chani, tihí cabo cahëyoiqui noa ra. ¹⁸ Yama tsi xo toa Dios jisnish cato. Jabi Dios noqui cahëmanish ca tsi xo toa jahuë Baquë yoi roha, naa Dios tahë cato.

Cristo yoati Juan chaninina

Mateo 3.11-12; Marcos 1.7-8; Lucas 3.15-17

19 Jabi arati ibo bo, jato mëbicanaibo, tihi cabo quiha Jerusalén ca jodioba chama bá raaniquë Juan qui. Jato ja raacaniquë Xabahamati Ibo ja iqui ca nicati. Jatsi Juan ja nicacaquë tsi quiha,

20—Cristo, naa jaha ma pasohai ca Xabahamati Ibo ma xo ëa ra —i jato qui Juan niquë.

21 Jatsi quiha,

—¿Tsohuë cara ni mia sa? ¿Elías ma ni mia ra? —i ja qui jaca niquë.

Jatsi quiha Juán quëbiniquë:

—Elías ma xo ëa —iquiina.

Jatsi,

—¿Díos raahai ca chani yoati Ibo-iboria ni mia sa? —i jaca niquë.

—Toa ma xo ëa ra —i Juan niquë.

22 Jatsi quiha,

—¿Tsohuë cara ni mia ra? Noqui yoahuë, noqui raahax cabo no quëbino iquish na. ¿Japa mia ti? ¿Jënihai ra? —i quiha Juan qui jaca niquë.

23 Jatsi Juán quëbiniquë:

—Xabachá ca quënahai ca ëa xo naa. Shomahuahacacahuë, Ibo johai ca bax na iquia ra. Jabi siri tsi quiha ëa yoati tsi Isaías yamabo, naa Dios Chani yoanish ca chaniniquë, naa é conox pari no —nëa tsi Juan nëcaniquë.

24 Jatsi quiha fariseobá raahacanish cabá nicatëquëniquë:

25—Johai ca Xabahamati Ibo, Elías, Dios Chani yoati Ibo-iboria, tihi cabo iyamapiquí tsi jënihiraxo tsi nohiria bo ashimahi pa? —i ja qui jaca niquë.

26 Jatsi quiha Juán jato quëbiniquë:

—Jënë tsi mato ashimaquia. Jama, mato xërëquë tsi bësohi quiha mato bëroma cato ra. 27 E cho joxëhi quiha ëa oquëria cato. ¿Jënahuariahax raca ja bax ë yonocona rë, iriama ca ë nori quëshpi na? —nëa tsi bëcanish cabo qui Juan nëcaniquë.

28 Jabi ani Jordán rabëquëxë, naa Betania mai icanish cató tsi quiha ja qui raahacanish cabo Juán quëbiniquë. Toa xo tsi quiha nohiria bo ashimahi ja iniquë.

Jesú jahuë yonoco chitahëhuanina

29 Huëaquë tsi quiha ja qui Jesu johai ca Juán jisniquë.

—Tsayacapa. Dios oveja tsi xo naa ra. Nohiria jocha bixëhi quiha. 30 Jabi mato qui ë yoani ca joni tsi xo naa, “E cho joxëhi quiha ëa oquë cato” i ë quë no. “E conox pari no tsi bëso ja iniquë” i ë ni quiha. 31 Toatiyá tsi Xabahamati Ibo ja iqui ca ë cahëymaniquë rë. Jama, jënë tsi ashimahi ë joniquë, Israël cabo qui mato Cristo jismaxëna —nëa tsi quiha nohiria bo qui Juan nëcaniquë.

32 Jatsi quiha Juán yoani ca tsi xo naa:

—Espíritu Santo é jisniquë ra, nai ax boto botëhai jascaria. Botëhax jahá tsi ja chitëniquë. 33 Jari jaha no pasohai ca Xabahamati Ibo ja iqui ca ë cahëymaniquë rë. Jama, é qui chaniniquë Dios, naa nohiria bo ashimati ëa raanish cato. “Espíritu Santo botëhai ca jisxëqui mia” i ë qui Dios ni quiha. “Botëhax tsohuëcara ó chitëxëhi quiha. Espíritu Santó tsi nohiria ashimahi ca tsi xo toa” i ë qui Dios ni quiha. 34 Jatsi Jesu qui Espiritu Santo botëhai ca é jisniquë. Ja tsi xo toa Dios Baquë ra iquia —nëa tsi quiha jato qui Juan nëcaniquë.

Jesu jariapari ca banahuacanaibo

35 Huëaquë tsi quiha dos ca jahuë rabëti bo ya Juan nii iniquë. 36 Niixo tsi quiha Jesu tarabihai ca ja tsaya-tsyaniquë.

—Tsayacapa. Dios oveja tsi xo toa ra —i quiha jato qui Juan niquë.

³⁷ Jatsi Jesu quiha Juan rabë ca rabëti bá banahuaniquë ra ja yoani ca nicaxo na. ³⁸ Bopinaxo tsi quiha ja cho banahuacanaibo Jesú jisniquë. Jisi tsi,

—¿Jahuë mëracanai? —i jato qui ja niquë.

³⁹ Jatsi quiha,

—¿Jahuënia tsi racahai, Maestró? —i jaca niquë Jesu qui.

Jatsi,

—Jisi bëcahuë —i jato qui Jesu niquë.

Jatsi quiha ja bëta ja bocaniquë. Boxo tsi quiha Jesu racahai ca iti ja jiscaniquë. Jisi tsi ja bëta ja chitëcaniquë, yata ja ini iqui na.

⁴⁰ Jabi Jesu ya canish ca Andrés ini quiha, naa Juan chani nicanish cato. Simón Pedro noma quiha. ⁴¹ Jasca, jisbaya tsi quiha jahuë rëquëmë Simón pari Andrés bichi caniquë.

—Xabahamati Ibo no jisquë ra —i quiha Simón qui ja niquë.

⁴² Jatsi quiha Jesu qui jahuë rëquëmë ja bëniquë. Ja bëquë tsi quiha Jesú tsayaniquë.

—Juan baquë Simón xo mia. Jaboqui janë paxa ca mi qui axëquia. Pedro mi quënahacaxëti xo —i quiha ja qui Jesu niquë. Jabi noba joí tsi “Maxaxa” Pedro janëhacani quiha.

Felipe, Natanael, tihí cabo Jesú quënanina

⁴³ Jatsi huëaquë tsi quiha Galilea mai qui Jesu cacasniquë. Caxo tsi Felipe ja jisniquë. Jatsi,

—E bëta johuë —i quiha ja qui Jesu niquë.

⁴⁴ Jabi Betsaida yaca quima Felipe joni quiha. Toa yacatá tsi racani quiha Andrés, Pedro ri. ⁴⁵ Jatsi quiha Natanael Felipë bichi caniquë.

—Noqui Xabahamati Ibo ë jisquë ra. Jabi naa joni yoati tsi no yoahacani quiha Moisés quënëni cato ó no. Jasca, ja yoati tsi quënëni quiha Dios Chani yoanish cabo ri. Jahuë janë tsi xo Jesu, naa José baquë quiha. Nazaret quima ax johi quiha —nëa tsi quiha Natanael qui Felipe nëcaniquë.

⁴⁶ Jatsi quiha,

—¿Jënahuariahax raca Nazaret quima ax jia ca jona? —i Natanael niquë.

Jatsi,

—Jisi jopa —i ja qui Felipe niquë.

⁴⁷ Jatsi ja bëcano tsi quiha Natanael Jesú jisniquë.

—Nëá tsi johi quiha Israël ca joni shinajiaxëni cato ra. Quiatimaxëni ca joni tsi xo naa —i quiha Jesu niquë.

⁴⁸ Jatsi quiha,

—¿Jënahuariaxo ëa mi cahëha pa? —i Natanael niquë.

Jatsi,

—Felipë mia quënanox pari no tsi tosa jihui namá mi tsahohai ca ë jisquë ra —i ja qui Jesu niquë.

⁴⁹ Jatsi Natanael quëbiniquë:

—Dios Baquë xo mia ra, Maestró. Israël caba chama-chamaria xo mia ra —iquiina.

⁵⁰ Jatsi,

—“Tosa jihui namá mia ë jisquë” i ë a iqui tsi ëa chahahuaqui mia pë.

⁵¹ Mía parayamaquia. Naa jisti oquë cabo jisxëqui mia ra. Nai japëquëhai ca jisxëqui mia. Jasca, Nohiria Baquë quima ax Dios ángel bo tëronohaina, ja qui ja botëcanaina, tihí cabo tsi jisxëqui mia ra —i quiha Natanael qui Jesu niquë.

2

Jënëria Jesú jënëpaxa manëmanina

¹ Dos bari quirëquë quiha Galilea mai ca Caná icanish ca yaca xo tsi ahui yahi quiha joni iniquë. Toá tsi quiha Jesu jahëhua iniquë jaa ri. ² Jatsi quiha jahuë rabëti bo ya Jesu caniquë jaa ri. Ja qui joi amahacani quiha. ³ Jabi nohiria bo oriquino tsi quiha oriquiti ibobá jënëria binianiquë rê. Jato jënë ja paisacaquë tsi quiha,

—Yama xo jato jënë rê —i quiha Jesu qui jahuë jahëhua niquë.

⁴ Jatsi Jesú quëbiniquë:

—Huënyamahuë, caí. Jamëri tsi xo toa mi shinahaina pë. Jari tsëquëyamahi quiha noho yonocoti xabaca ra —i quiha jahuë jahëhua qui Jesu niquë.

⁵ Jama, toá ca yonati bo qui jahuë jahëhua chaniniquë:

—Mato ja yoahai ca acahuë —iquiina.

⁶ Jabi toá tsi quiha seis maxax ca chomo bo nii ini quiha; naa Jodiobá chocohati jabi quëshpi na. Jabi pistiama naa chomo bo icani quiha. ⁷ Jatsi, —Chomo bo tsi jënëpaxa rêatsacana —i yonati bo qui Jesu niquë.

Jatsi quiha ja rëacanicuë jahuë quëbichí no. ⁸ Rëajahuacaquë tsi quiha,

—Huëtacahuë. Oriquiti ibo qui bocahuë —i jato qui Jesu niquë.

Huëtaxo tsi quiha jënëria ibo qui yonati bá boniquë. ⁹ Ja bocaquë tsi quiha jënëria rarinamahacani ca jënëpaxa ibobá tananicuë. Anomaria ja ini quiha. Tanaxo tsi quiha ahui yahax ca joni ja quënaniquë. Jabi jahuënia ca naa jënëria joha ca ja cahëyamani quiha. Cahënicuë taanish ca yonati bo roha.

¹⁰ Jatsi,

—Anomaria tsi xo naa jënëria ra —i ibo niquë—. Jënëria jiaxëni ca pari taahi quiha jatiroha cabo ra. Noba jabi quiha. Jaquirëquë, nohiria bo sëyaquë tsi quiha jënëria yoi ca taacani quiha pë. Jama, ja cho naa jënëria jiaxëni ca mi taaquë pa —i ja ni quiha ahui yahax ca qui.

¹¹ Jabi naa jisti quiha Jesú aniquë Galileá ca Caná yacata xo na. Jahuë jariapari ca jisti quiha. Naa jistí tsi quiha jahuë oquë jiaxëni ca Jesú jismaniquë. Ja iqui tsi jahuë rabëti bá chahahuaniquë.

¹² Jaquirëquë jahuë jahëhua, jahuë noma bo, jahuë rabëti bo, tihí cabo ya Jesu caniquë Capernaum mai qui. Toá tsi quiha ichariama ca bari no tsi ja chitëcaniquë.

*Arati xobo qui Jesu jiconina**Mateo 21.12-13; Marcos 11.15-18; Lucas 19.45-46*

¹³ Tsëquëpaimaria jodiobá pascua fiesta ini quiha. Ja quëshpi tsi Jerusalén qui Jesu caniquë. ¹⁴ Arati xobo qui jicoxo tsi huëyë bo, oveja bo, boto bo, tihí cabo iniacanaibo ja jisnicuë. Jasca, toá tsi quiha parata rarinamacanaibo tsaho iniquë pë. ¹⁵ Jaha tsi quiha huacapi Jesú quëconiquë. Quëcoxo tsi quiha arati xobo quima jato tëquë ja raanicuë. Jato oveja bo, jato huëyë bo, tihí cabo ja raanicuë cacha. Raaxo tsi quiha parata rarinamacanaiba parata ja pacanamanicuë. Jasca, jato mesa bo ja narabaniquë.

¹⁶ Jatsi,

—Mato boto bo cacha tsëcacata. Noho Jahëpa xobo tienda jabitihuaya-maxëqui mato ra —i quiha boto iniacanaibo qui ja niquë.

¹⁷ Jatsi quiha Dios libro ó ca quënëhacani ca jahuë rabëti bá shinanicuë, “Mi arati xobo noiquia, Díos. Anomaria tsi xo toa mi xobo ë noihaina ra” i ja nina.

¹⁸ Jatsi arati xobo quima jato Jesú raaquë tsi quiha jodiobá nicaniquë:

—¿Cacha jato raati chama ya ni mia sa? ¿Jahuë jisti ati mëtsa ni mia, noqui mi chama jismati? —iquiina.

¹⁹ Jatsi Jesú quëbiniquë:

—Naa arati xobo potasyocahuë. Tres barí tsi noho chamá tsi nitiquëmaxëquia —i jato qui ja niquë.

²⁰ Jatsi,

—Cuarenta y seis año no tsi ja yonococaniquë, naa arati xobo jatihuaxëna. ¿Jënahuariaxo raca tres barí tsi naa xobo mi nimatëquëna? —i jaca niquë, quëbihi na.

²¹ Jama, jahuë yora yoati tsi Jesu chanihi ini quiha, jato arati xobo yoati nomari. ²² Jasca, Jesu bësotëquëquë tsi quiha jodiobo qui ja nëcani ca jahuë rabëti bá shinani quiha. Jaha tsi Quënëhacanish cabo, Jesú yoanina, tihí cabo jahuë rabëti bá chahahuayoini quiha.

Nohiriá shinahai ca cahëhi quiha Jesu

²³ Pascua fiesta no tsi quiha Jerusalén tsi Jesu iniquë. Toá ja no tsi quiha huëstima cabá chahahuaniquë, ja ani ca jistiria cabo jisish na. ²⁴ Jama, jato bëta Jesu rabë nabëquiyamaniquë, jatiroha ca joni bá shinahai ca ja cahëni quëshpi na. ¿Mahitsa ja chahahuayamayamacani? ²⁵ Jabi nohiria bá shinahai ca tëquë ja cahëyoini quiha.

3

Jesu qui Nicodemo jonina

¹ Tobi jodioba chama niquë, naa Nicodemo icanai cato. Fariseobo, naa jodioba chama ja ini quiha. ² Jabi baquichá tsi quiha Jesu qui ja joniquë chaninaxëna. Johax,

—Dios raahacanish ca maestro xo mia, Taitá. Dios mi bëtayamarohapino tsi mi acai ca jisti bo mi ayamaquë aquë ra —i quiha Jesu qui ja niquë.

³ Jatsi,

—Mia parayamaquia. Cotëquëyapipihi tsi Diós otohái ca qui jicotimaxëni xo joni ra —i quiha ja qui Jesu niquë.

⁴ Jatsi,

—¿Jënahuariahax joni siri ca cotëquëna ra? ¿Jahuë jahëhua xama qui jicoxëti ni, cotëquëti pa? —i Nicodemo niquë.

⁵ Jatsi quiha Jesú quëbiniquë:

—Mia parayamaquia. Jënë, Espíritu Santo, tihí cabá tsi cotëquëyapipihi tsi Diós otohái ca qui jicotimaxëni xo joni ra. ⁶ Jabi nohiria comahi quiha nohiria. Jama, Dios baquë bo jabitiqui noa, Espíritu Santó tsi no cotëquëquë no. ⁷ “Mi cotëquëpaima xo” i ë no tsi ratëyamana. ⁸ Xotohi quiha yoshini jaha ja quëhai cató no. Xotojano tsi jahuë joi nicaqui noa. Jama, jahuënia ax ja johaina, jahuënia ja cahaina, tihí cabo tsi cahëyoiyamaqui noa. Jabi toca tsi yonocohi quiha Espíritu Santo ri, no cotëquëquë no. Jisnoma xo Espíritu Santo yonocohaina —i Jesu niquë.

⁹ Jatsi,

—¿Jënahuariahí ni sa? —i Nicodemo niquë.

¹⁰ Jatsi Jesú quëbiniquë:

—¿Israél ca nohiria maestro ma ni mia ra? ¿Naa ë chaniha ca cahëyamahai pa? ¹¹ Jabi no cahëhai ca jahuë bo, no jisi ca jahuë bo, tihí roha cabo yoati tsi chaniqui noa ra. Jama, noba chani biyamacani quiha nohiria pë. ¹² Naa maí

ca jahuë bo yoati ë chanihai ca chahahuayamapiquë tsi ¿jënahuariaxo tsi ëa mi chahahuana, naa Dios naipá ca jahuë bo yoati ë chanixëquë no?

¹³ Jabi ëa roha ca tsi xo toa Dios naipá ca jahuë bo jismati mëtsa cato. Yama tsi xo toa nai qui canish ca huëtsa ra. Jaroha ca nai ax jonish ca ëa xo naa, naa Nohiria Baquë cato. ¹⁴ Jabi jihuí tsi Moisés yamabá metal rono tëroni quiha nohiria bo rësoyamano iquish na. Jascaria, jihuí tsi tërohacaxëti xo Nohiria Baquë ri, nohiria bo rësoyamano iquish na. Ea namëxëti ca xo. ¹⁵ Jabi bësobësopaoxëhi quiha ë qui chitimicanaibo tëquë ra —nëa tsi quiha Nicodemo qui Jesu nëcaniquë.

Maí ca nohiria noihi quiha Dios

¹⁶ Jabi jatiroha ca maí ca nohiria Diós noiniquë. Noixo tsi quiha jahuë jahuësti baquë ja aniquë no bax na. Jahuë baquë chahahuahi tsi rësorësoyamahi quiha noa. Jama, bësobësopaoxëqui noa. ¹⁷ Jabi Diós jahuë Baquë maí qui raayamaniquë jato jocha quëshpi nohiria copixëna. Jama, jahuë Baquë ja raaniquë noqui xabahamaxëna jahá no.

¹⁸ Jabi tënëtia qui jahuë Baquë qui chitimicanaibo raayamaxëhi quiha Dios. Jama, chitimiyamacanai ca tsi xo toa Dios copi bixëhaina ra, jahuë jahuësti Baquë qui ja chitimiyamacanai quëshpi na. ¹⁹ Jabi Diós yoani ca tsi xo naa: Maí qui joniquë Huëa nori cato. Jama, tsëmo ó quëëcani quiha joni bo rë, yoi ca ja acanai iqui na. ²⁰ Jabi yoi ca acanaibo qui anoma tsi xo Huëa cato. Jasca, Huëa ca qui bëyamacani quiha pë, jato yoi ca acanai ca jahuë bo bërohuahacamitsa iqui na. ²¹ Jama, Huëa ca qui bëcani quiha jabija ca banahuacanaibo. Bërohuahacahi quiha Diós toa nohiria mëbihaina.

Jesu yoati Juan chaninina

²² Jaquirëquë quiha jodioba mai qui Jesu caniquë jahuë rabëti bo ya. Cahax jato bëta ja chitëniquë. Toa xo tsi quiha nohiria bo Jesús ashimaniquë. ²³ Jabi Enón icanai ca ani xo tsi quiha nohiria bo ashimahi Juan iniquë jaa ri. Salim yaca basima ja ini quiha. Toá tsi quiha huëstima ca jënë ini quiha. Jasca, ja qui nohiria bo cariahi ini quiha ashimahacati. ²⁴ Jabi toatiyá tsi quiha jari preso qui nanëhama Juan ini quiha.

²⁵ Jabi ashimati jabi tahëxo tsi quiha joi mërati Juan rabëti bá chitahëhuaniquë jodiobo yaxo na. ²⁶ Joi mërähax Juan qui ja bocaniquë.

—Jisa, maestró. Joquë Jesu, naa ani Jordán rabëquëx ca mi bëta inish cato pa. Jia tsi toa joni yoati mi chaniniquë. Tsayahuë. Jaboqui nëa xo tsi nohiria bo ashimahi quiha pë. Ja qui bocani quiha nohiria tëquë rë —i quiha Juan qui jaca niquë.

²⁷ Jatsi quiha Juán jato quëbiniquë:

—Jia tsi xo Jesu qui nohiria bocanaina iquia. Ja qui jahuë yonoco Diós ani quiha. ²⁸ Jabi toa joni yoati ë yoani ca ma nicaniquë ra. “Dios raahacanish ca Xabahamati Ibo ma xo ëa” ¿iyama ë ni? “E raahacaquë Cristo bëbo cati” i ë ni quiha. Jabi noho yonoco tsi xo toa jahuë quinia shomahuahaina.

²⁹ Ratëyamacana. Jënima tsi xo oquë ca joni qui nohiria bocanaina, naa fiesta ibo ya nohiria bocanai jascaria. ¿Jabi fiesta ibo mëbiyamamayamahi ni jahuë rabëti bo? Jabi Iboba rabëti xo ëa ra. Japi Ibo Jesu qui nohiria bocano tsi raniquia ra. ³⁰ Jabi oquënaxëti xo Jesu iquia. Anixëti xo jahuë yonoco ra. Jama, iriama ca ëa xo naa. Namahi quiha noho yonoco —nëa tsi quiha jato qui Juan nëcaniquë.

Mana ax jonish cato

³¹ Jatsi,

—Nai ax jonish ca tsi xo naa joni ra. Jatiroha cabo oquë xo. Maí conish ca roha xo éa ra. Iriama tsi xo noho tiisimati chama. Jama, noqui oquë tsi xo naa nai ax johax cato ra. ³²Ja jisni ca jahuë bo, ja nicani ca jahuë bo, tihí cabo yoahi quiha. Jama, jahuë chani jia ca biyamacani quiha nohiria pë. ³³Jama, “Jabija ca xo Dios” iti mëtsa xo tsohuëcara ca naa joni chani bichish cato. ³⁴Jabi Dios Chani yoahi quiha Jesu, ja qui Espíritu Santo Diós ani quëshpi na. Dios shina jayaria xo ra. ³⁵Jasca, jahuë Baquë noihi quiha Jahëpa Dios. Jahuë Baquë qui chama ja aniquë jatiroha ca ja yonano. ³⁶Jabi bëso-bësopaoxëhi quiha jahuë Baquë chahahuahai cato. Jama, nai qui jicoyamaxëhi quiha jahuë Baquë chahahuayamahai cato. Ja qui caxa-caxapaoxëhi quiha Dios ra —nëa tsi quiha nohiria bo qui Juan nëcaniquë ra.

4

Samariá ca yoxa

¹Jodioba chama bo, naa fariseobo icanai cabo qui chani cahëniquë Jesu yoati na. “Huëstima ca nohiria bëbohi quiha Jesu ra. Huëstima ca ashimahi quiha pa; naa Juan huino quiha” i jato qui nohiria bo niquë. ²Jama, jahuë rabëti bá nohiria bo ashimani quiha, Jesu ja nomari. ³Jabi ja acai ca jodioba chama bá nicaquë tsi quiha toa jodioba mai Jesú jisbayaniquë. Jisbaya tsi quiha Galilea qui jahari catsijaniquë.

⁴Jabi samaria maí nacoti nori ja ini quiha, jahuë mai qui cahëti. ⁵⁻⁶Nacopama tsi quiha matoroco barí tsi yaca Sicar icanai ca qui ja cahëniquë. Cahëhax Jacob yamabá ani ca quini, naa jënëpaxa jaya ca quini tapai Jesu tsahoniquë. Ja joicasni quiha. Basí ja coní quiha. Caquë bari. Jabi José yamaba maí tsi toa jënëpaxa ini quiha, naa jahuë jahëpa Jacob quima ja binina. ⁷Tsahojano tsi quiha Samariá ca yoxa joniquë jënëpaxa bichi na. Jodiobo qui yoiria Samaria cabo ini quiha. Jabi ja joquë tsi quiha,

—E qui jënëpaxa ahuë —i yoxa qui Jesu niquë.

⁸Jabi jamëpistia Jesu ini quiha. Yaca qui jahuë rabëti bo jiconi quiha piti copiti. ⁹Jatsi yoxa ratëniquë ja qui Jesu chanini nori iqui na.

—¿Samariá ca yoxa qui chanihi ni mia pa? ¿Jodioba jabi pasomaha ma ni? “E qui jënëpaxa ahuë” ¿i mi a pa? —i quiha Jesu qui ja niquë.

¹⁰Jatsi Jesú quëbiniquë:

—Diós mi qui acatsaina, mi qui chanihai cato, tihí cabo cahërohapiquí tsi ë quima bësomati jënë mi baaquë aquë iquia. Jatsi toa jënë mi qui ë aquë aquë ra —nëa tsi quiha yoxa qui Jesu nëcaniquë.

¹¹—Yama tsi xo mi jënëpaxa biti cato, Taitá —i yoxa niquë—. Nëmi xo quini ra. ¿Jahuëniaxo raca bësomati jënë mi bina? ¹²Naa maiquiní ca jënëpaxa jiaxëni ca noba Jacob yamabá aniquë. Jasca, naa jënë aniquë jahuë baquë bo. Aniquë jahuë vaca bo ri. ¿Jënahuariaxo raca jënë oquë ca é qui mi ana? ¿Noba rëquëyamabo Jacob oquë ni mia pa? —nëa tsi quiha yoxa nëcaniquë.

¹³Jatsi Jesú quëbiniquë:

—Tëshinatëquëhi quiha naa maiquiní ca jënë acai cato. ¹⁴Jama, tëshinatëquëpistia-yamariaxëhi quiha é acai ca jënë acai cato ra. Noho jënë ja aapino tsi rëamë ihipaoxëhi quiha jahuë shinana. Naama-naamapaoxëhai ca jënë xo naa ra —i quiha yoxa qui Jesu niquë.

¹⁵Jatsi,

—Toa jënë é qui ri ahuë, Taitá. E qui mi aapino tsi tëshinatëquëyamaxëquia ra. Jaha tsi naa maiquiní ca jënë bichi joyamaxëquia ra —i ja qui yoxa niquë.

¹⁶Jatsi Jesú quëbiniquë:

—Mi bënë bichi cata —iquiina.

¹⁷ Jatsi,

—Bënë yama ca ëa xo naa ra —i ja niquë.

Jatsi,

—Jabija tsi xo toa mi yoahaina. ¹⁸ Cinco ca bënë bo mi jayani quiha. Jasca, mi bënë ma xo toa mi bëta racahai cato. Jabija ca mi yoaquë ra —i quiha ja qui Jesu niquë.

¹⁹ Jatsi yoxá quëbiniquë:

—Tonia Dios Chani yoahai ca xo mia ra. ²⁰ Nëá tsi, naa macaná tsi noba rëquëyamabo arapaoni quiha Dios qui. Jama, “Jerusalén tsi araxëti quiha nohiria tëquëta” ii quiha mato jodiobo pë —i Jesu qui ja niquë.

²¹ Jatsi Jesú quëbiniquë:

—Ea chahahuahüë, caí. Johi quiha bari huëtsa ra. Toatiyá tsi naa macana, Jerusalén, tihi cabá tsi Jahëpa Dios qui arayamacaxëcani quiha nohiria.

²² Jabi ma arahai ca cahëyoiyamaqui mato samariacabo. Jama, no arahai ca cahëqui noa, naa noqui jodiobo. Jabi jodiobo quima johi quiha Diós nohiria bo xabahamahaina. ²³ Jasca, joxëhi quiha xaba huëtsa. Toa xaba tsëquëno tsi quinia huëtsá tsi Dios qui aracaxëcani quiha nohiria tëquëta, naa Dios noicanaibo. Jato shinaná tsi Dios qui aracaxëcani quiha ra. Mahitsa iyamaxëhi quiha ja aracanaina ra. Jabi jaboqui rohari tsi naa Dios qui aratí quinia paxa ca chitahëhuahi quiha huësti huësti ca aracanaibo yoi bo ra. Nëca ca aracanaibo jiscatsi quiha Dios. Ja qui jia quiha. ²⁴ Shina xo Dios. Jisnoma quiha. Jascaria, jisnoma xo naa jabija ca arahai paxa cato. Noba shinaná tsi ja qui no araxëti xo —nëa tsi quiha Jesu nëcaniquë.

²⁵ Jatsi yoxá quëbiniquë:

—Xabahamati Ibo raaxëhi quiha Dios ra. Joxëhi quiha Cristo icanai cato. Joquí tsi jahuë bo tëquë yoaxëhi quiha —iquiina.

²⁶ Jatsi,

—Dios raahacanish ca ëa xo naa, naa mi qui chanihai cato —i quiha ja qui Jesu niquë.

²⁷ Jatsi Jesu rabëti bo bacaniquë. Samariá ca yoxa ya tsi Jesu chanihai ca jisi tsi ja ratëcaniquë. Jesu ja nicácasani quiha yoxa yoati na. Jama,

—¿Jënihax tsi naa yoxa ya tsi chanihai pa? ¿Jahuë ó quëëhi ni sa? —iyama jaca ni quiha, bërabihí na. ²⁸ Jatsi yoxa jahari caniquë jahuë yaca qui. Jahuë chomo ja jisbërianiquë maiquini tapái. ²⁹ Jahuë yaca qui cahëhax,

—Naa joni jisi bëcapa. Jatiroha ca ë ani ca ëa ja yoaquë pa. ¿Tonia Diós raahai ca Xabahamati Ibo ma ni? —i quiha nohiria bo qui ja niquë.

³⁰ Jaha tsi yacatá ca nohiria tëquë jisbayaniquë. Jisbaya tsi quiha Jesu jisi ja bocaniquë.

Dios yonoco acaina

³¹ Jabi jahuë yaca qui yoxa bacaquë tsi quiha,

—Pihüë —i Jesu qui jahuë rabëti bo niquë.

³² Jatsi Jesú quëbiniquë:

—Piti huëtsa jaya xo ëa ra, naa ma cahëyamahaina —iquiina.

³³ Jatsi jato xërëquë tsi quiha chaninatsi jahuë rabëti bo niquë:

—¿Tsohuëcaracá ja qui piti bëha pa? —iquiina.

³⁴ Jatsi jahuë rabëti bo qui Jesu chaniniquë:

—Ea raanish ca quima johi quiha noho piti. Jahuë shina acaina, jahuë yonoco jatihuahaina, tihi cabo tsi xo toa noho piti ra. ³⁵ “Cuatro oxë tsi bimi tësaxëqui noa” ii quiha mato ra. Jama, johai ca nohiria tirixëni ca tsayacapa.

Tësati bimi jascaria ca xo. Dios chahahua-paimaria ca xo. Dios bax ja tësahacapaimaria ca xo iquia. ³⁶ Jasca, nohiria tësacanaibo qui copi jia ca axëhi quiha Dios. Bëso-bësopaocaxëcani quiha toa ja tësacanaina. Jaha tsi nohiria tësacanaibo ja ranixëhi quiha Dios Chani sayacanaibo ri. ³⁷ Jabi “Huësti ca joni tsi xo sayahaina. Ja sayaha ca tësahi quiha joni huëtsa” ii quiha nohiria bo. Jabija tsi xo toa ja chanicanaina. ³⁸ Jatsi mato raaquia ma sayahama ca tësati. ¿Tsayamacanai? Dios bax yonoconiquë huëtsa bo, Dios Chani sayahaina. Jaboqui jato yonoco tësaxëqui mato ra —nëa tsi quiha jahuë rabëti bo qui Jesu nëcaniquë.

Samariá cabá chahahuanina

³⁹ Jabi huëstima ca yacatá ca samariabá chahahuaniquë,

—Jatiroha ca ë ani ca ëa naa joní yoaquë pa —i jato qui yoxa quë no.

⁴⁰ Jatsi Jesu qui caxo tsi quiha samariabá bënarianiquë:

—No bëta mi chitëno ra —iquiina.

Jatsi dos bari no tsi jato bëta Jesu chitëniquë. ⁴¹ Jaha tsi nohiria huëtsa bo chitiminiquë jato ri Jesu chani nicahax na. Huëstima ja icani quiha.

⁴² —Jia tsi xo noqui mi yoahitahana. Jama, jaboqui chahahuariaqui noa, naa joni no nicaha quëshpi na. Nohiria bo Xabahamati Ibo yoi ja nori ca cahëqui noa ra —i yoxa qui jaca niquë.

Soldado ba capitán baquë

⁴³ Dos ca bari huinocaquë tsi quiha samariabo Jesú jisbayaniquë. Jisbaya tsi quiha jahuë mai qui, naa Galilea qui ja caniquë. ⁴⁴ Capama tsi quiha, —Dios Chani yoahai ca nicayamahi quiha jahuë maí ca nohiria bo rë —i Jesu niquë.

⁴⁵ Jama, jahuë mai, naa Galilea qui Jesu cahëquë tsi quiha nohiria bá joihuaniquë pa. Jatiroha ca Jesús ani ca ja jiscani quiha Jerusalén qui shishoqui na. Jabi Jerusalén ca pascua fiesta qui ja bocani quiha jato ri.

⁴⁶ Jahuë mai qui cahëhax Caná icanai ca yaca qui Jesu caniquë, jënëpaxa quima jënëria ja ani cato. Toá tsi quiha gobierno chama iniquë. Iquihi jahuë baquë ini quiha. Jasca, basi, naa Capernaum yacatá tsi racahi ja ini quiha.

⁴⁷ Jodioba mai ax Galilea qui Jesu joni nori ca ja nicaniquë. Nicahax Caná yaca qui ja caniquë jahuë baquë iqui na. Jatsi,

—Noho xobo qui johuë. Rësopaimaria xo noho baquë rë. Noho baquë mi jënimahuano ra —i quiha Jesu qui ja niquë.

⁴⁸ Jatsi capitán Jesú quëbiniquë:

—¿Jëniriahax ë qui chitiminox pari tsi jisti jiscatsi quiha mato rë —iquiina.

⁴⁹ Jama,

—Johuë, Taitá, noho baquë rësonox pari no —i Jesu qui capitán niquë.

⁵⁰ Jatsi,

—Cata. Rësoyamaxëqui mi baquë ra —i capitán qui Jesu niquë.

Jatsi jahari jahuë xobo qui capitán caniquë. Jesú yoani ca qui ja chitimini quiha jahuë baquë yoati na. ⁵¹ Jahari capama tsi quiha jahuë yonati bo ja bëchaniquë bahi xo na.

—Jënima xo mi baquë ra. Bëso xo —i quiha ja qui jaca niquë.

⁵² Jatsi,

—¿Jahuë hora jënimati ja tahëha? —i capitán niquë.

—Matoroco bari quiha ja chamahitaquë. A la una quiha —i jaca niquë.

⁵³ Jatsi jasca ca hora ja ini ca ja cahëniquë, naa “Jënima xo mi baquë” i Jesu quë no. Japi Jesu qui ja chitimiyoiniquë. Chitiminiquë jatiroha ca jahuë xobó cabo ri.

⁵⁴ Jabi segunda jisti tsi xo naa Jesú anina, jodioba mai ax Galilea qui johax na.

5

Tapiyamahai ca joni Jesú jënimahuanina

¹ Jaquirëquë Jerusalén tsi quiha jodioba fiesta iniquë. Jatsi caniquë Jesu ri. ² Jabi Jerusalén tsi ashimati jënëquini ini quiha, naa Betsaida icanai cato. Oveja jicoti caiti basima quiha. Jabi cinco ca pórticos, naa caiti jisiria cabo, naa ashimati iti jayani quiha. ³⁻⁴ Jabi jahuë pórtico namá tsi quiha noitiria cabo racahi ipaoni quiha. Toá tsi quiha bëco cabo, coyamacanaibo, yora choni jaya cabo, tihi cabo iniquë. ⁵ Toá tsi iniquë cotimaxëni cato. Treinta y ocho año no tsi ja coyamani quiha. Naama quiha. ⁶ Jabi Jerusalén qui jicopama tsi toa joni raca ca Jesú jisniquë. Naama toca tsi ja ini ca Jesú cahëniquë. Jatsi,

—¿Jënimacatsai? —i joni qui Jesu niquë.

⁷ Jatsi noitiria ca joni quëbiniquë:

—Yama tsi xo ashimati jënëquini qui ëa jicomahai cato rë. Angél jënëpaxa roihano tsi mëri tsi jënë qui canoma xo ëa rë. E jicocasno tsi jariapari jënë qui jicohi quiha huëtsa rë —i Jesu qui ja ni quiha.

⁸ Jatsi Jesu ja qui chaniniquë:

—Niihuë. Mi oxati bihuë. Cohuë —iquiina.

⁹ Jatsi chamatapiniquë joni. Chamaxo tsi quiha jahuë oxati ja biniquë. Bixo ja jisbayaniquë. Jabi joiti barí tsi quiha naa joni jënimahuahacaniquë. ¹⁰ Ja quëshpi tsi jodiobá jënimahuahacaniquë ca joni raahaniquë pë.

—Joiti barí tsi xo naa ra. Anoma tsi xo naa mi oxati bëhaina ra —i ja qui jaca niquë.

¹¹ Jatsi joni quëbiniquë:

—“Mi oxati bihuë. Cohuë” i ë qui ëa jënimahuahax ca quë ra —iquiina.

¹² Jatsi jodiobá nicaniquë:

—¿Tsohuë ni naa joni ra, naa “Mi oxati bihuë. Cohuë” i mi qui ax cato? —i jaca niquë ja qui.

¹³ Tsohuëcara ja ini joni cahëyamani quiha. Caquë Jesu. Nohiria misco ca qui ja jiconi quiha. ¹⁴ Jatsi yata tsi quiha jodioba arati xobo xo tsi Jesú toa joni bëchaniquë. Bëchahax tsi,

—Tsayapa. Jaboqui jënima xo mia. Jochatëquëyamahuë, jahuëcara oquë ca isihai ca mi bimitsa iqui na —i ja qui Jesu niquë.

¹⁵ Jatsi jodioba chama bo mërahi joni caniquë, Jesu jistëquëxo na.

—Jesu tsi xo toa joni, naa ëa jënimahuahax cato ra —i jato qui ja niquë.

¹⁶ Jaha tsi Jesu tënëmati jodioba chama bá chitahëhuaniquë rë, joiti barí tsi nohiria ja jënimahuani iqui na. ¹⁷ Jatsi quiha Jesú jato quëbiniquë:

—Jatiroha barí tsi jia ca aqui quiha noho Jahëpa ra. Jabi toca xo ëa ri —iquiina.

¹⁸ Jaha tsi Jesu pi jodiobá ariacasniquë, jato joiti barí jabi bo ja janayamani iqui na. Jasca, “Noho Jahëpa xo Dios” i jato qui Jesu ni quiha. Jabi nëca tsi Dios quësca jamë ja ani iqui tsi Jesu jodiobá acasniquë.

Dios Baquë chama

¹⁹ Jatsi quiha jodiobo Jesú quëbiniquë:

—Jabija ca mato yoaquia ra. Yama tsi xo toa jamëpistia xo ë acaina ra, naa Dios Baquë ë nori cato. Jasca, jaha ë quëëhai ca ayamaquia. Noho jahëpá acai ca ë jisi ca roha ca aquia ra. Jatsi noho Jahëpá acai ca jascaria aquia ëa ri. ²⁰ Jasca, ëa, naa jahuë Baquë noihi quiha Jahëpa. Jatiroha ca ja acai ca ëa jismahi quiha. Jaboqui naa joni jënimahuahacaquë. Jama, naa ë aca ca oquë ca axëquia. Jatsi ratëyoxëqui mato ra. ²¹ Jasca, noho Jahëpá bësoyama cabo bësomahai jascaria tsi ë qui jia cabo bësomaxëquia ëa ri. ²² Jasca, jato jocha quëshpi bo tsi nohiria copixëquia, nohiria bo copiti chama ë qui noho Jahëpá ani quëshpi na. Nohiria bo copiyamaxëhi quiha Jahëpa. ²³ Jabi ë qui chama acacanicuë, ëa nohiria bá oquëhuano, naa noho Jahëpa nohiria bá oquëhuahai jascaria. Jabi ëa oquëhuayamapiquí tsi Jahëpa Dios, naa ëa raanish ca oquëhuayamahi quiha mato ra.

²⁴ Mato parayamaquia. Bëso-bësopaoxëhi quiha noho chani nicahai cato, ëa raanish ca Dios chahahuahai cato. Jahuë jocha quëshpi tsi tënëtiya qui ja raahacayamati xo. Jaboqui bësoyoixëhi quiha ra. Rësonoma quiha. ²⁵ Mato parayamaquia. Dios Baquë joi nicaxëhi quiha bësoyama cabo ra, toa xaba tsëquëquë no. Jabi jaboqui ëa chahahuati chitahëhuahi quiha huësti huësti cabo ra. Jabi bëso-bësoxëhi quiha ëa nicacanaibo tëquë. ²⁶ Nicacapa. E qui nohiria bo bësomati chama noho Jahëpá ani quiha, Bësomati Ibo-iboria ja nori quëshpi na. ²⁷ Jasca, nohiria bo copiti chama ë qui ja ani quiha, joni ë manëni iqui na. ²⁸ Jabi ë yoahai ca qui ratëyamacana. Tsëquëxëhi quiha bari, naa maihuahacanish cabo tëquë noho joi nicaquë no. ²⁹ Toa barí tsi tërohacaxëhi quiha jia ca acanaibo. Jasca, tërohacaxëhi quiha yoi ca acanaibo. Bëso-bësopaaxëhi quiha jia ca acanaibo. Jama, copihacaxëti xo toa yoi ca acanaibo jato jocha quëshpi na.

Jesu chama yoati tsi ja chanicanina

³⁰ Yama tsi xo toa ëmëpistia xo ë acaina ra. Nohiria copiquí tsi Diós ëa yoahai ca roha aquia. Jaha tsi mëstë tsi xo nohiria ë copihaina. Jaha ë quëëhai ca ayamaquia; jama, jaha noho Jahëpa quëëhai ca nori. ³¹ Jabi ëmë yoati tsi ë chanipino tsi noho chani chahahuayamahi quiha nohiria bo. ³² Jama, tobi ëa yoati chanihai ca huëtsa cato ra. Jia tsi chanihi quiha. Jabija tsi xo toa ëa yoati ja chanihaina iquia ra. ³³ Jabi ashimati ibo Juan qui joni bo ma raanicuë, ëa yoati nicamati. Jabija tsi xo toa ëa yoati Juan chaninina ra. ³⁴ Jabija ca ja yoani quiha. Jama, tobi quiha Juan chanihai ca oquë cato ra. Mato bax nëcatsiquia, ëa ma chahuano xabahamahacati. ³⁵ Jabi huëa jascaria Juan ini quiha. Nohiria bo qui jahuë chani huahuapaoni quiha. Tanaroha pistia no tsi mato qui jia quiha jahuë huëahai ca chani iniquë ra. ³⁶ Jama, tobi quiha ëa yoati Juan oquë ca chanihai cato. Ea yoati chani-chaniriahai ca tsi xo toa ë acai ca jisti bo ra. Noho Jahëpá ë qui ani ca chamá tsi toa jisti bo aquia ra. Toa jisti bo aquia, Jahëpa Diós ëa raani ca ma cahëno iquish na. ³⁷ Jasca, ë bax chanihi quiha ëa raanish ca Jahëpa ri. Jabi jahuë joi ma nicapistia-yamariani quiha. Jahuë bëmana ma jisyanani quiha. ³⁸ Jasca, mato shina qui jicoyamahi quiha jahuë chani rë, ëa, naa Jahëpá raani ca ma chahuayamahai iqui na. ³⁹ Jama, Quënëhacanish cabo tsaya-tsayariaqui mato ra, mato ja bëso-bësopaomacaxëcanai quëscahuacuí na. Mahitsa tsi xo toa ma tsayahaina rë. Jabi ëa yoati chanihai ca tsi xo toa Quënëhacanish cabo ra. ⁴⁰ Jama, ëa yoati Quënëhacanish cabo chaniquë ri tsi jari ë qui jocasyama xo mato rë, xabahamahacaxëna.

⁴¹ Jabi ë qui iriama tsi xo toa ëa ma nicacasyamahaina. ⁴² Jama, mato cahëriaquia ra. Yama tsi xo toa mato ó ca Dios noicanaibo iquia. ⁴³ Jasca,

noho Jahëpa chamá tsi johai ca ëa xo naa. Jama, ëa, noho chani, tihí cabo bicasyama xo mato rë. Jama, jahuë chama yoí tsi joni huëtsa joopino tsi toa joni joihuaqui mato pë. ⁴⁴ Jatsi, ¿jënahuariahax raca ë qui ma chitimina, nohiríá mato qui acai ca oquë ó quëëpiquí na? Mato qui Díos acatsai ca oquë ó quëëyamaqui mato rë. ⁴⁵ Nicacapa, Jahëpa Dios bësojo ax tsi mato qui quësoyamaxëquia. Mato qui quësoxëhai ca tsi xo Moisés ra, naa ja qui ma chitimihai cato. ⁴⁶ Jabi ëa yoati tsi Moisés yamabá quënëni quíha. Moisés quënëni ca chahahuarohapíhax tsi ë qui ma chitimiquë aquë ra. ⁴⁷ Jatsi, ¿jënahuariaxo noho chani ma chahuana, Moisés quënëni ca ma chahuayamaquë no? —nëa tsi jodioba chama bo qui Jesu nëcaniquë.

6

Cinco mil ca nohiria Jesu pimanina

Mateo 14.13-21; Marcos 6.30-44; Lucas 9.10-17

¹ Jaquirëquë quíha ia Galilea Jesu shitaniquë. ²⁻³ Shitahax maca qui ja tëmahinaniquë. Tëmahinahax ja tsahoniquë jahuë rabëti bo ya. Jasca, huëstima ca nohiria bá Jesu banahuaniquë, noitiria cabo ja jënimahuahai jiscatsi na. ⁴ Basima quíha jodioba fiesta ini quíha, naa jato pascua fiesta. ⁵ Tshohopama tsi quíha ja qui bëcanai ca nohiria huëstima ca Jesu jisniquë. Jisi tsi Felipe qui ja chaniniquë:

—¿Jahuëniá ca mapari copixëhi ni noa naa nohiria bo pimaxëna? —iquíina.

⁶ Jabi ja nëcaniquë Felipe tanamaxëna, ja ati nori ca ja cahëni quëshpi na.

⁷ Jatsi Felipé quëbiniquë:

—Doscientos ca paratá tsi mapari copixo tsi ¿jënahuariaxo raca jato no sëyamana? Narisxëqui noa ra —i Jesu qui ja niquë.

⁸ Jatsi Jesu qui chanitsi Andrés, naa Simón Pedro rëquëmë niquë.

⁹ —Tobi quíha huësti ca baquë nëá no ra. Cinco ca mapari, dos ca sanino, tihí cabo jaya xo ra. ¿Tihí roha cató tsi naa tihiria ca nohiria raca pimahi ni noa pa? —i Jesu qui ja niquë.

¹⁰ Jatsi,

—Nohiria tsahomacahuë —i Jesu niquë.

Jabi jia toa iti ini quíha, huasi ya. Jatsi, tsahoniquë nohiria. Toá tsi cinco mil ca joni bo ini quíha. Tihiria ca racana quíha. ¹¹ Tshohomajahuacaquë tsi quíha baquë mapari Jesu biniquë. Jatsi Dios qui “Gracias” ixo tsi tsahonish cabo qui ja mëaniquë. Mëaxo tsi quíha sani nohiria bo qui ja mëaniquë. Jatsi nohiria bá piniquë. Ja sëyacaniquë. ¹² Sëyajacaquë tsi quíha,

—Pihama ca quësi bo catiacahuë, oriquiti yoshihuahacayamano —i jahuë rabëti bo qui Jesu niquë.

¹³ Jatsi mapari quësi bo, sani quësi bo, tihí cabo ja catiacaniquë. Catiaxo tsi quíha doce ca caca ja rëacaniquë pa, naa pihama cato. ¹⁴ Jatsi nohiria bo ratëniquë. Ja ani ca jisti jisi tsi,

—Jabíja. Dios Chani yoahai ca, naa jaha no pasohai ca tsi xo naa ra —i nohiria bo niquë.

¹⁵ Japi nohiria bá Jesu bicasniquë, jato rey, naa chama-chamaria manëmaxëna. Ja acascanai ca cahëxo tsi quíha jato ja jisbayaniquë. Jatsi maca bo qui jamëpístia tsi ja paxaniquë.

Jënë tsi Jesu conina

Mateo 14.22-27; Marcos 6.45-52

¹⁶ Bari caquë tsi quíha ia qui jahuë rabëti bo botëniquë Jesu manaxëna. ¹⁷ Joyamaniquë Jesu. Caquë bari. Jarohari tsi quíha noti qui ja jicocaniquë,

ia Capernaum shitaxëna. ¹⁸ Shitajacano tsi quiha xotoriatsi yoshi niquë rë. Anomaria choca ini quiha. ¹⁹ Pabasi huaaxaxo tsi quiha ianë ca tsi Jesu cohai ja jiscaniquë. Jato noti qui basimahi ja ini quiha. Jatsi quiha ja raquëcaniquë.

²⁰ Jatsi jato qui Jesu chaniniquë:

—Raquëyamacana. Ea yoi xo naa —iquiina.

²¹ Japi jato noti qui ja jicomacascani quiha. Jicomajahuacaquë tsi quiha mai qui, naa ja rërëcatsai ca iti qui ja cahëtapicaniquë.

Nohiria bá Jesu jiscasnina

²²⁻²⁴ Huëaquë tsi quiha ia rabëquëx ca chitënish ca nohiria bá Jesu yopaniquë. Jahuë rabëti bo ya noti tsi Jesu cayamani ca ja cahëcani quiha. Jabi Jesu yama tsi jahuë rabëti bá ia shitashinani ca ja shinacani quiha. Jatsi Jesu, jahuë rabëti bo, tihí cabo yopaxo tsi ia ja shitacascani quiha jato ri. Yama ca noti bo ini quiha. Jatsi toá tsi quiha, naa Ibo Jesús mapari jato pimani ca qui Tiberiá ca noti bo rërëniquë. Jatsi toa noti bo qui nohiria jicocaniquë Capernaum qui shitaxëna, toa xo tsi Jesu mërëcatsi na. ²⁵ Ia shitaxo tsi quiha Jesu ja jiscaniquë. Jisi tsi,

—¿Jënino tsi mi joha pa, Maestró? —i jaca niquë.

²⁶ Jatsi Jesús jato quëbiniquë:

—E bëta bëyocascaqui mato, mato ë pimahitaha iqui na pë. Mato qui iriama tsi xo toa ë acai ca jisti bo rë. ²⁷ Nicacapa. Iriama tsi xo piti ra. Naamayamahi quiha. Jatsi naamayamahai ca ó quëëyamacana. Jama, mana ca piti ó quëëcana. Mato qui toa piti acasquia, naa Nohiria Baquë ë nori cato. Mato bëso-bësoapasomaxëhi quiha toa ë acai ca piti ra. Jabi noho Jahëpa Díos ëa raaniquë, mana ca piti nohiria bo qui ati —nëa tsi nohiria bo qui Jesu nëcaniquë.

²⁸ Jaha tsi nohiria bo chaniniquë:

—¿Jënahuaxëhi ni noa Dios ranihuaxëna ra? —iquiina.

²⁹ Jatsi Jesús quëbiniquë:

—Ranixëhi quiha Dios, ja raani ca ma chahahuaquë no —iquiina.

³⁰ Jatsi,

—¿Jahuë jisti ati mëtsa ni mia? —i Jesu qui jaca niquë—. Noqui jismahuë, mi qui no chitimino. ¿Jahuë acai ra? ³¹ Jabi xabacá tsi racapama tsi naipá ca mapari noba rëquëbo yamabá pini quiha. Jabi “Naipá ca mapari jato qui Moisés yamabá ani quiha piti” ii quiha Quënehacanish cabo. Moisés ani ca oquë ca jisti mi ano ra, Díos pi mia raani ca no cahëyoino iquish na —nëa tsi Jesu qui ja nëcacaniquë.

³² Jatsi Jesús quëbiniquë:

—Mato qui naipá ca mapari Moisés yamabá ayamani quiha ra, noho Jahëpá tsi nori. Jasca, jaboqui naipá ca mapari yoi ca mato qui acatsi quiha.

³³ Jabi Díos acai ca mapari tsi xo toa nai ax botënish cato. Maí ca nohiria bësomahi quiha —i jato qui Jesu niquë.

³⁴ Jatsi,

—Jatiroha barí tsi naa mapari noqui ahuë, taitá —i nohiria bo niquë.

³⁵ Jatsi,

—Bësomati Mapari ca ëa xo naa ra —i jato qui Jesu niquë—. Paxnaya-maxëhi quiha ë qui johai cato. Tëshinayamaxëhi quiha ë qui chitimihai cato.

³⁶ Jama, mahitsa ëa, noho jisti bo, tihí cabo ma jisquë pë. Jisi tsi jari ë qui chitimicasyamaxo mato iquia. ³⁷ Jama, ë qui chitimixëhi quiha huësti huësti cabo, naa jatiroha ca ë qui noho Jahëpá acaina. Tsohuëcara ë qui johai ca niayama-xëquia ra. ³⁸ Jabi nai ax ë botëniquë, noho Jahëpa, naa ëa raanish

cato shina axëna. Noho shina ayamahai ca ëa xo naa. ³⁹ Ea raanish cato shina tsi xo naa ë qui ja ani cabo ë bënoyamahaina. Jato bësomaxëquia jaroha ca barí no. Ea raanish ca qui jia tsi xo toa. ⁴⁰ Ea, naa jahuë Baquë cahëcanaibo, ë qui chitimicanaibo, tihí cabo bësomacatsi quiha. Noho Jahëpa qui jia tsi xo toa jaroha ca barí tsi jato ë bësomaxëhaina —nëa tsi nohiria bo qui Jesu nëcaniquë.

⁴¹ Jatsi pë Jesu qui yosanatsi jodiobo niquë, “Nai ax johax ca Mapari xo ëa” i ja ni iqui na. ⁴² Jatsi Jesu pasomaha chanitsijacanicuë pë.

—Jesu roha tsi xo naa ra. José baquë quiha. Jahuë jahëpa, jahuë jahëhua, tihí cabo cahëqui noa ra. ¿Jënahuariahax “Nai ax ë botëquë” i ja na? —nëa tsi nohiria bo nëcaniquë.

⁴³ —Toca tsi chaniyamacana. Anoma quiha —i jato qui Jesu niquë—.

⁴⁴ Yama tsi xo toa ë qui jamëpistia joti mëtsa cato. Ea raanish ca Jahëpa tsi xo toa jato ë qui mëpiti Ibo ra. Jatsi ë qui mëpilhacahax cabo bësomaxëquia jaroha ca barí no. ⁴⁵ Jabi “Jatiroha cabo tiisimaxëhi quiha Dios” ii quiha Dios Chani yoanish cabo ja quënëcani cabo ó no. Japi noho Jahëpa nicacanaibo, naa jabija ca tiisimahacahax cabo, tihí cabo tsi xo toa ë qui bëcaxëcanaina.

⁴⁶ Jasca, yama tsi xo toa noho Jahëpa jisish ca ri. Huësti roha ca tsi xo toa noho Jahëpa jisish cato. Jisniquë toa Dios quima ax jonish ca roha. ⁴⁷ Mato parayamaquia. Bëso-bësopaoxëhi quiha ë qui chitimicanaibo iquia. ⁴⁸ Jasca, Bësomati Mapari ca ëa xo naa. ⁴⁹ Jabi nai ax paquënish ca mapari mato rëquëbo yamabá pini quiha xaba xo na. Pihax ja rësoyocanicuë ra. Jato bëso-bësopaomayamani quiha toa mapari ra. ⁵⁰ Jama, tobi quiha nai ax johax ca Mapari huëtsa ra. Rësoyamaxëhi quiha tsohuëcara ca naa Mapari pihai cato. ⁵¹ Mato parayamaquia. Nai ax botënish ca Bësomati Mapari ca ëa xo naa ra. Bëso-bësopaoxëhi quiha tsohuëcara ca naa Mapari pihai cato. Jabi naa Mapari tsi xo noho yora ra. Ja acacani quiha maí ca nohiria bo xabahamati —nëa tsi nohiria bo qui Jesu nëcaniquë.

⁵² Jatsi jato xërëquë tsi joi mëranatsi jodiobá huaniquë.

—¿Jënahuariaxo raca noqui jahuë yora ja ana? Pinoma quiha —i jaca niquë.

⁵³ Jatsi Jesu quëbiniquë:

—Mato parayamaquia. Pihacati xo Nohiria Baquë. Acacati xo jahuë jimi ra. Jabi xabahamahacatimaxëni tsi xo toa Dios baquë biyamahaina. ⁵⁴ Jama, bëso-bësopaoxëhi quiha noho yora pihai cato, noho jimi acai cato. Jaroha ca barí tsi quiha toa bësomaxëquia. ⁵⁵ Piti-pitiria tsi xo noho yora ra. Ati-atiria tsi xo noho jimi ra. ⁵⁶ E nohó bësoxëhi quiha noho yora pihai cato, noho jimi acai cato. Jasca, jahá tsi bësoxëquia ëa ri. ⁵⁷ Jabi ëa raanish cato chamá tsi bësoyoiquia ra. Jascaria, noho chamá tsi bësoyoihi quiha ëa pihai cato. ⁵⁸ Jabi naa nai ax botënish ca Mapari ca ëa xo naa ra. Mato naboyamabá pini ca mapari jascariama xo. Pihax ja rësoyocanicuë. Jama, bëso-bësopaoxëhi quiha tsohuëcara ca Mapari-maparia pihai cato ⁵⁹ —nëa tsi quiha nohiria bo qui Jesu nëcaniquë, Capernaum ca catiti xobo xo tsi tiisimaquí na.

Bësomati Chani

⁶⁰ Jahuë chani nicahax,

—Noqui bëronoma xo ja yoahaina rë. ¿Jënahuariaxo raca no cahëna ra? —i Jesu rabëti bo rabë roha niquë.

⁶¹ Jato qui yosa jahuë chani ini quiha. Jatsi ja shinacanaí ca cahëhax,

—¿Mato ratiahi ni ë yoahana ra? —i jato qui Jesu niquë—. ⁶² Mana, naa naipá tsi ë i-ipaoni quiha. ¿Jahari nai qui cati nori ë irohapiño tsi jahuë ma shinaquë ana? ⁶³ Jabi nohiria bësomahai ca tsi xo noho Shinana. Nohiria bësomayoiyamahi quiha noho yora ra. Pinoma xo toa ra. Jama, noho chani pi

chahahuahi tsi bēsōxēqui mato ra. Dios quima tsi xo naa mato qui ē yoahana. Jama, tobi quiha mato ó ca chahahuayamacanaibo rē —nēa tsi jato qui Jesu nēcaniquē.

⁶⁴ Jabi rēquē rohari tsi ja qui chitimiyoi-canaibo, ja pasomaha cabo, tihī cabo Jesú cahēni quiha.

⁶⁵ Jatsi Jesu chaniṭēquēniquē:

—Yama tsi xo toa ē qui jamēpistia joti mētsa cato itēquēquia ra. E qui noho Jahēpá mēpiti xo —iquiina.

⁶⁶ Jatsi pē huēstima ca banahuacanaibá Jesu jisbērianiquē jahuē chani nicaxo na. Jato jabi siri bo qui ja bacacaniquē pē. Jesu ya ja bocasyamacani quiha jahuē chani iqui na. ⁶⁷ Jisbēriajahuacaquē tsi quiha,

—¿Ea jisbēriacascanaī mato ri rē? —i jahuē doce ca rabēti bo qui Jesu niquē.

⁶⁸ Jatsi,

—¿Tsohuēcara qui no cana, Ibobá? —i Pedro niquē—. Mia roha tsi xo toa bēsōmati chani jaya cato ra. ⁶⁹ Jaboqui mi qui chitimiqui noa. Dios quima ax mēstēxēni ca mi nori ca cahēyoiqui noa ra —i Jesu qui ja niquē.

⁷⁰ Jatsi Jesú quēbiniquē:

—Mato tēquē ē biniquē. Doce ca xo mato. Jama, mato ó ca huēsti ca tsi xo toa ēa pasomaha cato rē —iquiina.

⁷¹ Jabi Judas Iscariote yoati chanihi Jesu ini quiha. Jabi soldado bo qui Jesu mēaxēti ca ja ini quiha; naa Jesu doce ó ca huēsti cato pa.

7

Jerusalén qui Jesu canina

¹ Jaquirēquē quiha Galileá tsi Jesu chitēniquē. Jodioba mai qui jiconoma ja ini quiha, jodiobá acasni iqui na. ² Jabi tsēquēpaimaria jodioba fiesta ini quiha, naa tapás racatiyá no. ³ Toatiyá tsi quiha Jesu qui jahuē noma bo chaniniquē:

—Jodioba mai qui jahari cata. Mi acai ca jisti bo mia banahuacanaibá jisno ra. Naa mai jisbayahuē ra. ⁴ ¿Jēnahuariaxo nohiria bá mia cahēna, jonē tsi mi chitēquē no? Jisti bo aapiquī tsi nohiria bo qui mi acai ca jahuē bo jismata —i Jesu qui jahuē noma bo niquē.

⁵ Jabi Jesu qui chitimiyoiyamani quiha jahuē noma bo ri rē. ⁶ Jatsi Jesú jato quēbiniquē:

—Canoma xo ēa ra. Jari noho xaba ma xo toa emē nohiria bo jismati. Jama, mato qui jia tsi xo jaboqui fiesta qui cahaina. ⁷ Mato qui cayayama xo nohiria bo. Mato ayamacaxēcāni quiha. Jama, ē qui caxariacani quiha, jato yoi ca ja acanaī ca pasomaha ē chanihai iqui na. ⁸ Fiesta qui bocata. Jari fiesta qui cayamaquā. Jari noho cati xaba ma xo ra —i jahuē noma bo qui Jesu niquē.

⁹ Jahuē noma bo qui chanihax Galileá tsi ja chitēniquē. ¹⁰ Jariapari quiha jahuē noma bo Jerusalén qui bocaniquē fiesta qui. Ja bocaquē tsi quiha jonē tsi Jesu caniquē jaa ri. Béro tsi ja cayamani quiha.

Tapas fiestá tsi Jesu inina

¹¹ Jabi fiesta no tsi quiha jodiobá Jesu mērahi iniquē. Mērahax,

—¿Jahuēnia cara ca Jesu tia? —i jaca niquē.

¹² Jabi nohiria xērēquē tsi quiha huēstima ca ranimis-hai ca iniquē Jesu yoati na.

—Jonī shina jiaxēni ca tsi xo naa ra —i jato rabē roha bo niquē, chaninahi na.

Jama,

—Jia yama xo Jesu ra. Nohiria bo parahī quiha pē —i huētsa bo niquē.

¹³ Jabi bëro tsi quiha Jesu yoati tsi ja chaniyamacani quiha, jato jodioba chama bo qui raquëhi na. ¹⁴ Jatsi fiesta naamano tsi quiha jodioba arati xobo qui Jesu caniquë jaa ri. Caxo tsi quiha nohiria bo tiisimati ja chitahëhuaniquë.

¹⁵ Jatsi jodioba chama bo ratëniquë ja tiisimahai ca nicahax na.

—Tiisi jaya xo naa joni pa. ¿Jahuëniá ca tiisi ja bini pa? Noba escuela bo xo tsi ja tiisimahacayamani quiha ra —i chama bo niquë.

¹⁶ Jaha tsi Jesú jato quëbiniquë:

—Nohó-na ma xo naa ë tiisimahaina ra. Dios, naa ëa raanish ca quima johi quiha ë tiisimahaina. ¹⁷ Dios shina aapicasquí tsi jahuënia ca ë tiisimahai ca joha ca cahëxëhi quiha Dios banahuacatsai cato tia. “¿Dios quima ni? ¿Joni quima ni?” ixëhi quiha, cahëcatsi na. ¹⁸ Jama, jamë oquëhuacatsi quiha jahuë chani roha yoacatsai cato. Jama, jahuë raati ibo oquëhuacatsai ca tsi xo toa jabija ca chanihai cato. Parayamahi quiha. ¹⁹ ¿Jabi mato qui yoba Moisés ayamayamani? ¿Jënahuariaxo jahuë yoba nicayamacanai? ¿Jënixo tsi ëa pi acascanai pë? —i jato qui Jesu niquë.

²⁰ Jatsi nohiria bá quëbiniquë:

—Yoyoxëni xo mia ra. ¿Tsohuëcaracá mia acatsana? —i jaca niquë.

²¹ Jatsi Jesú jato quëbiniquë:

—Joiti barí tsi joni ë jënimahuaquë tsi ma shina-risiquihitaquë pa. ¿Mato qui yoi ni joiti barí tsi joni ë jënimahuahaina sa? ²² Tsayacahuë. Joiti barí tsi yonocoqui mato ri, Moisés ani ca jibirishati jabi ma aquë no ra. Jabi noba rëquëbo yamabo qui naa jabi acacani quiha Moisés qui nomari ra. ²³ Jabi mato qui jënima tsi xo joiti bari tsi mato baquë bo jibirishahaina, Moisés yoba jatihuati. Jama, joiti barí tsi joni ë jënimahuano tsi ë qui caxaqui mato pë. ¿Jëni ni sa? ²⁴ Moisés yoba pasomaha joiti barí tsi ë acai nori ca jascahuaku mato pë. Jaxcamënaqui mato ra. Shinahaxma tsi ë qui quësoyamacana ra —nëa tsi nohiria bo qui Jesu nëcaniquë.

—¿Dios raahacanish ca ma ni? —i nohiria bo nina.

²⁵ Jatsi Jesu yoati tsi chaninatsi Jerusalén ca nohiria bo niquë:

—¿Ja acascanai ca joni ma ni naa pa? ²⁶ Tsayacapa. Bëro tsi nohiria bo qui chanihi quiha ra. ¿Jëniriahax ja qui chaniyamahi ni noba chama bo pa? ¿Tonia Xabahamati Ibo ja nori ca cahëcahi ni sa? —i huësti huësti ca niquë.

²⁷ Jama,

—Oca ma xo tia. Naa joni coní yaca cahëqui noa, naa noqui tëquëta ra. Jama, Xabahamati Ibo jisiquino tsi jahuënia ja johai ca cahëyamaxëqui noa ra —nëa tsi nohiria huëtsa bo nëcaniquë.

²⁸ Jatsi arati xobó tsi Jesu nëcaniquë nohiria bo tiisimahi na:

—¿Ea cahëyoicanai? ¿Jahuënia ax ë joni ca cahëyoicanai? E joyamaniquë ë jocasni iqui na. Jama, ë raahacaniquë. Jabija ca tsi xo toa ëa raanish cato. Toa cahëyamaqui mato ra. ²⁹ Jama, toa cahëquia ja quima ë joni iqui na. Ea ja raaniquë ra —i nohiria bo qui Jesu niquë.

³⁰ Jatsi jodioba chama bo Jesu qui tsamicasniquë pë. Binoma quiha, jari jahuë rësoti xaba tsëquëyamani quëshpi na. ³¹ Jama, toá ca nohiria huëstima cabo Jesu qui chitiminiquë ra.

—Anomaria tsi xo naa joni jisti bo acaina ra. ¿Jënahuariaxo naa oquë ca jisti bo jaha no pasohai ca Xabahamati Ibobá ana? Ja tsi xo naa ra —i jaca niquë, ja qui chitimihí na.

Soldado bo raahacanina Jesu qui tsamiti

³² Nēca tsi Jesu yoati tsi nohiria bo baxēxēquē tsi quiha jodioba chama bá ja chanicanai ca nicaniquē rē. Jaha tsi pē soldado bo ja raacanicquē Jesu qui tsamiti. ³³ Japi Jesu nēcaniquē:

—Tana roha pistia no tsi mato bētaxēquia. Jaquirēquē ēa raanish ca qui jahari caxēquia. ³⁴ E cano tsi ēa mēraxēqui mato; mahitsa. Jasca, ē cahai ca qui canoma ixēqui mato ra —i jato qui Jesu niquē.

³⁵ Jatsi chaninabēquitsi jodiobo niquē:

—¿Jahuēnia cacatsi ni naa joni sa? “Mahitsa ēa mēraxēqui mato” ii quiha pa. ¿Tonia pais huētsa ca jodiobo qui cayamaxēhi ni? ¿Nohiria huētsa bo tiisimacatsi ni? ³⁶ ¿Jēnihi ni ja yoahana sa, “Ea mēraxēqui mato; mahitsa. E cahai ca qui canoma ixēqui mato” i ja quē no? ¿Jēnihi ni sa? —i jaca niquē.

Bēsomati Jēnē iquish cato

³⁷ Jabi jaroha ca fiesta bari ja ini quiha. Jodiobo qui oquē toa bari ini quiha. Toa bari tsi quiha Jesu niiniquē nohiria bo qui chanixēna. Pistiama ca jahué joi quiha.

—E qui jopaima xo tsohuēcara tēshinahaina. Bēsomati jēnē ja qui axēquia ra. ³⁸ “Tsohuēcara ē qui chitimino tsi jahué shina quima huahuaxēhi quiha bēsomati jēnē” ii quiha Quēnēhacanish cabo —nēa tsi Jesu nēcaniquē nohiria bo qui.

³⁹ Jabi Espiritu Santo yoati tsi chanihi Jesu ini quiha, naa chahahuacanaibo qui acacati cato.

⁴⁰ —Tonia Dios Chani bēhai ca tsi xo naa joni ra —i huēstima cabo niquē, Jesu chani nichax na.

Jasca,

—Nohiria Xabahamati Ibo tsi xo naa ra —i nohiria huētsa bo niquē.

⁴¹ Jama,

—Nohiria Xabahamati Ibo ma xo tia. Galilea mai ax joyamahi quiha jaha no pasohai ca Xabahamati Ibo ra. ⁴² Tsayacahuē. Belén, naa noba David yamabo racani cató tsi coxēhi quiha jaha no pasohai ca Xabahamati Ibo ra. David yamaba chahitaxocobo ixēhi quiha ra —nēa tsi quiha huētsa bo nēcaniquē.

⁴³ Ja iqui tsi jamēri jamēri ini quiha nohiria bá shinahaina Jesu yoati na. Huēstima cabo qui jia ja ini quiha, huētsa cabo qui yoi ja nori. ⁴⁴ Jasca, huēsti huēsti ca Jesu qui tsamicasniquē. Jama, jari ja qui ja tsamiyamacanicquē raquēhi na.

Jodioba chama bá chahahuanina

⁴⁵ Jatsi raahacanish ca soldado bo jahari bocanicquē jato jodioba chama bo qui. Jesu yama ja bēcani quiha.

Jatsi,

—¿Jēnixo tsi Jesu ma bēyamacana pē? —i soldado bo qui chama bo niquē.

⁴⁶ Jatsi,

—Yama tsi xo nēca ca chanihai cato ra. Jiaria tsi xo naa joní yoahaina ra —i soldado bo niquē quēbihi na.

⁴⁷ Jaha tsi jodioba chama bá jato raahaniquē:

—¿Mato ri ja paraha pa? ⁴⁸ ¿Japa noqui? ¿Toa joni chahahuahi ni noa, naa noqui fariseobo, noqui chama bo? Ayamaqui noa; ¿tsayacanaí? ⁴⁹ Jama xo nohiria bo pē. Dios Chani cahētimaxēni ca xo ra. Yoshihuahacanish cabo tsi xo naa nohiria bo ra —i soldado bo qui chama bo niquē.

⁵⁰ Jatsi Nicodemo, naa baquichá tsi Jesu qui canish ca chaniniquē chama bo qui. Jabi chama Nicodemo ini quiha jaa ri.

51 —Naa joni nicahaxma tsi ja qui quësoqui noa pë. ¿Noba yoba pasomaha ma ni naa no acaina? Jariapari ja acai ca no cahëxëti xo —i Nicodemo niquë.

52-53 Jatsi chama bá Nicodemo ri raahaniquë pë:

—¿Yoiria ca galileabo ma ni mia ra? Quënëhacanish cabo tsayahuë. Yama tsi xo Galilea ax johai ca Dios Chani bëhai cato ra —iquina.

8

Jochanish ca yoxa tsamihacanina

1 Fiesta quirëquë jato xobo qui nohiria boyocaniquë. Jama, Maca Olivo Ya qui Jesu caniquë. 2 Jatsi huëaquë tsi baquishmari tsi quiha jahari arati xobo qui ja bacaniquë. Jatsi ja qui nohiria tëquë bëcani quiha. Jatsi tsahoxo tsi quiha tiisimati Jesú chitahëhuaniquë. 3 Tiisimajahuano tsi quiha Dios yoba cahëxëni cabo, fariseobo, tihi cabá jochahuaxëni ca yoxa bëniquë Jesu qui; naa joni huëtša ya inish cato; naa bënë ma ca ya tsamihacanish ca yoxa quiha. Bëxo tsi quiha nohiria bësojó tsi yoxa ja nimacaniquë.

4 Jatsi Jesu qui ja chanicaniquë:

—Joni huëtša, naa jahuë bënë ma ya quiha naa yoxa iquë pë. No jisquë ra. 5 “Ja qui nohiria bá maxax niano. Namëhacati xo tocanaibo” ii quiha Moisés yamabo jahuë yoba ó no. ¿Japa mia ti? ¿Jënihai naa yoxa yoati na? —i jaca niquë Jesu qui.

6 Ja nëcacani quiha Jesu tanamaxëna. Jahuëcara ca ja pasomaha ca ja mërascasani quiha pë, ja qui quësocasquí na. Jatsi Jesu tëtöhaca tsi mai tsi huishatsijahuaniquë jahuë mëtsisí no. Quëbiyamaniquë Jesu.

7 Jatsi,

—¿Japa naa yoxa? ¿Jënihai? —iriatsi jaca niquë pë.

Jaha tsi Jesu niiniquë chanixëna. Chanipama tsi,

—Jariapari ja qui maxax niati xo tsohuëcara ca jochayama cato ra —i jato qui ja niquë.

8 Jatsi ja tëtötëquëhaca tsi mai tsi ja huishatëquëniquë. 9 Jahuë chani nica-pama tsi quiha huësti huësti tsi yoxa qui quësocanaibá jisbërianiquë. Jariapari bocaniquë yosibo. Jaquirëquë shinapaya bo bocaniquë. Jatsi jamëpistia tsi Jesu iniquë niihai ca yoxa ya. 10 Jatsi Jesu niitëquëniquë.

—¿Jahuënia ni mi qui quësocanaibo, yoxa? Yama tsi xo toa mi qui quësocatsai ca huësti cato pa —i yoxa qui ja niquë.

11 —Yama a. Boyocaquë pa, Ibobá —i yoxá niquë.

Jatsi,

—Mí qui quësoyamaquia ëa ri. Cata. Jaboqui rohari tsi jochayamahuë —i ja qui Jesu niquë.

Jodiobo qui Jesú joi mëranina

12 Jatsi arati xobó ca nohiria bo qui Jesu chanitëquëniquë:

—Maí ca nohiria Huëa ca ëa xo naa. Ea pi banahuahi tsi tsémó tsi coyamaxëhi quiha mato. Mato quinia bërohuaxëquia, naa Huëa ë nori cato. Nohiria Bësomati Ibo ca ëa xo naa —nëa tsi ja nëcaniquë.

13 Jatsi jodioba chama bá quëbiniquë:

—Mimë yoati tsi chaniqui mia pë. Mahitsa tsi xo toa mi yoahaina ra —iquina.

14 Jatsi,

—Emë yoati tsi ë chanipino tsi jari jabija xo noho chani ra, jahuënia ax ë joni ca ë cahëhai quëshpi na. Jasca, ë caxëhai ca cahëquia. Jama, jahuënia ax ë jonina, jahuënia tsi ë caxëhaina, tihi cabo cahëyamaqui mato ra. 15 Ea ma

cahëhai ca quëscahuaqui mato, nohiria quiniá tsi ma shinahai quëshpi na. Ja tsi xo toa ë pasomaha tsi xo mato chani. Toca tsi nohiria qui quësoyamaquia.
¹⁶ Quësohë-pino tsi jabija tsi xo toa ë quësohaina, ëmëpistia ax tsi ë quësoyamahai quëshpi na. Ea, ëa raanish cato, tihí caba tsi xo toa nohiria qui quësohaina.
¹⁷ Iriama tsi xo toa huësti roha ca joni jabija ca chanihaina. Oquë tsi xo dos. “Dos ca joni bo iti quíha” ¿iyamayamani mato yoba ra? “Jabija tsi xo dos ca joni ba chani, jasca ca ja chanicaquë no” ii quíha. ¹⁸ Jabi ëa yoati chanihai ca huësti ca ëa xo naa. Ea yoati chanihai ca huëtza tsi xo naa ëa raanish ca Jahëpa —nëa tsi jodioba chama bo qui Jesu nëcaniquë.

¹⁹ Jatsi Jesu ja nicacanicuë:

—¿Jahuënia ni mi ipa ra? —iquina.

Jatsi,

—Ea cahëyamaqui mato ra. Jasca, noho Jahëpa cahëyamaqui mato. Ea pi cahërohaquí tsi noho Jahëpa ma cahëquë aquë ra —i jato qui Jesu niquë.

²⁰ Arati xobó tsi Jesu nëcani quíha nohiria bo tiisimahi na. Nohiria parata jatu caja tahë tsi nií ja ini quíha. Jasca, Jesu qui ja tsamiyamacani quíha, jari jahué rësoti xaba tsëquëyamani quëshpi na.

“E caxëhai ca qui canoma xo mato” i Jesu nina

²¹ Jatsi nohiria bo qui Jesu chanitëquënicuë:

—Caxëquia. E cano tsi ëa mëraxëqui mato; mahitsa. Jatsi mato jocha ó tsi rësoxëqui mato rë. Jabi ë cahai ca qui canoma xo mato —i ja niquë.

²² Jatsi,

—¿Jahuë chanihi ni sa? ¿Jamë ixëhi ni sa? ¿Jëniriahax “E cahai ca qui canoma xo mato” i ja a sa? —i jodiobo niquë.

²³ Jatsi Jesú jato quëbiniquë:

—Maí ca nohiria bo xo mato. Jama, mana ax jonish ca ëa xo naa. Nëá racaqui mato. Nëá racayamahai ca ëa xo naa. ²⁴ Jabija tsi xo toa “Mato jocha ó tsi rësoxëqui mato” i ë ana. Xabahamati Ibo ë nori ca chahahuayamapihi tsi mato jocha ó tsi rësoxëqui mato ri —i jato qui Jesu niquë.

²⁵ Jatsi,

—¿Tsohuëcara ni mia ra? —i nohiria bo niquë.

Jatsi,

—¿Jënahuariahax “Tsohuëcara ni mia” icanai pë? Rëquë rohari tsi mato ë yoani quíha. ²⁶ Jari huëstima tsi xo toa mato yoati tsi ë yoahama cato, naa yoi ca ma acaina. Jama, ëa raanish cató ëa yoahai ca roha chaniquia. Emë yoati chaniyamaquia ra. Jabija tsi xo toa ëa raanish cato chani ra —i jato qui Jesu niquë.

²⁷ Jabi jahué Jahëpa Dios yoati tsi chanihi ja ini nori jodioba chama bá cahëyamani quíha.

²⁸ Jaha tsi,

—Jihui ó tsi ëa, naa Nohiria Baquë namëxëqui mato ra. Namëxo tsi jaha ma pasohai ca Xabahamati Ibo ë nori ca cahëxëqui mato ra. Toatiyá tsi ëmë ax tsi ë yonocoyamahai ca cahëxëqui mato, Jahëpá ëa tiisimani ca jahué bo roha ë yoahai quëshpi na. ²⁹ E bëtá xo ëa raanish cato ra. Ea jisbëriayamaxëhi quíha, ja qui jia ca ë aroha-arohahai quëshpi na —i ja niquë.

³⁰ Nëcajano tsi quíha huëstima cabo Jesu qui chitiminiquë.

Paquëmahacahax cabo, yonati bo

³¹ Jatsi ja qui chitimihai ca jodiobo qui Jesu chaniniquë:

—E tiisimahai ca nicapihi tsi noho rabētiria bo ixēqui mato ra. ³² Jabija ca cahēxēqui mato. Jocha quima mato paquēmāxēhi quiha jabija ca Chani —i ja niquē jodiobo qui.

³³ Jatsi,

—Abraham yamaba chahitaxocobo xo noa ra. Yama tsi xo toa noqui yonahaina. ¿Jēnahuariahax “Paquēmāxēqui mato” i mi na? —i Jesu qui jaca niquē.

³⁴ Jatsi Jesú quēbiniquē:

—Mato parayamaquia. Jocha yonati tsi xo toa jatiroha ca jochacanaibo. ³⁵ Jabi noitiria tsi xo yonati. Jahuē chama xobó tsi chitēroha-chitērohayamahi quiha, chama huētsa qui ja iniahacamitsa iqui na. Jama, jamēri tsi xo chama baquē. Jahuē jahēpa xobó tsi chitēroha-chitērohahi quiha. Chama huētsa qui iniahacatimāxēni quiha. ³⁶ Jasca, jocha quima Dios Baquē mato tsēcarohapino tsi shoma-shomaria ixēqui mato, naa chama baquē jascaria iquiina. ³⁷ Jabija. Abraham yamaba chahitaxocobo xo mato iquia ēa ri. Jama, jari mato qui yoi xo noho chani rē. Noho chani bicasyamaquí tsi ēa acasqui mato pē. ³⁸ Jatsi nicaparicana. Noho Jahēpá ēa jismani ca jahuē bo yoati chaniquia ra. Jama, toa chani nicacasyama xo mato pē, mato jahēpá yoba nicacasquí na —nēa tsi jodiobo qui Jesu nēcāniquē.

³⁹ Jatsi,

—Noho Jahēpa yoi tsi xo Abraham yamabo ra —i jaca niquē.

Jatsi,

—Abraham chahitaxocobo yoi bo irohapiquí tsi jia ca ma aquē aquē ra, naa ja ani jascaria. ⁴⁰ Jama, jaboqui ēa acasqui mato pē, jabija ca mato qui ē chāniquē no. Toca tsi Abraham yamabá ayamani quiha. ⁴¹ Jabi mato jahēpa yoi acai ca jascaria ca aqúi mato ra —i jato qui Jesu niquē.

Jatsi jodiobá quēbiniquē:

—Jia tsi no coniquē ra. Yoma bo ma xo noa. Noba Jahēpa yoi tsi xo Dios ra —iquiina.

⁴² Jato Jesú quēbiniquē:

—Dios pi mato jahēpa irohano tsi ēa ma noiquē aquē ra. Dios quima ax ē joniquē ra. Emēpistia tsi ē joyamani quiha. Jama, Diós ēa raaniquē. ⁴³ ¿Jēnahuariaxo ē yoahai ca jahuē bo cahēyamacanai pē? Noho chani nicacasyama xo mato iquia. ⁴⁴ ¿Tsayacanai? Yoshi-yoshiria tsi xo toa mato jahēpa yoi ra. Mato jahēpa jaha quēēhai ca acasqui mato. Rēquē rohari tsi ati ibo ja ini quiha. Quiamisxēniria quiha. Jabija ca chānitimāxēni quiha. Jahuē jabi tsi xo quiamis-haina ra. Quiati ibo-iboria tsi xo toa ra. ⁴⁵ Ja tsi xo toa jaboqui tsi jabija ca ē chanino tsi ēa chahahuayamaqui mato pē. ⁴⁶ ¿Jēnahuariahax tsi ē qui ma quēsōna? Jocha yama ca ēa xo naa. Jabija ca ē yoano tsi ¿jēnihax tsi ē qui chitimiayamacanai? ⁴⁷ ¿Tsayayamacanai? Dios Chani nicahi quiha Diós-na bo. Tocama xo mato rē. Dios baquē bo ma xo mato ra. Ja tsi xo toa Dios Chani nicayamaqui mato iquia —nēa tsi quiha jodiobo qui Jesu nēcāniquē.

Jesu quirēquē Abraham inina

⁴⁸ Jatsi jodiobá quēbiniquē caxaquí na:

—Dios cahētimaxēni ca carayana xo mia ra. Mia ri tsi xo toa yoshi jaya cato ra. ¿Jabija ma ni naa no yoahaina mia yoati na? —i Jesu qui jaca niquē.

⁴⁹ Jatsi,

—Yoshi yama ca ēa xo naa ra. Chanipama tsi Noho Jahēpa oquēhuaquia ra. Jama, mato tsi xo toa ēa ocahuahaina pē. ⁵⁰ Emē oquē bicasyama xo

ëa; jama tobi quiha huëtsá ëa oquëhuacatsaina. Ea mëbicansai ca tsi xo toa.
⁵¹ Nicaparicana. Mato parayamaquia ra. Rësopestiyamariaxëhi quiha noho chani nicacanaibo —nëa tsi jato qui Jesu nëcaniquë.

⁵² Jatsi jodiobá quëbiniquë:

—Jabija. Mia ri tsi xo yoshi jaya. Rësoniquë Abraham ra. Rësoyoniquë Dios Chani yoanish cabo ri. Jama, “Rësoyamapistiariaxëhi quiha noho chani nicahai cato” ¿i mi a pa? ⁵³ ¿Abraham yamabo oquë ni mia pa? Ja rësoniquë ra. Rësoyoniquë jaquirëquë ca Dios Chani yoanish cabo ri. ¿Jënahuaría raca jato oquë ca mi ina? —i jaca niquë.

⁵⁴ Jatsi Jesú jato quëbiniquë:

—Emë ë oquëhuapino tsi iriama tsi xo noho oquë ra. Jama, noho Jahëpa tsi xo toa ëa oquëhuahai cato, naa noba Jahëpa ma quënahai ca jascaria cato. ⁵⁵ Dios cahëyamaqui mato rë. Jama, Dios cahëhai ca ëa xo naa. “Dios cahëyamaquia” irohapihi tsi quiaxëni ca ë iquë aquë pë, naa quiaxëni cabo ma nori jascaria. ⁵⁶ Jasca, ë johai ca xaba mato jahëpa Abraham yamabá jiscasni quiha. Jasca, ë noho ja pasoni quiha. E noho pasohi tsi ja rani-ranini quiha —nëa tsi jato qui Jesu nëcaniquë.

⁵⁷ Jatsi jodiobá quëbitëquëniquë:

—Jari cincuenta años ma xo mia ra. ¿Jënahuariaxo raca Abraham mi jisni? —i Jesu qui jaca niquë.

⁵⁸ Jatsi,

—Mato parayamaquia. Abraham conox pari no tsi ë iniquë ra —i Jesu niquë.

⁵⁹ Jatsi jodiobá maxax bo topiniquë Jesu axëna. Jama, jato quima Jesu paxaniquë. Paxaxo tsi quiha jato arati xobo ja jisbayaniquë.

9

Bëco ca joni Jesú jënimahuanina

¹ Copama tsi quiha bëco ca joni Jesú jisniquë. Jahuë coni ca bari rohari tsi quiha bëco ja iniquë.

² Jatsi,

—¿Jënihax tsi bëco tsi ja coní? ¿Tsohuë jochani? ¿Naa joni ní? ¿Jahuë nabo ní? —i jaca niquë Jesu nicahi na.

³ Jatsi Jesú quëbiniquë:

—Jochayamaniquë naa joni. Jasca, jochayamaniquë jahuë nabo ri. Bëco tsi ja coniquë ra, ja jënimahuahacahai cató tsi Diós jahuë chama jismano iquish na. ⁴ Jatsi ëa raanish cato yonoco ë ati xo. Dios bax yonocoti xaba tsi xo naa ra. Joxëhi quiha baquicha. Ja jono tsi yama tsi xo toa Dios bax ë yonocoxëhaina. ⁵ Jama, maí ca nohiria bo yahí tsi maí ca nohiria ba Huëa ca ëa xo naa —nëa tsi quiha Jesu nëcaniquë.

⁶ Chanihax maí tsi Jesú coshohaniquë. Coshohaxo tsi quiha jahuë quëyonó tsi matsa ja biqui-biquihaniquë. Jatsi matsacá tsi joni bëro ja sinoniquë.

⁷ Sinohax,

—Siloé icanaí cato ca jënë tsi bëchocota —i bëco ca joni qui Jesu niquë.

Jatsi joni caniquë. Bëchocohax tsi quiha ja taistëquëniquë. Jënimá jahari ja joni quiha. ⁸ Ja joquë tsi quiha ja tahë ca racacanaibo, toa joni cahëxëni cabo, tihí cabo ratëniquë.

—¿Parata bënaxëni ca tsahonish ca joni ma ni naa pa? —i jaca niquë.

⁹ —¿Oca ma ní? —i jato rabë roha niquë.

Jatsi,

—Jama xo toa. Ja jisiria quiha —i nohiria huëtsa niquë.

Jatsi,

—Toa joni xo ëa ra —i parata bënaxëni ca niquë.

¹⁰Jatsi,

—¿Jënahuariaxo raca mi bëro jënimahuahacaha pa? —i ja qui nohiria bo niquë.

¹¹Jatsi joní quëbiniquë:

—Tsohuëcara ca, naa Jesu icanai cató matsa biqui-biquihaquë. Jatsi noho bëro ja sinoquë pa. Sinohax, “Siloë ca jënë tsi bëchocota” i è qui ja quë. Jatsi jënë qui è caquë. Bëchocohax ë taisquë ra —i jato qui joni niquë.

¹²Jatsi,

—¿Jahuënia ni naa joni ra? —i nohiria bo niquë nicahi na.

—¿Jahuënia cara ca tia? Cahëyamaquia rë —i joni niquë.

¹³Jatsi bëco inish ca joni nohiria bá boniquë jodioba chama bo qui. ¹⁴Jabi joiti bari ja ini quiha, naa matsacá tsi Jesú joni bëro taismaquë no. ¹⁵Jatsi fariseobá, naa jodioba chama bá toa joni nicaniquë jato ri:

—¿Jënahuariahax mi taismahacaha sa? —iquiina.

Jatsi joní quëbiniquë:

—Noho bëró tsi matsa naa joní janaquë tsi è bëchocoquë. Jaboqui taisquia ra —iquiina.

¹⁶Jatsi,

—Dios cahëyamahi quiha naa joni ra. Joiti barí tsi yonocohi quiha pë —i jato rabë roha niquë.

Jama,

—Jistiria naa joní aquë ra. ¿Jënahuariaxo raca jochahuaxëni ca joní nëca ca jisti ana? Tonia Dios cahëhi quiha —i fariseobo huëtsa bo ni quiha.

¹⁷Jatsi bëco inish ca joni qui chama bo chanitëquënikuë:

—¿Japa mia ti? ¿Jënihai mia ri naa joni yoati na? ¿Tsohuë ni naa joni, naa mia taismahax cato? —i jaca niquë.

Jatsi taismahacanish cató quëbiniquë:

—Dios Chani yoati ibo tsi xo naa joni iquia —iquiina.

¹⁸Jabi bëco ja iqui ca jodioba chama bá chahahuayamani quiha pë. Jaha tsi jahuë jahëpa, jahuë jahëhua, tihi cabo ja bënacanicuë jato nicaxëna.

¹⁹—¿Mato baquë ni naa? ¿Bëco tsi ja coní? ¿Jënahuahax tsi jaboqui taisti mëtsa ja iqui? —i jahuë nabo qui jaca niquë.

²⁰Jatsi jahuë nabá quëbiniquë:

—Noba baquë yoi xo naa. Jabija, bëco tsi ja coní quiha. ²¹¿Jënahuariahax ja taismahacaha sa? ¿Tsohuëcaracá taisamaha sa? Cahëyamaqui noa ra. Nicacana, shina coshi xo. Jamë xo mato ja yoano —i jahuë jahëpa niquë.

²²Nëca tsi jahuë nabo chanini quiha, jodioba chama bo qui raquëhi na. Jodioba catiti xobo quima ja niahacasyamacani quiha. Jabi “Ni-ahacati quiha tsohuëcara ca ‘Jaha no pasohai ca Xabahamati Ibo xo naa joni’ icanaina” i jodiobo ni quiha. ²³Jabi ja tsi xo toa “Shina coshi xo noba baquë. Nicacana” i jato qui jahuë nabo ni quiha. Jasca, arati xobo quima ja niahacasyamacani quiha. ²⁴Jatsi jodioba chama bá bëco inish ca bënatequënikuë:

—Quiayamahuë. Jochahuaxëni ca Jesu nori ca cahëqui noa ra —i ja qui chama bo niquë.

²⁵Jatsi,

—¿Oca ma ni? Cahëyamaquia. Jabi bëco ca joni è iquë; jaboqui taisquia ra —i bëco inish ca niquë.

²⁶Jatsi,

—¿Jēnahua mi bax jahuaha? ¿Jēnahuaxo tsi mia ja taismaha? —i tēquē chama bo niquē.

²⁷ Jatsi bēco inish cató jato quēbitiquēniquē:

—Ja aca mato ē yoaquē ra. ¿Ea ma nicayamacana? ¿Tonia jahuē rabēti bo manēcascanai pa? —iquiina.

²⁸ Jatsi toa joni ja raahacaniquē pē:

—Jesu rabēti xo mia pē. Jama, Moisés yamabo banahuacanaibo xo noa.

²⁹ Moisés yamabo qui Dios chanini ca cahēqui noa. Naa Jesu cahēyamaqui noa. Tsohuēcara quima jahuē chama ja bini cahēyamaqui noa —i ja qui jaca niquē.

³⁰ Jatsi joní jato quēbiniquē:

—Anomaria tsi xo toa naa joní acana. Noho bēro ja jiahuaquē ra. Jama, ¿jahuēnia ax ja joní ca cahēyamacanai pa? ³¹ Jochacanaibo nicayamahi quiha Dios ra. Jama, ja qui aracanaibo, jahuē yoba bo nicacanaibo, tihi cabo nicahi quiha. ³² Mai nēhohuahacaniya rohari tsi bēco conish ca jēnimahuahacahai ca nicahama ini quiha. ³³ Dios quima joyamarohapihi tsi ati mētsama naa joní iquē aquē ra —nēa tsi bēco inish ca nēcaniquē jodiobo chama bo qui.

³⁴ Jatsi,

—Jochahuaxēni mi coniquē ra. ¿Noqui tiisimahi ni mia pa? —i jaca niquē. Jatsi quiha jato arati xobo quima toa joni ja niacaniquē pē.

Bēco cabo jascaria xo jochacanaibo

³⁵ Jabi jato arati xobo quima ja niahacani ca Jesú nicaniquē. Nicaxo tsi quiha joní mērahi ja caniquē. Bichi tsi quiha,

—¿Nohiria Baquē qui chitimihai? —i ja qui Jesu niquē.

³⁶ Jatsi joní quēbiniquē:

—¿Tsohuē ní toa, Taitá? Toa joni qui chitimicasquia ra —iquiina.

³⁷ Jatsi,

—Mi jisquē ra. Ja tsi xo toa mi bēta chanihai cato —i Jesu niquē.

³⁸ —Chitimiquia, Ibobá —i joní niquē.

Jatsi Jesu bēsojó tsi quiha ja mēniquē.

³⁹ Jatsi Jesu chaniniquē:

—Naa mai qui ē joniquē nohiria ba jocha bērohuaxēna. Bēco cabo, naa jochacanaibo mēbicasquia ra, xabahamati quinia ja jiscano. Jama, ēa iqui tsi bēconayoicani quiha “Bēco yama xo noa” icanaibo. Jato jocha jisyamacani quiha rē —nēa tsi Jesu nēcaniquē.

⁴⁰ Jatsi,

—¿Bēco ni noa pa? —i toa ca chama rabē roha bo niquē, ja yoani ca nicahax na.

⁴¹ Jatsi Jesú quēbiniquē:

—Jabija ca cahēyamarohapihi tsi quēsohacatima ma iquē aquē. Jama, tobi mato jocha rē, “Bēco yama xo noa” ma iquii iqui na —nēa tsi quiha Jesu nēcaniquē jato qui chanihí na.

10

Oveja panē chani

¹ —Mato parayamaquia —i Jesu niquē—. Oveja yomaxēni ca tsi xo toa oveja panē caiti qui jicoyamahai cato. Iti huētsá tsi matarahi quiha pē.

² Jama, panē caiti qui jicohi quiha oveja ototi ibo. ³ Ja jono tsi quiha ja bax caiti japēcahi quiha panē obēso cato. Jicoxo tsi jato jané tsi jahuē oveja bo quēnahi quiha. Jabi iboba joi cahēhi quiha oveja bo. Quēnaxo tsi cacha jato rēquēninihi quiha. ⁴ Paquēmahax jato bēbo cahi quiha ibo. Jatsi, banahuacani

quilha jahuë oveja, jahuë joi cahëquí na. ⁵ Joni huëtsa banahuayamacani quiha. Ja quima jabacaxëceni quiha jahuë joi cahëyamahi na —nëa tsi Jesu nëcaniquë.

⁶ Naa chani pistia Jesú yoaniquë nohiria bo mëbixëna. Jama, ja yoani ca nohiria bá cahëyamani quiha.

Ototi Ibo jiaxëni cato

⁷ Jatsi quiha jahuë chani Jesú bërohuaniquë ja cahëyoicano. Ja nëceni quiha: —Mato parayamaquia. Oveja panë Caiti ca ëa xo naa ra. ⁸ Yomaxëni cabo jascaria tsi xo ëa bëbo bëcanish cabo, naa mahitsa ca tiisimacanaibo. Jato qui nicayamahi quiha noho oveja yoi bo. ⁹ Jabi Caiti xo ëa ra. Xabahamahacaxëti xo toa tshuëcara ë noho jicoti cato. Jahá bësoxëquia. Toa shomahuaxëhi quiha Dios. Yamaxëhi quiha toa ja naris-haina iquia.

¹⁰ ‘Jama, oveja yomahi johi quiha yomaxëni cato. Joxo tsi oveja namëhi quiha. Quëyohi johi quiha rë. Jabi tocahi quiha mahitsa ca tiisimacanaibo pë. Jama, ëa ti tsi xo toa nohiria bësomahi johaina, oquë tsi ja bësocano iquish na. ¹¹ Jabi oveja ototi ibo jiaxëni ca ëa xo naa. Emë aapiquia oveja bax nati.

¹² Jama, oveja jishëriahi quiha yonati, johai ca cama jisi na. Jishopë, jato obëso ca ma xo toa. Oveja ibo ma quiha. Ja jabano tsi oveja píhi quiha camano. Jatsi jato pacanamahi quiha rë. ¹³ Jasca, parata quëshpi roha yonocohi quiha yonati. Oveja noiyamahi quiha rë. Jabi ja tsi xo toa jabahi quiha yonati, cama joquë no. ¹⁴⁻¹⁵ Jama, oveja ó bësoti jiaxëni ca ëa xo naa. Noho oveja cahëquia, naa ëa noho Jahëpá cahëhai jascaria. Jascaria, ëa cahëceni quiha noho oveja, naa noho Jahëpa ë cahëhai jascaria. Oveja bax emë aapiquia nati. ¹⁶ Jasca, oveja huëtsa bo jaya xo ëa ra. Carayana ca nohiria bo ca xo. Jato ri rëquëninixëquia. Noho joi qui nicacaxëceni quiha jato ri. Jatsi huësti ca nohiria maxo icaxëceni quiha jodiobo, carayanabo tëquë. Huësti ca ototi ibo jayacaxëceni quiha.

¹⁷ ‘Jabi ëa noihi quiha noho Jahëpa, oveja bax nati emë ë acai iqui na. Rësohax bësetëquëxëquia. ¹⁸ Jabi yama tsi xo toa jahuë chamá tsi ëa namëti mëtsa cato. Jama, caxacanaibo qui emë aquia nati. Noho chamá tsi emë aquia nati. Jasca, noho chamá tsi bësetëquëxëquia. Jabi noho Jahëpá ëa raaniquë nohiria bo bax nati —nëa tsi quiha nohiria bo qui Jesu nëcaniquë.

¹⁹ Jatsi Jesú yoani ca iqui tsi jodiobo mapëxënaniquë. Rabë ca shinahai ca ja jayacani quiha Jesu tahëxo na. Jatsi,

²⁰ —Yoshi jaya xo naa joni ra. Yoyoxëni quiha. ¿Jëniriexo raca ja qui nicacanaí pë? —i jodio huëstima cabo niquë.

²¹ Jama,

—Nëca tsi chaniti mëtsama xo yoshi jaya cato ra. ¿Jënahuariexo raca yoyoxëni cató joni bo taismana? —i jodiobo tëxë bo niquë ja yoati na.

Jodiobá Jesu chahuayamanina

²² Jabi Jerusalén tsi quiha jodiobo mani iniquë. Dios qui jamë aquëquëti fiesta ja ini quiha. Jatiroha ca xënipá tsi quiha naa fiesta ja i-ipaocani quiha, matsitiyá no. ²³ Toatiyá tsi quiha arati xobó tsi co-cohi Jesu iniquë, naa Salomón Portal icanai cató no. ²⁴ Co-cojano tsi quiha jodioba chama bo ja qui quëtsoniquë ja qui chanicatsi na.

—¿Jaha no pasohai ca Xabahamati Ibo ni mia sa? Bëro tsi noqui yoahuë. Yosanaqui noa ra. ¿Jëmino noqui yoahai sa? —i Jesu qui jaca niquë.

²⁵ Jatsi Jesú jato quëbiniquë:

—Mato ë yoahitaquë ra. E yoaquë tsi ëa chahuayamahitaquë mato pë. Ea yoati tsi jabija ca chanihi quiha ë acai ca jisti bo. Jabi naa jisti bo aquia

noho Jahëpa chamá no. ²⁶ Jama, ëa chahahuayamaqui mato rë, noho oveja ma nomari iqui na. ²⁷ Noho joi nicahi quiha noho oveja yoi bo. Jasca, noho oveja bo cahëquia. Ea banahuacani quiha. ²⁸ Jasca, jato bëso-bëso-pamaxëquia. Bënotimaxëni ca xo. Jabi yama tsi xo toa ë quima jato tsëcati mëtsa cato ra. ²⁹ Jabi ë qui jato noho Jahëpá aniquë, jato ó ë bësono. Jatiroha cabo oquë tsi xo noho Jahëpa ra. Jabi yama tsi xo toa noho Jahëpa quima jato tsëcati mëtsa cato iquia. ³⁰ Jasca, ëa, noho Jahëpa, tihi ca tsi xo huësti roha cato —nëa tsi Jesu nëcaniquë.

³¹ Jatsi pë jodiobá maxax bo topitëquëniquë axëna.

³² Jatsi Jesú jato quëbiniquë:

—Jisti huëstima cabo ë aquë mato bax na jisti. Ja acacaniquë noho Jahëpa chamá no. ¿Jëni ca jisti ji axëni ca quëshpi tsi ëa acascanai pë? —iquiina.

³³ Jatsi quiha jodiobá quëbiniquë:

—Mi acai ca yonoco jia ca quëshpi tsi mia acasyamaxo noa; jama Dios mi ocahuahai quëshpi ja nori. Yoi tsi xo toa mi chanihaina ra. Jasca, Dios manëcasqui mia pë, joni roha mi nori —i jaca niquë.

³⁴ Jatsi Jesú quëbiniquë:

—Yoi ma xo ë chanihana ra. Quënëhacanish cabo ó tsi “dios bo” mato rëquëyamabo quënëhacani quiha, “Dios bo xo mato” i jato qui Dios quë no. ³⁵ Quiayamahi quiha Dios Chani ra. “Dios bo” ja quënëhacani quiha, naa Dios Chani bicanish cabo. Dios bo xo nohiria tëquë; jahuë jabi ja jayacana iqui na. ³⁶ Japi “Dios baquë xo ëa” iti mëtsa xo ëa ri ra. Jabi noho Jahëpa Diós ëa biha ca tsi mai qui ëa ja raaniquë. Jatsi, ¿jënahuariahax raca “Dios ocahuahai mia pë” i ë qui ma na, “Dios Baquë xo ëa” i ë quë no? ³⁷ Noho Jahëpa yonoco pi ë ayamano tsi ëa chahahuayamacana. ³⁸ Jama, jahuë yonoco pi ë ano tsi ë acai ca jisti bo chahahuacana, ë qui ma chitimiquë mari. Noho jisti bo chahahuapiqui tsi ë nohó Jahëpa iquiina, jahá ë iquiina, tihi cabo cahëxëqui mato tia —nëa tsi Jesu nëcaniquë.

³⁹ Jatsi Jesu qui ja tsamitëquëcscaniquë namëxëna. Jama, jato quima ja paxaniquë ra. ⁴⁰ Paxahax tsi quiha ani Jordán Jesú shitaniquë. Shitahax toa tsi quiha, naa jariapari ca Juárez nohiria bo ashimani cató tsi ja chitëniquë.

⁴¹ Toatiyá tsi quiha Jesu qui huëstima cabo bëcaniquë.

—Jisti bo Juárez ayamaniquë. Jama xo naa joni ra. Ariahti quiha ra. Naa joni yoati tsi jabija ca Juárez yonani quiha —i nohiria bo niquë.

⁴² Toá tsi quiha huëstima cabo ja qui chitimiquë.

11

Lázaro rësonina

¹ Jabi iquihi quiha Lázaro iniquë rë. Betania yacatá tsi ja racani quiha jahuë yoxacabo ya; naa María, Marta, tihi cabo ya. ² Jabi Iboba tahë qui perojomë japanish ca María tsi xo naa. Jasca, jahuë boó tsi María Jesu tahë masani quiha. Toatiyá tsi iquihi jahuë jonica ini quiha. ³ Jaha tsi quiha Jesu qui jahuë yoxacabá chani raaniquë:

—Iquihi quiha mi rabëtiria rë, Ibobá —iquiina.

⁴ Jato chani nichahax,

—Iquihi quiha Lázaro rë —i Jesu niquë jahuë rabëti bo qui—. Jama, rësoyamaxëhi quiha. Iquihi quiha, jia tsi Dios yoati tsi nohiria bo chanino iquish na. Dios Baquë oquë jismahacati xo jahá no —i ja niquë.

⁵ Jabi Marta, jahuë noma María, Lázaro, tihi cabo Jesú noini quiha. ⁶ Jabi Lázaro iquihai ca yoati tsi nichahax jato xobo qui Jesu cayamatapiniquë pa. Jari dos bari no tsi quiha ja chitëniquë ja ini cató no.

⁷ Jaquirëquë quiha,

—¿Jahari jodioba mai qui canomani, naa Lázaro racahai ca qui? —i jahuë rabëti bo qui Jesu niquë.

⁸ Jatsi jahuë rabëti bá quëbiniquë:

—Mia manacani quiha pë jodioba chama bo. Maxaxá tsi mia acascani quiha pë. ¿Jahari catëquëhai pa? —iquiina.

⁹ Jatsi Jesú jato quëbiniquë:

—Jabi Díos ëa raaniquë jahuë yonoco ati. Jari jatihuahama xo noho yonocoti xabaca ra. Jasca, yama tsi xo toa ëa ati mëtsa cato jaboqui. Jari jatihuahama quiha noho yonocoti xabaca iquia. ¹⁰ Jama, Díos bax noho yonocoti xaba jatiquë tsi ë qui tsamixëhi quiha ë qui caxacanaibo —nëa tsi Jesu nëcaniquë.

¹¹ Jatsi,

—Oxa xo Lázaro rë. Jaha bësomahi caquia ra —i jato qui ja niquë.

¹² Jatsi,

—Oxapihi tsi chamaxëhi quiha tia, Ibobá —i jaca niquë nichahax na.

¹³ Jama ja rësohitaha yoati tsi Jesu chanihi ini quiha. Jama, Lázaro oxahai ca ja quëscahuacani quiha; oxajano mari. ¹⁴ Jatsi bëroria tsi jato qui Jesu chaniniquë:

—Nahitaquë Lázaro rë. ¹⁵ E qui jia tsi xo ja bëta ë yamahitahana ja rësoquë no. Ja iqui tsi oquëxëhi quiha ë qui ma chitimihaina ra. ¿Jisi canomani? —i jato qui ja niquë.

¹⁶ Jatsi,

—¿Jesu ya canomani, ja bëta rësoti? —i Tomás niquë jahuë rabëti bo qui.

Nohiria Bësomati Ibo

¹⁷ Betania qui cahëxo tsi quiha naama, cuatro bari no tsi ja maihuahacani nori ca Jesú nicaniquë. ¹⁸ Jabi Betania basima Jerusalén ini quiha. Cariama quiha; una hora nama. ¹⁹ Jaha tsi Jerusalén ax huëstima ca jodiobo bëcaniquë, Marta, María, tihi cabo bëpasimaxëna, jato jonica rësohitaha iqui na. ²⁰ Jatsi Jesu johai ca Martí nicaniquë. Nicaxo tsi quiha Jesu bëchahi ja caniquë. Cayamaniquë María. Xobó tsi ja chitëni quiha. ²¹ Jesu bëchahax,

—Nëá pi mi rohano tsi noho jonica rësoyamaquë aquitaquë rë, Ibobá. ²² Jabi jaboqui jahuëcara ca Díos mi bënahai ca mi qui axëhi quiha tia —i Jesu qui Marta niquë.

²³ Jatsi,

—Bësotëquëxëhi quiha mi jonicato ra —i Jesu niquë.

²⁴ —Jabija; toca xo tia. Jaroha ca barí tsi bësotëquëxëhi quiha, naa jatiroha cabo bësotëquëxëquë no —i Marta niquë.

²⁵ Jatsi Jesú quëbiniquë:

—Rësonish cabo Bësomati Ibo ca ëa xo naa ra. Jabi bësotëquëxëhi quiha ë qui chitimihai ca bësoyama cato. ²⁶ Bëso-bësopaoxëhi quiha tshuëcara ca ë qui chitimihai cato. Díos quima aquëquëmahacatimaxëni ixëhi quiha. ¿Jabija ma ni, Martí? —i ja qui Jesu niquë.

²⁷ Jatsi,

—Jabija xo ra, Ibobá. Díos Baquë, naa nohiria bo jaha pasohai ca Xabamati Ibo ca mia xo naa —i Marta niquë.

Jesu arantina

²⁸ Chanihax jahuë noma bënahi Marta caniquë. Cahax,

—Joquë Maestro ra. Mia jiscatsi quilha —i ja qui Marta niquë, baxëxhi na.

²⁹ Nicachax joitapi María niquë Jesu qui caxëna. ³⁰ Jari yaca cacha Jesu ini quilha, naa Marta ja bëchani cató no. ³¹ Jabi María jisbayahai ca jisi tsi toá ca jodiobá banahuaniquë jato ri, naa xobó ca María bëpasimacanaibo. Ja banahuacani quilha, Lázaro maí tsi ja aracatsai quëscahuquí na. ³² Jatsi Jesu qui María cahëniquë. Cahëhax jatahë tsi quilha ja mëniniquë. Jatsi,

—Nëá pi mi rohano tsi noho jonica rësoyamaquë aquitaquë rë, Ibobá —i María niquë.

³³ Araconaniquë María rë. Ara-araniquë ja bëta bëcanish ca jodiobo ri. Jaha tsi Jesu cohuërianiquë.

³⁴ Jatsi,

—¿Jahuënia ni jahuë mai? —i Jesu niquë.

—Jisi jopa —i jaca niquë.

³⁵ Jatsi aratsi Jesu niquë jaa ri. ³⁶ Jatsi,

—Tsayacapa. Lázaro ja noini quilha —i jodiobo niquë.

³⁷ Jatsi,

—¿Bëco cabo ja taismayamayamani? ¿Tonia rësohai quima Lázaro jënëmati mëtsa ja iyamayamahitaha? —i huësti huësti ca niquë.

Lázaro bësotëquëmahacantina

³⁸ Cohuëriahax Lázaro maí qui Jesu caniquë. Jabi macaná ca quini tsi ja maihuahacani quilha. Jasca, jahuë maíquini qui maxax चाहिताखेंनि tarahacani quilha japati. ³⁹ Jatsi,

—Tori maxax taracana —i nohiria bo qui Jesu niquë.

Jatsi,

—Pisi quilha, Ibobá. Ja rësohitaquë. Cuatro bari tsi quilha —i ja qui Marta niquë, naa rësohitahax cato yoxacato.

⁴⁰ Jatsi Jesú quëbiniquë:

—“E qui chitimipiqui tsi Dios chama jisxëqui mia ra” ¿iyama mi qui ë a? —i quiina.

⁴¹ Jatsi nohiria bá bahama maxax taraniquë. Jatsi nai qui Jesú tsayahaca tsi jahuë Jahëpa qui ja chaniniquë:

—Ea nicaqui mia, noho Jahëpá. Ja quëshpi tsi “Gracias” iquia. ⁴² Ea mi nicarohahai ca cahëquia. Jama, naa nëá ca niicanai ca nohiria bax bëro tsi ë chaniquë, ëa mi raani ca ja cahëcano —nëa tsi jahuë Jahëpa qui Jesu nëcaniquë.

⁴³ Jatsi Jesú quënaniquë:

—Huajahuë, Lazaró —iquiina.

⁴⁴ Jatsi rësonish ca Lázaro huajaniquë. Raití tsi jahuë tahë bo, jahuë mëquë bo, tihí cabo yabohacani quilha. Jasca, jahuë mapo ri yabohacani quilha raití no. Jatsi,

—Yaboco ca mëristsacana. Ja cano ra —i jato qui Jesu niquë.

Jodioba chama bá Jesu acasnina

Mateo 26.1-5; Marcos 14.1-2; Lucas 22.1-2

⁴⁵ Jabi Jesú ani ca huëstima ca jodiobá, naa María jisi bëcanish cabá jisniquë. Jisi tsi quilha ja qui ja chitimicaniquë. ⁴⁶ Jama, jato huësti huësti cabo bocaniquë Jesú ani ca yoati tsi fariseobo qui yoaxëna. ⁴⁷ Jatsi arati ibo ba chama bo, fariseobo, tihí cabo jato jodioba chama bá quënaniquë, jato bëta chaninaxëna.

—¿Jēnahuariaxēhi ni noa rē? Jisti yoi bo aqui quiha naa joni ra. ⁴⁸ Naa joni pi no jēnyamano tsi chahahuaxēhi quiha nohiria tēquē pē. Naa Jesu pi ja chahahuacano tsi joxēhi quiha romanoba soldado bo tonia, noba arati xobo potaxēna. Jatsi noqui quēyocaxēcani quiha ra tonia —nēa tsi chama bo nēcaniquē.

⁴⁹ Jatsi chanitsi jato huēsti ca niquē, naa Caifas icanai cato. Jabi toa xēni no tsi quiha jato arati ibo-iboria ja inì quiha. Jatsi,

—¿Jēnahuariacascanaì pē? ⁵⁰ Oquē tsi xo huēsti ca joni nohiria bo bax rēsohaina iquia. ¿Jesu tahēhax tsi quēyohacaxēti ni noba maì ca nohiria bo ra? Ja rēsono iquia —nēa tsi jato qui Caifás nēcaniquē.

⁵¹ Jabi jamē yoi tsi chama Caifás chaniyamani quiha. Jama, toa xēni no tsi quiha arati ibo ba chama ja inì iqui tsi Dios quima jahuē chani joni quiha. Ocapixēti ca jahuē bo ja chanini quiha. “Noqui jodiobo ratixēhi quiha naa joni ra nati” i ja ni quiha. ⁵² Jasca, “Dios xocobo, naa pacanamahacanish ca carayanabo ri catiaxēhi quiha, huēsti ca nabo amaxēna” i ja ni quiha. ⁵³ Jaha tsi toa bari rohari tsi jodioba chama bá Jesu acasni quiha pē.

⁵⁴ Japi nohiria xērēquē tsi quiha bēro tsi Jesu coyamani quiha. Toa chama bo iqui tsi quiha jodioba maì ja jisbayani quiha. Jisbaya tsi xaba basima ca qui ja cani quiha chitēxēna. Toá tsi quiha Efraín icanai ca yacatá tsi ja chitēniquē jahuē rabēti bo ya.

Pascua fiesta chitahēnina

⁵⁵ Jabi basima jodioba pascua fiesta ini quiha. Jabi fiesta chitahēnox pari no tsi huēstima ca nohiria Jerusalén qui bocaniquē jianati jabi axēna. ⁵⁶ Arati xobó tsi catihax Jesu yoati tsi ja chaninabēquicaniquē. Jesu mērahi ja icani quiha. Nicahi tsi,

—¿Japa? ¿Pascua fiesta qui joyamahi ni Jesu? —i nohiria bo niquē jiscascanaìna.

⁵⁷ Jabi jodioba chama bá Jesu bicasniquē pē ja qui tsamicasquí na. Jaha tsi, —Jesu jono tsi noqui yoacaxēcahuē —i nohiria bo qui jaca niquē.

12

Perojomé tsi Jesu tahē ashimahacanaìna

Mateo 26.6-13; Marcos 14.3-9

¹ Toatiyá tsi quiha pascua fiesta tsēquēti basima iniquē. Seis bari tsi chitahēpaima ja inì quiha. Jatsi Betania qui Jesu caniquē, naa Lázaro xobo qui, naa Jesús bēsotēquēmani ca joni xobo qui. ² Toa ax tsi quiha Jesu bax oriquiti shomahuahacaniquē. Jato taahi María ini quiha. Jasca, Jesu ya oriquihi Lázaro ini quiha jaa ri. ³ Jatsi nardo icanai ca perojome copixēni cató tsi quiha Mariá Jesu tahē ashimaniquē. Ashimaxo tsi quiha jahuē boó tsi jahuē tahē ja masaniquē. Jatsi xobó tsi jahuē chopish rēamēni quiha. ⁴ Jatsi Judas Iscariote, naa Jesu rabēti chaniniquē. Jabi jodioba chama bo qui Jesu mēanish ca ja inì quiha. Jatsi,

⁵ —¿Jēnixo tsi naa perojome iniyamahacaha pa? Copixēni quiha. Ja iniahacarohapino tsi huēstima ca parata no biquē aquē rē, noitiria cabo ati ra —i ja niquē.

⁶ Jabi nēca tsi Judas chanini quiha, parata yomaxēni ca ja inì quēshpi na. Noitiria cabo ja noiyoiyamani quiha. Jasca, Jesu rabēti ba parata obēso ca ja inì quiha pē. Jaha bēsoquí tsi quiha ja yomapaoni quiha.

⁷ Jatsi Jesu chaniniquē:

—Jënëmayamacana. Noho maihuati xaba bax yoxá ano. ⁸ Mato bêtarihaxëhi quiha noitiria cabo. Jama, mato bêtayamarohahai ca ëa xo naa ra —i ja niquë.

⁹ Jatsi Betaniá ca Jesu ini ca Jerusalén ca nohiria bá nicaniquë. Nicañax toa tsi quiha ja bocaniquë Jesu jisi na. Nohiria tirixëni quiha. Jasca, Lázaro ri, naa bësotëquëmahanish ca ja jiscascani quiha. ¹⁰ Jaha tsi Lázaro ri arati ibo ba chama bá acasniquë. ¹¹ Jabi Lázaro bësotëquëmahanici iqui tsi huëstima ca jodiobá jato rëquëniniti ibo bo jishëriani quiha Jesu banahuaxëna. Jishëria tsi quiha Jesu qui chitimitsijaca-niquë.

Jerusalén qui Jesu jiconina

Mateo 21.1-11; Marcos 11.1-11; Lucas 19.28-40

¹² Huëaquë tsi quiha Jerusalén qui Jesu johai ca nohiria bá nicaniquë, naa pascua fiesta bëcanish cabo. ¹³ Nicaxo tsi quiha xëbini pëhi jascaria cabo ja bicaniquë bahi poohati. Bichi tsi quiha Jesu bëchahi ja bocaniquë. Jatsi quënatsi nohiria bá huaniquë:

—Jia xo Dios. Shomahuahaca ca tsi xo naa Iboba janë tsi johai cato ra. Noqui Israél caba chama-chamaria Diós shomahuano ra —i jaca niquë.

¹⁴ Jatsi quiha Jesú burro biniquë. Bichi tsi jacacha ja tsahoni quiha, Quënëhacanish cabá yoani jascaria. ¹⁵ “Mato chama-chamaria qui raquëyamacana, Israél ca nohiria bá. Burró tsaho joxëhi quiha pa” i Quënëhacanish cabo ni quiha. ¹⁶ Jabi toatiyá tsi toa quënëni ca Jesu rabëti bá cahëyamani quiha, naa toca tsi Jerusalén qui ja jicohai yoati na. Jama, nai qui ja tërohacaquë tsi Jesu yoati ja quënëhacani ca ja shinatapicani quiha. Jabi Quënëhacanish cabo jatihuahacani quiha toca tsi Jerusalén qui ja jicoquë no.

¹⁷ Jasca, Jesu ja huëstima ca nohiria bo ini quiha maiquini quima Lázaro ja quënaquë no. Toa xo tsi quiha Lázaro ja bësotëquëmani ca ja tsayacani quiha. Tsayaxo tsi quiha Jerusalén ca nohiria bo ja yoacani quiha. ¹⁸ Jabi ja tsi xo toa huëstima ca nohiria bëchahi bocaniquë, Jerusalén qui Jesu jicoquë no. ¹⁹ Jatsi chaninabëquitsi quiha jodioba chama bo niquë:

—¿Jënahuarixëhi ni noa pë? ¿Tsayacani? Ja qui jabacani quiha nohiria tëquë pë —iquiina.

Carayanabo Jesu qui jonina

²⁰ Jabi Jerusalén qui bëcaniquë carayanabo. Rabë roha quiha. Pascua fiesta ati ja bëcaniquë jato ri. ²¹ Felipe qui basimahax,

—Jesu jiscasqui noa, Señor —i quiha jaca niquë ja qui.

²² Jatsi Andrés yoahi Felipe caniquë. Jatsi Jesu qui ja bobëquicaniquë yoaxëna. Jatsi carayana bëcanai ca ja yoacaquë tsi quiha ²³ Jesú quëbiniquë:

—Joquë hora ra, naa Nohiria Baquë oquënaxëquë no. ²⁴ Mato parayamaquia. Saihuayamaxëhi quiha trigo bëro, maí tsi ma banayamaquë no. Jascaria, Dios xocobo paxa bo sainox pari no tsi rësoparixëti xo Nohiria Baquë. E namëhacaxëti quiha. ²⁵ Parayamaquia. Quëyohacaxëti xo jahué shina noixëni cato. Jama, xabahamahacaxëti xo toa jahué shina noiyamahai cato. Bëso-bësopaoxëhi quiha toa. ²⁶ Ea banahuaxëti xo tsohuëcara ë bax yonococatsaina iquia. Jatsi nai qui ë tërohacano tsi ë bëtaxëhi quiha noho yonoco acai ca ri. Tsohuëcara pi ë bax yonocono tsi toa oquëhuaxëhi quiha noho Jahëpa ra —nëa tsi Jesu nëcaniquë.

Ja rësohai ca yoati tsi Jesu chaninina

²⁷ —Jaboqui shina-huëjënaquia rë. ¿Jënixëhi ni ëa rë noho Jahëpa qui? “Naa tënëti xaba quima ëa tsëcahuë ra, noho Jahëpá” ¿ixëhi ni ëa sa? Iyamaxëquia. E tënëxëti xo rë. Ja tsi xo toa ë joni quiha maí qui. ²⁸ E tënëhai cató tsi mi oquë

jismahuë, noho Jahëpá, jia tsi nohiria bá mia oquëhuano iquish na —nëa tsi Jesu nëcaniquë.

Jatsi naipá ca joi chaniniquë:

—Noho oquë é jismaquë. Noho oquë jismatëquëxëquia mi rësoquë no —i naipá ca joi niquë.

²⁹ Jabi naipá ca joi toá ca nohiria bá nicaniquë. Nicahax,

—Tërëjaquë pa —i jaca niquë.

Jama,

—Ja qui ángel chaniquë pa —i huëtsa bo niquë.

³⁰ Jatsi Jesu jato qui chaniniquë:

—Chaniyamaquë toa joi é nicati quëshpi na. Jama, mato bax ja chaniquë ra. ³¹ Jaboqui quësohacaxëti xo chahahuayamacanaibo. Jasca, jaboqui bëbohacaxëti xo maí ca nohiria yonamixëni ca Satanás. ³² Jabi cruzó tsi namëhacaquí tsi nohiria tëquë é qui bëxëquia —i Jesu niquë.

³³ Jabi nëca tsi Jesu chaniniquë ja rësohai ca quinia jismaxëna. ³⁴ Jatsi nohiria bá quëbiniquë:

—Jaha no pasohai ca Xabahamati Ibo yoati tsi chanihi quiha Quënëhacanish cabo; “Bëso-bësopaoxëhi quiha Cristo” iquiina. Jatsi, ¿jënahuariahax raca “Namëhacaxëti xo Nohiria Baquë” i mi na? ¿Tsohuë ni naa “Nohiria Baquë” i mi aina? ¿Xabahamati Ibo jascaria ni? —i jaca niquë.

³⁵ Jatsi quiha Jesú quëbiniquë:

—Huëa ca éa xo naa. Mato bëta naamayama-xëquia. Jaboqui tsi xo toa noho chani chahahuati xabaca ra. Jaboqui chahahuacana, jocha tsëmó mato bëbomitsa iqui na. Jabi jahuë quinia cahëyamahi quiha tsëmo ó cohai cato. ³⁶ Huëa ca jayaquí tsi chahahuacana, jahuë xocobo manëxëna —nëa tsi Jesu nëcaniquë.

Jaquirëquë jato Jesú jisbayaniquë. Jisbaya tsi ja jonëniquë.

Jodioba chama bá chahahuayamanina

³⁷ Jabi huëstima ca jisti bo Jesú aniquë nohiria bo bësojo xo na. Mahitsa quiha. Jisxo tsi quiha jari Jesu ja chahahuacasyamacani quiha. ³⁸ Jasca, jatihuahacati Isaías quënëni ca ini quiha, naa, “Yama tsi xo toa no yoahai ca chani chahahuahai cato, Ibobá. Mahitsa jato qui Dios chama jismahacaquë rë” i ja quënëni ca nina.

³⁹ Jabija, chahahuatimaxëni ja icani quiha rë, Diós jato bëro bëcohuani iqui na. Jabi toca tsi Isaías yamabá quënëni quiha.

⁴⁰ “Diós jato bëcohuani quiha.

Jato shina ja quëstohuarajahuani quiha, jabija ca ja jisyamacano, jato shinaná tsi ja cahëyamacano.

Jasca, Dios quiri ja bësoyamacano, jato jocha ja masano iquish na” i ja ni quiha.

⁴¹ Jabi toca tsi Isaías yamabo chaniniquë ra toatiyá tsi Jesu oquë ja jisni iqui na. Jesu yoati tsi ja chanini quiha.

⁴² Jama, jari huëstima ca jodiobá Jesu chahuaniquë. Jama, chahahuahax ja pasicaniquë pë, fariseobo, naa jato rëquënëni ibo bo qui raquëhi na. ¿Jato catiti xobo quima ax ja niahacacasyamacani ma ni? ⁴³ Jishopë. Nohiria bá jato oquëhuahai ca ja noicani quiha. Jato qui iriama Diós acái ca oquë ca ini quiha.

Jato pasomaha Jesu chaninina

⁴⁴ Jatsi joi pistiamá tsi quiha nohiria bo qui Jesu chaniniquè:

—Ea chahahuaquí tsi noho Jahèpa ri, naa éa raanish ca chahahuayoiqui mato ra. ⁴⁵ Jasca, éa tsayaquí tsi éa raanish ca jisqui mato. ⁴⁶ Jasca, maí ca nohiria Huéa ca éa xo naa. Mai qui é joni quiha, tsémo ó tsi é qui chitimihai ca chitéyamano iquish na. ⁴⁷ Jabi noho chani nicacasyamacanaibo qui jaboqui quèsoyamaxèquia. Jaboqui nohiria bo xabahamahi é joniquè, tènètiya qui jato raahi mari. ⁴⁸ Jama, jaroha ca bari tsi quiha noho chani tsi quèsohacaxèti xo toa noho chani nicayamacanaibo, éa biyamacanaibo. ⁴⁹ Jasca, jaboqui é chanino tsi é quima joyamahi quiha é yoahaina. Noho Jahèpa quima quiha. Noho Jahèpá yoani ca mato qui é yoaquè ra. Noho chani ma xo. ⁵⁰ Jasca, nohiria bèsò-bèsopaomaxèhi quiha noho Jahèpa yoba bo ra. E chanihai ca tsi xo toa é qui noho Jahèpá yoahana ra —nèa tsi nohiria bo qui Jesu nècaniquè.

13

Jesú jahuè rabèti ba tahè ashimanina

¹ Huèaquè tsi chitahèti nori quiha pascua fiesta iniquè. Toatiyá tsi noba mai jisbèriati xaba tsèquèha ca Jesú cahèni quiha. Jahèpa qui bacatí xaba ja ini quiha. Jabi jahuè maí ca rabèti bo ja noiriani quiha ra. Jasca, jato ja noiriahai ca jato ja jismani quiha.

² Jabi jahuè rabèti bo ya oriquihi Jesu iniquè. Naama tsi quiha Judas Iscariote, naa Simón baquè Yoshini bini quiha yoi ca shinamaxèna. Ja tsi xo toa jodioba chama bo qui mèatsi quiha Judás huaniquè. ³ Jabi jatiroha ca Jesú cahèni quiha. Ja qui chama Jahèpá anina, Dios quima ja jonina, Dios qui jahari ja cahaina, tihí cabo ja cahèni quiha. ⁴ Jatsi oriquihax mesa quima Jesu joiniquè. Joixo tsi quiha jahuè sacoria ja tsononiquè. Tsoboxo tsi quiha toalla ja bihaca tsi ja chinèxèniquè. ⁵ Jatsi pitèxti, naa lavamanos icanai ca qui jènèpaxa ja japaniquè. Japaxo tsi quiha jahuè rabèti ba tahè chocohatsijahuè. Chocohaxo ja shinahuèniquè.

⁶ Jatsi Simón Pedro qui ja joniquè.

—¿Noho tahè chocohahi ni mia pa, noho Ibobá? —i ja qui Pedro niquè.

⁷ Jatsi Jesú quèbiniquè:

—Jaboqui tsi é acai ca cahèyoiyamaqui mia. Jama, bari huètsa cahèxèqui mia tia —iquiina.

⁸ Jatsi,

—Noho tahè ashimayamapistiariaxèqui mia ra —i Jesu qui Pedro niquè.

Jatsi Jesú quèbiniquè:

—Mí tahè pi é ashimayamano tsi ¿jènahuariaxo raca noho yonoco mi ana? —iquiina.

⁹ Jatsi,

—Noho tahè ashimahuè, Ibobá. Jasca, noho mèquènè, noho mapo, tihí cabo ri ashimahuè ra —i Pedro niquè.

¹⁰ Jatsi nèca tsi quiha Jesú quèbiniquè:

—Ashitèquèyamahi quiha bahuèhacanish cato ra. Ashimahacaxèti xo jahuè tahè roha, ja chèquènaquè no. Jascaria, jènima tsi xo masahacanish ca shina jaya cato. Masahacaxèti xo ja abèna ca jocha roha, ja jochaquè no. Bahuèhaca ca xo mato tèquèta. Jama, nèá xo huèsti ca shina masahama ca jaya cato rè —i Jesu niquè.

¹¹ Jodioba chama bo qui ja mèacasni ca Jesú cahèni quiha. Ja tsi xo toa,

—Nèá xo huèsti ca shina masahama ca jaya cato rè —i ja nina.

12 Jato tahë ashimaxo tsi quiha jahuë sacoria Jesú sahuëtëquëniquë. Jatsi mesa tahë ja tsahotëquëniquë. Tsahohax,

—¿Jënixo tsi mato tahë ë ashimaha? ¿Cahëcanai? —i jato qui Jesu niquë—. 13 Maestro, Ibo, tihi cabo ëa quënaqui mato. Jabija tsi xo toa ma chanihaina, mato Ibo ë nori quëshpi na. 14 Jama, ¿jahuë yonati tahë ashimahi ni chama pa? ¿Tsayacana? Mato tahë yoi ë chocoaguë ra, naa mato Ibo, mato Maestro ra. Toca tsi ma ati xo mato ri. 15 Mato tahë ë chocoaguë ra, ototi quinia mato jismaxëna. Mato bax ë aca ca jascaria tsi huëtsa bo bax ma ano mato ri. 16 Mato parayamaquia. Yama tsi xo toa jahuë chama oquë ca yonati. Jasca, raanish ca oquë ma xo raahacanish cato, naa jahuë ibo chani bëhai cato. 17 Jabi naa yoba nicaquë mato. E yoaha ca yoba jabipihi tsi ranirixëqui mato ra.

18 ‘Mato tëquë yoati tsi chaniyamaquia. E bini cabo cahëriaquia ra. Jama, jatiuhacaxëti xo Quënëhacanish cabo, naa “Mia pasomaha tsi xo toa mi bëta xo pihai cato” iquina. 19 Nicapariana. Jodiobo chama bo qui ëa pi ja mëanax pari no tsi mato yoaquia, Xabahamati Ibo ë nori ca ma cahëno iquish na. 20 Mato parayamaquia. Mato raaxëquia, noho chani nohiria bo qui boti. Ea yoi bixëhi quiha mato chani bichi cato. Jasca, ëa raanish ca Jahëpa ri bichi quiha ëa bichi cato —i jato qui Jesu niquë.

“Jodioba chama bo qui ëa aqii mato ó ca huësti cato” i Jesu nina

Mateo 26.20-25; Marcos 14.17-21; Lucas 22.21-23

21 Chanihax cohuëtsi Jesu niquë.

—Mato parayamaquia. Jodioba chama bo qui ëa mëaxëhi quiha mato ó ca huësti cato rë —i ja niquë.

22 Jatsi bëisnabëquitsi jahuë rabëti bo niquë,

—¿Tsohuë cara ni sa? —i jaca niquë.

23 Jabi Jesu tapani tsaho Juan ini quiha naa Jesu rabëti-rabëtiria. 24 Jatsi ja qui Simón Pedró jahuë mëquë bëë-bëëhaniquë,

—¿Tsohuë yoati ni toa ja chanihaina? Nica huë, no cahëno ra —iquina.

25 Jatsi Jesu qui Juan xëquëniquë nicaxëna,

—¿Tsohuë ni toa mia pasomaha cato rë? —iquina.

26 Jatsi Jesú quëbiniquë:

—Pitëxti qui naa mapari nacomaquia moosaxëna. Nacomaxo tsi toa joni qui axëquia. Jabi ëa pasomaha ca tsi xo toa naa mapari bichi cato ra —i ja niquë.

Jatsi quiha mapari Jesú nacomaniquë pitëxti qui. Nacomaxo tsi quiha Judas Iscariote qui ja aniquë. 27 Jatsi mapari ja biquë tsi quiha jahuë shina qui Satanás jicotapiniquë pë.

Jatsi,

—Mí acatsai ca ahuë. Bamayamahuë —i ja qui Jesu niquë.

28 Jabi Judas qui Jesú yoaha ca toá ca tsaho cabá cahëyamani quiha nicaxo na. 29 Jahuëcara ca oriquiti copiti, noitiria cabo qui parata ati ma ni, tihi cabo ati ja raahacani ca ja quëscahuajahuacani quiha. Toca tsi ja shinacani quiha, jato parata obëso ca Judas ini iqui na. 30 Jatsi quiha Jesú ja qui ani ca mapari Judás biniquë. Bichi tsi quiha cache ja caniquë. Baquicha ja ini quiha.

Yoba paxa cato

31 Judas jisbayaquë tsi,

—Tsëquëquë Nohiria Baquë rësoti xabaca ra —i Jesu niquë—. Jaboqui noho oquë jismahacaxëti xo. E rësohai cató tsi jismahacaxëti xo Dios oquë ri. 32 Jabi ëa iqui tsi Dios oquë jismahacano tsi ë qui jahuë naipá ca oquë axëhi quiha

Dios. E qui apaimaria xo ra. ³³ Tanaroha pistia no tsi mato bêtaxëquia rë, noho xocobá. Jasca, ë caquë tsi quiha ëa mëraxëqui mato. Jama, ë cahai ca qui canoma xo mato iquia ra, naa jodiobo ë yoahitaha jascaria. ³⁴ Jaboqui yoba paxa ca mato qui aquia: Noinacana iquia, mato ë noihai jascaria. ³⁵ Ma noinapino tsi noho rabëti bo ma nori ca cahëcaxëcani quiha jatiroha cabo — nëa tsi jahuë rabëti bo qui Jesu nëcaniquë.

“Ea pasomaha chanixëqui mia” i Pedro qui Jesu nina
Mateo 26.31-35; Marcos 14.27-31; Lucas 22.31-34

³⁶ Jatsi,

—¿Jahuënia tsi cahai, Ibobá? —i Simón Pedro niquë ja qui.

Jatsi,

—Jaboqui ë cahai ca qui canoma xo mia. Jama, bari huëtsa ëa bahuaxëqui mia ra —i ja qui Jesu niquë.

³⁷ Jatsi Pedró quëbiniquë:

—Jaboqui tsi mi bëta cacasquia, Ibobá. Mi bax ëmë axëquia nati —iquiina.

³⁸ Jatsi Jesú quëbiniquë:

—¿E bax rësoxëhi ni mia pa? Patiari bënë quëonox pari no tsi tres tsi ëa pasomaha chanixëqui mia rë —i ja qui Jesu niquë.

14

Jahëpa Dios quinia

¹ Shina-motsiquiyamacana. Dios qui chitimicana. Jasca, ë qui ri chitimicana —i jahuë rabëti bo qui Jesu niquë—. ²⁻³ Noho Jahëpa racahai cató tsi xo huëstima ca xobo bo ra. Jabi mato xobo bo rohahuahi caquia. Rohahuahax jotëquëxëquia mato bixëna, ë noho ma no. Tocayamarohapino tsi bëro tsi mato ë yoaquë aquë. Quiayamaquia. ⁴ Jabi ë cahai ca quinia cahëqui mato —nëa tsi Jesu nëcaniquë jahuë rabëti bo qui.

⁵ Jatsi Tomás chaniniquë:

—¿Jahuënia tsi cahai, Ibobá? Cahëyamaqui noa rë. ¿Jënahuariaxo raca mi cahai ca quinia no cahëna? —i Jesu qui ja niquë.

⁶ Jatsi Jesú quëbiniquë:

—Dios qui quinia xo ëa ra. Jabi ja ca xo ëa ra. Bësomati Ibo xo ëa ra. Yama tsi xo Jahëpa Dios qui jamëpistia cahai cato. Jasca, ëa roha tsi xo toa ja qui mëpihai cato. ⁷ Jasca, ëa cahëpiquí tsi noho Jahëpa ri cahëxëqui mato. Jaboqui Jahëpa yoi cahëyoiqui mato. Jahëpa ma jisquë ra —i ja qui Jesu niquë.

⁸ Jatsi Felipe chaniniquë:

—Mi Ipa noqui jismahuë, Ibobá. Jispihi tsi ranixëqui noa ra —iquiina.

⁹ Jatsi Jesú quëbiniquë:

—Mato bëta ë naamaquë, Felipé. ¿Jënahuariaxo jari ëa cahëyamahai rë? Jahëpa Dios yoi jisqui ëa jisish cabo ra. Jënihax, “Jahëpa noqui jismahuë” ¿i mi a pa? ¹⁰ ¿Jahëpa Dios ó ë iquiina, ë nohó Jahëpa Dios iquiina, tihi cabo chahahuayamahi, Felipé? E quima joyamahi quiha noho chani, naa mato ë yoahaina. Jahëpa quima quiha. Jabi naa yonoco ati ibo tsi xo Jahëpa ra, naa ë nohó bësohai cato. ¹¹ Jasca, Jahëpa ó ë iquiina, ë nohó Jahëpa iquiina, tihi cabo chahahuana. Noho chani chahahuacasyamaqui tsi ë acai ca jisti bo quëshpi tsi ëa chahahuana. ¹² Mato parayamaquia. Ea chahahuapiquí tsi ë acai ca jisti bo axëqui mia ri ra. Naa ë acai ca jisti bo oquë ca axëqui mia, Jahëpa qui ë cahai quëshpi na. ¹³ Caxo tsi noho janë tsi jahuëcara ca ma bënëhai ca mato bax axëquia. Toca tsi axëquia ra, ë acai cató tsi Jahëpa oquë jisiquino iquish na.

14 Jahuëcara pi noho janë tsi ma bënano tsi mato bax axëquia —nëa tsi Felipe qui Jesu nëcaniquë.

Espíritu Santo yoati tsi Jesu chaninina

15 —Ea pi noiquí tsi noho yoba nicaxëqui mato. 16-17 Jasca, noho Jahëpa nicaxëquia, Mëbiti Ibo huëtša ca mato qui ati. Espiritu Santo quiha, naa mato bëta chitë-chitëpaoxëhai ca tsi xo naa ra. Jabija ca qui mato mëpixëhi quiha. Jabi Espiritu Santo biyamahi quiha Dios cahëyamacanaibo. Jato qui bëroma quiha. Cahëyamacani quiha rë. Jama, mato ti tsi xo toa Espiritu Santo cahëcanaina, mato ó ja nori iqui na.

18 Yoma bo iyamaxëqui mato. Toca tsi mato jisbëriayamaxëquia. Jahari mato qui joxëquia. 19 Tanaroha pistia no tsi ëa jisyamaxëhi quiha nohiria bo. Jama, ë caquë tsi jari ëa jistëquëxëqui mato. Bëso ë nori quëshpi tsi bësoyoixëqui mato ri. 20 Jasca, toa bari tsi quiha Jahëpa ó ë iquiina, ë nohó ma iquiina, mato ó ë iquiina, tihí cabo cahëxëqui mato ra, ë bësohtëquëquë no.

21 Tsohuëcara ca noho yoba bo nicahai ca tsi xo toa ëa noihaina ra. Jasca, ëa noihai ca noixëhi quiha noho Jahëpa. Toa noixëquia ëa ri. Noixo tsi ja qui ëmë jismaxëquia —nëa tsi jahuë rabëti bo qui Jesu nëcaniquë.

22 Jatsi quiha Judas huëtša chaniniquë, naa Judas Iscariote ma cato:

—¿Noqui roha mimë yoi jismaxëhi ni mia pa, Ibobá? ¿Jënixo tsi chahuhayamacanaibo qui mimë jismayamaxëhai, mia ja cahëyoicano? —i Jesu qui ja niquë.

23 Jatsi Jesú quëbiniquë:

—Noho chani nicaxëhi quiha ëa noihai cato. Toa noixëhi quiha noho Jahëpa ra. Ja qui joxëqui noa, naa ëa, noho Jahëpa. Johax jahá bësoxëqui noa ra. 24 Jama, noho chani nicayamaxëhi quiha ëa noiyamahai cato rë. Jasca, noho chani ma xo naa ma nicahaina, noho Jahëpa chani nori. Ea raanish cato chani tsi xo naa ma nicahana iquia.

25 Jabi nëca tsi chaniquia mato bëtahi na. 26 Jama, Espiritu Santo mato qui noho Jahëpá raano tsi mato tiisimaxëhi quiha. Mato Mëbiti Ibo ixëhi quiha. Joxo tsi ëa yoati tsi mato tiisimaxëhi quiha. Mato ë yoaha ca tëquë mato shinamaxëhi quiha ë jisbayaquë no.

27 Mato bëpasimaquia. Jia tsi xo toa mato ë bëpasimahaina; Dios cahëyamacanaibá bëpasimahai ca jamëri nori quiha. Shina-huëjënayamacana. Jasca, raquëyamacana. 28 ¿Jabi mato ë yoaha ca ma nicayamayamaha? “Mato jisbëriayamaxëquia” i ë quë ra. Jasca, “Mato qui jahari joxëquia” i mato qui ë quë ra. Jatsi ëa pi noihi tsi rani-ranixëqui mato ra, jahari noho Jahëpa qui ë cahai tahëhax na. Ea oguëria xo noho Jahëpa ra. 29 Jaboqui tihí ca tsi mato yoaquia, ja ocanox pari no. Jatsi ocapijaquë tsi ë qui chitimiyoixëqui mato ra. 30 Jabi ichariama bari tsi xo toa mato bëta ë chanihaina rë. Capaima xo ëa ra. Jasca, johi quiha Satanás rë, naa chahuhayamacanaibo yonati ibo-iboria. E axëhai ca yonoco quëtayamaxëhi quiha ra. Ea yonati mëtsama xo ra. 31 Jama, Jahëpa Dios ë noihai ca nohiria bá cahëno. Noiquí tsi jatiroha ca noho Jahëpá yoahai ca aquia ra. Iquë tia. Bëcahuë. ¿Canomani? —nëa tsi Jesu nëcaniquë jahuë rabëti bo qui.

15

Bimi nishi, jahuë mëshi bo

1 —Bimi saiuhahai ca nishi jascaria ca ëa xo naa —i Jesu niquë—. Bimi nishi ototi ibo tsi xo noho Jahëpa ra. 2 E nohó ca mëshí pi bimi saiuhayamano tsi toa mëshi mëris-hi quiha noho Jahëpa. Jasca, saiuhahai ca mëshi bo

rohahuahi quiha, oquë tsi ja saihuacano iquish na. ³ Jabi mato ë yoani ca chani tsi ma bahuëhacaniquë, naa mëshi rohahuahacahai jascaria. ⁴ E nohó bësocana, naa mato ó ë bësohai jascaria. Jabi nishi quima mëris-hacapiquí tsi çjënahuariaxo raca toa mëshí saihuana? Jascaria, ë nohó bësoyamapiquí tsi saihuati mëtsama ixëqui mato ri.

⁵ Nishi xo ëa ra. Mato tsi xo mëshi bo. Jabi huëstima ca bimi saihuahi quiha ë nohó bësohai cato. Dios yonoco ariaxëhi quiha, jaha ë bësohai iqui na. Yama ca axëqui mato ë bëtaxoma. ⁶ Jabi niahacaxëti xo tsohuëcara ë nohó bësoyamahai cato, naa niahacanish ca mëshi yoi ca jascaria. Bësobësopaoyamaxëhi quiha toa rë. Jabi nëca ca mëshi yoi bo catiahi quiha bimi ibo. Catiaxo tsi chihi qui niahi quiha. Toá tsi mëshocaxëceni quiha. ⁷ Jama, ë nohó pi ma bësono tsi, mato ó pi noho chani chitëno tsi jaha ma quëëhai ca baati mëtsa ixëqui mato. Baaxo tsi bixëqui mato ra. ⁸ Jabi huëstima ca bimi saihuahi quiha noho rabëti yoi bo ra. Toca tsi Dios jabi ja ca jismacani quiha ra. Jasca, toca tsi noho rabëti bo ma nori ca cahëxëhi quiha nohiria bo. ⁹ Mato noiquia ra, naa ëa noho Jahëpá noihai jascaria. E noihai cato ó tsi chitëcana. ¹⁰ Noho yoba pi aquí tsi ë nohai cato ó tsi chitëxëqui mato. Jabi noho Jahëpa yoba bo aquia. Jaha tsi ja noihai cato ó tsi chitëxëquia ra.

¹¹ Nëcaquia ë ranihai ca ma oquëxnano. Ma rani-raniriano ra. ¹² Noho yoba tsi xo naa: Noinabëquicana, mato ë noihai jascaria. ¹³ Tsohuëcara pi jahuë rabëti bax rësono tsi anomaria tsi xo toa ja noihaina. Yama tsi xo toa oquë ca noihaina. ¹⁴ Jasca, noho rabëti bo xo mato, noho yoba ahi na. ¹⁵ Jaboqui yonati bo mato quënayamaquia. Jahuë chamá shinahai ca cahëyoiyamacani quiha toa bo rë. Jama, noho rabëti bo mato quënaquia ra. Ja tsi xo toa noho Jahëpa quima ë nicaha ca tëquë mato yoaquia ra. ¹⁶ Ea ma biyamaniquë. Jama, mato ë biniquë. Bixo tsi mato raaquia, huëstima ca huinocayamahai ca bimi saihuahi ma bocano. Jasca, noho janë tsi ma baaha ca jahuëcara ca mato qui axëhi quiha noho Jahëpa. ¹⁷ Jabi noho yoba tsi xo naa: Noinabëquicana. Iquë.

Noqui caxahi quiha maí ca nohiria bo

¹⁸ Ratëyamacana. Mato qui pi Dios cahëyamacanaibo caxano tsi ë qui pari ja caxacani quiha. ¹⁹ Jabi jato maí ca jabi yoi ca pi ma noino tsi mato noicaxëceni quiha Dios cahëyamacanaibo, jató-na ja noicanai jascaria. Jama, maí ca nohiria bo quima mato ë tsëcaniquë ra. Jató-na ma xo mato. Ja tsi xo toa mato qui caxahi quiha maí ca nohiria bo. ²⁰ Jabi ë yoaha ca shina-bënoyamacana: “Jahuë ibo oquë ma xo yonati” i ë quë ra. Jabi ëa tënëmacaxëceni quiha maí ca nohiria bo. Jasca, mato ri tënëmacaxëceni quiha, noho rabëti bo ma nori iqui na. Jasca, noho chani nicarohapixo tsi mato chani ri ja nicaquë acaquë ra. ²¹ Jasca, ëa raanish ca cahëyamahi quiha maí ca nohiria bo rë. Jaha tsi ëa iqui tsi mato tënëmacaxëceni quiha rë. ²² Jato qui pi chanihi ë joyamarohano tsi ja quësoyamahacaquë acaquë. Jama, jaboqui jocha jayaca xo rë. “Noho shina ri ma xo” iti mëtsama ca xo ra, noho chani ja nicacana quëshpi na. ²³ Noho Jahëpa qui caxahi quiha tsohuëcara ca ë qui caxahai cato rë. ²⁴ Jasca, jato xërëquë xo pi jistiria bo ë ayamarohano tsi ja quësoyamahacaquë acaquë. Jama, ë ani ca jistiria bo ja jiscani quiha. Jisi tsi ëa, noho Jahëpa, tihi cabo qui jari caxacani quiha pë. ²⁵ Jabi jatihuahacati xo Quënhëcanish cabo ra, ja acanai cató no, naa, “Mahitsa ë qui caxacaxëceni quiha rë” iquiina.

²⁶ Joxëhi quiha Espíritu Santo, naa mato Mëbiti Ibo ra. Noho Jahëpa ax joxëhi quiha. Jabija ca yoahai ca tsi xo naa. Jabi mato qui Espíritu Santo raaxëquia. Joxo tsi jatiroha ca ëa yoati mato yoaxëhi quiha. ²⁷ Jascaria, ëa yoati chanixëqui mato ri, rëquë rohari tsi ë bëta ma ini quëshpi na.

16

Tënëxëhi quiha Jesu rabëti bo

¹ Jabi mato qui caxacaxëcani quiha maí ca nohiria bo. Toa mato yoaquia, jabija ca quima ma casoyamano iquish na. ² Jato catiti xobo quima mato niacaxëcani quiha rë. Toa xaba tsëquëno tsi mato acaxëcani quiha ra. Axo tsi Dios yonoco ja acanai ca quëscahuacaxëcani quiha rë. ³ Jasca, ëa, Jahëpa, tihí cabo cahëyamacani quiha rë. Ja tsi xo toa mato acaxëcani quiha pë. ⁴ Jaboqui mato yobaquia, noho chani ma shinaparino toa xaba tsëquëquë no.

Espíritu Santo yonoco

Jariapari tsi ë caxëhai ca ë yoayamaniquë, jari mato bëta ë ini quëshpi na. ⁵ Jama, jaboqui ëa raanish ca qui capaima xo ëa. Jama, “¿Jahuënia tsi cahai?” iyamaqui mato rë. ⁶ Jabija ca mato ë yoaha iqui tsi cohuëria xo mato. ⁷ Jasca, mato qui jia tsi xo ë caxëhaina iquia. E cayamapino tsi mato qui joyamaxëhi quiha Espíritu Santo, naa mato Mëbiti Ibo. Jama, mato qui Espíritu Santo raaxëquia nai qui caquí na. ⁸ Jato jocha nohiria bo qui bërohuaxëhi quiha joxo na. Jasca, noho mëstë ca jabí, Diós nohiria bo copixëhaina, tihí cabo tsi bërohuaxëhi quiha. ⁹ Jasca, jato jocha bërohuaxëhi quiha Espíritu Santo, ë qui ja chitimiyamacanai quëshpi na. ¹⁰ Jasca, noho mëstë ca jabí bërohuaxëhi quiha, Jahëpa Dios qui ë caxëhai iqui na. Jabi mëstë ca ë nori iqui tsi Jahëpa qui cati mëtsa xo ëa. Jasca, ë caquë tsi ëa jisymaxëqui mato. ¹¹ Jasca, Diós nohiria bo copixëhai ca bërohuaxëhi quiha Espíritu Santo, Satanás, naa maí ca nohiria yonati ibo copihacani quëshpi na.

¹² Jari huëstima ca tsi xo toa mato qui ë yoacatsaina. Jaboqui cahënoma xo mato rë. Jaha tsi yoayamaquia. ¹³ Jama, joxëhi quiha Espíritu Santo. Joxo tsi jatiroha ca jahuë bo tiisimaxëhi quiha. Jabija ca yoahai ca tsi xo naa. Quiayamahi quiha. Jahuë chamá tsi chaniymaxëhi quiha. Jama, chaniquí tsi ja nicahai ca jahuë bo roha mato qui yoaxëhi quiha. ¹⁴ Jasca, ëa oquëhuaxëhi quiha. Oquëhuaxo tsi ë noho ca chani bixëhi quiha. Bixo tsi mato cahëmaxëhi quiha ra. ¹⁵ Jabi noho Jahëpa oquë, jahuë chani, tihí cabo tëquë jaya xo ëa ra. Ja tsi xo toa “Ja qui ë acai ca jahuë bo bixëhi quiha Espíritu Santo. Bixo tsi mato cahëmaxëhi quiha ra” i ë quë.

Ja rësohai yoati tsi Jesu chaninina

¹⁶ “Tanaroha pistia no tsi ëa jisymaxëqui mato. Jaquirëquë, ichariama bari huinocaquë tsi ëa jistëquëxëqui mato —nëa tsi jahuë rabëti bo qui Jesu nëcaniquë.

¹⁷ Jatsi quiha chaninabëquitsi jahuë rabëti bo niquë:

—¿Jënijaha sa? “Tanaroha pistia no tsi ëa jisymaxëqui mato; jaquirëquë, ichariama ca bari tsi ëa jistëquëxëqui mato” i ja quë pa. Jasca, “Noho Jahëpa qui caquia” i ja quë pa. ¹⁸ ¿Jahuëcara chanihi ni naa sa, “Tanaroha pistia no” i ja quë no? Ja chanihai ca cahëyamaqui noa rë —nëa tsi quiha jahuë rabëti bo nëcaniquë.

¹⁹ Jabi jahuë rabëti bá nicacascani ca Jesú cahëniquë. Ja quëshpi tsi jato qui ja chanitëquëniquë:

—“Tanaroha pistia no tsi ëa jisyamaxëqui mato. Jaquirëquë, ichariama ca bari tsi ëa jistëquëxëqui mato” i ë quë. ¿Jabija ma ni naa ma nicacatsaina? ²⁰ Mato parayamaquia. E caquë tsi araxëqui mato. Jama, ranixëhi quiha maí ca nohiria. Cohuënaxëqui mato. Jama, ranixëqui mato, ëa ma jistëquëquë no. ²¹ Jabi pahë ya xo yoxa, jahuë baquë coquë no. Jama, jahuë baquë coquë tsi jahuë comahai ca pahë shina-bënohi quiha. Ranihi quiha, jahuë baquë coha quëshpi na. ²² Jascaria tsi jaboqui cohuë xo mato ri. Jama, ranixëqui mato, mato ë jistëquëquë no. Mato quima mëbitimaxëni ixëhi quiha ma ranixëhaina ra.

²³ Toatiyá tsi ëa nicayamaxëqui mato, jahuëcara bixëna. Jama, Jahëpa Dios nicaxëqui mato ra. Jahuëcara ma nicahai ca mato qui axëhi quiha, noho rabëti bo ma nori quëshpi na. ²⁴ Jaboqui jari noho janë tsi nicayamahi quiha mato, bëhoxquí na. Jama, toatiyá tsi noho janë tsi nicatsacana. Nicaxo tsi bixëqui mato. Toca tsi ranirixëqui mato ra —nëa tsi Jesu nëcaniquë.

Maí ca jabi bëbohi quiha Jesu

²⁵ —Jaboqui mato joma quiha mato ë yoahaina rë. Jama, joxëhi quiha xaba huëtza. Toatiyá tsi bëroria tsi Jahëpa Dios yoati tsi chanixëquia —i jahuë rabëti bo qui Jesu niquë—. ²⁶ Toatiyá tsi noho janë tsi Jahëpa Dios nicaxëqui mato. Noho janë tsi ma bëhoxno tsi mato bax nicayamaxëquia, noho Jahëpá mato nicaxëhai quëshpi na. ²⁷ Mato noiriahí quiha Jahëpa Dios yoi, ëa ma noihai iqui na. Jasca, Dios quima ax ë joni ca chahahuacuí mato. Ja quëshpi tsi mato noiriahí quiha Jahëpa. ²⁸ Jahëpa Dios ë jisbërianiquë mai qui joxëna. Jaboqui naa mai jisbëriaquia jahari noho Jahëpa Dios qui caxëna —nëa tsi Jesu nëcaniquë jahuë rabëti bo qui.

²⁹ Jatsi jahuë rabëti bá quëbiniquë:

—Jaboqui bëro xo mi chanihaina. Jonë ma xo ra. ³⁰ Jaboqui jatiroha ca cahëhai ca mi nori ca cahëqui noa. Mia pi no nicacasno tsi no shinahai ca cahëqui mia pa. Ja tsi xo toa Dios quima ax mi joni ca cahëqui noa ra —i Jesu qui jaca niquë.

³¹ Jatsi quihá Jesú quëbiniquë:

—¿Jaboqui chahahuacanaí pa? ³² Jabi basima tsi xo toa hora ra, naa ma pacanamahaca-xëquë no. Jabi joquë toa hora. Toatiyá tsi mato xobo qui jabaxëqui mato pë. Ea jisbëriaxëqui mato rë. Jama, ëmëpistia iyamaxëquia ë bëta Jahëpa nori quëshpi na. ³³ Nëca tsi mato qui chaniquia ma bëpasino, ma raquëyamano iquish na. Nicacana. Mato yosicaxëcani quihá maí ca nohiria. Jama, ranitsicana maí ca yoi ca jahuë bo, maí ca nohiria bo, tihi cabo ë boboni quëshpi na —nëa tsi quihá jahuë rabëti bo qui Jesu nëcaniquë.

17

Jahuë rabëti bo bax Jesu bëhoxnina

¹ Jatsi quihá nai Jesú tsyaniquë bëhoxhi na. Tsayahax,

—Tsëquëquë ë rësoti xabaca rë, Jahëpá —i Jahëpa Dios qui ja niquë—. Mi Baquë xo ëa ra. Noho oquë jismahuë, mi oquë ë jismano ëa ri. ² Jasca, ë qui nohiria yonati chama mi aniquë, ë qui mi ani ca nohiria bo tëquë ë bëso-bësopaomano iquish na. ³ Jabi bëso-bësopaoti quinia tsi xo naa ra: Mia, ëa, tihi cabo ja cahëyoiti ca xo ra. Mia tsi xo toa jaroha ca Dios yoi. Jasca, ëa ti tsi xo toa mi raani ca baquë yoi. ⁴ Jabi naa mai xo tsi mi oquë ë jismaquë ra. Jasca, ë qui mi ani ca yonoco ë jatihuaquë ra. Jaboqui yama tsi xo. ⁵ Jatsi jaboqui noho oquë mi jismati xo, Jahëpá, naa mi bëta ë jayapaoni ca oquë. Jabi mai mi nëhohuanox pari no tsi anomaria ini quihá noho oquë ra.

⁶ Jasca, è qui mi ani ca maí ca nohiria bo qui tsohuë mi nori ca è jismaquë ra. Jabi jato qui mi oquë è jismaquë. Jariapari tsi mi-na bo ja icapaoniquë. Jatsi è qui jato mi aniquë jato ó bësoti. Jaboqui mi chani nicacani quiha ra. ⁷ Jasca, jaboqui èa yoi cahëriacani quiha. Noho chani, noho tiisi, noho chama, tihí cabo è qui mi ani ca cahëcani quiha. ⁸ E qui mi ani ca chani jato qui è aniquë. Mi chani ja bicaniquë ra. Bixo tsi mi quima ax è joni ca cahëriacani quiha ra. Ea mi raani ca chahahuayoicani quiha iquia.

⁹ Jasca, noho rabëti bo bax bëhoxquia. Chahahuayamacanaibo bax bëhoxyamaquia. Jama, è qui mi ani cabo bax bëhoxquia mi-na bo jaca nori quëshpi na. ¹⁰ Jabi jatiroha ca nohó-na bo xo mi-na bo ri. Jasca, jatiroha ca mi-na bo xo nohó-na bo ri. Jaboqui ja acanai cató tsi jismahacahi quiha noho oquë. ¹¹ Ea ti tsi xo jisbayahaina. Jama, néa tsi chitëcahi quiha nohó-na bo. Jisbaya tsi mi qui caquia. Ja quëshpi tsi jia tsi è qui mi ani cabo ó bësohuë, noho Jahëpa jiaxëni cató. Toca huë, huësti ca ja icano, huësti ca no nori jascaria. ¹² Jato bëtapama tsi jato è oto-otoniquë, è qui mi ani ca chamá no. Jënima ca xo. Huësti roha tsi xo toa bënohacahax cato, naa nëntëtiyá ca baquë rë. Tocapijaquë, Quënëhacanish cabo jatihuacano iquish na. Iquë. ¹³ Jaboqui mi qui caquia. Jato bëtapama tsi naa jahuë bo jato è yoaniquë, è ranihai ca ja xatënacano iquish na. ¹⁴ Jasca, mi chani jato qui è aquë. Ja iqui tsi jato qui caxahi quiha maí ca nohiria bo, jato maí ca jabi yoi bo ja niacani iqui na. Maí ca nohiria bo quirima ca xo, èa jascaria jaca nori. ¹⁵ Mai quima jato tsëcahuë iyamatsiquia. Jama, jato ó bësohuë, Satanás jato yoshihuayamano. ¹⁶ Jaboqui maí ca nohiria ma ca xo. Jató-na ma ca xo, èa jascaria jaca nori. ¹⁷ Jasca, jabija ca Espiritu Santó tsi jato aquëquëmahuë, mi yonoco ati. Jabija tsi xo mi chani ra. ¹⁸ Jabi maí ca nohiria bo qui èa mi raani jascaria tsi maí ca nohiria bo qui jato è raaquë èa ri. ¹⁹ Jato bax èmë mi qui aquia namëhacati, Espiritu Santó tsi ja aquëquëmahacacano iquish na.

²⁰ Jabi noho rabëti bo, jato chani iqui tsi è qui chitimicaxëcanaibo, tihí cabo bax bëhoxquia ra. ²¹ Bëhoxquia ja huëstinabëquicano. No nohó ja huëstinabëquicano, Jahëpá, naa è nohó mi nori jascaria. Ja huëstinabëquicano ra, maí ca nohiria bá èa mi raani ca chahahuano iquish na. ²² Jabi è qui mi ani ca oquë jato qui è aniquë, ja huëstinabëquicano iquish na, naa huësti ca no nori jascaria. ²³ Jabi jato ó xo èa. Jasca, è nohó xo mia ri. Ja iqui tsi ja huëstinabëquinayoicano ra. Tocapijacano tsi èa mi raanina, jato è noi-noihaina, tihí cabo cahëcaxëcani quiha maí ca nohiria bo.

²⁴ Jabi èa mi noiniquë mai nëhohuacanaxox pari no. Toatiyá tsi oquë è qui mi aniquë. Toa oquë ja jiscano ra. Ja tsi xo toa è nori cató tsi noho rabëti bo icano jato ri, noho oquë ja jiscano. ²⁵ Jishopë, mëtëxëni ca Jahëpá. Mia cahëyamahi quiha maí ca nohiria bo rë. Jama, mia cahëhai ca èa xo naa. Jasca, èa mi raani ca cahëhi quiha noho rabëti bo ri. ²⁶ Mi jabi yoi jato è cahëmaniquë. Jasca, jari mi jabi yoi jato cahëmaxëquia, noiti ja tiisicano, èa mi noihai jascaria. Jabi jato shina ó tsi bësoxëquia —nëa tsi Jesu nëcaniquë bëhoxhi na.

18

Jesu tsamihacarina

Mateo 26.47-56; Marcos 14.43-50; Lucas 22.47-53

¹ Bëhoxhax tsi quiha pao Cedrón Jesú shitaniquë. Jahuë rabëti bo ri ja boni quiha. Shitahax huerto qui ja jicocaniquë. ² Jabi toa iti Judás cahëni quiha jaa ri, naa Jesu pasomaha inish cato. Huëstima tsi toa huerto qui Jesu ca-capaoni

quilha jahuë rabëti bo ya. ³Jaha tsi quilha huerto qui Judás caniquë jaa ri, Jesu mërahi na. Huëstima ca soldado bo, jodioba chama bá raani ca policia bo, tihí cabo ja boniquë. Jotati bo, lamparina bo, saipi bo, tihí cabo ja jayacani quilha. ⁴Huerto qui ja cahëcaquë tsi quilha jato bëchahi Jesu caniquë, ja acascanai ca ja cahëni quëshpi na. Bëchahax,

—¿Tsohuë mëracanai? —i jato qui Jesu niquë.

⁵Jatsi,

—Nazarét ca Jesu mëraqui noa ra —i jaca niquë.

Jatsi quilha,

—Ja xo ëa ra —i Jesu niquë.

Jabi toá tsi quilha soldado bo ya Judas nii iniquë, naa Jesu pasomaha inish cato. ⁶“Ja xo ëa ra” i Jesu quë tsi quilha ja chishtëquiri-caniquë. Mai qui ja paquëcaniquë ratëhi na. ⁷Jatsi quilha Jesú jato nicatëquëniquë:

—¿Tsohuë mëracanai ra? —iquiina.

Jatsi quilha,

—Nazarét ca Jesu ra —itëquë jaca niquë.

⁸Jatsi Jesú quëbiniquë:

—“Ja xo ëa ra” i ë quë. Ea pi ma mërano tsi noho rabëti bo ma paquëmano iquia —iquiina.

⁹Jabi toca tsi ja yoaha ca Jesú jatihyani quilha naa “E qui mi ani cabo bënoyamaxëquia” i ja quë no. ¹⁰Jatsi quilha Simón Pedró jahuë saipi tsëcaniquë. Tsëcaxo tsi quilha Malco, naa arati ibo-iboria yonati ja paxtianiquë. Jahuë mëncayá ca pahoqui quilha. ¹¹Paxtia-jahuaquë tsi quilha,

—Mi huaina qui jahari mi saipi nanëhuë. ¿E qui noho Jahëpá ani ca yonoco ayamayamaxëhi ni ëa ra? Aquia ra —i Pedro qui Jesu niquë.

Jodioba chama bo bësojó Jesu niinina

¹²Jatsi pë soldado bo, jato capitán, jodiobá policia bo, tihí cabo Jesu qui tsaminiquë. Tsamixo tsi quilha ja nëxacaniquë pë. ¹³Nëxaxo tsi Anás xobo qui pari Jesu ja bocaniquë. Caifás raisi ja ini quilha. Jabi toa año no tsi arati ibo ba chama Caifás ini quilha. ¹⁴Jabi jodiobo yobanish ca Anás tsi xo naa, “Oquë tsi xo nohiria bo bax huësti ca joni rësöhaina” inish cato.

Pedró Jesu ocahuanina

Mateo 26.69-70; Marcos 14.66-68; Lucas 22.55-57

¹⁵Jabi Jesu cho Pedro caniquë. Ja cho ë caniquë ëa ri, naa Jesu rabëti huëtsa. Jabi ëa Anás cahëni quilha, naa arati ibo-iboria iqui cato. Ja quëshpi tsi Jesu ya arati ibo-iboria xobo huënënë ca mai qui jicoti mëtsa ë iniquë.

¹⁶Jiconoma Pedro ini quilha. Caiti cacha nii quilha. Jatsi cacha ë caniquë, caiti obëso ca xotaco qui chanixëna, huënë qui Pedro jicomacatsi na. Jatsi Pedro ë jicomaniquë ra. ¹⁷Jatsi ë bëta jicojano tsi

—Tonia Jesu rabëti xo mia ra —i caiti quëmëpi ca xotaco niquë Pedro qui.

Jatsi quilha,

—Jahuë rabëti ma xo ëa ra —i Pedro niquë rë.

¹⁸Jabi matsi iqui tsi toá ca policia bo, yonati bo, tihí cabá chihi maponiquë. Mapohax toá tsi quilha ja yohocaniquë. Jato bëta niiniquë Pedro ri, yohohi na.

Anás Jesu nicanina

Mateo 26.59-66; Marcos 14.55-64; Lucas 22.66-71

¹⁹Jatsi quilha jahuë rabëti bo, ja tiisimahaina, tihí cabo yoati tsi arati ibo ba chamá Jesu nicaniquë. ²⁰Jatsi Jesú quëbiniquë:

—Bëroria tsi nohiria bo qui ë chaniniquë ra. Mato catiti xobo bo, arati xobo, tihî cabo xo tsi ë tiisimapaoniquë, naa jodiobo tëquë catihai cato xo na. Jonë tsi ë chaniyamaniquë ra. ²¹Ja quëshpi tsi, ¿jëniriixo tsi ëa nicahai? Noho chani nicanish cabo nicahuë ra. E yoani ca cahëcani quiha ra —i jato chama qui Jesu niquë.

²²Jatsi pë toá ca nii ca soldadó Jesu bëpaishaniquë pë.

—¿Toca tsi arati ibo ba chama quëbihi ni mia pa? —i ja qui soldado niquë.

²³Jatsi quiha Jesú quëbiniquë:

—Anoma ca pi ë chanirohano tsi ëa nicamahuë. ¿Jëniriixo tsi ëa mi bëpaishaha pa, jabija ca ë chaniquë no? —iquiina.

²⁴Jatsi arati ibo-iboria Caifás qui Anás Jesu raaniquë. Jari nëxë Jesu ini quiha.

Pedró Jesu ocahuatëquëninina

Mateo 26.71-75; Marcos 14.69-72; Lucas 22.58-62

²⁵Jabi chihi tahë tsi quiha jari nii quiha Pedro iniquë, yohohi na. Yohojano tsi quiha ja qui chanitsi toá ca joni bo niquë:

—¿Jesu rabëti ma ni mia ra? —i ja qui jaca niquë.

Jatsi quiha,

—Jahuë rabëti ma xo ëa ra —i Pedro niquë rë.

²⁶Jatsi quiha Pedro qui ibo-iboria yonati chaniniquë, naa paxtiahacanish cato jimibo:

—¿Huerto xo tsi Jesu ya mia ë jisyama-yamaha? —iquiina.

²⁷Jatsi quiha,

—Ea ma xo ra —i Pedro niquë rë.

Ja quiaquë tsi quiha patiarî bënë quëotapiniquë.

Pilato bësojó Jesu niinina

Mateo 27.1-2, 11-14; Marcos 15.1-5; Lucas 23.1-5

²⁸Jaquirëquë Caifás xobo jisbaya tsi quiha romanoba chama xoboria qui Jesu ja bocaniquë. Baquishmari ja ini quiha. Jahuë xoboria qui cahëhax tsi quiha ja jicoyama-caniquë. Carayanaba xobo qui jicohai jodiobo qui yoi ini quiha, jato jabi pasomaha ja ini quëshpi na. Jató qui roa quiha. Jicorohapihi tsi jato pascua fiesta oriquiti mëtsama ja iquë acani quiha. ²⁹Jatsi quiha cacha Pilato caniquë jato qui.

—¿Jahuë naa joni qui quësocanai? —i jato qui ja niquë.

³⁰Jatsi quiha,

—Anoma ca pi ja ayamarohano tsi mi qui no bëyamaquë aquë ra —i jaca niquë.

³¹Jatsi quiha Pilató jato quëbiniquë:

—Bicahuë. Mato yobá tsi copihuë —iquiina.

Jatsi quiha,

—Naa joni namëcasqui noa ra. Romanoba yoba pasomaha tsi xo toa joni no namëhaina rë —i jaca niquë.

³²Nëca tsi Jesú yoani ca jatihuahacani quiha, naa ja rësohai ca quinia yoati ja yoaniquë no. ³³Jatsi jahuë xoboria qui jahari Pilato cahaca tsi Jesu ja bënëcaniquë. Bënëhax,

—¿Jodioba chama-chamaria ni mia? —i Jesu qui ja niquë.

³⁴Jatsi quiha Jesú quëbiniquë:

—¿Mi quima johi ni mi nicahana? ¿Tonia ëa yoati huëtza bá mia yoayamayamaha? —iquiina.

³⁵Jatsi,

—¿Jodio ë nori ca shinahai? Mi jimibo, jato arati ibo bo, tihi cabo tsi xo toa ë qui mia mëahax cabo ra. Jatsi, ¿jahuë anoma ca mi aca sa? —nëa tsi Jesu qui Pilato nëcaniquë.

³⁶ Jatsi quiha Jesú quëbiniquë:

—Maí ca nohiria chama ma xo ëa ra. Nëa xo tsi yonayamaquia. Jasca, nëa xo tsi ë yonarahapino tsi noho yonati bo nianaquë aquë, jodioba chama bo qui ë mëahacayamano. Mai xoma xo ë yonahaina ra —nëa tsi Jesu nëcaniquë.

³⁷ Jatsi quiha,

—¿Chama ni mia pa? —i Pilato niquë.

—Jabija. Chama xo ëa ra. Ja tsi xo toa ë conina. Mai qui ë joniquë jabija ca yoaxëna. Jabi noho rabëti bo tsi xo toa jabija ca nicacanaibo tëquë —i Pilato qui Jesu niquë.

³⁸ Jatsi quiha,

—¿Jahuë ni toa jabija ca sa? —i Pilato niquë.

Chanihax cacha jodiobo qui Pilato catëquëniquë. Cahax,

—Yama tsi xo naa joni anoma ca acana iquia —i jato qui ja niquë—. ³⁹ Mato pascua fiesta no tsi presó ca achiquinish ca huësti ca ë paquëmapaoniquë. Noba jabi quiha. ¿Japa jaboqui mato jodiobo chama-chamaria mato bax paquëmaxëhi ni ëa? —i jodiobo qui Pilato niquë, Jesu paquëmacatsi na.

⁴⁰ Jatsi quiha jato joi jodiobá choshaniquë. Jato qui yoi ini quiha ja yoanina. Jaha tsi,

—Naa joni paquëmayamahuë ra. Barrabás paquëmahuë ra —i jaca niquë pë. Jabi yomaxëni ca joni naa Barrabás ini quiha.

19

Jesu ja namëcanina

Mateo 27.15-31; Marcos 15.6-20; Lucas 23.13-25

¹ Jatsi Pilató Jesu biniquë. Bixo tsi quiha ja rashamaniquë rispichí no. ² Jaquirëquë moxa chaha soldado bá quëconiquë. Quëcoxo tsi quiha ja machëquërëxacaniquë pë. Jatsi quiha raiti shini ja sahuëmacaniquë; naa chama-chamaria sahuëti. ³ Sahuëmahax ja qui soldado bo bocaniquë joi-huaxëna.

—¡Viva! ¡Viva, jodioba chama-chamariá! —i jaca niquë pë.

Joihuaxo tsi quiha ja bëpaishacaniquë pë.

⁴ Jaquirëquë cacha Pilato catëquëniquë jodiobo qui.

—Cacha mato qui Jesu boquia. Yama tsi xo toa anoma ca ja acana iquia. Ja bësoxëti xo ra —i jato qui ja niquë.

⁵ Jatsi xobo cacha Jesu caniquë. Moxa chaha, raiti shini, tihi cabo sahuë ja ini quiha. Jatsi,

—Nëa xo mato joni ra —i jato qui Pilato niquë.

⁶ Jatsi quiha arati ibo bo, jato yonati bo, tihi cabá Jesu jisniquë. Jisi tsi,

—Cruzó tsi tooxahuë. Cruzó tsi tooxahuë —i jaca niquë pë.

Jatsi quiha,

—Bocahuë. Asasyamaxo ëa ra. Mamëxo tsi cruzó tsi tooxacahuë pë. Yama tsi xo anoma ca ja acana iquia ra —i jato qui Pilato niquë.

⁷ Jatsi jodiobá quëbiniquë:

—“Ja namëhacati xo” ii quiha noba yoba ra, “Dios Baquë xo ëa” i ja ni quëshpi na —i jaca niquë.

⁸ Nichahax raquëriatsi Pilato niquë. ⁹ Raquëhi tsi jahuë xoboria qui ja jicotëquëniquë Jesu qui chanitëquëhi na.

—¿Jahuënia ax mi joni? —i ja qui Pilato niquë.

Quëbiyamaniquë Jesu; pasi quiha.

¹⁰ —¿Ea quëbiyamahai pa? ¿Noho chama cahëyamahai? Mia paquëmati chama, mia cruzó tsi tooxamati chama, tihi cabo jaya xo ëa ra —i Jesu qui ja niquë.

¹¹ Jatsi Jesú quëbiniquë:

—Mana quïma mi qui chama ayamahacarohapino tsi ëa namëti chama mi jayamaquë aquë ra. Jaha tsi mi jocha oquë tsi xo toa mi qui ëa mëahax cato jocha ra —nëa tsi quiha Pilato qui Jesu nëcaniquë.

¹² Jatsi quiha Pilató Jesu paquëmacasniquë nicaxo na. Jama, jahari jodiobá quënaniquë:

—Paquëmapihi tsi romanoba chama-chamaria rabëti ma xo mia pë. Romanoba chama pasomaha tsi xo toa “Chama-chamaria xo ëa” iquii cato. Tocahi quiha naa Jesu ra —i jaca niquë.

¹³ Jesu qui ja quësocanai ca nicaxo tsi quiha Pilató Jesu boniquë, cacha xo copixëna pë. Bohax tsi quiha jahuë copiti tshohi ja tsahoniquë ja qui quësoxëna. Tsahohax,

¹⁴ —Nëá xo mato chama-chamaria Jesu ra —i jodiobo qui ja niquë.

Jabi pascua fiesta chiho ca bari ja ini quiha. Matoroco bari quiha. ¹⁵ Jatsi quënantsi quiha nohiria bá huaniquë:

—Ahuë ra. Ahuë ra. Cruzó tsi tooxahuë ra —i jaca niquë.

Jatsi quiha,

—¿Mato chama-chamaria tooxaxëhi ni ëa pa? —i jato qui ja niquë.

¹⁶ Chanixo tsi jato qui Pilató Jesu mëaniquë cruzó tsi tooxahacati.

Cruzó tsi Jesu ja tooxacanina

Mateo 27.32-44; Marcos 15.21-32; Lucas 23.26-43

¹⁷ Jatsi jodiobá Jesu biniquë. Yaca cacha ja mëpihacani quiha jahuë cruz iahaina. Mapo Xao Ya icanai ca maca qui tsi quiha ja bocaniquë, naa jodioba joi tsi “Gólgata” quënahacani cato. ¹⁸ Toa xo tsi Jesu soldado bá tooxaniquë cruzó no. Jasca, ja bëta dos ca joni huëtsa bo ja tooxacaniquë, huësti ca jahuë mëñëcayá no, huëtsa jahuë mëxojó no. Nëpax tsi quiha Jesu cruz iniquë.

¹⁹ Jatsi quiha papi ó tsi Pilató quëñëniquë cruzó tsi janahacati chani.

“Nazarét ca Jesu. Jodioba chama-chamaria” i ja quëñëni ca niquë.

²⁰ Jabi Jerusalén basima tsi Jesu tooxahacani quiha. Ja quëshpi tsi huëstima ca jodiobá Pilató quëñëni ca jisniquë. Tres ca joi bá tsi jahuë chani quëñëhacani quiha, naa jodioba joi, griego joi, romanoba joi. ²¹ Jabi arati ibo bo qui anoma ini quiha Pilató quëñënina. Jatsi quiha Pilato qui ja chanicaniquë:

—Mi quëñëha ca rarinamahuë. “Jodioba chama-chamaria” quëñëyamana rë. Jama, “ ‘Jodioba chama-chamaria xo ëa’ ii quiha naa joni” quëñëhuë —nëa tsi quiha Pilato qui jaca niquë.

²² Jatsi quiha,

—E quëñëha ca rarinamayamaquia ra —i Pilato niquë.

²³ Jatsi cruzó tsi Jesu tooxaxo tsi quiha jahuë raiti soldado bá biniquë. Bixo tsi cuatro ca maa ca ja oquëxhuacaniquë jamë bax na. Jabi cuatro ca soldado bo ja icani quiha, naa jahuë raiti ó quëñënish cabo. Jatsi quiha jahuë camisaria jiaxëni ca ja bicaniquë, naa quëshëquë yama cato. ²⁴ Bichi tsi soldado bo nëcaniquë:

—Jahuë camisaria no jaxcayamano ra. Suerte bo no niaparino. Toca tsi jahuë camisaria biti ca cahëxëqui noa ra —i jaca niquë.

Toca tsi ja acanai cató tsi Quëñëhacani cabo jatihuahacani quiha. Jabi Quëñëhacani cabá yoani ca tsi xo naa:

“Jato xērēquē xo tsi noho sahuēti bo ja oquēxhuacaniquē.
Noho camisaria quēshpi tsi suerte bo ja niacaquē” iquiina.
Jabi toca tsi soldado bá aniquē ra.

²⁵ Jabi cruz tapai quiha Jesu jahēhua María, jahuē jahēhua noma, Cleofas ahuini María, María Magdalena, tihi cabo iniquē. ²⁶ Jasca, jahuē jahēhua tapai nii ē iniquē, ēa ri. Jatsi noqui, naa ēa, jahuē jahēhua María, tihi cabo Jesú jisniquē. Jisi tsi,

—Jaboqui mi baquē tsi xo toa, caí —i jahēhua qui ja niquē.

²⁷ Jatsi ē qui ja chaniniquē:

—Noho jahēhua mi otono, mi ihua ó mi bēsohai jascaria —iquiina.

Japi noho xobo qui Jesu jahēhua ē boniquē racati.

Jesu nanina

Mateo 27.45-56; Marcos 15.33-41; Lucas 23.44-49

²⁸ Jaquirēquē jahuē maí ca yonoco jatihuahacani ca Jesú cahēniquē. Jatsi, —Tēshinaquia —i ja niquē, Quēnēhacanish cabá yoani ca jatihuaxēna.

²⁹ Jabi toá tsi nii quiha chomo iniquē. Nopi ca jēnē jayani quiha. Jatsi toa jēnēria qui tatē ja moosacaniquē. Moosaxo tsi quiha tahuá tsi tatē ja rēbiquiriahacaniquē. Jatsi jahuē janá qui ja tērocaniquē nopi ca jēnē amaxēna.

³⁰ Jēnēria acax tsi,

—Jatiquē noho yonoco ra —i Jesu niquē.

Jatsi ja tēpiniquē. Tēpihax ja naniquē.

Jesu xao bo tēcachayamanina

³¹ Jabi chitahēpaimaria quiha jodioba joiti bari iniquē. Ja quēshpi tsi Pilato qui jodiobo chaniniquē:

—Cruzó tsi tooxahacani caba huico bo tēcaritsacahuē, ja rēsohuēnicano. Jato yora bo botēmahacaxēti xo —iquiina.

Jabi jodiobo qui anoma ini quiha cruzó tsi yora rotamēhaina, naa jato joiti barí no. Bari-bariria jato jodioba joiti bari ini quiha. Jato qui roa quiha.

³² Jaha tsi quiha soldado bo bocaniquē jato huico bo tēcaxēna. Jatsi Jesu ya ca tooxahacani caxo tsi quiha huico pari ja tēcacaniquē, mēri tsi ja rēsocano.

³³ Tēcax Jesu qui ja bocaniquē. Ja qui cahēxo tsi quiha bēsoyama ja iqui ca ja jiscaniquē. Ja quēshpi tsi jahuē huico bo ja tēcayamacaniquē. ³⁴ Jama, soldado huēstítá Jesu yora quēpē tsacaniquē jahuē saipí no. Jatsi jimi, jēnēpaxa, tihi cabo xapaquēniquē. ³⁵ Jasca, ja rēsohai ca ē jisniquē ēa ri. Jabija tsi xo naa ē quēnēhaina. Quiayamaquia. Parayamaquia, ja qui ma chitimicano mato ri. ³⁶ Jabi nēca tsi Jesu naniquē Quēnēhacanish cabo jatihuahacaniquē iquish na, naa “Jahuē xao bo tēcayamacaxēcani quiha” ini cato ó no. ³⁷ Jasca, “Ja tsacani ca qui tsayaxēhi quiha nohiria bo” ii quiha Quēnēhacanish caba iti huētsa ó no.

Jesu maihuahacanina

Mateo 27.57-61; Marcos 15.42-47; Lucas 23.50-56

³⁸ Jaquirēquē quiha raquēhax tsi Arimatiá ca racanish ca José caniquē Pilato qui. Caxo tsi quiha Jesu yora ja bēnaniquē maihuaxēna.

Jatsi quiha,

—Bihuē —i ja qui Pilato niquē.

Jatsi quiha Jesu yora bichi ja caniquē. Jabi Jesu rabēti ja iqui ca ja yoyamaniquē jodioba chama bo qui raquēhi na. ³⁹ Jasca, ja bēta Nicodemo caniquē jaa ri, naa baquichá Jesu qui canish cato. Yora maihuati shomahuati perojome, naa mirra, áloes roi hacani ca chēxēti ja bēcaniquē. Ihuē ini quiha ja bēcani ca chēxēti. ⁴⁰ Jatsi Jesu yora ja bicaniquē. Bixo tsi quiha ja

yabocaniquë, chëxëti tsi cohohuahaina. ⁴¹ Jabi cruzó tsi Jesu tooxahacani ca basima huerto ini quiha. Toá tsi maiquini paxa ca ini quiha, naa maihuahama cato. ⁴² Ja bamayamacaniquë, jato jodioba joití bari chitahëpaimaria ini quëshpi na. Jaha tsi toa maiquini qui mëri tsi Jesu ja maihuacaniquë, cruz basima ja ini quëshpi na.

20

Jesu bësotëquënina

Mateo 28.1-8; Marcos 16.1-8; Lucas 24.1-12

¹ Domingo baquishmari, jari mitsëmono tsi quiha maiquini qui María Magdalena caniquë. Caxo tsi quini quëbëti maxax चाहिताxëni ja yopaniquë. Bahama ja tarahacani quiha. ² Yopahax jahari ja jabaniquë Simón Pedro, ëa, tihi cabo yoaxëna. Jabahax,

—Maiquini quima noba Iboba yora ja tsëcacahitaquë rë. ¿Jahuënia cara jahuë yora ja janacahitaha sa? Cahëyamaqui noa rë —i ja niquë.

³ Jatsi quiha Pedro, ëa, tihi cabo jahuë maiquini qui bocaniquë jisxëna. ⁴ No jabanabëquiniquë. Jatsi Pedro ë xononiquë. Jariapari jahuë maiquini qui ë cahëniquë. ⁵ Cahëxo tsi ë naisniquë. Jahá ca jahuë yora yabohacanish ca raiti ë jisniquë caiti xo na. Jari quini qui ë jicoyamaniquë. ⁶ Jatsi ë cho Pedro joniquë. Johax quini qui ja jiconiquë jisxëna. Yabohacanish ca raiti ja jisniquë ja ri. ⁷ Jatsi Jesu bëmána yabohacaha ca raiti pistia ja jisniquë. Iti huëtsá tsi ja ini quiha pa; yabohaca roha. Raiti tixë basi jahuë mapo raiti ini quiha. ⁸ Jatsi maiquini qui ë jiconiquë ëa ri. Jicoxo tsi niabëriahacanish ca raiti pistia ë jisniquë ëa ri. Jisi tsi Jesu bëso iqui ca ë cahëniquë ra. ⁹ Toatiyá tsi jari Jesu yoati Quënëhacanish cabo no cahëyamariani quiha, naa “Rësonish cabo quima ja tërohacati xo” iquii cato. ¹⁰ Tsayahax jahari noba xobo qui no caniquë.

María Magdalena qui Jesu jisiquinina

Marcos 16.9-11

¹¹ Jabi jahari quiha jahuë maiquini qui María Magdalena caniquë. Toá tsi arahi ja iniquë, quini quëmëpi nüi iquiina. Arapama tsi quiha ja rëniniquë naisxëna. ¹² Naisxo tsi quiha dos ca ángel bo ja jisniquë. Raiti joxo sahuë ja icani quiha. Jasca, Jesu janahacani cató tsi tsaho ja icani quiha; huësti ca jahuë matoró no, huësti ca jahuë tahë rësó no.

¹³ Jatsi quiha,

—¿Jënihax tsi arahai, cáí? —i ja qui ángel bo niquë.

—Noho Iboba yora ja bocahitaquë rë. Ja janacana ca iti cahëyamaquia rë —i María niquë.

¹⁴ Chanipama tsi quiha ja bopinaniquë. Jatsi Jesu ja jisniquë pa. Jama, Jesu ja iqui ca ja cahëyamani quiha.

¹⁵ Jatsi quiha,

—¿Jënihax tsi arahai, cáí? ¿Tsohuë mërahai? —i ja qui Jesu niquë.

Jabi toa mai obëso ca ja iqui ca María jascahuani quiha. Ja quëshpi tsi ja qui chanitsi María niquë:

—¿Jahuë yora mi bichi? ¿Jahuënia tsi mi janaha? Ea yoahuë; ë bichi cano —i ja qui María niquë.

¹⁶ Jatsi quiha,

—María —i ja qui Jesu niquë.

Ja qui bësöhax tsi,

—Maestro pa —i María niquë.

17 —Ea achariayamahué. Jari noho Jahëpa qui ë tëronoyamaquë ra —i ja qui Jesu niquë—. Dios, naa noho Jahëpa qui caquia. Jabi mato Dios, mato Jahëpa xo noho Jahëpa ri. Ja qui ë cahai ca yoati tsi ëbë xatë bo yoata —nëa tsi María Magdalena qui Jesu nëcaniquë.

18 Jatsi quiha Jesu rabëti bo qui María caniquë yoacatsi na.

—Ibo Jesu ë jisquë ra —i jato qui ja niquë.

Jatsi ja qui Jesú yoaha ca jato qui ja yoaniquë.

Jahuë rabëti bo qui Jesu jisiquinina

Mateo 28.16-20; Marcos 16.14-18; Lucas 24.36-49

19 Jabi domingó tsi quiha manihí Jesu rabëti bo iniquë. Caquë quiha bari. Mitsëmono quiha. Jasca, xobo caiti quëbëhacani quiha, jato jimibo qui ja raquëcani iqui na. Ja manicano tsi quiha jato xërëquë tsi Jesu niitapiniquë pa.

—Joquë ëa ra. Raquëyamacana —i jato qui ja niquë.

20 Chanixo tsi quiha jahuë mëquë bo, jahuë taquëpë, tihi cabo jato ja jismaniquë. Jatsi quiha jahuë rabëti bo ranirianiquë jato Ibo jisi na. 21 Jatsi jato qui Jesu chanitëquëniquë:

—Raquëyamacana. Mato raquia noho chani yoati, naa ëa noho Jahëpá raani jascaria —i jato qui ja niquë.

22 Jatsi quiha jato ja xoohaniquë. Xoozacax tsi,

—Espíritu Santo bicahuë —i jato qui ja niquë—. 23 Masahacati xo toa nohiria jocha ma shina-bënohaina. Jama, jato jocha pi ma shina-bënoyamano tsi masahacayamaxëqui mato —nëa tsi quiha jahuë rabëti bo qui Jesu nëcaniquë.

Tomás Jesu jisnina

24 Jabi jato bëta Tomás, naa Gemelo icanai ca iyamani quiha, naa jato qui Jesu jisiquiquë no. Jabi doce ca rabëti bo ó ca huësti ca ja ini quiha. 25 Ja quëshpi tsi,

—Ibo no jisquë ra —i Tomás qui jaca niquë.

—¿Ocama ni? —i Tomás niquë—. Chahahuanox pari tsi jahuë mëquë tsayacasquia ra. Jasca, clavó tsacahitaha ca iti jiscasquia. Jahuë clavo quiní tsi noho mëtsis ë raaparino ra —nëa tsi quiha jato qui ja nëcaniquë.

26 Jatsi huësti semana huinocaniquë. Naquëtë tsi manihí quiha ja itëquëcaniquë. Toatiyá tsi jato bëtá Tomás iniquë jaa ri. Jasca, quëbëhacani quiha xobo caiti. Ja manicano tsi quiha naquëtë tsi jato xërëquë tsi Jesu jisiquitapiniquë. Nii quiha. Jatsi,

—Joquë ëa ra. Raquëyamacana —i jato qui Jesu niquë.

27 Jatsi quiha Tomás qui Jesu chaniniquë:

—Nëa mi mëtsis raahuë. Noho mëquë tsayahué. Nëa mi mëquënë tsi noho taquëpë mamëpa. ¿Jari chahahuayamacatsai pa? Ea chahahuahuë —i ja qui Jesu niquë.

28 Jatsi quiha,

—Noho Ibobá, noho Diós —i Tomás niquë quëbihi na.

29 Jatsi quiha,

—Chahahuaqui mia, ëa mi jisi iqui na. Jama, shoma tsi xo toa ëa jis-haxma tsi ë qui chitimicanaibo ra —i ja qui Jesu niquë.

Jesú anina

30 Jabi huëstima ca jisti huëtisa bo Jesú aniquë jahuë rabëti bo bësojo xo na. Naa libro ó tsi tihi ca jahuë bo quënëyamaxëquia; huëstima quiha. 31 Jama, naa jisti bo quënëhacaquë jaha no pasohai ca Xabahamati Ibo Jesu nori ca ma

cahëno. Jasca, Dios Baquë ja nori ca ma cahëno. Jabi bëso-bësopaoxëhi quiha ja qui chitimicanaibo.

21

¹ Jaquirëquë noqui, naa jahuë rabëti bo qui Jesu jisiquitëquëniquë ia Tiberias quëmapó no. Jabi nëca tsi noqui ja jisiquiniquë. ² Simón Pedro, Tomás, Natanael, naa Galileá ca yacatá racanish cato, Zebedeo baquë bo, Jesu dos ca rabëti bo, tihí cabo no iniquë ia quëmapó no. ³ Jatsi,

—Sani ai caquia ra —i noqui Pedro niquë.

Jatsi,

—Mi bëta caqui noa noqui ri —i no niquë.

Jatsi noti qui no jiconiquë noqui tëquëta. Jicoxo tsi mahitsa no tana-tanashiniquë rë. Yama quiha. ⁴ Huëaquë tsi quëmapó ca joni nii ca no jisniquë. Jesu ja iqui ca no cahëyamani quiha.

⁵ Jatsi,

—¿Japa? ¿Mëquë ya ni mato, joni bá? —i noqui ja niquë.

—Yamaha rë —i no niquë.

⁶ Jatsi,

—Noti mënëcayá tsi mato nishi niatsacana. Toá ca bixëqui mato ra —i noqui ja niquë.

Jatsi mënëcaya ó tsi noba nishi no nianiquë. Anomaria sani ini quiha. Jahari nishi xërëtimaxëni no iniquë rë, tihiria ca sani ini quëshpi na.

⁷ Jatsi Pedro qui ë chaniniquë:

—Tonia Ibo tsi xo toa ra —iquiina.

Jatsi Pedró jahuë sahuëti sahuëniquë. Tsoboco ja ini quiha. Sahuëhax jënë qui ja biisiquë Jesu qui caxëna. ⁸ Noti tsi noqui tëxë chitëniquë, sani rëamë ca nishi xërëhi na. Quëmapo basima no ini quiha, cien metros roha. ⁹ Rërëxo tsi chihi rëxquë no jisniquë. Jahá ca sani imahi ja ini quiha. Toá tsi mapari ini quiha jaa ri.

¹⁰ Jatsi noqui Jesu chaniniquë:

—Ma bichi ca sani tihí roha ca nëri bëcana —i noqui ja niquë.

¹¹ Jatsi noti qui Pedro jiconiquë sani bixëna. Quëmapo qui nishi ja xërëniquë. Rëamë tsi nishi ini quiha; ciento cincuenta y tres sani quiha. Tësëyamaniquë nishi pa, huëstima ja iquë ri. ¹² Jatsi,

—Nëri bëcahuë. ¿Sani piyamacanai? —i noqui Jesu niquë.

Jabi Ibo Jesu yoi ja iqui ca no cahëniquë. Ja tsi xo toa “¿Ibo yoi ni mia?” iyamanoniquë.

¹³ Jatsi mapari bichi Jesu caniquë. Bixo tsi noqui ja mëaniquë. Sani noqui ja aniquë piti.

¹⁴ Jabi tres tsi ja iniquë, naa noqui Jesu jisiquihaina bësotëquëhax na.

Simón Pedro ya Jesu chaninina

¹⁵ No oriquiquë tsi quiha Simón Pedro Jesús nicaniquë:

—¿Tëxë bo oquë tsi ëa noihai, Jonás baquë Pedró? —iquiina.

Jatsi,

—Jaahuë, Ibobá. Mia noiquia. Toa cahëqui mia ra —i Pedro niquë.

Jatsi Jesús quëbiniquë:

—Noho oveja bo, naa ëa chahahuacanaibo tiisimana —i ja qui ja niquë.

¹⁶ Jatsi Jesús Pedro nicanitëquëniquë:

—¿Ea noiyoihai? —iquiina.

—Jaahuë, Ibobá. Mia noiquia. Toa cahëqui mia ra —i Pedro niquë.

Jatsi,

—Noho oveja bo obëso mi ino ra —i ja qui Jesu niquë.

¹⁷ Jatsi quiha Jesú Pedro nicatëquëniquë pa:

—¿Ea noiyoihai, Jonás baquë Pedró? —iquiina.

Jatsi Pedro cohuëniquë, tres tsi “¿Ea noihai?” i Jesu ni iqui na.

—Jatiroha ca cahëqui mia, noho Ibobá. Mia noiyoiquia. Toa cahëqui mia ra —i Jesu qui Pedro niquë.

Jatsi quiha,

—Noho oveja bo tiisimana —i ja qui Jesu niquë—. ¹⁸ Jabi jaha mi quëëhai ca mi a-apaoniquë, shinapayo mi iquë no. Jama, mi sirinaquë tsi mia nëxacaxëcani quiha nohiria bo. Mi cacasyamahai ca qui mia mëpicaxëcani quiha mia namëxëna —nëa tsi quiha Pedro qui Jesu nëcaniquë.

¹⁹ Jabi Pedro rësohai quinia Jesú jismani quiha nëca tsi ja chaniquë no. Jabi Pedro rësohai cató tsi Dios oquë jismahacaxëti ini quiha. Jatsi,

—Ea banahuahuë —i ja qui Jesu niquë.

Jesu rabëti huëtsa

²⁰ Jatsi bopinaxo tsi ëa yoi Pedró jisniquë. Jato cho banahuahi ë ini quiha. Jabi Jesu rabëtiria ë ini quiha ëa ri. Jabi no oriquino tsi Jesu tapai tsahonish ca ëa xo naa, naa “¿Tsohuë ni toa mia pasomaha cato, Ibobá?” iquish cato.

²¹ Jatsi ëa jisi tsi,

—¿Japa toa joni, Ibobá? ¿Jënahuariahax rësoxëhi ni? —i Pedro niquë ëa yoati na.

²² Jatsi quiha Jesú Pedro quëbiniquë:

—Toa joni shinayamahuë. Mi shina ma xo ja rësohaina. Ja bësopino tsi jahari ë joxëquë rohari noho shina tsi xo toa. Ea mi banahuati xo iquia —iquiina.

²³ Jatsi pë “Rësoyamaxëhi quiha Juan” itsi nohiria bo niquë. Jabi toa mahitsa ca chani rëtsamani quiha chahahuacanaibo xërëquë no rë. Jabi “Rësoyamaxëqui Juan” iyamaniquë Jesu. Jama, “Mi shina ma xo ja rësohaina. Ja bësopino tsi jahari ë joxëquë rohari noho shina tsi xo toa. Ea mi banahuati xo iquia” i Pedro qui ja ni quiha.

Jatihaina

²⁴ Jabi Juan xo ëa, naa carta quënëhai cato. Jabija tsi xo naa ë quënëhaina ra. Jabija ca ë quënëhai ca nori ca cahëqui mato ri. ²⁵ Jabi huëstimaria tsi xo toa Jesú anina ra. ¿Jënahuariaxo raca ja ani ca tëquë no quënëna? Jatiroha ca ë quënërohapino tsi xëa narisquë aquë janati ra.

Los Hechos De Los Apostoles

¹ Noho jariapari ca cartá tsi Jesú yoati mi qui è quënëniquë. Quënëxo tsi jatiroha ca Jesú anina, ja tiisimayonina, tihi cabo mi bax è quënëniquë, naa jahuë yonoco ja chitahëhuatiya rohari ja tërononiquë rohari. ² Tihi tsi è quënëni quiha. Jama, tërononox pari tsi quiha ja bini ca rabëti bo Jesú tiisimaniquë Espiritu Santo chamá no. ³ Jasca, bësohax huëstima tsi quiha jato qui ja jisiquiniquë. Cuarenta bari no tsi quiha jato bëta ja ini quiha. Jato bëtapama tsi quiha Diós ototai ca yoati ja chani-chaniniquë.

⁴ Jahuë rabëti bo ya rabënapama tsi quiha jato qui ja nëcaniquë:

—Jari Jerusalén ax riquiyamacana. Nëa xo tsi manaparicana, naa noho Jahëpá mato qui raacatsai ca quëshpi na. “Espiritu Santo raaquia” i ja ni quiha, naa mato è yoani jascaria. ⁵ Jënë tsi mato Juan yamabá ashimaniquë. Jama, ichariama bari no tsi Espiritu Santó tsi ashimahacaxëqui mato ra —nëa tsi jato qui Jesu nëcaniquë.

Mana Jesu tërohacanina

⁶ Jabi Jesu ya rabënapama tsi quiha jahuë rabëti bá nicaniquë:

—¿Jaboqui tsi Israél cabo qui jato mai jahari axëhai, Ibobá? —i ja qui jaca niquë.

⁷ Jatsi Jesú jato quëbiniquë:

—Bari bo, fecha bo, tihi cabo janati Ibo tsi xo noho Jahëpa ra. Toa bari fecha bo cahënomá xo mato ra. ⁸ Jama, ma cahëxëti ca tsi xo naa: Mato qui Espiritu Santo jono tsi chama bixëqui mato. Jatsi caxëqui mato ëa yoati chanixëna. Jatsi Jerusalén, jatiroha ca jodioba mai, samariaba mai, nëama ca carayanaba mai, tihi cató tsi ëa yoati chanixëqui mato ra —i jato qui Jesu niquë.

⁹ Chanihax tsi quiha nai qui ja tërohacaniquë. Ja tëronono tsi quiha ja tsaya-tsayacanicuë. Jatsi quiha tsëmo qui ja jiconiquë. Caquë ra. Jisnoma ja ini quiha. ¹⁰ Jabi ja tëronohai ca ja tsaya-tsayacano tsi quiha dos ca ángel bo jisiquiniquë jato tahë no. ¹¹ Jisiquihax ja nëcacaniquë:

—¿Jëniriahax nëá tsi niicanai pa, naa nai tsaya-tsayacanaina, Galileá ca joni bá? Jotëquëxëhi quiha naa mato ó ax tëronohax ca Jesu yoi ra. Ja tëronohai ca ma jisquë. Toca tsi jahari joxëhi quiha ja bacaxëquë no —i jato qui ángel bo niquë.

Matías ja bicanina Judas iti biti

¹² Maca Olivo Ya jisbëria tsi quiha Jerusalén qui ja bacacanicuë, naa jahuë Chani chitahëhuati ibo bo. Cariama quiha. ¹³ Yaca qui cahëhax tsi quiha jato naquëtë qui ja jicocanicuë. Mana jato racati ini quiha. Toá tsi ja manicaniquë, naa Pedro, Jacobo, Juan, Andrés, Felipe, Tomás, Bartolomé, Mateo, Alfeo baquë Jacobo, Simón, naa gobierno pasomaha chaninish cato, Jacobo noma Judas. ¹⁴ Toá tsi iniquë yoxa bo ri, naa Jesu jahëhua, jahuë noma bo, tihi cabo.

¹⁵ Toatiyá tsi quiha Pedro niiniquë chahahuacanaibo qui chanixëna. Toá tsi ciento veinte ca nohiria mani ini quiha. Nihax ja nëcanicuë:

¹⁶ —Jatihuahacati nori quiha Quënëhacanicuë cabo iquë ra, naa Espiritu Santó David yamabo chanimanina. Jabi Judas yamabá, naa Jesu qui tsamicanish cabo mëpinish cató ani ca yoati David yamabo chanini quiha. ¹⁷ Jasca,

no bëta Judas yamabo yonocobëquinapaoni quiha. ¹⁸ Jama, ja ani ca yoi ca quëshpi tsi parata ja bini quiha pë. Bixo tsi quiha mai pistia ja copini quiha. Toá tsi ja rësoniquë paquëhax na. Poshini quiha jahuë jatoquë. Jatsi jahuë poco xapaquëni quiha. ¹⁹ Jatsi quiha “Mai Jimi Ya” toa mai Jerusalén ca nohiria bá quënaniquë nicaxo na. Jato joi tsi quiha “Acéldama” ja icani quiha. ²⁰ Tsayacahuë. Nëca tsi quiha salmos libro ó tsi David yamabá quënéni quiha: “Yoshihuahacaxëti xo jahuë xobo.

Toá tsi nohiria racayamano”
i ja ni quiha.

Jasca,
“Jahuë yonoco huëtsá bino”
ii quiha Judas yoati na.

²¹ Ja tsi xo toa huësti ca joni no bixëti xo jahuë yonoco iti ja bino iquish na. Jasca, no bëta inish ca ja iti nori quiha, naa Jesu ya co-copaonish cato. ²² Juan yamabá Jesu ashimani ca jisni ca ja iti xo. Jasca, jatiroha ca Jesús ayonina, no quima ax ja mëbihacanina, tihi cabo jisti nori ja iti xo. Jasca, “Bëso xo Jesu” i ja xëti nori quiha no bëta —nëa tsi Pedro nëcaniquë jato qui.

²³ Jatsi quiha dos ca joni bo ja bicaniquë. Bichi tsi quiha ja bëhoxcaniquë:

²⁴ —Jatiroha ca joni ba shina naispiquei mia ra. Nëá xo dos ca joni bo. ¿Jëni ca joni mi bichi? Noqui jismahuë ra, ²⁵ naa Chani chitahëhuati iboba yonoco ja ano. Jabi naa yonoco Judás niabëriani quiha rë jahuë iti qui caxëna —nëa tsi ja nëcacaniquë bëhoxhi na.

²⁶ Jatsi quiha suerte bo ja acaniquë cahëxëna. Bëboniquë Matías. Bëbohax once ca Chani chitahëhuati ibo bo qui ja riiniquë.

2

Espíritu Santo jonina

¹ Fiesta Pentecostés icanai ca bari tsëquëquë tsi quiha naquëtë tsi chahuacanaibo tëquë mani iniquë. ² Manipama tsi quiha nai ax johai ca yoshi chamaxëni ca pacotsa ja nicacanicuë. Rëamëni quiha xobo, naa ja tsahocanai cató no. ³ Jatsi quiha chihí jana jisiria ca ja jiscanicuë. Jatiroha cabo qui naa chihí jana japacanicuë mapëxëhax na. Jato mapo tëquë ó nii ja icani quiha. ⁴ Jatsi quiha Espiritu Santo ja rëahacanicuë. Rëamëhax joi jamëri tsi chanitsijanicuë, naa Espiritu Santó jato chanimahai cató no.

⁵ Toatiyá tsi quiha Jerusalén tsi huëstima ca jodiobo racahi iniquë, naa país huëtsa bo ax bëcanish cabo. Dios noicanaibo ja icani quiha. ⁶ Naa yoshini pacotsa ja nicacanicuë jato ri. Nicahax tsi quiha ja quëtsocticuë. Jatsi ja shina-risiquanicuë, jato joi yoi bá tsi ja chanicanai nori quëshpi na. ⁷ Jatsi ja ratë-ratëcaniquë:

—Jisna. ¿Galiléa ca joni bo ma ni naa chanicanaibo pa? ⁸ ¿Jënahuariaxo raca noba joi yoi tsi nicahi ni noa sa? ⁹ Nëá xo Partia joi jaya cabo. Nëá xo Media joi jaya cabo. Nëá xo Elam joi jaya cabo. Jasca, nëá xo Mesopotamia, Judea, Capadocia, Ponto, Asia, tihi ca mai ca nohiria joi bo ra. ¹⁰ Jasca, nëá xo Frigia, Panfilia, Egipto, tihi ca mai ax bëcanish cabo. Nëá xo Africa ó ca Cirene ori ax becanish cabo ra. Jasca, nëá xo Roma ax bëcanish cabo, jodioba arati jabi binish ca carayanabo ri. ¹¹ Jasca, tobi Creta, Arabia, tihi ca mai ax bëcanish cabo. Noba joi yoi bá tsi chanicani quiha pa. Anomaria ca Diós aca ca noba joi tsi yoacani quiha ra —nëa tsi quiha naa nohiria nëcacaniquë.

¹² Jatsi quiha ja ratëyocanicuë. Ratëhax,

—¿Jënahuaría ni sa? ¿Jënipihí ni? —i jaca niquë chaninahí na.

¹³ Jama, huëtsa bá osa-osacaniquë nicaxo na.

—Huëstima ca jënë ja ayocaquë iqui noa. Pahëquë naa joni bo ra —i jaca niquë rë.

Nohiria bo qui Pedro chaninina

¹⁴ Jatsi quiha Pedro niiniquë once ca Chani chitahëhuati ibo bo ya. Niihax chanitsijaniquë joi pistiamá no.

—Ea nicacana, ëbë xatë bá, Jerusalén ca racacanaibá. ¹⁵ Naa joni bo pahëha ca quëscahuaqui mato pë. Pahëyama ca xo iquia. ¿Jënahuariahax ja pahëcana? Tsayacapa. Huëaquë tsi, naa a las nueve roha tsi xo ra. ¹⁶ Jama, ma jisi ca yoati Joel yamabá quënëniquë ra. Ja yoani ca tsi xo naa:

¹⁷ “Jaroha ca barí tsi nohiria bo tëquë qui noho Shina japaxëquia ra” ii quiha Dios.

“Jasca, ëa yoati tsi chanicaxëceni quiha mato baquë bo, mato jahi bo ri.

Jasca, tënamëcaxëceni quiha mato shinapayo bo.

Jasca, namacaxëceni quiha mato siri bo.

¹⁸ Jasca, noho yonati bo, naa joni bo, yoxa bo, tihí cabo qui noho Shina japaxëquia ra toa barí no.

Jatsi ëa yoati tsi chanicaxëceni quiha ra.

¹⁹ Jatsi naipá ca jistiria bo, maí ca jisti bo, tihí cabo jismaxëquia.

Tobixëhi quiha jimi, chihi, chihicohini

²⁰ Jasca, tsëmonaxëhi quiha barí.

Shininaxëhi quiha oxë, naa jimi jascaria.

Tocaxëhi quiha ra, Ibo johaí ca barí tsëquënox pari no.

Anomariaxëhi quiha toa barí ra.

²¹ Jasca, xabahamahacaxëceni quiha Iboja janë quënacaxëcanaibo tëquë” ii quiha Dios; nëa tsi Joel yamabá quënëniquë.

²² “Ea nicaparicana, Israél ca joni bá. Jahuë Jesu, naa Nazarét ca Jesu qui chama Díos aniquë ra. Toca tsi quiha Díos raani ca ja iqui ca ma jismahacaniquë, Dios chamá tsi jistiria bo ja ani cató no. Jisti bo ja aniquë ra mato bëtaquí na. ²³ Jabi naa joni mato qui mëahacaniquë, Dios shinana, naa jaha ja quëëni ca ja ini quëshpi na. Jatsi carayanabo yaxo tsi cruzó tsi naa joni ma tooxaniquë. Naa joni ma namëniquë iquia. ²⁴ Jama, jahuë Jesu Díos bësotëquëmaniquë iquia. Bësoyama caba iti quima ax ja paquëmahacani quiha ra. Bëbotimaxëni ja rësohai ca ini quiha. ²⁵ Jabi Jesu yoati tsi David yamabo nëcaniquë:

“Ea bësojó ca Ibo ë jisquë.

Ea jisbëriayamahi quiha.

Ja iqui tsi shina-motsiquiyamaxëquia ra.

²⁶ Ja tsi xo toa shina-raniquia.

Anomaria xo noho Ibo iquia ranihi na.

Rësohax bësotëquëti ó pasoquia ra.

²⁷ Bësoyama caba iti ó tsi ëa jisbëriayamaxëqui mia ra.

Jasca, mi chama iqui tsi poroyamaxëhi quiha mi yonati jiaxëni cato.

²⁸ Bësoti quinia ëa mi jismaquë.

Jasca, ëa ranihuaxëqui mia, mi bëta ë xëquë no”

i jahuë Jahëpa Dios qui Jesu ni quiha David yamabá quënëni cató no.

²⁹ Bëro tsi mato qui chaniquia, ëbë xatë bá. Nicacana. Siri tsi David yamabo yoi rësoniquë. Ja mëihuahacaniquë. Jasca, tobi quiha no bëta jahuë mai. ³⁰ Jabi Dios shina cahëxëni ca David yamabo iniquë iquia. “Mi chahitaxocobo huësti ca janaxëquia, mi trono xo tsi ja yonano” i ja qui Dios

ni ca ja cahëniquë. Jasca, quiayamahai ca Dios ini ca ja cahëniquë. ³¹ Jabi rëquë ca xaba tsayahi David iniquë Cristo qui. Diós axëti nori ca cahëhax tsi quiha Cristo bësotëquëxëhai ca yoati ja chaniniquë. Bësoyama cabo iti ó tsi ja niabëriahacayamaxëhaina, jahuë yora poroyamaxëhaina, tihi cabo yoati David chanini quiha. ³² Dios tsi xo toa naa Jesu icanai ca Bësotëquëmati Ibo. Ja bësotëquëyamëquë ra. Tihi ca tsi xo toa no yoahaina ra, naa noqui tëquëta. ³³ Jasca, jahuë Jesu Diós oquë-oquëhuaniquë ra. Jaboqui Dios mënëcayá tsi tsaho xo ra. Jaquirëquë Espíritu Santo jahuë Jahëpa quima Jesús biniquë. Bixo tsi quiha noqui ja japaniquë, naa Diós yoani jascaria. Jabi noqui Espíritu Santo japahacahai ca tsi xo toa ma tsaya-tsayahaina, ma nica-nicahaina ra. ³⁴ Tsayacahuë. Nai qui tëronoyamaniquë noba David yamabo. Jama, nëca tsi ja quënëniquë noba Jesu yoati na:

“ ‘Noho mënëcayá tsi tsahotsina,

³⁵ mi chama nama tsi mia pasomaha cabo ë janaxëquë rohari’ i noho Ibo qui Ibo Dios ni quiha”

nëa tsi David yamabo nëcani quiha.

³⁶ Jatsi jatiroha ca Israël ca nohiria bá jabija ca cahëno ra. Ma tooxani ca Jesu Diós oquëhuaniquë ra. Noba chama, noqui Xabahamati Ibo, tihi cabo Diós jahuë Jesu manëmaniquë —nëa tsi nohiria bo qui Pedro nëcaniquë.

³⁷ Jatsi Pedró yoani ca nicahax tsi quiha ja cohuënacanicuë. Cohuënahax, —¿Jënahuaxëhi ni noa ra, noba xatë bá? —i Pedro, Chani chitahëhuati ibo bo, tihi cabo qui jaca niquë.

³⁸ Jatsi Pedró quëbiniquë:

—Mato jocha quima Dios quiri bësocana. Jasca, Jesu janë tsi ma ashimahacaxëti xo. Tocacana, mato jocha masahacano iquish na. Jatsi mato qui Espíritu Santo axëhi quiha Dios ra. ³⁹ Mato, mato xocobo, carayanabo, tihi cabo qui Espíritu Santo acatsi quiha, mato qui jahuë Chani acacani iqui na. Bixëhi quiha noba Ibo, Diós quënëni cabo tëquë —nëa tsi nohiria bo qui Pedro nëcaniquë.

⁴⁰ Chanipama tsi quiha jato ja yoba-yobanicuë:

—Jochahuaxëniria ca nohiria bo quima tsëquëcana, xabahamahacaxëna —iquiina.

⁴¹ Jatsi quiha ashimahacanicuë jahuë chani chahahuanish cabo. Toa barí tsi quiha chahahuacanaiba maxo qui tres mil ca nohiria riiniquë ra. ⁴² Chahahuaxo tsi quiha Chani chitahëhuati ibobá tiisimani ca ja nicanicaniquë. Jia tsi quiha ja rabëna-rabë nabëquicaniquë. Rabëna xo tsi quiha Dios shiati ja nëtocanicuë. Jasca, Dios qui ja bëhox-bëhoxcaniquë.

Jariapari ca chahahuacanaibo

⁴³ Toatiyá tsi quiha huëstima ca jisti bo jahuë Chani chitahëhuati ibobá iniquë. Jatsi ratëyoniquë nohiria tëquë, tsayahi na. ⁴⁴ Jasca, racanabëquiniquë chahahuacanaibo tëquë. Racanabëquihax tsi quiha jato jahuë bo tëquë ja xatënacanicuë. ⁴⁵ Jato jahuë bo ini axo tsi quiha noitiria cabo qui parata ja acanicuë. ⁴⁶ Jasca, jatiroha ca barí tsi quiha jodioba arati xobó tsi ja caticananicuë Dios qui araxëna. Jasca, jato xobo xo tsi quiha shiati ja pipaacanicuë. Jasca, ja oriquibëquinapaocanicuë ranihax na. Ja huashiya-macani quiha. ⁴⁷ Jasca, jia tsi Dios ja ocahua-ocahuacanicuë. Nohiria qui jia jato jabi ini quiha. Jasca, jatiroha ca barí tsi quiha nohiria xabahamahacanicuë. Jatsi iglesia qui ja riicaniquë chahahuahax na.

3

Catëjo tahë jaya ca jënimahuanina

¹ Huësti barí tsi quiha Pedro, Juan, tihi cabo jodioba arati xobo-xoboria qui bocaniquë bëhoxhi na. A las tres ja ini quiha, naa jato bëhoxti hora. ² Jabi toá tsi arati xobo caití tsi quiha, naa “Caiti Jiaria” icanai cató tsi quiha joni noitiria ca tsaho iniquë. Catëjo ca tahë yoi jayanish ca ja ini quiha. Jatiroha bari tsi toá tsi ja janahacani quiha, parata bënariati. ³ Jatsi arati xobo-xoboria qui Pedro, Juan, tihi cabo jicohai ca ja jisniquë. Jisi tsi,

—E qui parata ahuë —i jato qui ja niquë.

⁴ Jatsi joni Pedro Juan bëisniquë. Bëis-hax ja qui Pedro chaniniquë:

—Noqui bëishuë iquia —iquiina.

⁵ Jatsi quiha joni tsaya-tsayaniquë. Parata ó ja pasoni quiha. ⁶ Jatsi Pedro ja qui nëcaniquë:

—Parata yama ca ëa xo naa. Jama, mia mëbicasquia. Nazarét ca Jesucristo tsi xo toa chama jaya cato. Jahuë janë tsi tapitsina iquia —i ja qui Pedro niquë.

⁷ Jatsi jahuë mëquë mënëcayá tsi Pedró biniquë. Bixo tsi quiha toa joni ja joimaniquë. Chamatapini quiha jahuë tahë. Jënima jahuë jopoto ini quiha.

⁸ Jatsi joni biisniquë. Jahuë tahë tsi ja niiniquë. Jatsi co-cotsijaniquë. Jatsi quiha Pedro, Juan, tihi cabo ya arati xobo qui ja jiconiquë jaa ri. Co-copama tsi quiha Dios ja ocahua-ocahuaniquë, biisi-biisixo na. ⁹ Ja cohaina, Dios ja ocahuahaina, tihi ca tsi quiha toá ca maní ca nohiria bá jisniquë. ¹⁰ Parata bënaxëniria cato, naa “Caiti Jiaria” icanai cató ca tsahopaohax ca joni ja iqui ca cahëhax tsi ja ratëyocaniquë.

—¿Jënahuarihax ja jënimahuahacaha sa? —i jaca niquë tsayahax na.

Arati xobó tsi Pedro chaninina

¹¹ Pedro, Juan, tihi cabo parata bënaxëniria cató achaniquë. Achajahuano tsi quiha jato qui nohiria bo jabayoniquë tsayacatsi na. Portal de Salomón icanai cató tsi ja quëtsoyani quiha. ¹² Jatsi nohiria bo jisi tsi quiha jato qui Pedro chaniniquë. Ja nëcaniquë:

—¿Jëniriahax ratëcanai pa? ¿Jëniriexo tsi noqui tsaya-tsayacanaí sa? Noba chamá tsi naa joni no tapimayamaquë ra. ¿Jënahuariexo noba mëstë ca jabí tsi naa joni no jënimahuana ra? ¹³ Dios, naa noba Abraham yamabo, noba Isaac yamabo, noba Jacob yamabo, tihi caba Diós jahuë yonati Jesu oquëhuaniquë ra. Jabi naa jasca ca Jesu Pilato qui ma mëaniquë pë, ja namëhacano. Jatsi Pilató paquëmacasquë tsi quiha “Anoma. Paquëmayamahue” i ja qui ma niquë ra. ¹⁴ Mato ti tsi xo toa jocha yama ca Mëstëxëniria ca niati ibo-iboria bo iquia. Niexo ati ibo-iboria ca joni ma baaniquë rë, paquëmahacati. ¹⁵ Mato ti tsi xo toa nohiria Bësomati Ibo-iboria acanaíbo iquia. Jama, naa acacanish ca Jesu Diós bësobëquëmaniquë ra. Jabija tsi xo naa no yoahaina iquia. Parayamaqui noa. ¹⁶ Naa joni, naa ma tsayahai ca joni jënimahuahacaquë ra, naa jasca ca Jesu janë no. Naa ma cahëhai ca joni tapimahacaquë ra, toa janë qui ja chitimihá cató no. Tsayacahuë.

¹⁷ Jisa, noho xatë bá. Tonia cahëxoma tsi ma tocaniquë iquia, naa mato rëquëniniti ibobá ani jascaria. ¹⁸ Jama, toca ca quiniá tsi quiha ja yoacani ca Diós jatihuaniquë, ma tocani cató no. Naama tsi quiha Cristo yoati tsi jahuë Chani yonish cabo chanini quiha, “Tënëxëti xo Cristo” iquiina. ¹⁹ Jatsi jaboqui mato jocha quima Dios quiri bësocana ra, mato jocha masahacano iquish na. ²⁰ Jatsi mato ranihuaxëhi quiha Ibo Dios. Jasca, mato bax ja bini ca Xabahamati Ibo, naa jahuë Jesu mato qui raaxëhi quiha. ²¹ Jama,

jaboqui naipá tsi ja chitëpariti xo ra. Jariapari tsi tsëquëxëti xo jatiroha ca paxahuahacatiya, naa Dios Chani yoanish cabá tsi Diós yoani jascaria. ²² Moisés yoani ca nicacana. Ja nëcani quiha: “Mato qui Dios Chani Yoati Ibo-iboria raaxëhi quiha Dios ra, naa mato qui ëa ja raani jascaria. Mato jimibo huësti ca yoi ixëhi quiha naa joni ra. Ja yoahai ca tëquë ma nicaxëti xo. ²³ Jasca, Dios nohiria bo quima aquëquëmahacaxëti xo toa joni chani nicayamacanaibo. Nicayamahax quëyohacacaxëcani quiha” tih ca tsi i Moisés ni quiha ra.

²⁴ Jabi naa xaba yoati tsi Dios Chani yoanish cabo tëquë chanipaoni quiha, naa Samuel yamabo tiya rohari cabo. ²⁵ Jasca, naa Dios Chani yoacanish caba chahitaxocobo xo mato ra. Mato qui Dios Chani acacani quiha jaari, naa mato naborëquëbo qui ja acacani jascaria. Jariapari tsi quiha Abraham yamabo qui Dios Chani acacaniquë, naa “Chahitaxocobo jayaxëqui mia. Toa baquë tsi shomahuahacaxëhi quiha maí ca nohiria bo tëquë” i ja qui Dios nina. ²⁶ Jatsi mato jodiobo qui pari tsi quiha jahuë yonati yoi Diós raaniquë mato shomahuaxëna. Mato jocha quima mato casomacatsi quiha ra —nëa tsi quiha Pedro nëcaniquë nohiria bo qui.

4

Jodiobo yosibo bësojó tsi Pedro, Juan, niinina

¹ Jari nohiria bo qui ja chanicano tsi quiha bëcaniquë arati ibo bo, arati xobo obëso ca capitán. Jasca, bëcaniquë saduceobo icanaí ca chama bo ri, naa “Bësotëquëyamaxëhi quiha nohiria” icanaibo. ² Jato qui yoi ini quiha toa nohiria bo qui Pedro, Juan, tih cabá tiisimanina, Jesu bësotëquëmahacani nori yoahi ja icani quëshpi na. Jato qui yoi toa chani ini quiha, nohiria bësotëquëyamaxëhai ja quëscahuacani quëshpi na. Jatsi Pedro, Juan, tih cabo qui ja caxacaniquë. ³ Caxahax tsi quiha jato qui ja tsamicaniquë. Caquë quiha bari. Ja iqui tsi preso qui jato ja nanëcaniquë huëaquë copixëna. ⁴ Jama, huëstima cabá chahahuaniquë jato chani nicaxo na. Cinco mil ca joni bo tahë ja icani quiha.

⁵ Huëaquë tsi quiha jodioba chama bo catiniquë, naa jato yosibo, jato yoba tiisimacanaibo. ⁶ Toá tsi quiha Anás, naa jato arati ibo-iboria iniquë jaa ri. Jasca, toá tsi quiha Anás jimibo iniquë jato ri, naa Caifás, Juan, Alejandro, tih cabo. ⁷ Catixo tsi quiha jato nëpax tsi Pedro Juan ja nimacaniquë nicaxëna. Nimahax,

—¿Jënahuaxo tsi naa joni ma jënimahuahitaha sa? ¿Jahuë chama ya ni mato ra? ¿Tsohuë ni toa naa chama mato qui ati ibo ra? —i jato qui jaca niquë.

⁸ Jatsi quiha Espiritu Santo rëamëxo tsi Pedró quëbiniquë:

—Noqui nicacana, nohiria chama bá, yosibá. ⁹ ¿Naa noitiria ca joni no mëbihitaha ca yoati tsi noqui nicacanaí sa? “¿Jënahuariahax naa joni jënimahuahacaha sa?” ¿ii ni mato ra? ¹⁰ Jënima quiha. Ma cahëyoti xo. Cahëxëti xo Israél ca nohiria bo tëquë ri. Nazaret ca Jesucristo chamá tsi ja jënimahuahacahitaquë ra, naa ma tooxani ca jasca cato chamá no. Ja tsi xo toa Diós bësomanina. Jesu chama iqui tsi mato bësojó tsi nii quiha naa joni ra. ¹¹ Jabi naa jasca ca Jesu yoati tsi chanihi quiha Quënëhacanish cabo ra.

“Oquënaxëhi quiha yosibá niaha ca Maxaxa ra.

Oquë-oquëria ca manëxëhi quiha”

ii quiha ra. Jabi Jesu tsi xo naa maxaxa ra, naa ma niani cato. Jama, naa maxax jascaria tsi ja oquënani quiha. ¹² Oquë-oquëria ca tsi xo naa ra. Yama tsi xo Xabahamati Ibo huëtza ra. Ja huësti ca tsi xo Jesu. Jaroha ca tsi xo

toa Diós noqui acana noqui xabahamati —nëa tsi quiha chama bo qui Pedro nëcaniquë.

¹³ Chama ya tsi Pedro, Juan, tihi cabo chanini nori ca jisi tsi toa chama bo ratërianiquë. Jasca, escuela qui ja boyamacani nori ca nicaquí tsi Jesu rabëti bo ja icani nori ca ja cahëcaniquë. ¹⁴ Jama, Pedro, Juan, tihi cabo ya niihai ca jënimahuahacahitahax ca joni jisi tsi quëbiti ja cahëyamacani quiha. Ja iqui tsi jato qui quësoti mëtsama ja icaniquë. ¹⁵ Jatsi quiha naquëtë catcha jato ja raacanicuë jamëhax chaninaxëna. Raahax,

¹⁶ —¿Jënahuariaxëhi ni noa sa, naa joni bo qui? Naa anomaria ca jisti naa joni bá acahitaha ca cahëhi quiha Jerusalén ca nohiria bo tëquë rë. ¿Jënahuariayah “Oca ma xo” i no na ra? ¹⁷ Naa jahuë bo nohiria bo qui pacanamitsa rë. Jato no jënëxëti xo ra. Jatsi jato no yobano, Jesucristo janë tsi ja chanitëquëpistiariacano —i jaca niquë chaninahi na.

¹⁸ Jatsi quiha Pedro, Juan, tihi cabo ja quënacanicuë. Quënaxo tsi quiha jato ja yobacanicuë:

—Nohiria bo qui Jesu yoati tsi ma chanitëquëyamano ra —iquiina.

¹⁹ Jama, Pedro, Juan, tihi cabá quëbiniquë:

—Shinaparicana. ¿Tsohuë nicayoixëhi ni noa ra? ¿Mato ni? ¿Dios ni?

²⁰ ¿Jënahuariaxo no chanihai ca no jënëna ra? No jisnina, no nicanina, tihi cabo yoati tsi no chaniti xo ra —i jato qui Pedro Juan niquë.

²¹ Yobatëquëxo tsi quiha chama bá jato paquëmaniquë. Jabi nohiria bo qui raquëquí tsi Pedro, Juan ja copiyamacani quiha. Jabi naa jënimahuahacanish ca joni quëshpi tsi Dios ocahuahi nohiria bo iniquë. ²² Anomaria toa jisti ini quiha. Cuarenta año bo huino toa jënimahuahacanish ca joni ini quiha.

Dios qui chahahuacanaibo bëhoxnina

²³ Jisbëria tsi quiha jato nohiria yoi bo qui Pedro Juan bocanicuë. Jatsi quiha arati ibo bo, yosibo, tihi cabá yoani ca jato ja yoacanicuë. ²⁴ Jatsi quiha Dios qui ja bëhoxycanicuë nicahax na:

—Mia ri tsi xo Ibo-iboria. Mia ri tsi xo toa naipa, mai, ia, tihi cabo Nëhohuati Ibo ra. Jahá cabo tëquë mi ani quiha ra. ²⁵ Jasca, mia ri tsi xo toa Espiritu Santó tsi noqui chaninish cato, naa noba naborëquëbo David yamabo mi chanimaniquë no:

“¿Jënihax tsi caxahi ni carayanabo pë?

¿Jënixo mahitsa tsi shina-shinahi ni nohiria bo ra, Dios pasomaha yoi ca axëna?

²⁶ Shomahuahacacani quiha maí ca rey bo rë, iquinaxëna.

Caticani quiha país ca chama bo rë, Ibo Dios, jahuë Xabahamati Ibo, tihi cabo pasomaha iquinaxëna”
i David yamabo ni quiha.

²⁷ “Tocapiyamëquë ja yoanina iquia. Naa noba yaca yoi tsi Herodes, Poncio Pilato, tihi cabo chaniyamëquë carayanabo, Israel ca nohiria bo, tihi cabo ya. Chaninaxo tsi quiha mi yonati mëstëxëni ca Jesu, naa noqui mi raani ca ja namëcasjahuacanicuë pë. ²⁸ Jatsi quiha ja tocanicuë. Jabi mi planes, naa mi chamá tsi acacani ca planes roha ja acani quiha, mi shina ja ini quëshpi na.

²⁹ Jabi jaboqui mi yonati bo roamiscani quiha pë, Ibobá. Jama, noqui, naa mi yonati bo mi chamahuano, raquëxoma tsi mi chani ni yoano iquish na.

³⁰ Jasca, mi chamá tsi noitiria cabo mi jënimahuano. Jasca, mi yonati jiaxëni ca Jesu janë tsi jisti-jistiriabo mi ano ra” —nëa tsi ja nëcanicuë bëhoxhi na.

³¹ Ja bēhoxcaquē tsi quiha yajo-yajohacanicuē ja caticani ca xobo ra. Jasca, Espiritu Santó tsi ja rēahacanicuē. Rēamēhi tsi raquēhaxma tsi quiha Dios Chani chanitsijanicuē.

Jato jahuē bo ja xatēnacarina

³² Toatiyá tsi quiha jia tsi chahahuacanaibo rabēnabēquicanicuē. Jaharisi quiha ja shinacanaí ca ini quiha. Jasca, jato jahuē bo tēquē ja xatēnadicuē. “Nohó-na xo naa, nohó-na xo toa” iyama jaca ni quiha. ³³ Jasca, chama-chamariá tsi quiha Dios Chani chitahēhuati ibo bo chaniniquē, Ibo Jesu bēsotēquēmahacani nori ca yoahi na. Toatiyá tsi quiha jia tsi Diós jato mēbiniquē. ³⁴ Jasca, toatiyá tsi quiha chahahuacanaibá narisyamaniquē. Jato xobo bo, jato mai bo, tihí cabo ja iniadicuē. ³⁵ Iniixo tsi quiha toa parata Chani chitahēhuati ibo bo qui ja adanicuē. Jaquirēquē quiha noitiria cabo qui toa parata acacani quiha. ³⁶ Jabi tocaniquē José, naa Chipre ó conish cato. Arati xobó ca yonati ja ini quiha. Jabi naa José qui janē huētsa Chani chitahēhuati ibo bá ani quiha, naa Bernabé cato. Noba joí tsi “Nohiria mēbiti ibo” iqui noa. ³⁷ Jabi jahuē mai Bernabé inianiquē jaa ri. Iniixo tsi quiha Chani chitahēhuati ibo bo qui jahuē parata ja mēanicuē, noitiria cabo qui acacati.

5

Ananías, Safira, tihí cabá paracasnina

¹ Jatsi quiha joni huētsa, naa Ananías icanai cató jahuē mai inianiquē jaa ri, jahuē ahui Safira yaxo na. ² Iniixo tsi quiha parata xatē ja jananicuē jamē bax na. Jahuē ahui qui jia ini quiha ja anina. Jatsi quiha parata tēxē ja bēnicuē Chani chitahēhuati ibo bo qui. ³ Ja bēquē tsi quiha ja qui Pedro chaniniquē:

—¿Jēnahuariahax mi shina qui Satanás jicoha pa? Parata xatē mi jonēquē pē iniixo na. Toca tsi Espiritu Santo qui mi quiaquē rē. ⁴ Toa mai inianox pari tsi ¿mí-na ja iyamayamani? Jasca, ja iniahacaquē tsi jari mi parata ja iquē ra. Jama, noqui paracasquí tsi toa parata xatē roha noqui mi bēquē rē. Anoma tsi xo toca ca mi shinahaina iquia. Dios qui mi quiaquē rē, joni qui nomari —nēa tsi quiha ja qui Pedro nēcaniquē.

⁵ Jatsi quiha Ananías rēsoniquē, Pedro chani nicahax na. Mai qui ja paquēnicuē. Jatsi quiha nohiria tēquē raquē-raquēnicuē nicahax na. ⁶ Jatsi joixo tsi quiha shinapayo bá jahuē yora yaboniquē raití no. Yaboxo tsi cacha boxo tsi ja maihuacanicuē.

⁷ Tres hora quirēquē Ananias ahui jiconiquē, naa Safira icanai cato. Jari jahuē bēnē rēsoha nori ca ja nicayamani quiha. ⁸ Jatsi Pedró nicaniquē:

—Ea yoahuē. ¿Tihí roha ca parata ma bichí, mato mai quēshpi na? — iquiina.

Jatsi quiha,

—Jabija. Tihí roha ca parata no bichitaquē —i Pedro qui ja niquē. Ja quiiani quiha.

⁹ Jatsi Pedró quēbiniquē:

—Jishopē. ¿Jēnirixox nēca tsi mi shinaha pa. Espiritu Santo tanamaqui mia pē. Nicapa. Bēcani quiha rē mi bēnē maihuahax cabo. Mia bichí bēcani quiha maihuaxēna —i ja qui Pedro niquē.

¹⁰ Jatsi ja rēsotapiniquē. Jatahē tsi quiha ja paquēnicuē. Jatsi quiha shina-payobá jiconiquē. Jicoxo tsi ja jiscanicuē. Cacha boxo tsi quiha jahuē bēnē ya

raqüepina tsi ja maihuacanicuë. ¹¹ Jatsi raquë-raquënicuë chahahuacanaibo tēquë. Jasca, raquëyoniquë nicanish ca nohiria huëtsa bo ri.

Acacani ca jisti bo

¹² Toatiyá tsi quiha Salomón Portal icanai cató tsi chahahuacanaibo catihi ipaonicuë araxëna. Toa xo tsi huëstima ca jisti bo Dios Chani chitahëhuati ibobá ani quiha, nohiria bo xërëquë xo na. ¹³ Jama, jato bëta arati catiyamani quiha nohiria tēxë rë, jato chama bo qui raquëhi na. Jama, nohiria bo qui shi-najiaxëni cabo chahahuacanaibo ini quiha. ¹⁴ Toatiyá tsi jato qui riini quiha huëstima ca chahahuacanaibo paxa cabo, naa Ibo qui chitimicanish ca joni bo yoxa bo tēquëta. Jatiroha ca barí tsi jato maxo anini quiha. ¹⁵ Jasca, Chani chitahëhuati ibobá acani ca jisti bo iqui tsi isicanaibo, iquicanaibo, tihí cabo nohiria bá bëcani quiha ja jënimahuahacano. Bahí tsi jato oxati, jato huana bo, tihí cabo ó tsi ja janahacani quiha Pedro ja manacano. Pedro tēbaquishi jato matarahai ca ó ja quëëcani quiha jënimahuahacati. ¹⁶ Jasca, Jerusalén ca tēamë ca yaca huëtsa bo quima ax nohiria bëcani quiha. Isicanaibo, yoshi jaya cabo, tihí cabo ja bëcani quiha. Ja jënimahuahaca-canicuë jato tēquëta.

Chani chitahëhuati ibo bo tēnëmahacana

¹⁷ Jatsi quiha Dios Chani chitahëhuati ibo bo qui arati ibo-iboria yosanicuë. Jato qui yosanicuë jahuë rabëti bo ri, naa saduceobo, naa “Bësotëquëyamaxëhi quiha nohiria” icanabo. ¹⁸ Yosannahax tsi quiha jato qui ja tsamicanicuë. Tsamixo tsi preso qui jato ja nanëcaniquë. ¹⁹ Jatsi toa baquichá tsi quiha Ibo Diós raani ca angél preso caiti japëcaniquë. Japëcaxo tsi quiha preso cacha jato ja bënicuë ra. Jatsi jato qui ja yoanicuë:

²⁰ —Bocata. Arati xobo nabirí tsi niixo xabahamati quinia paxa ca yoacana —iquiina.

²¹ Jatsi huëaquë tsi quiha arati xobo qui ja jicocanicuë, naa ja yoahacacani jascaria. Jicoxo tsi nohiria bo tiisimatsijahuacanicuë. Jatsi quiha arati ibo ba cahënicuë jato rabëti bo ya. Cahëxo tsi quiha jodioba chama bo, yosibo, tihí cabo ja quënacanicuë chaninaxëna. Jatsi quiha preso qui policia ja raacanicuë Chani chitahëhuati bo bëti. ²² Preso qui cahëxo tsi quiha Chani chitahëhuati ibo bo policia yopanicuë. Yama a ra. Jatsi ja bacanicuë chama bo yoaxëna.

²³ —Preso qui no cahëquë. Jënima toa caiti bo iquë ra. Pëyëhama quiha jahuë candado iquë iqui noa. Jasca, caiti cacha jari nii iqui quiha jaha bësoti soldado bo ra. Jama, caiti japëcaxo tsi yama ca no jisquë pa. Mëquëya toa jato preso ca naquëtë iquë pa —i chama bo qui jaca niquë bacahax na.

²⁴ Jatsi ja yoacani ca nichahax tsi quiha ja shina-risiquiyocanicuë, naa soldado ba capitán, arati ibo-iboria bo. Nichahax,
—¿Jënhuaría ni sa? —i jaca niquë.

²⁵ Jatsi quiha chani paxa jaya ca joni jiconiquë. Jicohax,
—Jisi bocata. Arati xobo nabirí tsi nii quiha nanëhacahitahax ca joni bo ra. Toa xo tsi nohiria bo tiisimacani quiha ra —i jato qui ja niquë.

²⁶ Jatsi mëri tsi capitán caniquë jahuë soldado bo ya. Jahari chama bo qui jato ja bëcaniquë. Ishima tsi toa Chani chitahëhuati ibo bo ja bëcani quiha nohiria bo qui raquëquí na. Nohiria bá jato acai ca ja quëscahuacani quiha.

²⁷ Bëxo tsi quiha chama bo bësojó tsi jato ja nimacanicuë. Jatsi arati ibo ba chama bá jato nicaniquë:

²⁸ —“Jesu yoati tsi nohiria bo tiisimayamacana” ¿i mato qui no yamayamahitaha ra? ¿Jënhuariacana ra? Jerusalén tsi pacanahi quiha mato chani ra. Anoma tsi xo toa ma tiisimahaina. Jasca, noqui quësocasqui mato pë, toa Jesu nani quëshpi na —nëa tsi quiha arati ibo ba chama nëcaniquë.

²⁹ Jatsi Pedro, Dios Chani chitahēhuati ibo bo, tihí cabá quēbiniquē:

—Jariapari tsi Dios no nicaxēti xo ra, joni bo nomari. ³⁰ Noba naborēquēba Diós jahuē Jesu bēsomayamēquē ra, naa cruzó tsi ma tooxayamēta ca jasca cato. ³¹ Bēsomaxo tsi quiha ja oquēhuayamēquē, jahuē mēncayá ja ino. Chama jahuē Jesu qui ja ayamēquē Rēquēniniti Ibo, Xabahamati Ibo, tihí cabo iti. ³² Jabi toca xo ra. Jabija ca cahēxo tsi nohiria bo yoa-yoacui noa ra, paraxoma. Tocahi quiha Espiritu Santo ri. Jasca, jahuē Chani nicacanaibo qui Espiritu Santo aqui Dios ra —nēa tsi quiha ja nēcacanicquē.

³³ Jatsi quiha catinish ca yosibo caxa-caxanicquē ja yoacani ca nicahax na. Itsisnanicquē jato shinana ra. Jato ja acascani quiha. ³⁴ Jama, jato ó niini quiha huēsti ca chama, naa Gamaliel icanai cato. Yoba tiisimanish ca joni ja ini quiha. Jasca, nohiria qui shinajiaxēni ca naa joni ini quiha. Yosibo bēsójó niixo tsi quiha naquētē cacha Chani chitahēhuati Ibo bo ja raanicquē.

³⁵ Raahax chanitsijanicquē:

—Jisa, Israel ca joni bá. Quiniacaxēcahuē, anoma ca naa joni bo qui ma ayamano. ³⁶ Tobi ini quiha Teudas icanai cato. Joni-joniria ja ini ca ja quēscahuani quiha ra. Jasca, ja bēta cuatrocientos ca joni bo riini quiha nianaxēna. Toa joni acanicquē ra. Jatsi pacanamahacani quiha jahuē rabēti bo tēquēta. ³⁷ Jaquirēquē tobi iniquē Galileá ca Judas. Nohiria censo ini cató tsi toa joni jisiquini quiha. Joni bo misco ja mēpini quiha jaa ri. Jama, toa joni acanicquē jaa ri. Jabayoni quiha jahuē rabēti bo ra. ³⁸ Jatsi noho yoba tsi xo naa: Naa joni bo no motsayamano. Jato paquēmacana iquia. Jato chama yoi pi ja chanicano tsi quēyohacaxēhi quiha ja acaina iquia. Pacanaxēhi quiha jato rabēti bo ri. ³⁹ Jama, Dios yonoco pi ja acano tsi yama tsi xo toa jato yonoco quēyoti mētsa cato ra. Jatsi quiniacaxēcahuē, Dios yoi pasomaha iquinahi ma imitsa iqui na —nēa tsi yosibo qui Gamaliel nēcanicquē.

⁴⁰ Jatsi quiha yosibo qui jia quiha jahuē yoba iniquē. ⁴¹ Jatsi Dios Chani chitahēhuati ibo bo jahari ja quēnanicquē. Quēnaxo tsi quiha jato ja rashanicquē. Jatsi quiha jato ja yobanicquē, Jesu janē tsi ja chaniyamacano. Yobaxo tsi quiha jato ja paquēmacanicquē. ⁴² Jatsi quiha jatiroha ca barí tsi arati xobo xo tsi Xabahamati Ibo Jesu iqui ca ja yoa-yoanicquē. Jasca, chahahuacanaiba xobo xo tsi tiisimatsijahuanicquē.

6

Iglesia ca mēbicanaibo janēhacarina

¹ Toatiyá tsi chahahuacanaiba maxo anino tsi quiha jodioba joi chanicanaibo qui carayana ca joi chanihai ca jodiobá joi mēraniquē.

—Piti biyamahi quiha noba bēnē imanish ca yoxa bo rē, barihaní tsi piti ja acaquē no —nēa tsi quiha jato jimibo qui ja nēcanicquē.

² Jatsi quiha chahahuacanaibo tēquē Dios Chani chitahēhuati ibo bá quēnanicquē ja caticano.

—Noqui yoi tsi xo Dios Chani no yoahai ca jēnēhaina rē, piti, parata, tihí cabo otōxēna. Anoma quiha. ³ Jatsi siete ca joni shinajiaxēni cabo mēracana, nobē xatē bá, toa ototi yonoco ati. Espiritu Santo rēamē ca joni ja ixēti ca xo. Jasca, tiisi ja jayacaxēti xo. Jato qui naa ototi yonoco mēaxēqui noa ra. ⁴ Mēaxo tsi xaba jayaxēqui noa bēhoxti, Dios Chani tiisimati —nēa tsi quiha jato qui Chani chitahēhuati ibo bo nēcanicquē.

⁵ Jatsi rananicquē chahahuacanaibo tēquē, nicahax na. Jatsi quiha siete ca joni bo ja bicanicquē ja yoahacacani jascaria. Jatsi Esteban ja bicanicquē, naa Dios qui chitiminish ca Espiritu Santó rēamēnish ca joni. Jasca, Felipe, Prócoro,

Nicanor, Timón, Parmenas, Antioquía ó ca conish ca Nicolás, naa jodioba jabi binish ca carayana, tihi cabo quiha ja bicaniquë toa yonoco ja otocano. ⁶Jatsi quiha Chani chitahëhuati ibo bo bësojó ja janahacacaniquë. Jatsi jato bax ja bëhoxcana ca tsi jato mëquë jato ó ja janacaniquë shomahuaxëna.

⁷Toatiyá tsi quiha Dios Chani pacananiquë. Ani-aniniquë Jerusalén ca chahahuacanaibo. Jasca, Cristo qui chitiminiquë huëstima ca jodioba arati ibo bo ri ra.

Preso qui Esteban nanëhacanina

⁸Toatiyá tsi quiha chamaxëniria ca jisti bo Estebán aqui iniquë nohiria xërëquë xo na. Diós toa joni shomahuariani quiha, jahuë yonoco ja aquë no. Jasca, Espiritu Santo chama jayani quiha. ⁹Jama, ja qui caxa iniquë catiti xobó ca nohiria bo, naa Paquëmahacacaniquë ca Yonati bo icanaí ca maxo. Esteban qui tsi quiha joi mëratsijahuacaniquë. Jasca, jato maxo qui riiniquë jodioba huëtsa bo ri, naa Cirene, Alejandría, Cilicia, Asia, tihi cabo mai ax bëcanish cabo. Esteban qui caxa ja icani quiha jato ri. ¹⁰Jabi Esteban qui joi ja mëracano tsi quiha Espiritu Santo tiisi tsi jato ja quëbiniquë. Esteban bëbotimaxëni ja icani quiha, ja quëbihai ca iqui na. ¹¹Jatsi quiha parata joni bo qui ja acaniquë quihuamaxëna. Acax tsi quiha,

—“Moisés yamabo, Dios, tihi cabo pasomaha chanihi quiha Esteban ra. No nicaquë ra. Anoma quiha” tihi ca tsi icana —i joni bo qui jaca niquë pë.

¹²Jatsi ja quiacaniquë Esteban qui nohiria bo caxahuaxëna. Jatsi quiha itsisnaniquë nohiria bo, yosibo, Diós yoba tiisimacanaibo tëquëta. Caxahi tsi quiha joiha Esteban qui ja tsamicaniquë. Ratëniquë Esteban. Tsamixo tsi quiha jodioba chama bo qui ja boniquë ja qui quësoxëna. ¹³Jatsi quiha chama bo qui chanitsi quiha quiacanaibo niquë.

—Noba arati xobo, Moisés yoba, tihi cabo pasomaha chanihi quiha naa joni ra. Anoma tsi xo toa ja chani-chanihaina ra. ¹⁴Jasca, “Noba arati xobo potasxëhi quiha naa Nazarét ca Jesu” ii quiha pë. Jasca, “Noqui Moisés yamabá ani ca jabi bo rarinamaxëhi quiha ra” tihi ca tsi ii quiha ra. No nica hitaquë ra —i quiha jaca niquë quiahi na.

¹⁵Jatsi quiha toá ca naquëtë ca tsahonish ca chama bá Esteban bëisniquë. Bëis-xo tsi quiha ángel bëmana jisiria ca jahuë bëmana manëhai ca ja jis-caniquë.

7

Estebán quëbinina

¹Jatsi quiha arati ibo-iboriá Esteban nicaniquë:

—¿Jabija ni naa mi qui ja quësocanaina? —iquiina.

²Jatsi Estebán quëbiniquë:

—Ea nicaparıcana, ëbë xatë bá, noho jahëpa bá. Mesopotamia mai tsi Abraham yamabo racano tsi quiha noba oquë-oquëria ca Diós ja qui jisiquiniquë ra, naa Harán racahi ja canox pari no. ³Toatiyá tsi quiha, “Mí mai, mi jimibo, tihi cabo jısbëriana. Mai huëtsa, naa mi qui ë jismaxëhai ca mai qui cata” i ja qui noba Dios ni quiha. ⁴Jaha tsi quiha Abraham riquiniquë Caldea mai ax na. Riquicaya tsi quiha Harán mai icanaí ca qui ja caniquë racahi na. Jatsi Abraham jahëpa rësoniquë. Ja rësoquë tsi quiha neri naa mai qui, naa ma racahai ca qui Diós raaniquë. ⁵Raaxo tsi quiha naa mai yoi ja qui Diós ayamaniquë ibohuati. Mai mishni roha ca ja qui acacayamani quiha toatiyá no. Jama, “Mía, mi chahitaxocobo, tihi cabo qui naa mai axëquia, ibohuati” i ja qui Dios ni quiha, baquë Abrahám jayanox pari no.

6 Jasca, “Naa mai niabayacaxëcani quiha mi चाहितखोकोबो carayanaba mai tsi racaxëna. Toá tsi carayanaba yonati bo icaxëcani quiha mi चाहितखोकोबो. Cuatrocientos ca año no tsi jato yosicaxëcani quiha toa carayanabo ra. 7 Jasca, toa carayanabo copixëquia, naa jato yonamixëñiria cabo. Jaquirëquë toa carayanaba mai jisbayacaxëcani quiha mi चाहितखोकोबो naa mai ó tsi ë qui araxëna” nëa tsi noba Abraham yamabo qui Dios nëcaniquë. 8 Jatsi quiha Abraham yamabo qui jabi paxa ca, naa jibirishati jabi Diós aniquë, ja parayamahai ca jismaxëna. Jatsi quiha Abraham yamabá jahuë baquë Isaac jibirishaniquë, huësti ca semana ja jayaniquë no. Jasca, Isaac yamabá jahuë baquë Jacob jibirishaniquë jaa ri. Jaquirëquë Jacob yamabá jahuë doce ca baquë bo ri jibirishaniquë ja cocaquë no.

9 Jabi Jacob doce ca baquë bo noba naborëquëbo ini quiha. Jatsi quiha jato noma José qui noba naborëquëbo yosananicuë. Yosanaxo tsi quiha carayana ca comerciante bo qui jato noma ja iniacanicuë, Egipto mai qui ja bocano. Toá tsi quiha yonati José iniquë rë. Jatsi, ja bëta Dios ini quiha. 10 Toá tsi José tënë-tënëni quiha. Jatsi Diós José mëbirianiquë. Tiisi ja qui ja ani quiha. Jatsi José tiisi Faraón jisnicuë, naa Egipto chama-chamaria. Jisi tsi quiha jahuë mai tëquë, jahuë xobó cabo, tihi cabo José qui ja mëanicuë otajahuano iquish na.

11 Toatiyá tsi quiha Egipto, Canaán, tihi ca mai ca nohiria bá tënë-tënënicuë. Piti ja biniacani quiha. Jasca, binianiquë José rëquëmë bo ri, naa noba naborëquëbo. Yama ja jayacani quiha piti. 12 Jatsi Egipto ó ca piti ini ca nicaxo tsi quiha jahuë baquë bo Jacob yamabá raanicuë, Egipto mai qui ja shishocano. Toa xo tsi quiha trigo ja copicaniquë piti. 13 Jaquirëquë jahuë rëquëmë bo biniatëquënicuë. Biniahax Egipto qui ja bacatëquëcaniquë. Toatiyá tsi quiha “Mato noma xo ëa ra” i jato qui José ni quiha. Jasca, Faraón qui jahuë rëquëmë bo ja boniquë cahëmaxëna. 14 Jaquirëquë quiha jahuë jahëpa qui chani José raanicuë Egipto mai qui ja jono. Jatsi quiha ja bëyocanicuë Jacob-nabo tëquëta, naa setenta y cinco ca nohiria. 15 Egipto mai qui cahëhax toá tsi ja racacanicuë. Jasca, toá tsi ja rësoyocanicuë, naa Jacob, noba naborëquëbo. 16 Jatsi xëni huëttsa quiha Jacob xao bo, noba naborëquëba xao bo, tihi cabo jahari ja bëcaniquë Canaán mai qui. Toá tsi quiha, naa Siquem icanai cato ax tsi quiha ja maihuahacanicuë. Jabi toa Siquem ó ca maihuati mai noba Abraham yamabá copini quiha Hamor icanai ca baquë bo quima.

17 Jatsi quiha cuatrocientos ca año bo, naa Abraham yamabo qui Diós yoani ca chani jatipaimano tsi quiha noba jimibo ani-aniniquë. Huëstima tsi ja icanai quiha Egipto mai no. 18 Jasca, toatiyá tsi quiha noba jimibo yonatsi Egipto chama huëttsa huaniquë. José-nabo jaca nori ca ja cahëyamani quiha rë. 19 Jasca, noba jimibo qui caxa ja ini quiha. Caxaxo tsi quiha jato ja para-paranicuë. Jasca, jato cobëna ca baquë bo ja niabëriama-niquë rë, jato rësomacatsi na. 20 Toatiyá tsi quiha noba Moisés coniquë ra. Jiaria ca baquë ja ini quiha. Toa baquë Diós shomahuaniquë. Tres oxë no tsi quiha ja shinahamahacanicuë jahuë xobó no. 21 Jatsi quiha xobo cacha ja jonëcaniquë Faraón qui raquëquí na. Jatsi Faraón jahiní jisnicuë. Jisi tsi quiha Moisés pista jahuë xobo qui ja boniquë shinahamaxëna. Jahuë baquë jascaria tsi ja shinahamahacani quiha. 22 Jatsi quiha Egipto tiisi, jato jabi bo, tihi cabo Moisés tiisimahacanicuë. Toca tsi quiha joni-joniria ja manënicuë. Oquënaniquë jahuë chani, ja acai ca tëquë.

²³ ‘Cuarenta año bo jayaxo tsi quiha jahuë jimibo Moisés jiscasniquë. ²⁴ Jato tsaya-tsayaquí tsi quiha noitiria ca rashahacahai ca joni, naa jahuë jimibo ja jisniquë. Jatsi jabë xatë ja mëbicasniquë. Jatsi quiha toa rashahai ca Egipto ca carayana Moisés tēpasniquë copixëna. ²⁵ Tēpasxo tsi quiha jato rēquëniniti ibo iti ó ja pasoniquë, toa mai quima ax jato tsëcaxëna. “Diós raani ca joni tsi xo naa ra noqui mëbiti” i jaca ti ó ja pasoni quiha. Jabi Moisés ja bicasyamaniquë jato rēquëniniti ibo iti. ²⁶ Jatsi huëaquë dos ca jimibo iquinahai ca Moisés jisniquë. Jato rabēnamacatsi tsi “¿Jēniriahax iquinacanai rē? Mabë xatë bo xo mato ra” i jato qui ja ni quiha. ²⁷ Jatsi quiha joni huëtsa yosihai ca joni Moises shitijihaniquë. Shitijihacax tsi “¿Noba chama ni mia pa? ¿Tsohuëcaracá mi qui chama aca pa, noqui yobati? ²⁸ Tonia ëa acasqui mia ra, naa Egipto ni aquitaha jascaria” i Moisés qui ja ni quiha. ²⁹ Jatsi Moisés raquëniquë nicahax na. Raquëhax tsi quiha Madián mai qui ja jabaniquë. Toá tsi ja racaniquë carayanabó ya. Ahui bichi tsi dos ca baquë bo ja saihuaniquë toa xo na.

³⁰ ‘Jaquirëquë cuarenta año bo huinocaquë tsi quiha Moisés qui ángel jisiquiniquë, mëshohai ca pëtoro ó no. Sinái xabacha tahë tsi Moisés ini quiha. ³¹ Chihí jisi tsi quiha ja ratëniquë, “¿Jahuë ni naa sa?” iquiina. Jatsi pëtoro qui ja basimaniquë tsayaxëna. Basimaxo tsi quiha Iboba joi ja nicaniquë: ³² “Mi naborëquëba Dios xo ëa ra. Abraham, Isaac, Jacob, tihi caba Dios xo ëa ra” i ja qui Dios ni quiha. Jatsi mëmë-mëmëniquë Moisés raquëhi na. Pëtoro qui ja tsayacasyamani quiha. ³³ Jatsi quiha, “Mi zapato bo tsobohuë. Roa xo naa mai ra, naa mi niuhai cato. ³⁴ Noho Egipto ca nohiria ba tēnhai ca jisquia ra. Ja ëëscanai ca nicaquia ra. Ja tsi xo toa ë botëquë jato paquëmaxëna. ¿Canomani? Jahari Egipto mai qui mia raaquia ra” i ja qui Ibo niquë.

³⁵ ‘Jabi noba jimibá niani ca joni Diós biniquë ra, jato rēquëniniti ibo iti. “¿Noba chama ni mia pa? ¿Tsohuëcaracá mi qui chama aca pa, noqui yobati?” i jaca ni quiha naa joni tsayahax na. Jama, jato qui Moisés raahacaniquë ra jato rēquëniniti ibo iti. Toa pëtoró ca jisiquihai ca ángel noba Moisés jahari raaniquë noba jimibo ja xabahamano. ³⁶ Jabi naa jasca ca Moisés noba jimibo mëpiniquë ra Egipto mai quima. Jasca, jisti-jistiria bo ja aniquë ra, Egipto, Ia Shini, Sinái xabaca, tihi cabo xo na. Cuarenta año no tsi quiha ja tocaniquë ra. ³⁷ Jasca, “Mato qui jahuë chani yoati ibo huëtsa raaxëhi quiha Dios mato mëbiti. Mato quima tsëquëxëhi quiha naa joni ra” i jahuë jimibo qui Moisés yamabo ni quiha. Toca ca yoanish ca Moisés tsi xo naa ra. ³⁸ Jasca, xabachá tsi Dios qui arati noba jimibo catiquë tsi quiha Maca Sinái ca ángel ya tsi chaniniquë Moisés roha, noba jimibo nomari. Toa xo tsi quiha Dios yoba yoi ja biniquë noqui ati ra.

³⁹ ‘Jama, naa Moisés noba jimibá banahuacasyamaniquë pë. Jato qui yoi quiha. Jahari Egipto mai qui ja bacacascaniquë pë. ⁴⁰ Jatsi quiha “Dios bo noqui mi ano ra, noba rēquëniniti ibo bo iti. Yama xo Moisés ra. ¿Jahuënia caraca tia?” i Aarón qui jaca ni quiha, Moisés banahuacasyamahí na. ⁴¹ Toatiyá tsi quiha ídolo ja acaniquë pë. Toro baquë jahuë jaria ini quiha. Axo tsi quiha tēpas-hacanish ca yohina bo ja qui ja bëcaniquë pë toa ídolo ranihuaxëna. Jato qui jia ini quiha ja acanina.

⁴² ‘Jatsi jato quima Dios casoniquë. Jato noma jabi qui jato ja mëaniquë, oxë, bari, huishtima, tihi cabo qui ja aracano. Jabi ja toacani ca Dios Chani yoanish cató yoani quiha:

“Cuarenta xëni no tsi quiha yohina bo ma tēpasniquë; mahitsa.

E qui ja acacayamacaniquë rë, Israël cabá; mato mahitsa ca dios bo qui ja acacani iqui na.

⁴³ Jatsi Moloc icanai ca dios qui ma ara-araniquë rë, jahuë arati tapasa mato bëta bohi na.

Jasca, Renfán icanai ca huishti qui ma ara-araniquë rë.

Tihi ca ídolo bo ma aniquë rë, arati.

Ja quëshpi tsi Babilonia mai oquëri mato pacanamaxëquia ra”

i Dios ni quiha.

⁴⁴ Jasca, xabachá racapama tsi quiha arati oxti noba naboyamabá jaya-paoniquë. Jabi Moisés jisni ca planes jascaria tsi toa arati oxti acacanicuë, naa Diós Moises yoani jascaria. ⁴⁵ Toa arati oxti noba naboyamabá jaya-paoniquë. Jatsi Moisés quirëquë quiha Josue yaxo tsi noba naboyamabá toa arati oxti bënicuë noba mai qui. Jatsi carayanaba mai quiha noba naborëquëbá biniquë ra. Toa mai ó tsi noba naborëquëbo rëquë bocaquë tsi quiha toa carayanabo Diós jabamaniquë. Jatsi toá tsi huëstima ca xëni no tsi quiha toa arati oxti chitënicuë. David yamabá yonati chitahëhuaquë tsi jari tobi toa arati oxti i-ipaoni quiha. ⁴⁶ Toatiyá tsi arati xobo paxa ca David yamabá acasnicuë. “Noba Jacob yamaba Dios bax arati xobo acasquia, racati” i ja ni quiha. Jasca, Diós noba David shomahuarianiquë. ⁴⁷ Jama, toa arati xobo David yamabá ayamani quiha, jahuë baquë Salomón ja nori. ⁴⁸ Jasca, joni bá acai ca xobó tsi racayoiyamahi quiha Dios ra. Jabi nëcahi quiha Diós ra:

⁴⁹ “Naipa xo tsi yonaquia; noho tsahoti jascaria xo ra.

Mai xo tsi yonaquia;

noho tahë iti jascaria xo ra.

¿Jënahuarixo raca ë bax xobo ma ana ra?

Jatiroha ca iti ó xo ëa ra.

⁵⁰ Jasca, ¿noho mëquënë tsi jatiroha ca acacayamani?”

i Dios ni quiha.

⁵¹ Jisa, jonibá. Noba naborëquëbo jascaria xo mato rë. Mahitsa ca dios bo, jabi bo, tihi cabo ja banahuacanicuë. Jishopë, tocaqui mato ri iquia, naa carayanabo jascaria. Mato shina qui jicotimaxëni xo Dios Chani rë. Jasca, Espíritu Santo joi nicacasyamaxo mato jaari ra. ⁵² Jisa; ëa yoacana. ¿Jëni ca Dios Chani yoati ibo mato naborëquëbá tënëmayamayamani? Dios Chani yoanish cabo tëquë ja acanicuë iquia. “Joxëhi quiha Mëstëxëni ca Yonati” i jaca quë tsi quiha tihi cabo mato naborëquëbá aniquë rë. Jaboqui tsi naa Mëstëxëni ca ma ayamëquë mato ri ra. Carayanabo qui ma mëayamëquë iquia, ja acacano iquish na. ⁵³ Jabi tocayamëquë mato, naa Dios yoba binish cabo ra. Jabi angél mato qui ani ca yoba nicayamaqui mato rë —nëa tsi quiha toa chama bo qui Esteban nëcaniquë.

⁵⁴ Esteban chani nicapama tsi quiha itsisnarianiquë jato shinana. Caxaxënia ja icani quiha ra. Esteban qui anomaria ini quiha ja caxacanaina.

⁵⁵ Jama, nai Esteban bësniquë. Espíritu Santo rëamë ja ini quiha. Bëisquí tsi quiha Dios oquë-oquëria, ja mënëcayá ca nii ca Jesu, tihi cabo ja jisnicuë. ⁵⁶ Jisi tsi quiha,

—Tsayapa. Japëquëhi quiha naipa ra. Nohiria Baquë, naa Jesucristo jisquia ra. Toá xo ra; Dios mënëcayá tsi nii xo —nëa tsi quiha Esteban nëcaniquë.

⁵⁷ Jatsi quiha jato joi ja choshacanicuë jahuë chani nicacasyamaxo na. Jasca, ja pámapoicaniquë. Joi choshapama tsi quiha ja qui ja jabayocanicuë

axëna. ⁵⁸ Tsamixo tsi quiha yaca cache ja xëreçanicuë axëna. Toa xo tsi quiha Esteban ja acanicuë maxaxá no. Jasca, ati ibo bá jato sahuëti bo janani quiha shinapayo tapai, naa Pablo icanai cato. ⁵⁹ Tsobocoxo tsi quiha Esteban qui maxax bo ja niacanicuë. Rësopama tsi quiha Esteban bëhoxnicuë:

—Noho shina bihuë, Ibo Jesú —iquiina.

⁶⁰ Jatsi quiha ja mëniniquë. Mënihax,

—Jato jocha shina-bënohuë, Ibobá —iriatsi ja niquë.

Jatsi ja nanicuë.

8

¹ Jabi toá tsi quiha Pablo ini quiha. Ja qui jia ini quiha ja acanaina.

Chahahuacanish cabo Pabló acasnina

Toa barí tsi quiha Jerusalén ca chahahuacanaibo tënëmati nohiria chama bá chitahëhuaniquë pë. Jatsi pacanamahacayonicuë chahahuacanaibo tëquë. Jodioba maí ca departamento huëtsa bo, Samaria mai, tihi cabo qui ja jabayocani quiha. Jerusalén tsi chitënicuë Chani chitahëhuati ibo bo roha.

² Jatsi quiha Dios noixëni ca joni bá Esteban maihuaniquë. Maihuahax ja ara-araconacanicuë.

³ Jatsi chahahuacanaibo quëyotsi Pabló huaniquë. Quëyopama tsi quiha xobo, xobo huëtsa, xobo huëtsa, tihi cabo qui Pablo jiconiquë chahahuacanaibo tsëcaxëna. Tsëcaxo tsi quiha preso qui jato ja nanënicuë.

Samaria mai qui Felipe canina

⁴ Jabapama tsi quiha Dios Chani chahahuacanaibá yoabonanicuë. Jatiroha ca iti xo tsi ja yoacani quiha. ⁵ Toatiyá tsi quiha Samaria maí ca yaca qui Felipe caniquë. Caxo tsi quiha Xabahamati Ibo Jesu ini ca ja yoanicuë. ⁶ Jia tsi quiha jahuë chani ja nicacanicuë. Ja acai ca jisti bo jisi tsi ja yoani ca ja chahahuacanicuë jato ri. ⁷ Jatsi jënimahuahacanicuë yoshi jayanish ca huëstima cabo. Tsëquëpama tsi jato joi ja choshacani quiha. Jasca, yora choni jayanish cabo, tapiyamacanaibo, tihi cabo jënimahuahacanicuë jato ri. ⁸ Jatsi quiha rani-ranicuë toa yacatá ca nohiria bo.

⁹ Jama tobi quiha Simón icanai ca iniquë toa yacatá no, naa yobë i-ipaonish cato. Ja ani cató tsi quiha Samariá ca nohiria bo ratë-ratënicuë. Jasca, jamë shinamixxëni ca joni ja ini quiha. ¹⁰ Jasca, ja qui chama bo, nohiria bo, tihi ca nohiria tëquëtá chahahuapaoni quiha.

—Anomaria tsi xo naa joni chama ra. Tonia Dios chama jaya xo ra —i nohiria bo paonicuë ja yoati na.

¹¹ Yobë ja ini iqui tsi nohiria bá chahahuapaonicuë. Naama tsi ja qui ja nicacani quiha. ¹² Jama, Dios Chani Felipe yoaquë tsi quiha ja quima Dios quiri ja bësocanicuë. Diós nohiria bo otocatsaina, Xabahamati Ibo Jesu iquiina, tihi cabo Felipe yoa-yoanicuë. Jatsi chahahuahax tsi quiha toa nohiria ashimahacanicuë, naa joni bo, yoxa bo, tihi cabo tëquë. ¹³ Jatsi quiha Jesu qui chitiminiquë Simón ri. Ja ashimahacanicuë jaa ri. Ashimahacaxo tsi quiha Felipe ja banahuanicuë. Ja ratë-ratënicuë acacanish ca jistiria bo jisi na.

¹⁴ Jatsi quiha Samariá ca nohiria bá Dios Chani chahahuani nori ca Jerusalén ca Dios Chani yoati ibo bá nicanicuë. Nicaxo tsi quiha Pedro, Juan, tihi cabo ja raacanicuë ja tsayacano iquish na. ¹⁵ Samaria mai qui cahëhax chahahuacanaibo bax ja bëhoxcaniquë, Espíritu Santo ja bicano. ¹⁶ Jari jato qui Espíritu Santo botëyamani quiha. Ibo Jesu jané roha tsi ja ashimahacacani

quilha. ¹⁷Jatsi quiha nohiria ó tsi jato mëquë Pedro, Juan, tihi cabá jananiquë. Jatsi Espíritu Santo ja bicaniquë.

¹⁸Dios Chani yoati ibo bá jato mëquë nohiria ó janahai cató tsi Espíritu Santo acacani nori ca Simón jisniquë. Jisi tsi quiha Pedro, Juan, tihi cabo qui parata ja acasniquë toca ca chama bixëna.

¹⁹—Toca ca chama é qui ri acana. Espíritu Santo nohiria bá bino ra, noho mëquë jato ó ë janahai cató no —i jato qui ja niquë.

²⁰Jatsi Pedró quëbiniquë:

—Mi parata ya tënëtiya qui cata. ¿Jënahuariaxo raca Diós acai ca chama paratá tsi copiti mi jascahuana? ²¹No bëta yonoconabëquitimaxëni xo mia ra, Dios basi mi shinahai ca nori iqui na. Anoma quiha. Jatsi ²²mi shinahai ca yoi ca quima casohuë. Mëri tsi Dios qui bëhoxhuë, mi shinahai ca yoi ca ja masano ra. ²³Yosaria ca mi nori ca jisquia ra. Mia yonahi quiha mi shina ó ca jocha ra —nëa tsi Simón qui Pedro nëcaniquë.

²⁴Jatsi Simón raquëniquë. Raquëhax,

—E bax bëhoxcana ra, naa mi yoaha ca Diós ëa copiyamano —i Simón niquë.

²⁵Jatsi toa yacata xo tsi Iboha Chani yoahax Jerusalén qui ja bacacaniquë. Bacapama tsi quiha huëstima ca Samariá ca yaca bo xo tsi Dios Chani ja yoabonacaniquë ra.

Etiopía ca chama Felipe bëchanina

²⁶Jatsi quiha Felipe qui Ibobá raani ca ángel chaniniquë:

—Niihuë. Sur quinia tsi cata. Toá xo Jerusalén quima Gaza quinia ca bahi ra —iquiina.

Xabachá ca nacohai ca bahi ja ini quiha. ²⁷Jatsi quiha Felipe caniquë. Bahi qui cahëxo tsi quiha Etiopía maí ca carayana ja jisniquë. Jahari bahí tsi cohi ja ini quiha. Jabi chama naa joni ini quiha, naa jahuë país ca parata obësoti ibo-iboria. Jahuë país ca yoxa chama bax ja yonoconi quiha, naa Candace icanai cato. Jabi Jerusalén qui naa joni caniquë arahi na. ²⁸Jatsi quiha jahuë mai qui bacapama tsi quiha Dios papi tsayahi ja iniquë; caritá tsi saho. Dios Chani yoati ibo Isaiás yamabá quënëni ca tsayahi ja ini quiha. ²⁹Jatsi quiha Espíritu Santo Felipe qui chaniniquë:

—Cata. Toa johai ca carita mi bëchano —iquiina.

³⁰Jatsi Felipe carita jisi caniquë. Capama tsi quiha joni joi ja nicaniquë. Isaiás quënëni ca tsayahi ja ini quiha, joi bëro cató no.

—¿Japa mi tsayahai ca cahëhai? —i joni qui ja niquë.

³¹Jatsi joní quëbiniquë:

—¿Jënahuariaxo raca ë cahëna rë? Yama tsi xo toa ë qui naa chani bërohuahaina rë —iquiina.

Jatsi Felipe qui joi ja amaniquë ja bëta ja tsahono.

³²Jabi ja tsayani ca tsi xo naa:

“Namëhacati ja mëpihacaquë ra, oveja jascaria.

Namëjahuacano tsi quiha ja pasiquë, naa oveja jascaria jahuë rani maxcoha-caquë no.

³³Ja bërabihuahacaquë ra.

Ja qui chama bá nicayamaquë rë.

Yoanoma tsi xo toa ja bëta bësobëquicanaibá acana ra.

Mëri tsi naa joni acacaquë ra”

i ja tsayani ca ni quiha, naa Dios papi ó cato.

³⁴Jatsi chamá Felipe nicaniquë:

—Ea mëbihuë. ¿Tsohuë yoati tsi chanihi ni Isaías sa? ¿Jamë yoati ni? ¿Joni huëtsa yoati ni? —iquiina.

³⁵ Jatsi quiha ja tsayahai ca nori ca bërohuati Felipé chitahëhuaniquë. Toa chani bërohuapama tsi quiha Jesu yoati chani jia ca ja yoaniquë. ³⁶ Bahí tsi copama tsi quiha jënë tóro pistia ca qui ja cahëcaniquë. Cahëhax,

—Tsayapa. Toá xo jënë ra. ¿E ashimahacati ma ni? —i Felipe qui chama niquë.

³⁷ Jatsi,

—Jesu qui pi mi chitimiyoino tsi ¿ai canomani? —i Felipe niquë.

Jatsi chamá quëbiniquë:

—Jaahuë. Dios Baquë yoi ca Jesu nori ca chahahuaquia ra —iquiina.

³⁸ Jatsi jahuë carita ja mënimahaca tsi jënë qui ja bocaniquë. Toa xo tsi quiha Felipé chama ashimaniquë. ³⁹ Jatsi tëmahinajacano tsi quiha Espíritu Santó Felipe mëbitapiniquë. Jistëquëyamani quiha Etiopía ca chama. Jatsi chama rëtsaminiquë jahuë mai qui. Rani tsi ja ini quiha. ⁴⁰ Jatsi Azoto yacatá tsi Felipe jisiquitapiniquë pa. Toa xo tsi quiha Dios Chani ja yoaniquë. Yoaxo riquiquiria tsi quiha Dios Chani ja yoabonaniquë Cesarea qui caqui na.

9

Jesu qui Pablo chitiminina

Hechos 22.6-16; 26.12-18

¹ Toatiyá tsi quiha chahahuacanaibo Pabló quëyocasniquë. Anomaria ini quiha jato ja roahaina. Quëyocatsi tsi jodioba arati ibo bo qui ja caniquë, ja shinahai ca yoahi na. ² Caxo tsi quiha carta bo, naa Damasco yacatá ca chama bo qui joihuati carta ja baaniquë. Jabi Damascó ca chahahuacanaibo tëquë, naa joni bo, yoxa bo tëquë, tihí cabo qui ja tsamicasni quiha, jahari Jerusalén qui boxëna. ³ Jatsi Damasco yaca qui basimajano tsi quiha ja qui mana ca huëa-huëaria ja qui huahuatapiniquë. ⁴ Mai qui paquëxo tsi quiha ja qui chanihai ca joi Pabló nicaniquë.

—Jisa Pabló. ¿Jënixo tsi noho rabëti bo tënëma-tënëmahai rë? —i ja qui joi niquë.

⁵ Jatsi,

—¿Tsohuë ni mia, Ibobá? —i Pablo niquë.

Jatsi,

—Jesu xo ëa ra. Noho rabëti bo tënëmaqui mia rë. Niitsina. Yaca qui mi jicono ra. ⁶ Toa ax tsi mi qui yoahacaxëti xo toa mi axëti cato —i ja qui joi niquë.

⁷ Jabi toa joi nicacanicuë Pablo banahuahai ca joni bo ri. Nicahax ja shina-risiquicaniquë. Yama ca ja jiscani quiha. ⁸ Jatsi quiha Pablo joiniquë. Nihax ja bëpëquënicuë. Bëco quiha ja iniquë ra. Ja taisyamani quiha. Jatsi quiha Damasco yaca qui Pablo ja mëpicaniquë. ⁹ Jatsi tres bari tsi quiha ja taisyamaniquë. Jasca, piti, jënë, tihí cabo ja ayamaniquë.

Pablo qui Ananías raahacanina

¹⁰ Jabi Damasco yacatá tsi racanicuë Ananías icanai cato; naa Ibo qui chitiminish ca joni. Naa joni qui noba Ibo jisiquiniquë ja tënëmehai cató no. Jisiquihax,

—Ananías —i ja qui Ibo niquë.

Jatsi,

—Nëá xo ëa, Ibobá —i ja qui Ananías niquë.

¹¹ Jatsi,

—Městëxëni icanai ca bahi qui catá. Toá xo xobo ra. Jahuë ibo tsi xo Judas. Jahá chitëhi quiha Pablo, naa Tarsó racapaonish cato. Jaha xo tsi nicahuë. Jaboqui bëhoxhi quiha. ¹²Jasca, ja tënámëhai cató tsi mia ja jisquë ra. Jahuë naquëtë qui mi jicohaina, mi mëquënë tsi jahuë bëro mi motsahaina taismaxëna, tihi ca tsi ja jisquë tënámëquí na —nëa tsi quiha Ibo nëcaniquë Pablo yoati na.

¹³Jatsi Ananiás quëbiniquë:

—Jishopë, Ibobá. Huëstima ca nohiria bá ëa yobayamëquë naa joni yoati na. “Jerusalén ca chahahuacanaibo tënëmahi quiha” icani quiha ra. Anoma xo naa joni iquia. ¹⁴Jasca, nëri ja johitaquë rë noqui, naa mi qui chitimicanaibo qui tsamixëna. Carta jaya quiha arati ibo ba chama bo jismati. Preso qui noqui bocatsi quiha iquia —i Ibo qui Ananiás niquë.

¹⁵Jama, Ibo nëcaniquë:

—Cata. Toa joni ë biniquë, carayanabo, país ca chama bo, jodiobo, tihi cabo qui noho Chani ja bono. ¹⁶Jasca, noho janë iqui tsi ja tënë-tënëxëhai ca ja qui jismaxëquia —i Ananiás qui Ibo niquë.

¹⁷Jatsi quiha Pablo mërahi Ananiás caniquë. Jahuë xobo qui jicoxo tsi quiha Pablo ó tsi jahuë mëquë ja jananiquë. Janahax,

—Jisa, ëbë xatë Pabló. Ibo Jesú ëa raaquë, naa bahí tsi mi qui jisiquihitahax ca jasca cato. Ea ja raaquë ra, mi taistëquëno, Espiritu Santo mi rëahacano iquish na —nëa tsi quiha Pablo qui Ananiás nëcaniquë.

¹⁸Jatsi quiha Pablo taistapiniquë ra. Jahuëcaraca, naa sani tsapa jascaria ca jahuë bëro quima ririqiniquë. Jatsi jënima quiha jahuë bëro iniquë. Jatsi Pablo joiniquë. Jasca, ja ashimahacaniquë. ¹⁹Jatsi ja originiquë. Oriquihax ja chamaniquë. Jatsi quiha toa Damascó ca chahahuacanaibo ya ja chitëniquë ichariama ca barí no.

Damascó xo tsi Dios Chani Pabló yoanina

²⁰Chahahuaxo tsi quiha jodioba catiti xobo bo xo tsi Dios Chani yoati Pablo chitahëhuaniquë. Yoahi tsi,

—Dios Baquë yoi xo Jesu ra —i jato qui ja niquë.

²¹Jatsi ratëyocaniquë jahuë chani nicanish cabo.

—Jia ma. ¿Jerusalén ca Jesu qui chitiminish cabo tënëmapaonish ca ma ni naa sa? ¿Nëá ca chahahuacanaibo qui tsamihí ja joyamayamahitaha? ¿Jerusalén ca arati iboba chama bo qui ja bocasyamayamahitaha? —nëa tsi quiha nohiria bo nëcaniquë jahuë chani nichahax na.

²²Jama, raquëxoma tsi quiha Dios Chani Pabló yoa-yoaniquë. Cristo, naa jato Xabahamati Ibo Jesu iqui ca jato ja jismani quiha. Jama, toa Damascó ca jodiobá jahuë chani chahahuayoicasyamaniquë rë. Pablo chani quëbitimaxëni ja icani quiha.

Damascó ca jodiobá Pablo acasnina

²³Jatsi quiha jodioba chama bá Pablo acasniquë huëstima ca bari quirëquë. Ati planes ja acani quiha shinaxo na. ²⁴Jama, ja acascanai ca Pabló nicaniquë. Jatsi ja quinia-quinianiquë. Jatiroha ca bari, jatiroha ca baquicha, tihi cató tsi quiha yacatá ca caiti bo ó ja bësocaniquë axëna. ²⁵Jama, quinia huëtá tsi quiha Pablo paxaniquë ra. Baquichá tsi quiha yacatá ca panë xo tsi Pablo chahahuacanaibá botëmaniquë mai qui. Cacanó tsi ja botëni quiha. Toca tsi quiha Pablo paxaniquë.

²⁶Jatsi Jerusalén qui cahëhax tsi quiha Jerusalén ca chahahuacanaibo qui Pablo riicasniquë. Jama, ja qui ja raquëcaniquë. Chahahuahai ca ja iqui ca

ja quëscahuayamacani quiha. ²⁷ Jatsi quiha Bernabé Pablo mëbiniquë. Chani chitahëhuati ibo-iboria bo qui Pablo ja boni quiha. Boxo tsi quiha Pablo qui ocapijani ca jato qui ja yoaniquë. Yoaquí tsi quiha Damasco quinia ca bahi tsi ja qui Ibo jisiquinina, ja qui Ibo chaninina, Damasco xo tsi Ibo Chani ja yoanina, tihí cabo jato qui ja bërhuaniquë. ²⁸ Jatsi quiha Chani chitahëhuati ibo bo ya Pablo co-coniquë. Jasca, toa xo tsi Iboba Chani ja yoa-yoaniquë raquëxoma. ²⁹ Jama, ja bëta joi mëraniquë carayanaba joi chanihai ca jodiobo. Jato qui yoi ini quiha ja chanihaina. Ja iquí tsi Pablo ja acascani quiha. ³⁰ Jama, ja acascanai ca chahahuacanaibá nicaniquë. Nicaxo tsi quiha Pablo ja mëbicaniquë ja paxano iquish na. Jatsi Cesarea yaca qui ja bocaniquë. Toa xo tsi quiha Tarso yaca qui ja raacaniquë ra.

³¹ Jaquirëquë quiha chahahuacanaibo, naa jodioba maí cabo, Galileá cabo, Samariá cabo, tihí cabo nohiria bá yosiyamaniquë. Jia tsi quiha ja racaracani quiha. Jatsi chamananiquë ja chitimicanaina ra. Jasca, Espiritu Santó jato mëbiniquë. Chahahuaniquë huëstima cabo. Jia tsi Iboba yoba ja banahuariacaniquë.

Lida yaca qui Pedro canina

³² Toatiyá tsi quiha chahahuacanaibo qui shishohi Pedro caniquë, naa yaca huëtsá ca racacanaibo qui. Jabi Lida icanai ca yaca qui ja cani quiha. ³³ Caxo tsi quiha Eneas icanai ca joni ja bëchaniquë toa xo na. Noitiria ca joni ja ini quiha. Ocho año no tsi jahuë oxati raza ja ini quiha. Choni jahuë yora ini quiha. ³⁴ Jatsi quiha Pedro ja qui chaniniquë:

—Mia jënimahuahi quiha Jesucristo, Eneás. Joihuë. Mi oxati shomahuahuë —i ja qui ja niquë.

³⁵ Jatsi jënimahuahacanish ca Lida, Sarón, tihí ca yacatá ca racacanaibá jisniquë. Jisi tsi quiha Ibo quiri ja bësoyocaniquë ra.

Yoxa Pedró bësetëquëmanina

³⁶ Jasca, Jope icanai ca yacatá tsi quiha shinajiaxëni ca yoxa racaniquë. Tabita jahuë janë ini quiha. Jabi Carayanaba jói tsi quiha Dorcas ja quënahacani quiha. Jasca, noitiria cabo mëbihí naa yoxa i-ipaoni quiha.

³⁷ Toatiyá tsi ja rësoniquë iquihax na. Jatsi jahuë rabëti bá jahuë yora ashimahaca tsi quiha mana ca naquëtë ó tsi ja janacaniquë. ³⁸ Jatsi Lida yacatá tsi Pedro iquí ca ja nicacaniquë. Basima ja ini quiha. Nicaxo tsi quiha dos ca joni bo ja qui ja raacaniquë chani ya, Pedro bicasquí na. Cahëhax,

—Mëri tsi Jope qui johuë —i ja qui jaca niquë.

³⁹ Jatsi jato bëta Pedro caniquë nicahax na. Ja cahëquë tsi quiha mana ca naquëtë qui nohiria bá boniquë. Toá tsi bënë imanish ca yoxa bo mani ini quiha. Arapama tsi quiha Dorcás quëshani ca saco bo, sahuëti bo, tihí cabo Pedro qui ja jismacaniquë. Noitiria cabo bax ja ani quiha. ⁴⁰ Naquëtë qui jicoxo tsí quiha Pedró nohiria bo raaniquë catcha. Raahax ja mëniniquë bëhox-xëna. Bëhoxhax tsi quiha bësoyama ca yoxa quiri ja bësoniquë.

—Tsahohuë, Tabitá —i ja qui ja niquë.

Jatsi quiha ja bëpëquëniniquë. Pedro jisi tsi quiha ja tsahoniquë. ⁴¹ Jatsi Pedró mëhachahaca tsi ja nimaniquë. Jatsi toá ca mani ca chahahuacanaibo, bënë imanish ca yoxa bo, tihí cabo ja quënaniquë. Quënahax,

—Nëá xo mato Tabita ra. Bëso xo ra —i jato qui ja niquë.

⁴² Jatsi ocapijani ca Jope yacatá ca nohiria bo nicayoniquë. Jatsi quiha Ibo qui huëstima ca nohiria chitiminiquë. ⁴³ Jatsi naama tsi quiha Jope ó tsi Pedro

chitëniquë tiisimahi na. Simón icanai ca joni ya ja chitëni quiha, naa yohina bichi shomahuati ibo ya.

10

Carayana ca Cornelio qui Pedro canina

¹ Jabi Cesarea yacatá tsi quiha carayana ca Cornelio racaniquë. Soldado capitán ja ini quiha. Jabi huëstima ca soldado bo ja yonani quiha, naa Italia mai ax bëcanish cabo. ² Jasca, shinajiaxëni ca Dios qui arahai ca joni ja ini quiha. Jasca, Dios qui aracani quiha jahuë ahuini, jahuë xocobo ri. Jasca, noitiria cabo qui parata ja ani quiha. Dios qui ja bëhoxrohani quiha. Tihi tsi ja ani quiha Dios noiquí na. ³ Toatiyá tsi quiha yata, a las tres tsi bëhoxpama tsi Cornelio tënamëniquë. Jahuë xobo qui jicohai ca ángel ja jisniquë, naa Díos raani ca ángel. Jicohax,

—Cornelió —i ja qui ángel niquë.

⁴ Jatsi ángel Cornelió tais-taisniquë raquëhax na. Jatsi,

—¿Jahuë ni, Taitá? —i Cornelio niquë.

Jatsi ángel quëbiniquë:

—Mi bëhoxhaina, noitiria cabo mi mëbihaina, tihi cabo Dios qui jia quiha. Jaboqui mia shinahi quiha Dios. ⁵ Jaboqui joni bo Jope yaca qui mi raano. Toá xo joni, naa Simón Pedro icanai cato. Bichi ja bocano ra. ⁶ Simón ya, naa yohina bichi shomahuati ibo ya racahi quiha; naa ia quëpë ca xobó cato —nëa tsi quiha Cornelio qui ángel nëcaniquë.

⁷ Jatsi quiha ja qui chaninish ca ángel jisbayaniquë. Jisbayajahuaguë tsi quiha dos ca yonati bo, huësti ca soldado, naa Dios qui arahai cato, tihi cabo ja quënaniquë, Pedro qui ja bocano. ⁸ Quënaxo tsi quiha ángel yoaha ca jato qui ja yoaniquë. Yoaxó tsi quiha Jope qui jato ja raaniquë Pedro ja bicano.

⁹ Huëaguë tsi quiha, naa matoroco bari tsi quiha Jope basima ja icaniquë. Jasca, matorocó bari tsi quiha xobo cacha Pedro caniquë bëhoxhi na.

¹⁰ Bëhoxpama tsi quiha ja paxnaniquë. Ja oriquicasni quiha. Jari ja bëtë-bëtëcano tsi quiha Pedro tënamëniquë. ¹¹ Jatsi nai japëquëhai ca ja jisniquë. Japëquëjaquë tsi quiha jahuëcara ca, naa raiti jahëhuaxëni ca mai qui botëhai ca ja jisniquë. Jahuë cuatro ca papotó tsi ja botëmani quiha. ¹² Jabi jaxara tsi quiha yohina bo, rono bo, isa bo, tihi cabo iniquë. ¹³ Jatsi quiha chanihai ca joi Pedró nicaniquë:

—Joihuë, Pedró. Tëpashuë. Mi pino ra —i ja qui joi niquë.

¹⁴ Jama, picasyamaniquë Pedro.

—Jishopë, Ibobá. Pinoma xo ra. Noba jabi pasomaha tsi xo toa no pihaina iquia —i Pedro niquë.

¹⁵ Jatsi joi chanitëquëniquë:

—“Jënima tsi xo naa piti ra” ii quiha Dios. Jatsi “Pinoma” iyamahuë —i ja qui joi niquë.

¹⁶ Trés tsi joi nëcani quiha. Jatsi nai qui raiti chahita tërohacatapiniquë.

¹⁷ Jatsi quiha Pedro shina-shinaniquë ja jisni ca yoati na. Shinajahuano tsi quiha Cornelió raani ca joni bo jahuë xobo qui cahëniquë. Caiiti cacha nii quiha ja icaniquë. ¹⁸ Cahëhax,

—¿Nëa racahi ni Simón Pedro ra? —i jaca niquë quënahi na.

¹⁹ Nicayamahi quiha Pedro. Ja tënamëhai ca yoati shinahi ja ini quiha. Jatsi ja qui Espíritu Santo chaniniquë:

—Jisa. Mia bēnahi quiha tres ca joni bo ra. ²⁰ Joihuē. Jato qui botētsina. Raquēhaxma tsi jato bēta cata, jato ē raahitaha quēshpi na —i Pedro qui Espiritu Santo niquē.

²¹ Jatsi quiha joni bo qui Pedro botēniquē. Botēhax,

—Pedró xo ēa ra. ¿Jēnihax tsi ma bēcana? —i jato qui Pedro niquē.

²² Jatsi ja quēbicaniquē:

—Noqui capitán Cornelió raahitaquē ra. Shinajiaxēni ca Dios qui arahai ca joni quiha. Jasca, jodiobo nohiria bo qui jia quiha. Jabi ja qui ángel chanihitaquē ra. “Pedro qui chani raahuē, mi xobo qui ja jonó iquish na” i ja qui ja ita quiha. Johuē. Mi chani nicacatsi quiha —i Pedro qui joni bo niquē.

²³ Jatsi quiha joni bo qui joi Pedró amaniquē ja bēta baquichá oxati. Jatsi huēaquē tsi baquishmari tsi quiha jato bēta Pedro caniquē. Jasca, bocani quiha Jopé ca chahahuacanaibo rabē cato.

²⁴ Oxabaya riquibaya tsi huēaquē tsi quiha Cesarea yaca qui ja cahēcianiquē. Jabi Pedro ó Cornelio pasoni quiha. Jaha pasoku tsi quiha jahuē jimi bo, jahuē rabēti bo, tihi cabo ja catiani quiha, Pedro chani ja nicacano iquish na. ²⁵ Jatsi jahuē xobo qui Pedro cahēquē tsi quiha ja bēsojó tsi Cornelio mēniniquē. ²⁶ Jama, Pedró joimaniquē. Joimahax,

—Niihuē. Joni roha xo ēa ri ra —i ja qui Pedro niquē.

²⁷ Jatsi Cornelio xobo qui Pedro jiconiquē. Jicoxo tsi quiha huēstima ca nohiria mani ca ja jisniquē. ²⁸ Jatsi jato qui Pedró chaniniquē:

—Noqui jodioba yoba pasomaha tsi xo toa mato carayanabo ya no rabēnabēquihaina ra. Dios qui yoi ē quēscahuani quiha. Jama, yama tsi xo toa yoi cato, jēnima xo carayanabo tēquē, tihi cabo ēa Díos jismahitaquē ra.

²⁹ Ja tsi xo toa carayana ca Cornelió ēa bēnaquē tsi ē jotapihitaquē. “Jishopē. Cacayama xo ēa” i jato qui ē yamahitaquē ra. Jatsi jaboqui mia nicacasquia. ¿Jēnixo tsi ēa mi bēnaha? —nēa tsi ja qui Pedro nēcianiquē.

³⁰ Jatsi quiha Cornelió quēbiniquē:

—Bari huētsa, naa matoroco bari bēhoxpama tsi ēa bēsojó ca niihai ca joni, naa bajra-bajrahai ca sahuēti sahuē ca ē jisitaquē ra. ³¹ “Mi bēhoxhaina, noitiria cabo mi mēbihaina, tihi cabo Dios qui jia quiha” i ē qui ja itaha quiha.

³² Jasca, “Jope yaca qui joni bo mi raano. Toá xo joni ra, naa Simón Pedro icanai cato. Bichi ja bocano. Simón ya, naa yohina bichi shomahuati ibo ya racahi quiha; naa ia quēpē ca xobó cato” i ē qui ja itaha quiha. ³³ Ja yoaha ca nicaxo tsi bamaxoma tsi joni bo mi qui ē raatapihitaquē mia biti. Noqui jia tsi xo mi johana ra. Jaboqui nēá xo noa, noqui tēquēta, Dios bēsojó no. Ibo Dios Chani, naa mi yoaxēti ca nicariacasqui noa ra. Ihuē —nēa tsi Pedro qui Cornelio nēcianiquē.

Carayana ca Cornelio xobo xo tsi Dios Chani Pedró yoanina

³⁴ Jatsi chaniti Pedró chitahēhuaniquē:

—Jabija ca ē cahēyamaniquē rē. Oquē noqui jodiobo iqui ca ē quēscahuani quiha rē. Jama xo ra. Yama tsi xo toa oquē ca nohiria bo Dios qui iquia. Jaharisi ca xo ra. ³⁵ Jaboqui nohiria bo tēquē, naa ja qui aracascanaibo, jia ca acanaibo, tihi cabo bichi quiha. ³⁶ Jabi jodiobo qui pari jahuē Chani Díos raani quiha. Jariapari tsi Dios ya rabēnamati Chani jato qui jahuē Jesucristo yoani quiha. Jabi jahuē baquē tsi xo toa jatiroha caba Ibo-iboria, naa jodiobo, carayanabo tēquē. ³⁷ ¿Jodioba mai ó tsi ocapijani ca ma nicayamayamani? Jabi jariapari tsi quiha ashimati ibo Juan yamabá Jesu ashimaniquē Galilea xo na. ³⁸ Jatsi quiha jahuē Jesu qui chama Díos

aniquë Espíritu Santó no. Toa chamá tsi huëstima ca jia ca jahuë bo Jesú ani quiha. Jasca, yoshi jaya cabo ja jënimahuaniquë. Co-copama tsi quiha jia tsi ja tocaniquë, Dios ja bëta ini iqui na. ³⁹ Jabi naa Jesu ya no bohopaoniquë ra. Jatiroha ca ja anina, naa jodioba mai, Jerusalén, tihi cabo xo ja ayoni ca no jisniquë ra. Jatsi quiha naa Jesu ja acaniquë ra, cruzó tsi tooxacanai cató no. ⁴⁰ Jatsi tres bari tsi ja raaniquë mai xo na. Jaquirëquë jahuë Jesu Díos bëсотëquëmaniquë. Bësomaxo tsi quiha jahuë Jesu Díos jismaniquë nohiria bo qui. ⁴¹ Jatsi Jesu no jisniquë, naa jahuë rabëti bo. Jisyamahi quiha nohiria tëxë. Jama, noqui, naa ja bëta i-ibëquipaonish cabá jisniquë. Rëquë Díos noqui bini quiha tihi cabo no yoano. Jasca, naa bëсотëquëmahacanish ca Jesu ya no oriquiniquë. Ja bëta jënë no aniquë ra. ⁴² Jatsi nohiria bo qui jahuë chani yoati Jesú noqui raaniquë. “Jatiroha ca nohiria bo, naa bësoyama cabo, bëso cabo, tihi cabo copixëquia ja acanai ca quëshpi na. Tocati chama Díos ë qui ani quiha” i noqui Jesu ni quiha. Jasca, naa Chani yoatí no raahacanicuë ra. ⁴³ Jabi Jesu jonox pari no tsi Dios Chani yoati ibo bo chani-chanipaoniquë ja yoati na. “Jahuë chamá tsi masahacaxëhi quiha toa ja qui chitimicanaiba jocha ra” i jaca paoni quiha —nëa tsi Cornelio, jahuë xobó cabo, tihi cabo qui Pedro nëcaniquë.

Carayanabá Espíritu Santo binina

⁴⁴ Jari Pedro chanino tsi quiha ja qui nicacanaibo qui Espíritu Santo botënicuë; naa carayanabo qui. ⁴⁵ Jatsi Pedro ya bëcanish ca jodiobo ratënicuë, carayanabo qui Espíritu Santo Díos ani ca jisi na. ⁴⁶ Jasca, jamëri ca joi bá tsi Dios ja ocahuahai ca ja nicacanicuë. ⁴⁷ Jatsi Pedró chaniniquë:

—¿Tobi ni toa jato ë ashimahai ca jënëmacatsai cato pa? Noqui jodiobo jascariá tsi naa carayanabá Espíritu Santo biquë jato ri ra. ⁴⁸ Jatsi Jesucristo janë tsi jato ashimaxëquia ra —i jahuë jimibo qui Pedro niquë.

Jato ja ashimaquë tsi quiha Pedro ja nicacanicuë tihi ca bari tsi ja chitëno.

11

Carayanabá chahahuahai ca yoati Pedró yoanina Jerusalén ca yosibo qui

¹ Jatsi quiha Dios Chani carayanabá bini ca Dios Chani chitahëhuati ibo bo, jodioba maí ca chahahuacanaibo, tihi cabá nicaniquë. ² Jatsi Jerusalén qui Pedro bacaquë tsi quiha ja qui jodioba chahahuacanaibo quësoniquë. Quësohax,

³ —¿Jëniriahax carayanabo qui shishohi mi cahitaha rë? ¿Jëniriahax jato bëta tsi mi oriquihitaha? Anoma quiha —i Pedro qui jaca niquë ja qui quësocatsi na.

⁴ Jatsi quiha ja qui ocapijani ca jato qui bërohuati Pedró chitahëhuaniquë:

⁵ —Huësti bari tsi Jope qui shishopama tsi ë tënamëhitaquë bëhoxhi na. Tënamëquí tsi jahuëcara ca, naa raiti jahëhuaxëni ca mai qui botëhai ca ë jisitaquë. Jahuë cuatro ca papotó acha quiha. ⁶ E tsaya-tsayahitaquë ra. Tsayaquí tsi ja xara ca huëstima ca yohina bo, rono bo, isa bo, tihi cabo ë jisitaquë. ⁷ Jatsi ë qui chanihai ca joi ë nicahitaquë. “Tëpashuë. Pihuë, Pedró” i ë qui joi itaha quiha. ⁸ Jama, ë quëbiniquë: “Jishopë, Ibobá. Anoma ra. Noba jabi pasomaha ca ë piyamapistarianiquë ra” i ë itaquë. ⁹ Jatsi mana ca joi ë qui chanitëquëhitaquë pa. “Jënima tsi xo naa piti ra” ii quiha Dios ra. ‘Pinoma’ iyamahuë” i ë qui joi ita quiha. ¹⁰ Tres tsi quiha ja ocanicuë ra. Jaquirëquë mana ja tërohacanicuë.

11 “Toatiyá tsi quiha noho racahai ca xobo qui tres ca joni cahëhitaquë. Cesarea yaca quima ja raahacacahitaha quiha ëa biti. 12 Jatsi quiha “Raquëhaxma tsi jato bëta cata” i ë qui Espiritu Santo itaha quiha. Jatsi ë cahitaquë. Jasca, ëa chimatihitaquë seis ca xatë bo ri. Jatsi carayana ca Cornelio xobo qui no jicohitaquë, naa noqui tëquëta. 13 Jatsi quiha jahuë xobó ca niñhai ca ángel ja jisi ca yoati noqui ja yoahitaquë. “Jope yaca qui joni bo raahuë Pedro biti. 14 Mato qui chani yoaxëhi quiha, mia, mí-nabo, tihi cabo xabahamati” i ja qui ángel itaha quiha. 15 Jicoxo tsi quiha Dios Chani yoatí ë chitahëhuahitaquë. Jatsi naa carayanabo qui Espiritu Santo botëniquë, naa noqui ja botëni jascaria. 16 Jatsi Ibo Jesú noqui yoani ca ë shinahitaquë: “Jënë tsi ashimahi quiha ashimati ibo Juan. Jama, Espiritu Santó tsi ashimahacaxëqui mato ra” i noqui ja ni quiha. 17 Jatsi jato qui Espiritu Santo Diós aca nori ca ë cahëhitaquë ra, naa noqui ja ani jascaria, naa noba Ibo Jesucristo qui no chitiminiquë no. Jatsi ¿jënahuariaxo raca Diós acai ca ë jënëna? —nëa tsi quiha Jerusalén ca yosibo qui Pedro nëcaniquë carayanabá chahahuacanaí ca yoati na.

18 Jatsi Pedró yoaha ca nicahax tsi quiha ja rani-ranicaniquë. Jënëni quiha ja qui ja quësocanaina.

—Carayanabo xabahamacatsi quiha Dios ra. Jato bësomacatsi quiha pa —i jaca niquë Dios ocahuahi na.

Antioquíá ca carayanabá chahahuanina

19 Esteban axo tsi quiha chahahuacanaibo huëtsa ri yositsi nohiria bá huaniquë. Ja iqui tsi nëama ja jabacanicuë. Fenicia mai, Chipre mai, Antioquía yacata, tihi cabo qui ja jabacanicuë. Toa xo tsi quiha jato jimibo qui, naa jodiobo qui roha Dios Chani ja yoacanicuë. 20 Jasca, toatiyá tsi quiha Antioquía yaca qui huësti huësti ca chahahuahai ca jodiobo bocanicuë, carayanabo qui Ibo Jesu Chani jia ca yoaxëna. Carayanaba mai, naa Chipre, Cirene, tihi cató ca racahai ca jodiobo bocani quiha. 21 Jia tsi Ibobá jato mëbini quiha. Jatsi quiha huëstima ca carayanabá chahahuaniquë. Ibo quiri ja bësocani quiha jato ri.

22 Jabi Ibo quiri carayanabo bësoni ca nicaxo tsi quiha jato qui Bernabé Jerusalén ca iglesiá raanicuë. 23 Cahëxo tsi quiha Diós toá ca carayanabo xabahamani ca ja jisnicuë. Jatsi quiha ja raniniquë. Jasca, jia tsi jato ja yobanicuë, Ibo quima ja casoyamacano iquish na. 24 Jabi shinaji axëni ca joni Bernabé ini quiha. Espiritu Santo rëamë ja ini quiha. Jasca, chamaxëni Ibo qui ja chitimihai ca ini quiha. Ja iqui tsi huëstima ca carayanabo Ibo quiri bësoniquë ra.

25 Jaquirëquë riquicaya tsi Tarso yaca qui Bernabé caniquë, Pablo mëraxëna. 26 Jatsi Pablo ja jisnicuë. Jaquirëquë quiha Pablo ja bënicuë jahari Antioquía qui. Jatsi toa xo tsi quiha huësti ca año ja raacanicuë chahahuahai ca carayanabo ya. Huëstima ca nohiria bo tiisimahi ja icani quiha. Jabi Antioquíá pari tsi “Cristiano bo” chahahuacanaibo quënahacani quiha.

27 Jasca, toatiyá tsi quiha Jerusalén ax huësti huësti ca Dios Chani yoati ibo bo bëcaniquë Antioquía qui. 28 Jabi jato maxo ó tsi huësti ca joni, naa Agabo icanaí ca ini quiha. Cahëhax iglesiá tsi Agabo niiniquë chahahuacanaibo yobaxëna.

—Basima tsi xo nohiria bá piti biniatiya iquia ra. Paxnacaxëcane quiha naa carayanaba mai tëquë ó ca nohiria bo rë —í jato qui ja niquë.

Jabi ocapijani quiha, carayana ca chama Claudió yonaniquë no. ²⁹ Jatsi jodioba maí ca chahahuacanaibá tënë-tënëniquë biniaquí na. Jatsi quiha Antioquiá ca chahahuacanaibá ofrenda raaniquë jato mëbicasquí na. Parata ati tiísi jayaquí tsi jato qui ja acani quiha. ³⁰ Ofrenda catiaxo tsi quiha Bernabé, Pablo, tihi cabo qui ja acaniquë Jerusalén ca yosibo qui ja bocano.

12

Jacobo namëhacanina — Preso qui Pedro nanëhacanina

¹ Toatiyá tsi quiha chahahuacanaibo tënëmatsi chama Herodés huaniquë. ² Jariapari tsi quiha Jacobo, naa Juan rëquëmë ja tēpasniquë saipí no. ³ Jaha tsi shina-raniniquë jodiobo ra. Ja rani-ranicanaí ca jisi tsi Pedro qui ja tsaminiquë jaa ri. Jabi ocapijani quiha jodioba fiestá no, naa levadura yama ca mapari ja picaniquë no. ⁴ Tsamixó tsi quiha preso qui Pedro ja nanëniquë. Nanëxo tsi quiha huëstima ca soldado bo ja jananiquë Pedro ó bësoti. Cuatro ca maxo bo ja janani quiha. Jasca, jatiroha ca maxo ó tsi cuatro ca soldado bo ini quiha. Jabi pascua fiesta quirëquë jodiobo qui Pedro ja mëacasni quiha nohiria bo bësojó xo tsi copixëna. ⁵ Jama, presó ca Pedro ó soldado bo bësono tsi quiha ja bax iglesiá ca nohiria bo bëhox-bëhoxniquë.

Preso quima Pedro paquëmahacanina

⁶ Jatsi huëaquë tsi baquishmarí tsi quiha tsëcahacati Pedro iniquë. Huëaquë tsi jodiobo bësojo xo tsi Pedro Herodés copicasni quiha. Jama, toa baquichá tsi quiha oxa Pedro iniquë, dos ca soldado bo naxërëquë no. Jasca, cadená tsi nëxë ja ini quiha. Jasca, naquëtë cacha nii ini quiha dos ca jaha bësohai ca soldado bo. ⁷ Jatsi jahuë naquëtë tsi quiha Iboba ángel jisiquitapiniquë. Toá tsi nii ja ini quiha. Jasca, naquëtë qui huahuani quiha huëana. Jatsi ángel Pedro pipaisahaca tsi quiha ja bësomaniquë.

—Mëri, mëri, niitsina —i ja qui ángel niquë.

Jatsi jahuë mëquënë ca cadena xapaquëniquë.

⁸ Jatsi,

—Mi saco, mi zapato bo, tihi cabo sahuëhuë ra —i ja qui ángel niquë.

⁹ Jatsi quiha ángel Pedró banahuaniquë. Toca tsi quiha preso quima ja tsëquëniquë. Jabi ángel aca ca ja cahëyoyamani quiha, ja tēnamëhai nori ca quëscahuaguí na. ¹⁰ Toca tsi quiha jariapari ca soldado ba maxo ja huinocaniquë. Jaquirëquë maxo huëtza ja huinocaniquë. Huinohax preso caiti qui ja cahëcaniquë, naa yaca qui huajati cato. Jatsi quiha jato bax caiti japëquëniquë ra; jamë no. Jatsi ja huajacaniquë. Huajahax tsi quiha bahí tsi ja bocani quiha. Jatsi calle huësti cató tsi ángel Pedro jisbërianiquë. ¹¹ Jatsi Pedro bësoyoiniquë.

—Jabija pa. Ibobá huësti ca ángel raaquë pa, ëa tsëcati, Herodes, jodioba chama bo, tihi cabá ëa ayamano iquish na —i Pedro niquë.

¹² Ocapijaha ca shinapama tsi María, naa Juan Marcos jahëhua xobo qui Pedro caniquë. Toá tsi quiha huëstima ca nohiria mani ini quiha, bëhoxhi na.

¹³ Xobo qui cahëxo tsi quiha caiti ja tox-toxhaniquë. Jatsi Rode, naa xobó ca yonati caniquë, tsohuëcara joha ca jisi na. ¹⁴ Caxo Pedro quënahai ca joi ja nicaniquë. Nicañax jahari ja jabaniquë ranihi na. Caiti japëcati ja shina-bënoni quiha.

—Joquë Pedro ra. Caití nii xo pa —i jato qui ja niquë. ¹⁵ Jatsi,

—¿Jënahuariahax raca nëbi ja ina ra? Cahëyamaqui mia ra —i ja qui nohiria niquë.

Jama,

—Jisi bëcahuë. Mato parayamaquia. Joquë ra —iria tsi ja niquë.

Jatsi,

—Tonia jahuë ángel mi nicaquë. Yama xo ra —i ja qui jaca niquë.

¹⁶Nëcajacano tsi quiha jari caiti tox-toxhahi quiha Pedro iniquë jicocatsi na. Jarohari tsi caiti ja japëcacaniquë. Japëcaxo tsi quiha Pedro pa ja jiscaniquë. Ja ratëyocaniquë jisi na. ¹⁷Jatsi quiha Pedró jahuë mëquë bëë-bëëhaniquë jato pasimaxëna. Ja pasicaquë tsi quiha ocapijaha ca jato ja yoaniquë:

—Preso quima Ibobá ëa tsëcayaquë ra. Jaboqui Jacobo, chahahuacanaibo huëtsa bo, tihi cabo yoacata —i jato qui ja niquë.

Yoaxo tsi quiha jato ja jisbayaniquë xobo huëtsá racaxëna.

¹⁸Huëaquë baquishmarí tsi quiha soldado bá Pedro yopaniquë. Yopahax ja shina-motsiquicaniquë,

—¿Jahuënia caraca Pedro sa? —iquiina.

¹⁹Jatsi Herodés jahuë soldado bo raaniquë Pedro mërati. Mahitsa ja mëra-mëracani quiha. Jatsi Pedro ó bësoni ca soldado bo ja nica-nicaniquë. Mahitsa quiha. Ja cahëyamacani quiha. Jatsi caxaxo tsi cacha jato Herodés raaniquë namëhacati. Jaquirëquë jodioba mai Herodés jisbayaniquë jahuë xobo-xoboriá tsi racaxëna, naa Cesarea yacatá cató no.

Chama Herodes rësonina

²⁰Toatiyá tsi quiha Tiro, Sidón, tihi ca yacatá ca nohiria bo qui caxaxënia quiha Herodes iniquë. Ja iqui tsi tihi ca yaca ax nohiria maxo Herodes qui jisi bocaniquë ja bëta chaninaxëna, ja bëta iquinacasyamaha na. Cahëhax tsi quiha Herodes palacio ototi ibo, naa Blasto icanai ca ya pari ja chaninacaniquë. Jatsi Blasto qui jia ini quiha toa jaha ja quëëcanaina. Jatsi quiha Blasto jato mëbiniquë jato yacatá cabo ya Herodes rabënamaxëna. Jabi Herodes ya ja rabënacascani quiha jahuë mai xo tsi jato piti ja copicascani quëshpi na. ²¹Jatsi jato qui Herodés xaba aniquë jato bëta chaniti. Toa barí tsi quiha jahuë sahuëti-sahuëtiria ja sahuëniquë. Sahuëhax tsi quiha jahuë tronó tsi ja tsahoniquë. Tsahohax Tiro, Sidón, tihi ca yaca ax jonish ca maxo qui chanitsijaniquë: ²²Chanijano tsi quiha,

—Anomaria tsi xo toa ja yoahaina ra. Joni ma xo naa chanihaina, Dios ja nori —i nohiria bo niquë.

²³Jatsi quiha Ibobá raani ca ángel Herodes tēpastapiniquë, jia tsi Dios ja ocahuayamani iqui na. Xëná jahuë poco piyoni quiha. Jatsi Herodes naniquë.

²⁴Toatiyá tsi quiha Dios Chani pacananiquë. Mëri ja rëtsamini quiha. Huëstima ca chahahuacanaibo paxa cabo ini quiha.

²⁵Jasca, jato yonoco jatihuahax Jerusalén qui Pablo, Bernabé, tihi cabo bacaniquë. Juan Marcos ja bocani quiha jato bëta.

13

Bernabé, Pablo, tihi cabo raahacanina carayanbo qui Dios Chani yoati

¹Jabi Antioquíá ca iglesia naxërëquë tsi quiha Dios Chani yoati ibo bo, tiisimacanaibo, tihi cabo iniquë. Jabi toá ini quiha Bernabé, Simón naa Negro icanish cato, Cirene ax jonish ca Lucio. Tobi ini quiha Manaén, naa Herodes ya shinahamahanish cato. Jasca, tobi ini quiha Pablo. Tihi cabo Dios Chani yoati ibo-iboria bo ini quiha toa iglesia ó no. ²Jatsi huësti barí tsi Ibo qui culto ja acano tsi quiha jato qui Espíritu Santo chaniniquë:

—E bax Bernabé, Pablo, tihi cabo tsēcacana jato qui ã axēhai ca yonoco axēna —iquiina.

³ Jatsi ja samacanicuē. Ja bēhocanicuē. Jatsi jato mēquē Bernabé, Pablo, tihi cabo ó ja janacanicuē Dios Chani yoatí shomahuacasquí na. Shomahuaxo tsi quiha jato ja raacanicuē Dios yonoco ja acano.

Chipre xo tsi Dios Chani ja yoacanina

⁴ Jaquirēquē quiha Seleucia yaca qui Bernabé, Pablo, tihi cabo bocanicuē barco bixēna. Espíritu Santó tsi ja raahacani quiha. Barco qui jicoxo tsi quiha Chipre tēsēbē qui ja shitacanicuē. ⁵ Shitahax Salamina ícanai ca qui ja rērēcanicuē. Jatsi toa jodioba catiti xobo xo tsi quiha Dios Chani yoatí ja chitahēhuacanicuē. Jabi jato bēta Juan Marcos ini quiha jaa ri, jato mēbixēna. ⁶ Jatsi riquibayá tsi tēsēbē ja shitacana ca tsi Pafos yaca qui ja cahēcanicuē. Toa xo tsi quiha yobē ja bēchacanicuē, naa quiamixēni ca joni ra. Dios Chani yoahai ja nori ca toa yobēcá quēscahuani quiha mahitsa ja nori. Barjesús jahuē janē ini quiha. ⁷ Jabi toa tēsēbē ototi ibo, naa Sergio Paulo bax toa yobē yonoconi quiha. Jasca, tiisi naa mai ototi ibo ini quiha. Jatsi quiha Chipre ototi ibobá Bernabe, Pablo, tihi cabo quēnanicuē jato bēta chaninacasqui na. ⁸ Jama, toa yobēcá jato quētianicuē pē, jahuē chama ya ja chaninayamacano iquish na. Jabi Ibo quima jahuē chama ja casomacasní quiha pē. Yobē qui yoi jato chani ini quiha. ⁹ Jatsi quiha Pabló yobē bēisnicuē, Espíritu Santo chama jayaquí na.

¹⁰ —Paraxēni ca quiamixēni ca xo mia ra. Mia ri tsi xo toa Yoshini baquē-baquēria. Mia ri tsi xo toa Dios yoi pasomaharia cato ra. Anomaria tsi xo toa Iboha jabija ca quinia mi yoshihuacatsaina iquia ra. ¹¹ Jaha bēsopa. Jaboqui mia copixēhi quiha Ibo-iboria. Bēcōxēqui mia ra. Huēstima ca barí no tsi bari huēahai ca jisyamaxēqui mia ra —i yobē qui Pablo niquē.

¹² Jatsi ocapijani ca Chipre ototi chamá jisnicuē. Jisi tsi quiha Ibo qui ja chitiminiquē, Iboha Chani qui ja ranini quēshpi na.

Pisidiá ca Antioquía qui ja bocanina

¹³ Jaquirēquē Pafos ax riquibaya tsi quiha Pablo, jahuē rabēti bo, tihi cabo bocanicuē Perge qui, naa Panfilia maí ca yaca qui. Perge qui ja cahēcaquē tsi quiha Juan Marcós jisbērianicuē, jahari Jerusalén qui cacasquí na. ¹⁴ Jatsi Perge ax riquibaya tsi Pisidia mai qui Pablo, Bernabé, tihi cabo bocanicuē. Yaca Antioquía qui ja cahēcanicuē. Cahēhax tsi quiha jodioba catiti xobo qui ja bocanicuē joiti barí no. Jicohax ja tsahocanicuē. ¹⁵ Jatsi Moisés yoba, Dios Chani yoati ibo bá quēnēnina, tihi cabo toá ca yosibá nicamanicuē. Nicamaxo tsi quiha Pablo qui joi ja acanicuē jato bēsōjó tsi ja chanicano iquish na.

—Noqui pi chamahuati chani jayaquí tsi noqui mi yoano ra —i Pablo qui jaca ni quiha.

¹⁶ Jatsi Pablo niiniquē. Chaninox pari tsi quiha jato ja pasimanicuē, jahuē mēquē bēē-bēēhacaina. Jatsi jahuē chani ja chitahēhuanicuē:

—Ea nicaparicana, Israél ca joni bá. Ea nicacana mato ri, Dios qui aracanai ca carayanabá. ¹⁷ Siri tsi quiha noba rēquēyamabo Diós quēnani quiha. Quēnaxo tsi quiha jato ja shomahuarianicuē, carayana ca Egiptó tsi ja racanicuē no. Toá tsi ja anicani quiha. Jatsi toa carayana ca mai quima Diós jato mēpiniquē jahuē chamá no. ¹⁸ Jaquirēquē cuarenta ca año no tsi quiha jato ja oto-otoniquē, xabachá tsi ja icanicuē no. ¹⁹ Jaquirēquē quiha siete ca carayana ca nohiria bo ja quēyocani quiha, naa Canaan maí ca racapaonish cabo. Jatsi quiha toa mai noba rēquēyamabo qui Diós aniquē

ibohuati. ²⁰ Toca tsi quiha cuatrocientos cincuenta ca año bo huinocaniquë. Jaquirëquë quiha noba jimibo qui ototi ibo bo, naa juez bo, Diós aniquë jato obësoti. Jarohari tsi noba jimibo Samuel yamabá jato otoniquë. ²¹ Jaquirëquë rey, naa chama-chamaria ó quiha noba jimibo quëënicquë, jato ja yonano. Jatsi quiha Saulo yamabo, naa Cis baquë jato qui Diós aniquë jato obësoti. Jabi Benjamin maxo quima Saulo joni quiha. Jatsi cuarenta ca año no tsi quiha noba jimibo Saulo yamabá yonaniquë. ²² Jaquirëquë Saulo quima jahuë yonati chama jahari Diós biniquë. Bixo tsi quiha toa chama noba David yamabo qui ja aniquë noba jimibo yonati. Jatsi jia tsi quiha David yoati tsi Diós chaniniquë: “Isaí baquë David ë biquë ra, ja yonano. E qui jiaría ca joni quiha. Jaha ë quëëhai ca jatiroha ca axëhi quiha ra” i Dios ni quiha. ²³ Jaquirëquë David yamaba chahitaxocobo huësti ca Diós biniquë, noqui Xabahamati Ibo iti. Jesu Diós biniquë ra, naa ja yoani jascaria. ²⁴ Jabi Jesú jahuë yonoco chitahëhuanox pari no tsi quiha Dios Chani Juan yamabá yonaniquë. Jato jocha quima nohiria casoti, jatsi ja ashimahacacati, tihí cabo Juan chanini quiha noba jimibo qui. ²⁵ Jahuë yonoco jatihuapama tsi quiha “Yama ca ëa xo naa ra. Nohiria Xabahamati Ibo, naa jaha ma pasohai ca ma xo ëa ra. Jama, ë cho joxëhi quiha. Ea oquë-oquëria ca tsi xo naa ra” i nohiria bo qui Juan yamabo ni quiha.

²⁶ Jabi ëa nicaparicana, Abraham chahitaxocobá. Jasca, ëa nicaparicana mato ri, Dios qui aracanai ca carayanabá. Noqui tëquë qui Dios xabahamati Chani raahacanicquë ra. ²⁷ Jabi Xabahamati Ibo Jesu ini ca Jerusalén ca nohiria bo, jato chama bo, tihí cabá cahëymaniquë rë. Jabi jatiroha ca joiti barí tsi mahitsa Dios Chani yonish cabá quëñëni ca ja nicacanicquë. Jasca, ja quëñëceni ca ja jatihuacanicquë ra, Jesu namëhacati ja raacanicquë no. ²⁸ Jariapari tsi Jesu qui ja quësoriacascani quiha namëcastsi na. Quësonoma ja ini quiha jocha yama ja ini iqui na. Jatsi carayana ca Pilato qui Jesu ja mëacanicquë namëhacati. ²⁹ Toca tsi jatiroha ca Jesu yoati quëñëhacani ca ja jatihuacani quiha. Namëxo tsi quiha cruz quima botëmaxo tsi maiquini qui jahuë yora ja nanëcanicquë. ³⁰ Jama, Diós jahuë Jesu bësotëquëmaniquë. ³¹ Jaquirëquë huëstima ca bari no tsi quiha jahuë rabëti bo ya Jesu co-coniquë, naa Galilea ax Jerusalén qui ja bëta bocanish cabo.

³² Jaquirëquë nëri no johitaquë ra mato qui naa Chani jia ca yoaxëna. Jabi siri tsi noba naborëquëbo qui naa Chani Diós yoaparini quiha. ³³ Jama, no bax, naa jato chahitaxocobo bax toa Chani ja jatihuani quiha, jahuë Jesu ja bësomani cató no. Jabi Jesu bësotëquëxëti nori yoati Diós noqui yoani quiha, salmo libro ó no. Toa ó tsi “Noho baquë xo mia ra. Jaboqui mia bësomaquia ra” i Dios ni quiha. ³⁴ ¿Tsayacanai? Jahuë baquë yoi ja bësomaniquë ra. Jasca, rësotëquëyamapistiarixëhi quiha noqui ja ani ca Jesu. Jariapari “Paraxoma tsi mato qui huëstima ca jahuë jia cabo, naa nohiria xabahamati quinia, Xabahamati Ibo, tihí cabo axëquia, mato David yamabo qui ë yoani jascaria” i noqui Dios ni quiha. ³⁵ Jasca, iti huëtsa ó tsi “Rësotëquëyamaxëqui mi mëstëxëni cato. Ea poromayamaxëqui mia, Diós” ii quiha. ³⁶ Jabi David yamabo yoati chaniyamahi quiha naa ja quëñëcanina ra. David yamabo tsayacapa. Bësoquí tsi jia tsi jahuë nohiria bo ja otoni quiha, Dios shina aquí na. Jama, ja rësoniquë. Jahuë naboyamabo ya ja maihuahacanicquë. Jatsi, ¿jahuë yora poroyamayamani? Iniquë ra. ³⁷ Jama, poroyamaniquë naa bësotëquëmahanish cato ra, naa Diós bësomani cato. ³⁸ Tihí tsi xo toa Dios Chani jia cato iquia ra. Jatsi ëa nicacana, ëbë xatë bá. Naa bësotëquëmahanish ca Jesu mato yoaqui noa ra. Ja tsi xo toa nohiria jocha

masati Ibo-iboria ra. ³⁹ Jasca, mēstēhuahacaxēhi quiha jatiroha ca ja qui chitimicanaibo. Anomaria tsi xo toa Jesú acaina, Moisés yobá acai oquē-oquēria. Nicaparıcana. ¿Jēnahuarıaxo raca toa Moisés yobá noqui mēstēhuana ra? ⁴⁰ Jatsi quiniacaxēcahuē, ma chahahuacasyamamıtsa iqui na, naa Dios Chani yoanish cabá yoani jascaria:

⁴¹ “Tsayacahuē, jabıja ca nicacasyamacanaıbá.

Mato xabacá tsi anomarıaxēhi quiha toa ē axēhaina ra.

Jama, chahahuayamaxēqui mato rē, toa chani ma nicaxēquē no.

Japi ratēhax rēsocahuē iquia ra”

i Dios ni quiha ja quēnēcani cato ó no. Jatsi quiniacaxēcana, ma tocayamano ra —nēa tsi Pablo nēcanıquē, Chani jia ca yoahi na.

⁴² Jatsi jodioba catıti xobo Pablo, Bernabé, tihi cabá jisbayano tsi quiha jato qui nohiria bá joi amanıquē, joıti bari huēsá tsi jasca ca jahuē bo yoati ja chanicano. ⁴³ Jasca, Pablo, Bernabé, tihi cabo qui huēstima ca jodiobo, huēstima ca jodioba jabi binish ca carayanabo, tihi cabo riınıquē. Jatsi quiha Bernabé yaxo tsi quiha jia tsi Pabló jato yobarıanıquē, ja nicacana ca Dios Chani ja chahahuayoıcano.

⁴⁴ Jatsi joıti bari paxa tsēquēquē tsi quiha yacatá ca nohiria bo tēquē, naa carayanabo bēcanıquē İboba Chani nicaxēna. ⁴⁵ Jatsi carayanabo huēstima ca jisi tsi jodiobo yosananıquē pē. Yosanaıhax tsi quiha Pabló yoahai ca chani pasomaha chanıtsıjacıanıquē caxahi na. ⁴⁶ Jatsi raquēhaxma tsi quiha Pablo, Bernabé, tihi cabo chanıquē:

—Mato jodiobo qui pari Dios Chani yoatı nori no ıquē ra. Jama, naa Chani jia ca bicasyama xo mato ıqui noa. Tsayacahuē. Mato bēsö-bēsopaomacıtsı quiha Dios ra, jama, mato qui yoi jahuē Chani nori. Ja tsi xo toa carayanabo qui caxēqui noa tia. ⁴⁷ Jatsi jaboqui jato qui no catı xo naa İbo Jesú noqui yoanı quēshpi na:

“Carayanabo bax huēa mia manēmaquia ra, noho xabahamati quinia nēamaria cabá cahēno ıquısh na”

i noqui İbo ni quiha —nēa tsi jodiobo qui jaca nıquē.

⁴⁸ Jatsi quiha carayanabo ranı-ranıquē Pablo chani nicahax na. Nicaxo tsi quiha İbo qui “Gracias” i jaca nıquē. Jatsi chahahuanıquē huēstima ca carayanabo, naa Dıós bini cabo. Bēsö-bēsopaoti ja quēnahacıanı quiha jato ri. ⁴⁹ Jacıırēquē quiha toa mai tēquē ó tsi quiha İboba Chani pacanıquē ra.

⁵⁰ Jama, jodiobo qui yoi ini quiha toa chani paxa cato. Ja ıqui tsi yacatá ca carayanaba chama bo, jodioba jabi binish ca yoxa bo, tihi cabo naa jodiobá caxahuanıquē Pablo, Bernabé, tihi cabo qui. Toca tsi Pablo Bernabé tēnēmati ja chıtahēhuacıanıquē. Tēnēmaxo tsi quiha jato mai quıma jato ja niacıanıquē pē. ⁵¹ Jatsi quiha Pabló Bernabé jisbayanıquē. Rıquıbaya tsi quiha jato tahē ca mai pari ja pojpoıacıanıquē jato shına yoi ca ja ini ca jısmaxēna.

Pojpoıacıax tsi İconıo, naa yaca huēsıa qui ja bocanıquē. ⁵² Jama, ranı-ranıni quiha toá ca chahahuabēna cabo, Espıritu Santo jayahi na.

14

İconıó tsi Pablo chıtēnına

¹ İconıo qui cahax tsi quiha jodioba catıti xobo qui Pablo Bernabé jıcıanıquē. Jıcxo tsi quiha chama ya Dios Chani ja yoacıanıquē. Jaha tsi quiha huēstima ca jodiobo, carayanabo, tihi cabá chahahuanıquē ra. ² Jaha tsi yosanani quiha chahahuacasyamahai ca jodiobo. Yosanaxo tsi quiha toa yacatá ca carayanabo ja ıtsısnahuayocanıquē chahahuacıanaıbo pasomaha.

³Ja quëshpi tsi naama tsi quiha Pablo Bernabé chitëni quiha toá ca chahahuacanaibo mëbixëna. Raquëxoma tsi lbo yoati ja yoacani quiha. Jasca, yoapama tsi quiha jisti bo ati mëtsa ja icani quiha, Diós jato qui ani ca chamá no. Toca tsi jabija ca jato chani ini ca Diós jismani quiha.

⁴Jatsi quiha jahuëcara shinati yacatá ca carayanabá cahëyamaniquë. Ja mapëxnacani quiha. Huëstima cabá jodiobo mëbicasni quiha. Nohiria tëxë bá Pablo, Bernabé, tihi cabo mëbicasni quiha. ⁵Jarohari tsi quiha toa jodiobo yaxo tsi quiha yacatá ca carayanabo, jato chama bo, tihi cabá planes ani quiha Pablo, Bernabé, tihi cabo axëna. ⁶⁻⁷Jama, ja acascani ca Pabló Bernabé nicaniquë. Nicahax tsi quiha mai huëtza, naa Laconia icanai ca qui ja jabacanicuë. Toa mai ca dos ca yaca bo, naa Listra, Derbe, jato tëamë ca nohiria, tihi cabo xo tsi quiha Dios Chani ja yoacanicuë.

Listra xo tsi Dios Chani Pabló yoinina

⁸Jabi Listra ó tsi joni, naa tahë choni jaya ca racanicuë. Toca tsi ja coni quiha rë. Tapipistiayamariani quiha naa joni ra. ⁹Toa xo tsi Dios Chani Pabló yoacuë tsi quiha jato chani naa joni nicaniquë. Nicaxo tsi quiha ja chahahuanicuë. Jatsi jënimahuahacati chahahuati mëtsa ja ini ca Pabló jisnicuë. Jisi tsi quiha ¹⁰joni qui ja quënaniquë:

—Mi tahë tsi niihuë ra —iquiina.

Jatsi mëri tsi ja niiniquë. Tapiti ja chitahënicuë ra. ¹¹Jabi Pabló ani ca nohiria bá jisnicuë. Jisi tsi quiha quënantsijahuacanicuë jato joí no:

—Noqui botëquë dios bo ra. Joni jaria bo jaya ca xo —iquiina.

¹²Jatsi dios “Júpiter” Bernabé quënahacanicuë. Jatsi dios “Mercurio” Pablo quënahacanicuë, chaniti ibo ja ini quëshpi na. Jabi botënish ca dios bo ja icani ca ja quëscahuacani quiha. ¹³Jatsi jato dios Júpiter arati ibo jonicuë jato arati xobo ax na. Jabi yaca cacha jato arati xobo ini quiha. Jatsi huëyë bo, jianati joa bo, tihi cabo jato arati ibobá bëniquë yacata jicoti qui. Jatsi nohiria bo yaxo tsi quiha huëyë bo ja tëpascanicuë Pablo, Bernabé bax na, dios bo ja icani ca quëscahuacani na. ¹⁴Jatsi quiha ja acascani ca Pabló Bernabé nicaniquë. Nicaxo tsi quiha jaraxatsi jato sahuëti bo jahuacanicuë cohuëquí na. Nohiria misco qui jabapama tsi quiha ja quëna-quënacanicuë:

¹⁵—Ayamacahuë, joni bá. Maí ca nohiria yoi bo xo noa ra, naa mato jascaria. Chani jia ca yoahi no johitaquë ra. Mato mahitsa ca jahuë bo quima bëso ca Dios quiri, naa naipa, mai, ia bo, tihi cabo nëhohuanish ca quiri bësocana iqui noa ra. ¹⁶Jariapari tsi mato carayanabo qui Dios caxayamapaoni quiha, mato quinia yoi cato ó tsi ma bohoquë no. ¹⁷Toatiyá tsi quiha bëso ja ini ca cahëti mëtsa ma i-ipanicuë iquia, mato bax ja ani cató no. Mato qui naipá ca oi ja raani quiha. Jasca, ma banani ca shinahamahi quiha. Ma piti ca mato qui aquí quiha, ma narisyamano iquish na. Jasca, mato ranihuahi quiha —nëa tsi nohiria bo qui Pablo nëcanicuë.

¹⁸Pablo chani nicaxo tsi quiha jari jato bax huëyë bo ja acascaniquë pë. Jarohari tsi quiha nohiria bo ja jënëcanicuë ja ayamacano iquish na. Bëroma ja ini quiha.

¹⁹Jatsi quiha Antioquía, Iconio, tihi ca yaca bo ax tsi quiha huësti huësti ca jodiobo cahënicuë. Cahëxo tsi quiha Pablo ja ocahuacanicuë jahuë chani nohiria bá nicayamano iquish na. Jatsi Pablo qui yacatá ca nohiria bo caxanicuë. Caxaxo tsi quiha Pablo ja acanicuë maxaxá no. Axo tsi quiha yaca cacha jahuë yora ja xërecanicuë, bësoyama ja ini ca quëscahuacani na.

²⁰Jama, jahuë yora tëamë tsi chahahuacanaibo quëtsoquë tsi quiha Pablo

niiniquë. Joihax jahari yaca qui ja caniquë chahahuacanaibo ya. Jatsi huëaquë tsi quiha Derbe icanai ca yaca qui Pablo caniquë Bernabé ya.

²¹ Derbe qui cahëxo tsi quiha Dios Chani ja yoacanicuë. Yoapama tsi quiha huëstima ca chahahuacanaibo ja bëbocanicuë. Jaquirëquë quiha Listra, Iconio, Antioquía, tihi ca yaca bo qui jahari ja bacacanicuë. ²² Bacaxo tsi quiha chahahuacanaibo ja chamahuacanicuë. Chamahuaxo tsi quiha jato ja yobacanicuë Ibo quima ja casoyamacano.

—Diós otohái ca qui jiconox pari tsi huëstima tsi no tënëxëti xo ra —i jato qui jaca niquë.

²³ Yobaxo tsi quiha jatiroha ca iglesia ó tsi yosibo ja janacanicuë chahahuacanaibo ja otcano. Jabi Ibo qui mëanax pari tsi quiha ja samacana ca tsi ja bëhoxcaniquë. Jia tsi toá ca nohiria bo Ibo qui chitimini quiha.

Siriá ca Antioquía yaca qui Pablo Bernabé bacanina

²⁴ Derbe jibëria tsi quiha Pisidia mai ja natanicaniquë. Natanihax tsi quiha Panfilia mai qui ja cahëcaniquë. ²⁵ Toa xo tsi, naa Perga yacata xo tsi quiha Dios Chani ja yoacanicuë. Yoahax Atalia yaca qui ja bocanicuë. ²⁶ Jahá ca barco qui jicohax tsi quiha jahari Antioquía qui ja bocanicuë, naa Dios qui ja acacani cató no. Jabi jato qui toa acacani ca yonoco ja jatihuacani quiha. ²⁷ Jatsi Antioquía qui cahëxo tsi quiha chahahuacanaibo tëquë ja catiacanicuë. Jatsi jato bax Diós anina, carayanabo Diós jahuë Chani nica-manina, carayanabá chahahuahaina, tihi cabo quiha jato ja yoacanicuë. ²⁸ Jaquirëquë quiha naama tsi ja chitëcaniquë toá no, chahahuacanaibo ya.

15

Jerusalén tsi ja caticanina

¹ Toatiyá tsi quiha Antioquía qui cahënicuë huësti huësti ca jodiobo jato mai ax na. Cahëxo tsi quiha carayana ca chahahuacanaibo tiisimatsijahuacanicuë. Ja nëcanicuë:

—Ma jibirishahacati xo ra. Moisés yamabá noqui toa jabi ani quiha ati. Xabahamahacati-maxëni xo mato ra, toa jabi acaxma —nëa tsi ja nëcapani quiha chahahuacanaibo qui.

² Jatsi quiha jibirishati jabi tahëxo tsi jato qui Pablo, Bernabé, tihi cabá joi mëraniquë. Jato qui yoi jato yoba ini quiha. Jaha tsi Pablo, Bernabé, iglesia ca xatë huëtsa bo, tihi cabo Jerusalén qui raahacanicuë, toá ca Chani chitahëhuanish cabo, yosibo, tihi cabo ya ja chaninacano iquish na, naa toa Moisés jabi yoati na.

³ Jatsi iglesia ca xatë bá jato raanicuë. Fenicia, Samaria, tihi ca mai bo natanipama tsi quiha carayanabo Ibo qui bësocanai ca ja yoabonacanicuë. Jatsi raniquë iglesia ca xatë bo toa chani nicahax na.

⁴ Jatsi Jerusalén qui cahëxo tsi quiha iglesia ca xatë bo, yosibo, Chani chitahëhuati ibo bo, tihi cabo ja joihuacanicuë. Joihuaxo tsi quiha jatiroha ca jato bax Diós ani ca ja yoacanicuë. ⁵ Jatsi niiniquë huësti huësti ca chahahuanish ca fariseobo chanixëna:

—Jibirishahacaxëti xo chahahuahai ca carayanabo ra. Jasca, Moisés yoba ja nicaxëti xo jato ri ra —i toá ca xatë bo qui jaca niquë.

⁶ Jatsi Chani chitahëhuati ibo bo, yosibo, tihi cabo catiniquë jibirishati jabi, Moisés yoba, tihi cabo yoati tsi chaninaxëna. ⁷ Naama tsi quiha ja chaninacani quiha. Jatsi Pedro niiniquë chanixëna:

—Ea nicaparicana, ëbë xatë bá. Naama tsi quiha mato ó ca ëa Diós biniquë, carayanabo qui jahuë Chani Jia ca yoatí, ja chahahuacano jato ri iquish na.

⁸ Jatsi Diós, naa nohiria ba shina cahëxëni cató carayanabo qui Espíritu Santo aniquë, noqui jodiobo qui ja ani jascaria. Dios qui jia ja ini quiha. ⁹ Ja qui oquë noqui jodiobo iyamani quiha, ja qui ja chitimihai cató tsi jato shina ja bahuëni iqui na. ¹⁰ Jatsi çjëniriäxo tsi Dios tanamacascanai sa? Naa chahahua-hai ca carayanabo qui noba jodioba jabi bo pi ma ano tsi caxaxëhi quiha Dios tonia. Toa jabi bo banahuatimaxëni noba naborëquëbo ini quiha jato ri. Jasca, banahuatimaxëniäriä xo noqui ri ra. ¹¹ Toa jabi no acai cató tsi noqui xabahamayamahi quiha Dios ra. Jama, jahuë Jesucristo noihai cató tsi xabahamahacahi quiha noa iquia, naa carayanabo xabahamahacahai jascaria —näa tsi iglesiä ca chama bo qui Pedro nëcaniquë.

¹² Jatsi pasicaniquë catinish cabo. Jaquirëquë quiha Pablo, Bernabé, tihi cabo chaniniquë. Chanixo tsi quiha carayanabo xërëquë xo tsi Diós jato amani ca jistiria bo ja yoacani quiha. ¹³ Jato chani ja jatihuacaquë tsi quiha Jacobo chaniniquë:

—Ea nicaparicana, ëbë xatë bá. ¹⁴ Carayanabo Diós otocatsai ca noqui Simón yoaquë ra. “Carayanabo quima jahuë nohiria yoi bo tsëcahi quiha jahuë-na bo iti” i ja a quiha. ¹⁵ Jabija tsi xo toa ja yoahana ra. Tocaxëti xo i Dios Chani yoati ibo-iboria ni quiha, Quënëhacanish cabo ó no. Jabi ja quënëcani ca tsi xo naa:

¹⁶ “Mato jocha iqui tsi mato ë jisbërianiquë; jama, bacaxëquia. Bacaxo tsi noho nohiria yoi bo catiäxëquia ë qui ja aracano iquish na, naa David yamabá yonani cató tsi ja arapaocani jascaria.

¹⁷ Jatsi Ibo yoi chahahuacaxëcani quiha nohiria huëtä. Nohó-naxëhi quiha carayanabo ri’

¹⁸ näa tsi Ibo, naa noqui jahuë planes yoanish ca nëcani quiha”.

¹⁹ ‘Jabi naa quënëni ca iqui tsi noho yoba tsi xo naa: Dios quirir bësocanai ca carayanabo no yosanamayamano. “Noba jodioba jabi bo ma ati xo” i jato qui no yamano ra. ²⁰ Jama, carta ó ca yoba huëtä jato qui no raano. Idolo bo qui acacaha ca piti ja piyamacano. Jasca, anoma ca chotahai ca ja quiniacano. Jasca, jimihuahama ca nami, jimí, tihi cabo ja piyamacano. Tihi ca yoba bo roha jato qui no quënëxëti xo iquia. Tihi tsi xo toa ja ayamacaxëcänaina iquia.

²¹ Jabi jatiroha ca barí tsi quiha tihi ca jahuë bo pasomaha ca yoba yoahacani quiha jatiroha ca yacata ax na. Naama tsi quiha noba nohiria qui toa Moisés yoba acacani quiha —näa tsi jato qui Jacobo nëcaniquë.

²² Jatsi iglesiä ca chahahuacanaibo ya tsi quiha Dios Chani chitahëhuati ibobo, yosibo, tihi cabä jato ó ca huëtä huëtä ca joni bo biniquë Antioquia yaca qui jato yoba boti. Pablo, Bernabé, tihi cabo ya jato ja raacani quiha. Jatsi Judas ja bicaniquë, naa Barsabás quënahacanish cato. Jaquirëquë Silas ja bicaniquë. Tihi cabo ja bicaniquë jato yoba boti. Jato xatë bo rëquëninini ibo bo ja icani quiha. ²³ Raapama tsi jato bëta naa carta ja raacanicuë:

“Mabë xatë bo, naa Dios Chani chitahëhuati ibo-iboria bo, nëa ca yosibo, tihi cabo tsi xo naa carta quënëcänaina. Mato carayanabo joihuaqui noa, naa Antioquia yacata, Siria, Cilicia mai, tihi cató ca racacanaibo. ²⁴ Jishopë. Noba maxo ó ca xatë bo, naa chama yama cabo mato qui bocani ca no nichahitaquë rë. ‘Jibirishahacaxëti xo chahahuahai ca carayanabo. Jasca, jodioba yoba bo ma banahuaxëti xo’ çí mato qui ja yamayamacani? Toca tsi ma shina-motsiquini ca no nichahitaquë. Anoma quiha. ²⁵ Jaha tsi nëa ca dos ca joni shinajäxëniä ca no biquë mato qui raaxëna. Shinaxo tsi Pablo, Bernabé, tihi cabo ya jato raaqui noa. ²⁶ Ibo Jesucristo tahëhax tsi huëtä tsi naa dos ca joni bo acacaquë ani quiha ra. ²⁷ Jaha tsi Judas, Silas, tihi cabo mato

qui raaqui noa noba yoba boti. No quënëha ca jasca ca mato yoacaxëceni quiha. ²⁸ Nicaçana. Noba jodioba jabi bo mato qui acasyama xo noa. Mato qui yosariaxëhi quiha iqui noa. Jama, tobi quiha yoba pistia mato qui no acatsaina, naa noqui, Espíritu Santo, tihi cabo qui jia cato. ²⁹ Idolo bo qui acacahax ca oriquiti, jimi, jimihuahama ca nami, tihi cabo piyamacana. Jasca, anoma ca chotahai ca basicana. Tihi cabo ayamapiquí tsi jia tsi axëqui mato. Iquë” nëa tsi jato carta nëcaniquë.

³⁰ Jatsi Pablo, Bernabé, chani bocanai ca joni bo, tihi cabo bocaniquë Antioquía qui. Cahëxo tsi quiha chahahuacanaibo ja catiçaniquë jato carta nicamaxëna. ³¹ Toa yoba nicaçaniquë iglesiá ca nohiria bo. Nicaçax ja ranicanicaniquë. Jato qui jia toa yoba ini quiha. ³² Jasca, carta nicamaxo tsi quiha jia tsi chahahuacanaibo ja chamahuacanicuë, Dios Chani yoati ibo bo ja icani iqui na. ³³⁻³⁴ Ichariama bari no tsi ja chitëceni quiha. Jatsi jia tsi jahari Jerusalén qui ja raahacacani quiha. ³⁵ Jama, Antioquía tsi Pablo Bernabé chitënicuë. Toá tsi quiha Iboha Chani ja tiisimanicuë.

Pablo catëquëcina Dios Chani yoaxëna

³⁶ Jaquirëquë Bernabé qui Pablo chaniniquë:

—¿Iboha Chani no yoani cabo qui jahari canoma ni, toá ca yacatá ca xatë bo qui shishoxëna? ¿Jëniçacanai ca jisi canomani? —iquiina.

³⁷ Jatsi Juan Marcos Bernabé bocasni quiha, ja bëta ja cano. ³⁸ Jama, Pablo qui yoi ja ini quiha. Marcos ja bocasyamani quiha, Panfilia ó tsi jato ja niabëriani iqui na. Toatiyá tsi quiha jato bëta Marcos chitëyamani quiha. ³⁹ Ja iqui tsi Pablo Bernabé joi mërananicuë. Joi mëranahax tsi quiha jato jamë ca quiniá tsi ja bocaniquë. Ori tsi naa Chipre qui barcó tsi quiha Bernabé caniquë Marcos ya. ⁴⁰ Jatsi Silas Pabló biniquë ja bëta ja cano. Jabi ja bocanax pari no tsi toá ca iglesiá cabo jato bax bëhoxnicuë, Diós jato mëbiriano. ⁴¹ Jatsi Siria, Cilicia, tihi ca mai bo ja nacocanicuë. Nacopama tsi quiha chahahuanish cabo ja chamahuabonanicuë.

16

Pablo, Silas ya Timoteo canina

¹ Derbe, Listra, tihi ca yaca qui cahëxo tsi quiha Timoteo, naa Jesu qui chitiminish ca shinapayo ca Pablo, Silas, tihi cabá bëchaniquë. Chahahuahai ca jodio Timoteo jahëhua ini quiha. Jahuë jahëpa carayana ini quiha. ² Jasca, jia tsi Timoteo toa Listra, Iconio, tihi cató ca xatë bá ocahuan quiha. ³ Jatsi quiha jato bëta Timoteo Pabló bocasnicuë. Jama, bonox pari tsi quiha Timoteo ja jibirishanicuë, chahahuahai ca jodiobo ja qui caxayamano. Carayana jahuë jahëpa ini ca ja cahëceni quiha. ⁴ Jatsi quiha toa yaca bo ja nacocanicuë Dios Chani yoaxëna. Nacopama tsi Jerusalén ca Chani chitahëhuati ibo bo, yosibo, tihi cabá yobani ca ja yoabonanicuë. Jasca, jato yoba ja nicacati nori ca ja yoacani quiha. ⁵ Toca tsi Iboha quiniá tsi quiha iglesiá ca chahahuacanaibo chamahuahacanicuë. Toatiyá tsi jatiroha ca bari tsi quiha Ibo qui nohiria bo chitiminiquë.

Pablo tënamëcina

⁶ Jaquirëquë Frigia, Galacia, tihi ca mai tsi Pablo, jahuë rabëti bo, tihi cabo naconiquë. Jabi Espíritu Santó jato yobani quiha, Asia mai xo tsi jari Dios Chani ja yoayamacano. ⁷ Jasca, Misia mai qui cahëhax tsi quiha departamento Bitinia qui ja jicocacani quiha Dios Chani yoaxëna. Jama,

Jesú raani ca Espiritu Santó jato quëtiani quiha. ⁸ Jaha tsi Misia mai nacopama tsi quiha Troas yaca qui ja bocaniquë. ⁹ Toá tsi baquichá tsi Pablo tēnamēniquë: Ja qui Macedoniá ca joni jisiquini quiha. Pablo qui ja chanini quiha, “Noba Macedonia mai qui bëcahuë. Noqui ma mëbino ra” iquiina. ¹⁰ Tēnamēhax bamahaxma tsi cacastapiniquë Pablo. Jatsi quiha noba jahuë bo no shomahuaniquë Macedonia mai qui caxëna. Toá ca nohiria bo qui Chani Jia ca yoatí Diós noqui quēnani ca no cahëyoiniquë.

Filipos yaca qui ja cahëcanina

¹¹ Jatsi Troas no jisbayaniquë barcó no. Ia shitapama tsi quiha mëste tsi tēsëbë Samotracia qui no caniquë. Cahax huëaquë tsi quiha Neápolis yaca qui no rërēniquë. ¹² Riquibaya tsi mai tsi Filipos yaca qui no caniquë. Toa mai ca oquë-oquëria ca yaca Filipos ini quiha. Jasca, toá tsi huëstima ca romanobo ca nohiria racani quiha. Filipos qui cahëhax ichariama ca bari no tsi no chitēniquë. ¹³ Jatsi joiti barí tsi jodioba arati iti qui no caniquë araxëna. Yaca cacha, naa ani quëmápo tsi ja caticani quiha. Tsahohax toá ca arati bëcanish ca yoxa bo ya chaninatsino-niquë. ¹⁴ Jabi toá tsi ini quiha Tiatirá ca yoxa, naa Lidia icanai cato. Raiti shini iniahai ca ja ini quiha. Jasca, Dios qui arahai ca naa yoxa ini quiha. Ja iqui tsi jia tsi Pabló yoani ca chani ja nica-nicaraniquë. Jasca, Ibobá toa yoxa mëbiniquë, Pabló yoahai ca chahahuamaxëna. ¹⁵ Jahuë xobó ca bo ya ashimahacaxo tsi quiha joi noqui ja amaniquë jahuë xobó tsi chitēti. Joi amahax,

—Ibo Jesu qui ë chitimiquë ra. Mato qui jia pi no tsi noho xobo qui ma bëcano racati —i noqui naa yoxa niquë.

Jaha tsi jahuë xobo qui no caniquë chitëxëna.

¹⁶ Toatiyá tsi arati iti qui capama tsi quiha yonati xotaco no bëchaniquë. Yoshi ja jayani quiha, nohiria jato xaba cahëmati. Toca tsi huëstima ca parata ja bini quiha jahuë ibo chama bax na. ¹⁷ Jatsi Pablo, noqui, tihi cabo ja banahuaniquë. Banahuapama tsi quiha,

—Mana ca Ibo-iboria ca Dios yonati bo xo naa joni bo ra. Xabahamati quinia noqui yoatí ja bëcahitaquë ra —i ja niquë joi pistiamá no.

¹⁸ Tocapijaniquë huëstima ca barí no. Jarohari tsi Pablo yosananiquë. Yosannah ja bopinaniquë ja qui chanixëna. Jatsi jahuë yoshi qui ja chaniniquë:

—Jesucristo chamá tsi naa xotaco quima natsëquëhuë iquia —iquiina.

Jatsi yoshi natsëquëtapiquë.

¹⁹ Jatsi cohuënaniquë jahuë chama bo. Toca tsi jato parata biti xaba ja bēnocani ca ja cahëcani quiha. Ja iqui tsi Pablo, Silas, tihi cabo qui ja tsamicaniquë. Tsamixo tsi quiha yacatá ca plazá ca chama bo qui jato ja xërëcaniquë. ²⁰ Chama bo qui boxo tsi quiha jato qui quēsotsijacaniquë:

—Noba yacatá ca nohiria bo yosicani quiha naa jodiobo ra. ²¹ Noba jabi bo rarinamacasani quiha pë. Noba yoba pasomaha tsi xo toa ja yoacanaina. ¿Jēnahuariaxo raza jato jabi bo no bina ra? Romanobo xo noa —nëa tsi ja nēcacaniquë jato qui quēsohi na.

²² Jatsi jato qui quëtsonish ca nohiria bo riiniquë Pablo, Silas, tihi cabo qui quēsoxëna jato ri. Jaha tsi quiha chama bá jato sahuëti tsobomaniquë. Tsobomaxo tsi quiha ja yobacaniquë ja rashahacacano iquish na. ²³ Rashaxo tsi quiha cárcel qui ja niacaniquë. Jatsi cárcel obëso ca ja yobacaniquë jia tsi jato ó ja bësono, ja paxayamacano iquish na. ²⁴ Jatsi quiha cárcel nēpax ca naquëtë qui jato ja nanēniquë chama bá yobani ca nicaxo na. Nanëxo

tsi quiha jihui para quini jaya cato ó tsi jato tahë bo ja achamaniquë. Tsëquëtimaxëni ja icani quiha.

²⁵ Jatsi toa baquichá tsi quiha Dios qui bëhoxhi tsi Silas, Pablo iniquë. Bëhoxpama tsi ja quëquë-quëquëshinacanicuë. Tocajacano tsi quiha jato qui presó ca achiqui cabá nica-nicani quiha. ²⁶ Jatsi yajotapitsi quiha mai niquë. Anomaria tsi presó yajohacacani quiha. Japëquëyoniquë presó ó ca caiti bo tëquë. Mërisyocanicuë achiquinish caba mënëxëti cadenabo ri. ²⁷ Jatsi presó obëso ca bësoniquë. Presó ó ca caiti bo japëquë ca jisi tsi quiha achiquinish cabo paxani nori ca ja quëscahuani quiha. Jatsi jahuë chibiquiti saipi ja natsëcaniquë jamë ixëna. ²⁸ Jama, ja qui Pabló quënaniquë joi pistiamá no:

—Iyamahuë. Iyamahuë. Néa xo noqui tëquëta —iquiina.

²⁹ Jatsi quiha presó obëso cató pëxë baaniquë. Bixo tsi quiha mëri tsi ja jiconiquë. Jicohax mëmë-mëmë tsi quiha Pablo, Silas, tihi cabo bësojó ja mëniniquë. ³⁰ Jatsi cacha jato mëpilhax,

—¿Jënahuaxëhi ni ëa ra, joni bá, xabahamahacaxëna? —i jato qui ja niquë.

³¹ Jatsi ja quëbicaniquë:

—Ibo Jesucristo qui chitimicana. Jatsi xabahamahacaxëqui mato, naa mia, mí-na bo ri —iquiina.

³² Jatsi quiha presó obëso cato, jahuë xobó ca bo, tihi cabo qui Dios Chani ja yoacanicuë. ³³ Jasca, baquichá tsi quiha jato sëquënë, jato quëësi bo, tihi cabo presó obëso cató chocohaniquë. Jaquirëquë presó obëso cato, jahuë-na bo, tihi cabo ashimahacanicuë. ³⁴ Jatsi jahuë xobo qui jato ja bënicuë jato orihuaxëna. Rani-raniniquë presó obëso cato ra. Rani-ranioniquë jahuë xobó cabo tëquë, Dios qui ja chitimicani iqui na.

³⁵ Baquishmarí tsi quiha presó qui romanoba chama bá policia bo raanicuë jato paquëmati chani ya. ³⁶ Jatsi Pablo qui presó obëso ca chaniniquë:

—Joquë chani ra. Ma paquëmahacaxëti xo ii quiha yacatá ca chama bo. Jia tsi bocahuë —iquiina.

³⁷ Jama, policia bo qui Pablo chaniniquë:

—Mahitsa no rashahacahitaquë pë, nohiria bo bësojo ax na. Juez qui noqui ma boyamahitaquë ra, toa ax tsi noqui quësoxëna. Anoma quiha. Romanobo yoi ca noqui xo naa ra. Anoma tsi xo toa presó qui noqui romanobo ja niacanaína iquia. ¿Jaboqui jonë tsi noqui raacasahi ni pa? Cayamaqui noa ra. Nëri ja bëparicano ra noqui tsëcaxëna. Jamë yoi xo tsi noqui ja paquëmacano iquia —nëa tsi policia bo qui Pablo nëcaniquë.

³⁸ Jatsi quiha yacatá ca chama bo qui Pablo chani policia yoanicuë. Romanobo Pablo, Silas, tihi cabo ini ca nicahax ja raquë-raquëcaniquë.

³⁹ Raquëhax tsi quiha presó qui ja bocanicuë ishima tsi presó quima jato mëpilhax. Mëpilhax tsi quiha jato yaca cacha qui jato ja chimaticanicuë.

⁴⁰ Jatsi presó jishbaya tsi quiha Lidia xobo qui ja bocanicuë, toá ca chahahuacanaibo qui chanixëna. Jato ja chamahuani quiha. Chamahuaxo tsi quiha ja jishbayanicuë.

17

Tesalónica cabo Pablo qui caxanina

¹ Filipos ax riquibaya tsi quiha Anfípolis, Apolonia, tihi ca yaca bo Pablo Silas nataniniquë. Natanihax Tesalónica qui ja cahëcaniquë. Toá tsi jodioba catiti xobo ini quiha. ² Cahëxo tsi quiha jato catiti xobo qui Pablo caniquë. Jahuë jabi quiha. Tres ca joiti bari no tsi quiha Dios Chani yoati tsi jato bëta

ja chaninaniquë. ³ Chaninaxo tsi quiha Dios Chani jato qui ja bërohuaniquë. Cristó tënëxëhaina, ja rësoxëhaina, ja bësohtëquëxëhaina, tihi cabo jato Xabamati Ibo iti nori ca ja jismani quiha.

—Mato Xabamati Ibo-iboria tsi xo naa Jesu ë yoahaina iquia —i jato qui ja niquë.

⁴ Jatsi quiha chahahuaniquë huësti huësti ca jodiobo. Chahahuahax tsi quiha Pablo, Silas, tihi cabo qui ja riicaniquë. Jasca, chahahuaniquë huëstima ca Dios qui aracanai ca carayanabo ri. Chahahuaniquë huëstima ca chama ba ahui bo ri. ⁵ Jatsi ja chahahuacaquë tsi quiha toa chahahuayamahai ca jodiobo caxaniquë. Caxaxo tsi quiha plazá ca bohohai ca chiquixënia ca joni bo ja catiacaniquë ja yosicano. Yosipama tsi quiha Jasón icanai cato xobo qui ja jabacaniquë Pablo, Silas, mërahi na. Cacha, naa yacatá ca nohiria bo qui jato ja bëcasni quiha. ⁶ Pablo, Silas, tihi cabo ja yopacaniquë. Yopaxo tsi quiha xobo ibo Jasón, toá ca chahahuacanaibo huëtsa bo, tihi cabo ja xëreëcaniquë cacha yacatá ca chama bo qui. Xërepama tsi quiha ja quënacaniquë:

—Jatiroha cato xo tsi nohiria bo yosicani quiha naa Pablo, Silas, iqui noa. Jaboqui noba yaca qui ja bëcahitaguë pë. ⁷ Jasca, noba Jasón tsi xo toa naa joni bo otohaina ra, jahuë xobo xo no. Jasca, noba chama-chamaria yoba pasomaha chanicani quiha pë. “Tobi chama huëtsa, naa Jesu icanai cato” icani quiha ra —nëa tsi chama bo qui ja nëcacaniquë.

⁸ Jatsi shina-huëjënaniquë yacatá ca nohiria bo, jato chama bo ri, jato qui ja quësocanai ca nicahax na. ⁹ Jatsi paquëmanox pari tsi quiha chama bá parata bicasniquë pë. Jatsi Jasón, chahahuacanaibo, tihi cabá jato qui parata aniquë paquëmahacaxëna.

Yaca Berea qui Pablo Silas shishonina

¹⁰ Jatsi bamaxoma tsi quiha Berea yaca qui Pablo, Silas, tihi cabo chahahuacanaibá raatapiniquë. Cahëhax tsi quiha jodioba catiti xobo qui ja bocaniquë. ¹¹ Jabi Tesaloníca ca jodiobo oquë naa Bereá cabo ini quiha. Pablo chani qui ja nica-nicariacani quiha. Jatiroha ca barí tsi quiha Quënehacanish cabo ja tsaya-tsayacaniquë, jabija ca Pabló yoahai ca iqui ca cahëxëna. ¹² Jatsi Jesu qui chitiminiquë huëstima ca jodiobo. Jasca, chahahuaniquë huëstima ca carayana ca joni bo, yoxa bo, tihi cabo ri, naa nohiria rëquëninicanaibo. ¹³ Jatsi quiha Berea xo tsi Dios Chani Pabló yoahi ini ca Tesaloníca ca jodiobá nicaniquë. Nicahax ja bëcaniquë pë nohiria bo yosixëna. Pablo qui nohiria bo ja itsisnamacaniquë ra. ¹⁴ Ja iqui tsi chahahuacanaibá Pablo raaniquë ra ia quëpë qui. Jama, Berea ó tsi quiha Silas, Timoteo, tihi cabo chitëniquë chahahuacanaibo mëbixëna. ¹⁵ Jatsi Atenas yaca qui huësti huësti ca xatë bá Pablo chimatiniquë. Chimatihax jahari ja bocaniquë jato xobo qui. Silas, Timoteo, tihi cabo qui Pablo chani ja bocani quiha. Mëri tsi ja bëcati ó Pablo quëëni quiha. Jabi tocani quiha jahuë chani.

Atenás tsi Pablo chitënina

¹⁶ Atenas xo tsi mana-manapama tsi quiha Pablo shina-motsiquiniquë yacatá ca ídolo bo tsayahax na. ¹⁷ Jasca, jodioba catiti xobó tsi quiha ja chaninaniquë, toá ca jodiobo, Dios qui aracascanai ca carayanabo, tihi cabo ya. Jasca, plazá ca nohiria bo ya ja chaninaniquë Jesu yoati na. ¹⁸ Jatsi epicüreobo, estoicobo, tihi ca icanai ca maxó ca joni bá Pablo qui joi mëraniquë. Tiisi jayanish ca joni bo ja icani quiha. Chanihax,
—¿Jënihi ni naa bahua sa? —i huësti huësti ca niquë.
Jasca,

—Tonia jamëri ca dios bo qui noqui aramacatsi quiha pa —i huëtsa bo niqüë.

Jabi toca tsi ja chaninacani quiha, Jesu, ja bësotëquëhaina, tihì cabo Pablo chanini iqui na. ¹⁹ Jatsi quiha Pablo qui joi ja amacaniqüë jahuë chani nicacasquí na. Amaxo tsi quiha jato chaninati xobo, naa Areópago icanai ca qui ja boniqüë. Bohax,

—Mi yoahai ca tiisi paxa ca cahëcasqui noa ra. ²⁰ Noqui jamëri tsi xo toa mi yoahaina. Mi yoahai ca noqui mi bërohuano ra —i Pablo qui jaca niqüë.

²¹ Jabi tiisi-naxëni ca Atenás ca nohiria bo, toá ca racacanai ca carayanabo, tihì cabo ini quiha. Jaha tsi Pablo chani ja nicacascani quiha. Jato qui jia ini quiha tiisi paxa ca nicahaina, chaninacanaina, tihì cabo. Jato jabi quiha.

²² Jatsi jato bësojó tsi quiha, naa Areópago xara tsi Pablo niiniqüë chanixëna. Chanihax,

—Dios bo qui araxëni ca nohiria bo xo mato tia. Toa ë jisquë ra, Atenás ca joni bá. ²³ Mato yacatá tsi co-copama tsi mato arati itiria bo ë jisquë ra. Jisi tsi naa quënë pistia ca ë jisquë huësti ca altar ó no. “No cahëhama ca dios bax na” ii quiha jahuë quënë ra. Jabi naa Dios ë yoahai ca tsi xo toa naa ma cahëhama ca dios, naa ja qui ma arahaina.

²⁴ Jabi Dios yoi tsi xo toa naipa, mai, tihì caba Ibo-iboria, naa jatiroha ca nëhohuanish cato iquia. Joni bá acani ca arati xobó tsi racayamahi quiha. ²⁵ Naa Dios mëbitimaxëni xo nohiria, ja narisyamahai ca iqui na. Jasca nohiria bo qui jatiroha ca Ototi Ibo-iboria tsi xo naa. Jatiroha cabo bësomahi quiha. Noqui yoi xacamahi quiha.

²⁶ Jasca, huësti ca joni quima jatiroha ca nohiria bo nëhohuacani quiha. Nëhohuaxo tsi quiha naa mai tëquë tsi quiha jato ja racamaniquë. Jasca, ja bësocanai ca xaba naa Dios yoi janani quiha. Jasca, jatiroha ca nohiria bo qui jato mai ja ani quiha racati. ²⁷ Jabi tocaniquë Dios yoi, ja qui nohiria bá mërano iquish na. Mërapiquí tsi ja chahahuacamitsa ra. Jabi nohiria qui basima xo Dios yoi ra. ²⁸ Jabi Dios yoi iqui tsi bëso xo noa ra. Ja iqui tsi mohiqui noa. Ja iqui tsi naa maí tsi racaqui noa ra. Jasca, “Dios xocobo xo noa” ¿iyamayamacahi ni mato maestro bo ra? ²⁹ Jabija xo ra. Dios xocobo yoi bo xo noa. Jahuë xocobo pi inono tsi ¿jënahuariahax raca oro, plata, maxaxa, tihì cabo nohiria bá acai ca jaria ca Diós ina ra? Toca ma xo Dios iquia. ³⁰ Jabi nohiria bá Dios cahëyoiyamatiyá tsi quiha jato jocha Diós mataraniquë. Jama, jaboqui ja qui bësoxëti xo nohiria bo tëquë ii quiha ra. ³¹ Jatsi quiniacaxëcahuë. Nohiria bo copiti bari ja janani quiha. Toa bari tsi quiha mështë tsi nohiria bo tëquë copixëhi quiha ja bini ca joni yaxo na. Copiti Ibo-iboria ixëhi quiha naa joni ra. Jabi naa joni rësoquë tsi quiha Diós bësotëquëmaniquë ra. Ja iqui tsi Dios parayamahai ca cahëqui noa —nëa tsi jato qui Pablo nëcaniquë.

³² Jatsi “Bësotëquëxëhi quiha nohiria bo” i Pablo quë tsi quiha osa-osaniquë toá ca huësti huësti cabo. Jama,

—Mi chani nicatëquëcasqui noa ra, naa nohiria bo bësotëquëxëhai ca yoati na —i huësta bo niqüë.

³³ Jatsi Pabló jisbayaniquë. ³⁴ Jama, chahahuaniqüë huësti huësti ca jahuë chani nicanish cabo. Chahahuahax Pablo maxo qui ja riicaniquë. Riini quiha toa Areopagó ca maxo inish ca joni, naa Dionisio icanai cato. Chahahuani quiha huësti ca yoxa, naa Dámaris icanai cato. Jasca, chahahuaniqüë nohiria huëtsa bo ri.

18

Corinto qui Pablo shishonina

¹ Tiisimaxo tsi quiha Atenas Pablo jisbayaniquë. Jisbaya tsi quiha Corinto yaca qui ja caniquë. ² Corinto qui cahëxo tsi quiha jodio huësti ca ja bëchaniquë, naa Aquila icanai cato. Pontó maí conish ca naa joni ini quiha. Jasca, Corinto qui jobëna ja ini quiha jaa ri, jahuë ahui ya. Jato mai, naa Italia ax ja jabacani quiha toá ca maí ca chama-chamaria, naa Claudio icanai ca iqui na. Roma yaca quima jodiobo tëquë ja raani quiha. Cahëxo tsi quiha jato Pablo jisi caniquë. ³ Jatsi jato bëta ja chitëniquë yonocoxëna. Jabi parata quëshpi tsi jato bëta xo tsi oxti raiti xobo ja ani quiha iniaxëna. ⁴ Jatsi jatiroha ca joiti barí tsi quiha jodioba catiti xobo qui Pablo caniquë Jesucristo Chani yoaxëna. Jesu qui toá ca jodiobo, carayanabo, tihi cabo ja mëpicasni quiha.

⁵ Jatsi Macedonia mai ax Silas, Timoteo, tihi cabo cahëquë tsi quiha jahuë yonoco, naa oxti xobo acai ca ja jënëniquë, jatiroha ca barí tsi Dios Chani yoacasquí na. Xabahamati Ibo Jesu ini ca ja yoaniquë jodiobo qui. ⁶ Jatsi Pablo qui ja caxacaniquë toa chani nicacasyamahí na. Caxaxo tsi quiha Pablo ja ocahuacaniquë. Jarohari tsi jato ja jisbayaniquë. Jama, jisbayanox pari tsi quiha jahuë sahuëtí ca cospo ja rij-rijhaniquë ja cahai ca jismaxëna.

—Mato shina ri tsi xo ra, Diós mato qui pi quësoquë no. Mahitsa Dios Chani ma nicaquë ra. Jaboqui carayanabo qui caxëquia jato qui jahuë Chani yoaxëna —i jato qui Pablo niquë.

⁷ Jato jisbaya tsi quiha toá ca catiti xobo tapaí ca xobo qui ja caniquë tiisimaxëna, naa Justo icanai cato xobo. Jabi Dios qui arahai ca naa joni ini quiha. ⁸ Jasca, Ibo qui chitimini quiha toa catiti xobo obëso cato, naa Crispo icanai cato. Chitimini quiha jahuë xobó cabo ri. Toatiyá tsi quiha huëstima ca Corintó ca carayanabo chitiminiquë Ibo Chani nichah na. Ja ashimahacayocani quiha. ⁹ Jaquirëquë huësti ca baquichá tsi quiha Pablo tënamëniquë. Tënamëjano tsi Pablo qui Ibo chaniniquë. Chanihax,

—Nohiria bo qui raquëyamahuë. Mi pasiyamano. Noho chani mi yoano ra. ¹⁰ Jari tobi quiha huëstima ca yacatá ca ë qui chitimixëti cabo ra. Yama tsi xo toa mia acaina ra, mi nohó ë bësohai iqui na —i ja qui Ibo niquë.

¹¹ Jatsi un año y medio no tsi Corintó tsi Pablo chitëniquë jato xërëquë xo tsi Dios Chani yoaxëna.

¹² Toatiyá tsi quiha departamento Acayá ca obëso cato, naa gobernador Galión iniquë. Jatsi jodiobo Pablo qui tsaminiquë rë. Tsamixo tsi quiha tribunal, naa nohiria copiti iti qui ja bocaniquë ja qui quësoxëna. ¹³ Boxo tsi,

—Anoma tsi xo naa joni acaina ra. Dios qui arati quinia jamëri ca noba jimibo qui yoahi quiha pë. Noba jabi, noba yoba, tihi cabo pasomaha tsi xo toa ja yoahaina ra —nëa tsi Galión qui ja nëcacaniquë.

¹⁴ Quëbipaima Pablo iquë tsi quiha Galión jodiobo qui chaniniquë:

—Jisa jodiobá. Yama tsi xo toa yoi ca naa joni acana ra. Ja yosiprohano tsi yoi ca pi ja aarohano tsi jia tsi mato qui ë nicaquë aguë. ¹⁵ Jama, mato chani bo, mato jabi bo, mato yoba bo, tihi cabo tahëhax tsi iquinaqui mato pë. Toa nicacasyama xo ëa ra. Toca ca jahuë bo copiyamaxëquia ra —nëa tsi bëcanish ca jodiobo qui Galión nëcaniquë.

¹⁶ Chanixo tsi quiha tribunal quima jato ja raaniquë. ¹⁷ Jatsi jodiobá jisbayaniquë. Jatsi carayanabá jato catiti xobo obëso cato, naa Sóstenes qui ja tsamicaniquë pë. Tsamixo tsi quiha ja sëtianiquë tribunal xobo bësojo xo na. Chama Galión qui jënima ini quiha ja acanina pë.

Jahari Antioquía qui Pablo bacanina

¹⁸ Jatsi naama tsi quiha Corintó tsi Pablo chitëniquë. Jarohari tsi toá ca xatë bo ja jisbayaniquë. Jisbaya tsi quiha Siria mai quiri catsijaniquë barcó no. Aquila, Priscila, tihi cabá Pablo chimatini quiha. Cahax Cencrea yaca qui ja cahëniquë. Toa xo tsi quiha Pabló jahuë boo maxconiquë, parayamahai ca chani Dios qui ja yoani iqui na. Jodioba jabi ja ini quiha. Maxcorohax ja catëquëniquë. ¹⁹ Cahax Efeso yaca qui ja cahëcaniquë. Nëá tsi quiha Priscila, Aquila, tihi cabo chitëniquë. Jasca, yacatá ca jodioba catiti xobo qui shishohi Pablo caniquë. Toa xo tsi quiha jodiobo ya ja chaniniquë Jesu yoati na. ²⁰ Jatsi quiha Pablo qui joi ja amacanicuë naama tsi ja chitëno. Jama, chitënoma ja ini quiha. ²¹ Jisbaya tsi quiha barco qui ja jicotëquëniquë Efeso qui caxëna. Joihuahax,

—Jerusalén jari è cati xo ra. Basima tsi xo fiesta ra. Jama Dios shina pi ja no tsi jahari joxëquia tia mato qui shishoxëna ra —i jato qui ja niquë.

²² Jatsi quiha Cesarea yaca qui ja rërëcaniquë. Rërëhax mai tsi Jerusalén qui ja caniquë iglesiá ca xatë bo joihuaxëna. Jaquirëquë Antioquía qui ja catëquëniquë. ²³ Naama tsi Antioquía tsi ja chitëni quiha. Jaquirëquë Galacia, Frigia, tihi ca mai bo qui ja catëquëniquë toá ca chahahuacanaibo chamahuaxëna.

Efeso xo tsi Dios Chani Apolós yoanina

²⁴ Toatiyá tsi quiha tobi iniquë toa Alejandriá tsi conish ca jodio, naa Apolos icanai cato. Efeso yaca qui shishohi ja joni quiha. Jiaria tsi chaniti naa joni cahëniquë. Jasca, Quënëhacanish cabo ja cahëyoiniquë jaa ri. ²⁵ Jasca, Iboba quinia ja tiisimahacanicuë. Jesu quinia cahëxo tsi quiha jia tsi toá ca nohiria bo ja tiisimanicuë. Jama, ashimanish ca Juan chani roha ja cahëni quiha. ²⁶ Jabi raquëxoma tsi Efeso ca jodioba catiti xobo xo tsi Jesu Chani yoati ja chitahëhuaniquë. Jatsi quiha Priscila, Aquila, tihi cabá jahuë chani nicaniquë. Nicaxo tsi quiha ja qui joi ja amacanicuë jato xobo qui ja jono. Jatsi oquë tsi quiha Apolos qui Dios Chani ja bëröhuacanicuë oquë tsi ja cahëno iquish na. ²⁷ Jaquirëquë Acaya mai qui Apolos cacanicuë Dios Chani yoaxëna. Jaha tsi Efeso ca xatë bá mëbicasnicuë. Mëbixo tsi quiha ja bax carta ja quënëcaniquë Acayá ca xatë bo qui, jia tsi Apolos ja joihuacano iquish na. Jatsi toa mai qui ja cahëquë tsi quiha anomaria tsi toá ca xatë bá Apolos joihuaniquë. Jatsi jia tsi toá ca chahahuacanaibo Apolós mëbimëbiniquë, Dios noihai cató no. ²⁸ Toá tsi quiha chamá tsi jodiobo ya ja chaninanicuë nohiria bo bësojo ax na. Chaninaquí tsi quiha jato ja bëboniquë, Quënëhacanish cabá tsi jato Xabahamati Ibo Jesu ini ca jismaxo na.

19

Efeso qui Pablo canina

¹ Jabi Corintó tsi Apolos chitëno tsi quiha Efeso yaca qui Pablo cahëniquë. Maca bo ja natanini quiha. Cahëxo tsi quiha huësti huësti ca chahahuacanaibo ja bëchaniquë. ² Bëchaxo tsi quiha jato ja nicaniquë:

—¿Espíritu Santo ma bini, chahahuaxo na? —iquiina.

Jatsi,

—Biyamaqui noa. ¿Tsohuëcara ni naa Espiritu Santo sa? Nicayamaqui noa rë —i Pablo qui jaca niquë.

³ Jatsi Pabló jato nicaniquë:

—¿Jënahuariahax ma ashimahacani sa? —iquiina.

Jatsi,

—Juan yoani cató tsi no ashimahacani quiha —i jaca niquë.

⁴ Jatsi Pabló jato yobaniquë:

—Juan tiyá tsi quiha ashimahacanicuë toa jato jocha quima Dios quiri bësocanaibo. “E chò joxëhai ca qui ma chitimiti xo ra” i nohiria bo qui ja ni quiha. Jabi naa ja cho jonish ca tsi xo Jesu ra —i jato qui Pablo niquë.

⁵ Jatsi Jesucristo janë tsi ja ashimahacanicuë jahuë chani nicahax na.

⁶ Jatsi Pabló jahuë mëquë jato ó janaquë tsi quiha Espiritu Santo jato qui jiconiquë. Jatsi jamëri ca joi bá tsi quiha chanitsijacanicuë. Dios Chani ja yoacani quiha. ⁷ Jabi doce ca joni bo ja icani quiha.

⁸ Jaquirëquë catiti xobo qui Pablo caniquë jodiobo qui chanixëna. Tres oxë no tsi quiha raquëxoma tsi bëroria tsi jato qui Dios Chani ja yoanicuë. ⁹ Jama, jahuë chani qui nicacasyanicuë misco bo. Jesu qui ja chitimicasyamacani quiha. Jasca, nohiria bo bësojo xo tsi Jesu quinia ja ocahuacani quiha. Jarohari tsi Pabló jato jibyaniquë. Jibaya tsi quiha toá ca chitiminish cabo ja boniquë ja bëta. Jatsi Tirano escuela qui ja bocanicuë Dios qui araxëna. Jatiroha ca barí tsi quiha Dios Chani yoati tsi ja chaninacanicuë.

¹⁰ Dos año no tsi quiha Pabló jato tiisimanicuë toa xo na. Jaha tsi quiha Jatiroha ca Asia mai ca nohiria bo, naa jodiobo, carayanabo, tihí cabá Iboba Chani nicaniquë ra. ¹¹ Jasca, anomaria Diós ani ca jisti bo iniquë, naa Pabló anina. ¹² Ja motsani ca pañuelo bo, raiti quësi bo, tihí cabo iquicanaibo qui ja bocanicuë jënimahua-xëna. Jatsi jënimahuahacani quiha noitiria cabo. Jasca, jënimahuahacani quiha yoshi bo jayanish cabo ri. Tsëquëyoni quiha jato yoshi bo.

¹³ Toatiyá tsi quiha tobi iniquë toa huësti huësti ca bohocanai ca jodiobo, naa yobë jascaria cabo. Nohiria bo quima yoshi bo ja tsëcacani quiha jato ri. Jatsi Jesu janë tsi ja tanamacanicuë yoshi bo tsëcacëna.

—Jesu janë tsi, naa Pabló yoahai ca janë tsi tsëquëcahuë iqui noa —i jaca paoniquë pë.

¹⁴ Jabi tocapaoniquë Esceva baquë bo, naa jodioba arati ibo ba chamá-na bo. ¹⁵ Jatsi yoshi bá quëbiniquë:

—Jesu, Pablo, tihí cabo cahëqui noa. Jama, ¿tsouëcara ni mato ra? —iquiina.

¹⁶ Jatsi quiha toá ca yoshi jaya ca joni jato qui tsaminiquë. Caxaxëniria toa joni ini quiha. Sëtiapama tsi jato ja bëboniquë ra. Jatsi jahuë xobo quima ja jabayocanicuë. Jaxchacacani quiha jato raiti. Tsoboco ja icani quiha. Anomaria ja sëtiahacani quiha. ¹⁷ Jatsi ocapijani ca Efeso ca nohiria bá nicaniquë, naa jodiobo, carayanabo tëquë. Nicahax ja raquë-raquëcaniquë. Jasca, Ibo Jesu janë nohiria bá ocahuacanicuë.

¹⁸ Jasca, bëcaniquë chahahuacanaibo ri jato jocha bërohuaxëna. Tobi ini quiha jato jabi yoi ca ja acanaina rë. Jatsi jato yoixëniria ca jabi bo ja bërohuacanicuë. ¹⁹ Yobë i-ipaonish cabá jato libro yoi bo bëcane quiha mëshaxëna. Cincuenta mil ca parata quiha. ²⁰ Tocajacuë tsi quiha mëri tsi Iboba Chani pacanicuë. Toa Chani nohiria bá nicacanicuë ra.

²¹ Jaquirëquë Jerusalén qui Pablo cacanicuë. Macedonia, Acaya, tihí ca mai bo natanihax na.

—Tihí cabo qui shishohax Roma qui ë cati xo —i Pablo niquë.

²² Jatsi Macedonia mai qui canox pari tsi quiha jahuë rabëti bo, naa Timoteo, Erasto, tihí cabo ja raanicuë rëquë. Jatsi Asia mai ó tsi jari ja chitënicuë, toa xo tsi Dios Chani yoaparicatsi na.

Efesó ca iquinacanaína

²³ Toatiyá tsi quiha chahahuacanaíbo tahêhax tsi anomaria iniquê toa nohiria bá yosicanaina ra. ²⁴ Tobi ini quiha chahahuacanaíbo qui caxahai ca joni, naa Demetrio icanish cato. Platá tsi arati mishni bo ja ani quiha parata quêshpi na, naa jato diosa Diana arati xobo jaria cabo. Jasca, huêstima ca yonati bo ja jayani quiha. Toca ca yonocó tsi quiha huêstima ca ganancia bo ja acani quiha. ²⁵ Chahahuacanaíbo tahêxo tsi quiha jahuê yonati bo, yonococanaíbo huêtsa bo, tihi cabo ja quênacanicuê. Quênahax,

—Jisa joni bá. Diana iqui tsi yonoco jiaría ca jaya xo noa ra. Ja tahêxo tsi noba sueldo biqui noa ra. ²⁶ Jama, tobi naa Pablo icanai cato rê. Toa joni tsayacahuê. “Dios bo ma xo toa ma acaina” ii quiha pê. ¿Toa ma nicayamaha? Jasca, jaboqui jahuê chani chahahuahi quiha huêstima ca nohiria bo rê. Nêbí Efesó ca nohiria bo, Asia maí ca nohiria bo, tihi bo janyama mēpihi quiha naa joni ra. ²⁷ Anoma quiha. No acai ca jahuê bo nohiria bá copicasyamamitsa iquia. Jasca, noba diosa Dianá jahuê oquê-oquêria bēnomitsa ja tocapiquê no. Jaboqui ja qui arahi quiha Asia maí ca nohiria bo tēquê ra. Ja qui arahi quiha maí ca nohiria bo tēquê ra. Jama, ja yoahai ca iqui tsi noba Diana qui yosanatsicani quiha rê —nêa tsi joni bo qui Demetrio nēcaniquê.

²⁸ Jatsi toa dios bo canaíbo itsisniquê jahuê chani nicahax na. Quênatsijahuacanicuê:

—Oquê-oquêria ca tsi xo noba Efesó ca diosa Diana ra —iquiina.

²⁹ Jatsi quiha nohiria ba pacotsa pacananicuê yacatá no. Caxa ja icani quiha. Jatsi Pablo dos ca rabêti bo, naa Macedonia mai ax ja bêta bēcanish ca Gayo, Aristarco, tihi cabo qui ja tsamicaniquê. Tsamixo tsi quiha jato i-iti cancha-cancharia qui jato ja xêrēcaniquê. ³⁰ Ocapijani ca nicahax cancha qui Pablo jicocasni quiha jaa ri nohiria bo bēsojó tsi chanixēna. Jama, toá ca xatê bá Pablo quêtianiquê cancha qui ja jicoyamano. ³¹ Jasca, Pablo qui toa yacatá ca chama bá, naa jahuê rabêti bá chani raaniquê ja jicoyamano. Caxaxēniria toa nohiria bo ini quiha. ³² Jabi anomaria toa cancha ó ca nohiria ba pacotsa iniquê. Jasca, yama ini quiha jato rêquēniniti ibo, naa jato pasimati cato. Anomaria ini quiha jato jamēri ca quênacanaína. Jasca, jēniriahax ja bēcani nori ca huêstima ca nohiria bá cahēyamani quiha:

—¿Jēniriahax no catiha sa? —iquiina.

³³ Jatsi nohiria tirixēni bēsojo qui jodiobá Alejandro icanai ca chitijihanicuê nohiria bo qui chanimaxēna. Jatsi Alejandro jahuê mēquê huishqui-huishquihanicuê nohiria bo pasimaxēna. Jato qui ja chanicasni quiha. ³⁴ Jama, jodio ja ini ca jisi tsi quiha oquēnanicuê nohiria ba pacotsa ra. Carayanabo qui yoi jodiobo ini quiha.

—Oquê-oquêria ca tsi xo noba Efesó ca diosa Diana ra —i nohiria bo niquê jato joi choxahi na.

³⁵ Jatsi quiha yacatá ca secretario, naa papi obēso ca joniquê. Jarohari tsi nohiria bo pasimati mētsa ja iniquê. Pasimahax,

—Jisa Efesó ca joni bá. Noba diosa-diosaria Diana arati xobo, jahuê paquēnish ca jaria, tihi cabo ototi ibo ca noqui xo naa ra, naa noba yacata. Toa cahēhi quiha maí ca nohiria bo tēquê iquia. ³⁶ ¿Jabija ma ni è yoahana ra? Jatsi pasicana. Quiniacaxēcahuê, yoyo ca ma ayamano ra. ³⁷ Nēbi naa joni bo ma bēquê rê quēsoxēna. ¿Noba Diana arati xobó ca jahuê bo ja yomacana? ¿Noba diosa ja ocahuacana? Ayamacaqui iquia ra. ³⁸ Jabi naa joni bo qui Demetrio, jahuê yonati bo, tihi cabo quēsocasno tsi tobi quiha gobiernojuebo iquia. Jato qui ja bocati xo. Toa ax tsi jato qui ja quēsocano iquia.

³⁹ Jahuëcara huëtsa ó pi quëëcatsi tsi juez bo qui ma bocati xo nicaxëna. Toa gobierno xobo xo tsi mato nicacaxëcani quiha toá ca chama bo iquia. ⁴⁰ Jasca, ma pacots-huaha iqui tsi gobierno pasomaha no nori ca ja quëscahuacamitsa pë, naa Romá ca chama bo. Jatsi quiniacaxëcahuë. Noqui pi ja nicacano tsi çjënixëhi ni noa pë, naa pacotsa, ma yosihaina, tihí cabo tahëhax na? Bërabixëqui noa iquia —nëa tsi nohiria bo qui yacató ca secretario nëcaniquë.

⁴¹ Jatsi jato xobo qui nohiria bo ja raaniquë chanixo na.

20

Macedonia, Grecia, tihí ca mai bo qui Pablo canina

¹ Jabi ja yosicanai ca jatiquë tsi quiha chahahuacanaibo Pabló catianiquë jato qui chanixëna. Dios Chaní tsi chamahuahax tsi quiha “Caquia rë” i jato qui ja niquë. Joihuahax Macedonia mai qui ja riquiniquë. ² Toa mai natanipama tsi toá ca xatë bo ja chamahuabonaniquë. Jarohari tsi Grecia mai qui ja cahëniquë. ³ Cahëhax tsi quiha tres oxë no tsi ja chitëniquë. Jatsi barcó tsi Siria mai qui capaima ja iniquë, jodiobá acasni ca nicahax na. Ja quëshpi tsi jahari Macedonia mai qui ja caniquë. ⁴ Jabi tobi ini quiha Pablo chimatianaibo. Tobi ini quiha Sópater, Berea yaca ax jonish cato. Tobi ini quiha Aristarco, Segundo, naa Tesalónica ax bëcanish cabo. Jasca, tobi ini quiha Gayo, naa Derbe yaca ax jonish cato, jatsi Timoteo. Tobi ini quiha Tíquico, Trófimo, naa Asia mai ax bëcanish cabo. Tihí cabá Pablo chimatiniquë, Dios Chaní ja yoaquë no. ⁵ Jatsi noqui, naa Pablo, ëa, naa Lucas, tihí ca noqui bëbo Troas qui naa joni bo bocaniquë. Toa xo tsi quiha noqui ja manacaniquë. ⁶ Jama pascua fiesta iqui tsi Filipós tsi no chitëpariniquë. Jaquirëquë Troas qui no caniquë noqui ri, barcó no. Cinco ca bari tsi quiha no rërëniquë. Rërëxo tsi quiha huësti ca semana no raaniquë toa xo na.

Troas qui Pablo shishonina

⁷ Jatsi sábado, naa mitsëmono tsi quiha toá ca chahahuacanaibo ya no catiniquë oriquixëna, shiati axëna. Huëaquë cacatsi tsi naama tsi quiha Pablo jato qui chaniniquë. Naa baquichá tsi quiha jari chanihi ja ini quiha. ⁸ Jabi tobi ini quiha huëstima ca lamparina bo toa mana ca naquëtë xara cato. ⁹ Bëhuëjá tsi quiha tsaho shinapayo iniquë. Jabi Pablo chanirohachanirohano tsi quiha coshinaniquë naa shinapayo bëro ra, naa Eutico icanai cato. Oxahax tsi quiha nëama tres pisos tsi quiha ja paquëniquë mai qui. Topijahuacaquë tsi quiha bësoyama ja iniquë. ¹⁰ Jatsi Pablo botëniquë. Mënixo tsi quiha shinapayo ja iconiquë. Icohax,
—Arayamacana. Bëso xo ra —i jato qui ja niquë.

¹¹ Jaquirëquë mana ca naquëtë qui ja catëquëniquë. Toa xo tsi quiha Iboba shiati ja picani quiha. Huëaticano tsi quiha jahuë chani Pablo jatihuaniquë. Jatsi Pabló jisbayaniquë huëaquë no. ¹² Jasca, paquëhax ca shinapayo jahuë xobo qui ja bocani quiha. Rani-raniquë toa chahahuacanaibo ra.

Mileto qui Pablo shishonina

¹³ Jisbëria tsi quiha rëquë noqui, naa Pablo chimatianaibo, ëa, tihí cabo caniquë Asón yaca qui. Barcó tsi no caní quiha. Tocabono tsi Asón qui Pablo jamë caniquë maí no. ¹⁴ Jatsi Asón xo tsi quiha Pablo no bëcaniquë. Bëchaxo tsi quiha barco qui jato no jicomaniquë. Jatsi barcó tsi Mitilene qui no caniquë noqui tëquëta. ¹⁵ Asón ax riquibëria tsi huëaquë tsi quiha Quío icanai ca tësëbë oquëri ca qui no cahëniquë. Oxabëria tsi quiha Samos icanai

ca tēsēbē qui no rērēniquē. Oxabēria tsi huēaquē Mileto yaca qui no rērēniquē. ¹⁶ Rērēhax Efeso yaca qui Pablo shishocasyamani quiha, bamahaxma tsi Jerusalén qui cahēcatsi na. Huēstima ca bari ja raacasyamani quiha Asia mai xo na. Jasca, Jerusalén tsi ja icasni quiha Pentecostés fiesta quēshpi na.

Efesó ca yosibo qui Pablo chaninina

¹⁷ Jama, Mileto no rērēquē tsi quiha toa xo tsi carta ca chani Efesó ca yosibo qui Pabló raaniquē, Mileto qui ja bēcano. ¹⁸ Jatsi yaca qui ja cahēcaquē tsi quiha Pabló jato yobaniquē:

—Asia mai qui ē jonitiya rohari no tsi ē bēsohai ca tēquē cahēqui mato iquia. ¹⁹ Yonati jascaria tsi mato xērēquē tsi ē yonoco-yonoconiquē ra. Bēho ya ē yonoconi quiha mato noihi na. Toatiyá tsi quiha ē tēnē-tēnēniquē, ēa jodiobá acasni iqui na. ²⁰ Jasca, Dios Chani yoaquí tsi jia tsi mato ē yobaniquē mato mēbixēna. Yacatá ca nohiria bo bēsojo xo tsi mato xobo xo tsi tihí cabo xo tsi Dios Chani mato ē yoaniquē. ²¹ Jodiobo, carayanabo, tihí cabo qui jia tsi Dios Chani ē yoani quiha, “Mato jocha quima Dios quiri ma bēsōxēti xo. Ibo Jesu ma chahahuano” i mato quiina. ²² Jasca, jaboqui Jerusalén qui caquia, Espiritu Santó ēa raahai iqui na. ¿Jēnahuacaxēcahi ni toá ca nohiria bo sa, ē joquē no? Cahēyamaquia rē. ²³ Jama tēnēti, preso qui nanēhacati, tihí cabo ó pasoquia cahēhax na. Toa ēa yobahi quiha Espiritu Santo pē, jatiroha ca yacata xo na. ²⁴ Jatsi ē qui iriama tsi xo toa preso qui ē nanēhacaxēhaina. Raquēyamaquia. E qui Jesucristó ani ca yonoco ē jatihuati xo ra, naa nohiria bo Dios noihi ca Chani yoahaina.

²⁵ Mato xērēquē tsi ē co-copaoniquē, Diós nohiria bo otohái ca yoahi na. Toa Chani ma nicaní quiha. Jama, jaboqui ēa jistēquēyamariaxēqui mato rē, ē caquē no. ²⁶ Mato tēquē ē chahahuamacasniquē iquia. Ja tsi xo toa pi ma xabahamahacasyamano tsi noho shina ri ma xo ra. ²⁷ Dios Chani mato quima ē quētiayamaniquē yoaquí na. Dios shina tēquē nicaquē mato iquia. ²⁸ Jasca, mamē yoi, chahahuacanaibo tēquē, tihí cabo jia tsi ó bēsocana. Jato ototi yonoco mato qui Espiritu Santó ani quiha. Jatsi jia tsi Dios iglesiá cabo otocana. Jahuē baquē nahai cató tsi ja copihacacani quiha. ²⁹ Jasca, mato ē jisbayano tsi nēbi bēcaxēcani quiha mahitsa ca Dios Chani yoacanaibo, naa cama jascaria quiina. Joxo tsi iglesiá cabo quēyocascaxē-cani quiha rē. ³⁰ Jasca, mato quima tsēquēxēhi quiha huēsti huēsti ca Dios Chani cahēyoyamacanaibo ri. Quiacaxēcani quiha rē iglesiá quima chahahuacanaibo mēpixēna. ³¹ Jaha tsi quiniacaxēcahuē iquia ra. ¿Tres ca xēni no tsi bēho ya tsi mato ē yobayama-yamani? Barihani, baquicha tsi mato ē yoba-yobani quiha.

³² Jatsi jaboqui Dios yoi, ja noihi ca chani chamaxēni cato, tihí cabo qui mato mēaquia ra. Mato chamahuati xo Dios yoi. Jasca, mato chamahuaxēhi quiha jahuē Chani ri. Mato shomahuaxēhi quiha ra, jahuē nohiria bo tēquē ja shomahuariahai jascaria. ³³ Jasca, tsayacahuē. Mato parata, mato oro, mato jahuēmishni bo, tihí cabo ó ē quēyamaniquē mato bētahi na. ³⁴ Noho mēquē yoi tsi ē yonoco-yonoconiquē noho sueldo bixēna. Noho piti, noho jahuē bo tēquē, tihí cabo ē copiniquē ra, emē yoi xo na. Jasca, noho rabēti bo ri ē otoniquē. ³⁵ Tsayacahuē. Jēnima tsi xo yonoco coshi. Toca tsi noitiria cabo mēbiti mētsa xo noa yonocoqui na. Jatsi Ibo Jesu yoani ca ma shina-bēnoyamano. “Raniqui mato jahuē bo bichi na. Jama, oquēxēhi quiha ma ranihaina noitiria cabo qui ma aquē no” i ja ni quiha —nēa tsi Pabló nēcaniquē yosibo qui chanihi na.

³⁶ Yobahax tsi quiha rapotó tsi jato bêta ja niiniquê bêhox-xêna. ³⁷ Jatsi aratsijacanicuê. Pablo ja xêcocani quiha. Ja tatsocani quiha. ³⁸ Cohuê ja icanicuê, “Ea jistêquêyamariaxêqui mato” i ja ni quêshpi na. Jaquirêquê barco qui Pablo ja chimatiyocanicuê.

21

Jerusalén qui Pablo canina

¹ Jato joihuaxo tsi no jisbayaniquê. Jisbaya tsi quiha iá tsi mêtê Cos icanai ca têsêbê qui no caniquê. Huinobaya huêaquê tsi quiha Rodas icanai ca têsêbê qui no cahênicuê. Jaquirêquê Pátara icanai ca qui no rêrênicuê. ² Toa xo tsi quiha barco no rarinaniquê Fenicia mai qui caxêna. ³ Jisbaya tsi quiha Chipre icanai ca têsêbê no tarabiniquê, jahuê mêxojó no. Tarabibaya tsi Siria mai qui no cahênicuê. Jatsi Tiro yaca qui ja rêrêhacani quiha carga janaxêna. ⁴ Jatsi toá ca xatê bo jisi no caniquê, carga ja niacaquê no. Siete ca bari no tsi quiha jato qui no shishoniquê ra. Jatsi Espíritu Santó chamá tsi toá ca xatê bá Pablo yobanicuê, “Jerusalén qui cayamahuê” iquiina. ⁵ Jatsi barco shomahuahacaquê tsi quiha no bacanicuê caxêna. Jatsi noqui ja chimaticanicuê, jato ahui bo, jato xocobo ri. Barco qui têmahinanox pari tsi quiha mai quêmapó tsi no niiniquê rapotó no, bêhoxparixêna. ⁶ Jato têquê joihuahax tsi quiha barco qui no têmahinaniquê. Jatsi jahari jato xobo bo qui ja bocanicuê.

⁷ Jatsi catêquêniquê barco. Riquibaya tsi Tolemaida yaca qui no rêrênicuê. Rêrêxo tsi toá ca chahahuacanaibo no joihuaniquê. Huêsti ca bari tsi jato bêta no chitêni quiha. ⁸ Jatsi huêaquê riquibaya tsi Cesarea yaca qui no rêrênicuê. Rêrêhax toá tsi no chitênicuê Dios Chani yoati ibo-iboria Felipe xobó no. Jerusalén ca siete ó ca huêsti ca inish ca naa joni ini quiha. ⁹ Jasca, cuatro ca bènê yama ca jahi bo ja jayani quiha, naa Dios Chani yoacanaibo. ¹⁰ Yoanoma ca bari huinocaquê tsi quiha noqui cahênicuê jodioba mai ax johax ca joni, naa Acabo icanai cato. ¹¹ Joxo tsi quiha Pablo cinturón bixo tsi jahuê mêtêquê yoi, jahuê tahê yoi, tihí cabo ja nêxanicuê. Jatsi,

—Nêca tsi nêxahacaxêhi quiha naa cinturón ibo rê. Tocacaxêcani quiha Jerusalén ca jodiobo pê. Nêxaxo tsi carayanabo qui mêtacaxêcani quiha acacati. Tocaxêti xo ii quiha Espíritu Santo ra —nêa tsi noqui Acabo nêcanicuê.

¹² Jatsi jahuê chani nicaxo tsi Pablo no yobanicuê noqui ri:

—Jerusalén qui cayamahuê —i ja qui no niquê.

¹³ Jatsi,

—¿Jêniriahax aracanai sa? ¿Jêniriauxo êa quêtíacascanaí rê? Cacasquia ra. Nêxahacahai ca qui raquêyamaquia. Jasca, Jesucristo tahêxo pi êa ja namêcano tsi ê qui jia tsi xo ra —nêa tsi noqui Pablo nêcanicuê.

¹⁴ Jabi noqui Pabló chahahuayamaniquê. Jaha tsi no pasiniquê.

—Ja shinahai ca Diós ano ra —i no ni quiha.

¹⁵ Jaquirêquê noba jahuê bo no rohahuaniquê. Rohahuahax Jerusalén quirí no catêquêniquê. ¹⁶ Jasca, noqui chimatini quiha Cesareá ca xatê bo huêsti huêsti cabo. Jerusalén qui no cahêquê tsi quiha Manasón icanai ca xobo qui noqui ja bocanicuê, naa Chipre ó conish cato. Rêquê chahahuayaniish ca naa joni ini quiha. Jabi jahuê xobó tsi no chitênicuê cahêhax na. ¹⁷ Jasca, jia tsi quiha Jerusalén ca xatê bá noqui joihuaniquê. ¹⁸ Jatsi huêaquê tsi quiha noqui Pabló boniquê Jacobo jixêna. Jabi mani ini quiha iglesiá ca yosibo têquêta. ¹⁹ Jia tsi jato têquê Pabló joihuaniquê. Joihuaxo tsi quiha

carayanabo xērēquē xo tsi Diós ani ca jatiroha ca jahuē bo jato ja yoaniquē. Carayanabo qui Dios Chani ja yoahai ca ja bērohuaniqui. ²⁰ Jatsi ja ranicanicaniquē nichahax na. Dios ja ocahuacanicuē jato tēquēta. Jatsi Pablo qui ja chanicanicuē:

—Noqui nicaparihuē, nobē xatē. Chahahuacani quiha jodiobo ri. Tihiria cabá chahahuani quiha. Jama, Moisés yobá-naxēni cabo xo jato tēquēta. ²¹ Moisés yoba, jodioba jabi bo, jibirishati jabi, tihi cabo pasomaha mi nori ca ja nicacani quiha pē. ²² Jishopē. ¿Jēnahuariaxēhi ni noa sa? Mi joha ca nica-caxēcani quiha pē. ²³ Jaha bēsopa. Noba shina tsi xo naa: Nēá xo cuatro ca joni bo. Bahuēhacati jabi apaimaria ca xo, Diós yoani ca jatihuaxēna. ²⁴ Jato bēta catá mia ri arati xobo qui. Toa xo tsi noba bahuēhacati jabi mi ano ra, mia ri, jato bēta xo na. Jaquirēquē, jato gasto bo mi copino, mato boo ja maxcocaquē no. Toa jabi pi mi ano tsi mia pasomaha ca chani chahahuayamacaxēcani quiha iqui noa. Moisés yoba mi nichahi ca jiscaxēcani quiha mi tocapiquē no ra. ²⁵ Jasca, carayanabo, naa chahahuanish cabo qui yoba raaqui noa, “Pinoma xo ídolo bo qui acacaha ca piti” i jato qui iqui noa. Jasca, “jimi, jimihuahama ca nami, tihi cabo piyamacahuē” iqui noa. Jasca, “anoma ca chotahai ca quimacahuē” iqui noa. Tihi ca tsi xo toa no iquiina, yobahi na —nēa tsi quiha Pablo qui ja nēcanicuē.

Pablo qui ja tsamicascanina

²⁶ Japi huēaquē tsi quiha jodioba bahuēhacati jabi Pabló aniquē toa cuatro ca joni bo yaxo na. Axo tsi quiha arati xobo-xoboria qui jato ja boniquē ja acana ca yoaxēna. Jabi jato bax arati ibo bá yohina tēpasnox pari no tsi siete ca bari no tsi ja mana-manati nori icani quiha. Toa bari bo quirēquē jato quēshpi tsi yohina tēpas-hacati nori ini quiha. Tihi ca ati jaca nori ini quiha. Jodioba jabi bo quiha.

²⁷ Jabi toa bari bo jatipaimano tsi quiha Asia mai ax bēcánish ca jodiobá Pablo jisniquē arati xobo xo na. Jato arati xobó tsi Pablo ini ca jisi tsi ja caxacanicuē. Jatsi nohiria bo ja tsamacanicuē Pablo qui ja tsamicano.

²⁸ Tsamihax tsi quiha,

—Noqui mēbihuē, Israel ca joni bá. Moisés yoba, noba nohiria bo, noba arati iti, tihi cabo ocahuamixēniria ca tsi xo naa joni ra. Anoma tsi xo toa nohiria bo ja tiisimahaina ra. Jaboqui tsayacahuē. Noba iti roa ca yoshihuahi quiha pē. Noba arati xobo qui carayanabo ja jicomaquē ra —nēa tsi quiha ja nēcanicuē joi pistimá tsi quēnahi na.

²⁹ Jabi arati xobo qui Pablo jiconox pari no tsi yacatá ca carayana ya, naa Efeso ca Trófima ya tsi Pablo co-cohai ca ja jiscani quiha. Ja tsi xo toa jato arati xobo yoi qui carayanabo Pabló jicomani ca ja quēscahuacani quiha tonia.

³⁰ Jatsi yacatá ca nohiria bo shina-rajinaniquē. Mēri tsi ja quētsoanicuē. Quētsohax tsi Pablo qui ja tsamicanicuē. Tsamixo tsi quiha arati xobo-xoboria cacha ja xērēcaniquē. Jatsi arati xobo-xoboria ó ca caiti bo japahacanicuē jato cho, nohiria misco iqui na. ³¹ Jabi toa quētsonish ca nohiria bá Pablo acasni quiha. Jabija pi carayana ca soldado ba comandanté toa jodiobá acasni ca nicayamarohano tsi quiha Pablo ja aquē acanicuē ra. “Iquinahi quiha Jerusalén ca nohiria bo tēquē” i ja qui jaca ni quiha. ³² Nicaxo tsi quiha jahuē soldado bo, jahuē capitán bo, tihi cabo ja quēnatapinicuē. Bamahaxma tsi quētsonish ca nohiria bo qui ja jabacanicuē. Jatsi nohiria bá Pablo jēnēnicuē soldado bo jisi na. ³³ Cahēxo tsi quiha Pablo bichi comandante caniquē. Pablo qui soldado bo tsaminiquē. Tsamixo tsi quiha ja nēcanicuē dos ca cadena bá no. Jaquirēquē,

—¿Tsohuë ni naa joni ra? ¿Jahuë yoi ca ja aka? —i nohiria bo qui ja niquë.

³⁴ Jatsi nohiria bá quëbi-quëbiniquë. Jamëri jamëri ja qui ja quënacana ca ini quiha. Anomaria toa nohiria ba pacotsa iniquë. Jatsi comandante yosananiquë, tsohuë ca Pablo ini ca cahëti mëtsama ja ini iqui na. Jatsi cuartel qui Pablo ja boniquë. ³⁵ Jabi tapiti qui Pablo cahëquë tsi quiha bëyoria-bëyorianiquë yacatá ca nohiria bo. Anomaria toa nohiria bo ini quiha. Jatsi Pablo soldado bá itiniquë ja acacayamano iquish na. ³⁶ Banahuaniquë nohiria bo, Pablo acasquí na.

—Ahuë. Ahuë —i jaca niquë joi pistiamá no.

Nohiria bo qui Pablo chaninina

³⁷ Jatsi cuartel qui jicopama tsi quiha,

—Mi bëta chaniparicasquia ra —i comandante qui Pablo niquë.

Jatsi,

—¿Carayanaba joi chanihi ni mia pa? ³⁸ Jatsi toa iquinaxëniria ca Egiptobo ma xo mia tonia. Anomaria tsi xo toa joni ra. Cuatro mil ca iquinaxëniria ca joni bo toa joni mëpini quiha xaba qui —i Pablo qui comandante niquë.

³⁹ Jatsi Pabló quëbiniquë:

—Toa joni ma xo ëa ra. Jodio yoi xo ëa ra. Ciliciá ca Tarso yacatá tsi è coniquë. Yaca-yacaria tsi xo toa. Ea shinahuë. Noho jimibo qui chaniparicasquia —i ja qui Pablo niquë.

⁴⁰ Jatsi,

—Ihuë —i ja qui comandante niquë.

Jatsi quiha tapiti catcha tsi Pablo niiniquë chanixëna. Niixo tsi quiha jahuë mëquë ja huishquihaniquë nohiria bo pasimaxëna. Pasijacaquë tsi quiha jato joi yoi tsi chanitsi Pablo niquë.

22

¹ —Ea nicaparicana, ëbë xatë bá, noho jahëpa bá. Noho shina mato nicamacasquia —i jato qui ja niquë.

² Jatsi ja pasicaniquë jato Hebreo joi yoi tsi ja chaniha ca nicahax na.

³ —Jodio yoi xo ëa ra. Ciliciá ca Tarsó tsi è coniquë. Cohax tsi quiha naa yacatá tsi è shinahaniquë ra. Nëa xo tsi Gamaliel yoi ëa tiisimaniquë ra jahuë escuela xo na. Noba naborëquëba yoba, jabi bo, tihí cabo ëa ja tiisimani quiha. Jasca, Dios yonoco è aria-ariacasniquë noho coshi tëquëtá no, naa jaboqui ma acatsai jascaria. ⁴ Rëquë tsi toa quinia paxa ca banahuacanaibo è tënëma-tënëmapaoniquë, jato namëcasquí na. Jabi huësti huësti ca è namëniquë rë. Jasca, joni bo, yoxa bo, tihí cabo tsi preso qui è nanëpaoniquë. ⁵ Jabi è a-apaoni ca cahëhi quiha nëá ca arati ibo-iboria, yosibo tëquë ra. Jato nicacahuë. Parayamaquia. Jatsi, Damascó ca chahahuacanaibo qui è tsamicasniquë. Jatsi quiha è qui carta bo nëá ca yosibá aniquë ra Damascó ca yosibo qui jismati. Toa carta bo bichi tsi Damascó qui è caniquë toá ca chahahuacanaibo qui tsamixëna. Jahari Jerusalén qui jato è bëcasni quiha preso qui nanëxëna.

Ja chitimini ca Pabló yoanina

Hechos 9.1-19; 26.12-18

⁶ Jatsi Damascó qui è caniquë. Cahax yaca basimahëno tsi quiha ëa tëamë tsi anomaria ca naipá ca huëa huahuaniquë. Matoroco bari ja ini quiha.

⁷ Tsayahax mai qui è paquëniquë. Jatsi è qui chanihai ca joi è nicaniquë ra. “Jisa Sauló. ¿Jënixo tsi ëa tënëmahai ra?” i è qui joi ni quiha. ⁸ Jatsi, “¿Tsohuë ni mia, Ibobá?” i è niquë ra. Jatsi, “Jesu, naa Nazarét ca racanish ca ëa xo naa.

Ea tēnēmaqui mia ra” i è qui ja niquē. ⁹ Jabi ēa tēamē ca nohiria bá toa è qui chanihai ca joi nicayamani quiha. Toa huēaria roha ja jiscani quiha. ¹⁰ Jatsi, “¿Jēnahuaxēhi ni ēa, Ibobá?” i è niquē. Jatsi ēa Ibobá quēbiniquē: “Niihuē. Damasco qui cata. Toá tsi mi axēti ca yoahacaxēqui mia ra” iquina. ¹¹ Jatsi Damasco qui noho rabēti bá ēa mēpiniquē, bēco è ini iqui na. Anomaria toa huēa ini quiha.

¹² Jatsi ēa jisi joniquē huēsti ca joni, naa Ananías icanai cato. Jabi Dios yoba banahuahai ca shinajiaxēni ca naa joni ini quiha. Chahahuani quiha toá ca jodiobo tēquē. ¹³ Johax ēa tapai ja niiniquē. Jatsi, “Jisa, èbè xatē Sauló. Mí taistēquēno ra” i è qui ja ni quiha. Jatsi è taistapiniquē ra. Jēnima noho bēro ini quiha. Toa joni jisti mētsa è iniquē iquia. ¹⁴ Jatsi ēa ja yobaniquē: “Mía noba naborēquēba Díos bichitaquē, jahuē shina mia cahēmaxēna. Jasca, jahuē Mēstēxēniria ca mi jisti, jatsi jahuē joi yoi nicati, tihi cabo ó quēēhi quiha iquia. ¹⁵ Tocajahitaquē, mi nicahitahana, mi jisitahana, tihi cabo jatiroha ca nohiria bo qui mi yoano iquish na. Mí yonoco ixēhi quiha toa jahuē Chani yoahaina iquia. ¹⁶ Jatsi bamayamahuē. Niihuē. Jaboqui mi ashimahacaxēti xo ra. Mí jocha masaxēhi quiha, Iboba jané mi quēnaquē no ra” nēa tsi quiha è qui ja nēcaniquē.

Carayanabo qui ja raahacani nori ca Pabló yoanina

¹⁷ Jaquirēquē jahari Jerusalén qui è caniquē. Jatsi huēsti ca barí tsi arati xobo-xoboriá tsi bēhoxpama tsi è tēnamēniquē. ¹⁸ Tēnamēpama tsi Ibo è jisniquē ra. Jatsi è qui chanitsijaniquē: “Mēri, mēri, Jerusalén mi jisbayano. Nēa pí ēa yoati mi chanino tsi mia nicayamacaxēcani quiha” i quiha è qui Ibo niquē. ¹⁹ Jatsi, “Toca no tia, Ibobá. Catiti xobo bo qui è ca-capaniquē rē, mi qui chitimicanaibo mēraxēna, preso qui nanēcasquí na. Jasca, jato è tēnēmapaoniquē. Tihi ca è ani ca cahēyocani quiha. ²⁰ Jasca, mi chani yoahai ca Esteban yamabo ja acaquē tsi quiha è rani-raniniquē. Toa ax tsi toa ati ibo ba sahuēti ó è bēsoniquē. Tihi cabo iqui tsi ēa nicayamacaxēcani quiha naa nohiria bo ra” i Ibo qui è niquē. ²¹ Jatsi quiha Ibobá quēbiniquē: “Cata. Nēama ca carayanabo qui mia raaquia ra” iquina —nēa tsi quiha nohiria bo qui Pablo nēcaniquē.

Comandante Pablo ó bēsonina

²² Jabi jia tsi Pablo chani toa nohiria bá nicaniquē. Jama, “Carayana” i ja quē tsi quiha ja caxatapicaniquē. Caxaquí tsi quiha jato joi ja choshacanicquē: —Anoma tsi xo toa joni ra. Acahuē ra. Oquē tsi xo ja rēsohaina —iquina.

²³ Anomaria jato joi pacotsa iniquē. Jato sahuēti bo huishqui-huishquihapama tsi quiha mana mai mishpo ja niacanicquē caxaquí na.

²⁴ Jatsi quiha cuartel qui comandanté Pablo jicomanicquē. Jicomaxo tsi quiha Pablo ja rashacanicquē jabija ca yoamaxēna. ²⁵ Nēxajahuacano tsi quiha toá ca capitán qui Pablo chaniniquē. Chanihax,

—Romano-romanoria ca ēa xo naa. Ea rashanox pari tsi ¿juez qui ēa boyamahai sa? Anoma tsi xo toa mi acaina ra —i ja qui ja niquē.

²⁶ Jatsi quiha comandante qui capitán caniquē, Pablo nicañax na.

—Anoma tsi xo no acaina ra. Romano-romanoria ca joni tsi xo naa ra —i quiha ja qui ja niquē.

²⁷ Jatsi quiha Pablo qui comandante caniquē nicaxēna:

—¿Romano ni mia pa? Toa nicaquia —iquina.

Jatsi,

—Jaahuē —i Pablo niquē.

²⁸ Jatsi quiha comandanté quēbiniquē:

—Majia. Huëstima ca parata ë inianiquë pë romano manëxëna —iquiina.

²⁹Jatsi quiha Pablo quima toa soldado bo basitapiniquë. Jasca, raquëniquë comandante ri, romano ja nëxani iqui na.

Catinish ca jodioba yosibo bësojó tsi Pablo niinina

³⁰Jaquirëquë Pablo qui toa jodiobo quësocanai ca comandanté cahëcasniquë. ¿Jëniriahax Pablo qui caxaxëniria ja icana? Toa ja cahëcasni quiha. Jatsi quiha huëaquë Pablo ja pëcaniquë. Pëcaxo tsi quiha jodioba yosibo, jato arati ibo bo, tihi cabo qui chani ja raaniquë ja caticano iquish na. Jatsi ja caticaquë tsi quiha jato qui Pablo ja boniquë jato bësojó tsi nimaxëna.

23

¹Jatsi quiha catinish ca yosibo Pabló bëisniquë.

—Jisa, ëbë xatë bá. Mato parayamaquia. Dios bësojó niipama tsi jia tsi xo toa jatiroha ca ë anina iquia ra. Jënima tsi xo noho shinana —i quiha jato qui Pabló niquë.

²Jatsi caxaniquë arati ibo-iboria Ananías, Pablo chani nicahax na,

—Quëpaishacahuë. Quëpaishacahuë —i jaha bëso cabo qui ja niquë.

³Jatsi quiha,

—Mia tëpasxëhi quiha Dios iquia, jana quiamisxëni cató. ¿Jënahuariaxo tsi Dios yobá tsi ëa mi copina ra, Dios yoba mi nicayamaquë no mia ri? Dios yoba pasomaha tsi xo toa “Quëpaishacahuë” i mi aina —i ja qui Pablo niquë quëbilhi na.

⁴Jatsi toá ca nii cabo chaniniquë:

—Dios arati ibo-iboria ocahuacui mia ra —iquiina.

⁵Jatsi,

—Jishopë. Arati ibo-iboria ja iqui ca ë cahëyamaquë rë, ëbë xatë bá. “Nohiria chama bo ocahuayamacana” ii quiha Quënëhacanish cabo —i Pabló niquë.

⁶Jabi toa yosibo xara ini quiha saduceobo fariseobo tëquë. Jabi fariseobo jisi tsi quiha jato qui Pabló chaniniquë:

—Jisa, ëbë xatë bá. Fariseobo ca ëa xo naa ra. Fariseobo xo noho jahëpa ri. Diós nohiria bësohtëquëmaxëhai ó pasoquia ëa ri. Ja tsi xo toa ë qui quësoyoicani quiha naa nohiria bo rë —i quiha jato qui Pabló niquë.

⁷Jatsi joi mëriariatsijahuacaniquë ja yoaha ca nicaxo na. Joi mërahax tsi quiha ja mapëxnacaniquë, naa saduceobo, fariseobo. ⁸“Yama tsi xo nohiria bo bësohtëquëxëhaina; yama xo ángel bo; yama xo yoshini” tihi ca tsi ini quiha toa saduceobo. Jama, naa tres ca jahuë bo fariseobá chahahuani quiha. ⁹Ja iqui tsi anomaria ini quiha toa joi ja mëranacanaina. Aniniquë jato pacotsa. Jatsi Dios yoba tiisimacanaibo, naa fariseobo, niiniquë Pabló mëbixëna.

—Yama tsi xo naa joní yoi ca acana iqui noa. ¿Tonia Dios shinana, ángel, tihi cabo ja qui chaniyamani ma ni? —i quiha saduceobo qui jaca niquë.

¹⁰Jatsi comandante raquëniquë, Pabló ja ninicanai ca tsayahi na. Ja jaxcayocani nori ca ja quëscahuani quiha. Jaha tsi quiha nëpax jahuë soldado bo ja raaniquë jato quima Pabló ja bicano. Bichi tsi quiha jahari cuartel qui Pabló ja bëniquë.

¹¹Jatsi huëaquë, naa baquichá tsi quiha Pabló qui Ibo jisiquiniquë. Tapai niuhax,

—Chamatsihuë. Jia tsi xo toa Jerusalén tsi mi chanihaina ëa yoati na. Toca tsi Romá tsi mi chanixëti xo —i quiha ja qui Ibo niquë.

Pablo ja acasnina

¹² Huëaquë baquishmari tsi quiha jodiobo catiniquë, Pablo ati planes axëna. Parahaxma tsi,

—Piti, jënë, tihi cabo ayamaxëqui noa, Pablo aquí rohari ra —i jaca niquë.

¹³ Tobi ini quiha cuarenta ca joni bo huino, naa Pablo acaskanish cabo.
¹⁴ Jabi jato planes acax tsi quiha arati ibo bo, yosibo, tihi cabo qui ja bocaniquë yoaxëna.

—Parayamaqui noa ra. Piti, jënë, tihi cabo ayamaxëqui noa Pablo aquí rohari. ¹⁵ Jatsi comandante nicacana, jahari jodioba chama bo qui Pablo raati. “Pablo ya chanitëquëcasqui noa” i ja qui cana. Tocapimano tsi axëqui noa ra Jerusalén qui ja cahënox pari no —nëa tsi quiha yosibo qui jaca niquë. Jato shina quiha.

¹⁶ Jama, ja acascani ca planes Pablo yoxacato baquë nicaniquë. Nicachax cuartel qui ja caniquë Pablo yobaxëna. ¹⁷ Jatsi quiha capitán bo Pablo quënaniquë. Quënahax,

—Naa jonipayo comandante qui bocaquë. Chani jaya xo ra yoati —i quiha jato qui ja niquë.

¹⁸ Jatsi comandante qui capitán boniquë. Bohax tsi quiha,
—Ea Pablo quënaquë. “Naa jonipayo comandante qui bohüë” i ë qui ja quë ra. Mi bax chani jaya quiha —i ja qui capitán niquë.

¹⁹ Jatsi comandantë mëpiniquë ori, jamëhax ja bëta chanicasquí na.

—¿Jahuë ëa yoacatsai? —i ja qui ja niquë.

²⁰ Jatsi,

—Huëaquë tsi bëcaxëcani quiha jodiobo. Mia paracascani quiha pë. “Jahari jodioba chama bo qui Pablo mi raano, jahuë chani no nicatëquëno” i caxëcani quiha. ²¹ Quiniahuë. Tobi cuarenta ca joni bo huino quiha. Jatsi Jerusalén qui pi Pablo mi bono tsi bahi nëpax tsi jotacaxëcani quiha axëna. Parahaxma tsi “Piti, jënë, tihi cabo ayamaxëqui noa, Pablo aquí rohari” i jaca itaha quiha. Jaboqui jonë ca xo. Mi chani roha manacani quiha —nëa tsi quiha Pablo pihaca niquë.

²² Jatsi,

—Ea mi yoaha ca huëtisa bo qui yoayamahuë —i ja qui comandante niquë. Yobaxo tsi quiha jahari jahuë xobo qui ja raaniquë.

Carayana ca chama qui Pablo raahacanina

²³ Jatsi quiha comandantë jahuë capitán bo quënaniquë:

—Doscientos ca maí cohai ca soldado bo, setenta ca caballo pohuëhai ca soldado bo, doscientos ca piahua niati mëquixëni ca soldado bo, tihi cabo shomahuacana. Baquicha, a las nueve Cesarea yaca qui Pablo ma bono ra.

²⁴ Jasca, Pablo bax caballo shomahuacana. Jatsi quiniacaxëcahuë. Jia tsi gobernador Félix qui naa joni ma mëano —nëa tsi quiha jahuë capitán bo qui ja nëcaniquë.

²⁵ Yobaxo tsi quiha carta quënétsi comandantë huaniquë jato bëta raaxëna. Nëca tsi ja quënéni quiha:

²⁶ “Excelentísimo gobernador Félix: Claudio Lisias ca ëa xo naa. Mia joihuaquia. ²⁷ Mi qui ë raahai ca joni qui jodiobo tsamihitaquë. Soldado bo ya pi ë joyamarohano tsi naa joni ja aquë acahitaquë iquia. Romanobo ja iqui iqui tsi bichi ë cahitaquë ra. ²⁸ ¿Jëniriacaraxo naa joni ja acasahitaha pa? Jatsi jahuë jimiba chama bo qui ë bohitaquë, cahëcasquí na. ²⁹ Jatsi ja qui ja quësocanaí ca ë nicahitaquë. Mahitsa quiha. Jato jabi yoi bo yoati tsi quiha. Yama tsi xo toa yoi ca ja acana iquia ra. Jatsi ayamahuë. Preso qui nanëyamahuë. ³⁰ Jaboqui planes acani quiha pë naa joni axëna. Ja acascanai

ca iqui tsi mi qui raaquia jaha mi bĕsono. Jasca, ja qui quĕsocanaibo qui chani ĕ raaquĕ mia jisi ja bocano. Iquĕ”.

³¹ Jatsi soldado bo bocaniquĕ jato comandante yoba nicahax na. Baquichá tsi quiha Antĕpatris icanai ca qui Pablo ja bocani quiha. Toá tsi quiha soldado bo tooniquĕ. ³² Jatsi huĕaquĕ tsi quiha caballo pohuĕhax ca cohai ca soldado rĕtsaminiquĕ Pablo ya Cesarea qui. Bacani quiha soldado bo, naa mai cohai cabo. ³³ Cesarea qui cahĕxo tsi quiha mai obĕsoti ibo, naa prefecto qui carta ja acaniquĕ. Jaquirĕquĕ ja qui Pablo ja mĕacaniquĕ. ³⁴ Jatsi carta prefectó tsaya-tsayaniquĕ. Tsayahax,

—¿Jahuĕ maí tsi mi coní? —i quiha Pablo qui ja niquĕ.

Jatsi Pabló quĕbiniquĕ:

—Cilicia ó no —iquiina.

³⁵ Nicahax,

—Mia nicaxĕquia ra mi qui quĕsocanaibo joquĕ no —i Pablo qui ja niquĕ.

Jatsi Pablo ja raaniquĕ cárceł qui, naa Herodes xobo-xoboria cató no.

24

Pablo qui ja quĕsocanina

¹ Cinco bari quirĕquĕ quiha Cesarea qui Jerusalĕn ca jodiobo cahĕniquĕ. Cahĕni quiha jato arati ibo ba chama Ananías, jato yosibo, huĕsti ca abogado, naa Tértulo icanai cato. Tihi cabo cahĕni quiha. Cahĕhax tsi quiha prefecto jisi ja bocaniquĕ Pablo qui quĕsoxĕna. ² Jatsi Pablo quĕnahacaniquĕ. Ja joquĕ tsi quiha chaniti Tértulo chitahĕhuaniquĕ ja qui quĕsoxĕna. Ja nĕcani quiha:

—Joquĕ noa, noba taita Félix shinajiaxĕni cató. Mia iqui tsi jia tsi racaqui noa ra. Mi tiisi iqui tsi oquĕ-oquĕria xo noba mai. Yama tsi xo no nianahaina ra. ³ Mi acai ca quĕshpi tsi “Gracias” iqui noa ra. Jia tsi xo toa mi acaina jatiroha cato xo na. ⁴ Jaboqui tsi chani pistia icasquia pĕ. Tonia huĕstima tsi xo toa mi yonoco iquia. Jatsi mĕri tsi chanixĕquia. Mi yosanayamano. Jia tsi nicahuĕ. ⁵ Anoma tsi xo naa joni Pablo iquia ra. Noba jimibo, naa jodiobo tsamaha quiha iquinamaxĕna, naa jatiroha ca país xo na. Jasca, huĕsti ca maxo, naa nazarenobo icanai ca rĕquĕninihi quiha pĕ. ⁶ Jasca, noba arati xobo-xoboria ja yoshihuacas-hitaquĕ pĕ. Ja tsi xo toa ja qui no tsamihitaquĕ ra. Noba yobá tsi naa joni no copicas-hitaquĕ. ⁷ No ayamahitaquĕ rĕ, comandante joha iqui na. Chamá tsi pĕ noba mĕquĕ quima Pablo ja tsĕchitaquĕ rĕ. ⁸ Tsĕcaxo tsi quiha mi qui noqui ja raahitaquĕ pĕ. Jatsi Pablo nicahuĕ. Parayamaqui noa, naa joni qui quĕsoquí na. Tsayahuĕ —nĕa tsi quiha prefecto Félix qui Tértulo nĕcaniquĕ.

⁹ Jatsi toá ca jodiobo chaniniquĕ jato ri:

—Jabija tsi xo toa ja yoahana ra —iquiina.

Félix bĕsojó tsi Pablo chaninina jamĕ bax na

¹⁰ Jatsi Félix Pablo chanimaniquĕ. Pablo nĕcani quiha:

—Raniquia ra, mia bĕsojó ĕmĕ bax chanixĕna. Huĕstima ca año no tsi xo toa naa maí ca nohiria bo ó mi bĕsohaina. Mĕstĕ tsi xo mi copihaina ra. ¹¹ Jato nicahuĕ. Jerusalĕn qui jobĕna ca ĕa xo naa. Doce bari roha ca ĕ cahĕhitaquĕ arati xobo-xoboria tsi araxĕna. ¹² Quiahi quiha ĕ qui quĕsocanaibo pĕ. Toa arati xobo-xoboria, jato catiti xobo bo, yacatá ca iti huĕtsa bo, tihi cabo xo tsi nohiria bo ĕ tsamayamahitaquĕ joxo na. Pasiroha ĕ iquitaquĕ aracatsi na. ¹³ ¿Jĕniriauxo ĕa quiahuacahi ni sa? Mahitsa tsi xo toa ja yoacanaí ca tĕquĕ iquia. ¹⁴ Jabi ĕ yoacatsai ca tsi xo naa: Quinia paxá tsi noba naborĕquĕbo

Dios qui araquia ra. Mahitsa tsi xo naa arati quinia icani quiha pë, mahitsa ja nomari. Jasca, Moisés yamabá quënëna, Dios Chani yoanish cabá quënëna, tihí cabo chahahuaquia éa ri ra, jato jascaria. ¹⁵ Jasca, nohiria bo, naa shinajiaxëni cabo, yoixënia cabo, tihí cabo Díos bësotëquëmaxëhai ca ó pasokuia éa ri, jato jascaria. ¹⁶ Jasca, jia tsi Dios, nohiria bo, tihí cabo bësójó tsi Díos yoba nicacasquia éa ri, quësohacatimaxëni ixëna.

¹⁷ Jabi huëstima ca año no tsi Jerusalén è jisyamani quiha. Jobëna ca éa xo naa ra. Jabi Jerusalén qui è johitaquë ra ofrenda parata ya, naa noho paxnacanaí ca jimibo qui axëna. Jasca, toa xo tsi ofrenda bo è acas-hitaquë éa ri ra. ¹⁸ Jabi noba arati xobo xo tsi tocahëno tsi éa ja jiscahitaquë pë, naa Asia mai ax bëcanish ca jodiobo. Yama pacotsa ini quiha toá no. Yama ini quiha nohiria tirixëni, emë roha iquia. Jabi noba bahuëhacati jabi è jatihuahitaquë, éa ja jiscaquë no. ¹⁹ Jabi neri bëcaxëti xo toa Asia mai ax bëcanish ca jodiobo iquia ra. Mia bësójo ax tsi è qui ja quësocano iquia, è qui caxapihi na. ²⁰ Toa joni bo pi bëyamacano tsi nëa ca jodiobá mia parayamano. Jato yosibo, jato chama bo, tihí cabo bësójó tsi nii è iquitaquë. Ea ja nicariacahitaquë pë, è qui quësocasquí na. Jato nicahuë. “¿Jahuë ni toa ja yoyohaina?” itsihuë. Yama xo iquia ra. ²¹ Toa barí tsi noho joi roha è choshahitaquë rë, “Díos nohiria bo bësotëquëmaxëhai ó è pasohai iqui tsi è qui quësocasqui mato tonia” i jato qui è itaquë no. Jaro ha ca tsi xo toa è yoyohaina iquia ra —nëa tsi quiha Pablo nëcaniquë prefecto ca Félix qui.

²² Jatsi Pablo nicahax Félix bamaniquë. Bamaxo jato ja paquëmani quiha. Jabi chahahuacanaiba quinia cahëria ja ini quiha. Jatsi,

—Comandante Lisias jono tsi mia nicatëquëxëquia ra —i quiha Pablo qui ja niquë.

²³ Jatsi capitán qui chani Félix aniquë Pablo ó ja bësono. Jabi jënima Pablo ini quiha. Toá tsi co-coti mëtsa ja ini quiha. Jasca, ja qui shishoti mëtsa jahuë rabëti bo ini quiha mëbixëna.

²⁴ Jaquirëquë ichariama ca bari huinocaquë tsi quiha Félix bacaniquë jahuë ahui Drusila ya. Jabi jodio jahuë ahui ini quiha. Bacaxo tsi quiha Pablo ja quënaniquë Jesucristo qui ja chitimini ca nicacasquí na. ²⁵ Jia tsi quiha jato qui Pablo chaniniquë. Jatsi Dios mëstë, nohiria bá jato shina mëquihaina, joxëhai ca copi, tihí ca jahuë bo chanijano tsi quiha Félix raquëniquë. Raquëhi tsi,

—Iquë, iquë tia. Cata. Bari huëtza mia quënatëquëxëquia —i quiha Pablo qui ja niquë.

²⁶ Jasca, Pablo quima parata ó ja pasoniquë pë. Ja iqui tsi huëstima tsi quiha Pablo ja quënaniquë ja bëta chaninaxëna.

²⁷ Jatsi dos ca año huinocaquë tsi quiha Félix ratiniquë prefecto paxa cato, naa Porcio Festo. Jabi jodiobo ranihuacasquí tsi Pablo ja paquëmayamaniquë rë. Jatsi jari preso xara Pablo chitëniquë.

25

Festo bësójó tsi Pablo chaninina

¹ Jatsi quiha Festo cahëniquë toa maí ca nohiria bo yonaxëna. Prefecto paxa ca ja ini quiha. Tres bari quirëquë Cesarea ja jisbayaniquë Jerusalén qui shishoxëna. ² Toa ja no tsi quiha ja qui bëcaniquë jodioba arati ibo bo, jato chama bo. Pablo qui ja quësocascani quiha. ³ Cahëxo tsi quiha Festo ja bënariacaniquë jato ja mëbino, Pablo pasomaha. “Jahari Jerusalén qui Pablo

mi raano” i Festo qui jaca ni quiha, Pablo acatsi na, naa bahí tsi ja bacaxëquë no. ⁴ Jama, Festó quëbiniquë:

—Cesareá ca presó xo Pablo ra. Tsëquënoma. Jahari capaima xo ëa. ⁵ E bëta mato chama bo bocati xo. Anoma ca pi toa joni aarohano tsi toa ax tsi ja qui ma quësono iquia —nëa tsi quiha Festo nëcaniquë.

⁶ Ocho o diez ca bari roha tsi Jerusalén tsi Festo chitëniquë. Jaquirëquë quiha Cesarea qui jahari ja caniquë. Cahëhax huëaquë tsi quiha nohiria bo copiti ja chitahëhuaniquë. Jatsi quiha Pablo ja quënaniquë ja bësojó ja niino. ⁷ Jatsi Pablo jisiquiquë tsi quiha ja qui quëtsoniquë bëcanax ca jodiobo. Ja téamë tsi nii ja icani quiha ja qui quësoxëna. Huëstima ini quiha toa ja quiaacanaina ra. ⁸ Jatsi quiha chaniti Pablo chitahëhuaniquë:

—Yama tsi xo toa anoma ca ë anina ra. Jodioba yoba bo, noba arati xobo-xoboria, noba chama César, tihí cabo pasomaha ë ocahuapistia-yamarianiquë ra —i Festo qui Pablo niquë.

⁹ Jatsi quiha jodiobo Festó caxahuacasyama-niquë. Jato ja mëbicasni quiha. Ja tsi xo toa,

—¿Jerusalén qui cacatsai? Toa xo tsi mi qui quësocanaibo nicaxëquia mia copiquí na —i Pablo qui ja niquë.

¹⁰ Jatsi Pabló quëbiniquë:

—Anoma ra. Romanoba copiti ití tsi niiquia copihacati. Nëa roha xo tsi ëa mi nicaxëti xo iquia. Romanoba jabi quiha. Yama tsi xo toa jodiobo pasomaha ë yoyonina ra. Toa cahëriaqui mia. ¹¹ Anoma ca pi aarohahi tsi nati copi quima ë paxacasyamaquë aquë ra. Jama, mahitsa tsi xo naa ë qui naa jodiobo quësohaina iquia. Quiariacani quiha. ¿Jënahuariaxo naa joni bo qui ëa mi ana copihacati? Anoma quiha. Romanoba chama-chamaria jiscasquia. Ea ja copino iquia ra —nëa tsi quiha Festo qui Pablo nëcaniquë.

¹² Jatsi yosibo ya Festo chaninapariniquë Pablo nicahax na. Chaninahax,

—“Romanoba chama-chamaria jiscasquia” ¿i mi a pa? Jatsi ja qui mia raaxëquia mia ja copino ra —i quiha Pabló qui ja niquë.

Rey Agripa bësojó tsi Pablo niinina

¹³ Ichariama bari quirëquë rey Agripa, jahuë ahui Berenice, tihí cabo Cesarea qui cahëniquë Festo joihuaxëna. ¹⁴ Huëstima ca bari no shishopama tsi quiha preso xara Pablo ini ca ja nicacaniquë. Festó jato yoani quiha.

—Nëa tsi preso xara tsi xo huësti ca joni, naa Félix nanëni cato. ¹⁵ Jabi Jerusalén qui ë shishohi caquë tsi toá ca jodioba arati ibo bo, jato yosibo, tihí cabo ë qui bëcaniquë naa joni qui quësocatsi na. Ja namëcásjahuacani quiha pë. ¹⁶ Jatsi, “Romanoba jabi ma xo toa nohiria huëttsa bo qui nohiria mëahacahaina namëhacati ra. Jariapari ja qui xaba acacaxëti xo ja qui quësocanaibo bëbochiná tsi ja chaninano. Jasca, jato bësojo xo tsi jamë bax ja quëbipariti xo jaa ri” tihí tsi jato ë yoaniquë ra. ¹⁷ Jatsi jahari Cesarea qui ë bëta ja bëchitaquë. Jatsi huëaquë jato nicati ë chitahëhuahitaquë. E bamayamahitaquë pë. Jatsi Pablo ë qui ja bëchitaquë. ¹⁸ Jatsi ja qui quësoti ja chitahëhuacahitaquë ja bësojo xo na. Anoma ca naa joni ani ca nicati ó ë pasohitaquë, mahitsa ca jato chani nori. ¹⁹ Jato jodioba jabi tahëxo tsi quiha joi ja mëra-mëracahitaquë pë. Tsohuëcara ca, naa Jesu icanai ca yoati tsi quiha ja chaninacahitaquë pa. “Bëso xo” i Pablo ni quiha. ²⁰ Jishopë. Ati ë cahëyamahitaquë rë. Jatsi, “¿Jerusalén qui cacatsai? Toa xo tsi mia nicaxëquia” i Pablo qui ë itaquë. ²¹ Jatsi, “Romanoba chama-chamaria jiscasquia. Ea ja copino ra” i ë qui ja itaquë pë. Jatsi jahari preso qui toa

joni ë raahitaquë, noba chama-chamaria qui raaxëna —nëa tsi quiha Agripa qui Festo nëcaniquë.

²² Jatsi,

—Toa joni nicacasquia ëa ri —i quiha Festo qui rey Agripa niquë.

Jatsi,

—Huëaquë toa joni nicashariqui mia ra —i Agripa qui ja ni quiha.

²³ Jatsi huëaquë tsi quiha naquëte-naquëtëria qui Rey Agripa jiconiquë jahuë ahui Berenice ya. Anomaria ini quiha ja jicocanaina. Jato bëta jiconi quiha soldado ba chama bo, yacatá ca chama bo ri. Tihi cabo jicocani quiha Pablo nicaxëna. Jatsi ja jicocaquë tsi quiha Festó Pablo quënënicquë. ²⁴ Quënëhax tsi quiha,

—Tsayapa, rey Agripá. Nëá xo Pablo icanai cato ra. Tsayacahuë joni bá. Naa joni namëcascani quiha jodioba nohiria bo tëquë iquia. Acascani quiha Jerusalén ca jodiobo, naa nëá ca jodiobo ri. “Namëhacati xo” icani quiha pë. ²⁵ Jama, yama tsi xo toa naa joní yoi ca acana iquia. Jia tsi ja qui ë nicahitaquë ra; yamaha quiha. Jatsi, “Romanoba chama-chamaria qui mia raaxëquia, mia ja copino ra” i ja qui ë itaquë pë, “Romanoba chamá ëa copino ra” i ja itaha iqui na. ²⁶ Jatsi jaboqui noba chama-chamaria qui carta ë quënëti xo pë, yoi ca ja aca ca yoahi na. ¿Jënahuarixaxo raca toa carta ë quënëna? Ja tsi xo toa mi qui naa joni bëcasquia mi nicano mia ri, rey Agripá. Naa joni pi mi nicano tsi tonia tobixëhi quiha jahuëcara ca ë quënëxëti cato ra. ²⁷ Jishop. Naa joni raacasyama xo ëa ra, ja qui quësoxoma —nëa tsi quiha rey Agripa qui Festo nëcaniquë.

26

Rey Agripa bësoj tsi Pablo chaninina

¹ Jatsi quiha,

—Mi chani nicacasquia, Pabló. Mimë bax chanihuë —i Pablo qui rey Agripa niquë. Jatsi chaniti Pablo chitahëhuaniquë, jahuë mëquë bo tëroxo na.

² —Shoma xo ëa, rey Agripá, ë qui jodiobo quësocani ca quëbixëna. Anomaria tsi xo toa ë qui ja quësocanaina rë. ³ Jasca jia tsi xo toa ëa mi nicahaina ra, jodioba jabi bo, jato yoba bo, tihi cabo cahëxëni ca mi nori iqui na. Jatsi jia tsi mi nicano. Mi yosanayamano.

Pablo jabi inina chahahuanox pari

⁴ ‘Ea cahëyoicani quiha jodiobo tëquë. Noho maí tsi ë shinahaniquë. Jasca, Jerusalén tsi ë racapaoniquë. Tihi ca tsi cahëcani quiha. ⁵ Naama, naa siri tsi ëa cahëcani quiha ra. Jariapari noba arati jabi banahuahai ca fariseobo ë i-ipaoniquë; naa jodioba jabí-naxëni ca iquiina. Jodioba jabi noixëneria cabo tsi xo toa maxo ra. ⁶ Jama, jaboqui ë qui quësocascani quiha toa jasca ca maxo pë, “Bësotëquëxëqui nohiria” i ë ai iqui na. Jabi noba naborëquëbo qui Diós tocani quiha ra. ⁷ Jariapari tsi noba doce ca nohiria maxo bá nicani quiha. Jasca, barihani, baquichá, tihi cató tsi arapama tsi quiha bësotëquëxëti ó pasoqui noa, noqui ri ra. Jama, toa ó tsi ë pasohai iqui tsi ë qui quësocani quiha no jimibo rë. Toca xo, taita Agripá. ⁸ ¿Jënahuariahax, “Nohiria bësotëquëmamaxëhi quiha Dios” i jaca na? ¿Jënahuariahax yoi ca toa ina?

Chahahuacanaibo Pabló tënëmanina

⁹ ‘Jabi siri tsi ë qui jia ini quiha Nazarét ca Jesu qui chitimicanaibo ë yosihaina. ¹⁰ Toatiji tsi ë yoyopaoni quiha Jerusalén ax na. Toa xo tsi preso qui huëstima ca chahahuacanaibo ë nanënicquë rë. Tocati arati ibobá ëa raani quiha. Jasca, “Namëhacacati xo” i jaca quë tsi quiha ë rani-ranipaoniquë pë,

“Acahuë” iquiina. ¹¹ Toatiyá tsi quiha ë co-copaoniquë, noba catiti xobó ca chahahuacanaibo mërahi na. Jato ë copicasni quiha. Jasca, Jesucristo quima jato ë casomacasniquë pë. Caxaxëñiria ë i-ipaoni quiha toatiyá no. Caxahax carayanaba mai qui jato ë chibaniquë jato achacasquí na.

Pabló chahahuanina

¹² Toatiyá tsi quiha Damasco quiri co-cohi ë iniquë, jato mëracatsi na. Noba arati ibobá ëa raani quiha jato biti, soldado bo ya. Comisión jahëhua ja ini quiha. ¹³ Jabi Damasco quinia ca bahí tsi co-copama tsi naipá ca huëa-huëaria, naa bari oquë ca ë jisniquë, Agripá. Matoroco bari ja ini quiha. Ea, noho rabëti bo, tihi cabo tëamë tsi quiha ja huahuaniquë ra. ¹⁴ Jatsi mai qui no paquëyoniquë. Paquëxo tsi ë qui chanilai ca joi ë nicaniquë. Noba joi tsi chanijani quiha. “Sauló, Sauló, ¿Jëñixo tsi ëa tënëmahai rë? Quiniahuë. Mi tëquëmitsa, buéy jamë tahë onëhai jasca cato” i ë qui joi ni quiha. ¹⁵ Jatsi ë nicaniquë. “¿Tsohuë ni mia, Ibobá?” Jatsi, Ibobá quëbini quiha: “Jesu xo ëa ra. Ea tënëmaqui mia ra. ¹⁶ Joihuë. Niihuë. Mi qui ë jisiquë, noho yonati mia manëmacatsi na. Jasca, jaboqui mi jisi ca jahuë bo nohiria bo mi yoaxëno. Jasca, noho Chani nohiria bo mi yoano, naa mia ë jismaxëhai cato. ¹⁷ Jasca, mi jimibo, carayanabo, tihi cabo qui mia raaxëquia noho chani mi yoano. Mia pi ja yosicano tsi mia mëbixëquia. ¹⁸ Bëco ca xo rë. Jato mi bëpëquëmano ra. Jia tsi tsëmo quima huëa quiri jato mi bësomano. Satanás quima Dios quiri ja bësocano ra. Tocapimino tsi ë qui chitimicaxëcani quiha. Jatsi masahacaxëhi quiha jato jocha ra. Diós mëstëhuani ca maxo qui riicaxëcani quiha jato ri” nëa tsi ë qui Ibo nëcani quiha.

Jesu chani Pabló nicanina

¹⁹ Jabi toca tsi naipá ca Ibo chaniquë tsi “Jo” i ja qui ë niquë. Ja iqui tsi jodiobo, carayanabo, tihi cabo qui ë caniquë jahuë Chani yoahi na, rey Agripá. ²⁰ Jariapari tsi Damasco ó cabo qui Cristo Chani ë yoaniquë. Jaquirëquë Jerusalén cabo, Judea maí cabo, carayanabo, tihi cabo qui Cristo Chani ë yoaniquë. “Mato jocha quima Dios quiri bësocana. Jabi jia ca jayacana, ma chahahuaha ca nohiria bá cahëno ra” i jato qui ë niquë chanihi na. ²¹ Ja quëshpi tsi ë qui jodiobo tsaminiquë pë arati xobo ax na. Ea ja acasani quiha. ²² Jama, toa barí tsi Diós ëa mëbiniquë ra. Ea mëbi-mëbiriahi quiha. Ja tsi xo toa xaba jaya xo ëa iquia, rey bo, chama bo, empleado bo, tihi cabo qui jahuë Chani yoati. Jabi Moisés yamabo, Dios Chani yoanish cabo, tihi cabá quënëni ca roha ca yoaquia ra. ²³ “Rësoxëti xo noba Xabahamati Ibo” i jaca ni quiha, siri. Jasca, “Rësohax jariapari ca bësotëquëxëhai ca ja ixëti xo. Bësoxo tsi jodiobo, carayanabo, tihi cabo qui xabahamati huëa ja yoaxëti xo” i jaca ni quiha. Jabi toa ja yoacani ca chani yoaquia ëa ri ra” —nëa tsi Agripa qui Pablo nëcaniquë.

Cristo qui Agripa Pabló mëpicasnina

²⁴ Toca tsi jamë bax chanijano tsi quiha.
—Iquë. Iquë. Yoyoxëni xo mia, Pabló. Mia yoyohuaqui mi tiisi pë —i Pablo qui Festo niquë joi pistiamá no.

²⁵ Jatsi Pabló quëbiniquë:

—Yoyoyamahai ca ëa xo naa ra, taita Festó. Mia parayamaquia. Jabija tsi xo naa ë yoahana ra. ²⁶ Jasca, ë yoaha ca cahëhi quiha rey Agripa ri. ¿Jabija ma ni, rey Agripá? Naa jahuë bo tëquë cahëriaqui mia ra. Bëro tsi nohiria bësójó tsi tocani quiha naa jatiroha cabo. ²⁷ Japa mia ti, rey Agripá. ¿Dios

Chani chahahuahai mia ri? Tonia chahahuaqui mia iquia —nëa tsi Pablo nëcaniquë.

²⁸ Jatsi,

—Huënyamaxëhuë. ¿Tana roha mishni tsi chahahuahai ca ëa manëmacatsai pa? —i Pablo qui Agripa niquë.

²⁹ Jatsi,

—Jaahuë. Jaboqui, huëaquë ma ni. Jatiroha ca noho joi nicacanaibo ëa jascano iquia ra. Nëxati cadena bo roha ja jayamacano —nëa tsi Agripa qui Pablo nëcaniquë.

³⁰ Nicañax tsi quiha rey Agripa niiniquë. Jatsi ja bëta niini quiha prefecto, jahuë ahui Berenice, jato bëta tsaho cabo. ³¹ Naquëtë huajahax tsi quiha prefecto ya ja chaninaniquë. Jatsi,

—Nayamaxëti xo naa joni ra. Yama tsi xo toa yoi ca ja anina. Jasca, ja paquëmahacaxëti xo ra —i jaca ni quiha chaninahi na.

³² Jatsi,

—Jishopë. Romanoba chama-chamaria pi Pabló jiscasyamarohano tsi jaboqui bëro tsi ja iquë aquë ja paquëmahacahaina rë —i Festo qui quiha Agripa niquë.

27

¹ Jatsi quiha Italia mai qui chama Festo, Agripa, tihi cabá Pablo raacasniquë. Jatsi Pablo, achiquinish ca huëtza bo, tihi cabo ja mëacaniquë capitán Julio qui. Carayanaba soldado-soldadoria ca maxo obëso ca quiha. ² Jatsi Adramitrio ax johitahax ca barco qui no tëmahinaniquë Italia mai qui caxëna. Asia mai ó ca rërëti bo quiri capaima noba barco ini quiha. Jasca, no bëta ini quiha Aristarco, naa Tesalónica ax jonish ca carayana ri. ³ Riquibaya tsi quiha huëaquë Sidón yaca qui no rërëniquë. Jabi shinajiaxëni toa capitán Julio ini quiha. Ja qui jënima ini quiha toá ca rabëti bo qui Pablo shishohaina, orihuahacati. ⁴ Jatsi quiha Sidón no jisbayaniquë. Jisbaya tsi quiha Chipre tësëbë xotoyamahai ca jo no caniquë. Barco bëchá yoshi ini quiha rë. ⁵ Tarabihax jisbaya tsi quiha Cilicia, Panfilia, tihi ca mai no huinoniquë. Huinobaya tsi quiha Mira yaca qui no rërëniquë. Licia maí ca yaca ja ini quiha.

⁶ Toa xo tsi quiha barco huëtza capitán biniquë, naa Alejandria mai ax johax cato. Italia mai qui capaima ja ini quiha. Jatsi toa barco qui noqui ja jicomaniquë. ⁷ Jisbaya tsi quiha huëstima bari no tsi rëquë no capëniiniquë. Bëroma tsi quiha Gnidó bësojo qui no cahëniquë. Yoshi iqui tsi rërënoma no ini quiha. Anoma yoshi ini quiha, noqui bëchá. Jaha tsi quiha Creta tësëbë xotoyamahai ca jo no caniquë. Oquëri Salmón no huinoni quiha. ⁸ Quëniabaya tsi quiha bëroma tsi Rërëti Jia bo qui no rërëniquë, naa Lasea yaca tahë no.

⁹ Huëstima ca bari bo no tsi quiha no bamaniquë rë. No capëniini quiha. Yota iqui tsi anoma ini quiha no rëquë cahaina. Ja iqui tsi jato Pabló yobaniquë.

¹⁰ —Jisa, joni bá. Anoma tsi xo rëquë cahaina. Caapiquí tsi cargo huëstima ca bënoxëqui mato tia. Yoshihuahacaxëhi quiha mato barco ri. Jasca, no nëachimitsa noqui tëquë iquia —nëa tsi Pablo nëcaniquë.

¹¹ Jama, Pablo yoba soldado ba capitán nicacasyamaniquë. Ja qui oquë ini quiha toa barco capitán, barco ibo, tihi cabá yonina. ¹² Jasca, yoi toa rërëti ini quiha chitëti, matsityá no. Ja iqui tsi rëquë cacasniquë huëstima cabo.

—¿Canoma ni? Fenicia qui cahëxëqui noa tia —i jaca ni quiha.

Jabi yoshi xotoyamahai ca jo toa rërëti ini quiha, naa Creta tësëbë ó no.

Ianě ca yota-yotaria

¹³ Jatsi mishni mishni tsi quiha xototsi yoshi niqüë. Jënima cati quëscahuacuq tsi quiha barco ancla bo ja xërëcaniquë barco xara janaxëna. Acax tsi quiha Creta ja quënibonacanicuë. ¹⁴ Ori pistia roha no cano tsi quiha xoto-xotoriatsi yoshi niqüë rë. Yota-yotaria ja ini quiha, naa tësëbë ax noqui quiri. ¹⁵ Jatsi achiquinicuë noba barco rë. Jahari tësëbë qui canoma no iniquë rë, yoshi bëcha no ini iqui na. Ja iqui tsi no jënënicuë tësëbë qui cahëti. Rëquë canoma no ini quiha. Jatsi basi noqui yoshini raanicuë rë. ¹⁶ Capama tsi tësëbë pistia, naa Claudia icanai ca casojó tsi no huinoncuë. Toa jo tsi quiha iriama yoshi xotohai iniquë. Jatsi tëtiaipama tsi barco chò ca xërëhacahai ca noti pistia no jicomanicuë. Bëronoma ini quiha no jicomahaina ra. ¹⁷ Jicomaxo tsi quiha barco nonamá tsi rispi no raanicuë, jahuë yora nëxaxëna, ja choshiyamano iquish na. Jatsi no raquë-raquënicuë jënë namá ca mixai-mixairia qui, naa Africa mai tahë ca mixai. No toohacasyamani quiha. Ja iqui tsi yoshini matiti raitiria no botëmaniquë, mëri no cayamano. Toca tsi ianë tsi noba barco raahacani quiha rë. ¹⁸ Noqui choca-chocaria nianiquë. Raquëria ja ini quiha. Choshi-paimaria noba barco ini quiha. Ja iqui tsi huëaquë tsi baquishmari tsi barcò ca carga ia qui no nianiquë huëjehuaxëna. ¹⁹ Jari jasca pi ja ini quiha. Ja iqui tsi huëaquë barco jahuë mishni bo no nianiquë. ²⁰ Jasca, huëstima ca bari no tsi bari, huishti bo, tih cabo no jisyamani quiha. Tsëmoria tëquë ja ini quiha. Jasca, janacayamani quiha yoshi xoto-xotoriahaina rë. Ja iqui tsi bësoti ó no pasoyamaniquë.

²¹ Jasca, huëstima ca bari no tsi no piyamaniquë. Toatiyá tsi joni bo bësójó tsi Pablo niiniquë chanixëna.

—Noho yoba ma nicayamahitaquë pë. Oquë ja iitaha quiha rë Creta no jisbayayamahaina iquia. No jisbayayamarohapino tsi naa carga, barco, tih cabo yoshihuahacayamaquë aquë rë. ²² Jama, raquëyamacana. Chamacahuë iquia ra. Rësoyamaxëqui mato ra. Jëtëquëxëhi quiha barco roha. ²³ Baquichá tsi è qui jisiquicüë ángel ra, naa Diós raaha ca ángel. Jabi naa Dios tsi xo noho Ibo ra. Ja tsi xo toa ja bax è yonocohaina. ²⁴ E qui naa ángel chanicuë ra. Chanihax, “Raquëyamahuë, Pabló. Carayana ca chama-chamaria bësójó tsi mi niixëti xo. Jasca, mia iqui tsi rësoyamaxëhi quiha mi bëta barcò ca joni bo ri. Jato shomahuaxëhi quiha Dios” i è qui ángel quë ra. ²⁵ Ja iqui tsi chamacana, joni bá. Parayamahí quiha Dios ra. Tocapixëhi quiha ra, ja yoaha jascaria. ²⁶ Jama, tësëbë qui noqui niaxëhi quiha yoshini ra —nëa tsi jato qui Pablo nëcaniquë.

²⁷ Dos semana no tsi toca tsi no raahacanicuë rë toa Adria icanai ca ianë no. Baquichá tsi “Basima xo mai tonia” i marinero bo niqüë. ²⁸ Jatsi medida jënë qui ja raanicuë. Treinta y seis ca metros ja ini quiha. Jaquirëquë ori pistia caxo ja tanamatëquëcaniquë. Veintisiete ca metros ja ini quiha. ²⁹ Jatsi raquëtsijacanicuë mai maxax qui yoshini noqui niamitsa iqui na. Jatsi cuatro ca mai achati ancla bo ia qui ja niacanicuë barco chipo jo xo na. Jaquirëquë baquishmari no mana-mananicuë raquëqui na. ³⁰ Toatiyá tsi quiha huësti huësti ca marinero bo barco quima paxacasnicuë pë. Noti pistia jënë qui botëmapama tsi barco rësó ca ancla huëtsa bo niahi ja bocani quiha noqui parahi na. ³¹ Jatsi soldado ba capitán qui Pablo chaniniquë:

—Barcò tsi toa joni bo pi chitëyamano tsi xabahamahacatimaxëni ixëqui mato ra —iquina.

³² Jatsi soldado bá noti rispichi quëësaniquë. Caquë noti pistia. Paxanoma ja icani quiha.

³³ Jatsi huëaticano tsi quiha joni bo Pabló pimacasniquë.

—Dos ca semana no tsi oxayamaqui mato. Jasca, piyamaqui mato. ³⁴ Jatsi piparicana iquia. Ma chamanaxëti xo ra. Jasca, yama tsi xo toa rësoxëhaina iquia. Jënimaxëqui mato tëquë ra —nëa tsi quiha joni bo qui Pablo niquë.

³⁵ Chanixo tsi quiha Pabló mapari biniquë. Jatsi jatiroha cabo bësojé tsi Dios qui “Gracias” i ja niquë piti quëshpi na. Jatsi xatënaxo tsi ja piniquë. ³⁶ Jatsi chamananiquë joni bo Pabló acai ca tsayahax na. Ja picaniquë jato ri. ³⁷ Jabi doscientos setenta y seis ca nohiria ini quiha toa barcó no ra. Huëstima no ini quiha. ³⁸ Pixo tsi quiha barcó ca jahuë bo ia qui niatsijahuaca-niquë huëjëhuaxëna. Harina trigo bëro ja niacani quiha.

Barco choshinina

³⁹ Huëaquë tsi quiha toa mai marinero bá cahëyamaniquë. Tsaya-tsayapama tsi nabiri ca quëmapo jia ca ja jiscaniquë. Toá tsi quiha barco ja rërëhacascani quiha. ⁴⁰ Jatsi ancla bo ja quëësacanicuë. Quëësaxo tsi quiha chiyëti ja mëriscaniquë. Mërismo tsi quiha rëquë ca matiti raiti ja tërocaniquë, quëmapo quiri yoshini barco matino iquish na. ⁴¹ Jatsi quëmapo quiri capama tsi quiha mixai ja rëtsois-hanicuë rë. Mai ja jëtani quiha. Tsëquënoma barco ini quiha. Jatsi quiha barco chipo ó ca chocá chosha-choshanicuë. ⁴² Jatsi soldado bá achiquinish cabo tëquë acanicuë ja paxayamacano iquish na. ⁴³ Jama, soldado ba capitán jato jënëmaniquë Pablo ja xabahamacasni igui na. Jatsi jatiroha ca pocati cahëxëni cabo Pabló yobanicuë jënë qui pari biisiti, quëmapo qui cahëti. ⁴⁴ Jaquirëquë banahuani quiha tëxë bo. Jihui para bo, quësi mishni bo, tihi cabá tsi mai qui ja nonocani quiha. Toca tsi mai qui no cahënicuë ra. Jënima no iniquë.

28

Malta icanai cató tsi Pablo inina

¹ Jënima tsi quëmapo qui cahëxo tsi quiha Malta toa tësëbë quënahacani ca no cahënicuë. ² Jia tsi quiha toá ca nohiria bá noqui shomahuanicuë. No bax chihi ja mapocani quiha, oi, matsi, tihi cabo igui na. Jia tsi noqui ja joihuacani quiha. ³ Jatsi Pabló caro mishni bo topiniquë chihi qui niaxëna. Niajahuano tsi quiha rono huajaniquë jahuë huao igui na. Pablo mëquë qui ja tsaminiquë rë. ⁴ Jatsi Pablo mëquë ronó acha ca toá ca nohiria bá jisnicuë. Jisi tsi quiha,

—Tonia ati ibo-iboria tsi xo toa joni ra. Jënë ax ja paxaquë pa. Jama, jaboqui naqui tia, ja copihacaha quëshpi na —i jaca niquë.

⁵ Jatsi Pabló jahuë mëquë huishqui-huishquihaniquë rono chihi qui paquëmaxëna. Jënëjahuaquë tsi quiha jënima Pablo iniquë ra. ⁶ Baiyamaniquë jahuë mëquënë. Ja rësoyamaniquë. Jama, tocati ó toa nohiria bo pasoni quiha. Ja rësoyamaquë tsi quiha shina huëtsa nohiria bá biniquë. Shinahax,

—Tonia dios tsi xo toa joni ra —itsi jaca niquë.

⁷ Jabi no rërëni ca basima tsi quiha toa tësëbë ca chama racani quiha, naa Publio icanai cato. Noqui joi ja amaniquë jahuë xobó tsi no chitëno. Tres ca bari no tsi noqui ja orihuani quiha. ⁸ Jabi oxatí tsi Publio jahëpa iniquë, iquihi na. Jasca, chixojani quiha. Jatsi jahuë jahëpa Pablo jisi caniquë. Cahax jahá tsi jahuë mëquë janahax tsi quiha ja bax ja bëhoxnicuë. Jahuë jahëpa ja jënimahuanicuë. ⁹ Ocapijaquë tsi quiha tësëbë ca iquicanaibo, isicanaibo, tihi cabo bëcaniquë jato ri. Ja jënimahuahacacani quiha. ¹⁰ Jatsi noqui jahuëmishni bo ja acanicuë noqui shomahuacasquí na. Jasca, noqui piti ja acanicuë, barco qui no jiconiquë no. No pibonahai ca noqui ja acani quiha.

Roma yaca qui Pablo canina

¹¹ Tres oxë quirëquë barcó tsi, naa matsitiyá tsi toá ca chitënish ca barcó tsi no jisbayaniquë. Alejandriá ca barco quiha. Jahuë rëpatí tsi quiha Castor, Pólux, tihi ca icanai ca dios jaria ca jisti bo ja jayani quiha. ¹² Jisbaya tsi quiha Siracusa qui no rërëniquë. Toá tsi tres ca bari no chitëni quiha. ¹³ Riquibaya tsi no quënicaniquë Regio icanai ca qui. Toá tsi no rërëniquë. Huëaquë tsi quiha yota pista iniquë. Jisbaya tsi dos bari tsi quiha Puteoli yaca qui no cahëniquë. ¹⁴ Toá ca xatë bo no bëchaniquë. Noqui joi ja amacaniquë jato bëta no chitëno. Huësti ca semana raahax no catëquëniquë Roma qui. ¹⁵ Jatsi no johai ca yoati tsi Romá ca xatë bá nicani quiha. Nicahax tsi quiha Foro de Apio, naa Tres Tabernas icanai ca qui ja bocani quiha, toa xó tsi noqui manaxëna. Jato bëchahax tsi “Gracias” i Dios qui Pablo niquë ranihi na. Jaha tsi ja chamaniquë. ¹⁶ Jatsi Roma qui no cahëquë tsi quiha preso obëso ca qui capitán achiquinish cabo mëaniquë. Jama, ja qui jia ini quiha toa jahuë iti yoi ó tsi Pablo chitëhaina jamë no. Jatsi huësti ca soldado capitán jananiquë Pablo ó bësoti.

Roma xo tsi Dios Chani Pabló yoanina

¹⁷ Tres ca bari quirëquë jodioba rëquënicanaibo Pabló quënaniquë, jato bëta tsi chaninaxëna. Ja bëcaquë tsi quiha Pablo nëcaniquë:

—Jisa, ëbë xatë bá. Jerusalén ca ëa ja achacaniquë, mahitsa. Jaquirëquë quiha Romanobo qui ë mëahacaniquë pë, ëa ja copicano. Nicacahuë. Yama tsi xo toa noba jimibo, noba naborëquëba jabi bo, tihi cabo pasomaha ë anina iquia. ¹⁸ Jia tsi quiha toa Romanobá ëa nica-nicaniquë. Nicaxo tsi quiha ëa ja paquëmacascaniquë. Yama ini quiha toa yoi ca ë anina iquia, naa namëti copi quëshpi na. ¹⁹ Jaha, ë qui caxaniquë toá ca jodiobo. Jato qui yoi ini quiha toa ëa ja paquëmacanaina. Ja iqui tsi “Romanoba Chama-chamariá ëa copino ra” i toá ca chama bo qui ë niquë. Jishopë, noho jimibo qui quësocasyamahai ca ëa xo naa ra. ²⁰ Ja tsi xo toa mato ë quënaquë mato bëta chaninaxëna. Noqui Israél cabá jaha pasohai ca iqui tsi naa cadená tsi nëxë xo ëa rë —nëa tsi yosibo qui Pablo nëcaniquë.

²¹ Jatsi ja quëbicaniquë:

—Jodio maí ca carta biyamaqui noa mia yoati na. Jasca, toa nahax ca bëcanish ca xatë bo tsi xo toa chani yama mia yoati na. Yama tsi xo toa mia pasomaha ca chani nëá no. ²² Mi shina nicacasqui noa ra. Naa maxo paxa ca pasomaha chanicani quiha nohiria tëquë iqui noa, jatircha ca iti ó no —nëa tsi Pablo qui ja nëcapaniquë.

²³ Jatsi huëstí bari ja iticaniquë Pablo ya chaninatëquëxëna. Toa bari tsi quiha misco ini quiha toa Pablo xobo qui bëcanish cabo. Baquishmarí tsi chitahëhax Pablo chanibahinaniquë. Chanixo tsi quiha Diós nohiria otocatsai ca ja bërohuaniquë. Jasca, Quëñëhacanish cabá tsi Xabahamati Ibo Jesu ini ca ja jismani quiha. Naama tsi quiha ja chaniniquë, naa jatiroha ca bari. ²⁴ Jatsi huësti huësti cabo qui jia Pabló yoani ca ini quiha; tëxë bo qui yoi quiha. ²⁵ Jaha tsi mapëxñani quiha toá ca jodiobo, Pabló yoani ca nicahax na. Ja bocanox pari no tsi Pablo nëcaniquë:

—Anomaria tsi xo toa Espiritu Santó yoanina iquia, naa Isaías yamá quëñëni cató tsi ja chaniniquë no. Ja nëcani quiha:

²⁶ “Naa nohiria bo qui chanihi cata.

Chanihax,

‘Cahëxoma tsi Dios Chani nicaqui mato pë.

Jisxoma tsi tsaya-tsayaqui mato pë’ ihuë.

²⁷ Quēstoria tsi xo naa nohiria ba shinana iquia. Nicacasyamahi quiha jato pahoqui. Bētsiniquicani quiha jabija ca ja jiscamitsa iqui na. Jabija ca nicacasyama ca xo. Quiniacani quiha pē, jato shinaná cahēyamano. Tocacani quiha ra, Dios quiri bēsocasyamahi na. Bēsopijacano tsi jato ē jēnimahuaquē aniquē iquia”

i Espiritu Santo ni quiha. ²⁸ Jaha tsi ma cahēyoino ra. Jaboqui rohari tsi carayanabo qui raahacahi quiha Dios xabahamati Chani iquia. Toa Chani nicacaxēcani quiha iquia —nēa tsi jato qui Pablo nēcāniquē.

²⁹ Tihi ca tsi Pablo yoaquē tsi quiha ja jisbayacāniquē. Jisbaya tsi ja chaninabēquicāniquē jahuē chani yoati na.

³⁰ Jaquirēquē dos ca xēni no tsi Roma yacatá tsi Pablo chitēniquē, jahuē xobó no. Xobo alquilada quiha. Toa xo tsi jatiroha ca ja qui shishocanaibo ja joihuaniquē. ³¹ Toa xo tsi Diós nohiria bo otohaina, Ibo Jesucristo, tihi cabo ja tiisimaniquē raquēxoma. Yama ini quiha toa jahuē chani jēnēmahai cató.

La Carta Del Apostol San Pablo a Los Romanos

Romá ca iglesia qui Pabló quënëhina

¹ Pablo, naa Jesucristo yonati tsi xo naa carta quënëhai cato. Jabi ë quënëhacaniquë, Dios Chani chitahëhuati ibo iti. Diós ëa biniquë jahuë Chani jia ca nohiria yoati.

² Jabi siri tsi “Noho Baquë mai qui raaxëquia” i Dios ni quiha. Jabi Dios tocani quiha Quënëhacanih cabo ó no. ³ Jatsi maí tsi jahuë Baquë Jesu coniquë ra. Cohi tsi chama David yamaba चाहितखोकोबो ja iniquë.

⁴ Jascaria, Dios Baquë ja iniquë jaa ri. Dios mëstëxëni ca jabi yoi ja jayani quiha. Jabi Dios Baquë chamaxëni ca ja iqui ca jismahacani quiha, rësonish cabo quima ja tërohacani cató no. Jabi noba Ibo tsi xo naa Jesucristo ra.

⁵ Noqui ja noiniquë. Noixo tsi quiha jahuë Chani chitahëhuati ibo bo noqui ja manëmaniquë. Jatsi jatiroha ca maí ca nohiria, naa carayanabo qui noqui ja raaniquë, jahuë Chani yoati. Ja chahahuacano jato ri. Chahahuaxo tsi jahuë yoba nicacaxëceni quiha jato ri. ⁶ Jabi mato Romá cabo quënëhacaniquë mato ri, Jesucristó-na bo iti.

⁷ Japi mato qui, naa Roma yacatá cabo qui naa carta raaquia ra. Mato noihi quiha Dios. Noixo tsi mato ja quënëhacaniquë jahuë nohiria iti. Noba Jahëpa Dios, noba Ibo Jesucristo, tihi cabá mato noino. Mato ja bëpasimacano ra.

Romá ca chahahuacanaibo Pabló jiscasnina

⁸ Jariapari tsi mato quëshpi tsi noho Dios qui “Gracias” iquia ra, ma chahahuani ca jatiroha ca maí ca nohiria bá nicani quëshpi na. ⁹ Jabi mato bax ë bëhoxrohahai ca cahëhi quiha Dios ra. Jabi naa Dios bax yonocoriaquia noho coshi tëquëtá no, jahuë Baquë Chani yoahi na. ¹⁰ Bëhoxquí tsi Dios nicanicarohaquia, mato qui shishoti xaba ë qui ja ano ra. ¹¹ Mato jiscasquia ra, mato mëbixëna. E qui Diós ani ca tiisi mato bëta xatënacasquia. Jasca, mato chamahuacasquia. Jabi jaha ë quëëhai ca tsi xo toa ra. ¹² No mëbinabëquiti xo. Jabi aranabëquipinono tsi chamahuaha-caxëquia ra. Jascaria, chamahuahacaxëqui mato ri. Toca tsi shomahuahacaxëqui noa, noqui tëquëta.

¹³ Jabi huëstima tsi xo mato qui ë cacasnina ra, ëbë xatë bá. Canoma ë iniquë rë, yaca huëtisa bo qui ë raahacani iqui na. Jabi mato yaca Roma xo tsi Cristo qui nohiria ë bëbocasniquë, carayanaba yaca huëtisa bo xo ë ani jascaria. ¹⁴ Jabi carayanabo, nohiria huëtisa bo, tihi cabo ë mëbixëti xo. Escuela tiisi jaya cabo, escuela tiisi jayama cabo, tihi cabo ri ë mëbixëti quiha. ¹⁵ Japi, mato Romá ca nohiria qui Cristo Chani jia ca yoacasquia ra.

Chama jaya xo Cristo Chani jia cato

¹⁶ Jabi Cristo Chani qui rabiyaquia yoaxëna. Dios chama jaya xo ra, chahahuacanaibo tëquë xabahamati. Jariapari tsi quiha naa Chaní tsi jodiobo xabahamahacaniquë ra. Jaboqui tsi xabahamahacahi quiha carayanabo ri jahá no. ¹⁷ Mëstëhuahacati quinia noqui yoahi quiha naa chani ra, naa “Jahuë Cristo qui no chitimixëti xo” iquiina. Jaroha ca xabahamati quinia tsi xo naa no chahahuahai cató no, naa Quënëhacanih cabá yoahai jascaria. Jabi “Bëso-bëso paoxëhi quiha chahahuahai cato” ii quiha.

¹⁸ Jabi jochahuaxëni cabo, yoi ca acanaibo, tihi cabo qui caxa xo naipá ca Dios ra. Ja qui anoma xo ja yoyocanaina. Ja yoyocanai cató tsi Dios Chani yoi ca quëtiacani quiha pë, jabija ca Chani nohiria bá cahëyamano iquish na. ¹⁹ Jatsi jato qui caxa xo Dios, jato qui bëroria tsi Dios cahëti quinia ini quëshpi na. Jabi Dios tiisi jaya ca xo nohiria bo tëquë, jato shina qui naa tiisi nanëhacani iqui na. ²⁰ Siri tsi, naa noba mai nëhohuahacaniya rohari tsi jato qui bëroria Dios ini quiha, naa Dios jisnoma ca jabi. Ja nëhohuani cató tsi jahuë oquë-oquëpaohai ca chama, jahuë mana ca jabi, tihi cabo jato qui bëroria ini quiha ra. Jatsi çjënahuariahax raca “Dios cahëti mëtsama xo noa rë” i jaca na? ²¹ Dios ja iqui ca ja chahahuayamacaniquë rë, ja cahëcaquë ri. Ja qui “Gracias” iyama jaca niquë rë. Jama, mahitsa ca jahuë bo quiri jato shina bësוניquë rë. Jatsi jato shina bo tsëmohuahacaniquë. ²² “Tiisi xo noa ra” i jaca ni quiha, cahëtimaxëniria cabo jaca nori. ²³ Jatsi noba rësotimaxëni ca Dios oquë ja niacaniquë pë, jato arati jahuë huëtsa bo qui araxëna. Mahitsa ja icani quiha. Japi rësohai ca joni jaria bo qui aratsijacanicuë rë. Isa bo, yohina bo, chaxpa bo, rono bo, tihi ca jaria bo qui aratsijacani quiha rë.

²⁴ Japi Diós jato niabërianicuë, jato shina jaha quëëhai ca jahuë bo ja acano. Jatsi Diós jato nianiquë yoixëni ca jocha ja acano, jato yora bo ja yoshihuacano. ²⁵ Dios jabija ca jabi ja rarinamacanicuë pë, mahitsa ca jahuë bo quëshpi na. Diós nëhohuani ca jahuë bo, naa isa bo, jihui bo, rono bo, tihi cabo qui aratsijacanicuë pë. Dios, naa noqui Nëhohuanish ca qui arayamatsi quiha jacanicuë ra. Jama, noqui Nëhohuanish ca Dios roha no oquë-oquëhuapaoxëti xo ra.

²⁶ Jabi ja tsi xo toa Diós jato niabërianicuë, jaha ja quëëcanai ca jahuë yoixëni cabo tëquë ja acano. Jatsi quiha ja yoyocanicuë. Jato noma jabi jia ca yoxa bá nianiquë pë, yoxa huëtsa bo ya jobonaxëna. ²⁷ Tocanicuë joni bo ri. Jato noma jabi jia ca ja niacanicuë jato ri, jato huëtsa ya jobonaxëna. Bërabixëni ca jahuë bo ja i-ibëquinacani quiha pë. Toca tsi jato yora bo yoshihuacani quiha ra, ja acanai ca jocha iqui na. Jato copi tsi xo toa ra.

²⁸ Jasca, Dios ja cahëcasyamacanicuë pë. Japi Diós jato niabërianicuë, yoixëni ca shina ja jayacano, anoma ca jahuë bo ati. ²⁹ Jatsi jatiroha ca anoma ca jahuë bo, jocha bo, tihi cabo ja ariacascanicuë. Anini quiha ja yoyocanaina rë. Parata ó ja quëëcani quiha. Nohiria qui ja caxacani quiha. Ranomixxëni cabo, ati ibo bo, tihi cabo ja manëcani quiha. Iquinaxëni cabo, paramixxëni cabo, caxaxëniria cabo, ranimixxëni cabo, tihi cabo ja manëcani quiha rë. ³⁰ Jasca, huëtsa bo ja ocahuacani quiha. Dios qui caxaxëniria ja icani quiha. Jamë shinamixxëni, jamë oquëhuamixxëni cabo ja icani quiha. Jasca, jocha paxa cabo ja chitahëhuacani quiha. Jasca, jato nabo qui nicamixxëni cabo ja icani quiha. Tihi ca tsi ja acanicuë yoyoqui na. ³¹ Jabi cahëtimaxëni cabo xo naa bo ra. Quiacani quiha pë. Jato chani jatihuayamacani quiha pë. Jasca, nohiria noiti cahëyamacani quiha pë. ³² Jabi “Rësopaimaria xo tocanaibo” ii quiha Dios yoba ra. Jama, Dios yoba cahëqui ri tsi jari toca ca jocha acani quiha pë. Jasca, nohiria huëtsa bo pi jochano tsi “Jënima tsi xo ma acaina” icani quiha pë.

2

Nohiria bo copixëhi quiha Dios

¹ “Toca ca jochahuaxëni ca carayanabo jasca ma xo noa ra” çii ni mato sa? Jato jascaria xo mato ri iquia ra. “Copihacaxëti xo toca ca jochacanaibo” iipih tsi mamë yoati tsi chaniqui mato ra, jasca ca jahuë bo ma acai quëshpi na. ² Mëstë tsi xo jochacanaibo Diós copihaina ra. Jochayamahi

quilha jato copihí na. ³ ¿Jahuë shinacanaí? ¿Jênahuariahax raca tocacanaí ca nohiria qui ma quësona, jasca ca jocha ma aquë no mato ri? Tocapihi tsi ¿jênahuariahax raca Diós copihai ca quima ma paxana? ⁴ Tonia Diós mato shomahuahai ca cahëyamaqui mato tia. Mato qui caxahuëniyamahi quilha ra. Mato qui yosanahuëniyamahi quilha. Jasca, ja noihai cató tsi jocha quima mato casomacatsi quilha ra. Jatsi ¿jênahuariahax, “Yoi xo toa Diós acaina” i ma na? ⁵ Quiniacaxëcahuë. Maxax jascaria xo mato rë. Mato jocha quima pi ja quiri ma bësoyamano tsi oquënaxëhi quilha Dios mato qui caxahaina iquia. Jabi tsëquëxëhi quilha Dios caxahai ca bari ra. Toa barí tsi jocha quëshpi tsi jahuë mëstë ca copi jismaxëhi quilha. ⁶ Jatsi jatiroha ca nohiria bo copixëhi quilha ja acanaí ca quëshpi na. ⁷ Yosaxoma jia ca acanaibo, Dios oquë ó quëëcanaibo, bëso-bësopaacanaibo, tihi cabo bëso-bësopaomaxëhi quilha. ⁸ Jama, jamë shinamixëni cabo, jahuë yoba nicamixëni cabo, naa yoi ca acanaibo, tihi cabo qui caxariaxëhi quilha Dios. Anomariaxëhi quilha jato ja copihaina ra. ⁹ Tënë-tënëcaxëcane quilha yoi ca acanaibo tëquë. Anomariaxëhi quilha jato cohuë ra. Copihacaxëti xo jodiobo. Copihacaxëti xo carayanabo ri. ¹⁰ Jama, oquëhuahacaxëti xo jia ca acanaibo tëquë. Oquëhuahacaxëti quilha jia ca acai ca jodiobo. Oquëhuahacaxëti quilha carayanabo ri. Jato oquëhuaxëhi quilha Dios ra. Jatsi rani tsi racacaxëcane quilha. ¹¹ Jabi mëstë tsi xo Diós nohiria copihaina ra. Ja qui jaharisi tsi xo nohiria bo tëquë.

Mëstë tsi xo Diós copihaina

¹² Jochacanaibo tëquë copixëhi quilha Dios ra. Carayanabo, naa Diós quënëni ca yoba jayamacabo pi jochano tsi jato ri copixëhi quilha Dios. Jasca, jodiobo, naa Dios yoba jaya cabo pi jochano tsi jato ri copixëhi quilha Dios. ¹³ Jabi Dios bësojó tsi mëstëhuahacayamaxëhi quilha jodiobo, Dios yoba ja jayacanaí ca iqui na ra. Jama, Dios yoba ja nicaxëti ca xo mëstëhuahacaxëna. ¹⁴ Carayanabo tsayacahuë. ¿Moisés yoba jayacahi ni? Mëquëya ca xo rë. Jama, ja acanaí cató tsi Dios yoba nicacane quilha jato ri pa. Jia ca ati cahëcane quilha, Dios yoba ja jayamacaquë ri. ¹⁵ Jabi jato shina ó tsi Dios yoba quënëhacane quilha, jia ca ati ja cahëyoicane ca quëshpi na. Jia ca ati jato yobahi quilha jato shinana. Jasca, anoma ca pi ja acano tsi jato qui quësohi quilha jato shinana. Jama, jia ca pi ja acano tsi jato qui quësoyamahi quilha. ¹⁶ Jabi tsëquëxëhi quilha jaroha ca bari ra. Toa barí tsi jahuë Jesucristó tsi nohiria bo tëquë copixëhi quilha Dios. Mato shina ó ca bërohuahama ca jahuë bo, naa ma shinahaina, jonë ca ma acanaina, tihi cabo copixëhi quilha ra. Jabi tocaxëhi quilha Dios, ë yoahai jascaria.

Moisés yoba jaya xo jodiobo

¹⁷ ¿Japa mato tsa ni? “Jodiobo xo noa. Moisés yoba qui chitimiqui noa. Oquë xo noba Dios” ¿tihi ca tsi i-iyamacanaí? ¹⁸ Jasca, “Dios shina cahëriaqui noa” iqui mato. Dios yoba ma tiisimahacane iqui tsi jia ca ati cahëyoiqui mato iquia. ¹⁹ “Bëco cabo mëpiti mëtsa xo noa. Tsëmó cabo bax huëa xo noa” iqui mato pë. ²⁰ Jasca, “Cahëyamacanaibo, shinapayo bo, tihi cabo Dios jahuë bo tiisimati mëtsa xo noa” tihi ca tsi iqui mato, Quënëhacane cabo ma jaya iqui na. Jayaquí tsi tiisi tëquë, jabija ca tiisi, tihi cabo cahëti mëtsa xo mato ra. ²¹ Jabija. Carayanabo tiisimati cahëqui mato iquia. Jama, tiisimaquí tsi ¿jênahuariaxo raca mato yoba yoi nicayamayamacanaí? Tiisimahi tsi “Yomayamacahuë” iqui mato; jama, ¿yomayamayamacanaí? ²² “Anoma tsi xo joni huëtsá ahui bichiina” iqui mato; jama, ¿tocayamayamacanaí? “Mahitsa ca dios bo qui arayamacahuë” iqui mato; jama, ¿jato arati xobó ca jahuë bo

yomayamayamacanai? ²³ “Jia tsi xo Dios yoba” iqui mato; jama, jahuë yoba nicayamaqui mato pë. Nicayamaqui tsi Dios quiahuaqui mato pë. ²⁴ Jascaria tsi, mato jabi yoi ca tahë_{xo} tsi Dios janë ocahuacani quiha carayanabo rë, naa Quënëhacanish cabá yoani jascaria.

¿Tsohuë ni toa jodiobo jabija cato?

²⁵ Jabi jënima tsi xo jodiobo iquiina, Dios yoba ma nicaquë no. Jama, Dios yoba pi nicayamaqui tsi Dios cahëyamahai ca carayanabo jascaria xo mato iquia. ²⁶ Jabi Dios yoba pi carayanabá nicanó tsi ¿jato shomahuayamayamaxëhi ni Dios? ¿Jahuë baquë yoi bo jato manëmayamayamaxëhi ni, naa jodiobo ja bini jascaria? ²⁷ Jatsi Dios cahëyamanish ca carayanabá tsi quësohacaxëqui mato jodiobo iquia. Mato ti tsi xo toa Dios yoba jayanish cabo ra. Jasca, mato ti tsi xo toa jibirishati jabi jayanish cabo. Dios tiisi jaya xo mato ra. Japi, quësohacaxëqui mato ra, Dios yoba nicayamaqui ca ma nori iqui na. ²⁸ Tobi quiha mato jodioba jabi bo. Jasca, tobi quiha mato jibirishati jabi. Jama, Dios jabija ca nohiria ma xo mato, mato jodioba jabi bo iqui na. ²⁹ Jama, jodio yoi bo, naa Dios jabija ca baquë bo tsi xo toa Dios jabi paxa ca jaya cabo ra. Espiritu Santó tsi jato shina bo rarinamahacani quiha, Moisés yoba nicaxoma. Jabi paxa ca jaya ca nohiria qui ranihi quiha Dios; chahahuayamacanaibo qui nomari.

3

¹ Ma chahahuahai cató pi jahuë nohiria yoi bo Diós mato manëmano tsi “Mahitsa tsi xo jodiobo no iquiina rë” ¿ii ni mato sa? ² Mahitsa ma xo ra. Jënima tsi xo jodiobo iquiina. ¿Carayanabo oquë tsi noqui jodiobo Diós shomahuayamayamani? Jariapari tsi quiha jahuë chani jodiobo qui Diós ani quiha. ³ Jama, toa chani noba naborëquëbá nicacasyamani quiha rë. Dios quima ja casocano ri tsi quiha jari jato shomahuaxëqui Dios, “Mato shomahuaxëquia” i ja ni quëshpi na. ⁴ Parayamaqui quiha. Jabi joni bá jato chani jatihuayamamitsa, quiacanaibo jaca nori iqui na. Jama xo Dios; jahuë chani jatihuahi quiha. Quiayamaqui quiha. Jabi toca xo Dios ii quiha Quënëhacanish cabo:

“Jabija ca chaniqui mia, Diós, chanihi na.

Mi qui nohiria quësono tsi jato bëboxëqui mia” ii quiha.

⁵ Jabi yoi ca no acai cató pi Dios mëstë jismahacano tsi ¿jënixëhi ni noa? “Anoma tsi xo Diós acaina pë, noba jocha quëshpi noqui ja copiquë no” ¿ixëhi ni noa pa? ⁶ Tocanoma quiha. Mëstë xo Dios ra. Mëstë iyamarohapiquí tsi ¿jënahuariaxo raca jato jocha quëshpi nohiria Diós copina? Jocha matarayamaqui quiha. Ja copihacati xo ra. ⁷ Jasca, tobi quiha yoyohai ca nohiria huëtsa bo. “Jënima tsi xo no quiahaina” icani quiha pë. “No quiano tsi oquë tsi jisiquixëhi quiha Dios parayamaqui ca jabi-jabiria. Jatsi toca pi Dios no oquëhuano tsi ¿jënahuariaxo jochacanaibo noqui ja tocana?” icani quiha pë. ⁸ Anoma tsi xo toca ca chanicanaina ra. “¿Yoi ca ai canomani, Diós noqui shomahuano?” iqui jascaria tsi xo toca ca chani pë. Anoma tsi xo toca ca ma shinahaina iquia. Jabi tobi quiha toa ëa ranixëni cabo rë. “Toca tsi chaniqui Pablo” icani quiha mato ó ca huësti huësti cabo pë. Tocayamaquia ra. Tënëtiya qui raahacacaxëcahi quiha tocacanaibo ra.

Jochaquë jatiroha cabo

⁹ Jatsi, ¿jënixëhi ni noa jodiobo yoati na? ¿Carayanabo oquë ma ni noqui jodiobo? Oquë ma xo noa ra. Jochahi quiha jatiroha ca nohiria bo. Jochahi quiha jodiobo. Jochahi quiha carayanabo ri. Jabi jochacanaibo nohiria

bo tēquē nori è jismaquē ra. ¹⁰ Toca tsi nohiria yoati tsi chanihi quiha Quēnēhacanish cabo ri. Nēcahi quiha:

“Yama tsi xo mēstēxēni cato; yama ra.

¹¹ Yama tsi xo jabija ca cahēhai cato rē.

Yama tsi xo Dios mērahai cato rē.

¹² Dios quima casoniquē jatiroha cabo; janyama bocani quiha jato tēquēta.

Jasca, yama tsi xo jia ca acai cato; yama ra.

¹³ Jasca, anoma tsi xo nohiria chanihaina, nami pisi jascaria.

Jato chaní tsi quiacani quiha pē.

Rono ba veneno jascaria tsi xo toa ja chanicanaina ra.

¹⁴ Jasca, yoixēni ca caxa ca chani icani quiha.

¹⁵ Jasca, mahitsa nohiria acascani quiha.

¹⁶ Jahuēnia ja bocanai cató tsi tēnēhi quiha nohiria bo rē jato tahēxo na.

¹⁷ Jasca, nohiria ya rabēnati cahēyamacani quiha pē.

¹⁸ Jasca, Dios qui raquēyamacani quiha ra” tihi ca tsi ii quiha. Jabi nēca tsi chanihi quiha Quēnēhacanish cabo jato yoati na ra.

¹⁹ Jabi jodiobo qui naa yoba-yobaria acacanicquē ra. Jato yoba yoi tsi xo naa ra. Jato qui Diós ani quiha. Jato qui chanihi quiha naa yoba, jato pasimaxēna. Japi, zjēnahuariahax “Jocha yama xo noa” i jaca na? Jasca, Dios copi bicaxēcani quiha carayanabo ri, naa nohiria bo tēquē. Paxayamacaxēcani quiha. ²⁰ Japi Moisés yoba no nicahai cató tsi mēstēhuahacatimaxēni xo noa, Dios bēsojó no. Jama, Dios yobá tsi noba jocha cahēqui noa ra. Toca tsi jocha noqui cahēmahi quiha Dios.

Dios tsi xo toa noqui mēstēhuahaina

²¹ Jabi jaboqui quinia huētsa noqui jismahi quiha Dios, mēstēhuahacati. Moisés yoba bo no nicahai cató tsi jaboqui noqui biyamahi quiha ra. Jama, siri tsi naa mēstēhuahacati quinia paxa ca Quēnēhacanish cabo, Dios Chani yoanish cabo, tihi cabá yoapaoni quiha. ²² Jaboqui nohiria bo tēquē, naa jahuē Jesucristo qui chitimicanaibo bichi quiha. Ja qui ja chitimicano tsi jato mēstēhuahi quiha. Jatsi jaboqui Dios qui jaharisi tsi xo nohiria bo tēquē. Yama tsi xo oquē cato ra. ²³ Jochaquē jatiroha cabo ra, naa jodiobo carayanabo tēquē. Dios jabi narisqui noa rē. ²⁴ Jaboqui ja noihai cató tsi noqui tēquē mēstēhuahi quiha Dios. Copiyama tsi xo toa no bax ja anina. Jocha quima noqui Diós paquēmaniquē jahuē Cristo ini cató no. ²⁵ Diós jahuē Baquē ani quiha, nohiria bo bax nati. Noba jocha quēshpi ja nani quiha. Ja tocani quiha, ja qui no chitimihai cató tsi noba jocha masahacano iqish na. Toca tsi ja mēstē ca copihai ca Diós noqui jismaniquē ra. Jabi siri tsi nohiria ba jocha copiyamahacani quiha. ²⁶ Jama, jaboqui ja mēstē ca copihai ca noqui jismacatsi quiha. Jariapari mēstē ja iquiina, jatsi jahuē Jesu qui chitimicanaibo ja mēstēhuahaina, tihi cabo tsi noqui cahēmacatsi quiha Dios jaboqui.

²⁷ Japi toca tsi Diós noqui mēstēhuano tsi zjēnahuariahax “Jia tsi xo no acaina” i no na? Jasca, Moisés yobá pi Diós noqui xabahamarohano tsi “Jia tsi xo no acaina” iti mētsa no iquē aquē pē. Jama, jahuē Baquē qui no chitimihai cató tsi noqui xabahamahi quiha. ²⁸ Jarohari tsi Dios bēsojó mēstēhuahacaxēhi quiha nohiria ra, Cristo qui ja chitimicaquē no, Moisés yoba ja nicacanaí cató nomari.

²⁹ Ja tsi xo toa nohiria bo tēquē, naa jodiobo, carayanabo, tihi cabo bichi quiha Dios jasca ca quiniá no. Jatiroha ca nohiria ba Dios tsi xo naa Dios.

³⁰ Jabi huēsti Dios roha tsi xo ra. Jasca, huēsti roha tsi xo Diós nohiria

xabahamati quinia. Jodiobo, carayanabo tēquē, tihi cabo xabahamahi quiha, jahuē Baquē qui ja chitimicaquē no. ³¹ Jatsi, ¿Dios yoba quēyohi ni noa, “No chitimihai cató tsi noqui xabahamahi quiha Dios” i no quē no? Ayamaqui noa. “Jënima tsi xo Dios yoba” iqui noa ra.

4

Dios qui Abraham chitiminina

¹ Jaboqui tsi Abraham yamabo, naa noqui jodioba rēquēyamabo yoati tsi mato yoapariquia. ² Jabi jia tsi xo toa Abrahám anina. Jama, ja ani ca iqui tsi mēstēhuahaca-rohapihi tsi “Jënima xo ēa ra” iti mētsa ja iquē aniquē ra. Jama, Dios bēsojo xo tsi jamē ocahuati mētsama ja ini quiha. ³ Quēnēhacanish cabo qui no tsayano. “Dios qui Abraham chitimiquē” ii quiha. “Toca tsi mēstē ja tocachanicquē” ii quiha.

⁴ Jatsi shinaparicana. Copihacaxēhi quiha yonocohai cato. Parata ja qui ahi quiha jahuē chama, jahuē yonoco quēshpi na. Mahitsa toa copi biyamahi quiha. ⁵ Jama, mahitsa noqui bichi quiha Dios ra. Dios qui iriama tsi xo toa jodioba yoba no acaina. No acai cató tsi xabahamahacatimaxēni xo noa. Jama, mēquēya ca jochahuaxēni ca bichi quiha, ja qui no chitimiquē no. Mēstē no tocachacati xo ja qui no chitimihai ca tahēxo na. ⁶ Japi “Ranihi quiha toa nohiria” i David yamabo ni quiha, copixoma tsi mēstē toa joni Diós tocani quēshpi na. Jabi nēca tsi naa ranihai ca joni yoati tsi David yamabá quēnēniquē:

⁷ “Mato jocha Diós masano tsi mato jocha niahacano tsi rani-raniqui mato.

⁸ Jahuē libro ó tsi mato jocha Ibobá quēnēyamano tsi rani-raniqui mato ra” i David yamabo ni quiha.

⁹ ¿Jabi tsohuē ni naa ranicanaibo? ¿Jodiobo roha ma ni naa nēca ca ranicanaibo pa? ¿Jabi nēca tsi raniyamayamacahi ni carayanabo ri? Jabi jariapari tsi quiha Dios qui Abraham chitimiquē. Jaquirēquē ja chitimihai ca tahēxo tsi quiha mēstē Diós Abraham tocaniquē. ¹⁰ Jabi, ¿jënino tsi mēstē Diós Abraham tocani? Ja jibirishahacanox pari no tsi quiha Diós shomahuaniquē ra. ¹¹ Jariapari tsi quiha Dios qui Abraham chitimiquē. Jaquirēquē jibirishati jabi ja biniquē, ja chitimihai ca tahēxo Diós bini ca jismati. Japi nēca tsi Abraham xocobo yoi bo manēhi quiha carayanabo ri, naa Dios qui ja chitimicaquē no. Ja chitimicana i ca tahēxo tsi jato ri bichi quiha Dios, jibirishati jabi tahēxo ja nomari. ¹² Jasca, Abraham xocobo yoi bo tsi xo jibirishahacanox ca jodiobo ri, Abraham jascaria tsi ja chitimicaquē no. Jato mēbiyamahi quiha jato jibirishati jabi, xabahamahacati. Jabi Abraham jibirishahacanox pari no tsi Diós toa joni mēstē tocaniquē.

Moisés yobá tsi mēstēhuahacatimaxēni xo nohiria

¹³ Jabi Abraham, jahuē चाहितaxocobo, tihi cabo Diós shomahuaniquē, “Mai tēquē ibohuaxēqui mato” i jato qui Dios niquē no. Jabi Abraham yamabo Dios qui chitimini ca tahēxo tsi quiha Diós toa joni shomahuaniquē, jodioba jabi ja nicani cató nomari. ¹⁴ Jama, “Jodioba jabi banahuacanaibo shomahuahi quiha Dios” i-ipinono tsi mahitsa tsi xo toa Dios qui no chitimihaina iquia. Jasca, mahitsa Abraham yamabo qui Diós Chani iquē ani quiha. ¹⁵ Jabi Moisés yobá tsi nohiria mēstēhuayamahi quiha Dios. Jama, toa yoba iqui tsi nohiria bo qui caxahi quiha, ja nicayamacana i quēshpi na. Jabi toa yoba pi iyamarohano tsi jato qui Dios quēsoyamaquē aniquē. ¹⁶ Ja quēshpi tsi ja qui chitimicanaibo roha shomahuahi quiha Dios. Copixoma

tsi noqui bichi quiha. Toca tsi shomahuahacaxêhi quiha Abraham chahitaxocobo yoi bo tēquē. Shomahuahacaxêhi quiha Dios qui chitimihai ca jodiobo. Jasca, shomahuahacaxêhi quiha Dios qui chitimihai ca carayanabo ri. Jabi Abraham chahitaxocobo yoi bo xo noqui chitimicanaibo tēquēta; noba jahēpa quiha. ¹⁷ Jabi ztocayamayamahi ni Quēnhacanish cabo ra? naa “Huēstima ca nohiria ba jahēpa mia manēmaquia” i Abraham qui Dios nina. Parayamaniquē Dios. Jabi Dios, naa rēsonish cabo Bēsomahai ca Dios Chani qui Abraham chitimiyoini quiha. Jahuē Chaní tsi jatiroha ca nēhohuanish ca Dios tsi xo naa.

¹⁸ Jabi sirixēni ax tsi quiha jari Dios qui Abraham chitiminiquē, “Baque mi qui axēquia” i ja qui Dios ni quēshpi na. Toatiyá tsi jari baquē saihuati ó Abraham pasoni quiha, sirixēni ja iquē ri. Japi huēstima ca nohiria ba jahēpa ja manēni quiha, ja yoahacani jascaria. Jabi “Huēstima ca chahitaxocobo jayaxēqui mia” ¿i ja qui Dios yamayamani? ¹⁹ Jaha tsi payoyamani quiha Dios qui Abraham chitimihaina, cien ca años ja iquē ri. Toatiyá tsi xocobo saihuati mētsama ja ini quiha. Jasca Sara ri; sirixēni quiha. ²⁰ Jama, jari Diós ja qui yoani ca Chani qui Abraham chitiminiquē. Jari baquē ó ja pasoni quiha. “Baque saihuayamaxēquia rē” iyama tsi quiha Abraham niquē ra. Jama, chamananiquē Dios qui ja chitimihaina. Jasca, jia tsi Dios ja ocahuani quiha. ²¹ Ja yoani ca jatihuati mētsa Dios nori ca ja cahēyoini quiha. ²² Ja tsi xo toa mēstē Abraham tocahaniquē, ja chitimihai ca tahēhax na.

²³⁻²⁴ Jabi Abraham bax roha ma xo toa Diós yoanina ra. No bax ri ja quēnhacani quiha, naa “Ja chitimihai ca tahēxo mēstē ja tocahaniquē” iquīina. Toca tsi noqui ri bichi quiha Dios, Jesucristo bēsotēquēmanish ca qui no chitiminiquē no. ²⁵ Noba jocha quēshpi tsi Jesu namēhacanicuē. Jatsi Diós bēsomaniquē noqui mēstēhuaxēna.

5

Dios ya no rabēnahaina

¹ Jabi Dios Chani qui no chitimihai cató tsi no mēstēhuahacanicuē. Ja iqui tsi Dios ya rabēnaqui noa ra, no bax Jesucristo ini iqui na. ² No chitimihai ca iqui tsi Dios qui noqui Cristó mēpiniquē. Jaboqui shoma xo noa ra. Rani-raniqui noa, Dios oquē-oquēria biti ó pasohi na. ³ Jasca, jaboqui rani-raniqui noa, noqui pi nohiria bá yosiquē no ri. Toca tsi noba tēnēti chama coshihuahi quiha noqui ja yosicanaina ra. ⁴ No tēnēno tsi oquēnaxēhi quiha noba jabi, ja tanamahacahai quēshpi na. Jasca, noba jabi pi tanamahacano tsi oquēnaxēhi quiha jaha no pasohaina. ⁵ Jasca, jaboqui Diós noqui noihai ca cahēqui noa, noqui acacanish ca Espíritu Santó no. Espíritu Santó tsi noba shina qui Diós noihai ca japahacani quiha. Ja tsi xo toa mahitsa ma xo toa jaha no pasohaina. Noqui ranihuahi quiha ra.

⁶ Jabi noitiria-nono tsi noqui jochahuaxēni cabo bax Cristo nanicuē, Dios qui jia ca xabacá no. ⁷ Anomaria tsi xo toa Diós noihaina ra. Toca ma xo no noihaina rē. Bēronoma tsi xo toa joni shinajiaxēni ca bax no namēhacahaina. Tocacasyama xo noa. Jabi huēsti huēsti ca jahuē rabētiria bax namitsa pa, noihi na. ⁸ Jama, Diós jahuē Cristo raanicuē no bax nati, jochacanaibo no iquē no. Toca tsi ja noi-noihai ca noqui ja jismani quiha. ⁹ Jasca, jahuē Cristo nani cató tsi quiha mēstē no tocahaniquē. Tocahi tsi zjēnahuariahax Dios noqui caxana jaroja ca barí no ra? ¹⁰ Jabi Dios pasomaha no i-ipaoni quiha. Tocanono tsi jahuē Baquē nani cató tsi quiha jahuē rabētiria bo noqui ja manēmaniquē ra. Jaboqui pi jahuē rabēti bo inono tsi zoquē tsi noqui

xabahamayamayamaxëhi ni Dios, bëso jahuë Baquë nori iqui na? ¹¹ Jasca, Dios qui raniquí noa, noba Ibo Jesucristo ini iquí na. Ja ini iqui tsi Dios ya rabënati mëtsa xo noa ra.

Adán anina — Cristó anina

¹² Jabi Adán yoyoni iqui tsi maí ca nohiria bo xërëquë tsi jocha chitahëniquë. Jasca, Adán jocha tahëhax tsi rësotsi nohiria bo niquë. Jochahi quiha nohiria bo tëquë pë. Jaha tsi jato jocha tahëhax tsi rësoyocani quiha. ¹³ Jabi Moisés yamabo qui Diós jahuë yoba anox pari no tsi nohiria jochapaoniquë. Jama, toatiyá tsi quiha jato jocha tocachacayamani quiha, jari Moisés yamabo qui Dios yoba acacayamani iqui na. ¹⁴ Toatiyá tsi quiha jato jocha iqui tsi Moisés rëquë ca bësocanaibo nani quiha jato ri, yoba-yobaria pasomaha ja jochayamacaquë ri, naa Adán jochani jascaria.

Jabi Adán yoyonitë rë. Jama, toçayamaniquë mai qui jonish ca Cristo. ¹⁵ Jasca, jocha Adán chitahëhuaniquë pë. Jama, toa jocha oquë tsi xo Diós noqui shomahuahaina ra. Huësti ca joni jocha tahëhax tsi rësohi quiha nohiria bo tëquë; jama, toa jocha oquë tsi xo Diós noqui noihaina ra. Ja noihai ca jismahacaniquë huësti ca joni, naa Jesucristó ja raaquë no, maí ca nohiria bo xabahamaxëna. ¹⁶ Jasca, Adán jocha tahëhax tsi rësohi quiha nohiria bo tëquë. “Jocha jaya xo jatiroha cabo” ii quiha Dios. Jama, jocha huëstima cabo tahëxo tsi jahuë Baquë Diós aniquë, no mëstëhuahacano iquish na. ¹⁷ Jabi huësti ca joni, naa Adán ani ca jocha tahëhax tsi rësohi quiha jatiroha cabo. Jama, joni huëtsa tahëhax tsi bëso-bësoyoiqui noa, naa noqui shomahuahacanish cabo. Jesucristó ani ca tahëxo tsi quiha noqui Diós shomahuaniquë ra. Copixoma tsi noqui mëstëhuahi quiha.

¹⁸ Jasca, Adán jocha tahëhax tsi nohiria bo tëquë quësohacaniquë. Jama, Jesucristo ini tahëxo tsi mëstë nohiria tocachacaniquë. Jaha tsi bësocani quiha ra. ¹⁹ Huësti ca nicamixëni ca joni tahëhax tsi quiha jochacanaibo nohiria bo tëquë manëniquë rë. Jama, Dios qui jia tsi Jesucristó nicani ca iqui tsi mëstëhuahacahi quiha huëstima cabo ra.

²⁰ Jabi Moisés qui jahuë yoba Diós aniquë, nohiria ba yoiria ca jocha jismaxëna. Ja tahëhax tsi quiha oquënaniquë jocha rë. Jatsi nohiria ba jocha oquënaquë tsi quiha oquënaniquë Diós noihai ri. Jabi anomaria tsi xo Diós noihaina ra; nohiria ba jocha oquë nori. ²¹ Jocha iqui tsi rësoqui noa. Jama, Diós noihai ca iqui tsi no mëstëhuahacaniquë. Ja noihai ca iqui tsi bëso-bësopaaxëqui noa, noba Ibo Jesucristó no.

6

Noba jabi siri nanina

¹ Jabi noba jocha oquë tsi xo Diós noihaina ra. Jama, “Jari no jochapaono ra, oquë tsi Diós noqui noino iquish na” ¿ii ni mato sa? ² Anoma tsi xo toca ca shinacana ra. Chahahuahax jocha qui no rësoniquë. Jocha qui rësohi tsi ¿jënahuariahax jari no jochacasma ra? ³ ¿jëni pi ni, no ashimahacaquë no? Tonia cahëyamaqui mato. Chahahuahax tsi no ashimahacaniquë, Jesucristo ya no rabënahai ca jismaxëna. Jabi noba jocha quëshpi tsi Cristo naquë tsi quiha ja bëta no naniquë noqui ri. ⁴ Ja bëta no naquë tsi quiha Cristo ya noba jabi siri maihuahacaniquë. Toca ca jismahi quiha no ashimahacahaina. Toca tsi ja bëta jocha qui no rësoniquë noba jabi paxa chitahëno iquish na. Jahuë chama-chamariá tsi noqui bësoyoimahi quiha Jahëpa Dios, jahuë Baquë Jesucristo ja bësotëquëmani jascaria.

⁵ Jabi Cristo ya no rësoniquë, noba jocha quëshpi tsi ja naquë no. Rësohi tsi noba jabi siri quima no aquëquëni quiha. Ja bëta rësohax çja bëta bësoyoiyamaxëhi ni noa ra, naa Cristo bësotëquëmahacani jascaria? ⁶ Jabi Cristo ya noba jabi siri namëhacani quiha cruzó no, no nohó ca jocha bëbohacano iquish na. Noqui jochá yonayamano ra. ⁷ Jabi jocha qui pi nohiria rësono tsi bëboti mëtsama xo jocha ra. Jocha quima aquëquë xo ra. ⁸ Jabi Cristo ya rësohi tsi jahuë jabi jia ca xatëanaxëqui noa. Ja bëta bësoyoixëqui noa. ⁹ Jabi rësotëquëyamapistiariaxëhi quiha Cristo ra. ¹⁰ Jocha tahëhax tsi huësti roha tsi Cristo nani quiha jocha chama quëyoxëna. Jocha quëshpi tsi rësotëquëyamapistiariaxëhi quiha. Jasca, jaboqui tsi Dios ya rabëna-rabënahi quiha bësohi na. ¹¹ Jascaria tsi toca tsi mato jocha jabi qui bësoyama ca mamë ma tocaxëti xo, Dios qui bëso ma nori. Jaboqui Dios nicaqui mato, Jesucristo ó ma nori iqui na.

¹² Japi mato yora bo ó xo tsi jochá yonayamano, yoi ca amaxëna. ¹³ Mato yora bo, naa mato mëquë bo, mato bëro, mato jana, tihí cabo jochá yonayamano mato jochamaxëna. Jama, Dios qui mamë acahuë jaboqui bësoyoiquí na. Jaboqui chahahuacanaibo xo mato. Japi mato mëquënë, mato bëro, mato jana, tihí cabo Diós yonano jia ca ati. ¹⁴ Tocapimano tsi mato yonayamaxëhi quiha jocha ra, Dios noihai cató tsi ma yonahacahai iqui na. Moisés yoba namá ma xo mato ra. Mato qui quëshohai ca yoba tsi xo toa. Jama, jaboqui Diós noihai ca tsi xo toa noqui mëbihaina, jocha bëboti.

Jocha yonati — Dios yonati

¹⁵ Jabija. Jaboqui noqui yonayamaqui Moisés yoba ra. Jaboqui Diós noihai namá bëso xo noa. Ja iqui tsi jochacasyama xo noa ra. ¿Jënahuariahax “Jënima tsi xo no jochahaina jaboqui” i no na? Anoma tsi xo toca ca ma shinahaina iquia. ¹⁶ Jabi yonati manëqui mato, tsohuëcara qui mamë ma aquë no nicaxëna. Jasca, jocha pi nicahi tsi jocha yonati tsi xo toa joni. Toa quinia tsi xo rësohaina. Jama, Dios yonati tsi xo toa jia ca acatsai cato. Mëstëhuahacati quinia tsi xo toa ra. ¹⁷ Jabi jocha yonati bo ma i-ipaoni quiha; jama, jaboqui ma tiisimahacani ca yoba qui nicariaqui mato ra. Ja quëshpi tsi Dios qui “Gracias” iquia. ¹⁸ Jabi jocha quima, naa mato ibo siri quima ma paquëmahacani quiha. Jatsi Dios yonati bo ma acacani quiha jia ca ati. ¹⁹ Nëca tsi mato qui chaniquia, ma cahëyoino iquish na. Jocha yonati bo ma i-ipaoni quiha yoi ca axëna. Jatiroha ca yoi ca ma a-apaoniquë; jama, jaboqui Dios yonati bo ma manëxëti xo jia ca axëna.

²⁰ Jia ca ati basi tsi ma i-ipaoniquë rë, jocha yonati bo ma iniquë no. Toatiyá tsi jia ca ma acasyamani quiha. ²¹ Jasca, toatiyá tsi quiha yoi ca roha ma tësapaoni quiha. Jabi Dios quima aquëquëxëhi quiha toca ca yoyocanaibo ra. ²² Jama, jaboqui Dios yonati bo xo mato ra. Jocha quima ma aquëquëniquë iquia. Ja quëshpi tsi Dios bax bësocasqui mato. Jarohari tsi bëso-bësopaaxëqui mato. ²³ Jabi jocha quëshpi bo tsi rësohi quiha nohiria bo. Jama, no copinoma tsi noqui bëso-bësopaomaxëhi quiha Dios, noba Ibo Jesucristó no.

7

Moisés yoba quima no paquëmahacarina

¹ Jabi ë yoacatsai ca cahëqui mato, ëbë xatë bá, gobierno yoba cahëxëni cabo ma nori iqui na. Jabi gobierno yoba nicahi quiha nohiria bësoquí na. Jama ja rësopino tsi toa nohiria yonati mëtsama xo gobierno yoba. ² Nëcapa. Chani pistia mato yoacasquia, ma cahëyoino iquish na. Jabi jahuë bënë

yoba nicaxëti xo ahuini, ja bësokuë no. Tocaxëti quiha ii quiha noba yoba-yobaria. Jatsi bënë ya racaxëhi quiha ahuini. Jama jahuë bënë pi rësono tsi çjënahuariaxo jahuë yoba ja nicana? Jatsi jahuë yoba quima aquëquëhi quiha ahuini, bënë huëtsa biti, bësoyama jahuë bënë nori iqui na. ³ Jama, anoma tsi xo bënë huëtsa bichiina, jari jahuë bënë bësono. Bichi tsi jochaxëhi quiha ahuini pë. Jama, jahuë bënë pi rësono tsi yoba quima aquëquëhi quiha yoxa, bënë huëtsa bixëna. Nohiria yoba namá ma xo ahuini jaari. Jatsi jochayamaxëhi quiha ahuini, bënë huëtsa ja biquë no.

⁴ Jascaria tsi Moisés yoba quima ma paquëmahacaniquë Cristo rësoquë no. Cristo ya tsi toa yoba qui ma rësoni quiha. Japi Moisés yoba quima ma aquëquëni quiha Ibo huëtsa, naa Bësotëquënish ca bixëna. Jabi jahuë Cristo noqui bimacatsi quiha Dios, ja bax jia ca jahuë bo no saihuano iquish na.

⁵ Chahahuanox pari tsi noba jabi siri ó tsi no bëso-bsopaoniquë. Toatiyá tsi Moisés yobá tsi no nohó ca jochahuaxëni ca jabi tsamahacapaoniquë, noqui jochamati. No nohó ca yoi ca jahuë bo toa Moisés yobá saihuani quiha. Toca tsi noqui ja namëni quiha. Jabi toa yobá tsi quiha no yonahacapaoniquë rë.

⁶ Jama, jaboqui noqui yonayamahi quiha ra. Japi Dios bax bësoyoiçëti mëtsa xo noa, Espíritu Santo quinia paxá no. Quinia siri tsi, naa Moisés yoba namá tsi bësoyamaqui noa jaboqui.

Jocha bërohuahi quiha Diós ani ca yoba

⁷ Çjënixëhi ni noa sa? “Yoi tsi xo toa Moisés qui Diós ani ca yoba” çjixëhi ni noa pa? Iyamaxëqui noa. Yoi ma xo jahuë yoba ra. Toa yoba pi Diós noqui ayamarohano tsi çjënahuariaxo tsi jocha no cahëna? Nëcapa. “Anoma tsi xo toa mato xatë ba jahuëmishni bo ó quëhaina” ii quiha Moisés qui acacani ca yoba. “Mato xatë ba jahuëmishni bo ó quëëyamacana” i toa yoba pi yamarohano tsi çjënahuariaxo tsi anoma ca ja iqui ca no cahëquë ana? ⁸ Jama, toa yobá tsi ë nohó ca jocha tsamahacaquë pë, yoi ca ó noqui quëëmati. Jabi toa yoba pi iyamarohano tsi chama yama jocha iquë aquë, yoi ca ëa amati. ⁹ Jasca, Dios yoba cahëyamahi tsi rani tsi ë i-ipaoniquë. Toatiyá tsi ë qui quësonoma Dios yoba i-ipaoni quiha, jahuë yoba ë cahëyamani iqui na. Jama, Dios yoba ë jabiquë tsi ë nohó ca jocha tsamahacaniquë, yoi ca ëa amati. Jatsi ë cohuënaniquë noho jocha bërohuahacani iqui na. ¹⁰ Toa yoba jia ca ë qui quësoni quiha. Jasca, ëa toa yobá mëbiyamani quiha quinia jia tsi bësoti. ¹¹ Dios yoba jia cató tsi ëa jochá paraniquë rë. Yoi ca ëa ja amani quiha. Jatsi ë cohuëniquë, Dios yoba ë qui quësoni iqui na.

¹² Jama, jari jënima tsi xo Diós ani ca yoba iquia. Yoi yama quiha. Mëstë quiha. ¹³ Jama, çjari mato qui yoi ni Moisés qui Diós ani ca yoba sa? “Noqui namëhi quiha toa yoba jia cato pë. Çjënahuariahax jia ca ja ina?” çji ni mato sa? Nicaparicana. Noqui namëyamaxëhi quiha Dios yoba ra. Jama, noqui namëhai ca tsi xo toa no nohó ca yoixëni ca jocha ra. Dios yoba jia cató tsi ëa namëhi quiha pë. Jasca, toca tsi noqui bëro xo jocha jabi yoi. Anomaria tsi xo jocha ra. Paramixëni quiha. Jishopë. Dios yoba jia ca bichi quiha, yoi ca ëa amaxëna.

Yonamixëni tsi xo jocha

¹⁴ Espíritu Santó tsi Dios yoba acacaniquë. Jënima tsi xo Dios yoba. Jama, ëa ti tsi xo jiyama, jocha yonati ë nori iqui na. ¹⁵ Noitiria ca ëa xo naa ra. Jia ca acasquia, ati mëtsa ariati. Jaha tsi ë qui yoi ca aquia pë. ¹⁶ Jabi yoi ca pi ë ano tsi ë qui quësohi quiha noho shinana. Toca tsi jia ca Dios yoba nori ca cahëquia. ¹⁷ Jabi ë nohó ca jocha tsi xo toa yoi ca amati ibo, ëa yoi nomari. ¹⁸ Jabi yama tsi xo toa ë nohó ca jia cato rë. Jia yama xo noho jabi. Jia ca ati

ó quëëquia, ati mëtsa ariati. ¹⁹ Jia ca pi acasquí tsi ë ati mëtsa ca ariati rë. E acasyamahai ca jahuë yoi bo tsi xo toa ë acaina pë. ²⁰ E qui yoi ca ë ano tsi ë nohó ca jocha tsi xo amati ibo, ëa yoi nomari.

²¹ Jatsi jabija tsi xo naa ë yoahaina: Jia ca pi ë acasno tsi tobi ë nohó ca yoi cato rë. Ea chitiahi quiha rë, jia ca ë ayamano iquish na. ²² Noho jabi paxa tahëxo tsi Dios yoba noi quia nicaxëna. ²³ Jama, ë nohó tsi xo yoba huëtsa rë, naa noho shina pasomaha ca yoba. Jocha yoba tsi xo naa ë nohó cato rë. Ea yonacatsi quiha. Ea jochamacatsi quiha pë. ²⁴⁻²⁵ Japi ëa ti tsi xo noitiria ra. Noho jabi paxa iqui tsi Dios yoba nicacasquia ra; jama, tobi quiha jabi siri. Ja tsi xo toa ëa jochamacatsaina rë. Jabi çtsohuëcara ni toa ëa mëbiti mëtsa cato ra? çTsohuëcara ni toa ë nohó ca jochahuaxëni ca jabi bëboti mëtsa cato ra? Shoma xo ëa ra. Noba Ibo Jesucristo tsi xo toa ëa mëbiti mëtsa cato iquía. Jocha quima ëa paquëmanish ca tsi xo naa ra.

8

Espíritu Santo quinia ó tsi no bësohaina

¹ Jabi jaboqui quësohacatimaxëni tsi xo toa Jesucristo ó cato ra. ² Quinia huëtsa ó tsi bësohi quiha. Jasca, Cristo qui ja chitimino tsi ja qui Espiritu Santo acacaquë. Jaha tsi namëhai ca jocha chama quima ja paquëmahacaha quiha bësomahai ca Espiritu Santo chamá no ra. ³ Jabi jocha chama noqui paquëmatimaxëni Moisés yoba iniquë ra. Noba noma jabi iqui tsi chama yama toa Moisés yoba ini quiha, noqui mëbiti. Jatsi quinia huëtsa Díos noqui aniquë xabahamahacati. Jariapari tsi quiha mai qui jahuë Baquë ja raaniquë. Jaquirëquë noba noma jabi, noba yora, tihí cabo jahuë Baquë sahuëniquë coxo na. Jatsi noba jasca ca yora jayahi tsi ja naniquë noba jocha quima noqui paquëmaxëna. ⁴ Toca tsi Díos aniquë ra, mëstë ca jabi no jayano iquish na, naa Moisés yobá yoani jascaria. Japi jaboqui noba noma jabi nicayamaqui noa, Espiritu Santo nicahi nori.

⁵ Jabi maí ca jabi bo shinahi quiha jato noma jabi nicacanaibo. Jama, mana ca jahuë bo shinahi quiha Espiritu Santo nicacanaibo. ⁶ Jabi tënëtiya qui mëpihacahi quiha maí ca jahuë bo shinacanaibo. Jama, mana tsi bocani quiha Dios jahuë bo shinacanaibo. Bësoyoicaxë cani quiha toca cabo. Jasca, bëpasicaxëcani quiha. ⁷ Jabi toca xo ra. Dios pasomaha tsi xo toa jahuë noma jabí tsi yonahacahax cato. Dios yoba nicacasyamahai ca tsi xo toa. Dios yoba nicatimaxëni quiha. ⁸ Jasca, Dios ranihuatimaxëni xo jochahuaxëni ca jahuë noma jabí tsi yonahacahai cato. ⁹ Jama, toca ma xo mato iquía. Chahahuacanaibo xo mato ra. Mato noma jabi nicayamaqui mato, Espiritu Santo nori, mato ó ja bësohai iqui na. Jabi Cristó-na ma xo toa Espiritu Santo jayama cato. ¹⁰ Jama, mato ó pi Cristo bësono tsi shoma xo mato ra. Jabi rësoxëhi quiha mato yora bo. Jama, bësoyoixëqui mato shinana, ma mëstëhuahacani iqui na. ¹¹ Espiritu Santo jayahi tsi bësetëquëxëqui mato ra. Jabi Espiritu Santo chamá tsi jahuë Cristo Díos bësomaniquë. Jasca, mato rësohai ca yora bo ri bësomaxëhi quiha Dios ra, mato ó ca bësohai ca Espiritu Santó no.

¹² Japi mato jochahuaxëni ca noma jabi qui ma nicayamano, ëbë xatë bá. ¹³ Mato noma jabi pi nicahi tsi rësoxëqui mato ra. Jama, Espiritu Santo chamá tsi mato noma jabi acatsai ca namëpihi tsi bësoyoixëqui mato. ¹⁴ Jabi Espiritu Santó mëpihacanih cabo tsi xo Dios xocobo ra. ¹⁵ Ja iqui tsi Dios qui no raquëyamaxëti xo, naa mëmëhai ca raquëria ca yonati bo jascaria. Yonati bo ma xo noa, Dios xocobo nori. Ja quëshpi tsi “Noho Jahëpa, noho Jahëpa” iqui

noa Dios qui. ¹⁶ Jasca, noba shina qui chanihi quiha Espíritu Santo ri, “Dios baquë yoi bo xo mato” iquiina. ¹⁷ Dios baquë bo iipihi tsi noba Jahëpa jahuë bo xatënaXëqui noa ra. Jasca, Diós jahuë Baquë qui ani ca jahuë bo tëquë xatënaXëqui noa Cristo yahax na. Jaha tsi jaboqui Cristo ya no tënëxëti xo, jahuë oquë xatënaXëna ra.

Jisiquixëhai ca oquë

¹⁸ Jabi iriama tsi xo toa jaboqui Cristo quëshpi tsi no tënëhaina iquia ra. Mahitsa quiha. Jaquirequë tsi jisiquixëhi quiha noqui acacaxëhai ca oquë-oquëria. Jiariaxëhi quiha. ¹⁹ Toa barí tsi bësomahacaxëhi quiha Dios xocobo. Dios oquë xatënacaxëcani quiha ra. Jabi toa bari ó pasocani quiha nëhohuahaca-canish ca jahuë bo tëquë ri. ²⁰⁻²¹ Jabi siri tsi naa mai, nihi, yohina bo, chaxpa bo, tihi ca nëhohuahacanish cabo tëquë yoshihuahacani quiha Adán jocha tahëhax na. Rësomahi quiha Ibo Dios, jahuë shina ja nori iqui na. Jasca, jaboqui poronahi quiha jatiroha cabo rësohax na. Jama, toa barí tsi yamaxëhi quiha rësohaina ra. Jasca, jocha quima paquëmahacaxëhi quiha naa mai ri, naa jocha quima Dios xocobo paquëmahacaxëhai jascaria. ²² Jariapari rohari tsi tënëhi nori iqui quiha Diós nëhohuani ca tëquë, naa tsëquëhai ca bari ó pasoquí na.

²³ Jabi toca xo noqui ri, naa Espíritu Santo binish cabo. Mana ca jahuë bo no tananiquë, noqui Espíritu Santo acacaquë no. Toa noba yora paxa bo ó quëëriaqui noa noqui ri ra, jocha quima aquëquëxëna. Toa tsëquëhai ca barí tsi Diós-na bo qui riixëqui noa. Ja tsi xo toa “Jëë, jëë” iqui noa, noqui ri, jaha quëëhi na. ²⁴ Yora paxa bo ó pasoqui noa bixëna ra. Jari jisyamaqui noa rë. Jama, jaha pasohi tsi, “Xabahamahacaxëqui noa” iqui noa. ²⁵ Jatsi jaboqui noba bëroma ca yora paxa bo ó no pasoxëti xo. Manaqui noa ra, yosanaxoma.

²⁶ Jasca, noqui mëbihi quiha Espíritu Santo ri, chama yama no iquë no. Jia pi Dios qui bëhoxti no cahëyamano tsi Jahëpa Dios qui no bax chanihi quiha. Jabi anomaria tsi xo toa Espíritu Santo no bax bëhoxhaina ra. Yoanoma quiha. ²⁷ Jabi Espíritu Santó no bax bënëhai ca jahuë bo cahëhi quiha Jahëpa ra, naa jatiroha caba shina cahëxëni cato. Jasca, Dios nohiria yoi bo bax chani-chaniyahahi quiha Espíritu Santo, Dios quiniá tsi no bax nicati cahëhai ca ja nori quëshpi na.

Jahuë-na bo ó bësohi quiha Dios

²⁸ Jabi jatiroha ca quiniá tsi noqui mëbihi quiha Dios ra. Jaha noicanaibo, naa jahuë shinaná tsi quënëhacanish cabo ya yonocobëquinahi quiha, jia ca axëna jato bax na. ²⁹ Jabi jariapari tsi noqui quënëhacanish cabo Diós bini quiha jahuë Baquë jascaria iti. Jahuë Baquë jabi-jabiria noqui amacatsi quiha. Toca tsi jahuë Baquë oquëhuacatsi quiha, huëstima ca noma bo ja jayano iquish na. ³⁰ Jabi noqui bixo tsi Diós noqui quënëhaniquë ja qui no jono. Jatsi no joquë tsi noqui ja mëstëhuaniquë, ja qui jia cabo nono. Mëstëhuahax tsi no bëta jahuë oquë ja xatënaniquë.

³¹ Jabi anomaria tsi xo toa no bax Diós acaina. Jatsi, çjënahuariahax no raquëna? Diós pi noqui mëbino tsi çjënahuariaxo raca tsohuëcaracá noqui bëbona? ³² Jabi huashiyamaniquë Dios. Jahuë Baquë ja chitiayamani quiha. ÇNo bax jahuë Baquë nati ja ayamayamani? Tocaxo tsi çnoqui jahuë bo tëquë ayamayamaxëhi ni ra? ³³ Jasca, çtsohuë ni toa, noqui, naa Diós bini ca nohiria bo qui quësoti mëtsa cato? Yama xo ra, Diós noqui mëstëhuani iqui na. ³⁴ Jasca, yama tsi xo toa noba jocha quëshpi tsi noqui copiti mëtsa cato, noba jocha quëshpi tsi Cristo nani iqui na. Nahax ja bësotëquëni quiha ra. Jaboqui Dios

mënēcaya ó tsi xo. Toá tsi Dios qui no bax chanihi quiha. ³⁵ Jabi anomaria tsi xo toa Cristó noqui noihaina iquia. Yama tsi xo toa Cristó noqui noihai ca jënemati mêtsa cato ra. Noqui pi nohiria bá yosino tsi no nohó bësóhi quiha. No tënëpino tsi jari no nohó bësóhi quiha ra. Oriquti, raiti, tihi cabo pi no narisno tsi no nohó bësóhi quiha. Nohiria bá pi noqui acasno tsi jari no nohó bësóhi quiha ra. ³⁶ Jabi, “Jatiroha ca barí tsi no rohahuahacaxëti xo, Dios bax naxëna” ii quiha Dios Chani. Tëpas-hacati ca manahai ca oveja jascaria xo noqui chahahuacanaibo. ³⁷ Jama, tocapino tsi jari noqui mëbihi quiha Cristo, noqui noiquí na. Ja iqui tsi bëbo-bëboriaxëqui noa. ³⁸ Jabi yama tsi xo Cristó noihai ca quima noqui aquëquëmahai cato. No rësopino tsi no nohó bësóhi quiha Cristo. Jasca, no bësopino tsi no nohó bësóhi quiha. Ja noihai ca quima noqui aquëquëmati mëtsama xo ángel bo, yoshi bo, chama bo ra. Jasca, jaboqui, huëa huëtsa, naa jatiroha ca xabacá tsi no nohó bësóhi quiha. ³⁹ Jasca, ja noihai ca quima aquëquëmatimaxëni xo mana ca jahuë bo, nëmí ca jahuë bo. Yama tsi xo toa Diós noihai ca quima noqui aquëquëmati mëtsa cato ra. Jabi noba Ibo Jesucristó tsi noqui ja noihai ca Diós jismaniquë ra.

9

Israél ca nohiria bá chahahuayamahaina

¹⁻² Cristo ma cahëyamahai ca iqui tsi cohüë-cohüeria ca ëa xo naa rë, ëbë jodiobo xatë bá. Mato parayamaquia ra. Ihuëria tsi xo noho shinana rë mato tahëhax na. Quiayamaquia ra, Cristó-na ca ë nori iqui na. Jasca, noho shina ó bësóhi quiha Espiritu Santo ri, ë quiayamano iquish na. ³ Ea nicapariano. Noho jimibo mëbicasquia rë. Jato chahahuamacasquia. Ja iqui tsi ë qui jënima tsi xo yoshihuahacahaina jato bax na. Jënima tsi xo Cristo quima ë aquëquëma-hacahaina, ja xabahamacano iquish na. ⁴ Jabi siri tsi Diós jato biniquë ra jahuë xocobo iti. Bichi tsi jahuë oquë, jahuë chama, tihi cabo jato bëta ja xatënani quiha. Jatsi Dios xabahamati chani, jahuë yoba, Dios qui arati jabi, tihi cabo jato qui acacani quiha. Jasca, “Mato shomahuaxëquia” i jato naborëquëbo qui Dios ni quiha. ⁵ Jasca, Jacob doce ca xocobo quima naa nohiria bëceni quiha. Jabi naa shomahuahacani ca nohiria bo quima noba Cristo, noba Xabahamati Ibo joni quiha. Jodio jimibo Cristo ini quiha jaa ri. Jatiroha cabo oquë-oquëria ca tsi xo naa ra. Japi Dios no oquëhua-oquëhuarohano ra. Amén.

⁶ Jabi jaboqui noba Cristo chahahuayamahi quiha jodiobo tëquë rë. Ja chahahuacasyama-picano tsi “Mahitsa xo Dios Chani” çixëhi ni noa pa? Iyamaqui noa. Chama jaya xo Dios Chani ra. Jabi nicapariano. Dios xocobo yoi ma xo Israél ca nohiria bo tëquë. ⁷ Jasca, Abraham yamaba xocobo yoi ma xo jatiroha ca jahuë chahitaxocobo ri. Jama, jahuë xocobo yoi bo tsi xo toa Dios Chani binish cabo. Toca ini quiha Abraham baquë Isaac. “Isaac quima roha coxëhi quiha mi चाहिताxocobo yoi bo” i Abraham qui Dios ni quiha ra. Jatsi Isaac Diós quënaniquë, Ismael nomari. ⁸ ¿Tsayacanai? Dios xocobo yoi bo tsi xo toa Dios Chani bichish cabo, noma ca quiniá tsi cohai cabo jaca nomari. ⁹ Jabi nëca tsi Dios Chani yoani quiha: “Xaba jia cató tsi noho chama mia jismaxëquia ra. Toatiyá tsi baquë comaxëhi quiha Sara ra” iquiina. ¹⁰ Jasca, jaquirëquë Rebeca yamabo qui Dios chaniniquë, naa Isaac ahuí qui. Jabi dos ca baquë bo ja comani quiha jahuë bënë Isaac bax na. ¹¹⁻¹² Jama, huësti ca baquë roha Diós bini quiha. Huëtsa ja bicasyamani quiha. Jatsi toa dos ca baquë conox pari no tsi quiha Jacob Diós biniquë Isaac chahitaxocobo saihuati. Esaú ja biyamani quiha. Jari jia cato, yoi cato, tihi cabo ati toa

xocobá cahëyamani quiha, naa Jacob Diós biniquë no. Jasca, jari cohama quiha toa dos ca baquë bo ini quiha toatiyá no. ¿Japi tsayayamacanai? No acái ca quëshpi tsi noqui biyamahi quiha Dios ra. Jama, jahuë shinaná tsi jaha ja quëèhai ca bichi quiha. ¹³ Jabi toca ja ini quiha, Quënëhacanish cabá yoani jascaria, naa “Jacob bixëquia shomahuaxëna. E qui yoi xo Esau” i Dios niquë no.

¹⁴ Jatsi, ¿jënixëhi ni noa ra? “Anoma tsi xo toca tsi Diós acaina ra” ¿ixëhi ni noa? Iyamaqui noa. Jënima tsi xo toa Diós anina. ¹⁵ Dios roha tsi xo toa nëca ca biti chama jaya cato. Moisés qui ja yoani ca nicacana. “E qui jia cabo shomahuquia ra. Jasca, ë noicatsai ca noixëquia” i Moisés yamabo qui Dios ni quiha. ¹⁶ ¿Tsayacanai? Jaha no quëèhaina, no acaina, tihi cabo iqui tsi noqui shomahuayamahi quiha Dios ra. Jama, ja qui jia cabo shomahuahi quiha, jato noiquí na. ¹⁷ Faraón, naa Egipto nohiria ba chama-chamaria no tsayano. Quënëhacanish cabo ó tsi ja qui Dios chanini quiha. Chanihax, “Nohiria chama-chamaria mia ë manëmaniquë, nohiria bo qui noho chama jismaxëna” i ja qui ja ni quiha. ¹⁸ Jasca, “Mia pasomaha noho chama iquë ra, maí ca nohiria tëquëtá ë ani ca nicano iquish na” nëa tsi quiha ja qui Dios nëcaniquë. Japi ja noicatsai ca mëbihi quiha Dios. Jasca, nohiria pi patoxihuacasquí tsi patoxihuaxëhi quiha, ja qui ja nicayamacano iquish na.

¹⁹ Jabi toca pi Diós ano tsi “¿Jënahuariahax tsi noqui Dios quësona pë, yoi ca no acaquë no? Yama tsi xo toa Dios shina pasomaha ati mëtsa cato” ¿ii ni mato sa? Jasca, “Ati ibo tsi xo Dios, joni shina nomari” ¿ii ni mato sa? ²⁰ Jabi toca tsi chaniyamacana ra. ¿Jënahuariaxo raca Dios ma ocahuana pa? “Jënixo tsi nëca tsi ëa mi aca” ¿ii ni acacahax ca paiti pa, jahuë ati ibo qui? Jahuë ibo ocahuatimaxëni xo paiti ra. ²¹ ¿Ja acatsai ca ayamayamaxëhi ni ibo ra? Jahuë matsacá tsi chomo jiaxëni ca ati mëtsa xo ibo. Jama, paiti yoixëni ca pi acatsi tsi aqui quiha, matsaca ibo ja nori iqui na.

²² Jabi toca xo Diós ani ri. Jahuë caxa, jahuë chama, tihi cabo nohiria bo qui Diós jismacasni quiha. Jismahax tsi ja bama-bamaparini quiha jato jocha quëshpi tsi jato copinox pari. Jato jocha quëshpi tsi quëyohacapaimaria toa nohiria ini quiha. ²³ Jasca, jahuë oquë-oquëria Diós jismacasni quiha nohiria bá cahëyoino iquish na. Jatsi jahuë nohiria yoi bo, naa jahuë oquë biti rohahuahacanish cabo ja shomahuariani quiha. Ja noihai ca jato jismacatsi quiha ra. ²⁴ Jabi noqui tsi xo toa jahuë nohiria yoi bo, naa noqui jodiobo, carayanabo ri. ²⁵ Jabi naa carayanabo yoati tsi chanihi quiha Dios, Oseas yamabá quënëni cato ó no: “E qui arayamacanaibo, naa carayanabo quënaxëquia noho nohiria yoi bo iti ra.

Siri tsi naa nohiria ë noiyamaniquë.

Jama, jaboqui jato noixëquia ra”

i Dios ni quiha toá no.

²⁶ “Jasca,

‘Dios nohiria ma xo toa carayanabo’ iyamacaxëcani quiha nohiria, naa ja toacani jascaria.

Jama, ‘Bësohai ca Dios xocobo xo carayanabo ri’ icaxëcani quiha”.

Tihi ca tsi i-i quiha Oseás quënëni cato ra. ²⁷ Jasca, Israel ca nohiria bo pasomaha Isafas yamabá quënëniquë jaa ri. “Tocanoma Israel ca nohiria bo imitsa. Ia quëmapó ca mashënë jascaria pi ja icano ri tsi jari jato xatë pistia roha xabahamaxëhi quiha Dios. ²⁸ Bamaxoma tsi mëri tsi maí ca nohiria bo tëquë copixëhi quiha Dios” i ja ni quiha jato yoati na. ²⁹ Jasca, “Noqui shinahi

quilha chamaxëni ca Dios. Noqui pi ja shinayamarohano tsi noqui jodiobo tēquē quēyohacaquē aniquē, naa Sódoma, Gomorra, tihí cabo quēyohacani jascaria” tihí tsi Isaias quēnēni quilha siri.

Cristo qui Jodiobo chitimicasyamahaina

³⁰ ¿Japa? ¿Jēnahuacatsi ni Dios ra? Nicaparicana. Jaboqui Diós acatsai ca tsi xo naa ra. Carayanabo, naa jahué mēstē mērayamanish cabo mēstēhuacatsi quilha Dios. Jabi jahué mēstē bicaxēcani quilha jato ri, ja chahahuacaquē no. ³¹ Jama, naa Dios mēstē biyamacaxēcani quilha jodiobo rē, Moisés yobá tsi ja mēstēhuahacascascanai iqui na. ³² Jatsi, ¿jēnixo tsi Dios mēstē biyamacahi ni? Mēstēhuahacayamacahi quilha Cristo qui ja chitimicanai cató tsi Dios mēstē ja bicasyamacanai iqui na. Jasca, jato jabi bo, jato yoba bo, tihí cabo banahuacascani quilha mēstēhuahacaxēna. Jama, Dios mēstē biti quinia tsi xo toa jahué Cristo qui chitimihaina ra. Jesucristó tsi jato quinia quētiahacani quilha. Japi Cristo qui ja yosanariacaniquē rē. ³³ Toca tsi chanihi quilha Quēnēhacanish cabo: “Jodioba quinia ó tsi Cristo janaxēquia. Jatsi ja qui yosacaxēcani quilha Sión racahai ca nohiria bo rē. Jama, ja qui rabiymacaxēcani quilha ja qui chitimicanaibo ra” i Dios ni quilha jato yoati na.

10

“Chahahuapaimaria xo jodiobo” i Pablo nina

¹ Jaha ē quēēhai ca tsi xo toa noho jimibo xabahamahacahaina ra, ēbē xatē bá. Dios qui bēhoxquia ja xabahamahacacano iquish na. ² Jabi anomaria tsi xo toa Dios qui ja aracanaina ra; mahitsa ja nori. Cahēhaxma tsi araracani quilha rē. ³ Jasca, Diós mēstēhuahai ca quinia cahēyamacani quilha rē. Ja tsi xo toa jato jabi bo, jato yoba bo, tihí cabo nicariacani quilha mēstēhuahacaxēna. Jama, Dios xabahamati quinia ma xo toa ra. ⁴ Jato arati quinia tsi xo toa Moisés yoba nicahaina rē. Jama, toa mēstēhuahacati quinia Cristó jatihuani quilha, ja qui chitimicanaibo tēquē mēstēhuahacano iquish na. ⁵ Jabi toa mēstēhuapaoni ca quinia yoati tsi Moisés quēnēniquē. Quēnēhi tsi, “Bēsoxēhi quilha yoba nicahai cato” i ja ni quilha rē. ⁶ Jama, oquē tsi xo mēstēhuahacati quinia huētsa, naa Cristo qui no chitimihaina ra. Ja tsi xo toa “¿Nai qui canoma ní? Cristo jahari no bēno, noqui mēbiti” iyamaqui noa ra. Jatihuahacani quilha jahué xabahamati yonoco ra. ⁷ Jasca, “¿Rēsonish caba ití qui canoma ní, Cristo tēroxēna?” iyamaqui noa. ⁸ “Basima xo Diós mato mēbihaina ra” ii quilha Dios Chani. “Mato jana, mato shinana, tihí cabá tsi ‘Chitimiquia’ itsicana” ii quilha Dios Chani ra. Jabi naa xabahamati Chani tsi xo naa ē yoahaina ra. ⁹ “Noho Ibo tsi xo Jesu” i pi ma no tsi rēsonish cabo quima jahué Cristo tērohacani ca mato shinaná pi ma chahahuano tsi mato xabahamaxēhi quilha Dios ra. ¹⁰ Mato shinaná tsi ja qui chitimiqui mato, mēstēhuahacaxēna. Jasca, xabahamahacaxēqui mato, mato janá tsi “Chahahuaquia” i ma quē no. ¹¹ Jabi “Rani-ranixēhi quilha tsohuēcara ca ē qui chitimihai cato” ii quilha Quēnēhacanish cabo ra. ¹² Jabi jaboqui jasca ca quiniá tsi Dios qui bēcani quilha nohiria bo tēquē, naa jodiobo, carayanabo. Jasca ca Ibo jayaca xo ra, jaboqui. Jabi jaha quēnacanaibo tēquē shomahuariahi quilha. ¹³ Xabahamahacaxēhi quilha jatiroha ca Ibo janē quēnahai cabo ra.

¹⁴ Jabi ¿jēnahuariaxo Cristo nohiriá quēnana, ja qui chitimiyamapiquí na? Jasca, Dios xabahamati Chani pi nicayamahi tsi ¿jēnahuariahax ja qui ja chitimicana? Jasca, jato qui pi Dios Chani yoahacayamano tsi ¿jēnahuaria xo

toa Chani nohiria bá nicana rē? ¹⁵ Jasca, Dios Chani yoatí joni bo pi chahahuacanaibá raayamano tsi çjēnhuariaxo raca Dios Chani ja yoacana rē? Jabi, “Jiaria tsi xo Dios Chani yoacanaibo bēcanaina ra” ii quiha Quēñēhacanish cabo. ¹⁶ Jama, toa Chani jia ca nicacasyamacani quiha jatiroha cabo rē. Jabi tocani quiha Isaías yamabo pē, naa “Yama tsi xo noho chani chahahuacanaibo rē, Ibobá” i ja niqūē no. ¹⁷ Jatsi chitimicani quiha nohiria, Chani nicahax na, naa Cristo Chani jia cato.

¹⁸ ¿Jabi naa Chani jia ca jodiobá nicayamayamani? ¿Jēnhuariahax “Nicayamaqui noa” i jaca na ra? Ja nicayocani quiha.

“Jatiroha ca mai qui caniquē Dios Chani yoacanaiba joi.

Nēama xo jato chani nohiria bá nicaquē ra”

ii quiha Quēñēhacanish cabo ra.

¹⁹ Jasca, Dios xabahamati Chani nicaxo tsi çja cahēyamayamacani? Nicaxo tsi ja cahēcāniquē iquia ra. Jodiobo yoati tsi Diós nēcāni quiha Moisés quēñēni cato ó no:

“Nohiria huētsa, naa nohó-na ma cabo xabahamaxēquia.

Jatsi jato qui yosanaxēqui mato ra.

Ea cahētimaxēni ca nohiria huētsa bo ē xabahamano tsi caxaxēqui mato pē” i Dios ni quiha jato yoati na.

²⁰ Jasca, carayanabo ri yoati tsi Dios chaniniquē, Isaías quēñēni cato ó no. Bēroria xo ja quēñēnina:

“Ea bicaxēcāni quiha ēa mērayamacanaibo ra.

Ea cahēcaxēcāni quiha ēa nicayamacanaibo ra”.

Tihi tsi ja quēñēni quiha carayanabo yoati na.

²¹ Jama,

“Nicamixēni ca ēa pasomaha ca nohiria bo qui joi ama-amaquia, jato mēbicasquí na; mahitsa quiha”

i Dios ni quiha Israël ca nohiria yoati na.

11

Xabahamahacanish ca Israël cabo

¹ Jabi ja nicamiscāni ca iqui tsi çjahuē Israël ca nohiria Diós niani? Ayamahi quiha. Jato pi ja niarohano tsi ē niahacaquē aniquē ēa ri rē, jodiobo ē nori iqui na. Abraham chahitaxocobo yoi xo ēa ri. Benjamín xatē tsi ē coniquē ra. ² Jasca, siri tsi Israël ca nohiria Diós biniquē jahuē nohiria-nohiria iti. Jato tēquē niayamaxēhi quiha ra. Tonia Quēñēhacanish cabo cahēyamaqui mato, naa Elías yamabo yoati na. Siri tsi Elías yamabo Dios qui chanini quiha. ³ Ja nēcāni quiha: “Mi Chani yoacanaibo tēpascāni quiha rē, Ibobá. Jasca, mi qui arati altar bo poxacāni quiha pē. Ea roha tsi xo toa bēsohaina ra. Jaboqui ēa pi acascāni quiha rē” i Elías yamabo ni quiha, jahuē jimibo pasomaha Dios qui ranimisti na. ⁴ Jabi toca tsi Elías yamabo ranimisquē tsi quiha Diós quēbiniquē: “Mimē ma xo mia ra. Jari Israël ca maí tsi xo siete mil ca nohiria huētsa bo ra, naa Baal bēsojó mēniyamacanaibo ra” i ja qui Dios ni quiha ra. ⁵ Jabi Elías tiyá tsi jascaria tsi xo jaboqui rē. Jari tobi xo Diós bini ca jodiobo xatē bo ri, naa ja qui aracascānaibo. Diós noihai ca iqui tsi xabahamahacaxēhi quiha huēsti huēsti cabo. ⁶ Jato bichi quiha Dios, jato noiquí na. Jato jabi, jato yoba, tihi cabo ja acānai ca iqui tsi jato biyamahi quiha. Ja acānai cató pi Diós jato xabahamarohano tsi ja noihai cató tsi ja xabahamahacayamaquē acaquē ra. Jama, noqui noiquí tsi noqui bichi quiha Dios ra.

⁷ ¿Jënipihi ni noa? Mahitsa Dios mëstë Israél ca nohiria bá mëra-mëraniquë iquia ra. Dios mëstë ja biyamacani quiha. Biniquë jato maxo pistia roha, naa Diós bini cabo roha. Quëstonariani quiha tëxë ba shinana rë, ja chahahuacasyamacani iqui na. ⁸ Jabi toca tsi jato yoati tsi chanihi quiha Quënëhacanish cabo ra. “Dios quinia cahëtimaxëni ca shina jato qui Diós aquë ra” ii quiha. Jasca, “Jabija ca chani jisquí tsi cahëyamacaxëceni quiha. Nicaquí tsi chahahuayamacaxëceni quiha pë. Jabi toca xo jaboqui rë” ii quiha Dios Chani jato yoati na. ⁹ Jasca, Israél ca nohiria pasomaha chaniniquë David yamabo ri.

“Mahitsa tsi xo jato qui jia ca arati fiesta bo ja acanaina ra. Jaha ja quëëcanai ca jabi yoi iqui tsi Dios quima casocani quiha pë. Ja iqui tsi copihacaxëceni quiha ra”
i David yamabo ni quiha. ¹⁰ Jasca,
“Jato shina tsëmonano ra, ja cahëyamacano iquish na ra.
Jaha ja quëëceni ca jahuë bo iqui tsi ja tënëcano”
i David yamabo ni quiha jahuë jimibo yoati na.

¹¹ Jabi Cristo quima jodiobo casoniquë rë. Ja iqui tsi ¿bënorohacaxëceni ni? Iyamacaxë-cani quiha iquia ra. Jaboqui roha tsi xo toa ja bënëcanaina ra. Cristo quima ja casocani nori tahëxo tsi jaboqui carayanabo xabamahi quiha Dios ra. ¹² Jato jocha tahëhax tsi shomahuahacahi quiha Dios cahëyamahai ca carayanabo jaboqui. Ja quima ja casocani iqui tsi nohiria bo tëquë, naa carayanabo xabamahi quiha Dios. Jabi jaboqui jia tsi xo toa carayanabo bax Diós acaina. Jama, Dios qui jodiobo jahari bacano tsi oquë-oquërixëhi quiha carayanabo Diós shomahuahaina ra.

Carayanabo xabamamahacahaina

¹³ Jaboqui mato carayanabo qui chaniquia. Mato qui ë raahacanicuë ra, Dios Chani mato yoati. Jia tsi xo naa yonoco Diós ë qui anina ra. ¹⁴ Jabi Dios Chani mato qui ë yoahai ca noho jimibá tsayano. Toca tsi mato qui noho jimibo yosanamacasquia Cristo qui jato mëpixëna. Tonia mato bax pi Diós acai ca jisquí tsi ja chahahuacamitsa jato ri ra. ¹⁵ Jabi jodiobo Diós niabëriani quiha ra. Niabëria tsi mato carayanabo ja biniquë xabamamaxëna. Jama, Cristo qui jodiobo bacano tsi anomariaxëhi quiha mato carayanabo bësöhaina toatiyá no ra. Toa barí tsi chitahëxëhi quiha jahuë rëso, naa rësonish cabo Diós bësomaxëquë no. ¹⁶ Jahari jahuë jodiobo bixëqui Dios. ¿Abraham, jato rëquëbo jahëpa bo, tihi cabo Diós biyamayamani? Jato pi bichi tsi ¿jato चाहितaxocobo ri biyamayamaxëhi ni Dios tia? Jato jahari bixëqui ra. Abraham yamabo Diós aquëquëmaniquë jahuë-na iti. Jasca, bichiquixëhi quiha jahuë चाहितaxocobo ri.

¹⁷ Jabi jodiobo niahacanicuë rë, naa mëchish-hacaha ca mëshi noma jascaria. Jabi jodiobo, naa mëshi noma bo niahacani quiha, Cristo qui ja chitimiyamacani iqui na. Jatsi jato tahëhax tsi jamëri ca mëshi huëtza bo, naa mato carayanabo catsamihacani quiha, Dios shoma bo ma xatënano. Jaboqui Abraham, jahuë चाहितaxocobo, tihi cabo qui Diós ani ca shoma bo xatënaqui mato ra. ¹⁸ Japi quiniacaxëcahuë. Jihui mëshi noma bo, naa jodiobo ocahuayamacana. Jari mëshi roha ma nori ca shina-bënoyamacana. Mato oquëhuahai ca tsi xo Dios ra. ¹⁹ “Toa mëshi noma bo mëchish-hacanicuë, jato no ratino iquish na ra” ¿ii ni mato sa? “Tonia jato oquë xo noa ra” i ma mitsa pë. ²⁰ Quiniacaxëcahuë. Toa mëshi noma bo, naa jodiobo, mëchish-hacani quiha ja chitimiyamacani iqui na. Jasca, jato ma ratiniquë, ma chitimini iqui na. Japi mamë oquëhuayamacana. Quiniacaxëcahuë, janyama ca ma ayamano iquish

na, naa jodiobá ani jascaria. ²¹ Jabi jodiobo, naa jihui noma mëshi bo Diós nianiquë, ja qui ja chitimiyamaquë no. Jasca, mëshi noma bo pi niaquí tsi mato ri niaxëhi quiha Dios, ja qui ma chitimiyamaquë no. ²² Japi Diós noihaina, ja cacahaina, tihi cabo qui tsayacahuë. Jaha nicayamacanaibo qui cacahi quiha Dios. Jama, Dios pi ma noi-noino tsi, ja qui ma chitimipino tsi mato mëbixëhi quiha ra. Jama, nicayamapihi tsi mëchish-hacaxëqui mato ri ra.

²³ Jasca, jodiobá chahahuatëquëpino tsi jahari pi Dios qui ja bëcano tsi jihui qui jato catsamimaxëhi quiha Dios. Jahari jato joihuaxëhi quiha. Toca ca ati chama jaya xo Dios ra. ²⁴ ¿Jabi mato carayanabo jia tsi Diós biyamayamani? Jia tsi mato, naa jamëri ca mëshi bo pi bichi tsi ¿oquë tsi jahuë nohiria-nohiria, naa mëshi noma bo biyamayamaxëhi ni? Tocaxëhi quiha ra, Cristo qui ja chitimicaquë no. Dios qui bëroria tsi xo mëshi noma bo jahari jato noma iti qui catsamimatëquëhaina.

Xabahamahacaxëhi quiha jodiobo

²⁵ Jisa, ëbë xatë bá. Jahuë Israél ca nohiria yoati tsi Diós acai ca cahëyamacani quiha nohiria. Yoahama ja ini quiha. Ja tsi xo toa jaboqui jato bax Diós acai ca mato yoaxëquia, mamë ma oquëhuayamano iquish na. Jaboqui tsi Dios Chani pasomaha ca xo jodiobo rë. Jama, naamapaoyamaxëhi quiha toca tsi ja ícanaina iquia. Jabi jariapari Cristo qui bëcaxëceni quiha jatiroha ca pais ca nohiria bo. Jariapari chahahuacaxëceni quiha huëstima ca carayanabo. Jaquirëquë chahahuatëquëxëhi quiha jodiobo ri ra.

²⁶ Toatiyá tsi xabahamahacaxëhi quiha jodiobo tëquëta. Jabi jasca ca ii quiha Quënëhacanish cabo ri:

“Sión ax joxëhi quiha Xabahamati Ibo ra.

Joxo tsi jato quinia yoi bo quima jodiobo bësomaxëhi quiha.

²⁷ Toatiyá tsi jato jocha masaxëquia, ë yoani jascaria” iquiina.

²⁸ Jaboqui Dios pasomaha tsi xo jodiobo rë, naa Cristo xabahamati Chani tahëhax na. Jaha tsi Diós mato carayanabo biniquë shomahuaxëna, jato tahëxo na. Jama, siri tsi Diós jodiobo bini quiha jahuë xocobo iti. Jato naborëquëbo iqui tsi jari jato noihi quiha Dios. ²⁹ Jahari jato bixëhi quiha Dios ra, jato ja shomahuacasn iqui na. Jahuë shina rarinamayamahi quiha.

³⁰ Jabi siri tsi Dios nicamixëni cabo mato carayanabo i-ipaoniquë. Jama, jaboqui shoma xo mato, jodiobá chahahuacasyamahai iqui na. ³¹ Jasca, jaboqui Dios nicamixëni cabo tsi xo jodiobo ri. Jama, huëa huëtsá tsi mato qui Diós acai ca shoma bo bicaxëceni quiha jato ri. ³² Jabi jamë ax jocha quima tsëquëtimaxëni xo nohiria bo tëquë. Toca tsi Diós ani quiha nohiria bo tëquë jasca ca quiniá tsi shomahuaxëna.

³³ Anomaria tsi xo Dios tiisi ra. Jatiroha ca cahëhi quiha. ¿Jënahuariaxo Dios shinahai ca nohiria bá cahëna? Diós acai ca cahëtimaxëni xo noa. Jasca, jahuë quinia bo cahëyoiti mëtsama xo noa ra. ³⁴ Yama tsi xo Ibo Dios shinahai ca cahëhai cato ra. Jasca, yama tsi xo Dios yobati mëtsa cato. ³⁵ ¿Tsohuë ni toa Dios qui jahuëjahuë ati mëtsa cato pa, mëbixëna? Narisyamahi quiha. ³⁶ Jatiroha ca Diós aniquë. Jahuë chamá tsi bësohi quiha jatiroha cabo. Jasca, jahuë oquë bax tsi jatiroha ca acacaniquë ra. Jatsi jia tsi Dios no ocahuacahuapoxëti xo.

¹ Jabi anomaria tsi xo toa Diós noqui shomahuahaina ra. Ja quëshpi tsi mato bënariaquia, èbè xatèbá, Dios qui mamè ma ano. Jatsi mato yora bo, mato shinana, tihi cabo ja qui aquèquèmacana jahuè yonoco ati. Tocapimano tsi mato qui ranixèhi quiha Dios. ² Jasca, maí ca nohiria ba jabi banahuayamacana ra. Yoi quiha jato jabi. Jama, Diós mato shina paxahuaxèno. Paxahuaxo mato jabi ja jabitihuaxèno. Jatsi Dios shinana, ja qui jia cato, ja qui ranihuahai ca jahuè bo, tihi cabo atí cahèxèqui mato ra.

³ Jabi èa Diós biniquè jahuè Chani yoati. Jaha tsi mato yobaquia. Noho yoba tsi xo naa: Mamè oquèhua-oquèhuariayamacana iquia. Jama, Diós mato qui ani ca medidá tsi mato jabi ma tanamano. Jabi naa medida paxa ca tsi xo toa Dios qui ma chitimiyoihaina. ⁴⁻⁵ Jasca, jamèri tsi xo toa Diós noqui acai ca tiisi bo, naa noba yora xatè bo jascaria. ¿Jamèri ma ni noba huico, noba tahè, noba mèquènè, tihi cabá acaina ra? Jabi toca xo noqui chahahuacanaibo ri. Jamèri ca yonoco jaya xo noa noqui tèquè ati. Japi mèbinabèquinono. ⁶ Ja noihai ca iqui tsi noqui tèquè qui jamèri ca tiisi bo ahi quiha Dios. Huèsti tsi xo toa Dios Chani yoati mètsa cato. Dios Chani yoati tiisi jayapiquí tsi jia tsi Dios Chani yoacana, naa ja qui ma chitimihai cató no. ⁷ Huètsa tsi xo toa nohiria mèbiti mètsa cato. Mèbiti tiisi jayapiquí tsi jia tsi nohiria mèbicana. Jasca, huètsa tsi xo toa nohiria tiisimati mètsa cato. Tiisimati tiisi jayapiquí tsi jia tsi nohiria tiisimacana. ⁸ Jasca, huètsa tsi xo toa nohiria ranihuati mètsa cato. Jatsi nohiria ranihuati tiisi jayapiquí tsi jato chamahuacana. Jasca, huètsa bo tsi xo huashiyamahaina. Jatsi mato jahuè bo xatènati tiisi jayapiquí tsi huashiyamacana. Tihi cató tsi nohiria mèbiquí tsi rani tsi jato mèbicana.

Chahahuacanaiba jabi-jabiria

⁹ Jatsi paraxoma noicana. Yoi ca quima bèsocana. Jia ca ó quèècana. ¹⁰ Jasca, jia tsi mabè xatè bo noicana. Jia tsi ocahuanacana, jia ca mabè xatè bá aquè no.

¹¹ Jasca, yonocohi tsi chiquishyamacana. Espíritu Santó tsi Diós yonoco ariicana lbo bax yonocoqui na.

¹² Ibo ó pasohi tsi ranicana. Tènèhi tsi yosanayamacana. Dios qui bèhox-rohacana.

¹³ Chahahuacanai ca noitiria cabo ya mato jahuè bo xatènacana. Jasca, mato bèroma ca shishocanaibo orihuacana.

¹⁴ Mato yosixèni cabo ocahuayamacana. Jama jato bax bèhoxcana.

¹⁵ Ranicanaibo ya ranicana. Nohiria pi cohuèno tsi jato bèta cohuènacana.

¹⁶ Jia tsi racanabèquicana. Mamè oquèhuayamacana ra. Jama, noitiria cabo ya ma rabènoxèti xo. “Tiisi-tiisiria ca èa xo naa ra” iyamatsicana; anoma quiha.

¹⁷ Nohiria bá pi mato yosino tsi jahari yoi ca copiyamacana. Nohiria qui jia ca jahuè bo ati ó quèècana. ¹⁸ Jatiroha ca nohiria bo ya jia tsi racanabèquiti tanacana. ¹⁹ Nohiria bá pi mato yosino tsi jato tènèmayamacana, èbè xatè bá. Jama, jato qui Dios caxano. “Ea tsi xo nohiria tènèmati ibo ra. Yoi ca acanaibo copixèquia” ii quiha Dios Quènèhacanish cabo ó no. ²⁰ Jasca, mato pasomaha cabo pi paxnana tsi jato orihuacana. Ja tèshinacano tsi jènè jato qui acana. Tocapimano tsi bèrabicaxècani quiha. Jatsi jato jocha quima ja casocamitsa jato ri. ²¹ Jabi mato qui nohiria bá yoi ca ano tsi jato qui yoi ca ayamacana. Toca tsi jato yoi ca bèboxèqui mato, jia ca ma acai cató no.

¹ Jabi yonahai ca gobierno chama bo qui nicaxëti xo jatiroha ca nohiria bo ra. Jatsi yonati chama amati ibo tsi xo Dios. Ja tsi xo toa jato qui chama acaina noqui yonati. ² Japi gobierno yoba pi nicayamahi tsi Dios qui jia ca pasomaha ixëqui mato pë. Jabi copihacaxëti xo gobierno pasomaha cato tia.

³ Jama, gobierno yoba pi nichahi tsi gobierno chama qui raquëyamaxëqui mato. Jama, gobierno chama bo qui raquëxëhi quiha toa yoyocanaibo ra. Jatsi raquëcasyamapiquí tsi gobierno yoba nicacana. Jia ca ma ano tsi jia tsi mato ocahuaxëhi quiha gobierno chama bo. Jato qui jia ixëhi quiha mato jabi. ⁴ Jabi Dios yonati tsi xo toa chama bo ra. Mato ja mëbixëti ca xo. Jama, anoma ca pi ahi tsi jato qui ma raquëxëti xo. Mato copiti chama jaya ca xo ra. Tocacani quiha Dios mëbixëna. Yoyocanaibo copicani quiha ja bax na. ⁵ Japi gobierno yoba nicacana, chama bá mato copiyamano iquish na. Jabi noba shina qui jia tsi xo toa gobierno chama ba yoba nichahina.

⁶ Jasca, gobierno chama bo qui mato impuesto bo acana. Copihacaxëti xo gobierno chama bo jato yonoco quëshpi na. Jabi Dios bax yonococani quiha ra, jia tsi jato yonoco ja acaquë no. ⁷ Jasca, jato ó tsi cuenta pi jayaquí tsi copihuë. Rani tsi jato qui mato impuesto bo acana. Jasca, jia tsi mato yonahai ca chama bo qui nicacana ra. Jato ma chahuaxëti xo.

Noinacano

⁸ Quiniacaxëcahuë. Anoma xo cuenta bo ra. Huësti roha tsi toa cuenta jia cato. Toa cuenta tsi xo nohiria huëtsa bo no noihaina. Jabi Dios yoba nichahai ca tsi xo toa jahuë xatë noihai cato. ⁹ Jasca, Dios yoba tëquë ma ano ra: “Joni huëtsa ahui biyamacana, joni ayamacana, yomayamacana, nohiria huëtsa ba jahuë bo ó quëëyamacana. Tihí ca tsi acahuë” ii quiha Dios yoba bo. Jasca, tobi quiha toa Dios yoba huëtsa bo ri; jama, huësti roha tsi xo toa Dios yobayobaria cato. “Huëtsa bo noicana, mamë ma noihai jascaria” ii quiha Dios oquë ca yoba ra. Tocapiquí tsi yoba huëtsa bo ri jatihuaxëqui mato iquia. ¹⁰ Noipiquí tsi mabë xatë qui yoi ca ayamaxëqui mato ra. Dios yoba tëquë nichahai ca tsi xo toa nobë xatë bo no noihaina ra.

¹¹ Jabi ma tocaxëti xo, joti basima noba lbo nori quëshpi na. Oxatiya ma xo naa ra. Jatsi jaha bësocana. No chahahuaniquë tsi quiha jari basi Cristo johai ca iipaoniquë. Jama, jaboqui basiriamë xo ja bacahaina iquia ra.

¹² Jatipaimaria xo jocha tsëmonatiya ra. Huëapaimaria xo ja johai ca xabaca. Japi jocha tsëmo quima bësocana. Jasca, Dios jabi jia ca sahuëcana, soldadó jahuë armadura sahuëhai jascaria, huëa ó xo tsi bëboxëna. ¹³ Huëaná ca nohiria iipiquí tsi jabi jia ca no jayati xo. Jama, tobi quiha toa yoyocanaina: naa pabë-pabëriahaina, pahëhaina, anoma ca chotahaina, iquinahaina, yosana-haina. Tihí cabo tsi xo yoi. ¹⁴ Jama, noba lbo Jesucristo jabi sahuëcana. Sahuëxo tsi mato noma jabi yoi ca chahahuayamacana, jaha ja quëëhai ca axëna.

14

Quiniaxëni ca chahahuacanaibo

¹ Jabi tobi quiha toa quiniaxëni ca chahahuacanaibo ra, naa coshi yama cabo. Jia tsi jato joihuacana. Jamëri ca jabi bo pi ja jayacano tsi jato raniyamacana, naa jato jabi tahëxo na. ² Jamëri xo nohiria ba jabi bo ra. Huësti ca chahahuahai ca tsi xo toa jatiroha ca pihaina. Ja qui jiaría quiha jatiroha ca ja pihaina ra. Jama, tobi toa jaha quiniaxëni ca chahahuahai cato. Verdura bo roha picatsi quiha ra. Ja qui roa tsi xo toa piti huëtsa. ³ Jatsi quiniacaxëcahuë. Piti ó quiniaxëni ca ranimisyamaxëti xo jatiroha ca jahuë bo pihai cato. Anoma quiha. Jasca, jatiroha ca picatsai ca ranimisyamaxëti

xo verdura bo roha pihai ca ri, Diós toa dos ca nohiria bini iqui na. ⁴ Jatsi, ¿jénahuariahax raca toca tsi mabë xatë bo ma ranina? Anoma quiha. Ibobá-na tsi xo toa bo tēquëta, mato yonati bo nomari. Anoma ca pi ja acano tsi Diós jato yoano iquia. Jato mēbixëti mētsa xo Dios ra, jia ca ati.

⁵ Jasca, tobi quiha toa jodioba fiesta barí tsi aracascanaibo. Oquëria ca jato bari bo nori ca quëscahuacani quiha. Jama, chahahuacanaibo huëtsa bo qui jaharisi tsi xo jatiroha ca bari. Jatsi shinaparixëti xo jatiroha cabo ra, jia ca ati cahëxëna. ⁶ Jabi, “Oquë tsi xo naa barí tsi Dios qui no arahaina” i huësti ca mitsa. Jënima quiha. Toa barí tsi aracatsi quiha, Dios ranihuaxëna. Jasca, Dios ranihuahi quiha jatiroha ca pihai ca ri, jahuë piti quëshpi tsi “Gracias” ja iqui iqui na. Jasca, Dios ranihuahi quiha verdura bo roha pihai ca ri. Dios qui “Gracias” ii quiha toa ri. ⁷ Japi quiniacaxëcahuë, mabë xatë jabi bo tahëhax na. Nomë bësoyamaqui noa, jaha no quëehai ca roha ca axëna ra. No acai ca tsayahi quiha nobë xatë bo ra. ⁸ Jatsi bësopihí tsi Ibo bax bësouqui noa. Jasca, rësopihí tsi Ibo bax rësouqui noa. Bëso, bësoyama, tihi tsi no imitsa. Tocahi tsi jari Ibobá-na xo noa ra. ⁹ Ja tsi xo toa no bax Cristo rësoni quiha. Rësohax ja bësotëquëniquë noqui tēquë, naa bësocanaibo, bësoyama cabo, tihi cabo yonaxëna. ¹⁰ Jatsi, ¿jëniriáxo raca nobë xatë bo no ranina? Jasca, ¿jëniriahax raca nobë xatë bo qui no caxana? Dios bësójó tsi niixëqui noa, noqui tēquë copihacaxëna, joni bësójó nomari. ¹¹ Jabi Quënëhacanish cabo ó tsi Ibo Dios nëcaniquë:

“Bëso xo ëa ra. Parayamaquia.

Ea bësójó tsi mēnicaxëcani quiha jatiroha cabo ra.

Jia tsi Dios ocahuaxëhi quiha jatiroha ca nohiria”

i Dios ni quiha. ¹² Japi Dios qui noba jocha bërohuaxëqui noa, naa noqui tēquëta ra.

Mabë xatë bo jochamayamacana

¹³ Japi mato huëtsa raniyamacana. Jama, jato ma mēbixëti xo. Jato jochamayamacana. Jabi jia ca ma yayapino tsi jia ca acaxëcani quiha. Jama, ma yoyopino tsi ja tocacamitsa jato ri pë. ¹⁴ Jatsi nicaparicana. E qui jënima tsi xo jatiroha ca no pihaina iquia. Toca ca Ibobá ëa jismani quiha. Jama, jahuëcara pi nohiria picasyamano tsi oquë tsi xo toa ja piyamahaina. Ja shinahai tsi xo. ¹⁵ Jasca, ma pihai cató tsi mabë xatë bo pi yoshihuahacano tsi Dios noihai ca quinia ó tsi bësoyamaqui mato rë. Jasca, ¿toa xatë bax Cristo nayamayamani? Japi jahuëcara ma pihai cató tsi mabë xatë bo yoshihuahacano tsi pinoma tsi xo toa iquia. ¹⁶ Jatsi quiniacaxëcahuë. Jënima jahuëcara ca ma pihai ca imitsa. Jama, ma pihai ca tahëxo tsi nohiria mato ranipino tsi oquë tsi xo toa piti ma piyamahaina iquia. ¹⁷ Jabi no pihaina, jënë no acaina, tihi cabo tsi xo mahitsa Diós otoihaí cató ó no. Oquë tsi xo toa jabi mēstëxëni ca jayahaina. Jasca, oquë tsi xo nobë xatë bo ya jia tsi no racanabëquihaina. Oquë tsi xo Espiritu Santó tsi no ranihaina. Tihi tsi xo jiaría cabo ra. ¹⁸ Nëca pi Cristo quinia ó tsi ma bësono tsi mato qui ranixëhi quiha Dios. Jasca, jia tsi chanicaxëcani quiha nohiria bo ri mato yoati na.

¹⁹ Jatsi Dios quinia ó tsi bësocana. Tocapimano tsi oquëxëhi quiha ma rabënahëquihaina. Toca tsi mēbihacaxëhi quiha jatiroha cabo. ²⁰ Jatsi ma pihai ca iqui tsi Dios yonoco yoshihuayamacana ra. Jënima tsi xo piti tēquë iquia. Jama, no pihai cató pi nobë xatë bo no jochamano tsi anoma tsi xo toa no pihaina iquia. ²¹ Jatsi oquë ca quinia tsi xo toa nami no piyamahaina, jënëria no ayamahaina, jahuëcara ca huëtsa no acaina, tihi cabá tsi nobë xatë bo no jochamaquë no. ²² Jabi jamëri jamëri tsi xo nohiria bá shinahaina piti yoati

na. Jënima quiha. Dios roha ma yoano. Jabi ma acatsai ca pi ahi tsi shoma xo mato, mato shina quësohacayamaquë no. ²³ Jama, tobi quiha toa quiniaxëniria cato ra. Ja qui yoi ca pi ja pino tsi ja qui quësoxëhi quiha jahuë shinana pë. Ja qui jocha quiha. Jabi jocha tsi xo toa noqui yoi ca acaina. Noitiria ca tsi xo toa.

15

Nobë xatë bo mëbihaina

¹ Jabi quiniaxëniria ca chahahuacanaibo no mëbiti xo ra, naa noqui Cristo quinia cahëxëni cabo. Mëbihi tsi nomë no ranihuayamaxëti xo. ² Jasca, nobë xatë bo no ranihuaxëti xo. Jasca, jato no mëbino, Cristo quinia ó tsi ja shinahacano iquish na. ³ Cristo jabi no tsayaparino. Joxo tsi quiha jamë tsi ja ranihuayamaniquë. Jama, ja joquë tsi quiha nohiria bá roaniquë pë. Jabi toca tsi chanihi quiha Quënëhacanish cabo, “Ea roamistsi quiha mi qui caxacanaibo” iquiina. ⁴ Jabi siri tsi naa chani tëquë quënëhacani quiha, jaboqui noqui chamahuaxëna. Jatsi jaha no pasohaina, no yosanayamahaina, tihi ca tsi noqui tiisimahi quiha Diós quënëni ca chani ra. Jaha pasocanaibo Diós mëbini ca noqui jismahi quiha. ⁵ Jasca, Dios tsi xo toa noqui mëbihaina ra. Ja tsi xo toa noqui chamahuahaina. Jabi mato ri Diós mëbino, jia tsi ma rabë nabëquino iquish na. Jasca, mato ja mëbino ra, Cristo quinia ó tsi ma banahuano. ⁶ Jatsi huësti ca joí tsi Dios, naa noba Ibo Jesucristo Jahëpa jia tsi ocahuabëquixëqui mato.

Carayanabo qui Dios Chani yoahacaxëti xo

⁷ Jia tsi mato huëtza joihuanacana, naa Cristó mato joihuani jascaria. Toca tsi ocahuahacaxëhi quiha Dios. ⁸ Jabi yonati Jesu manëniquë jahuë jimibo mëbixëna iquia. Jato xërëquë xo tsi quiha Dios Chani ja yoaniquë jabija ca Dios nori ca jimaxëna. Jasca, ja joni cató tsi jahuë jodioba rëquëbo yamabo qui Diós yoani ca chani jatihuahacaniquë. ⁹ Jasca, mai qui Jesu joniquë Carayanabo ri xabahamahacano iquish na. Jia tsi Dios ja ocahuacano jato ri. Jabi toca tsi Salmo quënënish cató quënëni quiha carayanabo yoati na. “Carayanabo xërëquë xo tsi mia ocahuaxëquia. Quëquëxëquia mi janë yoati na” ii quiha.

¹⁰ Jasca, Dios Chani iti huëtza ó tsi,

“Jahuë jodiobo nohiria ya tsi ranicana, carayanabá” ii quiha.

¹¹ Jasca, iti huëtzá tsi,

“Jia tsi Ibo Dios ocahuacana, carayanabá.

Jatiroha ca nohiria bá Dios ocahuano ra” ii quiha.

¹² Carayanabo yoati tsi Isaías yamabá quënëniquë jaa ri.

“Jisiquixëhi quiha Isaí chahitaxocobo.

Jisiquixo tsi carayanabo yonaxëhi quiha.

Jatsi ja qui chitimicaxëcani quiha carayanabo ri”

i ja ni quiha.

¹³ Japi mato carayanabo bax bëhoxquia, Diós mato ranihuano iquish na. Jabi Dios ó pasoqui noa, noqui ja mëbino. Japi Diós mato ranihuano, ma chahahuaxë no. Tocapijano tsi oquëriaxëhi quiha jaha ma pasohaina Espiritu Santo chamá no.

Carayanabo qui Pablo raahacaniquë chaniti

¹⁴ Tiisi ma nori ca iipiquia, ëbë xatë bá. Jasca, shinajiaxëni xo mato iquia. Mato tiisi iqui tsi jia tsi yobanati mëtza xo mato, jia ca axëna. Tihi ca tsi cahëyoiquia. ¹⁵ Jabi raquëxoma tsi naa carta mato qui ë quënëquë, noho yoba

ma shina-bēnoyamano iquish na. Raquēhaxma tsi mato qui chaniquia, ē qui jahuē Chani yoati yonoco Diós ani iqui na. ¹⁶ Mato carayanabo qui ēa ja raaniquē, jahuē Cristo Chani ē yoano. Toa yonoco aquí tsi ē qui Diós ani ca Chani boquia mato carayanabo qui. Espiritu Santó rohahuaicanish ca ofrenda jascaria tsi Dios qui mato mēacasquia ra. ¹⁷ Jabi ē qui jia tsi xo toa Dios bax ē acana iquia. E aca ca qui bērabiyamaquia, jahuē Jesucristo ya ē yonocobēquinahai ca iqui na. ¹⁸ Jabi ē yoahana, ē acana, tihi cabá tsi jia tsi xo toa mato bax Cristó acana ra. ¿Tsayacanai? Jaboqui Dios banahuaqui mato ra, Dios Chani mato qui ē yoani iqui na. ¹⁹ Jasca, mato xērēquē xo tsi jisti bo ē aniquē. Toca tsi Espiritu Santo chama ma jisni quiha. Tihi cabá tsi Cristo qui mato carayanabo mēpihacaniquē ra. Jasca, toca tsi Cristo Chani ē yoabonaniquē jatiroha ca iti xo na. Jerusalén, nēama ca Ilírico mai, tihi cabo xo tsi jato qui jahuē Chani ē yoaniquē ra.

²⁰ Jabi Dios Chani yoahi quiha joni huētsa bo ri. Jia quiha. Jama, ja yoacanaí cato ax tsi yoacasyamahai ca ēa xo naa. Jato yonoco quiha. Ja tsi xo toa basi, naa Dios Chani nicayamanish cabo qui Cristo Chani yoacasquia, naa yoahama cato xo na. ²¹ Tocatsiquia Quēnēhacanish cabo jatihuahacano iquish na.

“Jisxēhi quiha jahuē Chani nicahama cabo.
Cahēcaxēcani quiha nicayamacanaibo” ii quiha.

Romá ca chahahuacanaibo qui Pablo shishocasnina

²² Nēama xo tsi Dios Chani yoahi tsi ē bamaniquē mato qui shishoxēna. Mato qui canoma ē iniquē rē. ²³ Jama, jaboqui jatihuahacaquē nēa xo tsi Dios Chani ē yoahaina ra. Japi mato jisi joquia. Naama tsi mato qui ē cacasni quiha. ²⁴ Jabi ē shinahai ca tsi xo naa: Mato oquēria ca España mai qui capama tsi mato yaca qui shishoparicasquia. Rani tsi shishonabēquixēqui noa tia. Jaquirēquē España mai qui ēa ma raaxēti xo.

²⁵ Jaboqui Jerusalén qui caapariquia, toá ca chahahuacanaibo mēbixēna. ²⁶ Jabi Macedonia, Acaya, tihi ca maí ca carayana ca chahahuacanaibá parata catiani quiha Jerusalén ca noitiria ca jodiobo bax na. Toa parata jato qui ē boxēti xo. ²⁷ Ranixo tsi naa parata ja acani quiha toá ca noitiria cabo mēbixēna. Jabi toá ca noitiria ca jodiobo carayanabá mēbixēti xo iquia. ¿Jodiobo iqui tsi Dios Chani ja nicayamayamacani? Ja quēshpi tsi jaboqui Jerusalén ca noitiria ca jodiobo ja mēbicaxēti xo iquia, ja biniayamacano iquish na. ²⁸ Jatsi jaboqui carayanabá ē qui mēani ca parata pari Jerusalén cabo qui ē booparixēti xo. Niabēria tsi jahari joxēquia España mai qui. Jopama tsi mato qui shishoxēquia tia. ²⁹ Jatsi mato qui ē cahēno tsi ēa chamahuariaxēhi quiha Cristo tia, jia tsi mato ē mēbino.

³⁰ Jasca, ē bax ma bēhoxno, ēbē xatē bá, Ibo Jesucristo tahēhax na. Jasca, ēa ma noihai ca iqui tsi ēa ma mēbino Dios yonoco ati, naa ē bax ma bēhoxhai cató no. Jabi, ¿Espiritu Santó ēa mato noimayamayamani? ³¹ Jatsi ē bax bēhoxcana, jodioba maí ca nicamixēni cabo quima ē paxano iquish na. Jasca, bēhoxcana, ē bohai ca parata ranixo tsi Jerusalén ca chahahuacanaibá bino ra. ³² Jaquirēquē Dios shina pi ja ino tsi rani tsi mato qui joxēquia tia. Johax mato bēta chitēxēquia, joiparixēna. ³³ Iquē. Noqui bēpasimahai ca Diós mato tēquē bētano ra. Amén.

1-2 Jabi noba yoxacato, naa Febe mato qui raaxëquia. Iboha janë tsi naa yoxa joihuacana iquia ra. Nëá ca Cencreá ca iglesiá ca yonocoxëni ca quiha. Chahahua-canaibá jabi tsi xo toa jia tsi nohiria joihuahaina. Jia tsi ëa naa yoxá mëbini quiha. Ja iqui tsi jatiroha ca quiniá tsi naa yoxa mëbicana ja joquë no.

3 Jasca, Priscila, Aquila, tihi cabo joihuacana. E bëta ax tsi Dios bax ja yonocobëquipaocaniquë jato ri. 4 Ea tahëhax ja naquë acaniquë ra, ëa xabahamaxëna. Ja quëshpi tsi jato qui “Gracias” iquia. Jato qui “Gracias” ii quiha carayanaba iglesia bo tëquë ri. 5 Jasca, jato xobó ca catihai ca aracanaibo joihuacana. Jasca, noho rabëti Epeneto joihuacana. Asia maí ca jariapari ca Cristo chahahuanish ca ja ini quiha. 6 Jasca, María ri. Mato bax ja yonoco-yonocorianiquë ra. 7 Jasca, tobi Andrónico, Junias. E bëta preso qui nanëhacanish cabo tsi xo toa bo. Noho rabëti bo quiha. Oquë-oguëria ca Dios Chani yoacanaibo ja icani quiha. Jariapari Cristo chahahuanish cabo tsi xo naa bo; jato cho ë iquiina. Jia tsi tihi cabo joihuacana.

8 Jasca, Amplias joihuacana. Ibo iqui tsi naa joni noiquia ra. 9 Tobi quiha Urbano, naa ë bëta yonocobëquipaonish cato. Tobi quiha Estaquis, naa ë noihai cato. Tihi cabo noicana. 10 Jasca, Apeles, naa Cristo chahahuanish ca yosi cato, Aristobuló-na bo, tihi cabo joihuacana. 11 Tobi noho jimi bo Herodión. Tobi Narcisó-na bo, naa jahuë xobó ca aracanaibo. Tihi cabo joihuacana. 12 Jasca, Trifena, Trifosa, tihi cabo joihuacana. Ibo bax yonocoria ca xo. Tobi noba yoxacato Pérsida. Joihuacana. Huëstima tsi xo toa Ibo bax ja yonocoina. 13 Jasca, tobi Rufo, naa Cristo chahahuanish ca yosi cato. Tobi jahuë jahëhua. Tihi cabo joihuacana. Ea jahuë jahëhuá shomahuarianiquë, naa noho cai jascaria iquiina. 14 Jasca, Asíncrito, Flegonte, Hermas, Patrobas, Hermes, jato maxó ca rabëti bo, tihi cabo joihuacana. 15 Jasca, Filólogo, Julia, Nereo, jahuë yoxa cato, Olimpás, jato bëtahai ca chahahuacanaibo, tihi cabo joihuacana. 16 Jia tsi joihuacanana iquia ra. Jabi mato joihuahi quiha nëá ca Cristo iglesia bo tëquë.

17 Quiniacaxëcahuë, ëbë xatë bá. Tobi xo toa chahahuacanaibo oquëxnamahai ca nohiria bo rë. Tobi toa nohiria janyama mëpicanaibo rë. Jaha bësopa. Jato bëta rabënyamacana iquia. 18 Noba Ibo Cristo bax yonocoyamacani quiha ra. Jasca, jamë shinamixëni ca xo. Anoma tsi xo toa ja yobacanaina. Paraquí tsi cahëtimaxëni ca nohiria janyama mëpicani quiha pë. 19 Jabi jato qui nicayamaxëqui mato tia. Nëama quiha, naa país huëtsa bo qui pacaniquë chani mato yoati na. “Jia tsi Cristo nicacani quiha Romá ca chahahuacanaibo” icani quiha ra mato yoati na. Ja iqui tsi rani-raniquia. Jia ca ati ma jabino ra. Oquë tsi xo toa yoi ca cahëyamacanaibo iquiina iquia. 20 Jabi mato mëbixëhi quiha Dios ra, naa noqui ranihuahai cato. Mato bax Satanás bëboriäxëhi quiha. Basima tsi xo toa bari ra. Noba Ibo Jesucristó mato shomahuano ra.

21 Jasca, mato joihuahi quiha nëá ca Timoteo, naa ë bëta yonocobëquihai cato. Jasca, mato joihuacatsi quiha ë bëta yonocobëquicanaibo, naa Lucio, Jasón, Sosípater. 22 Jabi Tercio tsi xo naa carta quënëhai cato. E bax quënëhi quiha. Jarohapa tsi mato joihuahuaia ëa ri. 23 Jasca, mato joihuahi quiha Gayo, naa nëá ca ëa orihuahai cato. Jahuë xobó tsi caticani quiha nëá ca chahahuacanaibo araxëna. Mato joihuahi quiha Erasto ri, naa yacatá ca parata obëso cato. Jasca, mato joihuahi quiha nobë xatë Cuarto ri. Tihi cabo tsi xo toa mato joihuacanaina.

24 Mato tëquë noba Ibo Jesucristó shomahuano. Amén.

Dios no ocahua-ocahuapaoti xo noa

²⁵ Dios no oquëhuano ra. Mato chamahuati Ibo tsi xo toa. Mato mëbixëhi quiha ra, mato qui ë yoani ca Cristo Chani ma banahuano iquish na. Naama pi nohiria qui jonë quiha naa Chani jia ca i-ipaoniquë ra. ²⁶ Jama, jaboqui bëroria tsi xo naa chani ra. Ja tsi xo toa nohiria tëquë ca qui ja yoahacaxëti xo ra, Cristo qui ja chitimicano jato ri. ¿Jabi tocapixëti nori ca Quënëhacanish cabá noqui yoayamayamani? Jabi noba bëso-bësopaohai ca Dios shina tsi xo toa nohiria huëtsa bá jahuë Chani nicahaina. ²⁷ Ja huësti ca tsi xo toa tiisi-tiisiria jaya cato ra. Jatsi Jesucristó tsi Dios ocahua-ocahuacana ra. Amén.

Primera Carta Del Apostol San Pablo a Los Corintios

Corintó ca chahahuacanaibo Pabló joihuanina

¹ Mato qui quēnēhai ca Pablo ca ēa xo naa. Dios shinaná tsi ē quēnahacaniquē, Dios Chani yoati ibo iti. E bēta xo tsi mato joihuahi quiha nobē xatē Sóstenes ri. ² Mato Corintó ca chahahuacanaibo qui naa carta raaquia. Dios nohiria bo, naa jahuē Jesucristó tsi mēstēhuahacaniish cabo qui naa chani raaquia. Jasca, raahacahi quiha jatiroha ca ití ca noba Jesucristo qui aracanaibo qui. Jato Ibo, noba Ibo, tihi cabá-na xo Jesu ra. ³ Jatsi noba Jahēpa Dios, noba Ibo Jesucristo, tihi cabá mato noino. Mato ja ranihuacano.

Ja shomahuariahacacana Jesucristó no

⁴ Jabi Jesucristó ani ca iqui tsi ma shomahuariahacaniquē iquia. Ja quēshpi tsi Dios qui “Gracias” iroha-irohaquia, bēhoxhi na. ⁵ Jatiroha ca quiniá tsi ma shomahua-riahacani quiha, Cristó-na bo ma nori iqui na. Jaha tsi oquē tsi xo toa ja bax ma chanihaina. Jasca, Cristo iqui tsi oquē tsi xo toa Dios ma cahēhaina iquia. ⁶ Jabi mato qui Cristo Chani no yoaquē tsi toa Chani ma birianiquē ra. Jaha tsi mato shina ó tsi toa Chani coshinaniquē. ⁷ Toca tsi Espiritu Santó acai ca tiisi bo ma biyoniquē. Yama ca tsi xo toa ma narishaina iquia, Ibo Jesucristo jisiquihai ca manaquí na. ⁸ Mato ottoxēhi quiha ra jahuē rēso qui. Jatsi jaroja ca bari, naa noba Ibo Jesucristo bari tsēquēno tsi quēshacatimaxēni ixēqui mato ra. ⁹ Chahahuahacati xo Dios. Quiayamahi quiha. Mato ja quēnani quiha, jahuē Baquē Jesucristo, naa noba Ibo ya rabēnati.

Ja mapēxnacana

¹⁰ Noba Ibo Jesucristo janē tsi mato yobaquia, ebē xatē bá. Jasca ca jahuē bo ma chahahuati xo iquia. Ma mapēxnayamano; anoma quiha. Jasca, huēsti ca shina roha ca ma jayano, Dios bax yonocobēquinaxēna. ¹¹ Jabi ma mapēxnahai ca ē nicaniquē rē, ebē xatē bá. “Joi mērabēquinacani quiha Corintó ca chahahuacanaibo” ii quiha nēá ca nohiria bo rē mato yoati na. ¹² Nicaparicana. Anoma tsi xo toa ma yoahaina iquia. “Pabló-na xo ēa” ii quiha mato mishni bo pē. “Apolós-na xo ēa” ii quiha maxo huētsa pē. “Pedró-na xo ēa” ii quiha huētsa bo. Tihi ca tsi iqui mato pē, chanihi na. ¹³ Jama, huēsti ca Ibo roha jaya xo mato ra. Mapēxnatimaxēni xo noba Cristo ra. Huēsti ca maxo roha xo noa ra, huēstima ca ja nomari. Nicaparicana. ¿Mato jocha bax Pablo tooxahacani pa? ¿Noho janē tsi ma ashimahacani pa? ¹⁴ “Gracias” Dios qui iquia ra, yama ca ē ashimani quēshpi na. Crispo, Gayo, tihi roha cabo tsi xo toa ē ashimanina. ¹⁵ Jaha tsi yama tsi xo toa “Pablo janē tsi ashimahacaniish ca ēa xo naa ra” iti mētsa cato ra. ¹⁶ Estéfanas, jahuē xobó cabo, tihi roha cabo ē ashimani quiha, mato bētaquí na. Ichariamajaba icani quiha. Yama tsi xo toa ē ashimani ca nohiria huētsa tia iquia ra. ¹⁷ Jabi Cristó ēa raayamaniquē nohiria bo ashimati. Jama, ē raahacaniquē jahuē Chani jia ca yoati. Yoahi tsi nohiria ba tiisi tsi chaniyamaquia. Jama, “Cristo rēsoni cató tsi no xabahamahacaxēti xo” iquia, jahuē chama Cristo cruz bēnoyamano iquish na.

Dios tiisi

18 Jabi tēnētiya qui bocanaibo qui yoyoxēni tsi xo naa cruz Chani. Jama, noqui xabahamahacanish cabo qui jia tsi xo ra. Dios chama jaya xo ra. 19 Jasca, Quēnēhacanish cabo ó tsi nēca tsi Dios chanini quiha jato yoati na: “Nohiria ba tiisi quēyoxēquia.

E qui iriama tsi xo toa cahēxēni caba tiisi.

Jato tiisi quētiaxēquia”

i Dios ni quiha. 20 Jabi Dios qui iriama tsi xo maí ca nohiria ba tiisi jaya cabo. Ja qui iriama tsi xo jato yoba, jato papi, tihi ca cahēxēni cabo ri. Chaniti mētsaxēniria ca ja icamitsa; jama, Dios qui iriama jato tiisi tēquē nori. Yoyoxēni ca jato tiisi nori ca Diós jismani quiha. 21 Jabi Dios cahēyoiti mētsama xo nohiria jato tiisi no. Dios quinia ma xo toa ra, Dios cahēti. Jama, jahuē Chani chahahuacanaibo xabahamahi quiha. Toa Chani yoaquia. Toca tsi Dios cahēti mētsa xo nohiria ra, jahuē Chani chahahuáqui na. Jishopē. Jato qui yoyoxēni tsi xo toa quinia rē. 22 Jisti bo jiscasani quiha jodiobo, chahahuanox pari. Jasca, carayanabo ri tsi xo toa nohiria ba tiisi roha nicacascanaina pē. 23 Jama, cruzó tsi Cristo tooxahacani ca Chani yoaqui noa ra. Jodiobo qui yoi xo naa Chani rē. Jasca “Yoyoxēni xo” icani quiha carayanabo ri. 24 Jama, Dios tiisi-tiisiria cahēriaqui noa, naa noqui quēnahacanish ca jodiobo carayanabo tēquē. Jabi Dios tiisi-tiisiria, jahuē chama, tihi cabo noqui jismahacanicuē cruzó tsi Cristo rēsoniquē no. 25 Dios tiisi quēasca ma xo nohiria ba tiisi. “Yoyoxēni xo Diós acaina” i jaca mitsa; jama, jato tiisi oquē Dios tiisi nori. Jasca, “Chama yama xo Cristo rēsohaina” i jaca mitsa; jama, nohiria ba chama oquē Cristo rēsohai ca chama nori.

¿Tsohuē ni toa xabahamahacanish cabo?

26 Shinaparicana, èbē xatē bá. Diós mato quēnaquē tsi ¿maí ca nohiria-nohiria ma ini pa? ¿Chama bo ma ini pa? 27 Iyamaqui mato. Toca ca tiisi jaya ca nohiria bo bērabihuacatsi quiha Dios ra. Ja tsi xo toa noqui tiisi janyama cabo ja biniquē. Noqui chama janyama cabo bichi quiha maí ca chama bo bērabihuaxēna. 28 Jishopē. Maí ca nohiria bo qui yoi tsi xo naa quinia ra. Jama, jato qui yoi cabo Diós biniquē oquēhuaxēna. Noqui noitiria cabo ja bichi cató tsi quiha jato tiisi ja quēyoniquē. 29 Ja iqui tsi yama tsi xo toa Dios bēsojó tsi jamē oquēhuati mētsa cato. 30 Dios roha tsi xo toa jahuē Cristo ya noqui rabēnamahai cato ra. Dios quinia tsi xo toa jahuē Cristo ra. Tsayacahuē. Jahuē Cristó tsi Diós noqui xabahamati quinia bērohuahacanicuē. Jahuē Cristó tsi no jahuahacanicuē. Jatsi jahuē Cristó tsi no xabahamahacanicuē. Tihi ca tsi ahi quiha Dios jahuē Cristó no. 31 Jaha tsi “Oquēhuacaspíquí tsi Ibo no oquēhuati xo ja acani quēshpi na” ii quiha Quēnēhacanish cabo.

2

Cruzó tsi Cristo tooxahacani ca Chani

1 Mato qui cahēxo tsi bēroria tsi Dios Chani mato qui ē yoanicuē iquia. Yoahi tsi chaniti mētsaxēniria ca ē iyamaniquē. Jasca, nohiria ba tiisí tsi mato qui ē chaniyamaniquē, Dios jabija ca yoahí na. 2 Jama, Jesucristo yoi, no bax cruzó tsi ja rēsonina, tihi roha ca ē yoanicuē mato bētaquí na. 3 Jasca, chama yama tsi mato qui ē joniquē shishohi na. E shina-huējēnaniquē rē. E mēmēnicuē. 4 Johax nohiria ba tiisí tsi ē chaniyamaniquē Dios Chani mato qui yoahí na. Jama, Espíritu Santo chamá tsi mato qui noho chani joniquē iquia. Ja iqui tsi Dios quima noho chani joni ca ma jisnicuē. 5 Jaha tsi nohiria ba tiisi qui chitimiyamahi quiha ma chahahuahaina, Dios chama qui ja nori.

Dios tiisi

⁶Jabi shinahanish ca chahahuacanaibo qui mana ca tiisi yoaquia. Nohiria ba tiisi jaquirima tsi xo naa tiisi ra. Naa mana ca tiisi cahëyamahi quiha toa Dios cahëyamacanaibo. Cahëyamahi quiha jaboqui yonacanaibo ri. Tihi ca tsi xo toa naamayamacaxëcanaina ra. ⁷Jasca, jato oquë tsi xo toa ë yoahaina ra, Dios quima noho chani nori iqui na. Noqui xabahamahacati quinia ca tiisi ca tsi xo naa ë yoahaina ra. Jabi no bax naa xabahamati quinia Diós ani quiha, mai nëhohuahacanox pari. ⁸Naa xabahamati quinia cahëyamahi quiha maí ca chana bo. Cahërohapiquí tsi cruzó tsi mana ca Ibo-iboria ja tooxayamaquë acaniquë iquia. ⁹Jasca, naa quinia quënëhacani quiha Quënëhacaniish cabo ó no:

“Anomaria tsi xo toa noicanaibo bax Diós shomahuahaina.

¿Jënahuariaxo ja acai ca shina no cahëna?

No tsayahaina, no nicahaina, tihi ca oquë ixëhi quiha toa no bax ja shomahuaxëhaina”

tihi tsi ii quiha.

¹⁰Jama, ja acai ca jahuë bo noqui Diós jismaniquë jahuë Espíritu Santó no. Jatiroha ca cahëriahi quiha Espíritu Santó ra. Dios jabi, Dios shinana, Dios tiisi, tihi ca tsi, naa noqui jonë ca jahuë bo cahëyoihi quiha. ¹¹Toca ma xo noa. Noqui tsi xo toa joni huëtsá shinahai ca cahëtimaxëni cabo. Nomë no shinahi roha ca cahëyoiqui noa iquia. Jasca, noqui tsi xo toa Diós shinahai ca cahëtimaxëni cabo. Jama xo Espíritu Santo ra. Ja roha tsi xo toa Diós shinahai ca cahëhaina. ¹²Jasca, naa Dios quima ca Espíritu Santo no biniquë noqui ri; maí ca tiisi ja nomari. Noqui tiisimahi quiha ra, Diós noqui ani ca jahuë bo tëquë no cahëyoino iquish na. ¹³Jaha tsi Dios jahuë bo bërohuapama tsi nohiria bá noqui tiisimani ca tiisi tsi chaniyamaqui noa. Jama, Espíritu Santó tsi noqui tiisimahi ca jahuë bo roha yoaqui noa iquia. Noba chani ma xo. Jabi toca tsi chahahuacanaibo qui mana ca tiisi bërohuacani noa, jato tiisimaquí na.

¹⁴Jabi Espíritu Santó tiisimahi ca jahuë bo biyamahi quiha Dios cahëyamacanaibo. Jato qui yoyoxëni quiha. Cahëtimaxëni ca xo, Espíritu Santo janyamacanai ca jaca nori iqui na. ¹⁵Jama, jatiroha ca jahuë bo cahëyoihi mëtsa xo Espíritu Santo jaya cabo ra. Jaha tsi yosanahi quiha Dios cahëyamacanaibo, tihi ca tsi tsayahax na. Noqui cahëyamayoicani quiha pë. ¹⁶¿Jënahuariaxo raca Ibobá shinahai ca ja cahëyoicana? Yama tsi xo toa noba Ibo tiisimati mëtsa cato ra. Jama, noqui tsi xo toa Cristó shinahai ca cahëcanaibo, naa ja qui chitimicanaibo.

3*Dios bax yonocobëquinahaina*

¹Jabi Dios Chani mato qui ë yoaquë tsi Dios tiisi binoma ma i-ipaoniquë iquia, Espíritu Santó tsi ma mëpihacayamani iqui na. Jari xocobo jascaria, naa chahahuabëna cabo jascaria ma ini quiha. ²Jaha tsi bëroria ca tiisi roha mato qui ë amaniquë, naa jahuë baquë jahëhuá xoma amahai jascaria. Toatiyá tsi Dios Chani-chaniria binoma ma iniquë. Jishopë. Jari toca xo mato rë jaboqui. ³Jari chahahuabëna cabo jascaria xo mato pë. Tsayacahuë. Jari mato xërëquë tsi xo yosanahaina iquia. Jari mato xërëquë tsi xo joi mërahaina rë. Tocapimano tsi ¿Jënahuariaxo Espíritu Santó mato mëpina? ¿Dios cahëyamacanaibo jascaria iyamayamacanai, tochi na? ⁴Huësti ca maxo tsi xo toa “Pablo roha ó quëëqui noa” iquiina. Maxo huëtsa tsi xo toa “Apolos ó

quëëqui noa” iquiina. Jabi toca pi ma chanino tsi çjënahuariaxo Espíritu Santó mato mëpina?

⁵ Nicapáricana. Iriama ca ëa xo naa. Jasca xo Apolos ri; iriama quiha. Dios yonati bo roha xo noa ra. Noqui iqui tsi Dios Chani qui ma chitiminiquë. Diós noqui aca ca yonoco roha aquí noa ra. ⁶ Jasca, jamëri tsi xo toa Diós noqui ani ca yonoco ati. Mato xërëquë xo tsi Dios Chani pari ë bananiquë. Jaquirëquë Apolos joniquë. Joxo tsi Dios Chani mato qui ja tiisimaniquë, mato coshihuaxëna. Noba yonoco tsi xo toa. Jama, Dios roha tsi xo toa mato ó ca Chani shinahamanish cato ra. ⁷ Ja quëshpi tsi iriama ca ëa xo naa, naa Dios Chani banahai cato. Jasca, iriama xo Apolos ri, naa Chani tiisimanish cato. Dios roha tsi xo toa mato shina ó ca Chani shinahamahaina. ⁸ Jaha tsi yonocobëquinahi quiha Dios Chani banahai cato, Dios Chani tiisimahi cato. Jato yonoco quëshpi roha tsi jato copixëhi quiha Dios. ⁹ Jatsi Dios yonati bo roha xo noa, Dios yahax tsi yonocobëquinahaina. Mato tsi xo toa huai iquiria. Huai lbo xo Dios. Huai ca yonococanaibo xo noqui.

Xobo iquiria xo chahahuacanaibo

Diós acai ca xobo jascaria xo mato. ¹⁰ Ea ti tsi xo toa jahuë xobo rohahuati ibo-iboria. Jabi Dios noihai cató tsi ë qui naa yonoco acacani quiha. Rohahuaxo tsi jahuë xobo chinichiti bo ë nimaniquë, mato chahahuamaquí na. Mato xërëquë xo tsi Dios yonoco ë chitahëhuani quiha. Jatsi ë quirëquë nohiria huëtsa bo joniquë, mato chamahuahi na. Joxo tsi ë chitahëhuani ca cacha tsi ja rohahuacanicuë. Jia tsi ja rohahuati ca xo iquia. ¹¹ Jabi Jesucristo roha tsi xo toa nimahacanish ca chinichiti. Ja qui roha chitimiqui noa xabahamahacati. ¹² Jasca, Jesucristo, naa chinichiti nori ca cacha rohahuacani noa. Jahá tsi jia ca jahuë bá tsi rohahuaxëhi quiha huësti huësti ca nohiria. Oro, plata, maxax copixëni cabo, tihi cabá tsi rohahuacaxëcani quiha. Jama, jihui, xëpamë, huasi, tihi ca copiriama cabá tsi rohahuacaxëcani quiha huëtsa bo pë. ¹³ Quiniacaxëcahuë. Bërohuahacaxëti xo noba yonoco yoi, lbo Jesucristo bacaguë no. Toa barí tsi chíhi tsi tanamahacaxëti xo nohiria yonoco tëquë. Jatsi mëshoyoxëhi quiha mahitsa ca yonoco. Mëshoyamaxëhi quiha yonoco jia cato. ¹⁴ Ja rohahuacana ca pi mëshoyamano tsi copi jia ca bicaxëcani quiha ra. ¹⁵ Jama, nohiria bá rohahuaha ca pi mëshono tsi jato copi jia ca bënocaxëcani quiha pë. Jishopë. Xabahamahacacaxëcani quiha, naa chíhi nacohai ca paxahai ca jascaria.

Arati xobo quëscaria xo chahahuacanaibo

¹⁶ ¿Dios xobo ma nori ca cahëyamacanaí sa? Mato ó tsi bësöhi quiha Espíritu Santo, naa Dios Shinana ra. ¹⁷ Jaha tsi tsohuëcaracá pi Dios xobo yoshihuano tsi toa nohiria quëyoxëhi quiha Dios iquia, roa ca mëstë ca Dios nohiria jaca nori iqui na. Dios xobo xo mato ra. ¹⁸ Ma parahacayamano. ¿Tonia mato xërëquë ma ni toa tiisi-tiisiria ca jaca nori ca quëscahuacanaibo? ¿Mato ó ca ma ni toa maí ca tiisi ó quëëcanaibo? Jatsi maí ca nohiria bo qui yoyoxëni ca ja manëcano iquia ra. ¹⁹ Dios qui yoyoria tsi xo toa maí ca nohiria ba tiisi, jato tiisi tsi xabahamahacatimaxëni jaca nori quëshpi na. Jabi, “Tiisi jayaria cabo paquëmahi quiha Dios, ja paracanaí cató no” ii quiha Quënëhacanish cabo. ²⁰ Jasca, “Tiisi jaya cabá shinahai ca cahëriahi quiha Dios; mahitsa jaca nori” tihi ca tsi ii quiha. ²¹ Ja tsi xo toa nohiria ba tiisi qui chitimiyamacana iquia. Dios tsi xo toa jatiroha ca jahuë bo mato qui ati ibo-iboria. ²² Apolos, Pedro, ëa, tihi cabo mato qui Diós ani quiha mato mëbiti. Jatiroha ca maí ca jahuë bo mato qui ja ani quiha mato mëbiti. Bësöhaina, rësöhaina, tihi cabo mato qui acacani quiha. Jasca, jaboqui, huëaquë, tihi cabo mato qui acacani quiha

mato mëbiti. Tihi cabo mato qui aqui quiha mato mëbiti ra. ²³ Jasca, Cristo qui ma acacaniquë mato ri. Cristó-na bo xo mato iquia; nobá-na ma nomari. Jasca, jahëpa Diós-na xo Cristo ri.

4

Anoma tsi xo tiisimacanaibo oquëhuahaina

¹ Anoma tsi xo Apolos, Pedro, ëa, tihi cabo ma oquëhuahaina iquia. Cristo yonati bo xo noa; jaroha. Toca tsi ma shinaxëti xo noqui yoati na. Dios Chani yoatí yonoco noqui acacani quiha nohiria bo qui bërohuati. ² Jabi jia tsi jahuë chama qui nicaxëti xo yonati. ³ ¿Japa ëa ti? ¿Cristo yonati jia cara ni ëa sa? Cahëyamaquia. “Yonati jia ca xo Pablo” i mato mishni bo mitsa. “Yonati yoi xo” i huëtsa bo mitsa. Jama, ë qui iriama tsi xo toa ëa yoati nohiria bá shinahaina. Jasca, “Jia tsi xo naa ë acana” iyamaquia, quiniahi na. ⁴ Jaboqui yama tsi xo toa ëa pasomaha ca jahuë bo iquia. Jama, ¿jënahuarixo émë ë cahëyoina? Ibo roha tsi xo toa ëa, noho shinana, noho yonoco, tihi cabo cahëyoihaina. ⁵ Jatsi quiniacana. Mato tiisimacanaibo oquëhuatapiyamacana iquia, Dios qui oquë yama ja icamitsa iqui na. Joxëhi quiha Ibo ra. Manacahuë. Joxo tsi nohiria ba shina ó ca jonë ca jahuë bo bërohuaxëhi quiha. Toa barí tsi oquëhuahacaxëhi quiha nohiria bo, jia ca ja acani ca quëshpi na. Jato copixëhi quiha Dios. ⁶ Jaha tsi Apolos, ëa, tihi cabo oquëhuayamacana, ëbë xatë bá. Quiniacaxëcahuë, Quënëhacanish cabo pasomaha ma iyamano. Anoma tsi xo toa huësti ca maestro oquëhuahaina, maestro huëtsa qui nicasyamaqui na.

Corintó ca chahahuacanaibo Pabló raahanina

⁷ ¿Nohiria huëtsa bo oquë ni mato tiisi pa? ¿Jatiroha ca jahuë bo Diós mato ayamayamani? Ja quëshpi tsi ¿jënahuariahax “Oquë xo noa” i ma na, Dios quima mato tiisi ma biquë no? ⁸ Quiniacaxëcahuë. Mamë paraqui mato iquia. Tonia chama bo, narisyamacanaibo, tihi cabo ma nori ca quëscahuachi mato pë. Noqui axma tsi chama-chamaria bo ma manëniquë iquia. E ra ma. Yonahai ca chama bo ma iti ó quëëquia. Tocapimarohano tsi mato bëta xo tsi yonaxëquia ëa ri tia.

⁹ Jama, noqui Dios Chani chitahëhuati ibo bo tsi xo toa jahuë rësó no. Tonia jaroha ca iti ó tsi Diós noqui janani quiha, nohiria bo bësojó tsi rësoti raahacanish ca joni bo jascaria. Noqui tsi xo noitiria. No tënëhai ca tsayacani quiha jatiroha cabo, naa ángel bo, nohiria bo tëquë. ¹⁰ Noqui ratëcani quiha tsayahax na. Cristo iqui tsi nohiria bo qui yoyoxëni xo no acaina. Jama, Cristo ó tsi mato ti tsi xo toa tiisi jaya cabo tonia. Mato oquëhuacani quiha Dios cahëyamacanaibo iquia. Jama pi xo noa. Noqui tsi xo toa chama yama. Noqui nomacani quiha pë. ¹¹ Jaboqui tsi paxnaqui noa. Tëshinaqui noa. Sahuëti narisqui noa. Noqui setiacani quiha; mahitsa. Noqui tsi xo xobo yama cabo. ¹² Jasca, noba mëquënë tsi yonocoqui noa, noba piti copixëna. Nohiria bá noqui roano tsi jato bax bëhoxqui noa, Diós jato shomahuano iquish na. Noqui pi ja tënëmacano tsi caxayamaqui noa. Jato tënëqui noa ra. ¹³ Noqui pasomaha pi nohiria bo chanino tsi caxahaxma tsi jato qui chaniqui noa. Jaboqui tsi Dios cahëyamacanaibo qui quërasria ca masa xo noa rë. Jabi toca xo noqui Dios Chani yoacanaibo iquia.

¹⁴ Nëca tsi mato qui quënëquí tsi mato bërabihuaquia tonia. Mato bërabihuacasyama xo ëa iquia. Nëca tsi mato qui quënëquia mato yobaxëna, noho xocobo ma nori ca quëshpi na. ¹⁵ Jabi huëstima ca Cristo yoati tiisimacanaibo ma jayacamitsa; jama, huësti roha ca mato jahëpa yoi nori. Mato jahëpa ë manëniquë, Cristo qui mato ë mëpiniquë no. Mato qui Dios Chani

yoatí chitahëhuanish ca ëa xo naa. ¹⁶ Ja tsi xo toa noho jabi jascacana iquia. ¹⁷ Jasca, mato qui Timoteo, naa noho noi ca baquë raaquia. Ibo Cristo yonoco ariahi quiha. Jatsi mato mëbixëhi quiha joxo na. E yoahai ca Cristo quinia mato nicamatëquëxëhi quiha, naa jatiroha ca iglesia bo xo tsi ë tiismahai ca jascaria.

¹⁸ Basi ë nori iqui tsi jamë shinamixxëni mato huësti huësti ca manëniquë rë. “Joyamaxëhi quiha Pablo, noqui raquëhi na” icani quiha tonia. ¹⁹ Jaha bësocapa. Dios qui pi jiano tsi mëri tsi mato qui joxëquia ra. Joxo tsi toá ca shinamixxëni cabá acái ca yonoco jixxëquia ra, jato chani nicahi ë nomari. ²⁰ Noba shina ó xo pi Díos yonayamano tsi mahitsa tsi xo toa no chanihaina iquia. Chama yama xo. Jama, no noho xo pi ja yonano tsi jahuë chama jayaxëqui noa jahuë yonoco ati. ²¹ Jatsi, ¿jënahuaxëhi ni ëa, mato qui joxo na? Toa nicaquia. ¿Joxëhi ni ëa, mato raahati? ¿Oquëyamayamahi ni ishima tsi ë johaina? Jabija; oquë tsi xo noihax ë joxëhaina iquia ra. Jama, mato quinia yoi bo pi ma niabëriyamano tsi mato raahaxëquia joxo na.

5

Niahacaxëti xo jochahuaxëni ca chahahuahai cato

¹ Jishopë. Chani yoi ca ë nicahitaquë mato yoati na. “Corintó ca chahahuacanaibo xërëquë ó tsi bësohi quiha jochahuaxëni cato, naa jahuë jahëpa ahui ya racahai cato” ii quiha toa nahax ca bëcanai ca nohiria rë. Anoma xo toa ja tocachaina ra. Tocayamacani quiha Dios cahëyamacanaibo ri. ² ¿Jënahuariahax “Jënima tsi xo ja acaina” i ma na pë? Cohuëyama xo mato; rani ma nori iquia. Jama, ja acai ca iqui tsi mato quima niahacaxëti xo toa joni iquia. ³ Jaboqui basi xo ëa rë; jama, mato bëta iquiria ë nori, mato ë shina-shinahai quëshpi na. Jabi anoma tsi xo toa jochahuaxëni cató acaina iquia. Mato bëtahaxma tsi mato quima ja niahacati xo iquia Ibo Jesu chamá no. ⁴⁻⁵ Jabi arati ma catino tsi mato bëtaxëquia noho shinaná no. Noba Jesu chamá tsi Satanás qui naa joni mëacana, Satanás tënëmano iquish na, jahuë jocha quima Dios quiri ja bësono. Tocacana, jahuë shina xabahamahacano iquish na, naa Ibo Jesucristo joxëquë no.

⁶ Anoma tsi xo “Jënima xo ja acana” i ma aina pë. Jabi mëri tsi pacanahi quiha jocha pistia, levadura mishni mapari xara pacanahai jascaria. ⁷ Jabi pascua fiesta pinox pari tsi quiha jato xobó ca levadura tsëcaparini quiha Israël ca nohiria. Jascaria tsi mato quima naa levadura yoi, naa jochahuaxëni ca joni tsëcacana. Tocapihi tsi jënimaxëqui mato ra. Siri tsi ma bahuëhacaniquë. ¿Mato jocha quëshpi tsi Jesucristo, naa noba pascua oveja tëpas-hacayamayamani? ⁸ Jaha tsi pascua fiesta jascaria jaya xo noqui chahahuacanaibo ri, naa arati no catiquë no. Jaboqui catipama tsi jocha quima no paquëmahacani ca shinaqui noa. Jasca, noqui jochamahai ca jahuë bo no jaquimaxëti xo, Dios qui arahi na. Jochahaxmä tsi jabija ca Dios qui no arano ra.

⁹ Jasca, siri tsi mato qui carta huëtza ë raaniquë. Toa carta ó tsi “Jochahuaxëni ca chahahuacanaibo ya rabë nabëquiyamacana” i ë niquë. ¹⁰ Jaha bësocapa. Tobi quiha jochahuaxëni ca chahahuayamacanaibo rë. Jato xërëquë tsi xo toa anoma ca chotamis-canaibo, paratá-naxëni cabo, yomacanaibo, mahitsa ca dios bo qui aracanaibo. “Tihi cabo ya rabënyamacana” iyama ë niquë. Inonoma xo. ¿Jënahuariahax chahahuayamacanaibo tëquë quima no aquëquëna? Inoma quiha. Tocapiqui tsi naa mai ma jisbayaxëti xo ra. ¹¹ Jama, chahahuahai ca quënahacanish ca nohiria pi jari jochacasno tsi toa nohiria ya rabë nabëquiyamacana, “Dios nohiria xo noa”

i jaca quë no. Toca ca nohiria yaxo tsi piyamacana iquia. Anoma quiha. ¹²⁻¹³Yobaquí tsi Dios cahëyamacanaibo yobayamaquia ra. Jato copiti Ibo xo Dios ra. Jama, chahahuacanaibo pi jochano tsi jato ma copixëti xo, “Mato maxo quima jochahuaxëni ca tsëcacana” i Dios Chani ai iqui na.

6

Dios cahëyamacanaibo qui mabë xatë bo ma bocanaina copihacati

¹ Mabë xatë bo pasomaha ca jahuëcara ca pi jayaquí tsi chahahuayamacanaibo qui jato boyamacana yobahacati. Anoma quiha. ¿Oquë ma ni Dios nohiria bo qui jato ma bohaina, yobahacati? ² ¿Jabi Dios cahëyamacanaibo yobayamayamaxëhi ni Dios nohiria bo? Tocaxëqui noa iquia. Tocapiquí tsi ¿mato xërëquë ca iriama ca jahuë bo yobati mëtsama ni mato rë? Jato ma yobaxëti xo iquia. ³ Tsayacahuë. Naipá ca ángel bo yonaxëqui noa ra. Jato pi yonaquí tsi nëá ca Dios nohiria bo yobati mëtsa xo noa tia. ⁴ Mato xërëquë pi mabë xatë bo joi ibëquinano tsi ¿Dios cahëyamahai ca juez qui jato raahi ni mato pë, copihacati? Iriama tsi xo Dios cahëyamacanaiba yoba ra. ⁵ Jishopë. Ma bërabixëti xo iquia. ¿Yama ni mato xërëquë ca jia tsi yobati mëtsa cato pa? Tonia tobi huësti përe xo iquia. ⁶ Jama, chahahuayamahai ca juez qui mabë xatë bo hoqui mato pë, chahahuayamacanaibo bësajo ax tsi jato qui quësoxëna. Anoma quiha.

⁷ Anoma tsi xo toa Dios cahëyamacanaibo qui mabë xatë bo bohaina iquia, jato qui quësoxëna. ¿Oquë ma ni janyama ca ma tënëhaina yoi ca tahëhax na? ¿Oquë ma ni mato jahuë bo ma bënöhaina? Tihi tsi ma ati xo. ⁸ Jama, mabë xatë bo qui quësocasqui mato pë, juez bësajo ax na. Quësoquí tsi jato janyamaquai mato iquia. Ma acai cató tsi jato quima yomaquí mato ra.

Dios xobo xo mato

⁹ Diós otohái ca qui jicoyamaxëhi quiha nohiria yoi bo. Tihi ca tsi cahëqui mato ra. Diós otohái ca qui jicoyamaxëhi quiha yoxa mëtsaxëniiria cabo, mahitsa ca dios bo qui aracanaibo. Jicoyamaxëhi quiha huëtsa ba ahui ninicanaibo, jato huëtsa ya jobonacanaibo. ¹⁰ Jicoyamaxëhi quiha yomacanaibo, paratá-naxëni cabo, pahëcanaibo, ranimixëni cabo, yomaxëni cabo. Tihi ca tsi xo toa jicoyamahaina. ¹¹ Jabi toca tsi mato huëstima cabo i-ipaoni quiha, chahahuanox pari. Jama, ma bahuëhacaniquë. Dios qui ma aquëquëmahaca-niquë jia iti. Jasca, Jesucristo chama, Dios Shinana, tihi cabá tsi ma xabahamahacaniquë ra.

Chahahuacanaiba jabi

¹² “Noqui jënima tsi xo toa no acatsai ca tëquë” i mato ó ca huësti mitsa. ¿Ocamani? Tobi quiha anoma ca acaina ra. Noqui mëbiyamahai ca tsi xo toa. Ja tsi xo toa yoi ca ayamaxëquia. Jatiroha ca ati mëtsa xo ëa iquia; jama, quinia-quiniaquia yoi cató tsi ë yonahacayamano iquish na. ¹³ ¿Japa no pihaina? ¿Noba pocó-na piti acacayamayamani? Jasca, ¿noba oriquiti-na noba poco acacayamani? Jatsi iriama tsi xo no pihaina iquia. Jatihuahacaxëhi noba yora bo, noba oriquiti, tihi cabo tëquëta. Jasca noba yora bo ri. Anoma ca chotati noba yora bo acacayamani quiha, Diós-na jaca nori. Noqui mëbicatsi quiha Dios ra, jahuë chamá no. ¹⁴ Jabi jahuë chamá tsi noba yora yoi bo chamahuacatsi quiha, naa noba Ibo Jesucristo ja bësomani ca chama jasca cató no.

¹⁵ Cristó-na bo xo mato yora bo ra. Jatsi, ¿jënahuariahax raca mëtsaxëniiria ca yoxa qui mato yora bo ma riina? Dios qui anoma quiha. ¹⁶ Mëtsaxëniiria ca

yoxa qui pi joni riino tsi huëstinacani quiha jato dos ca yora bo ra, “Huësti ca yora manëcane quiha rabëta” i Dios Chani ai quëshpi na. ¹⁷ Jama, Dios qui pi mamë ai tsi Cristo ya huëstinaqui mato. Toca tsi jahuë jabi, jahuë shinana, tihì cabo xatënaqui mato.

¹⁸ Jatsi quiniacaxëcahuë. Anoma ca chotahai ca jocha quima jabacana. Anoma quiha. Jahuëcara ca jocha huëtsa pi nohiriá ano tsi yoshihuahacayamaxëhi quiha jahuë yora. Jama, anoma ca jocha ai tsi jahuë yora pasomaha jochahi quiha ra. ¹⁹ Quiniacaxëcahuë. Mato yora bo tsi xo toa Espíritu Santo xobo ra. Toa cahëqui mato. Jahá tsi racahi quiha mato qui Diós ani ca Shinana. Ja tsi xo toa mato yora ibo tsi xo Dios; mató-na ja nomari. ²⁰ Jabi Cristo copixëni ca jimí tsi ma copihacaniquë ra. Ja tsi xo toa mato yora bá tsi Dios ma oquëhuaxëti xo ma acai cató no.

7

Ahui biti yoba

¹ Jabi ë qui ma raani ca carta ó tsi ahui bichiquiti yoati tsi ma nicaniquë. E quëbihai ca tsi xo naa: Jariapari tsi ë qui jia tsi xo ahui biyamahaina ra. ² Jama, jocha iqui tsi jia tsi xo jatiroha ca joni jahuë ahui yoi jayahaina. Jasca, jahuë bënë yol jayaxëti xo jatiroha ca yoxa bo ri, jochati ja tanamahacacayamano iquish na. ³ Jasca, jahuë ahui otoxëti xo bënë. Jahuë bënë otoxëti xo ahui ri. ⁴ Jasca, jahuë yora ibo ma xo ahuini, bënë-na ja nori. Jasca, jahuë yora ibo ma xo bënë ri, jahuë ahuini-na ja nori. ⁵ Ja tsi xo toa “Mia basitaquia” iyamaxëti xo bënë, jahuë ahui qui. Jama, mato qui jiapino tsi jënima tsi xo toa tanaroha pistia no tsi ma basitahaina iquia, oquë tsi Dios qui bëhox-xëna. Jaquirëquë ma jobonatëquëxëti xo, Satanás mato tanamayamano jochati. ⁶ Tihì ca tsi xo toa ë shinahaina, noho yoba-yobaria ja nomari. ⁷ Jama, ë qui oquë tsi xo toa joni bá ahui jayamahaina iquia, naa ëa jascaria. Jama, inoma ca xo. Jamëri tsi xo toa jatiroha ca nohiria qui Diós ani ca jabi ra. Huësti ca tsi xo toa ahui bicasyamahaina; huëtsa tsi xo toa ahui bicasyamahaina. Tihì ca quinia tsi xo jënima iquia.

Pablo Yoba

⁸ Bënoma cabo, bënë imanish cabo, tihì cabo qui noho yoba tsi xo naa: “Oquë tsi xo bënoma ca iquiina” iquia. ⁹ Jama, “E ra ma. E qui yoi tsi xo bënoma ca iquiina” i tsohuëcara pi no tsi oquë tsi xo ahuini, bënë, tihì cabo bichiina. ¹⁰⁻¹¹ Jasca, bënë bo, ahui bo, tihì cabo qui noho yoba tsi xo naa, naa Jesú yonina. “Jahuë bënë niayamaxëti xo ahuini ra” i ja ni quiha. Jascaria, “Jahuë ahui niayamaxëti xo bënë ra” i ja ni quiha. Jasca, jahuë bënë pi niabëriaquí tsi bënë huëtsa ja biyamaxëti xo. Bënoma ca icasyamahi tsi jahari jahuë bënë qui ja cati xo iquia.

¹² Tëxë bo qui noho yoba tsi xo naa, Ibobá-na ja nomari. Chahahuayamahai ca ahui pi jayaquí tsi jahuë ahui bënë niayamano, naa ja bëta pi ja racacasquë no. ¹³ Jasca ahui ri. Chahahuayamahai ca bënë pi jayaquí tsi jahuë bënë ja niayamano, ja bëta pi ja racacasquë no. ¹⁴ Ja racanabëquipicano tsi toa chahahuayamahai ca bënë chahahuamitsa, jahuë ahuini jabi jia ca tsayaquí na. Jasca, toa chahahuayamahai ca ahuini chahahuamitsa jaa ri, jahuë bënë jabi jia ca tsayaquí na. Jama, ja racanabëquipiyamacano tsi çjënahuariaxo raca jato xocobá chahahuana? Jama, ja racanabëquipicano tsi shomahuahacaxëhi quiha jato xocobo ra, jato chahahuahai ca nabo iqui na. ¹⁵ Jama, chahahuayamahai ca xatë pi jisbëriacasno tsi chitiyamacana. Ja jisbayano. Ja jisbayapino tsi tsëquë tsi xo toa chahahuahai ca xatë. Jabi Diós mato

quënani quiha rani tsi racanabëquiti. ¹⁶ Jatsi shinaparicana, chahahuahai ca ahui bá. “Oquë tsi xo noho chahahuayamahai ca bënë ë chitiahaina, chahahuamaxëna” i ma mitsa rë. Jama xo ra. ¿Mato bënë bo chahahuamati mëtsa yoi ni mato sa? Jasca, mato chahahuahai ca bënë bo ri. ¿Mato ahui bo chahahuamati mëtsa yoi ni mato sa? Ja iqui tsi mato chahahuayamahai ca xatë jisbayacaspino tsi oquë tsi xo toa ma oquëxnahaina iquia.

Mato jabi bo, mato tiisi, mato yonoco, tihi cabo qui yosanayamacana

¹⁷ Jabi iglesiá ca chahahuacanaibo qui ë acai ca yoba tsi xo naa: Mato jabi bo, mato tiisi, mato yonoco, tihi cabo mato qui acacani quiha. Jatsi Diós mato qui acacani ca iti qui yosanayamacana. ¹⁸ ¿Jodio ma ini, Cristo chahahuanox pari? Jatsi chahahuaxo tsi carayana manëti tanayamacana. ¿Carayana ma ini, Cristo chahahuanox pari? Jatsi jodioba jabi bo biyamacana. ¹⁹ Jabi Dios qui iriama tsi xo carayanabo, jodiobo, tihi caba jabi bo. Ja qui jia ca tsi xo toa jahuë yoba bo no nica-nicahaina ra.

²⁰ ¿Japa? ¿Jahuë yonoco ma jayani, Diós mato quënaquë no? Jatsi toa yonoco jari ma ano. ²¹ ¿Japa yonati ma ini, Dios chahahuanox pari? Jatsi shina-huëjënayamacana, yonati ma nori ca tahëhax na. Jama, mato chamá pi mato paquëmacasno tsi jënima quiha. Tsëquëcana. ²² ¿Japa; chamá mato yona-yonani, Diós mato quënaquë no? Jatsi ranicana. Jaboqui mato yona-yonayamaxëhi quiha jocha chama iquia. Cristo ó tsi tsëquë xo mato. ¿Japa; chama yama ma ini, Diós mato quënaquë no? Ranicana. Jaboqui Cristo yonati xo mato ra. ²³ Jabi Jesu copixëni ca jimí tsi ma copihacani quiha. Ja quëshpi tsi Cristó-na bo xo mato ra. Jaha tsi joni bo qui raquëyamacana. ²⁴ Jisa ëbë xatë bá. Diós mato janani ca iti ó tsi chitëcana, naa ma iqui ca jascaria chahahuanox pari. Mato yonoco, mato jabi bo, mato tiisi, tihi cabo qui yosanayamacana, Diós mato mëbihai quëshpi na.

Bënoma cabo — Bënë imanish cabo

²⁵ Jabi mato bënoma ca yoxajahi bo yoati tsi ëa ma nicaniquë mato cartá no. Jabi yama tsi xo toa Ilobá ë qui ani ca yoba yoi mato qui ati, naa mato yoxajahi bo yoati na. Jama, noho yoba mato qui axëquia, Diós shomahuahai cató tsi yobati tiisi ë qui acacani iqui na. Chahahuahacaxëti xo noho yoba ri iquia. ²⁶ Nicacana. Anomariaxëhi quiha no bësöhaina, naa Ibo Jesucristo bacanox pari no. Ja quëshpi tsi ë qui oquë tsi xo bënoma ca iquiina iquia. ²⁷ Jama, ahui pi otohí tsi aquëquëyamacana. Jasca, bënomapiquí tsi ahui biyamacana. ²⁸ Jama, ahui pi bichi tsi jochayamahi quiha joni. Jasca, jochayamahi quiha yoxajahi ri, bënë pi ja biquë no. Jama, xatë pi ja bicano tsi noiticaxëcani quiha iquia. Bëronomaxëhi quiha racanabëquiti ja jabicanaina naatiyá no. Ja quëshpi tsi nëca ca yoba jato qui aquia, jato mëbixëna.

²⁹ E yoacatsai ca tsi xo naa, ëbë xatë bá: Tsëquëti basima tsi xo toa noba Ibo bacahaina ra. Ja iqui tsi ahui yama cabo jascaria tsi bësoxëti xo ahui jaya cabo iquia. ³⁰ Jaboqui Dios yonoco no ati xo ra. Jahuëcaracá noqui jënëmayamano ra, naa cohuë iquiina, ranihaina, jahuëmishni bo copihaina.

³¹ Jasca, jahuëmishni bo copipiquí tsi iniapiquí tsi tihi ca jahuë bo no noiya-mano, Dios yonoco aquí na. Jabi huinocaxëhi quiha naa maí ca jahuë bo tëquë. ³² Jabi ë qui jia tsi xo toa maí ca jahuë bo yoati tsi ma shina-huëjënayamahaina, Dios yonoco aquí na. ³³ Jama, tocamapi xo toa ahui jaya cato. Maí ca jahuë bo shina-shinahi quiha. ³⁴ Jabi dos ca quiniá tsi ninihacahi quiha toa ahui jaya cato. Jahuë ahui jatsi Dios, tihi cabo shina-shinahi quiha. Jasca xo yoxa bo ri. Bënoma cabo, bënë jayama cabo, tihi cabo tsi xo toa Dios yonoco ariapicanaibo. Dios qui jato yora bo, jato shinana, tihi cabo

aquëquëmacascani quiha ra. Jama, tocamapi xo bënë jaya cato iquia. Mai ca jahuë bo shinahi quiha jahuë bënë ranihuacatsi na.

³⁵ Nêca tsi mato qui chaniquia mato mëbicatsi na. Mato quëtiacasyama xo ëa ra. Jatsi ahui pi ma bicasno tsi jënima xo. Jaha ë quëehai ca tsi xo toa quinia jiá tsi ma bëso-bësohaina. Jia tsi Dios yonoco ma aria-ariano, jahuëcara ca huëtsa bo shinaxoma.

³⁶ Jasca, tobi quiha toa jato yoxajahi jaya cabo, naa bënë yama cabo. “Oquë tsi xo bënë noho jahini bichiina. Shina coshi xo rë” i jahëpa mitsa. Toca pi shinaquí tsi jahuë jahi bax bënë ja bino ra. Jochayamahi quiha tocahi na.

³⁷ Jama, tobi quiha toa jahuë jahi huashihai cato. Ja qui oquë tsi xo jahuë yoxajahi bo bënoma ca iquiina. Toca pi ja shina-shinano tsi jënima tsi xo toa jahuë jahi bax bënë ja biyamahaina. ³⁸ Jatsi jia tsi aqui quiha toa jahuë jahi bax bënë biyamahai cato. Jasca, jia tsi aqui quiha toa jahuë jahi bax bënë bichii ca ri. Jama, oquë tsi aqui quiha toa jahuë jahi bax bënë biyamahai cato iquia.

³⁹ Jabi jahuë bënë xatë tsi xo ahui ra. Ja bësono tsi bënë huëtsa ja binoma quiha. Jama, jahuë bënë pi rësono tsi tsëquë xo yoxa tsohuëcara ca bënë paxa ca bixëna. Ibo chahahuahai ca toa joni iti xo iquia. ⁴⁰ Jama, bënë paxa ca pi ja biyamano tsi oquëxëhi quiha ja rani-ranihaina iquia. Jabi toca tsi shinahi quiha Dios Shinana ri iipiquia ra.

8

Ídolo bo qui acacahai ca nami

¹ Jaboqui ídolo bo qui acacahai ca nami yoati tsi chanicasquia. Jabi naa jahuë bo yoati tsi bërono tsi xo toa “Cahëyoiqui noa ra” i no aina. Ja iqui tsi no quiniaxëti xo ra, no tocamaxëno iquish na. Mahitsa noqui oquëhuahi quiha toca ca no shinahaina pë. Jama, noqui shinahamahi ca tsi xo toa no noiha. ² “Cahëyoiquia” iipihii tsi jari cahëti basi toa joni imitsa ra, cahëti tiisi naris-hi na. ³ Jama, Dios pi ja noino tsi toa joni cahëyoihii quiha Dios.

⁴ Jatsi ídolo bo qui acacahai ca nami no tsayano. ¿Piti ni? Jariapari tsi chama yama ídolo nori ca cahëqui noa. Dios ma xo toa ra. Huësti roha tsi xo toa noba Dios yoi. ⁵ Jama, “Tobi xo toa huëstima ca dios bo” ii quiha huësti huësti ca nohiria pë, naa naipá ca dios bo, mai ca dios bo. Jabi iirohapihii tsi mahitsa ca xo iquia. ⁶ Noba Dios yoi tsi xo huëstita. Yama xo huëtsa ra. Noba Jahëpa, naa jatiroha ca nêhohuanish ca tsi xo naa. Jasca, bëso xo noa, jahuë oquë jismaxëna. Jatsi tobi quiha huësti ca Ibo yoi ri, naa noba Jesucristo. Jahuë chamá tsi jatiroha ca nêhohuahacani quiha. Jahá tsi bëso xo noa ra.

⁷ Jabi naa jabija ca tiisi cahëyamahi quiha chahahuacanaibo tēquë rë, naa ídolo bo yoati na. Bëso jaca nori quëscahuacani quiha. Ja iqui tsi ídolo qui acacaha ca nami picasyama ca xo, jocha ja nori ca quëscahuacáqui na, coshi yama jato shina nori iqui na. ⁸ Shinaparicana. ¿Jênahuariaxo namí noqui mëbina, Dios ja noqui rabënamaxëna? Japi no piyamano tsi yama tsi xo toa no bënohaina. Jasca pi pihii tsi oquënyamaqui noa. ⁹ Jabi jënima tsi xo toa ídolo qui acacaha ca nami no pihaina iquia. Jama, quiniacaxëcahuë. Mato chama yama ca xatë bo ma jochamayamano, jahuëcara ca ma pihai cató no.

¹⁰ Shinaparicana. Mato shina coshi bo qui jënima tsi xo ídolo arati xobo xo tsi ma pihaina. Jama, ¿jahuë shinaxëhi ni toa shina coshi yama cato, toá ca ma pihai ca jisi na? Jisi tsi toa xo tsi ja qui yoi ca, naa ídolo qui acacaha ca nami pixëhi quiha jaa ri iquia. Anoma quiha. ¹¹ Jatsi toca tsi bënnoxëhi quiha mabë xatë coshi yama cato, mato oquë ca tiisi iqui na. Jabi ja bax Cristo

rësoni quiha jaa ri. ¹² Tocapihi tsi Cristo yoba pasomaha jochaxëqui mato ra, mabë xatë pasomaha ma jochahai cató no. Toca tsi jato shina coshi yama ca yoshihuaxëqui mato iquia. ¹³ Jaha pi idolo bo qui acacaha ca nami ë pihai cató ëbë xatë jochamano tsi toa nami piyamaxëquia ra. Pitëquëpistiayamariaxëquia, ëbë xatë jochamacasyamaquí na.

9

Parata copi Pabló biyamanina Dios Chani yoaquí na

¹ Dios Chani chitahëhuati ibo yoi ca ëa xo naa ra. Ea ti tsi xo chama yama. Ea ti tsi xo toa noba Ibo Jesu jïsnish cato. Jasca, ëa ti tsi xo toa noba Ibo qui mato chitimima-nish cato ra. Tihi ca ëa xo naa ra. ² Jama, tobi quiha toa noho chama bicasyamacanaibo rë, Chani chitahëhuati ibo ë nomari ca quëscahuauquí na. Jama, Chani chitahëhuati ibo yoi ca ë nori ca cahëqui mato ra, Ibo qui mato ë mëpini iquí na.

³ Nëca tsi noho chama bicasyamacanaibo quëbiquia ra: ⁴ ¿Oriquití, jënë, tihi cabo bití chama yama ni ëa pa, noho yonoco quëshpi na? ⁵ ¿Jato ahui bo pi Chani chitahëhuati ibo huëttsa bá bono tsi jasca ca tocati chama yama ni ëa pa? ¿Dios Chani yoaquí tsi jato ahui bo boyamayamacahi ni Pedro, noba Iboba noma bo, tihi cabo? ⁶ Tonia ëa, Bernabé roha tsi xo toa yonoco-yonocohaina noba oriquiti copiti parata quëshpi na. ⁷ Tsayacahuë. Yonocopama tsi ¿jahué gasto yoi bo copihí ni soldado pa? Jasca, huai banaxo tsi ¿jahué bimi piyamayamahi ni ibo pa? Jasca, vaca otoquí tsi ¿vaca xoma ayamayamahi ni jato obëso cato pa? ⁸ Tihi ca joni ba yoba roha jaca nori ca ma quëscahuamitsa, jaca nomari. Jasca ca yoba yobahi quiha Dios Chani ri ra. ⁹ Moisés quënëni ca yoba tsayacahuë. “Rëmapahacayamaxëti xo huëyë, trigo ja timaquë no” ii quiha. ¿Japa huëyë roha shinahi Dios ini, toa yoba acacaniquë no? ¹⁰ Jama xo ra. Noqui ri, naa jahuë Chani yoacanaibo shinahi ja ini quiha. Toa yoba quënëhacani quiha noqui mëbixëna. Jabi copihacaxëti xo Dios yonoco acanaibo ri, naa huaí ca banacanaibo, tësacanaibo, tihi cabo copihacahai jascaria. ¹¹ ¿Jabi mato shina ó tsi Dios Chani ë banamayamani? Mato pi mëbirohahi tsi ¿ë acái ca quëshpi tsi oriquiti, sahuëti, parata, tihi cabo bití ó pasoyamayamaxëhi ni ëa? ¹² Huëttsa bo qui tihi ca jahuë bo aqui mato pé, Dios Chani mato ja tiisimacaquë no. ¿Japa ëa tí? ¿Jato oquë tsi mato ë mëbiyamayamani? ¿Mato quima ca copi ó pasoyamayamaxëhi ni ëa pa?

Tsayacahuë. Mato jahuë bo ë bënëpistiayama-rianiquë mato mëbiquí na. Jama, ë biniani quiha, Cristo Chani jia ca pasomaha nohiria bo chaniyamano iquish na. ¹³ Shinaparicana. ¿Arati xobo quima jato oriquiti biyamayamacahi ni toá ca yonococanaibo? Jasca, ¿altar quima jato oriquiti biyamayamacahi ni toá ca yonococanaibo ri jato yonoco quëshpi na? ¹⁴ Jascaria ca quiniá tsi copihacaxëti xo Dios xabahamati Chani yoacanaibo ri jato yonoco quëshpi na. Iboba yoba tsi xo toa ra.

¹⁵ Jabi mato piti, mato parata, tihi cabo bití chama jaya ca ëa xo naa ra, bicasyamahai ca ë nori. Jasca, jaboqui mato qui naa carta quënëyamaquia parata ó quëëquí na. E qui jiaria tsi xo toa copi biyamahaina, Dios Chani yoaquí na. Mato parata pi birohahi tsi ¿jënahuariahax “Parata biyamaquia” i ë quë ana? Mato parata bicasyamahai ca ëa xo naa. E qui oquë tsi xo rësoxëhaina, bihaxma ra. ¹⁶ Jabi Dios Chani yoatí ë quënahacaniquë. Yoapama tsi “Jia tsi xo toa ë acaina ra” i ë tima xo. Inoma quiha. Toa yonoco ë qui acacani quiha ati. Dios yonoco quiha. Toa Chani pi yoayamahi tsi noiti-noitixëquia. ¹⁷ Jasca, naa Chani yoatí yonoco pi ë birohano tsi jënima ja

iquë aquë, naa parata bichiina toa yonoco quëshpi na. Jama, toa yonoco ë biyamaniquë. E qui ja acacani quiha ati. ¹⁸ Nicacana. Tobi toa noho copi yoi ra. Noho copi tsi xo toa mahitsa Dios Chani yoahaina iquia, parata bixoma. Yoapama tsi mato quima tih ca jahuë bo biti chama jaya xo ëa ra, bicasyamahai ca ë nori. E qui jia tsi xo ë tocahaina ra.

Jatiroha ca nohiria maxo Pabló bëbocasnina Cristo qui

¹⁹ Tsëquë xo ëa ra. Yonati ma xo ëa. Yama tsi xo toa ëa yonahaina, copihaina, Dios yonoco ë ano iquish na. Jama, jatiroha ca nohiria ba yonati ca ëa xo naa iquia, huëstima cabo Cristo qui bëboxëna. ²⁰ Jodiobo qui Dios Chani yoapihi tsi jodio manëquia, Cristo qui jato bëboxëna. Moisés yoba nama cabo qui yoapiquí tsi toa yoba namá tsi ëmë janaquia Cristo qui jato bëboxëna. Toa yoba nicaxëquia ëa ri, ja nama yoi ë nomari. ²¹ Jasca, carayanabo qui Dios Chani yoahi tsi jato jascaria tsi manëquia, Cristo qui jato bëboxëna. Jato bëtapiquí tsi noho jodioba jabi bo ayamaquia. Jabi tocapiyoihi tsi jari Dios yoba nama xo ëa ra. Tsëquë ma xo ëa, Cristo yoba nicayamaxëna. ²² Jasca, chama yama ca tiisimahama ca chahahuacanaibo pi yahi tsi jato jascaria tsi manëquia jato mëbixëna. Jisna; jatiroha ca nohiria bo jascaria tsi manëquia ra, jatiroha ca quiniá tsi Cristo qui jato bëboxëna. ²³ Tocaquia ra xabahamati Chani nohiria bá nicano iquish na. Jasca, tocapihi tsi shomahuacaxëquia ëa ri.

Dios mana ca premio no bëbono

²⁴ Shinapricana. Carrerá tsi jabana-bëquicani quiha jabati axëni cabo tëquë. Jabayocani quiha premio bëboxëna. Jama, huësti roha ca tsi xo toa premio bëbohaina. Jatsi toa jabati axëni ca jascariá tsi Dios yonoco ma ati xo mato ri, Dios mana ca premio bëboxëna. ²⁵ Bëbopicastsi tsi ma quinia-quiniaxëti xo iquia, mato shinana, mato yora bo, tih cabo coshino iquish na. Jabi jabati axëni ca tsayacana. Jahuë yora coshihuahi quiha mai ca naamayamahai ca premio bëboxëna. ²⁶ Jaha tsi mëstë tsi jabariahai ca ëa xo naa ra. Ea ti tsi xo bëbocatsaina. Ea ti tsi xo nianahaina, mahitsa naxë tox-toxhacai ca ë nomari. ²⁷ Ea ti tsi xo toa noho yora ó bësohaina. Noho yonati tsi xo ra. Tih ca tsi aquia ra bëboxëna. Jasca, naa carrera quima niahacacasyama xo ëa ra, “Naa carrera qui jicocana” i huëtsa bo qui ë ni quëshpi na. Bërabiria tsi xo toa niahacahaina ra.

10

Idolo bo pasomaha ca yoba

¹ Noba naboyamabo bax Diós ani ca ma shina-bënoyamano, ëbë xatë bá. Xabachá racapama tsi quiha tsémó tsi ja mëpihaca-caniquë, Egipto cabo quima ax ja jabacaquë no. Jabahax tsi quiha Diós mëbihai cató tsi Ia Shini ja nacoyocaniquë. ² Toca tsi ja mëbihacacaquë tsi quiha Moisés, naa jato rëquëniniti ibo ja chahahuayoicaniquë, naa jato tëquëta. Jatsi jato bax Diós janani ca yonati Moisés ini ca ja jistapicani quiha. ³ Jasca, xabachá tsi racapama tsi Diós raani ca mapari noba naborëquëbá piniquë jato tëquëta. ⁴ Jasca, toa xo tsi Diós jato qui ani ca jënëpaxa ja acaniquë, jato tëquëta. Jabi jato banahuani ca maxax chahitaxëni, naa Diós raani ca maxax quima ca jënëpaxa ja acani quiha. Jabi Cristo jascaria naa maxax ini quiha, jahá tsi ja mëbihacani iqui na. ⁵ Toca tsi noba naborëquëbo Diós shomahuacquë ri tsi quiha jari Dios huëstima cabá nicayamaniquë rë. Ja quëshpi tsi ja quëyohacacanicquë xabachá no.

⁶ Jabi ocapijaniquë noqui yobaxëna, yoi ca ó no quëëyamano, yoi ca ó ja quëëcani jascaria. ⁷ Mahitsa ca dios bo qui arayamacana, jato huësti huësti cabo ini jascaria. “Arahax ja tsahocaniquë pixëna, jënë axëna. Acax ja joicaniquë pabëxëna” ii quiha Quënëhacanish cabo jato yoati na. ⁸ Jasca, joni huëtsa ba ahui bo ya jobanayamacana, jato huësti huësti cabo ini jascaria. Toa barí tsi quiha veintitrés mil ca rësoniquë jato jocha quëshpi na. ⁹ Jatsi quiniacaxëcahuë. No acái cató tsi Ibo no tanamayamano ra, naa noba naborëquëbá ani jascaria. Ja acani quëshpi tsi rono bá jato quëyoni quiha.

¹⁰ Jasca Dios pasomaha chaniyamacana, jato mishni bo ini jascaria. Díos raani ca angél jato quëyoni quiha. ¹¹ Toca tsi ja copihacacani quiha, noqui yobaxëna, ja acani ca jasca ca jahuë bo no ayamano iquish na. Tihi ca jahuë bo quënëhacani quiha noqui, naa xaba rësó ca bësocanaibo mëbixëna. ¹² Jaha tsi quiniacaxëcahuë, “Jocha qui paquëyamahai ca ëa xo naa” i ma mitsa iqui na. Toca pi shinahi tsi jochati basima xo mato iquia.

¹³ Shinaparicana. Jochati tanamahacahi quiha nohiria bo tëquëta. Jasca, nohiria huëtsa oquë ma xo toa ma tanamahacahaina ra. Parayamaqui Dios. Mato mëbiraxëhi quiha, mato chama huino ma tanamahacayamano. Jochati ma tanamahacano tsi mato chamahuaxëhi quiha. Paxati quinia mato qui axëhi quiha, jia tsi ma tënë-tënëno.

Idolo bo qui acacanish ca piti

¹⁴ Idolo bo, naa mahitsa ca dios bo jaquimacana, ëbë xatë bá. Jato qui arayamacana. ¹⁵ Jabi tiisi jaya xo mato iquia. ¿Jabija ma ni naa ë yoahaina?

¹⁶ Jabi Iboba shiati jënë ai tsi Dios qui “Gracias” iqui noa. Jasca, naa shomahuahaca ca jënë no ano tsi ¿Cristo jimi jisti iyamayamahi ni? Jabija xo iquia. Cristo ya no rabënahai ca jismahi quiha. Jascaria no bëquëxha ca mapari no pino tsi ¿Cristo yora jisti iyamayamahi ni? Jahuë yorá tsi no shomahuahacani nori ca jismahi quiha ra, toa mapari no piquë no. ¹⁷ Jabi huësti ca mapari piqui noa, noqui tëquëta, shiati aquí na. Huësti ca maxo no nori ca jismahi quiha toa ra, huëstima ca xatë bo no iquë ri. Huësti ca maxo xo noa, jasca ca mapari no xatënahai iqui na.

¹⁸ Jodioba jabi bo no tsayano. Jato altar xo tsi yohina bo tëpascani quiha jato jocha quëshpi na. Toa acacanish ca piti ja picano tsi huësti ca maxo ca aracanaibo jaca nori ca jismahi quiha toa ja acanaina. ¹⁹ Jama, jamëri tsi xo toa carayanabá acaina, ídolobo qui piti ja acaquë no. Mahitsa tsi xo toa jato ídolo bo ra. Jasca, mahitsa tsi xo toa ja acanai ca jabi ri. ²⁰ Jabi yoshi qui acacahi quiha toa ídolo ba altár ca tëpashacanish ca yohina bo iquia, Díos-na jaca nomari. Tocahi tsi yoshi qui aracani quiha pë. Jatsi quiniacaxëcahuë. Yoshi bo ya ma rabënyamano ra. ²¹ Rabë ca shiati nëtonoma xo chahahuacanaibo ra. Iboba shiati jënë pi nëtoquí tsi yoshini shiati jënë ma nëtoyamano. Iboba shiati mapari pi piqui tsi yoshini shiati piyamacana. Anoma quiha. ²² ¿Rabë ca shiati pi no nëtono tsi ¿noqui caxayamayamaxëhi ni Dios ra? ¿Jënahuariahax Dios caxahai quima no paxana, tocapihi na?

Idolo bo qui acacanish ca piti pasomaha ca yoba

²³ “Jatiroha ca jahuë bo piti mëtsa xo noa ra” ¿ii ni mato sa? Jabija xo iquia ëa ri; yama tsi xo toa pinoma cato. Jama, jahuëcara ca no pihai cató pi nobë xatë bo no jochamano tsi oquë tsi xo toa jahuë bo no piyamahaina iquia. Nohiria mëbiyamahi quiha toa no tocahaina. ²⁴ Jatsi mamë roha shinayamacana ra. Oquë tsi xo toa nohiria huëtsa no shinahaina, jato mëbixëna. ²⁵ Jabi mato qui noho yoba tsi xo naa: Mercado ó ca nami pi

copiquí tsi picana. Copihi tsi “¿Idolo bo qui acacahax ca nami ni naa sa?” iyamacana, mato shina quëshocamitsa iqui na. ²⁶ “Ibobá-na tsi xo naa mai, jatiroha ca mai ca jahué bo ri” ii quiha Dios Chani. ²⁷ Jatsi raquëyamacana. Jasca, chahahuayamahi cató pi mato qui joi amano tsi jahué xobo qui bocahué, bocatsi na. Jatsi mato ja taahai ca jahué bo picana. “¿Idolo bo qui acacahax ca nami ni naa sa?” iyamacana mato shina tahêhax na. ²⁸ Jama, “Idolo ba nami tsi xo toa pê” i pi toá ca tsohuëcara no tsi piyamacana, mia yobahax ca iqui na. Ja shinahai ca iqui tsi piyamacana iquia. ²⁹ Jatsi quiniacaxêcahué. Mato yobahax ca qui yoi ca ma ayamano. Nohiria huêtsa shina ó no bêsoti xo. Jama, “Jishopê, tsohuëcara qui pi toa piti yoi no tsi ¿jênixo tsi toa è qui jênima ca piti piyamaxêhi ni èa rè?” i ma mitsa, picatsi na. ³⁰ Jasca, toa piti quëshpi tsi “Gracias” i Dios qui è no tsi “¿Jênahuariahax raca è qui nohiria quêsona?” ¿ii ni mato sa? ³¹ Toca pi ma shinano tsi anoma xo iquia. Jatiroha ca ma acai cató tsi Dios ma ranihuati xo. Oriquiquí tsi jênê aquí tsi Dios ranihuacana iquia. ³² Jasca, ma acai cató tsi nohiria jochamayamacana. Jodiobo, carayanabo, Dios iglesiá ca chahahuacanaibo, tihi cabo mato qui quêsoyamano ma acai ca tahêxo na. ³³ Tihi tsi acana iquia, è acai jascaria. Ea ti tsi xo toa nohiria ranihuacatsaina jatiroha ca quiniá no. Ea ti tsi xo toa jaha è quêêhai ca ayamahaina. Jama, jatiroha cabo mēbicasquia, ja xabahamahacacano iquish na.

11

¹ Noho jabi banahuacana, Jesu jabi è banahuahai jascaria.

Dios qui yoxa bo arahaina

² Jia tsi xo toa èa ma shina-shinahaina iquia. Jasca, mato è tiisimani ca jahué bo aqui mato ra. Jênima tsi xo toa ma acaina. ³ Jama, jari tobi huêsti ca yoba mato qui è bêrohuacatsaina. Jatsi nicacana: Joni ba ibo tsi xo Cristo. Cristo qui ja nicaxêti xo. Jasca, ahuini ibo tsi xo bënë. Jahué bënë qui nicaxêti xo ahuini. Jasca, Cristo Ibo tsi xo Dios. Ja qui nicahi quiha. ⁴ Jatsi quiniacaxêcahué. Nohiria bêsójó tsi bêhoxpiquí tsi Dios Chani yoapiquí tsi mapoti joní sahuëyamano ra. Sahuëpiquí tsi jahué Ibo Jesu bërabiuhahi quiha pê. ⁵ Jama xo yoxa bo. Mapoti ja sahuëxêti ca xo, nohiria bêsójó tsi bêhoxpiquí na. Jasca, Dios Chani yoapiquí tsi mapoti ja sahuëti ca xo. Tocapiyamaquí tsi jato bënë bërabiuhacaxêcani quiha pê. ⁶ Joni jisiria tsi jato boo maxcohacaxêti xo iquia, naa mapoti sahuëyamahai ca yoxa bo. Bërabria tsi xo yoxa maxcohacahaina. Bërabipíqu tsi mapoti ja sahuëcano. ⁷ Jama xo joni bo. Mapoti sahuëyamati ca xo, Dios oquë, Dios jaria, tihi cabo jisiquimahai ca jaca nori iqui na. Jama, joni oquë jisiquimahai ca tsi xo yoxa. ⁸ Jariapari tsi joni nêhohuahacaniquë. Yoxa quima ja joyamani quiha, joni quima yoxa nêhohuahacani nori. ⁹ Jasca, yoxa bax joni nêhohuahacayamaniquë; jama, joni bax yoxa nêhohuahacani nori. ¹⁰ Ja tsi xo toa mapoti yoxa bá sahuëti xo, bënë ja nicacanaí ca jismaxêna. Jasca, ángel bo tahêxo tsi ja tocaxêti ca xo, ja tsayacanaí quëshpi na.

¹¹ Shinaparcana. Dios quinia tsi xo toa joni, yoxa, tihi cabo mēbinabêquihaina. ¹² Jabi joni bax yoxa acacani quiha. Jasca, yoxa quima cohi quiha joni. Dios qui jaharisi ca xo. Jatiroha ca nêhohuati Ibo tsi xo naa.

¹³ ¿Japa mato tsa ni? ¿Mato qui jia ni Dios qui yoxa bêhoxhaina, jahué mapo mapahaxma? ¹⁴⁻¹⁵ Mapahacaxêti xo yoxa ba mapo iquia. Noba jabi-jabria quiha. Jasca, jato qui jia tsi xo toa jato boo têtêca cato. Jato qui ja acacani quiha jato mapo iti. Jama xo joni bo. Jato qui bërabria tsi xo toa boo têtêca

jayahaina. ¹⁶ Jabi tsohuëcaracá pi naa yoba nicacasyamano tsi yama tsi xo toa noqui chahahuacanaiba jabi huëtsa iquia. Tocacani quiha Dios iglesiá ca chahahuacanaibo tēquē, Dios qui ja aracaquē no.

Iboba shiati acaina

¹⁷ Mato yobapama tsi çjēnahuariahax “Jia tsi xo Dios qui mato arati quinia” çjē na rē? Anoma xo toa ma acaina iquia, arati ma quëtsoquē no. ¹⁸ Jariapari tsi Dios qui arati ma quëtsono tsi mato naxèrèquē tsi xo toa iquinahai ca maxo bo iquia rē. Toa è yoahacani quiha. Tonia jabija tsi xo ja yoacanaina iquia. ¹⁹ Tonia mato iglesia ó tsi xo toa jamēri ca maxo bo pē. Toca tsi jisiquimahacaxēhi quiha toa jabija ca quinia jaya cabo quëscahuaqui mato. Anoma quiha. ²⁰ Nicapariana. Oriquiti piti quëtsoquē tsi Iboba shiati piyamaqui mato iquia. ²¹ Oriquiqui tsi mēri tsi xo toa ma pihaina rē. Nohiria huëtsa manaxoma tsi piriaqui mato pē. Jaha tsi oriquiti nariscani quiha tēxē bo. Mato ti tsi xo toa sēya-sēyahaina. Tēxē bo tsi xo toa paxnacainaina. Jasca, jēnē paisahi tsi pahēcani quiha huēsti huēsti cabo ri. Anoma quiha. ²² Çjēniriahax mato xobó tsi oriquiyamacanai sa? Mato xobo xo tsi mato jēnē na ano ra. Iglesia xo tsi tocaquí tsi Dios chahahuacanaibo bērabihuauqui mato pē, ma acai cató no. Bērabicani quiha noitirica cabo ri, naa oriquiti bēyamacanaibo. Jatsi, çjēniria mato qui xēhi ni èa rē? Çjēniriahax, “Jēnima tsi xo toa ma tochaina” i mato qui è na, anoma ja iquē no.

²³ Shiati quinia jia ca mato qui aquëcasquia ra, naa Ibo quima è bini cato. Jabi soldado bo qui ja acacani ca baquichá tsi Ibo Jesú mapari biniquē. ²⁴ Bichi tsi quiha “Gracias” i ja niquē. Jatsi ja bēquëxniquē. Bēquëxhax tsi quiha “Bicana; picana. Noho yora tsi xo naa. Mato bax acacahi quiha. Nētocana, èa shinaxēna” i noba Ibo ni quiha. ²⁵ Jascaria tsi jēnē ja biniquē oriquixo na. Bichi tsi “Dios xabahamati quinia paxa ca jismahi quiha naa jēnē ra. Nohi jimí tsi acacaxēhi quiha toa quinia paxa cato ra. Ea shinacana, shiati jēnē aquí na” i jato qui Jesu ni quiha.

²⁶ Jotēquëxēhi quiha Ibo. Jatsi manapama tsi naa shiati mapari, jēnē, tihí cabo ma nētono. Toca tsi ja nani ca jismaqui noa. ²⁷ Jaha pi yoi ca quiniá tsi Iboba shiati nētoquí tsi Ibo Jesu yoi, ja nanina, tihí cabo ocahuaqui mato pē. ²⁸ Ja tsi xo toa shiati nētonox pari tsi jahuē shina naisxēti xo nohiria. Shina ó ca jocha yaquí tsi ja nētoyamano. ²⁹ Jabi quësohacaxēti xo toa mahitsa Iboba shiati nētohai cato, naa Ibo yoi, ja nanina, tihí cabo shinayamahai cato. ³⁰ Ja tsi xo toa mato xèrèquē tsi xo huëstima ca iquicanaibo iquia. Ja iqui tsi rēsoni quiha huëtsa bo. Ja copihacacani quiha quinia yoi tsi ja nētocani quëshpi na. ³¹ Jatsi nētonox pari tsi noba shina no naisxēti xo, yoi ca niaxēna. Tocapinono tsi noqui caxayamaxēhi quiha Dios. ³² Jama, toca pi noqui copiqui tsi noqui mēstēhuacatsi quiha Dios, chahahuayamacanaibo ya tsi no copihacayamano iquish na.

³³ Jatsi noho yoba tsi xo naa, èbē xatē bá. Iboba oriquiti pihí joquí tsi mato huëtsa manacana. Ma oriquibēquinano. ³⁴ Paxnapiqui tsi mato xobo xo tsi picahuē, mato qui Dios caxayamano iquish na. Iquē.

Jahuē huëtsa bo mato yoaxëquia joxo na.

12

Espíritu Santó noqui acai ca tiisi bo

¹ Espíritu Santó noqui acai ca tiisi bo ma cahëyoino, èbē xatē bá. ² Ma chahahuanox pari no tsi mato yona-yonapaoni quiha toa chanitimaxēniria ca mahitsa ca ídolo bo ra. ³ Jaha tsi jariapari ca yoba ma cahëyoixēti ca tsi

xo naa: “Yoshihuahacati xo Jesu” iyamahi quiha Espiritu Santó mëpihai cato. Jascaria, “Noho Ibo xo Cristo” ii quiha Espiritu Santó mëpihacahai ca roha.

⁴ Nicaparicana. Huëstima tsi xo toa Diós noqui acatsai ca tiisi bo. Jasca ca Espiritu Santo tsi xo toa tiisi noqui ati ibo-iboria. Jahuësti ca quiha. ⁵ Jasca, tobi huëstima ca jamëri ca quinia bá tsi Dios bax yonocoti. Jama, jasca ca Ibo bax yonocoqui noa ra, noqui tēquëta. Yama xo Ibo huëtsa. ⁶ Jasca, tobi huëstima ca jamëri ca tiisi bo Dios yonoco ati. Jama, jasca ca Dios tsi xo toa no nohó ca tiisi bá tsi yonocohaina. Yama tsi xo Dios huëtsa.

⁷ Jatiroha ca nohiria bo qui tiisi aqui Espiritu Santo, jatiroha ca chahahuacanaibo no mëbino iquish na. Yama tsi xo toa ati ibo huëtsa ra. ⁸ Huësti ca nohiria qui yobati tiisi aqui quiha. Nohiria huëtsa qui Dios Chani bërohuati tiisi aqui quiha. ⁹ Nohiria huëtsa qui chitimiti tiisi aqui quiha. Nohiria huëtsa qui nohiria jënimahuati chama aqui quiha. ¹⁰ Huëtsa qui jisti-jistiria ati chama aqui quiha. Huëtsa qui Dios Chani yoati tiisi aqui quiha. Huëtsa qui mahitsa ca tiisimacanaibo cahëti tiisi aqui quiha, chahahuacanaibo yobati. Jatsi huëtsa qui jamëri ca jói tsi chaniti tiisi aqui quiha. Jatsi huëtsa qui toa yoaha ca chani bërohuati tiisi aqui quiha. ¹¹ Tihi ca tiisi bo chahahuacanaibo qui aqui quiha jasca ca Espiritu Santo. Yama tsi xo toa ati ibo huëtsa ra. Jatiroha ca nohiria bo qui tiisi aqui quiha, jaha ja quëëhai cató no.

Huëstima ca xatë bo jaya xo yora

¹² Yora jascaria xo noqui chahahuacanaibo iquia. Huëstima ca jamëri ca xatë bo jaya quiha. Jascaria tsi xo Cristó maxo, naa noqui chahahuacanaibo. Huëstima ca jamëri ca nohiria bo jaya quiha noba maxo. ¹³ Jabi Espiritu Santó tsi no ashimahacani quiha, noqui tēquëta, huësti ca maxo manëti. Jabi Cristo yora xatë bo xo noqui tēquëta. Mishni mishni tsi xo jodiobo. Mishni mishni tsi xo carayanabo. Mishni mishni tsi xo yonati bo. Huëtsa tsi xo toa tsëquë cabo, naa chama jayama cabo. Huësti ca maxo xo noqui tēquë. Jasca ca Espiritu Santo noqui acacani quiha.

¹⁴ Huëstima ca xatë bo jaya xo noba yora yoi bo. Mëquë bo, poyamë bo, huico bo, tihi cabo jaya quiha. Huësti ca xatë ma xo ra. ¹⁵ Jaha tsi çjënahuariahax, “Yora xatë ma xo ëa, mëquë ë nomari iqui na” i noba tahë na? çJari noba yora xatë iyamayamahi ni? ¹⁶ Jascaria, “Yora xatë ma xo ëa ra, bëro ë nomari iqui na” çiti mëtsa ni noba pahoqui pa? çJari noba yora xatë iyamayamahi ni? ¹⁷ Bëro tēquë pi noba yora iirohano tsi çjënahuariaxo raca no nicana? Huësti ca pahoqui pi noba yora iirohano tsi çjënahuariaxo raca no xëtëna? ¹⁸ Jia tsi noqui Diós nëhohuaniquë ra. Ja qui jia ca quiniá tsi noba yora ó tsi jamëri ca xatë bo, naa poyamë, huico, mëquëñë, tihi cabo ja janani quiha. ¹⁹ Jascaria ca pi noba yora xatë bo iirohano tsi çjënahuariahax yora ja ina? ²⁰ Huëstima ca xatë bo jaya xo noba huësti ca yora ra.

²¹ Jaha tsi “Mia niaquia” mëquë qui iti mëtsama xo noba bëro. Jascaria, “E qui yoi xo mia ra. Cata” i tahë qui ti mëtsama xo noba mapo. ²² Jama, noqui iriama ca xatë bo tsi xo toa oquë-oquëria ca xatë yoi bo. ²³ Jabi huësti huësti ca noba xatë bo qui rabihi noa. Rabihi tsi toa xatë bo ó quiniaqui noa. Sahuëti tsi noba bërabiria ca xatë bo mapaquí noa, nohiria bá jisyamano. ²⁴ Toca tsi sahuëhacayamahi quiha noba yora xatë oquë cabo. Jama, noba yora ca xatë bo Diós oquëhuani quiha. ²⁵ Toca tsi ja ani quiha jia tsi noba yora xatë bo yonocobëquinano. ²⁶ Jatsi noba yora xatë huësti ca pi pahëno tsi pahëni quiha noba yora tēquëta. Jasca, huësti ca xatë oquëhuahacano tsi ja bëta ranihi quiha noba yora xatë bo tēquë.

²⁷ Japi mato ë yoacatsai ca tsi xo naa: Yora jascaria xo noqui chahahuacanaibo, naa Cristo yora ó ca xatë bo iquiina. Jamëri jamëri tsi xo toa no acaina. ²⁸ Tsayacana. Jariapari tsi jahuë Chani chitahëhuati ibo bo noqui Diós ani quiha, jahuë Chani pacanamati. Jaquirëquë jahuë Chani bërohuacanaibo noqui ja ani quiha. Jaquirëquë Dios Chani tiisimacanaibo noqui ja ani quiha. Jatsi jisti acanaibo, jënimahuati chama jaya cabo, mëbicanaibo, yobacanaibo, jamëri ca joí tsi chanicanaibo, tihi cabo noqui Diós ani quiha, noqui chahahuacanaibo ja mëbicano iquish na. ²⁹ Jaha tsi Dios Chani chitahëhuati ibo ma xo jatiroha cabo. Dios Chani bërohuacanaibo ma xo noqui tëquë. Tiisimacanaibo ma xo noqui tëquë. Jisti acanaibo ma xo noqui tëquë. ³⁰ Jënimahuati chama jayama xo noqui tëquë. Jamëri ca joi bá tsi chaniyamaqui noa, noqui tëquë. Jato chani bërohuati tiisi jayama xo noa, noqui tëquë. Jabi noqui chahahuacanaibo qui Dios tiisi bo tëquë acacani quiha. ³¹ Jabi naa tiisi oquë cabo ó quëëcana. Nicacahuë. Tobi xo toa tiisi bo oquë ca quinia huëtsa ra. Jaboqui naa quinia oquë ca mato jismacasquia.

13

Nohiria bo no noixëti xo

¹ Nohiria ba joi bo, ángel ba joi, tihi ca joi bá tsi chaniti mëtsa ë imitsa. Jama, ë noiyamapino tsi pacots-pacotsaria, campana pacotsa, tihi cabo jascaria ca tsi xo toa ë yoahaina ra. ² Jasca, Dios Chani yoatí tiisi ë jaya mitsa. Jonë ca jabija ca jahuë bo tëquë ë cahëmitsa. Jatiroha ca jahuë bo ë cahëmitsa. Jasca, Dios qui ë chitimihai iqui tsi maca bo niati tiisi ë jayamitsa. Jabi tihi ca ati tiisi ë jayamitsa. Jama, ë noiyamapino tsi mahitsa tsi xo toa ë aca ca tëquëta. ³ Jasca, noho jahuëmishni bo tëquë ë amitsa noitiria cabo qui. Dios Chani quëshpi tsi ëmë ë amitsa naxëna. Jama, ë noiyamapino tsi mahitsa tsi xo toa ë acaina iquia.

⁴ Noihi tsi huënyama xo noa. Noiquí tsi nohiria mëbiqui noa. Jasca, nohiria huëtsa ba jahuë bo ó quëëyamaqui noa noipihí na. Noipiquí tsi nomë shinayamaqui noa. ⁵ No noino tsi jia tsi xo noba jabi. Jaha tsi huashiyamaqui noa. Caxayamaqui noa. Huëtsa bo yosicasyama xo noa. ⁶ Noipihí tsi raniyamaqui noa, yoi ca nohiriá aquë no. Jama, jia ca pi nohiriá ano tsi rani-raniquí noa noihi na. ⁷ Jahuë bo tënë-tënëqui noa noiquí na. Nohiria qui chitimiqui noa. Jatiroha ca jia ca ó pasoqui noa. Yosana-yamaqui noa. Tihi ca tsi aqui noa noiquí na.

⁸ Naamapaoxëqui no noihaina. Naamapao-yamahai ca tsi xo toa Dios Chani yoatí tiisi. Jatixëhi quiha toa. Jatixëhi quiha jamëri ca joi bá tsi chanihai ri. Jatixëhi quiha cahëti tiisi. Tihi tsi xo toa jatihaina. ⁹ Jaboqui tsi naris-hi quiha toa no cahëhaina rë. Naris-hi quiha Dios Chani no yoahai ri. ¹⁰ Jama, Cristo bacano tsi cahëyoixëqui noa. Toa barí tsi jatixëhi quiha noba iriama ca tiisi ra.

¹¹ Xocobo ax xocobo jascaria tsi ë chani-chanipaoniquë. Toatiyá tsi xocobo jascariá tsi ë shina-shinapaoniquë. Jama, joni manëxo tsi noho xocoba jabi bo ë nianiquë. ¹² Jascaria tsi naris-hi quiha Dios jahuë bo no cahëyoihaina rë. Jaboqui jia tsi cahëyoiyamaqui noa pë xocobo jascaria. Jama, toa bari bëbëchiná tsi Dios cahëyoixëqui noa ra, naa noba shina ó ca jahuë bo ja cahëhai jascaria. ¹³ Jatsi tres tsi xo toa naamahai ca tiisi bo. Naamaxëhi quiha ja qui no chitimihaina. Naamaxëhi quiha jaha no pasohaina. Naamaxëhi quiha no noihaina. Jama, oquëria ca tiisi tsi xo toa no noihaina ra.

14

Jamëri ca joi bá tsi chanihaina

¹ Noiti tiisi ó quëécana iquia. Jasca, noipama tsi Espíritu Santó acai ca tiisi huëtsa bo ó quëécana. Jabi noqui ja acai ca oquë ca tiisi tsi xo toa Dios Chani yoatí tiisi. ² Jabi tobi quiha toa nohiria ba joi bá tsi chaniti mëttsa cabo. Oquë ma xo toa tiisi ra. Toca ca jamëri ca joi bá pi chanihni tsi nohiria qui chaniyamacani quiha, Dios qui nori. Jato chani cahëyamacani quiha nicacanaibo rë. Espíritu Santó tsi cahëhama ca jahuë bo chanicani quiha. ³ Jama, noba noma joi pi Dios Chani yoahi tsi nohiria qui chaniqui noia jato mëbixëna. Toca tsi chamahuahacaxëceni quiha. Toa quiniá tsi jato ranihuaxëqui noa. ⁴ Jama, jamë roha mëbihi quiha toa jamëri ca joi tsi chanihai cato. Jahuë noma joi tsi Dios Chani yoahai ca tsi xo toa chahahuacanaibo tëquë mëbihaina. ⁵ Jabi jamëri ca joi bá tsi ma chanino, mato tëquë iquia. Jama, è qui oquë tsi xo toa Dios Chani ma yoahaina mato noma joi no. Oquë tsi xo toa jahuë noma joi tsi Dios Chani yoahai cato. Jama, jamëri ca joi pi toa yoaha ca chani tsohuëcara ca nohiria bërohuano tsi jënima tsi xo toca ca ja chanihaina. Mëbihacaxëti xo chahahuacanaibo iquia. ⁶ Shinaparicana, èbë xatë bá. Jamëri ca joi bá pi mato qui chaniqui tsi çjënahuariaxo raca mato è mëbina? Mahitsa tsi xo toa è yoahaina iquia. Jama, è cahëhai ca jahuë bo, è qui Diós ani ca chani, jahuëcara ca chani paxa cato, tihí cabo pi bëroria tsi è chanino tsi mëbihacaxëhi quiha iglesiá ca nohiria bo ra.

⁷ Bëroria pi nohiria jahuë bisto i-iyamano tsi pacotsa roha tsi xo toa ja acaina. Música ma xo ra. Jascaria pi jamëri ca joi tsi jato qui no chanino tsi çjënahuariaxo raca Dios Chani nohiria cahëna? ⁸ Bëroria pi trompetá xoohacayamano tsi nianati shomahuahacayamaxëhi quiha soldado bo ra. Pacotsa roha tsi xo toa ja nicacanaína. ⁹ Jascaria pi bëroria tsi mato noma joi tsi Dios Chani ma yoayamano tsi çjënahuariaxo raca mato chani nohiria bá cahëna? Jato qui mahitsa tsi xo toa ma chanihaina iquia. ¹⁰ Jabi huëstima tsi xo toa maí ca jamëri ca joi bo ra. Jato ibo qui jia ca xo. Jato noma joi cahëriacani quiha. ¹¹ Jama, jamëri ca joi pi è qui joni chanino tsi çjënahuariaxo raca ja yoacatsai ca è cahëna rë? Jahuë joi iqui tsi chaninabëquitima ixëhi quiha noa rë. ¹² Tonia Espíritu Santó acai ca tiisi bo ó quëëriaqui mato iquia. Jënima quiha. Jatsi toa oquë ca tiisi bo ó quëécana, chahahuacanaibo mëbihacano iquish na iquia.

¹³ Dios nicaxëti xo toa jamëri ca joi tsi chanihai cato, jahuë chani bërohuati tiisi ja qui Diós ano iquish na. ¹⁴ Jabi Dios qui jamëri ca joi pi è chanino tsi noho jana roha tsi xo toa chanihaina. Cahëhaxma tsi chaniquia ra. ¹⁵ Çjapi jëni ca quiniá tsi chanixëhi ni èa sa? Dos ca quiniá tsi chanixëquia ra. Jatsi jamëri ca joi tsi chanixëquia Dios qui. Jasca, noho noma joi tsi chanixëquia nohiria bo qui noho chani ja cahëyoicano iquish na. Jamëri ca joi tsi quëquëxëquia. Jascaria, noho noma joi tsi quëquëxëquia, è quëquëhai ca nohiria bá cahëno. ¹⁶ Jatsi quiniacaxëcahuë. Mato shinaná tsi, naa jamëri ca joi tsi jia tsi Dios ma ocahuapino tsi çjënahuariaxo raca ma yoahai ca nohiria bá cahëna? Nicahax, çjënahuariahax “Amen, jaahuë” i jaca na? Jato jomaxëhi quiha toa ma yoahaina rë, mato noma joi tsi ma chaniyapiquë no. ¹⁷ Jia tsi xo toa Dios ma oquëhuahaina ra. Jama, mëbihacayamaxëhi quiha chahahuacanaibo rë, jamëri ca joi tsi ma chaniquë no. ¹⁸ Jabi Dios qui “Gracias” iquia ra, jamëri ca joi tsi Dios qui chanihai ca è nori quëshpi na. Mato oquë tsi xo toa jamëri

ca joi bá tsi è chanihaina iquia. ¹⁹Jama, chahahuacanaibo bësojò pi jamëri ca joi tsi chani tètëca è chanino tsi mahitsa tsi xo toa è yoahaina. Jato jomaxëhi quiha. Jatsi arati ja caticano tsi oquë tsi xo toa chani pistia roha ca è yoahaina jato noma joi no iquia. Toca tsi mëbihacaxëcani quiha chahahuacanaibo tëquë, jato joi tsi è chaniquë no.

²⁰Xocobo shinahai ria tsi shinayamacana, ëbë xatë bá. Shinaxoma tsi acani quiha pë. Jama, yoi ca pi jisiquino tsi jia tsi xo toa cahëtimaxënieria ca iquina, naa xocobo jascaria. Jama, oquë-oquëria tsi xo toa shina-choshi iquina iquia. Jatsi shinaparcana. ²¹Siri tsi quiha Israél ca chahahuayamahai ca nohiria bo yobahacanicuë. Jamëri ca joi tsi jato qui Dios chanini quiha. Jabi nëcahi quiha Quënëhacanish cabo:

“Jamëri ca nohiria ba joi tsi mato qui chanixëquia. Toca tsi è chanino tsi jari è qui nicayamaxëqui mato pë” i Israél cabo qui Dios ni quiha”

ii quiha Quënëhacanish cabo. ²²¿Tsayacani? Jamëri ca joi tsi quiha toa chahahuayamanish cabo Diós yobanicuë ra. Jabi toca xo jaboqui. Iglesia ca nohiria, naa Dios nohiria yoi bo quëshpi ma xo toa jamëri ca joi tsi no chanihaina. Jato qui Dios Chani yoahacaxëti xo jato noma joi no iquia, ja mëbihacacano iquish na. ²³Jaha tsi jamëri ca joi bá tsi chahahuacanaibo chaniyamano catihax na. Tocapiyamajacano tsi çjënicaçëcahi ni iglesia qui jicohax ca chahahuayamacanaibo ra? Toca ca chani nicahax “Yoyoxëni ca xo toa chahahuacanaibo” çiyamacaxëcahi ni? Tocacaxëcani quiha pë. ²⁴Jama, noba noma joi pi Dios Chani no yoano tsi no yoahai cató bërohuahacaxëhi quiha jato jocha. Jato joi pi Dios Chani ja nicacano tsi tsacahacaxëhi quiha jato shinana iquia. ²⁵Toca tsi jato qui bërohuahacaxëhi quiha jato shina ó ca yoi ca jahuë bo ra. Jaha tsi jato raportó tsi mënicaxëcani quiha Dios qui araxëna. Mënihax, “Jabija xo ra. Nëá xo Dios mato bëta” icaxëcani quiha.

Yoyoyamacana Dios qui arati ma catiquë no

²⁶Japi mato qui noho yoba tsi xo naa, ëbë xatë bá. Arati catihi tsi shomahuahacacana mabë xatë mëbixëna. Quëquëti jayaxëti xo huësti huësti cabo. Tiisimaxëti xo huëtsa bo. Dios quima ca chani yoaxëti xo huëtsa bo. Jamëri ca joi bá tsi huëtsá chanino. Jatsi ja yoahai ca nohiria huëtsá bërohuano, chahahuacanaibá cahëno iquish na. No acai cató tsi mëbihacaxëti xo jatiroha cabo iquia. ²⁷Tobi pi jamëri ca joi bá tsi chanicas-canaibo no tsi huësti huësti tsi ja chanicaxëti xo, naa dos, tres ca nohiria bo roha iquia. Jariapari chanixëti xo huëstaxa; jaquirëquë huëtsa, jaquirëquë huëtsa. Jasca, jato chani bërohuati xo nohiria huëtsa ra. ²⁸Mato xërëquë pi jato chani bërohuahai ca nohiria yamano tsi ja pasiti ca xo iquia. Chahahuacanaibo bësojò tsi jamëri ca joi bá tsi ja chaniyamacano. Tëxë bo qui bërohuahacaxëti xo jato chani. Yama pi ja no tsi jamëno, Dios, tih roha cabo qui ja chanicano ra.

²⁹Jasca, Dios Chani yoaxëti xo dos, tres cabo. Chanijacano tsi jia tsi jato qui nicaxëti xo chahahuacanaibo tëxë bo. ³⁰Jasca, Dios quima pi tsohuëcara ca tsahohai ca nohiriá chani bino tsi jënëxëti xo toa nii ca chanihai cato. ³¹Jia tsi xo Dios Chani ma yoahaina mato tëquëta. Quinia jia tsi, naa huësti huësti tsi ma chanino, jatiroha cabo tiisimahacano iquish na. Mëbihacaxëti xo jatiroha cabo. ³²Jasca, cahëhaxma tsi chaniyamaxëti xo toa Dios Chani yoati tiisi jaya cato. Ja yoyoyamano. ³³Jabi pacots-huati Ibo ma xo noba Dios ra. Ja qui yoi tsi xo toa ma pacots-huahaina ma catiquë no. Jia ca quiniá tsi noqui aranabëquima-catsi quiha noba Ibo ra.

Iglesia ca yoxa ba jabi

Jia ca quiniá tsi noqui aramacatsi quiha Dios jatiroha ca iglesiá no. ³⁴ Jatsi ma arano tsi pasixëti xo yoxa bo iquia. Ja chaniyamacano, “Nohiria ja rëquëniyamacano” i Quënëhacanish cabo ai quëshpi na. ³⁵ Jahuëcara ca cahëpicasquí tsi jato bënë bo ja nicacano jato xobo xo na. Rabiria tsi xo iglesiá ca yoxa bo chanihaina iquia.

³⁶ Jatsi quiniacaxëcahuë. Naa yoba pasomaha pi ma no tsi “¿Mato ó tsi Dios Chani chitahëni pa?” iquia. “¿Mato qui roha jahuë Chani raahacani pa?” iquia. Iyamahi quiha. Nicacaniquë nohiria huëtsa ri. ³⁷ Jabi Iboba yoba tsi xo naa mato qui ë quënëhaina ra. Iboba yoba ja nori ca cahëxëti xo toa mato xërëquë ca Dios Chani yoatí tiisi jaya cabo. Cahëxëti xo tiisi huëtsa jaya cabo ri. ³⁸ E yoahai ca yoba pi ja chahahuayamacano tsi tihí cabo chahahuayamacana.

³⁹ Jarohari tsi Dios Chani yoatí tiisi ó quëëcana iquia, ëbë xatë bá. Jasca, jamëri ca joí pi nohiriá chanino tsi pasimayamacana. ⁴⁰ Quinia jia tsi acaxëti xo jatiroha cato, arati ma catiquë no.

15

Cristo Chani

¹ Dios xabahamati Chani, naa mato qui ë yoani ca Chani mato shina-macasquia. Toa Chani ma bini quiha. Toa Chani qui chitimiriaqui mato.

² Japi mato qui ë yoani ca qui chitimihí tsi toa Chaní tsi xabahamahacaxëqui mato ra. Tocapiyamano tsi mahitsa tsi xo toa ma chahahuahaina iquia.

³⁻⁴ Jariapari tsi Cristo quima ë bini ca jahuë bo mato ë yoaniquë. E yoani ca tsi xo naa ra: Noba jocha quëshpi tsi Jesu naniquë, Quënëhacanish cabá yoani jascaria. Jaquirëquë ja maihuahacaniquë. Jatsi tres bari quirëquë ja bësomahacaniquë, Quënëhacanish cabá yoani jascaria. ⁵ Bësohax Pedro qui ja jisiquiniquë. Jatsi jahuë doce ca rabëti bo qui ja jisiquiniquë. ⁶ Jaquirëquë quiniëntos ca xatë bo qui ja jisiquiniquë. Jasca, jari jaboqui bëso tsi xo toa jato ó huëstima cabo, naa Jesu bëso ini ca jisnish cabo. Rësoyoni quiha tëxë bo. ⁷ Jatsi Jacobo qui ja jisiquiniquë. Jaquirëquë jahuë Chani chitahëhuati ibo bo tëquë qui ja jisiquiniquë.

⁸ Jarohari tsi ë qui yoi Cristo jisiquiniquë ra, Damasco quinia ca bahí no. Shoma ë ini quiha. ⁹ Jabi ëa oquëria ca xo toa Dios Chani chitahëhuati ibo bo. Ea ti tsi xo toa iriama cato, Dios iglesiá ca nohiria bo ë tënëmapaoni quëshpi na. Ja iqui tsi Chani chitahëhuati ibo quënahacapaimaria ma xo ëa ra. ¹⁰ Jama, ëa Diós noi-noirianiquë. Ja noihai ca iqui tsi shomaria xo ëa jaboqui ra. Mahitsa ëa ja noiyamani quiha. Ja noihai iqui tsi shomaria xo ëa jaboqui ra. Mahitsa ëa ja noiyamani quiha. Ja noihai ca tahëhax ja bax yonocoriaquia ra. Chani chitahëhuati ibo huëtsa bo oquë tsi xo toa ë yonocohaina iquia. Jabi ëa yonocomati chama tsi xo toa ëa ja noihaina. ¹¹ Jabi jia tsi xo toa noba yonoco tëquëta. Yonoconabëquipama tsi jasca ca Chaní jia ca yoaqui noa, naa noqui Chani chitahëhuati ibo bo tëquë. Naa Chani ma chahuaniquë iquia.

Bësotëquëxëhi quiha Cristó-na bo

¹² “Rësonish cabo quima Cristo tërohacaniquë” iqui noa, naa noqui Chani chitahëhuati ibo bo tëquë. Jabija ca noba Chani pi no tsi çjénahuariahax raca “Bësotëquëyamaxëhi quiha nohiria bo” i mato mishni bo na? ¹³ Nohiria bo pi bësotëquëyamano tsi bësomahacayamani quiha Cristo ri iquia. ¹⁴ Jasca pi Cristo bësomahacayamarohano tsi mahitsa tsi Dios Chani yoaqui noa. Jasca, mahitsa tsi xo toa ja qui ma chitimihai ri. ¹⁵ Jarohapa tsi Dios quiahuaqui noa tonia,

mahitsa “Rësonish cabo quima jahuë Cristo Diós tëroniquë” i nohiria bo qui no ai quëshpi na. Jatsi shinaparicana. ¿Bësotëquëxëhi ni nohiria bo iquia? Bësotëquëyamapijacano tsi Diós jahuë Cristo bësotëquëmayamani quiha jaa ri iquia. ¹⁶ Jasca pi rësonish cabo bësotëquëyamano tsi bësomahacayamani quiha Cristo ri. ¹⁷ Cristo pi bësomahacayamarohano tsi mahitsa tsi xo toa ja qui ma chitimihaina rë. Jari mato jocha ó tsi bëno xo mato ra. ¹⁸ Jasca, bësotëquëyamaxëhi quiha Cristo qui chitiminish ca rësonish cabo ri. ¹⁹ Tsayacahuë. Jaboqui noqui ranihuahi quiha toa bësotëquëti ó no pasohaina ra. Noqui jia quiha. Jama, bësotëquëyamapihi tsi noitiria ca noqui xo naa ra, no parahacaha quëshpi na.

²⁰ No parahacayamaniquë iquia. Rësonish cabo quima Cristo tërohacani quiha. Bësöhi quiha. Jariapari ca maihuahacanish ca bësotëquëhai ca nohiria tsi xo naa. Ja bësotëquëni iqui tsi bësotëquëcaxëceni quiha jahuë nohiria bo ri. ²¹ Jabi Adán jocha iqui tsi rësöhi quiha nohiria bo tëquë. Jasca, Cristó bëboni iqui tsi bësotëquëxëhi quiha nohiria bo ri. ²² Rësoxëqui noa, noqui tëquëta, noba jahëpa Adán jocha iqui na. Jascaria tsi bësotëquëxëqui noa, Cristó-na bo no nori iqui na. ²³ Jariapari tsi Cristo bësomahacanicuë. Jariapari ca tsi xo toa. Jaquirëquë bësomahacaxëhi quiha Cristó-na bo ri, jahari ja joxëquë no. ²⁴ Jaquirëquë joxëhi quiha jahuë rëso, naa jahuë Jahëpa Dios qui ja yonahai ca jahuë bo ja mëaxëquë no. Jama, mëanox pari tsi ja pasomaha ca chama bo tëquë bëboxëhi quiha ra. Bëboxo tsi jahuë Jahëpa Dios qui ja yonahai ca mëaxëhi quiha. ²⁵ Jama, jaboqui Chama-chamaria xo Cristo. Jahuë Jahëpa qui jari mëahama tsi xo toa ja yona-yonahaina. Ja pasomaha ca chama bo tëquë ja bëbopariti xo. ²⁶ Jabi jaroja ca noqui pasomaha ca tsi xo toa no rësöhaina. Bëbohacaxëhi quiha toa ri. ²⁷ Nicacana. “Cristo chama namá janahacaxëti xo jahuë bo tëquë” ii quiha Quënëhacanish cabo. Jabi “jahuë bo tëquë” i Dios Chani no tsi jahuë chama namá jahuë Jahëpa Dios nori ca ma quëscahuamitsa. Jama xo. Jahëpa Dios tsi xo toa jahuë Cristo chama namá ca jahuë bo janati ibo-iboria. ²⁸ Jabi Cristo chama namá tsi jatiroha ca jahuë bo janahacano tsi jahuë Jahëpa chama namá jamë janaxëhi quiha Baquë. Toa barí tsi jatiroha ca yonaxëhi quiha Dios.

²⁹ ¿Jahuë ó pasöhi ni nohiria bo, rësonish cabo bax ja ashimahacacaquë no? Tocacani quiha naipa xo tsi jato rabëti yamabo jiscascani na. Jama, “Yama tsi xo nohiria bo bësotëquëhaina ra” i pi jaca no tsi ¿jëniriahax jato rabëti yamabo bax ashimahacacahi ni pa? ³⁰ Rësonish cabo pi bësotëquëyamano tsi yoyoxëniria cabo noqui xo naa, naa noqui Dios Chani yoacanaibo. Jatiroha ca barí tsi toa Chani tahëxo tsi noqui acatsi quiha noqui pasomaha cabo ra. ³¹ Jishopë. Jatiroha ca barí tsi toa Chani tahëxo tsi ëa acascani quiha pë, ëbë xatë bá. Jasca, ë qui jia tsi xo toa Ibo Jesucristo ó tsi ma bësöhai ri. Mato parayamaquia. ³² Efeso ax tsi ë acacaquë ani quiha. Caxaxëniria ca yöhina jascaria toa joni bo ini quiha. Japi rësonish cabo bësotëquëyamano tsi mahitsa jato pasomaha ë iquinanicuë. Jasca, nohiria bo pi bësotëquëyamano tsi jaboqui no yoyono iquia. No oriquino. Jënë no ariano. No tocano ra, huëaquë tsi no rësosharihai quëshpi na.

³³ Ma parahacayamano. Mato jabi jia ca yoshihuacaxëceni quiha toá ca yoyocanaibo, mato bëta ja rabënapiquë no. ³⁴ Quiniacaxëcahuë. Toá ca paraxëni ca nohiria bo quima bësocahuë. Jari jochayamacana. Jasca, mato ó tsi xo toa huësti huësti ca Dios cahëyamacanaibo iquia. Nëcaquia mato bërabimaxëna.

Yora paxa ca no bixëhaina

³⁵ Quiniacaxëcahuë. Mato nicacaxëcani quiha huësti huësti cabo, naa rësonish cabo yoati na. Nicahax, “¿Jënahuariaxo raca tërohacaxëhi ni rësonish cabo sa? ¿Jëni ca yora jayacaxëcachi ni sa, ja bësotëquëxëquë no?” icaxëcani quiha pë. ³⁶ Yoyoxëni tsi xo toca ca ja nicacanaina iquia. Shinaparicana. Jconox pari tsi maí tsi toa bëro maihuahaca-parixëti xo. Ja rëso-parixëti quiha. ³⁷ Banapiquí tsi jahuë bëro yoi banaquí noa, jahuë jihui nomari. Jahuëcara ca ma banahai ca bëro jamëri tsi xo toa ja jocohaina. ³⁸ Toa bëro ma banano tsi ja qui yora paxa ca aqui Dios, naa ja qui jia ca yora. Jabi jatiroha ca bëro qui jahuë yora yoi ca ahi quiha. Ja iquí tsi jamëri jamëri tsi xo toa ja jococanaina. ³⁹ Jascaria tsi tobi jamëri ca nami bo ri. Tobi nohiria nami. Tobi yohina nami. Jaquirima tsi xo isaca nami. Jasca, jamëri tsi xo sanino nami ri. Tihi cabo tsi xo jamëri. ⁴⁰ Jascaria tsi xo naipá ca jahuë bo. Noquí rima tsi xo ángel yora bo. Maí ca nohiria jamëri tsi xo jato oquë ri. ⁴¹ Jascaria, jamëri tsi xo bari, oxë, huishti bo. Oxë huahuahai ca quírma tsi xo bari huahuahaina. Jamëri tsi xo huishti huahuahai ri. Jasca, huësti huishti jamëri tsi xo huishti huëtsa huahuahaina. Yama tsi xo jaharisi cato ra. ⁴² Jabi tocaxëhi quiha ra, rësonish cabo bësotëquëxëquë no. Jaboqui porohi quiha maihuahacahax ca yora. Jama, porotimaxëni tsi xo toa tëronoxëti cato. ⁴³ Yoiria tsi xo toa maihuahacahax ca yora ra. Anomariaxëhi quiha toa tëronoxëti cato. Chamayama tsi xo toa maihuahacahax cato. Chama jayaxëhi quiha toa tëronoxëti cato. ⁴⁴ Noba noma yora tsi xo toa ja maihuahacahaina. Jama, ja tërohacaquë tsi mana ca yora ixëqui ra. Jabi tobi dos ca yora jamëri cabo. Huësti tsi xo toa noba noma yora yoi. Rësoxëhi quiha toa. Jasca, tobi xo yora huëtsa, naa Diós noqui axëhai ca mana ca yora.

⁴⁵ Jabi jariapari ca joni Adán iniquë. Bësohai ca nohiria ja manëni quiha. Jama, nohiria bësomati ibo-iboria toa segundo ca joni manëni quiha, naa Cristo. ⁴⁶ ¿Tsayacanaí? Jariapari tsi xo toa noba noma yora. Jaquirëquë tsi xo toa Diós noqui axëhai ca yora, naa noba mana ca yora. ⁴⁷ Mai cospó tsi toa jariapari ca joni acacani quiha. Tocamaxo toa segundo cato. Mana ax ja joni quiha. ⁴⁸ Jabi cospó tsi acacani ca Adán jascaria xo noqui maí ca bësohai ca nohiria bo. Jama, mana ca joni jascariaxëhi quiha Cristó-na bo. ⁴⁹ Jaboqui Adán yora jascaria ca jaya xo noa. Jahuë noma jabi no bini quiha. Jascaria tsi mana ca joni yora jascaria ca jayaxëqui noa ra. Jahuë mana ca jabi tsi acacaxëhi quiha noa.

⁵⁰ E yoacatsai ca tsi xo naa ëbë xatë bá. Nicacana: Mana, naa Diós otoiha ca qui jicotimaxëniria tsi xo toa noba noma yora bo iquia. Bësobësopaotimaxëniria ca tsi xo naa noba rësohai ca yora bo. ⁵¹ Mato parayamaquia. Jiarra ca yoahama ca jahuë bo mato yoaquia: Rësoyamaxëqui noa, naa noqui tëquëta. ⁵² Mëri tsi, naa bëxtiria tsi yora paxa ca noqui acacaxëhi quiha jaroha ca trompeta xohacaxëquë no. Toa trompeta xohacano tsi tërohacaxëqui toa rësonish ca chahahuacanaibo pari. Rësotimaxëni ca yora paxa ca jayacaxëcani quiha. Jatsi jabitihuahacaxëqui noa, naa noqui bëso cabo. ⁵³ Porotimaxëni ca yora sahuëxëhi quiha noba porohai ca yora bo iquia. Rësotimaxëni ca yora rarinxëti quiha noba rësohai ca yora bo. ⁵⁴ Jabi toa rësotimaxëniria ca yora no sahuëno tsi jatihuahacaxëqui Quënëhacanish cabo, naa “Quëyohacaquë no rësohaina ra. Jia tsi xo no bëbohaina” iquiina. ⁵⁵ ¿Tsayacanaí? Noqui bëbotimaxëni tsi xo no rësohaina ra. Rësohai qui raquëyamaqui noa. ⁵⁶ Jabi jocha chama tahëhax tsi rësóqui noa. Jasca, Moisés yoba tahëxo tsi noqui quësoti chama jaya xo jocha ra. ⁵⁷ Jama, Dios qui “Gracias” iqui noa, naa dos ca chama bo bëboti mëtsa no nori iqui na. Noba Ibo Jesucristó tsi noqui bëbomahi quiha Dios. ⁵⁸ Jatsi chamatsicana, ëbë xatë

bá. Mahitsa ca tiisí tsi mëpíhacayamacana. Jasca, Iboba yonoco ma ariano. Tocapimano tsi mahitsama ixëhi quiha Ibo bax ma acaina iquia.

16

Noitiria cabo qui ofrenda acaina

¹ Dios nohiria bo bax, naa Jerusalén ca noitiria cabo bax parata yoati tsi yobacasquia, jia ca ati ma cahëno iquish na. Galata maí ca iglesia bo é yobani ca jasca ca tsi xo naa yoba ri. Nëcacana: ² Jatiroha ca domingó tsi mato sueldo químa ca parata xatë ma janaxëti xo ofrenda qui. Tocapimano tsi ofrenda huëtša é catiyamaxëti xo, mato qui é shishoxëquë no. ³ Mato qui cahëxo tsi mato ofrenda raaxëquia Jerusalén qui. Mato qui jia ca joni bo ya tsi mato ofrenda raahacaxëti xo iquia. Jasca, naa joni bo qui joihuati carta bo axëquia, jia tsi Jerusalén qui ja cahëcano. ⁴ Jasca, Jerusalén qui é caapino tsi é bëta ja bocano jato ri.

Pablo Corinto cabo qui shishocasnina

⁵ Jaboqui Macedoniá ca chahahuacanaibo qui shishoparicasquia. ⁶ Shishoquiiria tsi mato qui caxëquia chitëxëna. Naama matsitiyá tsi é chitëmitsa mato bëta. Jaquirëquë jia tsi rëquë éa raati mëtsa ixëqui mato iquia, é chahi ca jahuëniacara ca qui. ⁷ Johax mëri tsi nacocasyama xo éa ra. Dios qui jia pi no tsi naama tsi chitëxëquia johax na. ⁸ Jaboqui canoma xo éa. Efeso tsi chitëparicasquia Pentecostés fiesta bari quëshpi na. ⁹ Jasca, nëa xo tsi huëtšima ca xaba jaya xo éa, Dios yonoco axëna. Jasca, jari huëtšima tsi xo toa Dios Chani pasomaha cabo nëa no rë.

Timoteo — Apolos

¹⁰⁻¹¹ Mato qui Timoteo shishopino tsi jia tsi toa joni joihuacana. Dios bax yonocohi quiha, naa éa jascaria. Joihuaxo tsi chahahuacana ra, Dios yonoco ja acai quëshpi na. Jasca, toa joni ma mëbino jia tsi jahari é qui ja jono. Noho carta bëcanaibo bacaquë tsi jaha pasoxëquia jisti. ¹² Jasca, Apolos mato qui shishomacasquia. “Naa carta bohái ca xatë bo ya mi cano mia ri” i ja qui é quë. Jaboqui cacasyama xo rë. Jari shinahi quiha. Tonia mato qui caxëhi quiha xaba huëtša tsëquëquë no.

Jaroha ca chani

¹³ Quiniacaxëcahuë. Tobi quiha mahitsa ca chani. Jaha tsi Dios yoba ó tsi coshicana. Jasca, chahahuayamacanaibo qui raquëyamacana. Chamacahuë. ¹⁴ Noixo tsi jatiroha ca ma ano ra. ¹⁵ Jasca, Estéfanas, jahuë xobó cabo, tihi cabo yoati tsi nicacasquia. Jariapari ca Cristo qui bëbohacaniš cabo ja icani quiha Acaya maí no. Dios nohiria bo ja mëbiriacani quiha noixo na. ¹⁶ Jia tsi xo toca ca nohiria bo. Jabi toca ca nohiria bá pi mato rëquëninino tsi jato yoba nicacana. Jia tsi xo toca ca nohiria bá mato rëquëninihaina iquia, naa mato xërëquë ca yonocoriacanaibo. ¹⁷ Jasca, rani-raniquia Estéfanas, Fortunato, Acaico, tihi cabá éa jisi bëceni iqui na. Jaboqui éa mëbicani quiha mato tahëxo na. ¹⁸ Nëa xo tsi éa ranihuacani quiha, naa mato ja ranihuapaoni jascaria. Nëca ca joni bo ma chahahuaxëti xo, jato yonoco jia ca iqui na.

Joihuahaina

¹⁹ Mato joihuaqui nëa ca iglesiá cabo, naa Asia maí ca chahahuacanaibo. Mato joihuacatsi quiha Aquila, Priscila, jato xobó ca aracanaibo. ²⁰ Mato joihuahi quiha nëa ca chahahuacanaibo tëquëta. ²¹ Jarohari tsi mato joihuaquia éa ri, é quënëhai cató no. ²² Jasca, yoshihuahacaxëti xo toa

tsohuëcara ca noba Ibo noiyamahai cato. Noba Ibo jono ra. ²³Noba Ibo Jesú mato noino ra. ²⁴Jesucristó no bax ani iqui tsi mato tẽquẽ noiriaquia ra. Iquẽ.

Segunda Carta Del Apostol San Pablo a Los Corintios

Corintó ca iglesia Pabló joihuanina

¹ Pablo, naa Jesucristo yonati tsi xo naa carta quënëti ibo. Jabi ëa Diós biniquë ra, jahuë Chani chitahëhuati ibo iti. Jatsi Corintó ca chahahuacanaibo, Acaya maí ca chahahuacanaibo, tihi cabo joihuaquia. Jasca, mato joihuaahi quiha Timoteo ri, naa ë bëta ax tsi yonocobëquihai cato. ² Noba Jahëpa Dios, noba Ibo Jesucristo, tihi cabá mato shomahuano. Mato ja ranihuacano ra.

Ibo bax Pabló tënënina

³ Jabi Dios qui, naa noba Jesucristo Jahëpa qui “Gracias” iguia ra. Noqui shomahuati Ibo-iboria tsi xo toa noba Jahëpa ra. No tënëpino tsi noqui mëbixëhi quiha ra, mëbiti ibo-iboria ja nori igui na. ⁴ No cohuëno tsi noqui chamahuahi quiha ra. Tocahi quiha, nohiria huëtza bo no mëbino iquish na, ja cohuënacaquë no. Diós noqui mëbini jascaria tsi jato mëbixëqui noa noqui ri. ⁵ Jasca, anomaria tsi xo toa no bax Cristó tënënina ra. Ja igui tsi no mëbiriachanicuë. Jatsi jaboqui tënëpihi tsi mëbiriachaxëquia ëa ri ra, Cristo chamá no. ⁶⁻⁷ Jasca, mëbihacaxëqui mato ri, Dios Chani ë yoahai igui tsi ë tënëxëquë no. Ea Cristó mëbihai ca tsayacahuë. Tsayapiquí tsi Diós xabahamati quinia cahëxëqui mato iguia. Jasca, ëa jascaria tsi ma tënëno tsi mato mëbixëhi quiha Dios ra, ëa ja mëbihai jascaria. Mato parayamaquia. Mato mëbixëhi quiha ja bax ma tënëxëquë no.

⁸ Nicaparicana, ëbë xatë bá. Asia mai xo tsi quiha anomaria ë tënënicuë iguia Ibo bax na. Noho coshi oquë ë tënëhai ini quiha. Toatiyá tsi chamayama cohuë ë iniquë. Huëjë noho shina ini quiha rë. Ja igui tsi bësoti ó ë pasoyamaniquë. ⁹ Toatiyá tsi “Rësopaimaria xo ëa rë” i ë niquë tënëhi na. Jama, tocajaniquë ra, ë quima Dios quiri, naa nohiria bo Bësomati Ibo-iboria quiri ë bësono iquish na. ¹⁰ Jatsi ëa Ilobá mëbi-mëbiniquë ra. Ja igui tsi ë rësoyamaniquë. Jasca pi xaba huëtzá tsi ë tënëtëquëno tsi ëa mëbitëquëxëhi quiha Dios iguia. ¹¹ Jatsi ë bax bëhoxcana, preso quima ë paquëmahacano iquish na. Japi ë bax huëtstima ca nohiria bo bëhoxno tsi oquë-oquëriaxëhi quiha toa “Gracias” i-icanaibo ra, Diós ëa mëbixëquë no.

Pablo bamanina Corinto yaca qui caxëna

¹² Ranixo tsi ë yoacatsai ca tsi xo naa: Dios Chani yoaquí tsi mato yoi, nohiria huëtza bo, tihi cabo ë parayamaniquë ra. Jiaria noho jabi i-ini quiha mato bëta ë iniquë no. Jasca, yama tsi xo toa yoi ca ë anina iguia ra, nohiria huëtza bo xërëquë xo na. Jabi ëa noixo tsi quiha jahuë chamá tsi Diós ëa mëbi-mëbiniquë ra jia ca ë ano iquish na. Jasca, toca tsi mato mëbicasquia ëa ri, noho tiisi tsi nomari. ¹³ Jasca, naa carta quënëpama tsi bëroria ca chani quënëcasquia, noho chani tëquë ma cahëyoino iquish na. Yama tsi xo toa noho carta ó ca jonë ca chani ra. Mato parayamaquia quënëquí na. ¹⁴ Jaboqui jia tsi ëa ma cahëyoyamamitsa rë. Jama, huësti barí tsi ëa cahëyoixëqui mato tia, noba Ibo Jesu joxëquë no. Toa barí tsi ranixëqui mato, mato bax ë ani quëshpi na. Jasca, mato qui ranixëquia ëa ri.

¹⁵ Nëca tsi shinaquí tsi mato qui shishoti planes ë aniquë mato ranihuatëquëcasquí na. ¹⁶ Jariapari tsi Macedonia mai qui capama tsi mato qui

ë shishocasni quiha. Jaquirëquë, Macedonia ax riquiquiria tsi mato qui ë shishotëquëcasni quiha. Tih tsi noho planes ini quiha. Toca tsi mato qui ë caarohapino tsi jodioba mai qui ëa raati ma mëbiquë aniquë tia. Jama, canoma ë ini quiha rë toatiyá no. ¹⁷ Jishopë. Naa carta bichi tsi Macedonia mai ó ë nori ca jisi tsi “Jocasyamaxo ra. Quiahi quiha ra” ¿ixëhi ni mato sa ëa yoati na? Parahaxma tsi mato qui ë shishocasniquë iquia ra, canoma ë ini nori. Jabi paracani quiha huëstima ca Dios cahëyamacanaibo pë, jato planes aquí na. ¹⁸ Tocayamahai ca ëa xo naa ra. Jasca, ëa cahëyoih quiha Dios. Noho planes aquí tsi parayamaquia. ¹⁹ Tsayacahuë. Dios Baquë Jesucristo Chani mato qui yoquí tsi no parayamaniquë ra, naa Silvano, Timoteo, ëa. Jasca, parayamaquí Cristo ri. Chahahuahacaxëti xo jahuë Chani ra. ²⁰ Jasca, Cristo iqui tsi jia tsi xo toa noqui Diós quëbihaina. Parayamaqui quiha. Jahuë Chani jatihuahi quiha ra. Jascaria tsi Jesucristo yonati bo no nori iqui tsi quiayamaquí noa, noqui ri, Dios oquëhuacasquí na. ²¹ Jabi Dios tsi xo toa noqui mëbihaina ra, jabi jiaría ca no jayano iquish na. Jasca, Dios tsi xo toa noqui raati ibo-iboria ra, jahuë Chani yoati. ²² Jasca, noqui chahahuacanaibo ja jiisaniquë, noqui ibohuaxëna. Jiisaxo tsi quiha Espíritu Santo noqui ja aniquë, parayamahai ca ja nori ca no cahëyoino iquish na.

²³ Jaboqui Dios nicaquia mato qui ë quënëhai ca carta ja tsayano. Jatiroha ca cahëhi quiha. Mato parayamaquia ra quënëquí na. Mato qui ë shishoti planes ë rarinama-niquë pë, mato bërabihuacasyamaquí na. Caarohapixo tsi quiha mato ë raahacë aniquë tia. Jabi ja tsi xo toa mato qui ë cacasyamanina ra. Mato ë raahacasyamani quiha. ²⁴ Nicacana. Johax tsi mato bëta ax tsi yonocobëquinacasquia, ma rani-ranino iquish na, yonamis-hai ca ë nomari quëshpi na. Jabi jia tsi xo toa Cristo qui ma chitimihaina iquia.

2

¹ ¿Tsayayamacanaí? Mato cohuëhuacasyamahi tsi mato qui ë cacasyamaniquë. Ja iqui tsi planes huëtza bo ë aniquë shinaxo na. ² Jabi mato qui caarohapixo tsi mato ë cohuëhuaquë aniquë iquia yobaquí na. Jatsi ¿jënahuariaxo raca jia tsi mato cohuëhuahacahax cabá ëa ranihuaquë ani? ³ Ja tsi xo toa carta pari mato qui ë raaniquë mato yobaxëna, jocha quima ma casoparino iquish na. Toatiyá tsi caarohapihax tsi ë cohuëhuahacaquë aniquë ra toá ca jocha iqui na. Jama, jaboqui ranihuahacati ó pasoquia mato qui shishopihi na. Jatsi no rani-ranibëquinano ra. ⁴ Toa jariapari ca carta quënëpama tsi cohuëria ë iniquë. Quënëhi tsi ë ara-araniquë, mato cohuëhuacasyamahi na. Toca tsi mato ë yoba-yobaniquë, mato ë noihai ca ma cahëyoino iquish na.

Jochahuaxëni ca ja mëbicati xo

⁵ ¿Japa toá ca jochahuaxëni cato ra, naa noqui cohuëhuati ibo-iboria? Toa nicacasquia. Ja iqui tsi ma tënë-tënëniquë rë. Jasca, pistia tsi ë cohuëhuahacaniquë ëa ri ja ani ca nichax na. Jatsi quiniacaxëcahuë. ⁶ Jënima tsi xo toa jahuë jocha quëshpi toa joni ma copinina. Jama, jaboqui toa joni ma copihai ca ma jënëmati xo iquia. Copihacaquë toa joni ra. ⁷ Jaboqui jahuë jocha ma shina-bënoxëti xo iquia. Shina-bënoxo jaboqui toa joni ma mëbixëti xo, ja yosana-yosanayamano iquish na. Tonia iglesia ja jisbayacasmitsa pë. ⁸ Jaboqui toa joni noitëquëcana iquia. ⁹ Jabi toa jariapari ca carta ë quënëniquë, noho yoba pi ma nicaxëti nori ca cahëcasquí na. ¿Toa joni ma copini sa? Toatiyá tsi toa ë cahëcasniquë ra. ¹⁰ Jama, jaboqui pi toa joni yoi ca ani ca ma shina-bënono tsi jahuë jocha shina-bënoxëquia ëa ri. Jabi Cristo bësojo xo tsi toa joni jocha shina-bënoxëquia ra, mato mëbixëna. ¿Tonia tobi

ni toa ë shina-bënoxëti ca jahuë huëtsa bo sa? ¹¹ Jatsi toa jochahuaxëni ca mëbicasquia jaboqui, Satanás toa joni parayamano iquish na. Satanás planes, naa ja acatsai ca tsi xo yoixëniria. Toa cahëqui noa ra.

Troas yacatá tsi Pablo cohuënanina

¹² Jabi Troas yaca qui ë cahëquë tsi quiha xaba jia ca ë qui acacaniquë ra Cristo Chani jia ca yoati. Jasca, Troas qui cahëxo tsi noho rabëti Tito ë jisyamaniquë rë. Jaha ë pasoni quiha, mato ó ca chani nicaxëna. Yama a ra. ¹³ Ja iqui tsi ë shina-huëjënaniquë, ëa ri. Jatsi jato joihuahax tsi riquicaya tsi Macedonia mai qui ë caniquë.

Jesucristo chamá tsi bëboqui noa

¹⁴ Dios qui “Gracias” iquia, jia tsi noqui ja mëpíahi ca quëshpi na ra. Jahuë Cristo yaxo tsi noqui bëbomahi quiha Dios ra. Jabi ëa ja bini quiha jahuë Chani pacanamati, jatiroha cató ca nohiria bá jahuë Cristo cahëyoino iquish na. ¹⁵⁻¹⁶ Jabi xabahamahacacanaibo qui perojome jascaria tsi xo toa Dios Chani ë yoahaina ra. Dios qui jia quiha. Jama, nicacasyamacanaibo qui pisiria ca rësomahai ca coho jascaria tsi xo toa ë yoahaina. Jama, xabahamahacacanaibo qui bësomati perojome jascaria tsi xo toa Chani ra. Anomaria tsi xo Dios Chani iquia. ¿Tsohuëcara ni toa Chani yoatí mëtsa cato sa? ¹⁷ Jabi huëstima tsi xo toa Dios Chani yoacanaibo, parata ganancia quëshpi na pë. Jahuë mishni bo mëtsaxëniria cabo jascaria tsi Dios Chani mëtsamiscani quiha pë. Jama, paraxoma tsi Dios Chani yoaquia ra, Díós ëa raani iqui na. Dios ranihuacasquia. Jabi Cristo iqui tsi toa Chani yoati mëtsa xo ëa ra.

3

Arati quinia paxa ca chani

¹ Nëca tsi ë quënëno tsi ëmë ë oquëhuacatsai ca ma quëscahuamitsa rë. Tocayamaquia ra. Jama, tocacani quiha ë qui quësocanaibo iquia. Tsayacahuë. Jato ti tsi xo toa jamë oquëhuacanaibo. ¿Jato yoi oquëhuati carta bo bëyamayamacahi ni, jia tsi iglesiá ca nohiria bá jato joihuano iquish na? Jasca, iglesia huëtsa bo qui canox pari tsi mato quima ca carta ó quëëcani quiha pë, iglesia huëtsa bo jismati. ² Tocayamaquia ra. Noho carta yoi bo xo mato ra. Noho shina ó tsi quënëhacani quiha Ibo qui ma chitiminina iquia. Jaboqui jatiroha cabo qui yoahacahi quiha ma inina, naa cartá yoahai jascaria. ³ Toca tsi Cristo quima quënënish ca carta jascaria xo mato ra, noho yonoco ma nori iqui na. Tintá tsi naa carta quënëhacayamani quiha Dios Espiritu Santó tsi ja nori. Jasca, maxax para cato ó tsi ja quënëyamahacani quiha, naa Moisés yoba quënëhacani jascaria. Jama, nohiria ba shina ó tsi quënëhacahi quiha Ibo bax ma acaina.

⁴ Parayamaquia. Dios bësojó tsi mato xërëquë ca ë ani ca yonoco qui bërabiyamaquia Cristo chamá no. ⁵ Jënima tsi xo toa ë anina iquia, jahuë chama iqui na. Jasca, tiisi pi ë qui Díós ayamarohano tsi jjenahuariaxo raca jahuë Chani ë yoaquë ana? ⁶ Dios tsi xo toa ëa rohahuati Ibo, jahuë xabahamati quinia paxa ca Chani ë yoano. Jabi Moisés quënëni ca yobá tsi nohiria quësohacapaoni quiha nati. Jama, naa ë yoahai ca quinia paxá tsi xabahamahacahi quiha nohiria, Espiritu Santo chamá no.

Xabahamati quinia paxa ca Chani

⁷ Jabi Moisés yoba oquë-oquëria tsi xo Cristo Chani ra. Jabi maxax para cato ó tsi quiha Moisés yoba quënëhacaniquë. Jasca, nohiria bo qui toa yoba acacaquë tsi quiha anomaria toa Maca Sináí bajra-bajrahai ca iniquë ra. Toatiyá tsi Dios oquë-oquëria jismahacani quiha. Jasca, bajra-bajraniquë

Moisés bēmana, maca ax ja rēnichiquē no. Jahuē bēmana ó ca huēa tsayanoma toa nohiria bo ini quiha. Naamayamani quiha toa jahuē bēmana ó ca huēa. Tsayacahuē. Oquē jayapaoniquē toa noqui quēsohai ca namēcatsai ca yoba ra. ⁸ Jama, jaboqui oquē-ouqēria ca tsi xo toa Espiritu Santó acaina. Noqui bēsomahai ca tsi xo toa ra. ⁹ Jabi oquē jayani quiha toa Moisés yobá tsi nohiria bo Díos otohai ca xabaca iquia. Jama, oquē-ouqēria ca tsi xo naa nohiria bo mēstēhuahai ca Espiritu Santo xabaca. ¹⁰ Jabi noqui jiaría i-ipaoni quiha toa jariapari ca yoba xabaca. Jama, jaboqui mahitsa tsi xo toa oquē iqui noa, naa xabahamati quinia paxa ca xabaca oquē iqui na. ¹¹ Jabija. Oquē jayapaoni quiha toa nahai ca jariapari ca xabaca. Jama, oquē-ouqēriaxēhi quiha naa i-ipaohai ca quinia paxa cato ra.

¹² Jabi bēboxēhi quiha Cristo Chani ra. Toa ó pasohi tsi raquēhaxma tsi mato qui chaniquia. ¹³ Jabi Dios Chani yoaquí tsi jatiroha ca bērohuacasquia ra. Yama tsi xo toa ē mapacatsaina. Jama, toayamani quiha Moisés yamabo ra. ¿Raití tsi jahuē bēmana ja bēmapayamayamani, jahuē bēmana ó ca oquē Israel ca nohiria bá tsayayamano iquish na? Bērohuahacayamani quiha toa huinocahai ca oquē ra. Ja jisyamacani quiha. ¹⁴ Jasca, toa nohiria ba shina quēstohuahacaniquē rē. Toa arati quinia huinocati nori ca ja cahēyamacani quiha rē. Jabi jasca pi ca xo jaboqui pē. Moisés yamabá quēnēni ca tsayaquí tsi toa arati quinia jatihuahacani nori ca cahēyamacani quiha pē. Jama, mēbihacaxēhi quiha toa jato shina mapahai ca raiti, Cristo qui ja chitimicaxēcaquē no. ¹⁵ Tsayacahuē. Jaboqui Moisés quēnēni ca ja nicacano tsi jari mapahaca tsi xo toa jato shina rē. Toa arati quinia jatihuahacani nori ca jari cahēyamayoicani quiha rē. ¹⁶ Jama, Ibo Cristo qui nohiria bēsono tsi mēbihacaxēhi quiha toa jahuē shina mapahai ca raiti ra. Jatsi jabija ca cahēyoicaxēcani quiha. ¹⁷ Jabi Ibo Cristo tsi xo toa jocha quima noqui paquēmati Espiritu Santo ra. Jasca, Espiritu Santo jaya cabo tsi xo toa Moisés yoba quima paquēmahacahax cabo, quinia paxa ca ja banahuacano. ¹⁸ Jabi Ibo Cristo oquē jismahi quiha noqui chahahuacanaibo tēquē, naa Moisés yamabá Dios oquē jismahi jascaria. Toa oquē jascaria tsi manēhi quiha noba noma jabi. Ibobá iquiria noqui manēmahi quiha ra. Ibo Cristo, naa Espiritu Santo yonoco tsi xo naa ra.

4

¹ Jabi jahuē Chani ototi, yonoco Díos ē qui aniquē ra, ēa noiquí na. Ja iqui tsi coshi xo ēa, jahuē yonoco axēna. ² Jasca, quinia jiaxēni cató tsi yonococasquia, Dios yonoco aqni na. E qui yoi tsi xo toa yoaxoma tsi ē acaina, mato paraxēna. Nohiria bo paracasyama xo ēa, chaniquí na. Jasca, Dios Chani rarínamayamaquia yoaquí na ra. Jabija ca roha ca chanihai ca ēa xo naa iquia. Ja tsi xo toa “Jia tsi xo toa ja yoahaina” icaxēcani quiha nohiria bo, jabija ca ē chaniha ca ja nicacaquē no. Noho quinia tsi xo toa, Dios Chani ē yoaquē no. Jasca, ē acai ca jisquí Dios ri. ³ Jama, tobi xo toa noho chani nicacasyamanaibo rē, naa tēnētiya qui bocanaibo. Jato qui bēronoma tsi xo toa ē yoahai ca chani jia cato. ⁴ Satanás, naa maí ca yonamixēniria ca iqui tsi ēa chahuayamacani quiha pē. Satanás tsi xo toa Dios cahēyamacanaibo bēcohuahaina ra. Tocahi quiha, jabija ca huēahai ca Chani ja nicayamacano iquish na. Jama, Cristo oquē, naa Díos jaria-jaria ja nori ca bērohuahi quiha toa ē yoahai ca chani ra. ⁵ Jasca, Dios Chani yoahi tsi emē yoati tsi chaniyamaquia. Jama, “Ibo-iboria tsi xo Jesucristo” iquia. Jasca “Jesu iqui tsi mato yonati roha xo ēa” iquia. Tihi tsi xo toa ē yoahaina Dios

Chani yoaquí na. ⁶ Anomaria tsi xo noba Dios ra. Noba shina ó tsi jahuë huëa huahuamahi quiha, naa “Tsémo ó tsi huëa huahuano” inish cato. Ja iqui tsi Dios oquë yoi ca cahëyoiqui noa. Jabi toa oquë jahuë Cristó jisiquimani quiha, naa Dios oquë Moisés bëmaná jisiquimani jascaria.

Chani chitahëhuati ibobayonoco

⁷ Jabi jahuë copixëniria ca Chani Diós ë qui aniquë pa, nohiria bo qui ë bono. Chamayama ca iriama ca joni ca ëa xo naa ra. ¿Jëniriexo tsi Diós ëa bini pa? Caca yoixëniria cató tsi copixëniria ca jahuë bo nohiría bohái ca jascaria xo toa Diós acaina iquia. Jabi Diós tocani quiha, jahuë copixëniria ca Chani ë qui ja quë no. Ja iqui tsi jahuë Chani ë yoano tsi jisiquihi quiha Dios chama roha, chama yama ca ë nori iqui na. ⁸ Toa Chani iqui tsi ëa yosihí quiha nohiria bo rë; jama, bëbohacatimaxëni ë nori. “¿Jënahuariaxëhi ni ëa sa?” i ë mitsa; jama, cohuëyama ca ë nori. ⁹ Huëstima tsi xo toa ëa pasomaha cabo, ë bëta Dios nori. Mai qui ë niahacanicuë; jama, jari bëso ë nori. ¹⁰ Jatiroha ca barí tsi bërohuahacahi quiha noho yora rë, namëhacati, naa Jesu tënëmahacani jascaria. Jasca, ja tënëhaina, ja nahaina, tihí cabo Jesu bëboni jascaria tsi bëboxëquia ëa ri. E nohó ca Jesu jabi jisiquimahacaxëti xo ra. ¹¹ Jabi Jesu tahëhax tsi nati aroha-arohacahi quiha noho yora rë, no nohó ca Jesu jabi nohiria bá jisno iquish na. ¹² Jabi Dios Chani ë yoahai iqui tsi jatiroha ca barí tsi rësoti basima xo ëa iquia. Jama, naa Chani iqui tsi mato ó tsi bësohi quiha Cristo ra.

¹³ Jabi Dios Chani yoahi tsi Cristo qui chitimiquia, ëa ja mëbino iquish na, naa David yamabo Dios qui chitimini jascaria. Quënëhacanish cabó ó tsi “E chaniquë, Dios qui chitimihí na ra” i David yamabo ni quiha. Jabi tocaquia ëa ri chanihi na. ¹⁴ Jasca, Dios Chani yoapama tsi rësohai qui raquëyamaquia ra. Jabi noba Jesu tsayacana. ¿Noba Ibo Jesu Diós bësotëquëmamayamani? Jatsi, jahuë Jesu yaxo tsi noqui ri bësomaxëhi quiha ra. Toa barí tsi ja bësojó tsi niixëqui noa, noqui tëquëta ra. ¹⁵ ¿Tsayacanai? E tënë-tënënicuë ra, ma mëbihacano iquish na. E acai cató tsi pacanamahacahi quiha Dios noihai ca Chani ra. Toca tsi shomahuahacaxëhi quiha nohiria huëstima cabo. Jatsi toa barí tsi anomariaxëhi quiha toa Dios qui “Gracias” icanaibo iquia. Jatsi Dios oquëhuahacano ra.

¹⁶ Jabi bësotëquëxëqui noa ra. Ja iqui tsi shina-huëjënayamaquia, Dios yonoco aqú na. Jabi noho yora tsi xo toa chonihaina. Sirinahí quiha. Jama, noho shina tsi xo toa coshi-coshiria, jatiroha ca barí tsi ja chamahuahacahai quëshpi na. ¹⁷ Jabi jaboqui ë qui iriama tsi xo toa ë tënëhaina. Naamaya-maxëhi quiha ra. Iriama tsi xo. Jama, ë tënëhai quëshpi tsi copihacaxëquia toa barí no. Anomariaxëhi quiha toa i-ipaohai ca premio iquia. ¹⁸ Jatsi bësopama tsi naa maí ca bëroria ca jahuë bo ó quëyamaquia. Jama, mana ca jisnoma ca jahuë bo ó quëeriaquia ra bixëna. Jabi naamayamaxëhi quiha naa noqui bëroria ca maí ca jahuë bo. Jama, i-ipaohai ca jahuë bo tsi xo toa no jisyamahaina ra.

5

¹ Nicaparicana. Noho yora, naa noho oxti yoi rësono tsi yora paxa ca ë qui axëqui Dios, toa barí no ra. Ja acai ca yora ixëhi quiha, joni bá aca ca ja nomari. Toa barí tsi i-ipaohai ca yora jayaxëquia ra. ² Jabi jaboqui tsi bësopama tsi ëësiquia, naa noho mana ca yora sahuëcatsi na. Jabiticasquia ra. ³ Jasca, toa yora sahuëhax tsoboco iyamaxëhi quiha noho shinana, Ibo bacaquë no. ⁴ Jaboqui bësopama tsi oxtí tsi ë racahai ria tsi xo toa noho

yora ó tsi è bësohaina. E qui pistia yoi quiha. Jasca, rësocasyamaha tsi èësiquia rë. Rësocasyama xo ëa, Ibo jonox pari no. Bësopama tsi jabiticasquia toa barí no. Rësoxoma tsi noho yora paxa ca sahuëcasquia ra. ⁵ Jabi Dios tsi xo toa ëa jabitihuacatsaina. Ja tsi xo toa ëa rohahuahi quiha toa bari quëshpi na. Jasca, jahuë Espíritu Santo è qui ja ani quiha, è bax ja axëhai ca è shina-bënoyamano iquish na.

⁶ Noho mana ca yora ó pasohi tsi raquëyamaquia. Jama, noho yora yoi ó tsi bësohi tsi Ibo ya iyamapiquia rë. ⁷ Jasca, jisnoma xo noba Ibo; jama, “Ja bëtaxëquia” iquia, ja qui chitimihí na. ⁸ Raquëhaxma tsi jaha pasoquia. Ja iqui tsi è qui jënima tsi xo toa è rësohaina. Rësohi tsi Ibo ya ixëquia ra. ⁹ Ja tsi xo toa Ibo yoi ranihuacasquia ra bësóquí na. Jasca, rësóxo tsi jari Ibo ranihuacasquia toa jo xo na. ¹⁰ Jabi toa bari tsëquëno tsi Cristo copiti tsahoti bësójó tsi niixëqui noa noquí tëquëta copihacaxëti. Toa xo tsi noba copi bixëqui noa ra. Jatsi jia ca no anina, yoi ca no anina, tihí cabo quëshpi tsi copihacaxëhi quiha noa.

Rabënamati chani

¹¹ Jabi raquë-raquëria tsi xo toa Ibobá copihaina. Jaha tsi quinia-quiniaquia nohiria bo qui chanihi na. Jabi Ibo bax nohiria bo bëbocatsai ca ëa xo naa ra. Noho shina cahëriahi quiha Dios ra. Jasca, noho shina yoi ma cahëno mato ri. ¹² Jabi nëca tsi chaniquí tsi ëmë oquëhuacasyama xo ëa ra. Jama, xaba mato qui acasquia è qui ma ranino. Jasca, toá ca ëa ocahuamiscanaibo quëbiti mëtsa ma ino ra. Nohiria ba tiisi, nohiria jaria, tihí cabo roha chani-chanihi quiha toa joni bo pë. “Jia tsi xo toa no acaina ra” icani quiha pë, mahitsa ja nori. ¹³ Jasca, Dios yonoco è aria-ariahai iqui tsi yoyoxëni ca è nori ca quëscahuacani quiha toa joni bo rë. ¿Ocamani? Yoyopiqué tsi Dios bax naa yoyo jaya xo ëa iquia, mato mëbicasquí na. ¹⁴ Jabi noqui Cristó noi-noiriahai ca shinaquí tsi jahuë yonoco aria-ariacasquia ra. Tsayacahuë. Jatiroha ca nohiria bo bax huësti ca joni rësoniquë. Ja rësoquë tsi quiha rarinaniquë jatiroha ca nohiria ba iti. Tobi quiha toa bësó yoi cabo, naa Cristo cahëcanaibo. Tobi quiha toa bësó yama cabo, naa Cristo cahëyamacanaibo. ¹⁵ Ja tsi xo toa no bax rësonish ca bësotëquëmahacanish ca no ranihuaxëti xo, naa noqui bësó yoi cabo. Nomë bax no bësóyamano ra. Ja tsi xo toa jatiroha cabo bax ja nani quiha. ¹⁶ Jasca, è rarinani iqui tsi jamëri tsi xo toa nohiria yoati è shina-shinahaina jaboqui ra. Chahahuanox pari tsi quiha noho noma jabi quiniá tsi nohiria tanamahi è i-ipaoniquë rë jato cahëyoixëna. Toa quiniá tsi Cristo ri è tanamani quiha mahitsa. Cristo è cahëyoini ca è quëscahua-paoniquë pë. Jama, jaboqui tocayamaquia ra, chahahuahax na. ¹⁷ Jabi Cristó nohiria rarinamano tsi nohiria paxa ca manëhi quiha. Huinocahi quiha jahuë jabi siri. Jabi paxa ca bichi quiha ra.

¹⁸ Jabi Diós acai ca tsi xo toa no xabahamahacahaina. Cristo ini cató tsi jahuë rabëti bo noqui manëmacatsi quiha. Jasca, Dios tsi xo toa noqui rabënamati yonoco acaina ja tahëxo na. ¹⁹ ¿Tsayacanai? Nohiria bo tëquë ya tsi rabënacatsi quiha Dios, jahuë Cristó no. Ja acani ca jocha cuenta jato pasomaha tocahacayamani quiha ra. Jasca, toa rabënamati chani noqui Diós aniquë yoati. Tihí ca tsi xo toa no yoaxëti chani. ²⁰ Ja tsi xo toa Cristo Chani bohái ca ëa xo naa. Noho chaní tsi mato qui chanihi quiha Dios ra. Jatsi Dios ya ma rabënamahacano iquia ra. ²¹ Jabi jocha yama jahuë Cristo iniquë. Jama, no bax jahuë Cristo Diós jochahuaniquë ra, jahuë Cristo ini cató tsi jahuë mëstë no jayano iquish na.

6

1 Jasca, Dios ya yonocobëquipama tsi mato yoba-yobariaquia. Mato noi-noiriahi quiha Dios iquia ra. Ja tsi toa ja noihai ca quima casoyamacana iquia. Mahitsa mato ja noiyamano ra. 2 Jatsi Dios Chani nicaparicana: “E qui xaba jia cató tsi mato ë nicaquë ra.

Nicaxo tsi mato ë mëbiquë toa xabahamahacati barí no” i Dios ni quiha. Nicacapa. Jaboqui tsi mato mëbicatsi quiha Dios ra. Jaboqui tsi xo toa xabahamahacaxëti bari ra.

3 Jasca, Dios yonoco aqui tsi quinia-quiniaquia, ë qui nohiria bo quësoyamano iquish na. ¿Jato qui yoi ma ni ë acaina? Jabi, “Anoma tsi xo toa Dios yonoco ja acaina ra” i jaca mitsa ëa yoati na, Dios yonati bo qui quësocascani na. 4 Jama, yonocoquí tsi Dios yonati roha ë nori ca jismacasquia jatiroha ca ë acai cató no. Dios yonati xo tsi tënë-tënëquia ra. Ea nohiria bá yosipino tsi Dios yonati ë nori ca jismaquia. Ja iqui tsi ë binianiquë. Tënëhi tsi ë yosanayamaniquë. 5 Jasca, ë sëtiahacanicuë; preso qui ë nanëhacanicuë; ë qui nohiria bo caxa-caxanicuë; ë yonocorianiquë; coshi ini quiha noho bëro; ë paxnaniquë; tihi tsi ë tënë-tënënicuë ra Dios yonati xo na. 6 Jasca, jahuë yonoco aquí tsi noho jabi jiaxëni cató tsi Dios yonati ë nori ca jismaquia naa ë acai cató no. Tsayacahuë. E yoyoyamaniquë; Dios Chani ë cahëyoinicuë; ë yosanayamaniquë; nohiria bo ë mëbiniquë. Tihi cató tsi Dios yonati ë ini ca ë jismani quiha. Jasca, ë bëta Espiritu Santo iniquë; nohiria bo ë noiyoiniquë; 7 ë quiyamaniquë; Dios chama ë jayaniquë; tihi ca tsi ë ini quiha jahuë yonoco aquí na. Tihi ca jabi bo tsi xo toa noho mëstë ca arma quiha, naa noho bëboti arma, noho quiniamati arma. 8 Dios Chani ë yoano tsi tobi xo toa ëa oquëhuacanaibo; jama, tobi ë qui caxacanaibo nori. Tobi xo toa ëa ranicanaibo rë; jama, tobi toa jia tsi ëa ocahuacanaibo nori. Jabija ca ë chanino tsi tobi xo toa ëa quiahuacanaibo rë. 9 Tobi quiha ë quima casocanaibo rë, jama, tobi toa ëa cahëyoihai ca chahahuacanaibo nori. Huëstima tsi ë rësopicasicuë jari bëso ë nori Dios Chani yoaxëna. Rësoti basima iroha-irohaquia, jari bëso ë nori. 10 Cohuë ë nori ca quëscahuacani quiha ra; jama, ranihai ca ë nori. Noitiria ca ë nori ca quëscahuacani quiha; nohiria bo mëbiti mëtsa ë nori. Mëquëya ca ë nori ca quëscahuacani quiha; narisyamahai ca ë nori, naa ëa Dios Chani yoahai cato.

11 Jisa, noho Corintó ca rabëti bá. Bëroria tsi mato qui chaniquia ra. Mato parayamaquia chaniquí na. Jatiroha ca ë shinahai ca bërohuaquia. 12 Jatsi mato noi-noiriaquia iquia. Mato qui caxayama xo ëa ra. Jama, mato ri tsi xo toa ëa joihuacasyamahaina iquia. ¿Jëniñiaxo ëa noiyamacanaí sa? 13 Jaha tsi mato yoba-yobariaquia rë, naa jahuë xocobo jahëpá yobahai jascaria. Ea noitsacana iquia ra, naa mato ë noihai jascaria.

Chahahuayamacanaibo ya rabënyamacana

14 Yobahi tsi Dios cahëyamacanaibo ya rabënyamacana. Jato noma jabi banahuayamacana iquia ra. ¿Jënahuariahax raca dos ca quinia bo, naa mëstëxëni ca quinia, anoma ca quinia, tihi cabo jia tsi ibëquinana? Jamëri ca xo ra. Jasca, ¿jënahuariahax raca tsëmo, huëa, tihi cabo ibëquinana? Jamëri ca xo. 15 Jasca, ¿jënahuariahax raca dos ca ibo bo, naa Satanás, Cristo, tihi cabo ma jayana? ¿jënahuariahax raca Dios cahëyamacanaibo, chahahuacanaibo, tihi cabo rabë nabëquiyoina? 16 ¿jënahuariahax raca Dios iti-itiria, mahitsa ca dios ba iti-itiria, tihi cabo no jaxcamënamana? Quiniacaxëcahuë. Bësohai ca Dios iti-itiria tsi xo noqui ra. Nicacapa. Diós yoani ca tsi xo naa: “Noho nohiria bo ó tsi racaxëquia.

Jato bêta tsi co-coxëquia.
 Jasca, jato Dios yoi ixëquia ra;
 Noho nohiria yoi bo icaxëcani quiha jato ri”
 i ja ni quiha.

¹⁷ Jasca,

“Jato quima tsëquëcana.

Jato bêta rabënyamacana.

Jato yoi ca jabi pi ma basino tsi mato bixëquia ra.

¹⁸ Jatsi mato Jahëpa yoi ixëquia.

Jasca, noho baquë bo, noho jahi bo, tihî cabo ixëqui mato ra”
 nëa tsi Ibo chamaxëni ca nëcani quiha.

7

¹ Toca tsi noqui chaniqui Dios ra, no bêta rabënacatsi na, noho rabëti bá. Jatsi jocha quima no casoti xo ra. Noba yora, noba shinana, tihî cabo ó ca yoshihuahai ca jocha no bahuëno. Bahuëhax tsi no mështërianano Dios yoi nicahi na. Tihî tsi xo toa noho yoba ra.

² Jatsi ëa shinacana ra. Mato bêta rabënacasquia ëa ri ra. ¿Tsayayamaya-macana? Tonia anoma ca ë ani nori ca quëscahuaiquî mato iquia. Jishopë. Yama tsi xo toa mato pasomaha ca ë ani ca yoi cato ra. Yama tsi xo toá ca ë yoshihuani cato. Yama tsi xo toá ca biniahuahacahax ca nohiria huëstita. Tocayamahai ca ëa xo naa ra. ³ Jabi nëca tsi chaniquia mato mëbixëna, mato qui quësoti ë nomari. Noho shina ó xo mato ra. Jaha tsi bësopiquî tsi rësopiquî tsi mato mëbiriacasquia ra. ⁴ Jasca, naa yoba quënëpama tsi bërabihamax tsi bëroria tsi mato qui chaniquia ra. Quënëpama tsi rani-raniquia, noho yoba siri ma nicani iqui na. Jasca, jaboqui anomaria tsi xo toa ëa ma ranihuahaina ra, nëa tsi tënëhi ë iquë ri.

⁵ Jabi jaboqui Macedonia mai xo ëa rë. Naa mai qui cahëhax tsi joitimaxëni ë iyamëquë rë. Anomaria ja iyamëta quiha toá ca nohiria bá ëa yosihaina ra. E bêta joi ja mëracasca-yamëta quiha. Jasca, ë shina-huëjënayamëquë.

⁶ Jama, cohuë pi ë no tsi Dios, naa cohuë cabo ranihuati Ibo-iboriá ëa ranihuayamëquë ë qui Tito ja raahai cató no. ⁷ Jatsi ë rani-raniyamëquë ja joquë no. Jasca, ë raniyamëquë mato yoati tsi nicahax na, ëa ja yoayamëta cató no. Jia tsi iyamëta quiha toa mato yoati tsi ja chanihaina ra. Ea ma jiscasnina, ma jochani quëshpi tsi cohuë ma iquiina, noho yoba ma banahuacasnina, tihî cabo yoati ëa ja yoayamëta quiha. Nicahax oquë tsi rani-raniquia jaboqui ra.

⁸ Nicaparinana. Jabi toa mato qui ë raani ca carta iqui tsi tanaroha pistia tsi cohuë ma iniquë mato ri iquia. Ja iqui tsi pistia cohuë ë iniquë ëa ri ra toa chani ë raaquë no. Jama, ë qui jia ini quiha toa jariapari ca carta mato qui ë raanina. ⁹ Jabija; toa ë quënëni ca yobá mato cohuëhuaniquë pë. Jama, toa yoba iqui tsi jocha quima Dios quiri ma bësöniquë ra. Ja tsi xo toa rani-raniriaquia jaboqui. Jocha quima ma casoniquë iquia ma cohuëhuahacahai cató no. Jiaria ca cohuë tsi xo toa ra. Jaha tsi ma mëbihacarianiquë ra. ¹⁰ Jasca, Dios qui jiaria tsi xo toa jocha quëshpi no cohuëhaina ra. Toca tsi cohuëhax noba jocha quima casoqui noa ra. Jasca, Dios qui noqui mëpihi quiha toca ca cohuë, xabahamahacati. Jiaria tsi xo toca ca jocha quëshpi cohuë ra. Jama, toca tsi cohuëyamahi quiha Dios cahëyamacanaibo rë. Cohuënacani quiha pë, jato jocha bërohuahacaquë no, bërabihi na. Ja bërabihuahacacana ca iqui tsi cohuë ca xo, jato jocha quëshpi cohuë jaca nomari. Jabi toca ca cohuë tsi xo toa tënëtiya qui nohiria bo mëpihaina. ¹¹ Jatsi mato jocha quëshpi cohuë yoati shinaparinana. ¿Toca ca cohuë mato mëbiyamamani?

Ja iqui tsi jaboqui jocha quiniaxëniria xo mato iquia. Jasca, jaboqui yoi ca ma acai ca bëroriahua-casqui mato ra, toca ca cohuë iqui na. Jaboqui mato qui yoiria tsi xo jochahaina. Jasca, jocha qui Dios caxahai ca qui raquëria xo mato ra. Jënima tsi xo toa toca tsi iquina iquia. Jasca, jaboqui noho yoba nicariacasqui mato ra. Jasca, oquënaniquë toá ca jochahuaxëniria ca ma copicasni ca ri. Jaha tsi jaboqui quësohacatimaxëni xo mato iquia. ¹² Jabi toá ca jochahuaxëni cato, toá ca tënëmahacanish ca jahëpa, tihi cabo tahëxo tsi toa carta mato qui ë raani ca ma quëscahuamitsa. Jama xo. Toa carta ë quënëyoiniquë mato mëbixëna. Mato qui ja raahacani quiha ëa ma noihai ca jismati. Parayamaquia. Noho shina cahëhi quiha Dios ra. ¹³ Ja tsi xo toa ë rani-raniquë, naa ëa ma noiyoini iqui na.

Tito joquë tsi ë rani-raniquë ëa ma noiyoihai ca nicahax na. Jasca, oquë tsi ë ranihuahacayamëquë jia tsi Tito ma joihuani ca nicahax na. Ja bax ma ani ca iqui tsi jahuë shina chamahuahacani quiha. ¹⁴ Jabi mato qui Tito canox pari no tsi “Shina jiaxëni cabo tsi xo toa Corintó ca chahahuacanaibo ra” i ja qui ë ni quiha. Jabi ë parayamani ca Titó jisni quiha mato cahëxo na. ¿Tsayacanai? Mato parayamaquia mato qui chaniquí na. Jabija ini quiha toa mato qui ë yoanina Tito yoati na. ¹⁵ Jaboqui anihí quiha mato bax ja noihaina, mato shinaquí na. Jahuë yoba ma aria-ariacasnina, raquëxo tsi jia tsi ma joihuanina, tihi ca tsi shina-bënoyamahi quiha iquia. ¹⁶ Jasca, jaboqui rani-raniquë ëa ri, jia tsi mato qui ë chitimiyoiipihai iqui na.

8

Ranixo ofrenda acacati

¹ Jabi nëá ca Macedoniá ca iglesia bo Diós shomahuarianiquë iquia, ëbë xatë bá. Diós noihai ca iqui tsi anomaria tsi xo toa ja acanaina jaboqui. Toa mato yoacasquia. ² E jonox pari no tsi quiha huëstima tsi ja tënëcaniquë Ibo bax na. Jama, tënëhax raniquí tsi noitiria ca nohiria bo ja mëbicasani quiha ra. Jaha tsi jaboqui ofrenda acasani quiha biniahai ca nohiria bo qui. ³ Mato parayamaquia. Anomaria tsi xo toa Ibo bax ja acascanaina iquia. Biniacui ri tsi quiha jari ofrenda ja acahitaquë pa, naa Jerusalén ca noitiria cabo qui. ⁴ “Jodioba maí ca chahahuacanaibo mëbiriacasqui noa, noqui ri” i ë qui jaca itaquë pa. ⁵ Jatsi anomaria tsi xo toa ofrenda ja acahitahana ra. Jaha ë pasohai ca huino quiha. Jabi jariapari tsi Ibo Jesu chama qui jamë ja mëacahitaquë jahuë yoba nicaxëna. Jquirëquë, Dios shinaná tsi quiha ë qui jamë ja mëacahitaquë ra, noho yoba axëna. ⁶ Anomaria tsi xo toa ja acahitahana iquia. Jatsi ja acahitaha ca ofrenda jisi tsi mëri tsi mato qui jahari Tito raacasquia ra, ma chitahëhuani ca yonoco ma jatihuano. Jabi mato xërëquë Tito no tsi ¿ofrenda ati ma chitahëhuayamayamani, noitiria cabo bax na? Toa nicaquia. Jatsi jaboqui bacahi quiha Tito ra, toa ofrenda jatihuati mato mëbixëna. ⁷ Anomaria tsi xo toa ma acaina Ibo bax na iquia ra. ¿Ibo qui chitimiriayamayamacanai? ¿Nohiria bo tiisimati mëtsayamayamacanai? ¿Dios Chani cahëriayamayamacanai? ¿Nohiria bo mëbiriacasyamayamacanai? ¿Ea noiyamayamacanai? Tihi ca tiisi bo jaya xo mato iquia. Ja iqui tsi ma huashiyamano ra ofrenda aquí na.

⁸ Nëca tsi quënëpama tsi “Ofrenda acahuë ra; acahuë ra” iriyamaquia mato qui. Jama nohiria bo pi noiyoiquí tsi jato ma mëbixëtí xo iquia, ofrenda ma acai cató no. Ja tsi xo toa nëá ca chahahuacanaibá acai ca ofrenda yoati mato yoaquia, jascaria ca ma ano mato ri. Jatsi jaboqui ma noiyoihai ca jismacana. ⁹ ¿Japa noba Ibo Jesucristó noqui noiyama-yamani? Noixo

tsi jahuë oquë, jahuë jahuë bo, tihí cabo ja jishërianiquë ra noitiria ca joni manëxëna, noqui mëbicsatsi na. Shinacana. Tihí ca tsi no bax ja ani quíha, no shomahuariahacano iquish na.

¹⁰ Jaboqui mato yobapama tsi oquë tsi xo toa ofrenda ma jatihuahaina iquia, naa xëni huëtsa catiati ma chitahëhuani cato. Jabi jariapari ca noitiria cabo bax ofrenda acanaibo ma iniquë iquia. Jasca, noitiria cabo ma mëbicasni quíha. Jiaria quíha. ¹¹ Jatsi acahuë iquia. Jaboqui tsi toa ofrenda jatihuahacaxëti xo ra. Jabi toa ofrenda ma aria-ariacasni quíha. Jaboqui ma catiariano, ma ariacasni jascaria. Jatsi ma jaya ca quima Dios qui ma ano ra. ¹² Jabi ofrenda Dios qui acasqui mato tonia. Jatsi ma jaya ca quima Dios qui pi ma ano tsi mato qui ranixëhi quíha Dios ra. Jasca, mëquëya pi ma no tsi jaha pasoyamahi quíha.

¹³ Jabi noitiria cabo bax ofrenda aqui tsi ma biniayamano iquia. Quini-acaxëcahuë ma narisyamano mato ri. Jasca, ja narisyamacano jato ri. ¹⁴ Jaboqui huëstima ca jaya xo mato iquia, jato mëbixëna, ja narisyamacano iquish na. Jascaria ja xëni huëtsa ma biniano tsi mato mëbixëceni quíha jato ri, huëstima ca jayapiquí na. Toca tsi yamaxëhi quíha toa ma narishaina. ¹⁵ Jabi “Tocaxëti xo” ii quíha Quënëhacanish cabo. Moisés tiyá tsi narisyamani quíha toa nohiria bo, naa maí ca jahuëcara ca piti mapari jasca ca ja catiacaquë no. Catiexo tsi piti narisyamani quíha huëstima ca jayanish cato. Jasca, narisyamani quíha toa pistia ca catiahai ca ri. Yama ini quíha toa ja nariscanaina ra.

Corinto qui Tito raahacania

¹⁶ Jabi mato shina-shinaqui Tito ra, naa mato yoati ë shinahai ria. Mato mëbiriacatsi quíha iquia. Ja quëshpi tsi Dios qui “Gracias” iquia. ¹⁷ “Jahari Corinto yaca qui mi bacano” i Tito qui ë quë tsi “Jo” i ja itaquë ra. Ja cacastapini quíha mato mëbicsatsi na. Jaboqui mato qui shishoxëhi quíha, cati ó quëhi na. ¹⁸ Jasca, Tito ya nëa ca xatë huëtsa raaxëquia, naa nëa ca Dios Chani yoati cahëxëni cato. ¹⁹ Naa jasca ca joni iglesia bá bini quíha Jerusalén qui ë bëta xo ofrenda boti, naa no caxëquë no. Jabi naa ofrenda noqui acacani quíha Ibo Jesucristo oquëhuahacano iquish na. Jasca, jismahacaxëhi quíha jato no mëbicsaina. ²⁰ Jabi quinia-quiniaquia toa ofrenda otoi na, nohiria bo ë qui quësoyamano iquish na. ²¹ Ja tsi xo toa quinia-quiniaxëniria ca ëa xo naa, jia roha ca axëna. Ibo Jesu, nohiria bo ri, tihí cabo ranihuacasquia, ë acai cató no.

²² Jasca, naa dos ca joni bo ya tsi joni huëtsa raaquia, naa nëa ca Dios yonoco aria-ariacatsai cato ra. Huëstima tsi naa joni tanahamahacani quíha Dios yonoco aqui na. Jabi anomaria tsi xo toa ja mëbicsaina iquia. Jaboqui mato shinaqui tsi mato mëbicsatsi quíha jaa ri. ²³ Jatsi, “¿Tsohuëcara ni naa joni bo sa?” i pi toá ca chahahuacanaibo no tsi jia tsi jato quëbicana. Quëbihax, “Nëa xo Tito, Pablo rabëti. Jatsi nëa xo dos ca joni huëtsa bo, naa Dios oquëhuacascanaibo. Iglesia bo tsi xo toa noqui jato raati ibo-iboria” i jato qui cana. ²⁴ Jasca, mato qui ja shishocano tsi jato mëbicana, noiquí na. Jato pi ma mëbiriano tsi jato ma noihai ca cahëxëhi quíha nëa ca iglesiá cabo ri. Jasca, mato qui ë ranihai ca cahëcaxëceni quíha jato ri, nicaxo na.

9

¹ Jabi noitiria ca Jerusalén ca chahahuacanaibo qui no bohái ca ofrenda yoati mato qui ë quënëyamaxëti xo iquia. ² Tonia ofrenda acasqui mato ri jato mëbixëna. Ja tsi xo toa jato ma mëbicasni ca yoati tsi yoa-yoaquia nëa

ca Macedoniá ca xatë bo qui. Yoaxo, “Huësti ca xëni no tsi ofrenda Acaya maí ca chahahuacanaibá acasni quiha ra” i nëá cabo qui quia. Jatsi ma acasni ca nicahi quiha nëá cabo ra. Nicaxo tsi Jerusalén ca noitiria cabo mēbiriacasaxēcani quiha jato ri jaboqui ra. ³Jatsi jaboqui Tito, dos ca joni bo, tihí cabo mato qui raaxēquia, mato yoati tsi mahitsama noho chani nori ca jato jismaxēna. Jabi mato qui cahēhax tsi mato ofrenda biti ó pasocaxēcani quiha, jato ē yoahai ca jascaria. ⁴Jatsi quiniacaxēcahuē. Ofrenda pi ma jayamano tsi bērabixēqui noa ra, ē bēta nëá ca Macedoniacabo joxēmitsa iqui na. Jasca, bērabixēqui mato ri, ofrenda jayamapihi na. ⁵Ja tsi xo toa mato qui naa joni bo pari rēquē raaquia. Mato mēbicascani quiha ra, mato quima toa ofrenda catiaxēna, naa ma acasni jascaria. Toca tsi rohahuahacaxēti xo mato ofrenda ē joquē no. Tocapimano tsi bēroriāxēhi quiha ma acatsai ca shina jiaxēni cato ra. Jama, ofrenda pi acasyamaquí tsi ma ayamaxēti xo iquia.

⁶Noho yoba shinaparicana ofrenda ma aquē no. Mishni-mishniroha ca tēsaxēhi quiha ichariama ca banahai cato ra. Jasca, huēstima ca bēro banahai ca jascaria tsi shomahuariahacaxēhi quiha toa ofrenda jia ca acatsai cato, nohiria bo ja mēbicasquē no. ⁷Jatsi ofrenda anox pari tsi shinaparicana mato tēquēta. Jabi ofrenda acai cató tsi cohuēpiquí tsi ayamacana ra. Jasca pi nohiriá ofrenda acasyamano tsi jato amayamacana ra. Ofrenda acatsai ca noihi quiha Dios ra. ⁸Noixo tsi mato shomahuariati mētsa xo Dios ra, ja qui ma aquē no. Mato ja shomahuano tsi narisyamaxēqui mato iquia. Jatsi huēstima ca jayaxēqui mato oquē ca yonoco axēna. ⁹Tocaxēti xo ra, naa Quēnēhacanish cabá yoani jascaria.

“Huashiyamaquí tsi noitiria cabo qui ariahi quiha Dios noihai cato. Jasca, ja acai cá jia ca shina-bēnopistiyamariāxēhi quiha Dios ra” ii quiha ra.

¹⁰Jatsi jaha ma quēēhai ca bēro tēquē mato qui axēhi quiha Dios. Mato banati bēro, mato piti mapari, tihí cabo ati ibo-iboria xo. Axo tsi mato yonoco shomahuariaxēhi quiha tēsataria ca ma jayano iquish na. Tocaxēhi quiha Dios ra, ma huashiyamaquē no. ¹¹Mato rico-ricoriahuaxēhi quiha. Narisyamahí tsi jatiroha ca xabacá tsi ofrenda ati mētsariāxēqui mato ra. Jasca, mato qui noho yoba iqui tsi shomahuariahacaxēhi quiha toa mato ofrenda bicaxēcanaibo ri. Bichí tsi Dios qui “Gracias” iria-iriāxēcani quiha ra. ¹²Jatsi shinaparicana. Ma acai ca ofrenda iqui tsi mēbiriahacaxēhi quiha noiti-noitiria cabo. Jasca, toa ma acai ca ofrenda iqui tsi anomariāxēhi quiha toa Dios qui “Gracias” iquiina. ¹³Jasca, mato ofrenda iqui tsi mato jabi jia ca jiscaxēcani quiha Jerusalén ca nohiria bo. Cristo Chani ma chahuayoihaina, ma huashiyamahaina, jato ma mēbiriacatsaina, tihí cabo jiscaxēcani quiha ofrenda ma acai cató no. Jatsi rani-ranicaxēcaqui. Ranixo tsi Dios oquēhuariacaxēcani quiha mato iqui na. ¹⁴Jasca, mato bax bēhoxaxēcani quiha ra, mato bēta rabēnabēquicatsi na. Tocaxēcani quiha ra, Díos mato mēbiriaha ca jisish na. Mato ja mēbihai iqui tsi ma huashiyamahai ca jiscaxēcani quiha. Iquē ra. ¹⁵Jatsi Dios qui “Gracias” inono ra, no bax ja ani ca xabahamati quinia quēshpi na. Yoanoma tsi xo toa no bax ja acaina ra.

10

Chama Pablo jayanina Dios Chani yoati ibo iti

¹Jaboqui ēa yoi, naa mato qui yoixēniria ca bērabiria ca Pablo nicacana iquia ra. Jabi tobi quiha toa chama yama ca ē nori ca quēscahuacanaibo ra. “Ishima xo Pablo, noqui shishohi na” icani quiha. Jasca, “Roamixēniria xo, noqui

basihax na” i mato qui cani quiha tonia. Jabi toca ma xo ëa ra. Ja tsi xo toa ishimaria ca Cristo jascaria tsi jaboqui mato qui chanicasquia. ² Jariapari tsi quiniacaxëcana iquia ra. Mato qui joqui tsi mato roacasyama xo ëa ra. Jama, tobi quiha toa Dios cahëyamacanaiba jabi ë jaya ca quëscahuacanaibo rë. Jabi toa nohiria raahati ó pasoquia ra, mato qui johax na. ³ Jabija; ëa ti tsi xo toa chama yama ca joni. Jama, nohiria ba planes, nohiria ba quinia bo, tihi cabá tsi nianayamaquia. Yoixëniria ca jocha pasomaha nianapama tsi çjënahuariaxo raca jato quinia bá tsi no bëbona? ⁴ Noqui chahahuacanaiba arma bo, naa nianati bo tsi xo jamëri; Dios cahëyamacanaibá-na jasca ca jaca nomari. Dios chama jaya xo noba arma bo ra. Toa arma bá tsi Yoshini iti-itiria bo quëyoti mëtsa xo noa iquia ra. ⁵ Jatiroha ca Dios pasomaha ca quëyoquia ra. Jishopë. Tobi toa Dios pasomaha ca shinacanaina. Tobi toa Dios tiisi pasomaha ca chanicanaina ra. Tihi ca shina yoi bo bëboti mëtsa xo ëa ra, Dios chamaxëni ca arma bá no. Bëboxo tsi jatiroha ca toca ca shinacanaibo, chanicanaibo, tihi cabo Cristo qui mëpixëquia ra, ja huësti ca nicamaxëna. ⁶ Jasca, joqui tsi toá ca Dios Chani nicatimaxëni cabo tëquë copixëquia ra, noho yoba ma nicayoiquë no.

⁷ Nicacapa. Ea tsayaquí tsi chama yama ca ë nori ca quëscahuahi quiha toá ca ëa pasomaha cabo ra. Tonia jato qui yoiria tsi xo toa noho jaria, noho chani, noho jabi rë. Jasca, ëa oquëria ca jaca nori ca quëscahuacani quiha, “Cristo chama-chamaria jaya ca noqui xo naa” iquina. Jatsi ja shinaparicano iquia ra. Çjënahuariahax Cristo chama mëquëya ca ë ina? Jabi ë qui ri Cristó jahuë chama aniquë ra. ÇTsayacanaí? Anomaria tsi xo toa ëa ja shinacanaina iquia. ⁸ Cristo chama jaya xo ëa ra. Jabi naa chama ë qui acacani quiha mato chamahuati, mato yoshihuati nomari. Jabi toa chama qui bërabiyamaquia. Toa mato yoacasquia ra. E qui jiaria xo toa chama ra. ⁹ Tihi tsi quënëquia chama jaya ca ë nori ca ma cahëyoino, noho carta ma jisquë no. ¹⁰ Jishopë. “Ja quënëhai ca carta bo chahahuayamacahuë” i mato qui cani quiha toá ca huësti huësti cabo. “Chamaxëni tsi xo toa ja quënëhaina; mahitsa ca ja nori. Tsayacahuë, ja joquë no. Chama yama ca joni tsi xo naa ra. Yoiria tsi xo toa ja chanihaina” i mato qui cani quiha pë. ¹¹ Jabi basi ë no tsi ë quënëhai ca jamëri ca ë nori ca quëscahuahi quiha ëa pasomaha cabo. Jama, tsayacahuë. Mato bëta ë no tsi jamëriyamaxëhi quiha toa ë axëhaina ra mato ó xo na. Coshirixëquia ra, noho carta bo jascaria.

¹² Jasca, naa carta quënëpama tsi “Ea ti tsi xo toa oquë-oquëria” i mato qui yamaquia, naa ëa pasomaha cabo jascaria. Bërabiria tsi xo toa toca ca chanihaina ra. Jabi ëa oquë-oquëria jaca nori ca quëscahuacani quiha pë. Jatsi ja acanai ca tanamaquí tsi jato medida yoi ca acani quiha pë, jato yonoco yoi ca tanamaxëna. Tanamahax tsi ranicani quiha pë, jia ca jato yonoco nori ca quëscahuahi na. ¹³ Jama xo ëa ra. Quinia-quiniaquia ë acai ca yonoco yoati tsi chanihi na. Diós ë qui ani ca medidá tsi tanamahacahi quiha ë ani ca yonoco tëquë iquia. Toa yonoco yoati tsi mato qui chaniparicasquia ra. Jabi, çmato tana tsi jariapari ë cayamamani, Dios Chani ya? ¹⁴ Tana tsi mato qui caxo tsi quiha Dios medida ë niniyamaniquë mato qui caqui na. Toa yonoco Diós ë qui ani quiha. Tëtëcaria xo Dios medida ra. Ja iqui tsi Dios Chani ya tsi mato tana tsi ë caniquë Cristo Chani yoaxëna. Jatsi çë cho ja bëyamayamacani, naa mato ó ca Dios Chani yoacanaibo? ¹⁵ ÇJabi jia ma ni toa mato ó ca yonoco ja acanina? Quiniahax, “E acai ca tsi xo naa” iyamaquia. Anoma quiha. Jasca, mato ó ca tsi Diós ë qui ani ca yonoco anihuati ó pasoquia, jia tsi Cristo tiisi ma cahëyoiquë no. Tsayacahuë. Dios medida xara tsi chitëcasquia jahuë yonoco aqui na. ¹⁶ Jabi mato ó ca yonoco pi anino tsi jaha ë quëëhai ca tsi

xo toa nohiria huëtsa bo qui Dios Chani bohaina ra. Mato oquëri ca nohiria bo qui cacasquia ra. Jabi Dios Chani yoahacahai ca qui cacasyamahai ca ëa xo naa ra, jató-na iti ja nori iqui na. Toa qui caapiquí tsi ja acanai ca ë ibohuamitsa rë, “E acai ca tsi xo naa” iquiina. Anoma quiha. ¹⁷Jarohapa tsi noba yonoco yoati tsi chaniquí tsi Dios roha ë oquëhuati xo iquia. ¹⁸Jasca pi Diós ë acai ca yonoco shomahuano tsi noqui bëroriaxëhi quihua toa ë qui ja ranihaina. ¿Jënahuariaxo raca noho yonoco Diós shomahuana?, “Jiaria tsi xo naa ë acaina” i ë quë no.

11

Mahitsa ca Dios Chani chitahëhuati ibo bo

¹Jarohari tsi ëa yoati tsi chanixëquia pë. Jia tsi ëa nicaparicana ra, naa noho yoyo pistia mato ë yoaquë no. E qui yosanayamacana. ²Yoaquí tsi mato shina-shinaquia ra, naa jahuë ahui ranohai ca bënë jasca cato. Jabi mato ó bësoriaquia, naa Diós no nohó bësohai jascaria. Jabi Cristo qui mato ë aniquë ra, mato ja otono, naa jahuë jahi bënë ti ca qui jahëpá jahuë jahi jiaria ca acai jascaria. ³Jabi jaboquí jia tsi xo toa Cristo ma nicacatsaina iquia. Jama, Cristo quima ma casomitsa iquia xaba huëtsá no. Toa shina-shinaquia ra. ¿Jabi ronó Eva parayamayamani? Jascaria tsi ¿mato parayamayamaxëhi ni sa toá ca parahai ca tiisimacanaibo? ⁴¿Jabi mëri tsi naa jobëna ca tiisimacanaibo ma chahahuayamayamani? Jishopë. Jamëri ca Jesu, naa ë yoani ca quirima ca mato yoacani quihua pë. Jasca, Espiritu Santo yoi, Dios Chani yoi, tñhi cabo ma biyamaniquë ra jato qui nicaquí na. ⁵¿Ea oquë-oquëria ni toa mato jobëna ca Chani chitahëhuati ibo-iboria bo pa? ¿Jënahuariahax raca ëa oquë ca ja icana ra? ⁶Jabi Chani yoati cahëxëni ca ë iyamamitsa; jama, Dios tiisi cahëxëneria ca ëa xo naa ra. ¿Jatiroha ca quiniá tsi toa tiisi mato ë jismayamayamani, mato bëtaquí na?

⁷Jasca, Dios tiisi mato qui yoaquí tsi mato parata ë biyamaniquë ë tiisimahi ca quëshpi na. Tonia mato qui yoi tsi xo toa mato ë cobrar-ayamahaina iquia ra. Tonia ë jochaniquë ra, tocahi na. ⁸Jasca, mato xërëquë xo tsi Dios yonoco ë ano tsi iglesia huëtsa bá ë qui parata raaniquë ëa otóxëna. Jishopë. Jato parata ë yomani quihua mato mëbixëna ra. ⁹Nicaparicana. Toa xo tsi Dios Chani mato tiisimapama tsi ë biniarianiquë rë. Toatiyá tsi ¿mato parata ë baani? Ayamaniquë ëa ra. Jama, Macedonia quima ax bëcanish ca xatë bá ëa otoniquë. Ja iquí tsi mato ó xo tsi ofrenda ë bënëymaniquë ra, mato yosanamacasyamaquí na. Jascaria tsi tocaxëquia, xaba huëtsa mato qui ë shishotëquëxëquë no. Mato parata bicasyama xo ëa ra. ¹⁰Mato parayamaquia. Cristo tsi xo toa ëa raati ibo-iboria. Copixoma tsi Dios Chani yoaxëquia ra. Noho jabi quihua. E qui jia tsi xo ë tocahaina ra. Ja tsi xo toa toá ca iglesia bo, naa Acaya cabo quima parata biyamaxëquia ë tiisimahi ca quëshpi na. ¹¹Jabi noqui noiyamaquí tsi noba ofrenda bicasyamahai ca Pablo nori ca ma quëscahuamitsa. Jama xo. Mato noyoiquia. Toa cahëhi quihua Dios. ¹²Jama, quinia-quiniaquia. Dios Chani yoaquí tsi mato ofrenda bicasyamaxo ëa ra, ëa pasomaha cabo iqui na. Mato ofrenda pi ë bino tsi “Paratá-naxëni xo Pablo ra” icaxëcani quihua iquia. Jishopë. Toa xaba jato qui acasyama xo ëa ra. Ea jascaria tsi Ibo bax yonococasyama ca xo, parata ó quëemis-hi na. ¹³Dios Chani chitahëhuati ibo yoi bo ma xo toa joni bo iquia. Quiacani quihua jato yonoco yoati na. Jato yoixëni ca jabi rarinamacani quihua pë, Dios Chani chitahëhuati ibo-iboria bo jascaria jisiquixëna. ¹⁴Jatsi ratëyamacana. ¿Jascaria tsi jahuë yoixëni ca jabi Satanás

rarinamayamayamani, huëhai ca ángel jascaria tsi ja jisiquiniquë no? ¹⁵ Jabi tocacani quiha Satanás yonati bo ri. Rarinacani quiha jato ri, jia ca acanai ca nohiria jascaria jisiquixëna. Jama, ja acanai ca quëshpi tsi copihacaxëhi quiha toa nohiria bo ra.

Ibo bax Pablo tënëna

¹⁶ Jabi nëca pi ëa yoati ë chanino tsi “Yoyoxëni xo Pablo ra” ¿ji ni mato sa? Toca pi quëscahuacuí tsi noho yoyoxëni ca chani pistia nicacahuë. Yoyohi tsi mishni mishni noho yonoco yoati tsi chanicasquia ëa ri pë, naa ëa pasomaha cabo chanihai jascaria. ¹⁷ Nëca tsi chanipama Ibo quima ca chani ma xo naa mato ë yoacatsaina. Yoyo pistia tsi xo naa ë yoaxëhaina rë. ¹⁸ Jabi ja acanai ca tëquë yoati tsi chanicaní quiha huëstima ca ëa pasomaha cabo, jamë oquëhuacatsi na. Jatsi jaboqui tocaxëquia ëa ri pë. ¹⁹ Jishopë. Toa yoyoxëni cabo qui yosanayamaqui mato pa. Tonia mato qui jiarica ca xo toa ja acanaina iquia. Jatsi ëa, naa huësti ca yoyoxëni ca huëtsa ma nicaparino, mato cahëxëni cabá. ²⁰ Tsayacahuë. Mato yonacani quiha. Mato biniahuacani quiha. Mato jahuë bo mëbicaní quiha. Mato qui nomacani quiha. Mato bëpaishacani quiha. Tocajacano tsi jato tënë-tënëqui mato ra. Jato qui raniqui mato pa. ²¹ Jishopë. E bërabiniquë ré tocati.

Jamë pi ja oquëhuacascano tsi tocati cahëquia ëa ri, naa yoyoxëni ca jascaria. Tsayacahuë. Jaboqui bërabiyamaxëquia ra, jato jascaria chaniti. ²² “Jodio yoi bo xo noa ra” ¿icahi ni? Jatsi, toca xo ëa ri. “Abraham yamaba chahitaxocobo xo noa” ¿icahi ni? Jatsi, toca xo ëa ri. ²³ “Cristo yonati bo xo noa ra” ¿icahi ni? Jatsi oquëria ca yonati ca ëa xo naa ra. Jishopë. Yoyoxëni ca chanihai jascaria tsi xo naa ë chanihaina rë. Jariapari tsi jato yonoco oquë tsi xo toa ë yonocohaina iquia. Jasca, jato oquë tsi xo toa preso qui ë nanëhacanina ra. Jasca, jato oquë tsi xo toa ë rashahacanina ra. Jasca, jato oquë tsi rësoti basima ë ini quiha. ²⁴ Cinco tsi jato huacapí tsi jodioba chama bá ëa rashani quiha. Copiqui tsi treinta y nueve ca sëquë ë qui ja acani quiha. ²⁵ Jasca, tres tsi quiha carayanabá ëa rashaniquë jato jihuí no ra. Jatsi huësti tsi nohiria bá ëa aquë aniquë maxaxá no. Jatsi tres tsi ëa bëhai ca barco jëtëquëniquë. Huësti tsi quiha ia nëpax tsi ë nononiquë jatiroha ca barí no. ¿Tsayacanai? Tihí ca tsi ë tënë-tënëniquë Ibo bax na. ²⁶ Jasca, raquëria ë cohai iniquë. Tobi ini quiha ani bo ë shitahaina. Tobi ini quiha bahí ca yomacanaibo. Jasca, raquëria ini quiha toa ë acasni ca jodiobo, carayanabo. Raquëria ini quiha yacatá tsi racahaina; jasca, nihi, ia bo, tihí cabo shitahí ri. Jasca, mahitsa ca chahahuacanaibá ëa yosini quiha. ²⁷ Jasca, yosaria ca yonoco ë aniquë. Huëstima tsi oxanoma ë ini quiha. E paxnani quiha. E tëshinani quiha. Huëstima tsi oriquiti, racati, sahuëti, tihí cabo ë narisni quiha. Tihí ca tsi ë tënëniquë ra. ²⁸ Jarohapa tsi tobi ini quiha toa jatiroha ca barí tsi iglesia bo tëquë ë shina-shinahaina, jato otocasquí na. ²⁹ Japi tsohuëcaracá yoi ca ano tsi cohuënaquia ra. Tsohuëcara pi jochano tsi tënëriaquia ra. Jato tëquë mëbiriacasquia jato noiquí na.

³⁰ ¿Tsayayamacanai? Chama yama ca ëa xo naa ra. Toa mato yoaxëquia, ë tënëni ca yoati tsi chaniquí na. ³¹ Mato parayamaquia. E tënëni ca tëquë cahëhi quiha Dios, naa noba Ibo Jesucristo Jahëpa ra. Oquëhuahacati ca tsi xo toa ra. ³² Tonia noho jabi tsi xo toa Ibo bax tënëhaina iquia. Toca tsi ë chitahëniquë chahahuahax na. Damascó tsi ë no tsi chama-chamaria Aretas nita ca gobernador ëa acasni quiha. Jatsi yacatá ca caiti bo ó tsi jahuë soldado bo ja janani quiha, ë qui tsamimaxëna. ³³ Jama, panë ca xëa pistia nacohax ë paxaniquë, cacano tsi ëbë xatë bá mai qui ëa botëmaniquë no.

12

Pablo tēnamēnina

¹ ǀJabi Dios bax ē ani ca jahuē bo yoatí rētsaxēhi ni ēa rē? Mahitsa ca xo; jama, jari yoaxēquia. Jaboqui Diós ēa jismani ca jahuē bo, ē tēnamēnina, tihi cabo yoati tsi mato yoaxēquia. ² Naama tsi quiha, naa catorce año tsi ē tērohacani quiha Dios itiria ca qui. ǀNoho yora yoi tērononi sa? ǀNoho shina roha ma ni? Toa cahēyamaquia rē. Cahēhi quiha Dios roha. ³ Jabi Dios itiria qui ē tērohacani quiha itēquēquia parahaxma. ǀNoho yora tērononi ma ni? ǀNoho shina roha ma ni? ǀJēnahuariaxo ē cahēyoina? ǀE tēnamēni ma ni? Cahēhi quiha Dios roha. ⁴ Jatsi quiha mana qui cahēxo tsi quiha anomaria ca chani ē nicaniquē. Yoanoma ini quiha toa ē nicanina iquia. Jiaria quiha. ⁵ Jama, ocapihēni ca yoapama tsi ē bax Diós ani ca roha yoaxēquia, ja oquēhuahacano iquish na. Jabi ēa ti tsi xo toa mahitsa cato. Chama yama ca ēa xo naa iquia ra. ⁶ Jabi ē qui bēroria tsi xo toa jia tsi emē yoati tsi ē chanihaina. E tēnamēhai ca yoati pi ē chanino tsi yoyoxēni ē nori ca ma quēscahuamitsa. Jama, tocapihi tsi yoyoyamaquia, jabija ca ē yoahai quēshpi na. Jatsi quinia-quiniaquia, oquē-oquēria ca ē nori ca ma shinayamano. Noho chani, ē anina, tihi cabo oquē ē nomari ca ma cahēno.

⁷ Jabi anomaria ini quiha toa mana xo Diós ēa jismanina. Jatiroha ca nohiria bo qui ē yoacasnī quiha. Jatsi jahuēcara ca pahē, naa moxa pahē jascaria ca ē qui acacanicuē, emē ē oquēhuayamano iquish na. Yoshinī raahai ca pahē jascaria ja ini quiha. E qui ja acacani quiha ēa tēnemati. ⁸ Jatsi tres tsi quiha Ibo ē nicaniquē, naa noho yora ó ca pahē ja mēbino. Ayamaahi quiha. ⁹ Jama, Ibobá ēa quēbiniquē: “Mia mēbixēquia. Noho chama narisyamaxēqui mia” iquiina. Jasca, “Chama yama pi mi no tsi oquē-oquēria tsi xo toa noho chama mi nohó no” i ē qui ja ni quiha. Ja tsi xo toa rani-raniquia ē tēnēquē no. E qui jia tsi xo toca tsi chama yama ca iquiina. Japi noho chama yoi jayama ca ē no tsi nohiria bo qui bēroriaxēhi quiha Cristó ēa mēbihaina ra. ¹⁰ Jaha tsi ē qui jēnima tsi xo chama yama ca iquiina. Jasca, rani-raniquia pa, Ibo tahēxo nohiria bá ēa ocahuquē no. Jatsi ē qui jēnima tsi xo toa ē biniahaina, ē tēnēmahacahaina, ēa nohiria bá yosihaina. Ibo bax ocapihēno tsi ēa mēbiriaxēhi quiha Cristo, oquē tsi jahuē yonoco ē ano.

Corintó ca chahahuacanaibo Pabló shina-shinanina

¹¹ Yoyoxēni ca ē iquē rē, nēca tsi mato qui chanixēna. Mato shina ri tsi xo iquia, Ibo bax ē ani ca ma cahēyoini iqui na. ǀJēniriaxo tsi ēa ma mēbiyamayamani? ǀJēniriahax “Jia tsi xo toa nēá ca Pabló anina” i jato qui ma yamani rē? Jabi chama yama ca ē imitsa; jama, ēa oquē ma xo toa mato qui bēcanish ca Dios Chani chitahēhuati ibo-iboria bo iquia ra. ¹² Nicacahuē. Dios Chani chitahēhuati ibo yoi ca ma jisniquē ra, mato bēta ē iquē no. Yosanaxoma tsi ǀjisti-jistiria bo ē ayamayamani mato xērēquē xo na? ¹³ Jatsi ǀjahuē nariscani sa? Toa cahēcasquia ra. Tonia yosaria xo mato, mato ofrenda ē biyamani iqui na. Oca xo tia. Jishopē. Tonia ja tsi xo toa yoi ca ē anina iquia mato caxahuaxēna. Jaha tsi ēa shinacahuē.

¹⁴ Jaboqui mato qui shishocasquia ra. Jabi tres tsi xo toa mato qui ē shishocasnina. Mato qui pi shishotēquēquí tsi mato biniahuacasyamaquia. Mato parata, mato jahuē bo, tihi cabo ó quēēyamaquia. Jama, jaha ē quēēhai ca tsi xo mato yoi ototi. Tsayacahuē. ǀJato nabo ototi ni xocobo pa? Ayamacani quiha. Xocobo ototi ibo-iboria tsi xo toa jato nabo ra. Jascaria tsi mato jahēpa yoi ē nori iqui tsi mato ē otoxēti xo ēa ri. ¹⁵ Ja tsi xo toa ranixo tsi noho parata,

noho chama yoi, emë yoi, tihí cabo aapiquia mato mēbixēna. ¿Jēniriauxo tsi mishni mishni roha tsi ēa noicanai sa, mato ē noiriauxē no?

¹⁶ Jishopē. Tobi quiha mato ó ca ēa quiahuaacanaibo rē. Shishoquí tsi ¿mato ē biniahuani pa? “Paraxo noba parata bichi quiha Pablo” ¿iyamayamacahi ni? Jishopē. ¹⁷ ¿Jēnahuariaxo mato ē biniahuani? Ea yoacahuē. ¿Mato qui ē raani ca joni bá mato biniahuani pa? ¹⁸ Toa nicaquia. Mato qui Tito cani quiha, “Mí cati xo” i ja qui ē quē nō. Jasca, ja bēta xatē huētsa ē raani quiha mato ja mēbino. Jaboquí ēa yoacahuē. “Noqui Titó biniahuaniquē pē, ganancia acasquí na” ¿ii ni mato sa? ¿Jēnahuariaxo toca tsi ma shinana? Anoma quiha. Mato bēta racahi tsi ēa jascaria ja ini quiha. Mato ja parayamani quiha. Noba jabi tsi xo toa ra, nohiria bo mēbicastsí na.

¹⁹ Jabi ēa mato ē noimacatsai ca quēscahuaqui mato tonia. Jishopē. Tocayamaquia ra, Cristo chahahuahai ca ē nori iqui na. Dios yoi bēsojó tsi chaniquia ra. Dios roha tsi xo toa ēa copiti ibo-iboria ra. Jatsi nicaparicana, noho rabēti bá. Jatiroha ca ē acai cató tsi mato mēbiriacaquia, oquē ca chahahuacanaibo imano iquish na. ²⁰ Jama, jaboqui pi mato qui shishohi tsi mishni mishni tsi mato qui raquēquia rē. Shishoquí tsi ¿jahué jixsēhi ni ēa sa? Jasca, ¿jahué ó pasohi ni mato ri, ē quima sa? Toa shina-shinaquia ra. Jabi Ibo bax ma bēsohai ca jiscasquia joxo na. Jama, ¿toá ca joi mēracanaina, nohiria bo qui ma yosanahaina, ma caxahaina, tihí cabo jixsēhi ni ēa sa? Jasca, ¿toá ca huashicoxēni cabo, ranimixsēni cabo, jamē oquēhuamixsēni cabo, pacots-huaxēni cabo, tihí cabo jixsēhi ni ēa sa, ē joquē no? Tihí tsi shina-shinaquia mato yoati na. ²¹ Ja tsi xo toa mishni mishni tsi raquēpiquia mato qui shishoxēna. Tonia mato bēsojó tsi Diós ēa bērabihuamitsa iipiquia ra. ¿Mahitsa mato ē tiisimayamayamani sa? Toa shinaquia ra. Tocapijano tsi cohuē-cohuēriaxēquia rē. ¿Jari toá ma ni toa jato jocha quima casoyamanish ca anoma ca chotamixsēniria cabo ra? Toa shina-shinaquia ra.

13

¹ Jabi mato qui ē cahēno tsi tres ixēhi quiha toa mato qui ē shishohaina. Jaboqui mato qui ē shishoti xo ra. Jatsi copihacaxēti xo toá ca jochamixsēniria cabo ra. Tsohuēcara qui pi no quēsocasno tsi tobixēti xo toa dos, tres ca tsayahax cabo, “Jabija xo” iti. ² Mato bētaquí tsi dos tsi mato ē yobaniquē, toá ca jochamixsēniria cabo ma copino. Jaboqui tres tsi xo toa ē yobahaina ra. Jabi siri tsi jochanish cabo, jochabēna cabo, tihí ca jochamixsēniria cabo copixēquia ē joquē no. Paxayamacaxēcani quiha iquia. ³ Jama, “Jishopē. ¿Jēnahuariaxo noqui ja copina? ¿Cristo chama jayahi ni? Jahuē chama noqui ja jismaparino ra” ¿ii ni mato sa? Jatsi quiniacaxēcahuē. E nohó tsi Cristo chanihai ca mato jismaxēquia ra ē joquē nō. Chama-chamaxēni tsi xo Cristo ra. Tsayacahuē. ¿Mato xērēquē tsi jia tsi Cristo yonocoyamayamani ē ani cató no? ⁴ Jabi chamayama ca joni jascaria tsi Cristo acacaniquē cruzó no, chamaxēniria ca ja nori. Jaboqui Dios chamá tsi bēsohi quiha. Jabi toca xo ēa ri. Chama yama ca ēa xo naa, naa ja ini jasca cato. ¿Tsayayamacanai? Chahahuacanaibo yonayamahai ca ēa xo naa ra. Jama, tobi quiha toa Dios chama ra. Toa chamá tsi mato copixēquia ē joquē no.

⁵ Quiniacaxēcahuē. Jabi ēa tanamapama tsi mamē tanamaparicahuē iquia. ¿Mahitsa ma ni ma chahahuahaina sa? Toa nicaquia. ¿Mato ó tsi bēsoyoihi ni Cristo sa? “Jaatia” imano tsi ¿mahitsa ma chahahuayamani? iquia. ⁶ Jama, mahitsa ca chahahuahai ca ma xo ēa ra. Toa ma cahēno. ⁷ Jasca, mato bax Dios qui bēhoxquia ra, yoi ca ma ayamano. Ma bēbohaina, jia ca ma acaina, tihí cabo nohiria bá tsayano. Jabi mato ē mēbini ca nohiria bá jismitsa. Jisi

tsi “Jia tsi xo Pabló acaina” i jaca mitsa. E qui iriama tsi xo toca ca chani ra. Jaha ë quëëhai ca tsi xo toa ma bëbohai ca ja tsayacanaina ra. ⁸Jatiroha ca barí tsi jia ca roha acasquia ra. Jabija ca pi nohiria bá cahëno tsi rani-raniquia. ⁹E qui jënima tsi xo toa mahitsa iquiina, chamaxëni ca ma iquë no. Mëstëxëniria ca jabi jiaxëni ca ma jayano. Toa nicaqui noa bëhoxquí na. ¹⁰Jabi jaboqui naa carta quënëquia mato qui shishohi canox pari. Joxo tsi ë qui Ilobá ani ca chamá tsi mato raahacasyama xo ëa ra. Yoi quiha. Jabi toa chama ë qui acacani quiha nohiria bo chamahuati, mëbiti, jato yoshihuati ja nomari.

¹¹Jarohari tsi naa carta jatihuaquia. Jatsi ranicana. Mëstëxëniria ca jabi ó quëëcana. Mëbinacana. Huésti ca shina ma jayano. Iquinayamacana. Tihi ca tsi acahuë. Jasca, noqui noihai ca ranihuahai ca Dios mato bëtano. ¹²Jia tsi joihuanacana. ¹³Jasca, mato joihuahi quiha nëá ca chahahuacanaibo ri.

¹⁴Ibo Jesucristó mato tēquë shomahuariano. Jahëpa Diós mato noiyoino. Mato bëta Espíritu Santo rabënano. Iquë.

La Carta Del Apostol San Pablo a Los Gálatas

Chahahuacanaibo Pabló joihuanina

¹ Dios Chani chitahēhuati ibo ca Pablo ca ēa xo naa ra. Jesucristo, Jahēpa Dios, naa Jesucristo bēsomanish cato, tihī cabá ēa raaniquē jahuē Chani ē yoano. ² Galata maí ca iglesia bo joihuaquia. Jasca, mato joihuañi quiha ē bēta ca xatē bo ri. ³ Noba Jahēpa Dios, noba Ibo Jesucristo, tihī cabá mato noino. Mato ja bēpasimacano. ⁴ Jabi noba jocha quēshpi tsi Jesús jamē aniquē, jaboqui anomaria ca maí ca jabi yoi bo quima noqui xabahamaxēna. Jabi Dios qui jia ini quihā ja inina. ⁵ Dios no oquēhua-oquēhuapaoxēti xo. Amen.

Huēsti roha tsi xo Dios Chani

⁶ Noixo tsi Diós mato quēnaniquē. Jama, ¿jaboqui mato quēnanish ca quima casocanai pa? ⁷ Jabi yama tsi xo toa chani jia ca huētsa ra. Tonia mato xērēquē tsi xo toa mato yosihai ca nohiria bo iquia. Cristo Chani rarinamacasani quihā pē, chani huētsa yoaquí na. ⁸ Japi quiniacaxēcahuē iquia. Jabija ca tsi xo toa mato ē tiisimani ca chani ra. Yama tsi xo chani huētsa. Jamēri ca chani pi tsohuēcaracá yoano tsi tēnētiya qui toa Diós raano. Jasca pi mato qui jamēri ca chani naipá ca ángel, noqui yoi, tihī cabá yoano tsi tēnētiya qui Diós noqui raano iquia. ⁹ Jabija tsi xo toa ma bini ca chani itēquēquia. Tsohuēcaracá pi jamēri ca chani mato qui yoano tsi tēnētiya qui Diós raano iquia ra.

¹⁰ ¿Jabi tsohuēcara ni toa ē ranihuacatsaina, Dios Chani yoaquí na? ¿Nohiria ni? ¿Dios ni? ¿Tsayamacanai? Nohiria bo roha pi ranihuacatsi tsi ¿jēnahuariahax raca Cristo yonati ē ina ra? E qui Diós ranino ra.

Jesu quima Pablo chani jonina

¹¹ Joni bo quima joyamaniquē ē yoahai ca chani ra, ēbē xatē bá. ¹² Ea tiisimayamaniquē nohiria ra. Jama, ē qui Jesucristó jahuē Chani jisiquimaniquē ē yoano iquish na. ¹³ Tonia ē i-ipaoni ca ma nicaniquē tia, naa jodioba jabi ē noi-noiniquē no. Toatiyá tsi bamaxoma tsi chahahuacanaibo ē tēnēmapaoniquē rē. Jato ē quēyo-quēyocasniquē ra. ¹⁴ Jasca, anomaria ini quihā noba rēquēyamaba jabi ē noihaina. Noho rabēti bo oquē quihā.

¹⁵ Jatsi Diós ēa quēnaniquē, ēa noiquí na. Jabi ē conox pari no tsi ēa ja bini quihā jahuē-na iti. ¹⁶ Jatsi shina rani tsi jahuē Baquē yoi ēa ja jismaniquē, carayanabo qui jahuē Chani ē yoano iquish na. Toatiyá tsi joni huētsa bo qui ē cayamaniquē yoba bixēna. ¹⁷ Jasca, Jerusalén qui ē cayamaniquē toa jariapari ca Dios Chani chitahēhuati ibo bo icanish cabo ya chaninaxēna. Jama, Arabia mai qui ē catapiniquē. Jaquirēquē Damasco yaca qui jahari ē joniquē. ¹⁸ Tres año no tsi Jerusalén qui ē cayamani quihā. Jaquirēquē Jerusalén ca Pedro qui shishohi ē caniquē cahēxēna. Quince bari no tsi ja bēta ē chitēni quihā; jaroha. ¹⁹ Toatiyá tsi Dios Chani chitahēhuati ibo huētsa bo ē jisyanamaniquē. Jacobo, naa noba Iboba noma roha ē jisni quihā.

²⁰ Jabija tsi xo naa mato qui ē quēnēhaina iquia. Dios bēsój tsi quiayamaquia ra.

²¹⁻²² Jaquirēquē Siria, Cilicia, tihī ca mai bo qui ē caniquē. Naatiyá tsi jari ēa cahēyamaniquē jodioba maí ca chahahuacanaibo iquia ra. ²³ Jama, “Dios Chani yoahī quihā noqui pasomaha ca ipaonish cato pa” i nohiria bo paoni

quilha. “Ja quëyocasni ca Chani jaboqui yoahi quilha ra” i jaca paoni quilha ëa yoati na. Jaroha tsi xo toa ja nicacanina. ²⁴ Jatsi ë chahahuani iqui tsi chahahuacanaibá Dios oquëhuaniquë ra, raniquí na.

2

Jerusalén qui Pablo canina

¹ Catorce año no tsi Jerusalén qui ë cayamaniquë. Jaquirëquë ë caniquë Bernabé ya. Tito ri ë boni quilha. ² Jabi Jerusalén qui ë caniquë, “Cata” i ë qui Dios ni iqui na. Cahax, toá ca rëquëninicanai bo ya roha ë chaniniquë. Jatsi carayanabo qui ë yoani ca chani jato qui ë bërohuaniquë, ja cahëcano iquish na. ¿Anoma ca ë yoani ini ca ja quëscahuayamayamacani? ³ Jama, jato qui jia noho chani ini quilha. Jasca, Tito, naa ë bëta jonish ca carayana ja jibirishayamacaniquë ra, mahitsa ca chahahuacanaibo nicaxo na. ⁴ Jabi toá tsi mahitsa ca chahahuacanaibo iniquë pë, naa carayanabo qui jodioba jabi bo amacascanai bo. Jabi jodioba jabi bo tëquë quima Jesucristó noqui paquëmaniquë iquia. Jotamiscanaibo jascaria tsi ja bëcaniquë Jesucristó quinia jia ca nicaxëna. Japi ja joyamarohacano tsi Tito yoati tsi ja nicayamaquë acaniquë ra. ⁵ Jabi toa joni bo no chahuayamaniquë ra, Chani jia ca jabija ca ma jayano iquish na. Jatsi ë quinia-quinianiquë Dios Chani rarinamahacayamano iquish na.

⁶ Jasca, ë yoani ca chani rarinamayamaniquë toá ca oquëria ca rëquëninicanai bo ri. Jabi nohiria bo qui oquë-oquëria ca joni bo ja icamitsa, jama, Dios bësojó jascaria ca nohiria bo tëquë nori. ⁷ Jabi carayanabo qui chani yoati ëa Diós raaniquë, naa jodiobo qui Pedro raahacani jascaria. ⁸ Jato qui jia jato qui ë cahai ca ini quilha. Dios chamá tsi carayanabo qui ë raahacani nori ca ja jiscaniquë, naa jodiobo qui Pedro raahacani jascaria. Noqui tëquë Diós mëbini quilha. ⁹ Japi Jacobo, Pedro, Juan, naa oquë-oquëria ca joni bá noqui joi amaniquë ra, jato bëta no yonocobëquinano, Dios Chani no yoano. Jibirishahama ca carayanabo qui no cati nori iquë. Jato ri tsi xo toa jodiobo qui cahaina. ¹⁰ Jatsi no canox pari no tsi “Nobë noitiria cabo shina-bënoyamacana” i noqui jaca niquë; jaroha. Jabi noitiria cabo no mëbi-mëbicasniquë noqui ri.

Pedro Pabló raahanina

¹¹ Jatsi xaba huëtsa Antioquia yacatá tsi ë quiniatëquëniquë Dios Chani otohí na. Toatiyá tsi anoma quilha Pedró jabi iniquë rë, noqui shishohi na. Jatsi pë Pedro ë raahaniquë rë. ¹² Jabi Antioquia yaca qui johax tsi quilha carayanabo ya, naa jibirishahama cabo ya Pedro oriquipaoniquë. Jahuë jabi quilha. Jënima quilha. Jama, jodioba jabi-naxëni cabo, naa Jacobo ax bëcanish cabo qui yoi ini quilha toa carayanabo ya ja oriquihaina rë. Jatsi Pedró jënëniquë, jato qui raquëhi na. Jaquirëquë carayanabo ya ja rabënyamaniquë rë. ¹³ Jatsi pë carayanabo ya rabënacasyamaniquë chahahuahai ca jodiobo ri, Pedro jato bëta rabënyamahai ca jisi na. Jatsi jënëniquë Bernabé ri. ¹⁴ Anoma ini quilha ja acanina iquia; Dios Chani jia ca pasomaha quilha. Jatsi ja acanai ca jisi tsi Pedro ë raahaniquë jatiroha cabo bësojo xo na. Raahacax, “Jëniriahax chahahuahai ca carayanabo ya rabënyamahai, jaboqui?” i Pedro qui ë niquë. “¿Mí qui yoi ni? ¿Jëniriaxo tsi jodioba jabi bo jato amacatsai ra? Jodioma ca xo ra. Jabi jodio mí coniquë; jamaca mia ri tsi xo toa jodioba jabi tëquë nicayoiyamahaina iquia” nëa tsi Pedro qui ë nëcaniquë.

¹⁵ Jabi shoma tsi xo noqui chahahuahai ca jodiobo. Jodiobo no coniquë ra, Dios cahëyamahai ca carayanabo no nomari. ¹⁶ Naama tsi Jesucristo

quinia no cahëniquë. Jama, noqui xabahamayamaxëhi quiha Dios, noba jabi bo, noba yoba bo, tihi cabo no aquë no. Jama, noba jocha masahi quiha Dios, Jesucristo qui no chitiminiquë no. Jabi Jesucristo qui no chitiminiquë noqui ri, Dios bësojó tsi mëstëhuahacati. No mëstëhuahacayamani quiha noba jodioba yoba no nicahai cató no. Jabi jodioba jabi bo acai cató tsi mëstëhuahacatimaxëni tsi xo nohiria ra. Jesucristo qui ja chitimiti xo iquia.

¹⁷ Jaboquí jibirishati jabi, jodioba yoba bo, tihi cabo ri banahuacasqui mato carayanabo pë. Shinaparicana. Toa jodioba quinia pi banahuatëquëcatsi tsi “Naris-hi quiha Cristo qui no chitimihaina noqui xabahamati” ii quiha mato ra. “Jocha quima noqui paquëmatimaxëni xo Cristo. Jesucristo iqui tsi oquë tsi xo noba jocha” ii quiha mato ra, toca pi shinahi na. Anoma quiha. ¹⁸ Japi toa ë niani ca quinia siri qui bacarohahi tsi Dios pasomaha ë jochaquë aquë iquia. Jama, jochahai ca tsi xo toa jodioba jabí tsi xabahamahacatsai cató. ¹⁹ Jabi Quënëhacanish cabo tsayaquí tsi noho jocha yoi ë jisniquë ra. Noho jocha yoi bërohuahacani quiha Dios Chani no. Dios yoba ë qui quësoniquë, nicati basi ë ini quëshpi na. Jatsi toa quinia quima Cristo quiri ë bësoniquë Dios bax bësoxëna. ²⁰ Cristo ya tsi cruzó tsi ë naniquë noho jabi yoi qui. Jaboqui jamëri tsi xo toa ë bësohaina. E nohó bësohi quiha Cristo ra. Jaboqui pi Dios Baquë qui chitimihí tsi bësohtëquëyoiquia. Jabi ëa noihai ca tsi xo toa jahuë Baquë. Noihax ë bax ja naniquë ëa xabahamaxëna. ²¹ Dios noihai ca quima casoyamaquia. Dios Chani yoahi tsi “No bax Cristo rësoniquë ra” iquia. Jabi jodioba yoba no nicahai cató pi Diós noqui xabahamarohano tsi mahitsa Cristo naquë aniquë iquia ra.

3

Yoba paxa cato

¹ Jisa cahëtimaxëni ca Galatá cabá. ¿Tsohuëcaracá mato parani sa? Bëroria tsi cruzó tsi Jesucristo nani ca Chani mato qui bërohuahacaniquë iquia. ² Mato nicacasquia: ¿Jodioba yoba ma nicahai cató tsi Espíritu Santo ma bini? Toca tsi ma biyamaniquë ra. Jama, Espíritu Santo ma biniquë, mato qui yoahacani ca Cristo Chani qui chitimixo na. ³ Jatsi ¿jënahuariacanaí rë? Espíritu Santo quinia ó tsi ma chitahëniquë. Jama, jaboqui mato chama yoi tsi mëstëhuahacacasqui mato pë. ⁴ Jabi huëstima tsi xo toa Cristo Chani iqui tsi ma tënëniina iquia. Jama, toa Chani quima pi ma casono tsi ¿mahitsa ma ni toa ma tënë-tënëniina? Mahitsa xo iquia. ⁵ Jabi ¿Espíritu Santo mato qui ahi ni Dios pa, jodioba yoba ma nicahai ca iqui na? ¿Mato xërëquë xo tsi jisti chamaxëni cabo ahi ni Dios pa, jodioba jabi bo ma acai iqui na? Toca tsi ayamahi quiha. Toca tsi aqui quiha, jahuë Chani qui ma chitimini iqui na.

⁶ Abraham yamabo no tsayano. Dios qui ja chitimiyoiniquë. Chitimihax tsi Dios bësojó tsi ja mëstëhuahacani quiha. ⁷ Jaboqui tsi Abraham chahitaxocobo yoi bo tsi xo toa jatiroha ca chitimicanaibo ra. Jasca ca quiniá tsi xabahamahacaxëcani quiha, naa Abraham yamabo jascaria. ⁸ Jabi naama tsi quiha Quënëhacanish cabá chaniniquë carayanabo chitimixëhai ca yoati na. Jariapari tsi quiha naa Chani yoahacaniquë Abraham yamabo qui: “Mia iqui tsi shomahuahacaxëti xo jatiroha ca carayanabo” i Abraham yamabo qui Dios ni quiha. ⁹ Jaha tsi shomahuahacahi quiha chitimicanaibo tëquë, naa Abraham yamabo shomahuahacani jascaria. ¿Tsayacanaí? Dios qui chitimiyoinish ca Abraham ini quiha.

¹⁰ Jama, yoshihuaha ca tsi xo toa Moisés yobá-naxëni cabo. Yobá tsi mëstëhuahacacasani quiha rë. Nicapa. “Yoshihuaha ca tsi xo toa Moisés

yoba bo tēquē nicayamahai cato” ii quiha Quēñehacanish cabo ra. ¹¹ Jabi yama tsi xo toa Moisés yobá tsi Dios bēsojó tsi mēstēhuahacahai cato ra. Jabi noqui bēro xo Dios Chani. “Chitimihi tsi bēsohi quiha mēstēhuahacahax cato” i Dios ni quiha. ¹² Jama, xabahamati quinia huētsa jismahi quiha Moisés quēñēnina. Chitimihi cato quinia ma xo. “Bēsohi quiha yoba bo tēquē nicahai cato” ii quiha.

¹³ Jabi Moisés yoba iqui tsi no yoshihuahacaniquē iquia. Mato nicaquia. ¿Tsohuēcara ni toa Moisés yoba bo tēquē nicati mētsa na? Yama a ra. Jama, toa yoshihuahai ca yoba bo quima Cristó noqui tsēcāniquē, cruzó tsi no bax jamē tsi yoshihuahacaquí na. Jabi, “Yoshihuahaca ca tsi xo toa jihui ó tsi rotahaca cato” ii quiha Quēñehacanish cabo. Tsayacahuē. Toca tsi noqui ja ratini quiha. ¹⁴ Jabi Cristo nāniquē, carayanabo Diós shomahuano iquish na, naa Abraham yamabo ja shomahuani jascaria. Espíritu Santo jato qui acatsi quiha. Jabi naama tsi “Espíritu Santo jato qui axēquia” i Dios ni quiha.

Abraham qui Dios chaninina — Moisés yoba

¹⁵ Ejemplo mato qui ē ano, ēbē xatē bá, ma cahēyoino iquish na. Jabi dos ca nohiria bá convenio acasmitsa. Aquí tsi jato janē bo convenio papi ó tsi huishacani quiha. Jaquirēquē toa papi rarinamatimaxēni tsi xo joni huētsa. Ja nicahacaxēti xo. Jabi toca xo Dios convenio Abraham yamabo ya. Yama tsi xo toa ja cho johai cató toa convenio chani rarinamahaina. ¹⁶ Jabi naama tsi quiha Abraham yamabo Diós shomahuacasniquē. Jaha tsi “Mia, mi चाहितखोको, तिहि को शोमाहुआखेकिया” i Abraham qui Dios ni quiha. Jabi “Mi baquē bo” iyamaniquē Dios, “Mi चाहितखोको” inori, jahuē Cristo yoati chanihi na. ¹⁷ Jabi ē yoacatsai ca tsi xo naa. Abraham yamabo ya convenio Diós aniquē. Parayamaniquē Dios. Jaquirēquē joniquē Moisés yoba; cuatrocientos treinta ca años quirēquē quiha. Jabi toa convenio rarinamatimaxēni tsi xo toa ja cho joni ca Moisés yoba ra. ¹⁸ Jabi jaboqui tsi Moisés yoba no nicahai cató pi Diós noqui xabahamano tsi mahitsa quiha Abraham qui jahuē convenio chani iquē aniquē ra. Jama, parayamaniquē Dios, Abraham yamabo qui chaniqui na. Ja tsi xo toa Abraham ja shomahuani quiha. Jabi toa jariapari ca quinia banahuacanai ca noqui xo naa.

Jocha bērohuahi quiha Moisés yoba

¹⁹ Shinaparicana. Moisés yobá nohiria mēstēhuayamano tsi ¿jēnahuaqui tsi Moisés qui toa yoba bo Diós ani? Jabi ja acacani quiha nohiria ba jocha bērohuati. Jabi naama tsi Moisés yoba ini quiha. Jama, Abraham चाहितखोको, naa Jesucristo जोके त्ति जतिनेके Moisés yoba yonoco ra. Jabi naa xabahamati quinia jahuē Cristo yoi qui pari Diós aniquē, Abraham yamabo qui ja chaniniquē no. Jabi iriama ca tsi xo toa Moisés qui acacanish ca yoba. Jariapari tsi quiha ángel qui jahuē yoba Diós aniquē. Jaquirēquē Moisés qui toa yoba ángel boni quiha. Jatsi nohiria bo qui toa yoba Moisés boni quiha. ²⁰ Jama, naa oquēria ca Chani aqui tsi Abraham yamabo qui Dios chaniniquē jamē yoi ax na. Huētsa bo ja raayamaniquē jahuē Chani boti. Ja tsi xo toa Moisés qui acacanish ca yoba oquē tsi xo toa jahuē Cristó tsi Diós anina.

²¹ ¿Jahuē shinacanai? “¿Cristo qui Diós ani ca yonoco pasomaha ma ni Moisés yoba?” Iyamahi quiha. Jabi nohiria bo qui pi bēsomati yoba Diós aarohano tsi Dios bēsojo tsi no mēstēhuahacaquē aniquē ra. Jabi yama tsi xo toca ca acacanish ca yoba ra. Toca tsi jocha chama quima paxatimaxēni xo noa. ²² Tocahi quiha Quēñehacanish cabo ri: “Jatiroha cabo yonahi quiha

jocha chama” iquiina. Ja iqui tsi jahuësti ca paxati quinia tsi xo Jesucristo. Jaha tsi Jesucristo qui pi no chitimino tsi noqui mëstëhuahi quiha Dios ra.

²³ Jabi Cristo jonox pari no tsi Moisés yobá noqui yonapaoniquë. Toa yoba iqui tsi preso xara ca nohiria bo jascaria no i-ipaoniquë rë. Jama, noba Xabahamati Ibo joquë tsi ja qui chitimiti no chifahëhuaniquë. Noqui ja paquëmani quiha. ²⁴ Jabi noqui jodiobo obëso ca Moisés yoba i-ipaoniquë. Cristo qui noqui ja mëpini quiha, no chitimihai cató tsi no xabahamahacano iquish na. ²⁵ Joniquë Cristo ra. Ja iqui tsi jaboqui noqui otoyamañi quiha Moisés yoba. ²⁶ Jaboqui Dios baquë bo xo mato tëquëta, Jesucristo qui ma chitimihai cató no. ²⁷ Cristo ó tsi ma ashimahacanicuë. Cristo jabi ma sahuëyoni quiha. ²⁸ Jasca, jaboqui Dios bësojó tsi yama tsi toa xo oquë cato. Carayanabo oquë ma xo jodiobo. Yonati oquë ma xo chama. Yoxa oquë ma xo joni. Jaharisi xo noa. Jesucristó-na bo xo noqui tëquëta. Huësti maxo xo noa. ²⁹ Cristó-na bo ma nori iqui tsi Abraham yamaba chahitaxocobo yoi bo xo mato ra. Jaboqui Abraham qui Diós yoani ca chani iqui tsi shomahuahacaxëqui mato carayanabo ri ra.

4

Noqui yonapaoniquë jodioba yoba bo

¹ Jabi ejemplo huëtsa mato yoacasquia, ma cahëyoino iquish na. Jabi joni pi rësono tsi jahuë jahuëmishni bo, jahuë mai, jahuë xobo, tihi cabo bichi quiha jahuë baquë yoi. Jama, xocobo pi no tsi binoma tsi xo toa jahuë jahëpa jahuë bo. Jari yonati jascaria xo toa baquë ja shinahaxëquë rohari. ² Yonahacahi quiha. Huëtsa bo nicahi quiha. Jama, shinapayo manëhax tsëquëhi quiha. ³ Jabi naa baquë jascaria no i-ipaoniquë, naa noqui chahahuahai ca jodiobo. Jariapari tsi noqui yonapaoni quiha noba yoba, noba jabi bo. ⁴ Jatsi Dios qui jia ca xaba tsëquënicuë. Toa xabacá tsi Diós jahuë Baquë raanicuë noqui xabahamaxëna. Jatsi yoxá jahuë baquë comani quiha. Jodiobo ja conic quiha, ⁵ noqui yonahai ca yoba quima noqui tsëcaxëna. Toca tsi Diós aniquë jahuë baquë yoi bo noqui manëmaxëna. ⁶ Jahuë baquë bo ma nori iqui tsi Espiritu Santo mato shina qui Diós raanicuë. Ja tsi xo toa jahuë baquë yoi bo ma nori ca cahëqui mato ri ra. Jaboqui “Noho Jahëpa” i Dios qui qui mato. ⁷ Jasca, yonati bo ma xo mato ra. Jaboqui Dios baquë bo xo mato. Ja tsi xo toa jahuë jahuë bo tëquë ibohuaxëqui mato ri, naa jahëpá-na bo baquë ibohuahai jascaria.

Galatá cabo Pabló shinanina

⁸ Siri tsi Dios yoi ma cahëyamaniquë. Noitiria ma i-ipaoniquë. Toatiyá tsi mato yona-yanapaoniquë mato mahitsa ca dios bo ra. ⁹ Jama, jaboqui Dios yoi cahëqui mato ri ra. Diós mato bini quiha. Japi anoma tsi xo toa noba mahitsa ca jodioba jabi bo quiri ma bësocanaina iquia. Quiniacaxëcahuë. Mato yona-yanaxëhi quiha toa mahitsa ca jabi bo ra. ¹⁰ Jishopë. Mishni-mishniria tsi toa jabi bo quiri bësoqui mato rë. Jaboqui jodiobá fiesta bari bo, oxë bo, tihi cabo aqui mato pë. ¹¹ ¿Mato naxërequë tsi mahitsa ë yonocoyamayamani sa?

¹² Ea nicaparicana, ëbë xatë bá. Mato carayanabo jascaria tsi ë manënicuë noho jodioba jabi bo quima casohi na. Ea jascacana. Jabi jodioba jabi bo banahuati chitahëhuanox pari tsi ëa ma noipaoniquë. ¹³ Siri tsi mato bëta ë chitënicuë iquihi na. Ja iqui tsi xaba ë jayaniquë Dios Chani mato qui yoaxëna. ¹⁴ Toatiyá tsi ë qui ma yosanayamaniquë toá tsi ë iquinicuë

no. Anoma, quëras ë ini quiha iquihî na. Jama, ëa ma mëbiniquë ra, Dios ángel, Jesucristo yoi, tihi cabo ë irohani jascaria. ¹⁵ Toatiyá tsi ma rani-ranipaoniquë. Mato bëta ë no tsi jatiroha ca ë qui ma aquë aniquë tonia, ëa mëbixëna. ¹⁶ Jama, çjaboqui ë qui caxacanaî sa, jabija ca mato qui ë yoahai iqui na? ¹⁷ Jabi noixoma tsi mato chahahuariacani quiha naa bëcanish ca jodioba jabi-naxëni cabo iquia. Tocacani quiha pë, ë yoani ca chani quima mato casomaxëna, jato mahitsa ca chani ma nicano iquish na. ¹⁸ Jabi jënima tsi xo toa nohiria bá mato mëbicansaina iquia. Jabi tocaroha-tocarohaxëti xo toa mato qui bëcanish cabo. çMato mëbicahi ni sa, mato bëta yama pi ë no? Toa nicaquia. ¹⁹ Jisa noho xocobá. Jaboqui anomaria tsi xo toa mato ë shina-shinahaina ra, jabija ca chani quima ma aquëquëhai iqui na. Jahuë baquë comahai ca pahë jascaria tsi xo toa noho mapo pahë mato tahëhax na. Mato ó tsi Cristo jabi rëamëno ra. ²⁰ Jaboqui pi mato bëtarohahi tsi oquë tsi mato qui chaniti mëtsa ë iquë aquë. çJënahuariaxo mato mëbixëhi ni ëa sa?

Dos ca quinia bo

²¹ çJodioba yobá tsi yonahacacascanaî? Toa yoba pari ma cahëti xo. çJënihi ni Quënëhacanish cabo toa yoba yoati na. ²² “Dos ca baquë bo jayanicuë Abraham yamabo” ii quiha. Jariapari tsi jahuë cocinera Agar icanaî cató jahuë jariapari ca baquë Ismael comanicuë. Abraham yonati toa yoxa ini quiha. Jaquirëquë jahuë ahuinî jahuë baquë huëtsa comanicuë. Yonati ma ja ini quiha, jahuë ahuî nori. ²³ Jabi bëro tsi tohoyanicuë jahuë yonati, naa Agar icanish cato. Tohoyaxo tsi quiha jahuë baquë ja comanicuë. Jama, tohoyatimaxëni quiha jahuë ahuî iniquë rë, naa Sara icanish cato. Jabi ja tohoyanox pari no tsi quiha Abraham qui Dios chaniniquë, “Baquë jayaxëqui mia” iquiina. Jaquirëquë Sara yamabo tohoyanicuë jaá ri. Baquë ja comani quiha. ²⁴ Jabi dos ca quinia bo, naa jahuë nohiria bo Diós ototi quinia bo jismahi quiha naa dos ca yoxa bo iquia. Jahuë nohiria bo Diós otopaoni ca quinia siri jismahi quiha Agar yamabo. Jabi jodioba qui naa quinia siri acacani quiha Maca Sinaí ax na. Toa xo tsi Moisés yamabo qui jahuë yoba bo Diós aniquë. Nohiria bo ototi quinia siri ja ini quiha. Jabi yonati bo tëquë tsi xo toa jaboquí tsi naa quinia siri banahuacanaibo rë, naa yonati Agar ini jascaria. ²⁵ Tsayacapa. çAgar chahitaxocoba maî tsi niyamayamahi no toa Maca Sinaí? Quinia siri jisti tsi xo toa maca ri. Agar jascaria xo iquia. Jasca tobi naa quinia siri jisti huëtsa rë. Maî ca Jerusalén tsi quiha. Toa xo tsi jodioba yoba bo, jato jabi bo, tihi cabo banahuacani quiha pë toá racacanaibo. Yonati bo, naa Agar xocoba ca xo jato ri. Jabi Maca Sinaí, maî ca Jerusalén tsi xo jaharisi. Mahitsa ca xabahamati quinia jismahi quiha naa dos cato. ²⁶ Jama, tobi xo yaca huëtsa ra, naa naipá ca Jerusalén. Chitimicanaiba yaca tsi xo toa. Noba jahëhua jascaria xo. Jahanahax johi quiha noba jabi jia cato. Ja tsi xo toa jodioba yobá tsi yonahacatimaxëni xo noa. ²⁷ Jabi siri tsi naipá ca Jerusalén yoati tsi nëca tsi Isaias yamabá quënënicuë:

“Ranitsihuë, baquë yama ca yoxá.

Rani tsi quënahuë, comahai ca pahë cahëyamahai cató.

Huëstima ca xocobo jayaxëqui mia ra.

Tohoyatapinish ca ahuinî xocobo huinoxëhi quiha xocobo mëquëya cato ra” nëa tsi quiha ja quënëni ca nëcaniquë.

²⁸ Jabi Abraham yamabo qui Diós yoani iqui tsi Dios xocobo xo mato, naa Abraham yamabo baquë yoi Isaac ini jascaria. ²⁹ Jabi toatiyá tsi Isaac tënë-tënënicuë, naa Dios paxa ca quiniá tsi conish cato. Ja qui caxa ini quiha toa

yonati baquë pë. Jabi toca xo jaboqui. Noqui, naa Espíritu Santó conish cabo tēnēmahī quiha pë toa quinia siri banahuacascanaibo. ³⁰ Jabi nēca tsi Dios chaniniquē Abraham qui Quēnēhacanish cabo ó no: “Mi yonati, jahuē baquē, tihi cabo niahuē. Mi mai, mi jahuēmishni bo, tihi cabo binoma xo toa baquē. Mi ahuini baquē tsi xo ibo ti cato, mi rēsoquē no” i Abraham yamabo qui Dios ni quiha. ³¹ Jaha tsi Abraham yonati xocobo ma xo noa. Jama, ahuini baquē jasca ca xo noa, naa noqui jodioba yoba quima paquēmahacanish cabo.

5

Quinia siri quima no paquēmahacanina

¹ Jabi Moisés quinia siri quima Cristó noqui paquēmaniquē ra. Jatsi toa yobá tsi yonahacayamacana. Chamatsicana. Toa yonamixēni ca yoba qui ri bēsotēquēyamacana ra. ² Ea nicacahuē. Pablo yoi tsi xo naa mato qui quēnēhaina. Ma jibirishahacapino tsi Cristo quima casoqui mato iquia. ³ Nicacana. Moisés yoba tēquē nicaxēti xo jibirishahacahax cato ra. ⁴ Toa yobá pi mēstēhuahacacatsi tsi Cristo quima aquēquē xo mato iquia. Mato mēbiyamaxēhi quiha Dios. ⁵ Jama, noqui chahahuacanaibo tsi xo toa Cristo qui chitimihaina. Dios ó pasoqui noa, noqui ja mēstēhuano jahuē Espíritu Santó no. ⁶ Jabi Jesucristo quinia ó tsi jaharisi tsi xo carayanabo jodiobo tēquē. Dios qui oquē ma xo toa jibirishahacahax ca jodiobo. Jasca, ja qui oquē ma xo jibirishahama ca carayanabo ri. Jama, jaboqui jahuē Cristo qui chitimicanaibo tēquē xabahamahī quiha Dios. Chitimixo tsi Dios no noiti xo ra. Dios qui jia ca quinia tsi xo naa.

⁷ Jabi jia tsi Cristo quinia ó tsi banahuahi ma ipaoniquē. Jama xo jaboqui rē. ¿Tsohuēcaracá naa jabija ca quinia quima mato bēsomani pa? ⁸ Tocayamaniquē Dios, naa mato quēnanish cato. ⁹ Quiniacaxēcahuē. Tonia mato xērēquē tsi pacanahi quiha toca ca ma shinahai ca yoi rē. “Jatiroha ca mapari ó pacanahi quiha levadura mishni-mishniria cato” ¿iyamacahi ni? ¹⁰ Jama tocayamaxēqui mato iquia. Jahari ē yoani ca quinia qui mato bēxēhi quiha Dios iquia. Jasca, mato yosihai ca joni bo copixēhi quiha. ¹¹ Jishopē. Ea quiahuacani quiha toa Moisés yobá-naxēni cabo, èbē xate bá. “‘jibirishahacaxēti xo carayanabo’ ii quiha Pablo” icani quiha pë. Yoyoxēni ca chani tsi xo toa ra. Ja quiacanaina. Jabi jibirishati jabi pi ē yorohano tsi ēa ja tēnēmayamaquē acaniquē toá cabo. Jama, ē yoaní ca cruz Chani qui caxaxēniria ca xo iquia. ¹² Anomaria tsi xo toa mato jibirishacascanaibo ra. Mato ja jisbayacano iquia.

¹³ Jisa èbē xatē bá. Diós mato quēnaniquē, tsēquēti. Jodiobo ma manēyamaxēti xo ra. Toa jabí tsi ma yonahacayamaxēti xo iquia. Jasca, quiniacaxēcahuē, mato jochahuaxēni ca noma jabi ma banahuacasmitsa iqui na. Anoma ca quinia tsi xo toa. Oquē tsi xo toa mabē xatē bo ma mēbihaina, noinaquí na. ¹⁴ “Nohiria huētsa bo noicana, mamē ma noihai jascaria” ii quiha Quēnēhacanish cabo. Oquē-oquēria ca yoba tsi xo toa. Mabē xatē bo pi noiyoiquí tsi Dios yoba jatiroha cabo jatihuaxēqui mato ra. ¹⁵ Jama, joi pi mērahi tsi ranimistsí tsi quēyohacaxēqui mato tēquēta. Quēyohacaxēhi quiha mato iglesia bo ri, naa ma arabēquina-haina rē.

¹⁶ Nēcatsiquia. Espíritu Santó pi mato mēpino tsi mato jochahuaxēni ca noma jabi jaha quēēhai ca banahuayamaxēqui mato ra. ¹⁷ Jabi jaha noba noma jabi quēēhai ca tsi xo toa jaha Espíritu Santo quēēhai ca pasomaha cato. Jasca, jaha Espíritu Santo quēēhai ca tsi xo noba noma jabi jaha quēēhai ca jamēri. Jabi iquinacani quiha naa dos cato. Ja tsi xo toa jia ca pi mato

shinaná acasno tsi tobi quiha toa mato jochahuaxëni ca noma jabí mato jënëmaccatsaina. ¹⁸ Jama, Espíritu Santó pi mato mëpino tsi jocha bëboxëqui mato iquia. Bëbohax toa yonahai ca jodioba yoba tëquë quima ma paxaquë ra. ¹⁹ Jasca, noqui bërora tsi xo toa noba noma jabí noqui amahaina. Tobi xo: anoma ca chotahaina, yoyohaina, ²⁰ mahitsa ca dios bo qui arahaina. Tobi quiha yoshihuahaina, ranomis-haina, noiynamahaina, caxatapihaina, xaté bo bëquëxnahaina. ²¹ Tobi quiha joni huëtsa bá jahuëmishni bo ó quëëhaina, joi acaina, pahëhaina, pahëhax yoi ca acatsaina. Tihi cabo tsi xo jocha iquia. Nicacana. Diós otohái ca xatënyamaxëhi quiha toca ca jabicanaibo iquia ra, siri tsi mato ë yobani jascaria.

²² Jamëri tsi xo toa Espíritu Santó noqui amahaina. Espíritu Santo iqui tsi noicasqui noa. Tobi quiha no ranihaina, no bëpasihaina, no yosanayamahaina, no mëbiccatsaina, no jianacatsaina, Dios no chahahuacatsaina. ²³ Tobi quiha toa ishima no iquiina, noba shina mëquihaina. Tihi tsi xo toa Espíritu Santo jabí. Jabí yama tsi xo toa naa jabí jia ca pasomaha ca yoba. Jatiroha ca nohiria bo qui jia quiha. ²⁴ Jabí jato jocha qui mëpihai ca noma jabí niahi quiha Jesucristó-na bo. ²⁵ Espíritu Santo pi no banahuayoino tsi Espíritu Santó noqui mëpino ra. ²⁶ Nomë shinamixëni no iyamano ra. Anoma quiha. Nobë xaté bo nó caxahuayamano. Anoma quiha. Nohiria huëtsa bo qui no yosanayamano. Tihi tsi no jënëti xo.

6

Jatiroha ca nohiria mëbicana

¹ Tsohuëcaracá pi anoma ca ano tsi Espíritu Santó mëpihacahax cató toa joni mëstëhuano, ëbë xaté bá. Ishima tsi toa jochahax ca ja mëbixëti xo. Jasca, quiniacaxëcahuë, jochati ma tanamahacayamano mato ri. ² Jabí noitiria pi mabë xaté ino tsi jato mëbicana. Jia tsi xo toa ma mëbibëquinahaina. Tocapiquí tsi Cristo yoba jatihuaxëqui mato ri. ³ Jabí tobi xo toa oquëria ca jaca nori ca quëscahuacanaibo, mahitsa ca jaca nori. Jamë paracani quiha. ⁴ Tocayamacana. Jabí ja acái ca yoi, jahuë jabí yoi, tihi cabo jatiroha ca nohiria bá tsaya-tsayano. Jia ca arohahax ja ranixëti xo. Jënima quiha. Jasca, joni huëtsá acái ca ja tsayayamano. Jama, ja acái ca yoi, jahuë jabí yoi, tihi cabo ó ja bësono ra. ⁵ Jatsi jato jabí yoi ca otoxëti xo jatiroha cabo. Bëronoma tsi xo toa noba jabí otohaina iquia.

⁶ Dios Chani pi tsohuëcaracá mato tiisimano tsi toa pastor ya tsi mato jahuëcara mishni bo xatënacana. Copihacaxëti xo pastor jahuë yonoco quëshpi na.

⁷ Jasca, ma parahacayamano. Bëro tsi Dios no parahai ca nori ca ma quëscahuamitsa rë. Jama, parahacatimaxëni quiha. Ja tsi xo toa ja banaha ca tésaxëhi quiha toca ca joni iquia. ⁸ Jahuë noma jabí jaha quëëhai ca pi aquí tsi copihacaxëti xo toa joni. Jochahuaxëni ca jabí tésaxëhi quiha toa rë. Jama, Espíritu Santo jaha quëëhai ca pi aquí tsi jabí jia ca saihuaxëhi quiha ra. Toa joni bësoptomaxëhi quiha Espíritu Santo. ⁹ Japi jia ca ati no yosanayamano. No bëbohacayama-pino tsi noqui shomahuaxëhi quiha Dios. No tésaxëhai ca bixëqui noa ra xaba jia cató no. ¹⁰ Ja tsi xo toa jatiroha cabo bax jia ca no ano ra. Jasca, Cristó-na bo no shomahuariaxëti xo ra.

Jaroha ca yoba

¹¹ Tsayacana. Mato qui naa carta quënëquia noho mëquënë no ra. Chahitaxëni ca letra jaya quiha. ¹² Nicacana. Jamë shinamixëni tsi xo toa mato janyama mëpicanaibo. Ja tsi xo toa mato ja jibirishacascana iquia. Jasca,

Cristo cruz Chani quëshpi tsi tēnēmahacahai ca quima paxacascani quiha ra. ¹³ Jibirishahacahaina, jodiobo iquiina, tihi cabo tsi xo toa jato qui jia cato. Moisés yoba nicaxoma tsi tihi ca jabi bo bicani quiha pa. Ja iqui tsi mato jibirishacascani quiha “Jia tsi xo toa no acana” iquiina. Jodiobo mato manēmacascani quiha pē. ¹⁴ Tocayamaquia. Noba Ibo Jesucristo cruz Chani roha chaniquia. Cruz iqui tsi ē qui yoi tsi xo toa jochahuaxēni ca maí ca jahuē bo. Toa jahuē bo noiyamahai ca ēa xo naa. Toa jahuē bo qui bēsoyama ca jascaria ca ēa xo naa ra. ¹⁵ Dios qui iriama tsi xo toa jodioba jabi bo. ¿Jēnahuariaxo raca toa jabi bá noqui mēbina? Noqui oquēhuayamahi quiha jibirishahacahaina iquia. Oquē-oquēria ca tsi xo toa paxahuahacahax ca nohiria iquiina. ¹⁶ Jabi naa yoba banahuacanaibo Diós ranihuano. Jato ja noino. Dios nohiria-nohiria tsi xo toa naa yoba paxa ca banahuacanaibo iquia.

¹⁷ Jarohari tsi jodioba jabí-naxēni cabá ēa yositēquēyamano ra. Jesu tahēxo tsi tobi noho yora ó ca huishi qui ra. ¹⁸ Noba Ibo Jesucristó mato shomahuariano, ēbē xatē bá. Amén.

La Carta Del Apostol San Pablo a Los Efesios

¹ Efesó ca chahahuacanaibo, Jesucristo chahahuacanaibo huëtsa bo, tihí cabo qui naa carta raaquia. Jabí Pablo tsi xo naa carta quënëhai cato. Ea Diós biniquë ra, jahuë Chani bohái ca ití. ² Noho Jahëpa Dios, noba Ibo Jesucristo, tihí cabá mato shomahuano. Mato ja ranihuacano ra.

No bax Diós ani ca jahuë bo

³ Dios, naa noba Ibo Jesucristo Jahëpa no oquëhuano ra. Mana xo tsi noqui shomahuariaqui ra. Jahuë baquë Jesu ya no rabë nabëquihai ca iqui tsi jia tsi xo toa no bax ja acaina Espíritu Santó no. ⁴ Mai nëhohuanox pari tsi quíha noqui pari Diós biniquë ra, jahuë-na bo ití. Jahuë baquë Cristo iqui tsi noqui ja biní quíha noqui mëstëhuaxëna, ja bësojó tsi jochayama cabo inono iquish na. ⁵ Toca tsi no bax Diós aniquë no noino iquish na. Siri tsi jahuë baquë bo noqui ja manëmacasni quíha. Ja tsi xo toa jahuë baquë Jesu ja raani quíha no bax nati. Jahuë shína ja ini quíha. Jaha quëëqui tsi ja tocaniquë. ⁶ Jaha tsi oquëhuahacaxëti xo Dios, noqui ja shomahuariani nori quëshpi na. “Anomaria tsi xo noqui ja noihaina”, i no no, ja noihai ca baquë yoi noqui ja raani nori quëshpi na.

⁷ Jabí jahuë baquë yoi Diós aniquë no bax nati. Jahuë baquë jimí tsi jocha químa noqui ja paquëmani quíha. Jasca, masahacanicuë noba jocha ra. ¿Tsayacani? Anomaria tsi xo toa noqui Diós noihaina ra. ⁸ Ja noihai ca noqui ja japaniquë. Huashiyamahi quíha. Jasca, tiisi xo. Jatiroha ca cahëhi quíha. ⁹ Ja tsi xo toa ja tocanina no bax na, jamë xo shinaquí na. Shinaxo tsi ja acatsai ca Diós noqui cahëmani quíha. Siri tsi jahuë planes, naa ja acasni ca no cahëyamani quíha. Toatiyá tsi noqui jonë ini quíha jahuë planes, naa jahuë shinana. Jama, jaboqui jahuë planes cahëqui noa ra. Jasca, toa planes, naa ja acatsai ca jatihuaxëhi quíha jahuë Cristo. ¹⁰ Toa planes tsi jatihuaxëhi quíha jia ca xaba tsëquëquë no. Jatsi maí ca nohiria bo tëquë, naipá ca bësocanaibo, tihí cabo catiaxëhi quíha Dios, Cristo chama nama janaxëna. Jatsi jatiroha cabo yonaxëhi quíha Cristo ra. Toatiyá tsi Ibo-iboria ixëhi quíha.

¹¹ Jabí Dios shinaná tsi acacahi quíha jahuë bo tëquë. Toa jahuë planes ini quíha. Shinaquí tsi quíha Diós noqui biniquë ra jahuë nohiria yoi bo ití. Ja tocani quíha, jahuë baquë iqui na. Rëquë rohari tsi toca tsi Diós shinani quíha axëna. ¹² Noqui ja biniquë ra jahuë oquë noqui jismaxëna. Jaha tsi quíha noqui jariapari ca Cristo qui chitiminish cabá Dios ocahuano, naa noqui jodiobo.

¹³ Jasca, Cristo qui chitiminiquë mato carayanabo ri, jabija ca xabahamati Chani nicahax na. Espíritu Santó tsi ma jisahacani quíha Cristó-na bo ma nori ca jismati. Jabí mato carayanabo qui ri Espíritu Santo acacati ini quíha, siri tsi toa Diós yoani iqui na. ¹⁴ Jaboqui Espíritu Santo jaya xo noa, noqui tëquëta. Ja iqui tsi Diós noqui xabahamaxëhai ca cahëyoiqui noa ra. Parayamaquí Dios. Jahuë-na bo Diós xabahamaxëti ó noqui pasomahi quíha. Jatsi Dios no oquëhuano ra.

Efesó cabo bax Pablo bëhoxhaina

¹⁵⁻¹⁶ Jabí Diós acatsai iqui tsi mato bax bëhox-bëhoxquia. Siri tsi mato bax bëhoxti ë chitahëhuani quíha, naa Ibo Jesu ma chahahuayoihaina, Dios

nohiria bo ma noiyoihaina, tihi cabo ë yoahacaquë no. ¹⁷ Bëhoxquí tsi quiha noba Ibo Jesucristo Dios, naa noba oquëria ca Jahëpa nicaquia ra, mana ca tiisi mato qui ja ano. Jatsi oquëxëhi quiha toa Diós ma cahëhaina iquia. ¹⁸ Jasca, bëhoxquí tsi Dios nicaquia, mato shina ja huëahuano, jabija ca ma cahëno iquish na. Tsayacahuë. Anomaria tsi xo toa mato bax Diós acaina ra. ¿Mato ja quënyamayamani ja bëta ma iti? Toa xabacá tsi anomariaxëhi quiha toa jahuë nohiria bo bax Diós axëhaina ra. Toa ma cahëyoini quiha iquia ra. ¹⁹ Jasca, anomaria tsi xo toa Dios chama ra. Toa chamá tsi noqui mëbiriahi quiha. ²⁰ Toa jasca ca chamá tsi quiha jahuë Cristo ja bësotëquëmaniquë. Bësothëquëmaxo tsi quiha jahuë baquë ja oquëhuaniquë. Jatsi naipá tsi jahuë mëncayá tsi quiha jahuë baquë ja tsahomaniquë ja yonano. ²¹ Toa xo tsi yonahi quiha Cristo jaboqui ra. Gobierno bo tëquë, chama bo tëquë, yonacanaibo tëquë, jatiroha ca nohiria bo tëquë, jaboqui noqui bësocanaibo, johai ca xaba paxá tsi bësocanaibo, tihi cabo tëquë yonahi quiha noba Cristo ra. ²² Jasca, Cristo chama namá jatiroha cabo Diós jananiquë yonahacati. Jasca, jahuë iglesia, naa noqui chahahuacanaibo qui Cristo acacani quiha noba chama iti. Noqui Rëquëninini Ibo-iboria tsi xo naa ra. ²³ Noqui chahahuacanaibo, naa iglesia cabo tsi xo toa Cristo banahuacanaibo. Rëquëninini Ibo-iboria qui no riihai cató tsi huësti ca maxo manëqui noa, naa Rëquëninini Ibo, noqui chahahuacanaibo, tihi cabo. Yora jascaria xo noa. Jasca, no nohó tsi bësoyoihi quiha Cristo, naa jatiroha cato ó ca rëamëhai cato ra.

2

Dios noihai cató tsi ma xabahamahacanicuë

¹ Jabi Dios mato xabahamanox pari no tsi bësoyama jascaria bo ma i-IPAONICUë mato jocha iqui na. Nicamixëni cabo ma i-IPAONICUë ra. ² Toatiyá tsi jochahuaxëni caba quinia ma banahuani quiha. Satanás, naa naipá ca yoshi ba ibo-iboria ma nicapaoni quiha. Jaboqui Dios nicamixëni cabo chamahuahi quiha pë jahuë yonoco ati. ³ Jabi toa jochahuaxëni ca carayanabo jascaria noqui jodiobo i-IPAONICUë noqui ri. Noba noma jabi no banahuapaoni quiha. Noba yora, noba shina yoi, tihi cabo jaha quëëhai ca no a-APAONICUë. Anoma quiha. Ja iqui tsi quiha noqui caxaxëniira Dios iniquë, carayanabo qui ja caxani jascaria.

⁴ Jama, shinajiaxëni xo Dios. Anomaria tsi xo toa noqui ja noihaina ra. ⁵ Jochahuaxëni ca nicamixëniira cabo inono tsi noqui Diós bësothëquëmaniquë jahuë Cristo ya noqui rabënamaxëna. Ja noihai cató tsi ma xabahamahacani quiha. ⁶ Noqui bësothëquëmaxo tsi quiha jahuë mana ca chama, jahuë oquë, tihi cabo noqui ja aniquë jahuë Cristo yaxo tsi no yonabëquinano, no bax Cristo ini iqui na. ⁷ Ja tocani quiha jatiroha ca xabacá tsi ja noihai ca jismaxëna, naa Jesucristó tsi noqui ja shomahuarianina. Toa ja noihai ca jatiroha cabo cahëmacatsi quiha ra. ⁸ Tsayacahuë. Dios noihai cató tsi ma xabahamahacani quiha, ja qui ma chitimihai cató no. Mamë xabahamati mëtsama xo mato ra; mato bax Diós acai ca ja nori. ⁹ Jasca, mamë oquëhuati mëtsama xo mato ra, ma acai ca ja nomari. ¹⁰ Jabi Dios tsi xo toa noqui Nëhohuati Ibo-iboria. Jahuë Jesucristo ó tsi noqui ja nëhohuaniquë jia ca no ano iquish na. Siri tsi quiha jia ca ati noqui ja rohahuaniquë, jahuë shina ja ini quëshpi na.

Jodiobo, carayanabo, tihi cabo rabë nabëquihaina

¹¹ Jabi ma i-ipaoni ca shina-bēnoyamacana, carayanabá. Toatiyá tsi Dios ma cahēyamaniquē ra. Dios cahētimaxēniria ca yoixēni cabo ma quēnahacani quiha. Jabi toca tsi quiha jodiobo chaniniquē mato yoati na. Chanihax, “Noqui tsi xo toa Dios cahēcanaibo, no jibirishahacani nori iqui na” i jaca ni quiha. ¹² Jatsi shina-bēnoyamacana iquia. Toatiyá tsi quiha Cristo ma cahēyamaniquē ra. Carayanabo, naa jahué quinia cahētimaxēni cabo ma i-ipaoni quiha. Díos bini ca nohiria bo ya, naa Israel cabo ya ma rabēnabēquiyamapaoni quiha. Jasca, jato qui jismahacanish ca rabēnati quinia ma cahēyamaniquē. Toatiyá tsi mato carayanabo qui Dios chaniyamapaoni quiha. Jasca, yama ini quiha jaha ma pasohaina. Dios yama ma i-ipaoni quiha. Toca tsi ma i-ipaoniquē ra.

¹³ Jama, jaboqui basima tsi mato basi cabo Díos bēniquē, jahué baquē Jesu ya ma rabēnано iquish na. Jaha tsi jaboqui Cristo rēsoni iqui tsi jodiobo yoi bo ya, naa Dios cahēyoicanaibo ya rabēnabēquiqui mato ra. ¹⁴ Jabi Cristo tsi xo toa noqui tēquē rabēnabēquimati Ibo-iboria. Ja iqui tsi noqui jodiobo, mato carayanabo, tihi cabo bichi quiha Dios, huēsti ca nohiria paxa cabo axēna. Jaboqui yama pi xo dos ca maxo bo. Noqui bēquēxhuahai ca naxērēquē ca panē, naa noba jodioba yoba bo Cristó quēyoniquē ja ini cató no. Toa yoba iqui tsi no caxa-caxapaoni quiha rē. ¹⁵ Jama, toa jodioba yoba ja quēyoniquē ra. Quēyoxo tsi quiha dos ca nohiria bo, naa noqui jodiobo, mato carayanabo, tihi cabá tsi quiha huēsti ca maxo paxa ca ja nēhohuaniquē ja bēta rabēnabēquiti. ¹⁶ Jabi ja rēsonox pari no tsi quiha no caxana-caxanapaoniquē. Jama, ja nahai cató tsi no caxanahai ca ja quēyoni quiha. Cruzó tsi huēsti ca nohiria paxa cabo ja ani quiha, jahari Dios qui noqui bēxēna. ¹⁷ Jabi mai qui Jesu joniquē. Joxo tsi quiha mato carayanabo, naa Dios basi cabo, mato jodiobo, naa Dios basima cabo, tihi cabo qui Dios Chani jia ca ja yoaniquē. Dios ya rabēnamati Chani ja yoani quiha. ¹⁸ Ja iqui tsi jaboqui Espiritu Santó mēbihai cató tsi Dios qui joti mētsa xo noa noqui tēquēta. Huēsti ca Jahēpa jaya xo noa no bax Jesucristo ini iqui na.

¹⁹ Japi jaboqui Dios cahēqui mato, mato carayanabá. Carayana yoi bo ma xo mato, Dios nohiria yoi bo ma nori. Jaboqui jahué xocobo ya rabēnabēquipiqui mato ra. Jatsi Díos-na bo xo mato jaboqui. ²⁰ Tsayacahuē. Xobo jascaria xo noqui tēquēta. Jariapari tsi xo toa Dios Chani chitahēhuati ibo bo, Dios Chani yoati ibo bo. Tihi cabá noqui Dios Chani ani quiha. Xobo chinichiti jascaria ca xo. Jasca, tobi Cristo. Xobo naniti jascaria xo, oquē jahué yonoco nori iqui na. ²¹ Cristo ó tsi rohahuahacaqui noa xobo jia ca manēti. Toca tsi Ibo ya tsi aniqui noa, naa noqui chahahuacanaibo tēquē. ²² Jasca, Cristo ya ma rabēnabēquihai ca iqui tsi jahué xobo iti rohahuahacahi quiha mato ri, chahahuacanaibo huētsa ya. Huēsti ca xobo jiaría ca xo noa, naa noqui jodiobo carayanabo tēquē. Jahá tsi bēsohi quiha Dios ra, Espiritu Santó no.

3

Carayanabo Díos xabahamacasina

¹ Jabi mato carayanabo iqui tsi preso qui ē nanēhacanicquē. Cristo yonati nēxahaca ca ēa xo naa ra mato mēbicatsi na. ² Jabi mato carayanabo qui Dios Chani yoati yonoco ē qui acacani quiha mato mēbiti. ¿Tonia ē qui Díos ani ca yonoco yoati tsi ma nicayamayamani? ³ Ea pari quiha ja acatsai ca planes Díos jismaniquē. Jahué jonē ca shina ja ini quiha. Jismaxo tsi quiha ēa jahué planes ja cahēmaniquē. Ja tsi xo naa pistia ca ē quēnēhaina. ⁴ Jabi ē quēnēhai ca

tsayacana. Tsayaquí tsi jahuë Cristó tsi carayanabo ri Diós xabahamacatsai ca cahëxëni ca ë nori ca jixxëqui mato ri. ⁵ Jabi naarima tsi quiha carayanabo ri Diós xabahamacasni ca noba naborëquëbá cahëyamaniquë. Jama, jaboqui tsi quiha noqui Chani chitahëhuati ibo bo, Dios Chani yoati ibo bo, tihi cabo qui Dios shina jismahacanicuë Espíritu Santó no. ⁶ Jabi Dios cahëhama ca shina tsi xo toa jahuë Cristó tsi carayanabo ja xabahamahaina ra. Jaboqui Dios xocobo manëhi quiha carayanabo ri jodiobo ya. Jasca ca Dios maxo xatë xo jato ri. Jaboqui Espíritu Santo bicani quiha jato ri naa Diós yoani jascaria.

⁷ Jabi mato carayanabo qui ëa pari Diós raanicuë ra, jahuë Chani ë yoano. Ea noiquí tsi ëa ja chamahuani quiha jahuë yonoco ë ano. ⁸ Ea pi, naa Dios nohiria tënëmapaonish ca Diós bini quiha, carayanabo qui jahuë Chani yoati. Jaha tsi “Cristo tsi xo toa carayanabo Xabahamati Ibo-iboria” i jato qui ë ti xo. ⁹ Jasca, naa quinia jatiroha ca nohiria bo, naa jodiobo, carayanabo, tihi cabo qui ë bërohuaxëti xo. Jabi carayanabo Diós, naa noqui Nëhohuati Ibobá xabahamacasni ca noba naborëquëbá cahëyamaniquë rë. Naarima, naa huëstima ca año no tsi jato qui jonë Dios shina ini quiha. ¹⁰ Jama, jaboqui tsi Dios qui aranabëquicani quiha nohiria bo tëquë, naa “iglesiá” i no aina. Tihi tsi Diós aniquë mana ca ángel bo, mana ca chama bo, tihi cabá jahuë tiisitiisiria cahëno iquish na. Jabi carayanabo, jodiobo, tihi cabo aranabëquicanai cató tsi jato qui tsi Dios planes jismahacani quiha. ¹¹ Toca tsi Diós acasni quiha. Jaboqui tsi quiha jahuë shinana, naa jahuë planes ja jatihuaniquë noba Ibo Jesucristó no. ¹² Ja iqui tsi raquëhaxma tsi Dios qui chaniti mëtsa xo noa, jahuë Baquë qui no chitimini iqui na. ¹³ Jatsi ëa tahëhax shina-huëjënayamacana, naa mato carayanabo qui Dios Chani ë yoahai ca iqui tsi presó tsi ë nori ca iqui na. Ocapijaquë mato bax na ra.

Pablo bëhoxnina

¹⁴ Nëca tsi chanipama tsi Jahëpa yoi bësojó mënihax bëhoxquia ra. ¹⁵ Noqui nohiria bo, mana ca ángel bo, tihi caba jahëpa-jahëparia ca Dios tsi xo naa noba Jahëpa ra. ¹⁶ Anomaria tsi xo Dios oquë ra. Ja quëshpi tsi Jahëpa Dios nicaquia, mato shina ja chamahuano Espíritu Santó no. ¹⁷ Chamahuaxo tsi mato shina ó tsi Cristo bësono ra, ja qui ma chitimihai cató no. Jasca, mato bax bëhoxquia, noiti ma cahëriano iquish na. ¹⁸ Jasca, mato Efesó cabo, Dios nohiria bo tëquë, tihi cabo Diós mëbino, Cristó noihai ca ma cahëyoino iquish na. Anomaria tsi xo toa noqui ja noihaina ra. Yoanoma quiha. ¹⁹ Jabi ja noihai ca pi cahëhi tsi Dios jabi tëquë rëahacaxëhi quiha noa ra. Jabi, ¿jënahuariaxo raca ja noihai ca no cahëyoina rë? Noqui huino quiha. Tihi ca tsi mato bax nicaquia, bëhoxquí na ra. ²⁰ Jatsi oquëhuahacaxëti xo Dios iquia. Anomaria tsi xo toa ja ati mëtsa ca chama ra. No nohó ca yonocohai ca chama tsi xo toa, jia ca ati. ²¹ Japi jahuë Jesucristo ini iqui tsi Dios no oquëhua-oquëhuapaoti xo ra jahuë rëso qui. No tocaxëti xo iglesiá no ra. Amén.

4

Huësti ca yora xo chahahuacanaibo

¹ ¿Diós mato quënyamayamani? Jatsi mëstëxëni ca jabi jayacana iquia, naa Ibo tahëhax tsi presó ë nori cato. ² Noihi tsi shinapënicana. Shinapënihi tsi yosanayamacana. Yosanayamaquí tsi noicana. Noiquí tsi mëbinabëquicana. ³ Jasca, noihi tsi rabë nabëquiti ó quëëriacana. Jabi Espíritu Santo tsi xo toa noqui rabë nabëquimahaina ra. ⁴ Jabi tobi xo huësti roha ca iglesia ra; naa Cristo banahuacanaibo. Tobi xo huësti ca Espíritu Santo ri. Jasca, huësti

roha tsi xo toa xabahamati quinia ra. Jabi Diós mato quēnani quiha, ja bēta ixēti ó ma pasono. ⁵ Jasca, huēsti ca Ibo roha xo. Huēsti roha tsi xo toa no chitimihaina. Jasca, huēsti roha tsi xo toa no ashimahacahaina. ⁶ Tobi huēsti roha ca Dios; naa noba Jahēpa-jahēparia. Ja tsi xo toa noqui chahahuacanaibo tēquē otohái cato. No nohó tsi yonocohi quiha ra, jahuē shina no ano iquish na.

⁷ Nicaparicana. Noqui tēquē qui tiisi bo acacani quiha Dios yonoco ati. Jamēri jamēri tsi xo toa noqui Cristó acaina. ⁸ Jabi tocaxēti ja ini quiha ii quiha Quēnhacanish cabo.

“Mana nai qui ja tērononiquē bēbohax na.

Tēronoxo tsi quiha tiisi bo ja aniquē joni bo qui”

i jaca ni quiha Cristó acai ca yoati na. ⁹ Japi tsayacana. “Mana nai qui ja tērononiquē” ii quiha. Jabi mana tērononox pari tsi quiha ¿mai yoi qui ja botēyamayamani? ¹⁰ Jabi naa botēnish ca tsi xo Cristo ra; naa mana tēronish ca jasca cato. Toa tsi ja cani quiha jatiroha ca yonaxēna. ¹¹ Tēronoxo tsi quiha jahuē nohiria bo qui tiisi bo ja aniquē chahahuacanaibo mēbixēna.

Jatsi Dios Chani chitahēhuati ibo bo, Dios Chani yoati ibo bo, Dios qui nohiria bo mēpiti ibo bo, pastor bo, naa chahahuacanaibo obēso cabo, Dios Chani tiisimacanaibo, tihi cabo Cristó iglesia qui ani quiha. ¹² Tihi ca tiisi jaya ca joni bo acacani quiha noqui chahahuacanaibo rohahuaxēna, Dios yonoco ati. Toca tsi chamahuahacahi quiha iglesia, naa noqui Cristo banahuacanaibo. ¹³ Tocapihi tsi jia tsi catixēqui noa, jia tsi aranabēquihí na.

Jatsi quiha jaharisixēhi quiha no chitimihaina ra. Jasca, jaharisixēhi quiha Dios Baquē no cahēhaina. Tocapihi tsi shinacoshi bo manēxēhi quiha noa, toa Cristo jabi-jabiria jayahi na. ¹⁴ Jaha tsi xocobo jascaria iyamaxēqui noa ra. Jama, coshixēhi quiha no cahēhaina. Rarinamahacatimaxēni-xēhi quiha no chitimihaina ra. Jabi huēstima tsi xo toa mahitsa ca chani yoahacahaina rē. Tobi xo quiahaina, parahaina. Jama, shinahaxo tsi jato mahitsa ca chani chahahuayamaxēqui noa. ¹⁵ Noipihí tsi Cristo jascaria tsi manēxēqui noa ra, jabija ca Chani nicahi na. Jabi Cristo tsi xo toa noqui rēquēninihaina ra. Noba mapo quiha. ¹⁶ Ja tsi xo toa noqui chahahuacanaibo yonoco-bēquinamati Ibo-iboria. Cristo yora xatē bo xo noa. Jabi yonoco jaya xo jatiroha ca xatē ati. Jabi jia pi jatiroha ca xatē jahuē yonoco ano tsi anixēhi quiha Cristo yora; naa iglesia cato. Jasca, oquēxēhi quiha no noinabēquihai ri.

Quinia siri quima casocana

¹⁷ Iboha janē tsi Dios cahēyamacanaibo jascaria tsi bēsoyamacana iquia. Anoma tsi xo toa jato jabi ra. Jasca, mahitsa tsi xo toa ja shinacanaina.

¹⁸ Tsēmo rēamē tsi xo toa ja shinacanaina pē. Jasca, jabija ca cahēyamaquí tsi Dios cahēyoiyamacani quiha. Jabija ca nicacasyamacani quiha rē.

¹⁹ Bērabitimaxēni ca nohiria bo tsi xo naa ra. Anoma ca acacani quiha pē. Jasca, jato qui jia tsi xo toa ja acanaina ra. Jatiroha ca jocha yoixēni ca jabicascani quiha pē. ²⁰ Jama, jamēri tsi xo toa ma jabirianina, Cristo Chani nicahax na. ²¹ Jabija tsi xo toa Jesu Chani ra. Toa Chani ma yoahacaquē tsi quiha ¿jia tsi ma nicayamayamani? ²² Jatsi mato jochahuaxēni ca jabi ma tsoboxēti xo ra. Toa ma tiisimahacani quiha. Jatsi quiniacaxēcahuē. Mato jabi jia ca yoshihuahacayamano, yoi ca ó ma quēēhai cató no. ²³ Jaboqui paxahuahacaxēti xo mato shinana ra. ²⁴ Jatsi Dios jabi paxa ca sahuēcana. Jabi Dios jascariati no nēhohuacani quiha, mēstē, jochayama, tihi cabo iti.

²⁵ Jatsi jaboqui quiayamacana jaa ri. Jabija ca noba xatē bo qui no chanixēti xo, jasca ca yora xatē bo no nori iqui na. ²⁶ Jasca, caxapihi tsi jochayamacana. Caxahi tsi mēri tsi rabēnacana, naa bari canox pari

no. ²⁷ Mëri tsi rabënyamapiquí tsi Satanás qui xaba axëqui mato pë, mato yonati. ²⁸ Jasca, yomayamatëquëxëti xo yoma-yomapaonish cato. Yonocoti ja chitahëhuano iquia. Yonocopihi tsi noitiria cabo qui parata mëati mëtsaxëhi quiha ra. ²⁹ Jasca, quiniacaxëcahuë. Anoma tsi xo toa yoi ca chanihaina. Jia tsi nohiria bo qui chanicana jato chamahuaxëna, jato mëbixëna. Jatsi mato chani jia ca ja nichai cató tsi mëbihacaxëti xo nohiria bo ra. ³⁰ Jama, yoi ca pi chanimano tsi cohuëxëhi quiha Espiritu Santo ra. Espiritu Santo cohuëhuayamacana. Mato qui acacanish ca tsi xo naa ra, Diós-nabo ma nori ca jismati. Ja iqui tsi mato xabahamaxëqui Dios, jaroha ca barí no ra. ³¹ Jasca, huëtsa bo qui joi mërayamacana caxaquí na. Itsisnayamacana; anoma quiha. Mato joi choshayamacana. Anoma tsi xo ocahuahaina. Tihi ca jocha quima bësocana iquia. ³² Jama, rabë nabëquicana noihi na. Mato pasomaha pi mabë xatë bá jahuëcara ca ano tsi shina-bënocana, naa Cristo iqui tsi yoi ca ma acai ca Diós shina-bënoni jascaria.

5

Dios xocoba jabi

¹ Dios xocobo yoi xo mato ra. Jaha tsi Dios jascacana. ² Jasca, noinacana, naa Cristó mato noini jascaria. ¿No bax nati jamë ja ayamayamani? Jabi Dios qui acacapaoni ca oveja jascaria tsi Dios qui je acacani quiha. Perojome jascaria ja ini quiha Dios qui.

³ Jatsi Dios xocobo ma nori iqui tsi anoma ca chotahaina, yoi ca acaina, jahuëmishni bo ó quëëmish-haina, tihi cabo iyamacana, mato qui nohiria bo quësoyamao ra. ⁴ Jasca, rabixëniria ca yoyoxëniria ca jahuë bo, anoma ca shirahaina, tihi ca yoati tsi pasicana. Anoma tsi xo toca ca jahuë bo chanihaina. Jama, Dios qui “Gracias” i ma ti xo. ⁵ Nicaparicana. Jabija tsi xo naa ë yoaxëhaina: Cristo, Dios, tihi cabá otoiha ca qui jicopistiyamariaxëhi quiha mëtsaxëniria cabo. Jicoyamacaxëcane quiha shina yoixëniria ca jaya cabo, jahuëmishni bo ó quëëmishxëniria cabo rí. Toca tsi mahitsa ca dios qui aracanabo jascaria ca xo toa nohiria bo ra. ⁶ Tobi quiha huëstima ca mahitsa ca chani rë. Jatsi ma parahacayamao. Anoma ca ó ja bësocanei ca quëshpi tsi toa nicamixxëniria cabo qui caxaxëniria tsi xo Dios ra. Jato copixëhi quiha ra. ⁷ Toca ca nohiria bo ya rabë nabëquiyamacana iquia.

⁸ Siri tsi tsëmo ó tsi quiha ma i-ipaoniquë. Jama, jaboqui Dios huëa ó tsi bohoqui mato ra, Ibo ya rabënahi na. Jaha tsi jabi jiaxëni ca jayacana, Huëa ó ca nohiria bo jascaria. ⁹ Huëaná tsi no jabithuahacani quiha. Ja tsi xo toa caxayama xo noa jaboqui. Jahá tsi no mëstëhuahacani quiha. Jahá tsi noqui jia tsi xo jabija ca no banahuahaina. ¹⁰ Jatsi mato bax Ibo jaha quëëhai ca ma jabixëti xo ra. ¹¹ Tsayacahuë. Anoma tsi xo toa tsëmo ó cabá acaina ra. Jatsi jato bëta rabënyamacana. Jama, oquë tsi xo toa ja acanai ca yoi ca ma bërohuahaina. ¹² Bërabixëniria tsi xo toa jonë xo tsi ja acanaina ra. Ja acanai ca yoati tsi chaniyamaqui noa. Bërabiria ca xo. ¹³ Jabi huëa ó pi jahuëcara ca jochahuaxëni ca jahuë bo janahacano tsi noqui bërohuahacahi quiha toa yoi ca tëquëta. Toca tsi jato jabi yoi ca cahëxëqui noa. ¹⁴ Jabi toca tsi noqui yoahi quiha noba quëquëti ra, naa jochahuaxëni ca jahuë bo yoati na.

“Bësohuë, oxahai cató.

Bësoyama cabo, naa jochahuaxëni cabo quima tsëquëhuë.

Jatsi mato qui huahuaxëhi quiha Cristo ra” ii quiha.

¹⁵ Japi bësoti quiniacaxëcahuë. Jasca, jabi jia ca jayacana. Cahëtimaxëniria ca joni bo jascaria tsi bësoyamacana, tiisi ca joni jascati nori. ¹⁶ Jasca,

bamayamacana. Anomaria tsi xo toa jaboqui jochacanaina ra. ¹⁷ Japi yoyoyamacana. Jama, mato bax Ibo jaha quëèhai ca ma jabixëti xo iquia. ¹⁸ Jasca, pahëyamacana. Ja tsi xo toa nohiria yoshihuahaina ra. Jama, Espiritu Santó tsi rëamëcana. ¹⁹ Jasca, rabënapama tsi salmos, himnos, Dios quëquëti bo, tihi cabo i-icana. Jiaria tsi xo toa quëquëbëquinahaina. Jiaria tsi xo toa Ibo qui música jia ca ma acaina mato shina ó no. ²⁰ Jasca, noba Ibo Jesucristo janë tsi noba Jahëpa Dios qui “Gracias” iroha-irohacana jatiroha ca jahuë bo quëshpi na.

Bënë bo — Ahui bo

²¹ Jabi Cristo noihi tsi jia tsi racanabëquicana. ²² Jasca, mato bënë bo nicacana, ahui bá, naa Ibo ma nicahai jascaria. ²³ Jabi jahuë ahui ototi chama jaya xo bënë, naa chahahuacanaibo ototi chama Cristó jaya ca jascaria. Bënë tsi xo toa ahui ni mapo; naa jahuë rëquënititi Ibo. Jascaria tsi noqui chahahuacanaiba mapo tsi xo Cristo, naa noqui Xabahamati Ibo-iboria. Jasca, noqui tsi xo toa jahuë yora, naa noqui Cristo banahuacanaibo. ²⁴ Cristó nica-nicaqui noa, naa noqui chahahuacanaibo. Jascaria tsi jato bënë bo nicayoixëti xo ahui bo ri.

²⁵ Jasca, mato ahui bo noicana, bënë bá, jahuë iglesia, naa noqui chahahuacanaibo Cristó noini jascaria. Noixo tsi ¿jamë ja ayamayamani no bax nati? ²⁶ Cristó tocani quiha, noqui, naa jahuë iglesia mëtëhuacatsi na. Jahuë Chaní tsi noqui ja bahuëni quiha, jënë tsi no ashimahacahai jascaria. ²⁷ Toca tsi quiha jahuë iglesia oquëhuahacaniquë ja bax biti. Jatsi quiha iglesia jiaria ca mëtëxëniria ca biti mëtsa ixëqui Cristo ra. Jochayama ca quësohacatimaxëniria ca iglesia ixëhi quiha. ²⁸ ¿Jabi iglesia, naa jahuë yora oto-toyamahi ni Cristo ra? Toa jascaria tsi jato ahui bo otoxëti xo bënë bo ri, naa jato yora yoi bo ja otocanaí jascaria. Jabi jahuë yora noihi ca tsi xo toa jahuë ahui otoyoihai cato iquia. ¿Jahuë yora jascaria ma ni? ²⁹ Jabi yama tsi xo toa jahuë yora yoi otoyamahi cato iquia. Jahuë yora pimahi quiha jatiroha cabo. Jato yora bo otocani quiha, naa Cristó jahuë iglesia otoihaí jascaria, jato yora bo jaca nori iqui na. ³⁰ Jabi noqui ri otoihi quiha Cristo ra, jahuë yora xatë bo no nori iqui na. ³¹ Jabi ja tsi xo toa jahuë jahëpa, jahuë jahëhua, tihi cabo jisbayaxëti xo baquë jahuë ahui ya racaxëna. (Jasca, jahuë nabo jisbayati xo toa jahuë jahi ri bënë ya racaxëna.) Jatsi huësti ca xobo paxa ca manëcane quiha naa dos cabo, huësti ca yora paxa ca iquiina. ³² Anomaria tsi xo naa chani ra. Diós noqui jismani quiha, jahuë Chaní no. Jascaria tsi huësti ca yora paxa ca manëhi quiha Cristo, jahuë iglesia, tihi cabo ri. ³³ Jarohari tsi mato ahui bo ma noixëti xo ra, mamë ma noihi ca jascaria. Jasca, jato bënë bo nicayoixëti xo ahui bo ri.

6

Xocobo — Jato nabo

¹ Mato nabo nicacana, xocabá. Chahahuacanaiba jabi tsi xo toa. Jiaria tsi xo toa mato nabo nicahaina ra. ² “Mi ipa, mi ihua, tihi cabo noicahuë” ii quiha Dios yoba-yobaria. ³ Jabi tocapimano tsi mato shomahuaxëhi quiha Dios. Jasca, “Naama tsi bësoyoicaxëcane quiha tocacanaibo maí no” i Dios ni quiha.

⁴ Jasca, mato xocobo yosanamayamacana, jahëpa bá. Jama, jia tsi Iboba quinia ó tsi jato shinahamacana, jato qui Iboba yoba amahai cató no.

Yonati bo — Chama bo

⁵ Jia tsi mato chama bo nicacana, yonati bá. Noixo tsi jato yonoco acana, naa Cristo yonoco ma aquë ana jascaria. ⁶ Jabi tobi quiha toa chiquixëñiria ca yonati bo ra. Yonocoriacani quiha jato ó tsi jato chama bo bësoquë no. Jama, jato ó pi chama bësoyamano tsi bama-bamacani quiha pë. Tocayamacana. Anoma quiha. Jama, Cristo yonati ma nori iqui tsi noixo tsi Dios shina ma ariati xo ra. ⁷ Jatsi mato Ibo ma ranihuaxëti xo yonocoqui na, mato Ibo-iboria ja nori quëshpi na. Jascaria tsi ranihax yonocoriacana mato maí ca chama bax na. ⁸ Jabi jatiroha ca nohiria bo copixëhi quiha Dios, jia ca ja acanai ca quëshpi na. Chama jaya cabo, chama yama cabo, tihi cabo tëquë copixëhi quiha.

⁹ Jasca, mato yonati bo ri mëbicana, chama bá. Jato roayamacana. Anoma quiha. ¿Jasca ca naipá ca Chama-chamaria jayamayamani mato ra? Yama tsi xo toa Dios qui oquëria cato ra.

Dios armadura sahuëti xo chahahuacanaibo

¹⁰ Jarohari tsi Ibo ya ma rabënahai cató tsi coshinacana, ëbë xatë bá. Mato ó tsi jahuë chama ino ra. ¹¹ Jasca, Dios armadura tëquë sahuëcana, jia tsi yoshiní parahai ca quinia bo pasomaha niixëna. ¹² Jabi nohiria bo pasomahama xo toa no iquínayoihaina iquia, jama, yoixëñiria ca yoshi bo pasomaha ja nori. Yonamixëñiria ca chama bo, mana ca chama yoixëñiria cabo, tsëmo ó ca Dios pasomaha ca yoshi bo, tihi cabo pasomaha xo noa ra. ¹³ Naa Dios pasomaha cabo iqui tsi Dios armadura tëquë ma sahuëxëti xo. Sahuëhax tsi bëbohacayamaxëqui mato ra, toa bari yoixëni ca tsëquëxëquë no. Nianahax jari coshixëqui mato iquia toa barí no. ¹⁴ Jatsi ma shomahuahacano ra. Jabi niananox pari tsi jahuë armadura sahuëhi quiha soldado. Jahuë cinturón, jahuë shipati quiniamati manë, tihi cabo sahuëhi quiha shomahuahacaxëna. Jabi armadura jaya xo mato chahahuacanaibo ri. Jariapari tsi quiyamahai ca jabi sahuëcana, mato cinturón ja nori quëshpi na. Jatsi mëstëxëñiria ca jabi sahuëcana. Mato shipati quiniamati manë tsi xo toa. ¹⁵ Mamë shomahuacana, rabënamahai ca Chani jia ca yoaxëna, naa zapató tsi jahuë tahë soldado shomahuahai jascaria. ¹⁶ Jasca, Dios qui chitimihai ca jabi sahuëcana, naa mato escudo ja nori quëshpi na. Jatsi toa escudó tsi yoshini mëshohai ca pia bo tëquë nocahuapixëhi quiha mato ra. ¹⁷ Jasca, Dios casco bicana mato mapo quiniamaxëna, mato xabahamati ca ja nori quëshpi na. Jasca, Espiritu Santo saipi, naa Dios Chani bicana. ¹⁸ Tihi cabo bichí tsi bëhoxcana. Armadura narisxo tsi Dios nicacana ra. Jasca, Espiritu Santó tsi bëhoxcana jatiroha ca xabacá no. Bësohax tsi bamahaxma tsi Dios nohiria bo tëquë bax bëhoxcana. ¹⁹ Jasca, ë bax ri ma bëhoxno ra. Raquëxoma tsi nohiria huëtza bá Dios nicahama ca Chani yoacasquia ra. ²⁰ Jabi naa Chani tahëhax tsi preso xara xo ëa jaboqui. Jama, toa Chani yoati ë quënahacani quiha. Jatsi ë bax bëhoxcana, raquëxoma tsi toa Chani ë yoano.

Joihuanina

²¹ Jabi ëa yoati tsi, naa ë acai ca ë shinahai ca, tihi cabo mato yoaxëhi quiha Tíquico, naa ë bëta ax Ibo bax yonocobëquihai cato. Nobë xatë jiaxëni ca quiha. ²² Ja tsi xo toa mato qui naa joni raaquia, néa ca chani ëa yoati mato qui boti. Jahuë chaní tsi ma ranihuahacano.

²³ Jasca, noba Jahëpa Dios, noba Ibo Jesucristo, tihi cabá toá ca xatë bo tëquë ranihuano. Mato ja noimacano. Oquë tsi mato ja chahahuamacano. ²⁴ Noba Ibo Jesucristo noi-noicanaibo tëquë Diós shomahuano ra. Iquë.

La Carta Del Apostol San Pablo a Los Filipenses

Carcel xo tsi carta Pabló quënëhina Filipó ca chahahuacanaibo qui

¹ Pablo tsi xo naa carta quënëhaina ra. Filipó ca Jesucristo qui chitimicanaibo tēquē, jasca jato ó bēsohai ca yosibo, iglesiá ca mēbicanaibo, tihí cabo joihuaquia Timoteo yaxo na. Jesucristo yonati bo xo noa ra. ² Jabi noba Jahēpa Dios, noba Ibo Jesucristo, tihí cabá mato shomahuano. Mato ja bēpasimacano.

Chitimicanaibo bax Pablo bēhoxnina

³ Jatiroha ca xabacá tsi mato shinahi tsi “Gracias” iquia Dios qui. ⁴ Jasca, bēhoxhi tsi rani-ranihax mato bax bēhoxquia ra. ⁵ Jabi jia tsi ēa ma mēbiriani quiha, Dios Chani pacanamaxēna. Chahahuaxo tsi ēa mēbiti ma chitahēhuani quiha. Jiaria quiha. Jasca, jaboqui jari tocaqui mato. ⁶ Jabi ē cahēyoihai ca tsi xo naa ra: Mato ó ca yonoco jatihuaxēhi quiha Dios ra, naa toa yonoco jia ca Chitahēhuanish cato. Jatihuahacaxēhi quiha, toa barí tsi Jesucristo joquē no. ⁷ Jabi mato shina-shinaquia ra, mato noiquí na. Tocapiquia, ē bēta xo tsi Dios yonoco ma abēquini iquí na. Jasca, jaboqui presó tsi ē no tsi jari ēa mēbiriaqui mato tēquē ra, nēa xo tsi Dios Chani ē yoaquē no. ⁸ Paraxoma tsi mato yoparyopariaquia ra. Toa cahēhi quiha Dios. Jabi Jesucristó mato noihai jascaria tsi mato noi-noiriaquia ēa ri.

⁹ Bēhoxquí tsi mato bax ē nicahai ca tsi xo naa: Jariapari ma cahēyoihai ca ánino iquia. Jasca, oquē ca tiisi ma jayacano iquia. Jatsi tihí cató tsi ma noi-noiriahai ca oquē-oguēriano. ¹⁰ Jabi toca ca tiisi pi jayahi tsi jia ca oquē ca yonoco ati mētsa-xēqui mato ra. Jatsi Cristo jono tsi mēstēxēni ca quēsohacatimaxēni ca ixēqui mato toa barí no. ¹¹ Jasca, Dios mēstēxēniria ca jabi tsi ma rēamēno iquia ra, bēhoxhi na. Jabi mato ó tsi toa mēstēxēniria ca jabi saihuati mētsa xo Jesucristo roha. Toa jabi tsayaxo tsi jia tsi nohiria bá Dios oquēhuano.

Cristo bax Pablo bēsonina

¹² Jabi jēnima tsi xo toa presó tsi jaboqui ē iquiina iquia, ēbē xatē bá. Ja tahēhax tsi oquē tsi xo toa Dios Chani jia ca pacanahaina iquia. ¹³ ¿Tsayacanai? Cristo Chani tahēxo tsi preso qui ē nanēhacani ca cahēhi quiha nēa ca palació ca soldado bo tēquē. Jasca, ēa tahēxo nicahi quiha yacatá ca nohiria bo ri. Jiaria quiha. ¹⁴ Jasca, preso qui ē nanēhacani cató tsi chamahuahacani quiha nēa ca huēstima ca chahahuacanaibo ri. Jasca, anihí quiha jato chama, raquēxoma tsi Dios Chani yoati.

¹⁵ Jama, tobi xo toa yoi ca quiniá tsi Dios Chani yoacanaina rē. E qui yosaquí tsi Dios Chani yoacani quiha huēsti huēsti cabo ra. Anoma quiha. Jama, tobi xo toa bo, naa quinia jíá tsi Dios Chani yoacanaina, ēa mēbicasquí na. ¹⁶ Jabi naabo tsi xo toa Dios Chani yoacatsaina, ēa noiquí na. ¹⁷ Toca ma xo huētsa bo rē. Quinia jia tsi Dios Chani yoayamacani quiha pē, jamē oquēhuacasquí na. Tocacani quiha rē, ēa yosicasquí na, presó tsi ē iquē no. ¹⁸ ¿Jēnahuariahi ni naa nohiria bo sa? Xatē tsi xo toa Cristo Chani yoahaina, noixoma. Huētsa bo tsi xo toa jahuē Chani yoahaina, noiquí na. Jēnima

quiha. Jatiroha ca quiniá tsi yoahacahi quiha Cristo Chani ra. Ja iqui tsi rani-raniquia ra.

¹⁹ Jasca, rani-ranixëquia, preso quima ëa ja paquëmacaquë no. E bax ma bëhoxhaina, Cristó raani ca Espiritu Santó ëa mëbihaina, tihi cabo iqui tsi preso quima paquëmahacaxëti ó pasoquia ra. ²⁰ Jasca, jaboqui jaha ë queëhai ca tsi xo toa Cristo qui ë bërabi-yamahaina iquia. Jasca, raquëxoma tsi jahuë Chani yoacasquia ra. Bëbo-bëboria-casquia, jatiroha ca ë acai cató tsi Cristo oquëhuahacano iquish na. Ja bax ë bësohai cató pi ja oquëhuahacano tsi rani-raniquia. Jasca, presó pi resohti tsi ranixëquia. Toca ca quiniá tsi oquëhuahacati mëtsa xo jaa ri. ²¹ Jatsi ëa pi ja paquëmacano tsi xaba huëtsa jayaxëquia ra Cristo bax bësoti. Jama, ëa pi ja namëcano tsi jënima tsi xo toa ri, ja bëta ë ixëhai quëshpi na. Oquë tsi xo toa Cristo ya iquiina iquia. ²² Jama, rësoyamapihi tsi Ibo bax yonoco jia ca ati mëtsaxëquia ra. ¿Jënica cara ni toa oquë ca iti? ¿Bësoti ni? ¿Rësoti ni? ²³ Cahëyamaquia ra. Rësopiquia Cristo ya iti. Oquë xo toa ra. ²⁴ Jama, ¿jënahuariaxo raca mato ë mëbina, rësopiquí na? Oquë tsi xo toa ë bësohaina iquia mato bax na. ²⁵ Jabija; oquë tsi xo toa tia iquia. Namëhacayamaxëquia iquia ra. Mato bëta bësoxëquia, mato mëbixëna, oquë tsi Cristo ma cahëhaina, ma ranihaina, tihi cabo anino iquish na. ²⁶ Jatsi mato bëta pi ë itëquëno tsi jia tsi Jesucristo ocahuati mëtsa ixëqui mato, ë bax ja aca quëshpi na.

²⁷ Jatsi quiniacaxëcahuë, ma acai ca iqui tsi Jesucristo Chani ocahuahacayamano iquish na. Jabi preso quima ax tsëquëhax mato qui shishocasquia. Jama, mato qui pi shishoyamaquí tsi basi xo tsi ma acai ca yoati tsi nicaxëquia tia. ¿Jia ca icaxëcahi ni sa? Jia ca pi ma ano tsi huësti ca shina ó tsi yonoconabëquixëqui mato iquia. Jasca, jiaxëhi quiha toa Dios Chani pasomaha cabo ma bëbohaina iquia, toa Chani noiquí na. ²⁸ Tocapihi tsi mato pasomaha cabo qui raquëyamaxëqui mato ra. Jatsi jato qui ma raquëyamahai ca jisí tsi “Jishopë” icaxëcani quiha. Jasca, raquëyamapimano tsi bëbohacati ó pasocaxëcani quiha ra. Tocaxëqui ra, Diós mato mëbihai iqui na. ²⁹ Jabi shomaria xo mato ra, Cristo qui chitimiti xaba mato qui Diós ani quëshpi na. Jasca, mato qui acacani quiha toa xaba huëtsa ra, naa ja bax tënëti. ³⁰ ¿Tsayacanai? Jaboqui Dios Chani iqui tsi Dios bax tënëqui mato ri ë tënëni jascaria. Toa ma jisni quiha mato bëta ë iniquë no. Jabi jaharisi tsi xo naa nëá ca ë tënëhai ca ma nicahaina. Jënëyamaqui Ibo bax no nianahaina ra.

2

Jahuë oquë Jesú jisbërianina joni manëxëna

¹ Ea nicaparicana, ëbë xatë bá. Cristo qui riihax tsi ¿ma chamahuahacayamayamani? Cristó mato noihai ca cahëhax tsi ¿ma ranihuahacayamayamani? Jasca, ¿jia tsi Espiritu Santó mato rabënamayamayamani? ¿Jaboqui mabë xatë bo noiyamayamacanai? Tihi tsi xo toa mato bax Diós anina iquia. ² Ja iqui tsi mato yobacasquia jaboqui. Noho yoba pi nicaqui tsi ëa ranihuariaxëqui mato ra. Jariapari tsi jasca ca shina ma jayano. Jatsi jia tsi jasca ca Dios ma noino. Jatsi huësti ca shina ó tsi ma yonocobëquinano. Toca pi ma bësono tsi rani-ranixëquia ra. ³ Jasca, anoma tsi xo toa bëbomisxëniria ca jamë shinamixxëniria iquiina. Jama, mato oquë nohiria huëtsa bo nori ca ma tocaxëti xo. Jia tsi xo toa ca shinahaina ra. ⁴ Jasca nohiria huëtsa ba jahuë bo, ja acascanaina, tihi cabo shinacana jato mëbixëna. Anoma tsi xo toa mato jahuë bo roha shinahaina iquia.

⁵ Jasca, Jesucristo ó ca jabi ó quëécana. Jesu jascaria tsi no shinaxëti xo ra. ⁶ Jariapari tsi quiha Dios jabi-jabiria ja jayaniquë. Jayahi tsi Dios chama ó ja quëëyamani quiha, Dios chama jasca ca jayati. ⁷ Jama, jahuë oquë, jahuë chama, tihì cabo ja jisbërianiquë ra, mahitsa ca manëxëna. Jisbëria tsi quiha yonati jabi-jabiria ja sahuëniquë. Joni ja manëni quiha. Manëxo tsi noba jabi ja jayani quiha mai ó bësouqui na. ⁸ Jatsi jahuë Jahëpa yoba ja nicaniquë yonati jascaria. Nicachax tsi quiha rësohi ja caniquë. Jatsi yoiria ca cruzó tsi ja rësoni quiha ra. ⁹ Ja tsi xo toa jahuë Jesu Diós oquëhuarianiquë. Oquëhuaxo tsi quiha oquëria ca janë jahuë baquë Jesu qui Diós aniquë. Jatiroha ca janë huëtsa oquë toa janë ini quiha. ¹⁰ Toca tsi Diós aniquë, jatiroha ca bëso cabo, naa maí cabo, naipá cabo, tënëtiyá cabo, tihì cabo ja bësójó mënino iquish na. ¹¹ Mënihax, “Ibo-iboria tsi xo Jesucristo ra” icaxëceni quiha jatiroha cabo. Toca tsi ocahuahacaxëqui Dios ra.

Maí ca nohiria bo qui huëa-huëaria xo chahahuacanaibo

¹² Jisa noho rabëti bá. Jia tsi noho yoba ma nica-nicapaoniquë mato bëta ë iniquë no. Jama, jaboqui basi xo ëa rë. Ja iqui tsi oquë tsi noho yoba ma nicano iquia. Basixo tsi çjënahuariaxo mato ë mëbina? Japi jaboqui mamëyoixo tsi ma xabahamahacahai ca jatihuacana iquia, Diós mato tsayahai ca cahëquí na. Dios ma chahuaxëti xo ra. ¹³ ¿Tsayayamacanai? Mato ó tsi yonocohi quiha Dios, oquë tsi jahuë yoba ma banahuacasno iquish na. Mato mëbicatsi quiha, jahuë shina ati ó ma quëëno iquish na. Toca tsi jatihuahacaxëhi quiha ma xabahamahaina iquia. ¹⁴ Jatsi ranixo tsi jatiroha ca acana. Jasca, joi mërayamacana. Anoma quiha. ¹⁵ Toca ca jabi jia ca pi jayahi tsi Dios xocobo yoi bo, naa quësohacatimaxëni ca mëstëxëni ca xocobo ixëqui mato ra. Tocaxëqui mato, janyama ca jochahuaxëniiria ca maí ca nohiria bo xërëquë tsi ma bësouquë no. Jato xërëquë tsi huahuahai ca huishti bo jascaria ixëqui mato. ¹⁶ Tocaxëqui mato, maí ca nohiria bo qui bësomati Chani ma acai ca quëshpi na. Tocapimano tsi rani-ranixëquia, toa barí tsi Cristo joquë no ra. Mahitsa ë yonocoyamani nori ca jismahacaxëhi quiha. ¹⁷ Toa barí tsi jismahacaxëhi quiha mato jabi jia cato ra. Jasca, Cristo qui ma chitimihai ca iqui tsi anomariaxëhi quiha toa jaboqui ja bax ma acaina. Dios qui jiaxëhi quiha toa mato jabi jia cato, ma acaina, tihì cabo. Jasca, ma acai ca qui ë namëhacaxëhai ca maniacasquia, Dios qui ma acai ca oquëhuaxëna. Ja tsi xo toa ëa pi ja namëcano tsi ranixëquia. Jasca, mato bëta ranixëquia, Dios qui ma acai ca quëshpi na. ¹⁸ Jascaria tsi ë bëta ma raniti xo mato ri.

Timoteo — Epafrodito

¹⁹ Ibo Jesu qui jiapino tsi Timoteo mato qui raacasquia. Tocapihi tsi rani-ranixëquia iquia, ma acai ca yoati tsi nichahax na. ²⁰ Yama tsi xo toca ca joni huëtsa iipiquia. Tsayacahuë. Ea jascaria tsi mato mëbiriacatsi quiha. ²¹ Tëxë bo tsi xo toa jato jahuëcara ca yoi bo roha otocatsaina rë. Jasca, jato qui iriama tsi xo toa Jesucristo yonoco. ²² Toca ma xo Timoteo. Ea mëbi-mëbiriahi quiha Dios Chani jia ca yoaxëna, naa baquë jahuë jahëpa mëbihai jascaria. Toa cahëqui mato. ²³ Ja tsi xo toa mato qui Timoteo raacasquia. Jama, jaboqui raanoma quiha. ¿Jënahuacaxëcahi ni nëá ca chama bo sa? Toa cahëparicasquia. ¿Ea paquëmamacaxëcahi ni sa? Jari cahëyamaquia rë. ²⁴ Jatsi Ibo ó pasoquia ë mëbiti, mato qui ëa yoi ri shishono iquish na.

²⁵ Jasca, jahari nobë xatë Epafrodito ë raaxëti xo iipiquia. E qui naa joni ma raani quiha, ëa ja mëbino, ë narisyamano iquish na. Jia tsi xo toa ëa tapai ja yonocobëquihaina. Soldado jascaria tsi Cristo yonoco aqui quiha. ²⁶ Jama,

jaboqui mato yopa-yopariahi quiha. Jahari jahuë xobo qui cacatsi quiha. Jasca, shina-huëjënahi quiha ja iquini ca yoati ma nicani iqui na. ²⁷ Jabi anoma ja ini quiha jahuë iquini. Ja rësoquë aniquë iquia. Ja rësorohapino tsi cohuë-cohuëria ë iquë ani quiha. Jama, Epafrodito yoi, ëa ri, tihi cabo Diós mëbirianiquë. Jatsi noho cohuë qui cohuë huëtsa maniahacayamani quiha. ²⁸ Japi jaboqui naa joni jahari raacasquia. Jisi tsi ranixëqui mato. Jatsi ma rani-ranino tsi namahuahacaxëhi quiha noho cohuë jaboqui. ²⁹ Mato Ibo ó ca xatë ja nori ca iqui tsi rani tsi naa joni joihuacana ja joquë no. Nëca ca joni bo ma oquëhuaxëti xo iquia. ³⁰ Nëa tsi ja rësoquë ani quiha, Dios yonoco aqui na. Ocapijaquë ani quiha, mato tahëhax tsi ëa mëbiti ja joni iqui na.

3

Jabi mëstëxëni cato

¹ Jarohari tsi Ibobá mato ranihuano, ëbë xatë bá. Jasca, ë qui yosayama tsi xo toa ë quënëha ca yoba yotätëquëhaina. Ma yobahacatëquëti xo iipiquia. ² Jatsi jariapari tsi quiniacaxëcahuë iquia. Tobi mato ó ca jodioba jabí-naxëni cabo rë. Caxaxëniria ca ina bo jascaria ca xo. Jato mahitsa ca jibirishati jabi mato qui acasani quiha pë. Jatsi jato chani qui quiniacaxëcahuë. Anoma quiha. ³ Jabija ca arati jabi bo ja jayacanai ca quëscahuacani quiha pë. Jama, noqui tsi xo toa jabija ca arati jabi jaya cabo ra, naa Espiritu Santó tsi Dios qui aracanaibo. Ea yoacahuë. ¿Jënahuariaxo raza jato jibirishati jabí noqui mëbina iquia? Noqui mëbihai ca tsi xo Cristo yoi roha. ⁴ Jatsi jodioba jabi bá tsi nohiria xabahamahacarohapino tsi oquë tsi ë mëbihacaquë ani quiha; mahitsa jaca nori. ⁵ Jatsi ëa nicaparicana. ¿Jodio yoi ë coyamayamani? Ja iqui tsi ë jibirishacaniquë, ocho bari huinocaquë no. Jasca, Benjamín maxó ca ëa xo naa. Jasca, hebreo yoi, noho jimiba jabi bo, tihi cabá tsi ë shinahamahacanicuë. Noba jodioba jabi bo ë aria-arianiquë ra, fariseobo ë ini iqui na. ⁶ Jodioba jabí-naxëni ca ë ini iqui tsi iglesiá cabo ë tënëmapaoni quiha. Jodioba yoba bo tëquë ë jatihuani quiha, toca tsi mëstëhuahacati ó pasoquí na. ⁷ Toatiyá tsi noho jabi yoi, ë anina, tihi cabá tsi mëstëhuahacati ó ë pasoniquë. Mahitsa ja icani quiha. Jaboqui toa bo tëquë ë nianiquë Cristo quëshpi na. ⁸ Nicaparicana. Mahitsa tsi xo toa jatiroha ca jahuëcara ë anina, naa ëa mëbiti nori ca ë quëscahuani cato. Mahitsa naa taxa jascaria tsi xo toa bo tëquë iquia ra. Oquë-oquëria tsi xo toa Ibo Jesucristo cahëyoihaina iquia. Ja quëshpi tsi toa jahuë bo tëquë ë nianiquë, oquë tsi Cristo cahëxëna. ⁹ Ja bëta yoi rabëna-rabëncasquia ra. Jaboqui jía ca jahuë bo acaina, jodioba yoba acaina, tihi cabá tsi xabahamahacati ó pasoyamaquia. Jama, Dios mëstë yoi ë qui acasani quiha, Cristo, naa noba Xabahamati Ibo qui ë chitiminiquë no. Yama tsi xo mëstëhuahacati quinia huëtsa ra. Noqui Mëstëhuati Ibo-iboria roha tsi xo Dios, jahuë baquë qui no chitimiquë no. ¹⁰ Jatsi jaboqui Cristo yoi roha cahëcasquia ra. Jasca, ë noho ca Dios chama, naa jahuë baquë Cristo bësotëquëmanish ca chama yoi cahëyoicasquia. Anomaria tsi xo toa chama iquia. Jasca, ja tënëti jascaria tsi tënëti ë jabixëti xo ëa ri. Jasca, ja rësoni jascaria tsi jocha qui rësoni ë jabixëti xo ëa ri. ¹¹ Tihi tsi jabicascaquia ra, mana xo tsi jaroha ca barí tsi Cristo jabi ë jayano. Jabi toa jabi-jabiria jayati ó pasoquia ra. ¹² Jama, jaboqui toa jabi-jabiria jayati basi xo ëa rë. Jama, jari rëquë caquia, naa jabanacanaibo jascaria tsi bëboxëna. Jabi toca ca jabi-jabiria jayati Cristó ëa quënëni quiha. Jaha quëëquia rë. ¹³ Jabi mato parayamaquia, ëbë xatë bá. Jari bëboti basi xo ëa rë. Jama, rëquë capama tsi Dios bax ë ani ca jahuë bo shina-bënoquia. E qui iriama tsi xo toa ë anina

iquia. Naa jahuë bo shina-bënohax tsi Diós jaha quëèhai ca jahuëcara qui bësoxëquia, rëquë cacatsi na. ¹⁴ Toa premio qui mëstë tsi caquia ra bëboxëna. Jabi Jesucristó tsi noba naipá ca Diós ëa quënani quiha toa premio biti.

¹⁵ Toca tsi no shinati xo noqui shinacoshi ca chahahuacanaibo. Jama, jamëri ca pi ma shinano tsi ë yoaha ca mato qui bërohuaxëhi quiha Dios iquia. ¹⁶ Oca xo tia. Jatsi rëquë capama tsi jia tsi noqui mëpihai ca yoba jari no nicano ra. Toa yoba pi no banahuano tsi jiariaxëhi quiha toa noba jabi nëá mai ax na.

¹⁷ Jatsi noho jabi mëstëxëni ca banahuacana, ëbë xatë bá. Toa jabi mato ë jismani quiha mato bëtaquí na. Jasca, toá ca jascaria ca jabi jia ca jaya cabo chahahuacana, jasca ca jabi jayaxëna. ¹⁸ Jishopë. Tobi xo toá ca jabi yoi ca jaya cabo iquia. Mato bëta xo tsi jato yoati tsi mato ë yobani quiha. Jato qui quiniacaxëcahuë iquia bëho ya. Anoma tsi xo toa ja yoacanaina ra. Cruzó tsi Cristo noqui xabahamati quinia pasomaha ca xo rë. ¹⁹ Tënëtiya ax tsi quëyohacacaxëceni quiha. Jocha ó quëëmíxëniiria ca xo iquia. Bërabiria ca jocha acax tsi rani-ranicani quiha pë. Naa maí ca jahuë bo roha tsi shina-shinacani quiha rë. Tihí tsi xo toa ja acanaina. ²⁰ Jama, toca ca jabi yama xo noqui chahahuacanaibo. Naipá roha xo noba racati yoi iquia. Jasca, toá ca noqui Xabahamati Ibo ó pasoqui noa, naa noba Ibo Jesucristo. ²¹ Joxo tsi noba chama yama ca rësohai ca yora yoi bo rarinamaxëhi quiha. Jatsi jahuë mana ca yora jascariaxëhi quiha noba yora bo ri. Jahuë chama-chamariá tsi rarinamahacaxëqui noa ra, naa jahuë jatiroha ca bëboti chamá no.

4

Ibo ó tsi rani-ranicana

¹ Jarohari tsi Ibo quima bësoyamacana, ëbë xatë bá. Jasca, mato yopaquia, noho rabëti yoi bá. Toá ca noho yonoco quëshpi tsi noho premio xo mato iquia ra, ëa ma ranihua-ranihuahai iqui na. Ibo ma banahuahai ca iqui tsi rani-raniquia ra.

² Jasca, toá ca Evodia, Síntique, tihí ca yoxa bo yobacasquia jaboqui. “Ma iquinhai ca jënëcana” i jato qui quia ra. Ibo ó tsi rabënatsicana iquia. ³ Jasca, toa dos ca yoxa bo mëbica huë, noho shinajiaxëni ca rabëti bá. Jia tsi naa dos ca yoxa bá ëa mëbiriani quiha Dios Chani pacanamaxëna. Jasca, toatiyá tsi ëa mëbini quiha Clemente ri, chahahuacanaibo huëtsa bo yaxo na. Dios bësocanaiba libro ó tsi quënëhacani quiha jato janë bo tquë.

⁴ Mato yobapama tsi rani-ranicana iquia. Cristó-na bo ma nori iqui tsi rani-ranicana itëquëquia. ⁵ Jasca, jatiroha cabo qui mato ishima ca jabi jismana. Joti basima xo Ibo ra.

⁶ Jasca, jahuëcara yoati tsi shina-huëjënayamacana. Jama, jahuëcara pi narishi tsi bëhoxcana. Bëhoxpama tsi Dios nicacana, “Gracias” iquiina. ⁷ Jatsi mato ranihuaxëhi quiha Dios ra. No cahëhai ca oquë-oquëria tsi xo toa noqui ja ranihuahaina. Toca tsi mato shina bo otoxëhi quiha, Jesucristo qui ma chitimiquë no.

Jia ca shinacana

⁸ Jarohari tsi mato shina qui jia ca jahuë bo roha tsi rëacana, ëbë xatë bá. Tobi xo toa jabija ca jahuë bo. Tobi toa noqui mëbihai ca jahuë bo. Tobi toa mëstëxëniiria ca jahuë bo. Tobi noqui noimahai ca shinajiaxëni ca jahuë bo ra. Tihí ca jahuë bo yoati tsi shinacana iquia.

⁹ Jasca, mato ë jabimani ca ë tiisimani ca jahuë bo ariacana. Noho chani, noho jabi, tihi cabo pi ma banahuano tsi mato bëtaxëhi quiha Dios, naa noqui Bëpasimati Ibo-iboria.

Filipó ca chahahuacanaibá Pablo qui ofrenda raanina

¹⁰ Ibo qui “Gracias” iquia, ëa ma mëbitëquëcatsai ca quëshpi na. Shoma xo ëa iquia. Jabi siri tsi ëa ma mëbicasni quiha, mahitsa. Toatiyá tsi ëa mëbiti xaba mato qui acacayamani quiha. ¹¹ Mato parayamaquia. Ea ma mëbicsai ca iqui tsi rani-raniquia, ë qui ma raani ca parata quëshpi tsi ja nomari. Naama tsi quiha jatiroha ca xabacá tsi raniti ë jabiniquë ra. ¹² Biniapihi tsi rani-raniquia. Toca tsi bësoti ë jabiniquë. Jasca pi narisyamahi tsi rani-raniquia. Tihi tsi cahëyoiquia. Nicaparicana. Jatiroha cató tsi jatiroha ca xabacá tsi raniti ë jabiniquë. Sëyapihi tsi raniquia. Paxnapiquí tsi raniti cahëquia toatiyá no. Biniayamapihi tsi rani-raniquia. Jama, biniapiquí tsi raniti cahëquia toatiyá ri. ¹³ Jatiroha ca xabacá tsi tënëti mëtsa xo ëa ra, ë qui Cristó ani ca chamá no.

¹⁴ Nëa ax tsi ë biniano tsi ëa mëbiriacasqui mato. Ja tsi xo toa mato qui “Gracias” iquia ra. Jiaria tsi xo toa ëa ma mëbicsaina. ¹⁵ Jabi naama tsi quiha, naa Dios Chani yoatí chitahëhuahax tsi quiha ë biniarianiquë Macedonia mai jisbayahax na. Toatiyá tsi ë qui iglesia huëtsa bá ofrenda ayamani quiha ëa mëbiti. Jaroha ca ëa mëbinish ca iglesia ca mato xo naa ra. Toa cahëqui mato. ¹⁶ Jaquirëquë quiha Tesalónica ë chitëno tsi dos, tres tsi quiha ofrenda bo ë qui ma raaniquë ëa mëbiti. ¹⁷ Jabi ë qui jiaria ini quiha toa mato ofrenda bo. Jama, jaha ë quëyoihai ca tsi xo toa mato cuenta ó ca ganancia bo maniahacahaina. ¹⁸ Jabi ë qui ma raani ca ofrenda, naa Epafroditó bëni ca ë biniquë ra. Ja iqui tsi narisyamaquia jaboqui. Shoma xo ëa ra. Jasca, ranihi quiha Dios ri iquia. E qui ma raani ca ofrenda tsi xo perojome jascaria ja qui. ¹⁹ Jia tsi xo toa ë bax ma anina. Ja iqui tsi jahuë Jesucristó tsi mato otoriaxëhi quiha Dios, ma narisyamano iquish na. Ati Ibo-iboria xo Dios ra. ²⁰ Noba Jahëpa Dios yoi no oquëhua-oquëhuapaono ra. Iquë.

Jaroha ca joihuahaina

²¹ Jatiroha ca Diós-na bo, naa Jesucristo qui chitiminish cabo joihuaquia. Mato joihuahi quiha nëa ca ë bëta ca xatë bo ri. ²² Jasca, mato joihuahi quiha Romá ca chahahuacanaibo ri. Joihuahi quiha nëa ca chama-chamaria ca yonati bo ri. ²³ Noba Ibo Jesucristó mato shomahuano. Iquë.

La Carta Del Apostol San Pablo a Los Colosenses

Colosás ca iglesia qui Pablo quēnēnina

¹ Naa carta quēnēhai ca Pablo ca ēa xo naa. Jabi Jesucristó ēa quēnaniquē jahuē Chani chitahēhuati ibo iti. Dios shina ja ini quiha. Mato joihuaquia. Jasca, mato joihuahi quiha ēbē xatē Timoteo ri. ² Jabi Colosás ca bamati-maxēniria ca chahahuacanaibo qui naa noba Chani raaqui noa. Noba Jahēpa Díos mato shomahuano. Mato ja ranihuano ra.

Chahahuacanaibo bax Pablo bēhoxnina

³ Noba Dios, naa noba Ibo Jesucristo Jahēpa qui bēhoxhi tsi mato quēshpi “Gracias” iroha-irohaqui noa. ⁴ Ma bamayamahai ca no nicaniquē ra. Cristo Jesu qui ma chitimiyoihaina, chahahuacanaibo huētsa bo ma noihaia, tihí cabo no nicaní quiha mato yoati na. Ja quēshpi tsi “Gracias” iriaqui noa ra. ⁵ Jasca, anomariaxēhi quiha toa mana xo tsi Díos mato shomahuariahaina iquia ra. Jaha pasoti mā chitahēhuani quiha, Dios jabija ca Chani jia ca ma nicaniquē no. ⁶ Anomaria tsi xo toa Chani ra. Jaboqui jatiroha ca maí tsi pacanahi quiha toa ma nicani ca Chani. Jia tsi nohiria ba jabi yoi jabitihuahi quiha, naa mato jabi ja jabitihuani jascaria. Toa Chani nicahax tsi ma mēbiriahacani quiha, cahēyoihax na. ⁷ Jabi naa Chani Epafras, naa no bēta yonocobēquinanish cató mato tiisimaniquē. Jia tsi mato xērēquē tsi no bax ja yonoconi quiha. Cristo yonati yoi tsi xo naa joni ra. ⁸ Espíritu Santó tsi ma noihaí ca yoati tsi noqui ja yoani quiha.

⁹ Jabi ma chahauanina, ma noihaia, tihí cabo nicaxo tsi mato bax bēhoxti no jēnēpistiayamarianiquē ra. Bēhoxhi tsi mato bax Dios ē nicahai ca tsi xo naa: Jariapari Díos mato mēbino, jahuē shina ati ma cahēyoino. Jaquirēquē mana ca tiisi mato qui ja ano. Toa nicaquia bēhoxquí na. ¹⁰ Jatsi Dios shina cahēyoihi tsi Iboha quinia jia ca ó tsi bēsopixēqui mato ra. Toca tsi Ibo ranihuarohaxēqui mato. Jasca, Ibo cahēyoiquí tsi yonoco jia ca saihuaxēqui mato, jatiroha ca ma acai cató no. Jatsi Dios tiisi ma cahēhai ca aniriano iquia. Toa nicaquia bēhoxquí na. ¹¹ Jatsi jahuē chama yoi tsi Díos mato coshluano ra, yosanahaxma tsi jatiroha ca tēnēti mētsa imano iquish na. ¹² Tēnēhi tsi rani tsi Jahēpa Dios qui “Gracias” icana. Ja tsi xo toa noqui rohahuanish cato ra. Jahuē mana ca oquē-oquēria ca jahuē bo xatēnacatsi quiha. Toa huēaria ca ití tsi mēstēhuahacanish cabo ya ixēhi quiha noa ra. ¹³⁻¹⁴ Jasca, Jahēpa Dios tsi xo toa yonamixēniria ca tsēmo quima noqui mēbinish cato. Mēbixo tsi quiha ja noihaí ca Baquē otohai ca qui noqui ja shitamani quiha. Jahuē Baquē iqui tsi noqui ja paquēmahaca tsi noba jocha ja masaniquē.

Jahuē Baquē rēsohai cató tsi nohiria bo xabahamati quinia Díos anina

¹⁵ Nicacahuē. Jisnoma ca Dios jaria yoi ca Jisiquimati Ibo-iboria xo Cristo ra. Jahá tsi Dios jabi yoi ca jismahacani quiha. Jasca, jatiroha ca nēhohuahacanish ca oquē-oquēria ca tsi xo naa ra. ¹⁶ Jahuē chamá tsi jahuē bo tēquē acacani quiha. Naipá ca jahuē bo, maí ca jahuē bo, noqui bēroria ca jahuē bo tēquē, tihí cabo Cristó nēhohuani quiha jahuē chamá no. Jasca, jisnoma ca jahuē bo, naa ángel bo, mana ca íbobo, mana ca yonacanaibo, mana ca chama bo, tihí cabo nēhohuahacani quiha jahuē chamá no. Jasca, ja bax jatiroha ca nēhohuahacani quiha. ¹⁷ Jahuēcara ca nēhohuahacanox pari no

tsi ja iniquë. Jaboqui jahuë chamá tsi jatiroha ca otohí quiha ra. ¹⁸ Jasca, iglesía ca chahahuacanaibo rëquëniniti ibo tsi xo, naa “Iglesia Mapo” i no aina. Jabi iglesía tsi xo toa jahuë yora, naa noqui Cristo banahuacanaibo. Jasca, jatiroha ca rëquë Chitahëhuati Ibo-iboria tsi xo naa. ¿Tsayayamacanaí? Jariapari ca bësotëquëmahanish ca tsi xo naa, rësohax na. Toca tsi jatiroha ca quiniá tsi jariapari ca oquë-oquëria ca Cristo manëniquë. Yama tsi xo toa oquë cato ra. ¹⁹ Dios tocani quiha jahuë Baquë ó tsi Dios jabi-jabiria chitëno. ²⁰ Jasca, jahuë Baquë yoi tsi quiha jatiroha ca yoshihuahacanish ca jahuë bo jahari Diós bëcasniquë jamë ca yoi ya rabënamati. Cruzó tsi jahuë Baquë rësohai cató tsi jatiroha ca naipá cabo, jatiroha ca maí cabo, tihí cabo Diós jiahuani quiha, ja bëta ja rabënacano iquish na.

²¹ Jahari mato carayanabo ri Diós bëniquë ra ja bëta rabënati. Naarima tsi Dios basi mato carayanabo i-ipaoni quiha. Toatiyá tsi Dios pasomaha ma i-ipaoniquë, jochahuaxëniria ca jabi ma jayapaoni ca iqui na. ²² Jama, jaboqui jahuë Baquë rësoni cató tsi Dios rabëti bo ma acacaniquë ra. Mato bax jahuë yora yoi tsi ja tënë-tënëni quiha. Jaha tsi jahuë Baquë iqui tsi mështëxëni ca quësohacatimaxëni ixëqui mato ra, Dios bësójó tsi ma niiquë no. ²³ Tocaxëti xo ra, chahahuacanaibo quinia ó tsi ma rëtsaquë no. Jasca, toa tiisimahacani ca xabahamati Chani ó tsi ma coshinaxëti xo. Anomaria tsi xo toa Chani ra. ¿Jatiroha ca nohiria bo qui yoahacayamayamahi ni? Jabi yonati iti ë quënahacaniquë toa Chani yoati.

Iglesia mëbiti Pabló quënahacana

²⁴ Dios Chani yoapama tsi mato carayanabo bax tënëti rani-raniquia. E qui jia quiha. Jabi ë tënëhai cató tsi iglesía ca chahahuacanaibo tënëhai ca jatihuati mëtsa pistia ca ëa xo naa. Jabi iglesía cabo, naa banahuacanaibo bax Cristó tënëriani quiha. Jatsi ja tënëhai ca qui ë tënëhai ca maniacasquia ëa ri anihuaxëna. ²⁵ Jabi chahahuacanaibo tëquë mëbiti ë quënahacani quiha ë qui Diós jahuë Chani aniquë no. Toa Chani nohiria bo qui ë boti xo. ²⁶ Jabi sirí tsi quiha, naa huëstima ca xënipa no tsi cahënoma naa Chani i-ipaoniquë. Jama, jaboqui jahuë nohiria bo qui naa Chani jismahi quiha Dios ra. ²⁷ Jabi Dios shina tsi xo naa: Jahuë nohiria bo qui naa jonë ca cahëhama Chani Diós jisiquimacasni quiha. Jaboqui carayanabo qui ri cahi quiha jahuë Chani ra. Jonë i-ipaoni quiha toa mato carayanabo bax Diós acasnina. Jama, jaboqui mato ó tsi xo Cristo. Ja iqui Dios oquë xatënaixëqui mato carayanabo ri.

²⁸ Jaha tsi jatiroha ca nohiria bo, naa jodiobo carayanabo tëquë qui Cristo Chani yoaquia. Yobapama tsi jatiroha cabo toa Chani tiisimaqui noa, jia tsi Cristo tiisi ja cahëyoicano iquish na. Cristo ó tsi jatiroha cabo shinahamacasqui noa. ²⁹ Noba yonoco yoi tsi xo toa. Jaha no quëëhai ca tsi xo toa Cristo ó tsi nohiria bo shinacoshi iquiina. Ja tsi xo toa yonoco-yonocoriaquia ë qui Cristó acai ca chamá no.

2

¹ Jabi anomaria ini quiha toa mato bax ë yonoconina iquia. Mato Colosás ca chahahuacanaibo, toá ca Laodiceá ca racacanaibo, jasca mato noho bërroma ca xatë bo, tihí cabo bax ë yonocorianiquë ra. Toa mato cahëmacasquia. ² Mato mëbiqia ra ma shinacoshinano iquish na. Jasca, oquë tsi mato nòinamacasquia ra. Mato tiisi anihuacasquia, Dios yoi, naa mana ca jisnoma ca Dios ma cahëyoino ra. Nicaparicana. Cristo yoi pi cahëquí tsi noba mana ca jisnoma ca Dios yoi cahëxëqui mato ra. Cristo tsi xo toa Diós yoi noqui Cahëmati Ibo-iboria. ³ Jasca, ja tsi xo toa Dios tiisi-tiisiria jaya

cato iquia. ⁴ Jama, tobi xo toa mato paracascanaibo, naa Cristo quima mato bèsomacascanaibo rë. Ma parahacayamano. ⁵ Jaboqui mato basi xo ëa rë, jama, mato tahë ca jascaria ca ë nori, mato bëta noho shina nori iqui na. Jaboqui jia tsi Cristo qui ma chitimihai ca jisquia. Ja iqui tsi rani-raniquia.

⁶ Jabi Cristo ma biniquë mato Ibo-iboria iti. Jiaria quiha. Jatsi jia tsi mato ja yonano ra. ⁷ Jabi nëmi tsi mai qui jahuë tapo raahi quiha jihui, jahuë chama bixëna. Jascaria tsi Cristo quima mato chama ma bino mato ri. Jahá tsi ma shinahaxëti xo. Oquë-oquëria tsi Cristo qui ma chitimixëti xo, naa ma tiisimahacani jascaria. Jasca, rani-raniriacana Diós mato shomahuahai ca quëshpi na.

Cristo ó ca jabi paxa cato

⁸ Quiniacaxëcahuë. Tobi xo toa mahitsa ca chani. Tobi xo mahitsa ca tiisi ri. Tihi cabá tsi ma parahacayamano. Cristo quima joyamahi quiha ja yoacanaina, nohiria ba jabi bo, nohiria bá shinahaina, tihi cabo quima ja nori. Mahitsa tsi xo toa ja yoacana ca tëquë iquia.

⁹ Nicaparicana. Mai tsi Cristo coquë tsi quiha jahuë yora yoi ó tsi Dios jabi-jabiria bèsóniquë. ¹⁰ Ja tsi xo toa Dios jabi-jabiria jayaria xo. Mana ca yonahai ca chama jaya ca ángel bo Rëquëniniti Ibo-iboria ca Cristo tsi xo naa. ¿Tsayayamacanaí? Anomaria tsi xo noba Cristo ra. ¹¹ Cristo qui ma chahahuaguë tsi quiha Cristó mato jibirishayoiniquë, mato jochahuaxëniria ca noma jabi ja përesiquë no. Cristo tsi xo toa mato mëbinish cato, joni bo nomari. ¹² Jabi toa ma jismahacani quiha ma ashimahacanicuë no. Toatiyá tsi Cristo ya mato jochahuaxëniria ca noma jabi maihuahacanicuë. Ja maihuahacacuë tsi quiha Cristo ya mato jabi paxa ca tëroniquë, chamaxëniria ca Dios qui ma chitiminiquë no. Jabi naa chamaxëniria ca Diós jahuë Baquë bèsomani quiha. ¹³ Chitimi-nox pari tsi quiha Dios qui bèsoyama jascaria ca ma i-ipaonicuë mato jocha iqui na. Toatiyá tsi carayanabo ma ini iqui tsi Dios yoba ma jayamani quiha. Jama, jahuë Baquë ja bèsotëquëmani jascaria tsi mato carayanabo Diós bèsomanicuë. Bèsomaxo tsi quiha mato jocha tëquë ja masanicuë. ¹⁴ Masaxo tsi quiha mato jocha cuenta ja nianiquë. Anomaria ini quiha toa jahuë yoba pasomaha ca no jochahaina ra. Jatsi cruzó tsi noba cuenta bo ja tooxanicuë. Jaboqui yama tsi xo ra. ¹⁵ Toca tsi Satanás noqui quësoti chama ja mëbioniquë. Mëbixo tsi jahuë crúz ca Baquë tsi jatiroha cabo qui Cristó bëboni ca jahuë bo ja jismaniquë ra. Achiqui cabo jascaria tsi Satanás, jahuë yonati bo, tihi cabo ja mëpini quiha jatiroha cabá tsayano.

¹⁶ Jatsi rëquë canomani ra. Jodioba yonamixëniria ca arati jabi bo quima ma paquëmahacanicuë iquia. Toa jabi bo namá tsi ma janahacayamano bësoti. “Pinoma xo toa; anoma xo naa; naa jodioba fiesta acana; tobi xo noba joiti bari bo” tihi ca yoba bo mato qui acani quiha banahuati. ¹⁷ Jato jodioba jabi bo roha quiha. Jabi jënima toa arati jabi bo i-ipaoni quiha ati, Cristo jonox pari no. Jama, huinocahai ca tëbaquishi roha ca toa jabi bo ini quiha. Tsayacahuë. Jahuë jaria-jaria xo Cristo ra. Jabi jahuë jaria-jaria jisiquiquë tsi quiha toa mahitsa ca jabi bo huinocanicuë. ¹⁸ Jatsi quiniacaxëcana. Toá ca jodiobá jabí-naxëniria cabá mato parayamano jato mahitsa ca chani no. Jato qui jiaria tsi xo toa ángel bo qui ja aracanaina pë. Toca ca nohiria bo tsi xo toa ja tënamëcana ca yoati tsi noqui yoarohacas-canaina iquia. Tihi cabo iqui tsi mato oquë ja nori ca quëscahuacani quiha pë. Jama, jato noma jabi iqui tsi mahitsa tsi xo toa ja shinacanaina ra. ¹⁹ Tsayacahuë. Cristo, naa noba Rëquëniniti Ibo-iboria banahuacasyamacani quiha rë. Ja qui ja riyyamacani quiha. Jabi Cristó noqui rëquëninino tsi coshinaqui noa, naa noqui Cristo

banahuacanaibo. Huësti ca yora jascaria xo noa ra. Toca tsi Dios qui jia ca quinia ó tsi shinahaxëqui noa, naa noqui Cristo banahuacanaibo.

²⁰ Jatsi ëa nicaparicana. Cristo ya tsi toa maí ca noma quinia bo qui ma rësoniquë. Rësopiquí tsi çjëniriauxo tsi toa maí ca jabi bo jari acascanai sa, xabahamahacaxëna? Toa jabi bo ó pi quëëquí tsi çjari chahahuayamacanaiba quinia banahuayamayamacanai rë? ²¹ “Toa ayamacahuë; toa piyamacahuë, toa motsayamacahuë” i pi jaca no tsi jato qui nicariaqui mato rë. Çjëniria ni sa? ²² ÇMahitsa ma ni toa jabi bo tëquë iquia? Chama yama xo toa yoba bo noqui mëbiti. Pihacati xo piti ra. Jabi joni ba yoba roha xo toa ja yoacanaina iquia. ²³ Jiaria ca yoba bo jaca nori ca ma shinamitsa; mahitsa jaca nori. Tsayacahuë. Bëronoma tsi xo toa yoba bo no banahuahaina pé. Ja iqui tsi noba noma jabi yonati mëtsa toa jabi bo nori ca quëscahuqui mato rë. Mahitsa ca xo iquia ra. Noqui mëbitimaxëneria ca xo.

3

¹ Cristo yahax tsi ma bësomahacanicuë iquia, jabi paxa ca mato qui Diós aniquë no. Ja tsi xo toa mana ca jahuë bo yoati tsi ma shina-shinaxëti xo. Jahá xo Cristo. Toá tsi Dios mënëcayá tsi jahuë tronó tsi tsaho quiha.

² Jatsi mana ca jahuë bo yoati tsi shinacana, maí ca jahuë bo nomari.

³ Jabi chahahuacanaibo manëhi tsi mato noma jabi qui ma rësoniquë. Jatsi çjënahuariahax raca maí ca jahuë bo ó ma quëëna? Jaboqui Dios ó xo mato, jahuë Cristo ya. ⁴ Jaboqui Cristo tsi xo toa mato bësomayoihaina ra. Jabi ja jisiquino tsi mana tsi ja bëta jisiquixëqui mato ri. Toa barí tsi jahuë oquë xatëanaxëqui mato ra.

Noba jabi siri — Noba jabi paxa

⁵ Jatsi mato ó ca jochahuaxëni ca jahuë bo ma namëxëti xo, naa mato noma jabi yoi cato. Jatsi anoma ca chotahai ca basicana. Yoi ca jahuë bo ayamacana. Jasca, mato noma jabi jaha quëëhai ca banahuayamacana. Jasca, parata ó quëëmixonëria ca joni iyamacana, ídolo bo qui arahai ca jascaria ja nori iqui na. Tíhi ca mato ó ca jahuë bo ma namëxëti xo. ⁶ Quiniacaxëcana. Naa jocha bo iqui tsi jahuë yoba nicamixonëria cabo copi-copixëhi quiha Dios ra. ⁷ Jaha bësocapa. Toca tsi ma bëso-bësopaoni quiha chahahuanox pari.

⁸ Jasca, jaboqui chahahuacanaibo ma nori iqui tsi naa jocha bo tëquë ma nixëti xo: caxahaina, itsisnahaina, tënëmacatsaina, joi ocahuahaina, anoma ca chanihaina, tihí cabo niacana iquia. ⁹ Jasca, quianabëquiyamacana. Anoma quiha. ÇMato jabi siri, naa yoi ca ma a-apaoni ca ma tsoboyamayamani?

¹⁰ Tsoboxo tsi quiha Dios jabi paxa ca ma sahuënicuë. Mato ó tsi xo toa jabi paxa iquia. Jatiroha ca bari tsi toa mato ó ca jabi paxa chamahuahi quiha mato nëhohuanish cato ra, jahuë jaria-jaria ma jayano iquish na. Tocahi quiha oquë tsi ma cahëyoino. ¹¹ Jaha tsi yama tsi xo toa Dios qui oquë cabo iquia. Ja qui jaharisi tsi xo carayanabo jodiobo tëquë. Ja qui jaharisi tsi xo papi cahëcanaibo, papi cahëyamacanaibo tëquë. Ja qui jaharisi tsi xo yonati yonatima tëquë. Yama tsi xo toa ja qui oquë cato. Jabi no cahëcasai ca tsi xo naa: ÇMato ó tsi bësohi ni Cristo? Toa cahëcasqui noa. Jatiroha ca chahahuacanaibo ó bësohi quiha ra.

¹² Jabi Dios nohiria bo xo mato ra. Noixo tsi quiha mato ja biniquë jahuëna bo iti. Ja tsi xo toa ma noixëti xo. Noiqui tsi jahuë jabi sahuëcana. Noiti jabi ma sahuëxëti xo. Shomahuati jabi ma sahuëxëti xo. Mamë ma oquëhuayamaxëti xo. Ishima ma iti xo. Mëri tsi ma yosanayamati xo. ¹³ Jasca, mëbinabëquicana. Mato qui tsohuëcaracá joi mërapino tsi jato yoi

ca shina-bēnocana iquia. Shinaparicana. ¿Mato yoi ca mato Ibobá shina-bēnoyamayamani? Jascaria tsi ma tocaxēti xo mato ri. ¹⁴ Tihī ca jabi jia ca qui noiti jabi ma maniaxēti xo ra. No noihai ca tsi xo toa jatiroha ca jahuē bo quētsomahaina, huēsti ca maxo iti. ¹⁵ Jasca, Díos mato ranihuahai cató tsi mato shina yonahacano iquia. Huēsti ca maxo iti ma quēnahacani quiha jia tsi racanabēquiti. Jatsi rani-ranicana iquia.

¹⁶ Jasca, mato shina ó tsi Cristo Chani rēamēriano ra. Tiisi yaxo tsi tiisimanacana. Jia tsi yobanacana Dios yoba ya. Ranihax salmos, himnos, quēquēti bo, tihī cabo Dios qui quēquēcana. ¹⁷ Jahuēcara ca ma acaina, ma iquiina, tihī cabo tēquē acana Ibo Jesu chamá no. Apama tsi Jahēpa Dios qui “Gracias” icana jahá no.

Chahahuacanaiba banahuahacaxēti ca yoba

¹⁸ Mato bēnē bo nicacana, ahui bá. Tocaxēti xo Ibo qui chitimicanaibo ra. ¹⁹ Mato ahui bo noicana, bēnē bá. Jato yonayamacana iquia. ²⁰ Mato nabo nicacana, xocobá. Toca tsi Dios ranihuaxēqui mato ra. ²¹ Mahitsa mato xocobo caxahuayamacana, jahēpa bá; ja yosanacamitsa iqui na. ²² Mato chama bo nicacana, yonati bá. Mato ó ja bēsoyamacano tsi jia tsi yonococana, naa mato ó ja bēsocanai jascaria. Jasca, shina jia ca yahax tsi jia tsi jato bax yonococana, Ibo ma chahahuacatsai iqui na. ²³ Jahuēcara aquí tsi ranixo tsi acana. Ibo bax yonocoqui mato, nohiria bax roha nomari. ²⁴ Shina-bēnoyamacana: Jia ca pi ma ano tsi mato copixēhi quiha mato Ibo. Ibo Cristo bax yonocoyoiqui mato ra. ²⁵ Jasca, copihacaxēhi quiha yoi ca acanaibo ri jato yoi ca quēshpi na. Yama tsi xo toa Dios copi quima paxacaxēcanaibo ra. Dios qui jaharisi xo nohiria bo tēquē.

4

¹ Jatsi quiniacaxēcana chama bá. Mēstē tsi mato yonati bo yonacana. Shinaparicana. Chama yoi jaya xo mato ri, naa mato naipá ca Chama.

² Jasca, bēhoxti jēnēyamacana. Bēhoxpama tsi bēsocana Dios qui “Gracias” iquiina. ³ Jasca, no bax ri bēhocxana, Jesucristo Chani jia ca yoati xaba Díos noqui ano. Jabi toa Chani tahēhax tsi preso xara xo ēa jaboqui rē. ⁴ Jatsi bēhocxana, bēroria tsi Cristo Chani ē yoano, naa ē yoaxēti ria.

⁵ Jasca, quinia jia tsi Dios cahēyamacanaibo quiri bēsocana. Jato bax jia ca ati xaba ma yoshihuayamano. ⁶ Jia tsi yosanahaxma tsi jato qui ma chanixēti xo. Chanixo tsi jia tsi jato quēbiti ma tanaxēti xo.

Jaroja ca joihuahaina

⁷ Joxo tsi ēa yoati tsi mato yoaxēhi quiha Tiquico, naa mato qui naa carta ja axēquē no. Naa joni noiriaquia ra. Jia tsi ēa mēbiriahi quiha, ē bēta xo tsi Dios yonoco abēquihaina. ⁸ Naa joni mato qui raaquia, ēa yoati tsi ja yoaxēhai cató tsi mato ja ranihuano iquish na. ⁹ Jasca, ja bēta shinajiaxēni ca xatē huētsa raaquia, naa Onésimo icanai cato. Mato jimibo quiha, Colosas quima ax ja joni iqui na. Jatiroha ca nēá ca acapijaha ca mato yoacaxēcani quiha.

¹⁰ Jarohari tsi mato joihuahi quiha ē bētá preso iquí ca Aristarco. Jasca, mato joihuahi quiha Bernabé chahi Marcos ri. Jabi Marcos yoati tsi naa yoba mato qui ē raani quiha. Jabi mato qui ja shishono tsi jia tsi toa joni joihuacana. ¹¹ Jasca, mato joihuahi quiha nēá ca Jesús Justo ri. Naa tres ca chahahuanish ca jodiobo roha tsi xo toa jaboqui ē bēta yonocobēquihaina Chama Dios bax na. Jia tsi xo toa ēa ja mēbicanaina.

¹² Jasca, mato joihuahi quiha Epafra, naa mato yaca ax jonish cato. Cristo yonati yoi xo jaa ri. Anomaria tsi xo toa mato bax ja bëhoxhaina. Bëhoxpama tsi Dios nicahi quiha mato shinahamati, jia tsi Dios shina ma nicariano iquish na.

¹³ Mato parayamaquia. Mato mëbiriacatsi quiha naa joni ra. Jasca, toá ca Laodicea, Hierápolis, tihi cató ca iglesia bo ri shinahi quiha. ¹⁴ Jasca, mato joihuahi quiha doctor Lucas noho rabëti yoi. Mato joihuahi quiha Demas ri.

¹⁵ Jasca, Laodiceá ca chahuacanaibo ë bax ma joihuano. Jasca, tobi Ninfas, jahuë xobó ca aracanaibo, tihi cabo ë bax ma joihuano. ¹⁶ Jasca, naa carta tsayaxo tsi Laodiceá ca iglesia ma nicamano. Jasca, Laodicea qui ë raani ca carta bicahuë tsayaxëna. ¹⁷ Jasca, Arquipo qui noho chani yoi ma ano. “Mi qui acacani ca yonoco jatihuahuë, naa jaha Ibo quëëhai cato. Mi jatihuaxëti xo” ii quiha Pablo i ja qui cana.

¹⁸ Mato joihuaquia ëa ri. Noho mëquë yoi tsi naa carta quënëquia ra. Jasca, ëa shinacana. Jari preso xara xo ëa rë. Díos mato shomahuano ra. Iquë.

Primera Carta Del Apostol San Pablo a Los Tesalonicenses

Chahahuacanaibo qui Pabló quēñēnina

¹ Tesalónica yacatá ca chahahuacanaibo joihuaqui noa, naa Pablo, Silvano, Timoteo. Noba Jahēpa Dios, noba Ibo Jesucristo, tihi cabá-na xo mato. Diós mato shomahuano. Mato shina ja bēpasimano. ² Jatiroha ca barí tsi mato bax Dios qui “Gracias” iqui noa ja qui bēhoxhi na.

³ Noba Jahēpa Dios bēsojo xo tsi ma ani ca shina-bēnoyamaqui noa bēhoxquí na. Ma chahahuani iqui tsi jia tsi xo mato jabi. Jasca, Dios ma noihai ca iqui tsi anomaria tsi xo toa ma mēbinabēquihaina iquia. Jasca, coshi tsi xo toa Jesucristo ó ma pasohaina. ⁴ Jabi mato noihi quiha Dios ra. Mato ja biniqué ra jahuē-na bo iti. ⁵ Jabi Chani jia ca mato qui no yoaqué tsi mahitsa ca chani mato qui ja iyamaniqué. Jama, chama ya noba chani ini quiha. Espiritu Santó tsi mato qui no chaniniqué iquia. Jabija ca mato no yoaniqué ra. Jasca, mato xērēquē no no tsi noba jabi jiā cabo ma jisniqué. Mato no mēbicasniqué ra. ⁶ Jaha tsi noba jabi, Ibo Jesu jabi, tihi cabo ma jabiniqué noqui tsayahax na. Jatsi Dios Chani ma chahahuaquē tsi quiha nohiria bá mato tēñemaniqué rē. Jama, shinaranixo Dios Chani ma biniqué Espiritu Santó no.

Mato jabi nohiria huētsa bá jisnina

⁷ Jatsi noba jabi, Ibo Jesu jabi, tihi cabo ma jabiniqué. Jasca mato jabi ri jabiniqué jatiroha ca chahahuacanaibo, naa Macedonia mai, Acaya mai, tihi cató ca racacanaibo. ⁸ Mato quima Ibo Jesu Chani rētsamini quiha. Jatsi mato iqui tsi Dios Chani Macedoniá cabá nicaniqué. Nicaniqué Greciá ca nohiria bo ri. Nēama ca jatiroha cató ca nohiria bá nicaniqué ma chahahuahai ca yoati na. Ja quēshpi tsi ma chahahuani ca jato no yoayamaniqué shishoquí na, ja nicacani nori iqui na. ⁹ Jama, mato ó ca no chitahēhuani ca yonoco yoati tsi noqui yoacani quiha pa. Yoaxo tsi ídolo bo quima Dios quiri ma bēsonina, bēsohai ca jabija ca Dios bax ma yonocohaina, tihi cabo yoati tsi noqui yoacani quiha. ¹⁰ Jasca, naipa ax jahuē Baquē johai ó ma pasohai ca yoati tsi noqui yoacani quiha ra. Tihi tsi xo toa ja yoacanaina mato yoati na. Jabi Diós jahuē Baquē Jesu bēsoťēquēmaniqué. Jabi anoma ca johai ca tēñētiya quima noqui xabahamanish ca Jesu tsi xo naa ra.

2

Tesalónica ax tsi Pabló yonoconina

¹ Mato qui shishohi tsi mahitsa no yonocoyamaniqué iquia, ēbē xatē bá. Mato ó tsi mahitsama noba yonoco ini ca cahēqui mato. ² Jariapari Filipos yacata xo tsi no tēñeniqué. Toa xo tsi noqui nohiria bá yosiniqué, mato qui no jonox pari no. Noqui ja acani ca cahēqui mato. Jama, Diós noqui mēbiniqué toatiyá no. Jaha tsi raquēhaxma tsi mato qui Dios Chani yoahi no joniqué, noqui pasomaha huēstima cabo iquē ri. ³ Johax jabija ca mato qui no chaniniqué iquia. Janyama ca quima joyamani quiha noba chani. Jabi yoi cabo no iyamaniqué mato qui chanihi na. Mato no parayamaniqué. ⁴ Jama, Dios qui jia tsi xo toa no acaina. Noqui jahuē Chani acacanicué yoati. Jaha tsi jahuē Chani nohiria bo yoaqui noa, noba Dios, naa noba shina Naisti Ibo ranihuaxēna. Jahuē Chani yoayamaqui noa, nohiria bo ranihuaxēna.

⁵ Nohiria bo ranihuati chani no yoayamani quiha jaha no quëëhai ca bixëna. Jasca, parahax no chaniyamaniquë mato parata bixëna. Noba jabi nori ca cahëqui mato iquia. No ani ca jisniquë Dios ri. ⁶ Jabi mato parata, nohiria huëtza bá parata, tihi ca ó no quëëyamaniquë. Jama, “Noqui copihuë” iti mëtsa no iniquë ra, Cristo Chani chitahëhuati ibo bo no nori ca iqui na.

Mato noiqui noa

⁷ Jama, mato xërëquë ax ishima no iniquë, naa jahëhuá jahuë baquë icohai jascaria. ⁸ Mato no noirianiquë. Noihax tsi Dios Chani jia ca mato bëta no xatënaniquë. Jasca, nomë mato qui no aniquë mato mëbixëna. Toca tsi no aniquë mato noiriaquí na. ⁹ Jasca, no yonocorianiquë noba oriquiti copixëna ra. No bamayamani quiha. Jabi no ani ca ma jisniquë, ëbë xatë bá. Baquicha, barihani, tihi tsi no yonocopaoniquë mato parata biyamaxëna. Mato qui yosa no icasyamani quiha. Toca tsi no aniquë ra, Dios Chani jia ca mato qui yoaqui na. ¹⁰ Mato chahahuanish cabo qui jia noba jabi iniquë iquia. Noba jabi ma jisniquë ra. Noqui cahëhi quiha Dios ri. ¿Jabi jia ca no jayamayamani? ¿Mëstë no iyamayamani? ¿Quësohacatimaxëni no iyamayamani? ¹¹ Shinaparicana. Jahuë xocobo yobahai ca jahëpa jascaria no iniquë ra. ¹² Yobapama tsi “Jabi jia ca ma yaxaxëti xo” i mato qui no ni quiha. Mato no chamahuaniquë. Chamahuahax “Dios ranihuahai ca quinia ó tsi ma bësono” i mato qui no niquë. Jabi Diós mato bënënaniquë, ja otohái ca iti qui ma jicono, jahuë jabi jia ca ma bino.

Dios Chani ja bicanina

¹³ Jasca, jia tsi Dios Chani ma bini iqui tsi “Gracias” iriaqui noa Dios qui. Noba chani nicaxo tsi ma chahahuaniquë ra. “Dios Chani tsi xo naa ra, joni bá-na nomari. Jabija xo ra” i ma ni quiha nicahax na. Jabi mato chahahuacanaibá shina ó ax tsi jia tsi yonocohi quiha Dios Chani iquia. ¹⁴ Jasca, jodioba maí ca Dios iglesia bo jascaria ma tënëniquë mato ri. Toá ca Jesucristo ó cabo chahahuayamanish ca jodiobá tënëmani quiha. Jascaria mato país ca jimi bá mato tënëmani quiha jato jascaria. ¹⁵ Ibo Jesu, Dios Chani yoanish cabo, tihi cabo namëti ibo bo jascaria ca xo iquia. Jasca, noqui ri ja raacaniquë jato mai quima. Dios qui anoma tsi xo toa ja acanaina. Jatiroha ca nohiria pasomaha ca xo ra. ¹⁶ Noqui ri jënëmacascani quiha pë, nohiria huëtza bo qui Dios xabahamati Chani no yoayamano. Toca tsi anihí quiha jato jocha ra. Jaboqui jato qui caxa xo Dios.

Tesalónicabo qui Pablo shishocasnina

¹⁷ Tanaroha pistia no tsi mato quima aquëquëxo tsi mato no shinaniquë rë. Mato jisbaya tsi jahari ë cacasniquë mato qui shishotëquëhi na. ¹⁸ Tihi ca tsi ë cacasni quiha canoma ë nori. Satanás ëa jënëmani quiha. ¹⁹ Jaha bësocana. Mato shina-shinaqui noa iquia. Noqui ranihuahuí mato ra. Jasca, Ibo Jesu jono tsi oquëxëhi quiha no ranihaina. Ma chahahuani iqui tsi noqui jia tsi copixëhi quiha Dios ja bësojó tsi no niixëquë no. ²⁰ Jia tsi noqui ocahuaxëhi quiha Dios iquia. Ma chahahuani iqui tsi rani-ranixëqui noa ra.

3

Timoteo, jahuë chani, tihi cabo tsi Pabló raanina

¹⁻² Jatsi mato no shina-shinaniquë. Shinahax, “¿Jato qui Timoteo raaxëhi ni noa ca?” i no niquë. Jatsi Timoteo, naa nobë xatë mato qui no raaniquë, mato ja chamahuano, ma chahahuahai ca ja mëbino. Jabi Diós bax yonocohi quiha naa joni ra. Jahuë yonoco tsi xo toa Cristo yoati tsi Chani jia ca yoabonahaina.

Raahax tsi ëmë ax Atenas yacatá tsi ë chitëniquë. ³ Nicacana: Nohiria bá pi mato tënëmano tsi mato mëbixëhi quiha Timoteo, ma shina-huëjënayamano iquish na. Tënëti ó no pasoxëti xo iquia, naa noqui chahahuacanaibo. ⁴ Jabi mato bëta ax tsi “Tënëxëhi quiha chahahuacanaibo ra” i mato qui ë niquë, ma tënëmahacanox pari no. Jabi toca tsi ja ini ca cahëqui mato. ⁵ Jatsi mato shina-shinahi tsi “¿Tënëcahi ni sa?” i no ni quiha. Jaha tsi Timoteo mato qui ë raaniquë, ocapihai ca nicaxëna. ¿Tonia Satanás mato jochamayamani ma ni? ¿Tonia mahitsa ë yonocoyamani ma ni? Tih tsi ë quëscahuani quiha.

⁶ Jama, jahari mato ó ax Timoteo johitaquë. Joxo chani jia ca ë qui ja bëhitaquë mato yoati na. Ma chahahuahaina, mabë xatë bo ma noihaina, ëa yoati jia tsi ma shinahaina, ëa ma jiscatsaina, naa mato ë jiscatsai jascaria, tih cabo yoati ëa ja yoahitaquë ra. ⁷ Jatsi jia tsi ma chahahuahai ca yoati nicahax ë rani-ranihitaquë nëa xo tsi tënë-tënëhi na. ⁸ Ibo Jesu ó pi coshi ma niino tsi shina-huëjënayamaxëquia. ⁹ Jaboqui anomaria tsi xo toa ë rani-ranihaina mato iqui na. Ja iqui tsi jaboqui Dios qui “Gracias” iti mëtsa xo ëa ra, ja qui bëhoxhi na. ¹⁰ Baquicha, barihani, tih tsi mato bax bëhoxquia mato qui Diós ëa raano. Mato jiscasquia rë. Tonia naris-hi quiha Dios ma cahëhaina iquia. Ja tsi xo toa mato qui cacasquia, Dios jahuë bo mato jabimahi na.

Jaha Pablo quëëhina

¹¹ Noba Jahëpa Dios, noba Ibo Jesucristo, tih cabá mato qui ëa raano ra. ¹² Jasca, Diós ma noihai ca anihuano, oquë tsi mabë xatë bo ma noino iquish na. Jatiroha ca nohiria ma noino iquia, naa mato ë noihai jascaria. ¹³ Diós mato shina chamahuano, jiaxëni ca quësetimaxëni ca ma ino iquish na. Tocapihi tsi noba Jahëpa Dios bësojó tsi jia ixëqui mato, jahuë ángel bo ya tsi noba Ibo Jesucristo joxëquë no.

4

Jocha pasomaha ca chani

¹ Jarohari tsi noba jabi tsayahax tsi bësoyoiti ma jabiniquë iquia, Dios ranihuaxëna, ëbë xatë bá. Jabi toca tsi bësoqui mato tonia. Jënima quiha. Jama, jaboqui mato yobatëquëqui noa. Oquë-oquëria ca jabi ma jayaxëti xo iquia Ibo Jesu janë no. ² Ibo Jesu chamá tsi mato qui ë chanini quiha. Mato qui ë ani ca yoba cahëqui mato iquia.

³ Jabi mato bax jaha Dios quëëhai ca tsi xo naa: Ma aquëquëxëti xo. Anoma ca chotahai quimamaxëti xo. ⁴ Ahui biti ma cahëxëti xo. Bixo tsi jiaxëni ca quiniá tsi ma otoxëti xo. ⁵ Jochahuaxëniria ca Dios cahëyamacanai ca carayanabo jascariyamacana. Yoyocani quiha pë ahui bihax na. ⁶ Jasca, parahax mato xatë bo pasomaha ma jochayamano, ahui bichi na. “Nëca ca jocha copixëhi quiha Dios” iquia, naa mato ë yobani jascaria. ⁷ Jabi Diós noqui quënyamani quiha jocha ó tsi bësoti. Jama, noqui ja quënani quiha mëstëxëni iti. ⁸ Dios yoba tsi xo naa ë yoahaina iquia. Nicacasyama-piquí tsi Dios yoba niahi quiha pë toa nicacasyamahai cato, joni yoba ja nori ca quëscahuaquí na.

Noiti chani

⁹ Jasca, çjënahuariaxo raca mabë xatë bo ma noihai ca yoati tsi mato qui ë quëñëna, noinati Diós mato tiisimani iqui na? ¹⁰ Jatiroha ca Macedonia maí ca xatë bo noiqui mato. Jama, “Oquë tsi jato noitsacana” iquia, ëbë xatë bá. ¹¹ Jasca, pasiroha racati ó quëëtsicana. Huëtsa bo yosiyamacana. Mato mëquënë tsi yonocotsicana, naa mato ë yoani jascaria. Tih tsi iquia yobahi

na. ¹² Tocapimano tsi mato jabi jia ca tahëxo tsi jia tsi ocahuaxëhi quiha chahahuayamacanaibo. Jasca pi yonocohi tsi biniyamaxëqui mato ra.

Ibo Jesu jotëquëhaina

¹³ Jabi jaboqui tsi rësonish cabo yoati tsi mato cahëmacasquia, chahahuayamacanaibo jascaria ma iyamano iquish na. Jato yoi bo pi rësono tsi cohuëriacani quiha, bësotëquëhai ca ó ja pasoyamacanaí quëshpi na. ¹⁴ Rësoniquë Jesu iqui noa. Rësohax ja bësotëquëniquë iqui noa. Jasca, tocacaxëcani quiha Jesu ó ca rësonish cabo ri. Jato bëxëhi quiha Dios jahuë Jesu ya.

¹⁵ Nicacana. Ibobá noqui yoani ca tsi xo naa mato qui è yoahaina. Noba Ibo bacano tsi maihuahacanish cabo rëquë tëronoyamaxëqui noa, naa noqui jari bëso cabo. ¹⁶ Jariapari tsi yonahai ca jói tsi quënaxëhi quiha Dios. Jatsi quënaxëhi quiha ángel-ángelria. Xoohacacaxëhi quiha Dios trompeta. Jatsi nai ax botëxëhi quiha Ibo yoi. Jatsi ja qui tëronoxëhi quiha Cristo ó rësonish ca chahahuacanaibo pari. ¹⁷ Jaquirëquë tëronoxëhi quiha noqui bësó cabo jato qui riixëna. Jatsi nai xo tsi noba Ibo bëchaxëqui noa ra. Jaquirëquë noba Ibo ya i-ipaoxëqui noa ra. ¹⁸ Mabë xatë bo ranihuatsacana naa chaní no.

5

¹ Jabi Ibo bacahai ca xaba cahëxëni xo mato, nobë xatë bá. Toa xaba yoiti tsi è quënëyamaxëti xo iquia. ² Jabi baquicha yomaxëni ca jascaria joxëhi quiha noba Ibobá xabaca. ³ Toatiyá tsi “Jënima xo noa. Yama tsi xo nianhaina” ixëhi quiha chahahuayamacanaibo. Jama, jotapixëhi quiha jato quëyohai ca bari, naa yoxá comahai ca pahë jotapihai jascaria. ⁴ Jabi tsëmo ó ma xo mato, èbë xatë bá. Mato ratiayamaxëhi quiha toa xabaca, naa yomaxëni cató ratiagai jascaria. ⁵ Huëana, barihani, tihí caba baquë bo xo mato ra, baquicha, tsëmo, tihí caba baquë bo ma nomari. ⁶ Jatsi quiniacaxëcahuë. Ja johai ca ó pasoyamahi quiha jochacanaibo; oxacanaibo jascaria jaca nori. Jama, jaha bësocahuë. Shomahuahacacahuë Ibo joihuaxëna. ⁷ Toca ma xo jochacanaibo iquia. Ja johai ca qui shomahuahacacahama ca xo rë. Baquichá oxacanaibo jascaria ca xo. Cahëtimaxëni ca xo iquia, pahëcanaibo jascaria jaca nori. ⁸ Jama, shomahuahaca ca no ixëti xo, barihani baquë bo no nori iqui na. Soldado no jascariano. Shipati quiniamati, manë shabi, tihí cabo sahuëcani quiha shomahuahacaxëna. Jascaria, Dios no chahahuariano. No noinabëquino. Jesucristo ó no pasono. Tocapihi tsi shomahuahacaxëqui noa noqui ri.

⁹ Díos noqui biyamaniquë, ja cacahai cató tsi noqui copixëna. Jama, noqui ja biniquë, noba Ibo Jesucristó tsi noqui xabahamaxëna. ¹⁰ No bax ja naniquë ra ja bëta no bësó-bësopaono iquish na. Jatsi shina-huëjënayamacana. Rësonish cabo, bësó cabo, naa noqui tëquë tëroxëhi quiha joxo na. ¹¹ Jaha tsi chamahuabëquinacana. Jasca, mëbinabëquitsacana, ma acai jascaria.

Jaroha ca yoba

¹² Mato iglesiá ca yonococanaibo jia tsi nicacana, iquia, èbë xatë bá. Iboha quinia ó tsi mato mëpicani quiha ra. Jasca, Iboha chamá tsi yobacani quiha mato quiniamaxëna. ¹³ Jato noicana. Jato chahahuacana jato yonoco iqui na. Jasca, jatiroha cabo ya pasiroha racanabëquicana iquia.

¹⁴ Jasca, nicamixëni cabo raahacana, èbë xatë bá. Cohuëxëni cabo chamahuacana. Chama yama cabo mëbicana. Jatiroha cabo qui yosanayamacana. ¹⁵ Nohiria bá pi mato yosino tsi jahari jato copiyamacana. Anoma quiha. Jama, mabë xatë bo, jatiroha ca nohiria bo, tihí cabo mëbicana.

¹⁶ Jasca, rani-ranipaocana. ¹⁷ Jatiroha ca barí tsi bēhoxcana. ¹⁸ Jatiroha ca jahuē bo qui “Gracias” icana. Jesucristó tsi jaha Dios quēēhai ca tsi xo toa mato bax na.

¹⁹ Jasca, Espíritu Santo yonoco nocahuayamacana. ²⁰ Dios Chani yoacanaibo ocahuayamacana. ²¹ Jama, jatiroha ca chani tanacana, jabija ca ja nori ca cahēxēna. Chani jia cabo roha nicacana. ²² Jatiroha ca yoi ca quimacana.

²³ Jabi Dios, naa noba shina pasimati Ibobá mato jiahua-jiahuario. Mato jabi, mato shinana, mato yora, tihí cabo tsi Diós otono, quēsotima ca ma ino iquish na, Jesu joquē no. ²⁴ Jabi mato ó bēsohi quiha Dios, naa mato quēnanish cato. Quiyamahi quiha.

Pablo joihuanina

²⁵ No bax bēhoxcana, ēbē xatē bá.

²⁶ Jasca, toá ca chahahuacanaibo jatiroha cabo joihuacana no bax na.

²⁷ Jatiroha ca chahahuacanaibo naa ē quēnēha ca carta nicamacana iquia, Iboha chamá no.

²⁸ Noba Ibo Jesucristó mato shomahuano. Amén.

Segunda Carta Del Apostol San Pablo a Los Tesalonicenses

¹ Tesalónica yacatá ca chahahuacanaibo joihuaqui noa, naa Pablo, Silvano, Timoteo. Noba Jahëpa Dios, noba Ibo Jesucristo, tihi cabá-na xo mato ra.
² Noba Jahëpa Dios, noba Ibo Jesucristo, tihi cabá mato shomahuano. Mato shina ja pasimacano.

Tënëhai ó no pasoxëti xo

³ Jiaria tsi anihi quiha ma chahahuahaina iquia. Jasca, anihi quiha ma noinabëquihaina. Ja tsi xo toa mato bax Dios qui “Gracias” iroha-iroha è ti xo, èbè xatè bá. ⁴ Jaha tsi mato jabi jia ca yoati tsi yoabonaqui noa Dios chahahuacanaiba iglesia bo xo na. Mato pasomaha nohiria bo iquiina, mato ja tènëmacanaina, jato qui ma yosanayamahaina, tihi ca tsi jato è yoani quiha ranixo na. ⁵ Jasca, ma tënëhai cató tsi noqui bëro xo Diós jia ca acaina. Jia tsi nohiria bo copixëhi quiha Dios ra. Jabi ma tënëhai cató tsi mato rohahuahi quiha Dios iquia ja otohai ca qui mato jicomaxëna.

⁶ Jasca, mëstë xo Dios. Mato yosicanaibo copixëhi quiha iquia. ⁷ Jasca, jia tsi mato tènëmahacahax cabo racamaxëhi quiha Dios, noba Ibo Jesucristo nai ax jisiquiquë no. Toa barí tsi jahuë ángel chamaxëni cabo ya joxëhi quiha, chihi ririhai cató ó no. ⁸ Jatsi Dios cahëyamacanaibo, noba Ibo Jesu Chani jia ca nicamixëni cabo, tihi cabo tsi copixëhi quiha Dios. ⁹ Anomariaxëhi quiha ja copihaina ra. Tënëtiyá tsi ihipaocaxëcane quiha rë. Jato copi quiha. Noba Iboba iti quima raahacacaxëcane quiha. Jahuë oquë-oquëria ca chama jisyamacaxëcane quiha ra. ¹⁰ Tocaxëhi quiha Dios ra Ibo joquë no. Toa barí tsi Ibo ocahuaxëhi quiha jahuë-na bo tëquë, “Jiaria tsi xo Ibo ra” iquiina. Jasca, toa barí tsi jato xërëquë ixëqui mato ri, mato è yoani ca chani qui ma chitimini iqui na.

¹¹ Ja tsi xo toa mato bax Dios qui bëhoxqui noa, jiaxëni cabo Diós mato manëmano. Jabi Diós mato quënani quiha jia ca ati. Jahuë chamá tsi mato ja mëbino iquia, ma acatsai ca jia ca jahuë bo tëquë ma ano iquish na. Jasca, ja qui ma chitimihai cató tsi mato ja mëbino, ma acai ca yonoco ma jatihano. ¹² Toca tsi mato bax bëhoxqui noa, mato ó tsi noba Ibo Jesucristo janë oquëhuahacano iquish na. Jasca, Ibo ó tsi ma oquëhuahacano mato ri. Noba Dios, noba Ibo Jesucristo, tihi cabá mato shomahuano.

2

Jochamixëni cato

¹ Joxëhi quiha noba Ibo Jesucristo, nobë xatè bá. Joxo tsi ja qui noqui catiaxëhi quiha. Tihi ca yoati tsi chaniparicasquia. ² Jishopë. Tobi toa paracanaibo, naa “Tsëquëniquë Iboba xabaca” iquii ca nohiria bo. “Toca tsi ì quiha Pablo chani, jahuë carta bo” ¿i cahi ni sa? Nëca ca chani nicahax shina-risiquiyamatsicana iquia. Raquëyamatsicana. ³ Nëca tsi tsohuëcaracá mato parayamano. Jabi jariapari joxëhi quiha xaba huëtsa bo ra, noba Ibo jonox pari no. Jariapari joxëhi quiha Dios pasomaha iquinatiyá. Jaquirëquë jisiquixëhi quiha jochamixëni ca joni, naa tënëtiya qui raahacati cato. ⁴ Jisiquixo tsi jatiroha ca Diós quënahacanish cabo, arati jahuë bo, tihi cabo

tsi pasomahaxëhi quiha pë naa jochamixëni cato. Jatsi Dios arati xobó tsi tsahoxëhi quiha pë. Tsahohax toá tsi “Dios xo ëa ra” ixëhi quiha pë.

⁵ ¿Mato ë yoani ca ma shina-bënoni pa? Ocapixëhai ca yoati mato ë yoaniquë mato bëta xo na. ⁶ Jaboqui tsi naa jochamixëni ca quëtiahi quiha jahuëcara ca chama, ja jisiquiyamano iquish na. Jari jahuë xaba ma xo ra. Jabi naa quëtiahai ca chama cahëqui mato iquia. ⁷ Jama, jaboqui jonë tsi yonocohi quiha pë. Jisiquiyamahi quiha. Ja jisiquinox pari no tsi tsëcahacaxëhi quiha jahuë yonoco quëtiahai cato. ⁸ Jatsi jisiquixëhi quiha toa yoixëni cato rë. Jatsi chamá tsi joxëhi quiha noba Ibo Jesu yoi ri. Joxo tsi bëro tsi toa yoixëni ca tëpasxëhi quiha ra. Quëyohacaxëhi quiha jahuë yonoco yoi tëquë.

⁹ Nicacahuë. Naa yoixëni ca jono tsi mëbixëhi quiha Satanás. Satanás chama jayaxëhi quiha pë. Joxo tsi jisti bo axëhi quiha nohiria bo paraxëna. Toca tsi nohiria bo paraxëhi quiha rë, Cristo ja chahahuayamacano iquish na. ¹⁰ Jasca, jatiroha ca quinia yoi bo axëhi quiha pë, tënëtiya qui bocanaibo paraxëna. Toatiyá tsi jabija ca chani ó quëeyamacaxëcani quiha nohiria bo rë, xabahamahacaxëna. ¹¹ Ja quëshpi tsi janyama ca chani jato qui raaxëhi quiha Dios, quiaxëni cabo ja chahahuacano. ¹² Jaha tsi jabija ca chahahuayamacanaibo, jocha ó quëëcanaibo, tihi cabo tsi tënëtiya qui raaxëhi quiha Dios ra.

Diós mato quënaniquë xabahamahacati

¹³ Mato bax Dios qui “Gracias” no i-ipaoxëti xo, ëbë xatë bá. Anomaria tsi xo toa Ibobá mato noihaina iquia. Jariapari tsi mato ja quënnani quiha xabahamahacati. Espíritu Santó tsi mato ja bahuëni quiha, jabija ca Chani qui ma chitimiquë no. ¹⁴ Jabi no yoani ca chani tsi Diós mato quënaniquë xabahamahacati, noba Ibo Jesucristo chama jia ca ma xatënano iquish na. Tihi ca quëshpi tsi ja qui “Gracias” iqui noa.

¹⁵ Japi chamacana, ëbë xatë bá. Mato no tiisimani ca yoba achariacana ra, naa mato qui no chaninina, carta ó tsi no quënnëna, tihi cabo. ¹⁶⁻¹⁷ Noba Ibo Jesucristo, noba Jahëpa Dios, naa noqui noinish cato, tihi cabá mato chamahuano. Mato ja mëbicano, jabi jia ca ma jayano. Jabi noba Jahëpa Diós noqui shina-ranihuapaono. Jia ca no bax ja ani quëshpi tsi jaha pasoqui noa ra.

3

No bax bëhoxcana

¹ Jarohari tsi no bax bëhoxcana, ëbë xatë bá, mëri tsi noba Iboha Chani rëtsamino. Jia tsi Dios Chani nohiria bá bino, ma bini jascaria. ² Jasca, no bax bëhoxcana iquia, caxacanaibo, yoixëni ca joni bo, tihi cabo quima Diós noqui xabahamano, noqui ja yosiyamacano iquish na. Jabi Dios Chani chahahuayamahi quiha jatiroha cabo rë. ³ Jama, noqui mëbicasqui Dios ra. Mato chamahuaxëhi quiha. Satanás pi mato yosino tsi mato ó bësöhi quiha ra. ⁴ Jasca, Ibo qui chitimiquí tsi mato no tiisimani ca jahuë bo axëqui mato iquia. Jiaxëhi quiha ma axëhaina iquia. ⁵ Noba Ibobá mato mëbino, Dios noihaina, Cristo tënëhaina, tihi cabo ma cahëyoino iquish na.

Yonocoti xo jatiroha cabo

⁶ Noba Ibo Jesucristo chamá tsi mato yobaquia, ëbë xatë bá. Chiquixëni ca chahahuacanaibo, noba yoba nicamixëni cabo, tihi cabo quimacana iquia. ⁷ Noba jabi ma banahuaxëti nori ca cahëqui mato. No chiquishyamani quiha mato bëta ax na. ⁸ Noqui ma orihuaquë tsi mato no copiniquë ra. Baquichá,

barihaní no yonocopaoni quiha noba oriquiti copixëna. Tihi ca tsi no aniquë ra mato yosanamayamaxëna. ⁹ Jasca, no tocani quiha banahuati jabi jia ca mato qui axëna. ¿Jabi mato oriquiti biti mëtsa no iyamayamani? Jama, copixoma tsi no biyamaniquë ra noba jabi jia ca mato jismaxëna. Noba jabi má banahuaxëti xo iquia.

¹⁰ Jasca, “Piyamaxëti xo toa yonococas-yamacabo” i è niquë mato bëta ax na.

¹¹ Jishopë. “Chiquixëniria ca xo. Yonocoyamacani quiha. Ranimisxëniria ca xo” i noquii quiha nohiria bo rè mato yoati na. ¹² Jabi noba Ibo Jesucristo chamá tsi nëca ca nohiria bo yobaquia. “Jia tsi ja yonocoxëti ca xo, jato oriquiti copixëna” iquia ra.

¹³ Jari jia tsi yonococana, ëbë xatë bá. Jia ca ati qui yosanayamacana iquia.

¹⁴ Tsohuëcaracá pi noba yoba niano tsi jaha bësocahuë. Ja bëta rabënyamacana jahuë jabi qui ja bërabino iquish na. ¹⁵ Jama, mabë xatë ja nori ca shina-bënyamacana yobaxo na.

Jaroja ca chani

¹⁶ Jatiroha ca xabacá tsi Cristó, naa noqui ranihuati Ibobá mato shinaranihuano. Mato bëtajano. ¹⁷ Jabi noho mëquënë tsi naa carta jatihuaquia mato joihuaquí na. E quënëhai cató tsi naa carta ibo Pablo nori ca cahëxëqui mato. ¹⁸ Noba Ibo Jesucristó mato shomahuayoino. Amén.

Primera Carta Del Apostol San Pablo a Timoteo

Timoteo qui Pabló quēnēnina

¹ Pablo ca ēa xo naa chani quēnēhaina.

Jesucristo yonati ca ēa xo naa. Jabi Dios, naa noqui Xabahamati Ibo, jatsi Jesucristo, naa jaha no pasohai cato, tihī cabá ēa raaniquē Chani Jia ca ē yoano. ² Mi qui naa chani quēnēquia, Timoteó. Noho baquē jascaria xo mia iquia, Ibo tahēhax na. Noba Jahēpa Dios, noba Ibo Jesucristo, tihī cabá mia shomahuano. Mía ja noicano. Mía ja ranihuariacano iquia.

Timoteo Pabló yobanina Chani yoi ca yoati na

³ Efesó tsi jari mi chitēno ra. Jabi “Mi tocaxēti xo” i mi qui ē ni quiha Macedonia mai qui canox pari. Toá xo mahitsa ca chani yoacanaibo rē. Anoma tsi xo toa ja yoacanaia iquia. Ja iqui tsi jato mi pasimano. ⁴ Jasca, tobi xo toa jato naborēquēba chani bo, jato janē bo, tihī cabo ja chanicanaina. Ja iqui tsi joi mēracasani quiha iglesiá ca nohiria bo ja tahēxo na rē. Anoma quiha. Dios quinia ó tsi noqui mēbiyamahi quiha toca ca chani iquia, oquē tsi Ibo qui noqui chitimimati.

⁵ Toca tsi toá ca xatē bo mi yobano, jato huētsa ja noiyoicano iquish na. Noiyoipiquí tsi bahuēhaca ca shinana, shina jia cato, tihī cabo ja jayaxēti ca xo. Jasca, jia tsi Ibo qui ja chitimiti ca xo, noicatsi na. ⁶ Jama, tobi xo toa naa quinia jia ca quima casocanaibo rē. Casohax bēnocani quiha, jato mahitsa ca chani naxērēquē no. ⁷ “Dios yoba yoati ibo bo xo noa” icani quiha; jato chani yoi cahētimaxēni jaca nori. ¿Jēnahuariaxo Dios yoba ja tiisimacana, cahētimaxēni ca ja icaquē no?

⁸ Japi quinia jia cató pi Dios yoba bo yoahacano tsi noqui mēbixēhi quiha Dios yoba iquia. Toa cahēqui noa. ⁹ Jama, noqui mēstēxēni ca nohiria bo qui toa yoba bo acayamani quiha, nicamixēniria ca nohiria bo qui ja acacani nori. Jabi tobi xo toa yoyocanaibo, gobierno pasomaha nianacanaibo, Dios pasomaha cabo, jochahuaxēni cabo, mēstēhuahama cabo, Dios yoba pasomaha cabo. Tihī cabo qui Dios yoba bo acacani quiha. Jasca, jato jahēpa, jahēhua, tihī cabo acanaibo, ati ibo bo, tihī cabo qui ja acacani quiha. ¹⁰ Jasca, anoma ca chotacanaibo, nohiria yomacanaibo, quiacanaibo, juez bēsojó tsi quiacanaibo, tihī cabo qui ja acacani quiha. Jasca, ē tiisimahai ca jia ca chani pasomaha cabo qui Dios yoba acacani quiha. ¹¹ Jabi ē tiisimahai ca tsi xo toa ē qui acacani ca Chani. E qui toa Chani noba chamaxēniria ca oquēria ca Diós aniquē ra.

Dios qui “Gracias” i Pablo nina

¹² Noba Ibo Jesucristo qui “Gracias” iquia, jahuē yonoco ati chama ē qui ja ani iqui na. Ea shinaxo tsi ēa ja biniquē pa jahuē yonoco ati. Ja iqui tsi ja qui “Gracias” iquia. ¹³ Chahahuanox pari tsi Ibo ē ocahuapaoniquē rē. Jasca, chahahuacanaibo ē tēnēmapaoniquē jato qui caxaxēniria ē ini iqui na. Jatsi Diós ēa shomahuaniquē, cahēhaxma tsi ē tocani iqui na. Toatiyá tsi jari Cristo qui ē chitimiyamani quiha. ¹⁴ Jama, anomaria ini quiha Ibobá ēa noihaina ra. Jatsi Jesucristo iqui tsi ja qui ē chitiminiquē ēa ri. Jaboqui noi-noiriaquia ēa ri.

¹⁵ Jabijaria tsi xo naa mato qui ë yoahaina iquia. Chahahuahacaxëti xo naa chani ra: Mai qui Jesucristo joniquë jochacanaibo xabahamaxëna. Jabi jato oquëria ca jochanish ca ëa xo naa ra. ¹⁶ Ja iqui tsi anomaria ini quiha Diós ëa noihaina. Jasca, noiquí tsi jahuë Jesucristo ë qui yosanayamahi ca ja jismacasni quiha nohiria bo qui. Toa quiniá tsi Ibobá noiyoihai ca cahëxëhi quiha ë cho chahahuacanaibo, naa bëso-bësopaocaxëcanaibo ra. ¹⁷ Jatsi jia tsi Dios yoi no ocahuapaoxëti xo. I-paohai ca rësotimaxëniria ca Chama-chamaria tsi xo naa ra. Jisnoma quiha. Jaroha ca Dios yoi tsi xo naa. “Oquëria ca tsi xo naa” i-ipaoqui noa. Iquë. Amén.

¹⁸ Mía yobacasquia, ëbë baquë, Timoteó. Siri tsi yosibá mi bax bëhoxni ca chani mi shina-bënoyamano. Jato yoba pi nicahi tsi jia tsi Ibo bax nianapixëqui mia tia. ¹⁹ Nianahax Cristo, naa mi chahahuahai ca quima mi casoyamano. Jasca, shina jia ca mi jayaxëti xo. Jabi tobi xo toa jato shinaná yoahai ca jia ca qui nicacasyamacanaibo. Ja iqui tsi yoshihuahacaxëhi quiha ja chitimicanaina rë. Jato shina pasomaha ca acani quiha pë. ²⁰ Jabi tocani quiha Himeneo, Alejandro ri. Ja iqui tsi Satanás qui jato ë mëaniquë ja copihacacano iquish na.

2

Arati jabi bo

¹ Noho jariapari ca yoba tsi xo naa: Nohiria bo tēquë bax no bëhoxti xo iquia. Bëhoxquí tsi Dios no nicaxëti xo jato ja mëbino. Jasca, “Gracias” i Dios qui ti no shina-bënoyamano iquia. ² Jasca, gobierno chama-chamaria bo, jato nama ca chama bo, tihi cabo bax no bëhox-xëti xo, jia tsi no racabëquinano. Quinia jia cató pi ja yonacano tsi oquëxëhi quiha toa Dios qui no arahaina, no yonocobëquinahaina, tihi cabo iquia. ³ Tihi tsi xo jia. Dios, noqui Xabahamati Ibo ranihuahai ca quinia tsi xo naa. ⁴ Nohiria bo tēquë xabahamacatsi quiha Dios. Jabija ca quinia jato cahëmacatsi quiha. ⁵ Jabi huësti roha tsi xo Dios ra. Jasca, huësti roha tsi xo toa Dios qui nohiria mëpiti ibo. Toa joni tsi xo Jesucristo ra. ⁶ Jamë ja aniquë nohiria bo tēquë copixëna. Dios qui xaba jia cató tsi ja raahacani quiha no jisno iquish na. ⁷ Ja tsi xo toa carayanabo qui ë raahacaniquë toa Chani tiisimati. Parayamaquia ra. Jato qui ë raahacani quiha jabija ca quinia yoati.

⁸ Nicacana. Jatiroha cabo ó ca joni bo bëhoxno iquia. Bëhoxquí tsi jocha yama ca mëquë bo ja tērocana. Caxacanaina, joi mëracanaina, tihi cabo quima ja aquëquëxëti xo, jia tsi bëhoxcatsi na. ⁹ Jasca yoxa bo ri. Jabi jia ca ja jayacano jato ri. Jayahi tsi quinia jia cató tsi ja jianacaxëti xo. Jasca, quinia jia cató tsi jato boo ja bohuëxëcano. Jasca, copixëniria ca oro ca jianati bo, moyo bo, raiti bo, tihi cabá tsi ja jianariayamano. Ja quiniacaxëcati xo iquia. ¹⁰ Oquë tsi xo nohiria bo ja mëbi-mëbicanaina. Ja tsi xo toa Dios qui aracanai ca yoxa bá axëti cato iquia. ¹¹ Jasca, ishima tsi ja nicacano, ja tiisimahacacaquë no. ¹² Jasca, joni bo yoxa bá tiisimayamaxëti xo ra. E qui yoi tsi xo toa joni bo ja yonacanaina. Ja pasixëti ca xo. ¹³ Jabi jariapari tsi Adán acacani quiha. Jaquirëquë Eva ja ani quiha. ¹⁴ Parahacayamani quiha Adán, yoxa roha ja nori. Parahacahax ja jochani quiha. ¹⁵ Jama, baquë comahi tsi xabahaxëhi quiha yoxa bo ri, quinia jia cató pi ja chitimicano. Jatsi ja noixëti ca xo. Mëstë ca jabi ja jayaxëti ca xo. Quinia jia tsi ja bësoxëti ca xo. Tihi tsi ayoxëti xo yoxa bo ra.

3

Jënixëti ni iglesía ca chahahuacanaibo ó bësocanaibo

¹ “Jia tsi xo iglesía ca rëquëniniti ibo iquina” icani quiha nohiria. Jabija tsi xo toa ja yoacanaina ra. Rëquëniniti ibo pi joni manëcasno tsi yonoco jia ca tsi xo toa jaha ja quëéhaina ra. ² Ja tsi xo toa quësohacatimaxëni ca ixëti xo iglesía ca rëquëniniti ibo. Huësti ca ahui roha ja jayaxëti xo. Jënë-naxëni, yoyoxëni, tihi tsi ja itima xo. Ja qui nohiria bá nicaxëti xo. Jasca, jahuë xobo qui nohiria bo ja jicomati xo. Jatsi tiisimati ja cahëxëti xo. ³ Pahëxëni, iquinaxëni, tihi tsi ja itima quiha. Jama, ishima, shinajiaxëni, tihi tsi ja iti xo. Jasca, parata noixëni ca ja itima quiha. Tihi ca jabi jiaxëni cabo jayaxëti xo toa rëquëniniti ibo bo. ⁴ Jasca, jahuë xobó cabo otopihai ca ja iti xo. Jia tsi jahuë xocobo ja jabimaxëti xo nicati. ⁵ Jia pi jahuë xocobo ototi cahëyamaquí tsi çjënahuariaxo raca iglesía cabo ja otona? ⁶ Jasca, chahahuabëna ca mi biyamano rëquëniniti ibo iti. Anoma quiha. Tocapimino tsi jamë shinamixëni ca ja manëmitsa ra. Tonia ja qui quësoxëhi quiha xatë bo, Satanás qui Dios quësoni jascaria. ⁷ Jasca, jia tsi chahahuayamacanaibo qui chanixëti xo rëquëniniti ibo. Jato qui jia ja iti quiha. Quiniacaxëcahuë. Ja qui pi ja quësocano tsi yoshini trampa qui ja paquëmitsa ra. Jabi toca ca tsi ixëti xo toa rëquëniniti ibo manëcatsai cato ra.

Iglesía ca mëbicanaibo

⁸ Jascaria tsi jabi jia ca jayaxëti xo iglesía ca mëbicanaibo ri. Paramixëni, jënë-naxëni, paratá-naxëni, tihi ca tsi ja itima ca xo ra. ⁹ Jama, jia tsi Cristo quinia ja banahuati ca xo, naa jato bërroma ca Cristo. Ja tsi xo toa ja qui ja chitimicanaina. ¹⁰ Jato binox pari tsi jato tanamahuë. Çjabi jia ca jayacahi ni? Tsayaparihuë. Yama jato pasomaha ca jahuë bo pi no tsi jato qui iglesía ca yonoco ahue. ¹¹ Jasca, jabi jia ca jayaxëti xo toa jato ahui bo ri. Ranimixëni, jënë-naxëni, tihi tsi ja itima ca xo, shinajiaxëni ca jaca nori. ¹² Jasca, huësti ca ahui roha ca ja jayati ca xo. Jato xocobo, jato xobó cabo, tihi cabo ototi ja cahëxëti ca xo. ¹³ Jia pi iglesía ca yonoco ja acano tsi jato oquëhuacaxëcani quiha chahahuacanaibo. Jatsi raquëhaxma tsi Jesucristo qui ja chitimicani ca yoati tsi chanipicaxëcaqui.

No chitimihaina

¹⁴ Mi qui cacasquia. ÇOxë huëtsa ma ni? Jama, jaboqui naa carta mi qui raaquia è bamamitsa iqui na. ¹⁵ Bapapihëno tsi Dios iglesía ca arati quinia mia jismaxëhi quiha naa è quënëhaina. Bësó xo chahahuacanaiba Dios iquia. Jasca, jato ó tsi xo Dios jabija ca Chani. Toa jabija ca Chani ó bësocani quiha. ¹⁶ Jabi anomaria tsi xo toa noba arati quinia ra. Yoanoma quiha. Nohiria yora ó tsi Dios coniquë. Mëstë ja iquí ca Espiritu Santó jismaniquë. Angel bá tsaya-tsyaniquë. Carayanabo qui jahuë Chani yoahacanicuë. Ja qui ja chitimicaniquë jato ri. Jaquirëquë mana nai qui ja tërohacanicuë.

4

Cristo quima casocanaibo

¹ Xaba rësó tsi Cristo quima casocaxëcani quiha huësti huësti cabo, parahai ca tiisimacanaibo nicacatsi na. Jato qui jiaxëhi quiha toa yoshini tiisimahaina. Tihi ca tsi noqui yoahi quiha Espiritu Santó. ² Jatsi quiniacaxëcahuë.

Quiacaxēcani quiha toa tiisimacanaibo. Parati cahēxēni ca xo. Parajahua-cano tsi jato qui quēsoyamahi quiha jato shinana rē, bēsoyama jaca nori iqui na. ³ Tiisimahi tsi “Anoma tsi xo ahui bēnē bichiina” icani quiha pē, jēnima ja nori. “Pinoma xo toa; pinoma xo naa” icani quiha pē, piti yoati na. Jishopē. Tihi cabo Diós nēhohuani quiha piti. Jasca, toa piti quēshpi tsi “Gracias” iqui noa Dios qui, naa noqui chahahuacanaibo. Noqui tsi xo toa jabija ca cahēcanaibo. ⁴ Nicacana. Jia tsi xo toa jatiroha ca Diós nēhohuanina. “Gracias” iipihi tsi “Pinoma xo toa” i no yamaxēti xo, bēhoxhi na. ⁵ Dios Chani, no bēhoxhaina, tihi cabo tsi xo toa piti shomahuahaina piti.

Jesucristo pastor jiaxēni cato

⁶ Tihi ca yoba bo pi mi xatē bo qui ahi tsi Jesucristo yonati jiaxēni ca ixēqui mia. Tocapimino tsi chahahuahacati ca Chani, Dios yoba jia cabo, tihi cabo cahēhai ca mi nori ca jismahacaxēhi quiha ra. ⁷ Jasca, mahitsa ca chani, yoyoxēni ca chani, tihi cabo quima basihuē. Jatsi quiniahuē. Oquē tsi xo toa mi shina coshihuahaina Dios quinia ó tsi bēsohai cató no. ⁸ Tsayahuē. Jēnima tsi toa no mohi-mohihaina noba yora coshihuati. Jama, oquē tsi xo toa noba shina coshihuahaina Dios quinia ó no. Tocapimino tsi oquēxēhi quiha mi bēsohaina jaboqui, rēquē ca xaba ri. ⁹ Nicahuē. Jabija tsi xo naa ē yoahana. Ja chahahuahacaxēti xo. ¹⁰ Bēsohai ca Dios qui chitimiqui noa. Maí ca nohiria bo, noqui chahahuacanaibo, tihi cabo Xabahamati Ibo-iboria ca tsi xo naa ra. Ja tsi xo toa yonocoria-yonocoriaquia Dios bax na.

¹¹ Tiisimaquí tsi tihi ca jahuē bo chahahuacanaibo mi amano. ¹² Jasca, mia nohiria bá ocahuayamano, shinapayo mi nori iqui na. Quinia jia cato ó tsi mi bēsono chahahuacanaibo bax na. Mi chani, mi jabi, mi noihaína, mi chitimihaina, mi yoyoyamahaina, tihi cabo tsayacaxēcani quiha. ¹³ Ea manapama tsi mi bamayamano. Quēnēhacanish cabo nohiria bo mi nicamano. Dios Chani mi yoano. Mi tiisimano. ¹⁴ Jabi Dios Chani yoatí tiisi jaya xo mia iquia. Toa tiisi mi shina-bēnyomano. Toa tiisi Diós mi qui ani quiha, Chani chitahēhuati ibobá mi nohó jato mēquē jananiquē no. Mi bamayamano ra.

¹⁵ Jatsi ē quēnēha ca yoba mi shinano. Mi tiisi tsi mi ariano, mi shinahacai ca nohiria bá jisno iquish na. ¹⁶ Jahuēcara ca ahi tsi quiniaxēhuē. Tiisimahi tsi jaha bēsohuē. Tocapiquí tsi mimē xabahamaxēqui mia. Jasca, xabahama-hacaxēhi quiha mia nicacanaibo ri.

5

¹ Joni yosibo raahayamahuē. Anoma quiha. Jato qui chanipama tsi jia tsi jato mi yobano, naa mi ipa mi yobahai jascaria. ² Jasca joni baquē bo ri. Jato rēquēmē jascaria mi iti xo iquia. Jasca, yoxa ēhuati bo qui chanipama tsi jato noihuē, mi ihua mi noihai jascaria. Jasca, yoxa jahi bo ri mi mēbino, naa mi yoxa ca mi mēbihai jascaria.

³ Jasca, bēnē imanish ca yoxa yoi bo mi shinano. ¿Tobi ni jato otohái cato? ⁴ Tsayahuē. Shinahacahax ca xocobo, chahitaxocobo, tihi cabo pi ja jayacano tsi jato ēhuati bo ja ototi ca xo iquia. Jato nabo mēbiti ja cahēti ca xo. Jato ó ca cuenta jahari ja copixēti ca xo, Dios qui jia ja nori iqui na. ⁵ Jama, tobi xo bēnē imanish ca yoxa noitiria cabo, naa jato ototi Ibo yama cabo. Dios qui chitimiyoicani quiha ra. Baquicha, barihani, tihi cató tsi bēhoxcani quiha. Dios qui jamē aquēquēcani quiha ja bax yonocoxēna. ⁶ Jama, tobi xo toa Dios shinayamahai ca bēnē imanish ca huetsa bo. Jahuēmishni bo roha shina-shinacani quiha pē. Bēsoyama ca jascaria ca xo naa bēso ca yoxa bo iquia. Jato mi mēbiyamano. ⁷ Tihi ca yoba iglesiá ca nohiria bo qui mi ano,

quësohacatimaxëni ja icano iquish na. ⁸ Dios quima casocani quiha toa jato xobó cabo otocasyamacanaibo. Tsohuëcaracá pi jahuë nabo, jahuë jimibo, tihi cabo mëbiyamano tsi chahahuayamacanaiba jocha oquë tsi xo toa jahuë jocha iquia.

⁹ Mato lista qui shinapayo ca bënë imanish ca maniyamahué. Sesenta año bo pari ja jayaxëti xo. Jasca, huësti ca bënë ya roha ja ini nori quiha. ¹⁰ Jasca, jia tsi nohiria bo chanixëti xo ja acai ca yoati na. ¿Jia tsi jahuë xocobo ja shinahamani? ¿Shishocanaibo otohí ni? ¿Dios nohiria bo shomahuahi ni? ¿Noitiria cabo, iquicanaibo, tihi cabo mëbihi ni? ¿Tihi ca yonoco jia ca acatsi ni? Tocapijano tsi iglesiá ca lista qui jahuë janë maniahué iquia.

¹¹ Jama, mato lista qui shinapayo ca bënë imanish ca yoxa maniyamahué. Tihi cabo tsi xo toa bënë huëtsa bicascanaibo. Jato noma jabi quiha. Cristo qui aquëquëhax tsi ja casomitsa pë bënë bixëna. ¹² Tocapijacano tsi noqui bërora tsi xo toa Cristo ja banahuayoicasyamahaina. ¹³ Jasca pi iglesiá cabá jato otono tsi ja chiquishcamitsa. Yonocoyamapihi tsi xobo bo topocotopococani quiha pë mahitsa. Topocohi tsi ranimiscaxëceni quiha tia. Anoma tsi xo toa ja tocacanaiba. ¹⁴ Jaha tsi è qui jia tsi xo toa bënë paxa ca ja bicanaina. Xocobo ja saihuaxëti ca xo. Jato xobó cabo ja otoxëti ca xo. Tocapijacano tsi yamatsixëhi quiha toa jato pasomaha ca chani iquia. ¹⁵ Jishopë. Iglesia quima huësti huësti ca casoni quiha Yoshi banahuaxëna.

¹⁶ Noho yoba tsi xo naa. Jato bënë imanish ca yoi bo chahahuacanaibá otoxëti xo iquia, jato jimibo ja icaquë no. Copixëni tsi xo toa jato orihuati gasto bo. Ja tsi xo toa iglesiá cabá jato mëbiyamano. Jama, toa bënë imanish ca yoxa noitiria cabo, naa jamë yoi cabo, iglesiá cabá mëbixëti xo iquia.

¹⁷ Jasca, doble ca sueldo copihacaxëti xo iglesiá ca rëquënicanaia ca yosibo. Dios Chani pi ja yoariacano tsi ja tiisimariapicano tsi jato qui chahahuacanaibo rani-raniriano iquia. ¹⁸ Nëcahi quiha Dios Chani ra: “Trigo bëro huëyë timano tsi jaranacati amayamacahuë” ii quiha. Jasca, “Copihacaxëti xo yonocohai cato. Sueldo ja bino” ii quiha.

¹⁹ Jasca, pastor qui nohiria quësono tsi quiniaxëhuë. Mi nicanox pari no tsi ja qui quësoxëti xo dos tres cabo pari. ²⁰ Pastor pi jocharohano tsi chahahuacanaibo bësojo xo tsi mi raahaxëti xo, tëxë bo raquëno iquish na. ²¹ Nicaparihuë. Dios, Jesucristo, jahuë ángel yoi bo, tihi cabo bësojo xo tsi mia yobaquia. Iglesia ca nohiria bo ó bësopama tsi jaharisi nohiria bo mi yobano ra. Yamaxëti xo toa mi qui oquë cato iquia. ²² Jasca, mëri tsi nohiria ó tsi mi mëquë janayamahué pastor amaxëna. Tocapiquí tsi jahuë jocha mi yopamitsa. Toca ca joni pi pastor mi ano tsi mi qui quësoxëhi quiha iglesia iquia. Nohiria huëtsa ba jocha xatënyamahué. Jocha quima tëquë basina.

²³ Jasca, mi poco ó quiniaxëhuë. Huëstima tsi xo toa mi iquihaina. Tobi quiha mi poco pahë. Jatsi jënëpaxa roha mi ayamano. Oriquiquí tsi oquë tsi xo vino pístia acaina iquia. Poco qui jia quiha.

²⁴ Jasca, huësti huësti ca joni ba jocha tsi xo noqui bërono ra. Jatiroha ca nohiria bo tsi xo cahëhaina. “Ja copihacaxëti xo ra” iqui noa. Jama, jonë tsi xo toa nohiria huëtsa bo jochahaina. Jari basi tsi xo jato copi. ²⁵ Jascaria pi jia ca huësti huësti cabá ano tsi noqui bërora tsi xo toa jia ca ja acanaina. Jasca, bërohuahacaxëhi quiha toa jonë ca acacanish ca jia ca jahuë bo ri.

¹ Jato chama bo nicaxëti xo chahahuahai ca yonati bo tëquë, Dios janë, Dios yoba, tihi cabo qui nohiria bo quësoyamano iquish na. ² Jasca, chahahuahai ca chama pi jayahi tsi ja yosanayamaxëti xo, jahuë xatë ja nori iqui na. Tihi ca yoba bo mi yoaxëti xo iquia, mi tiisimaquë no.

Mahitsa ca tiisimacanaibo

³ Quiniaxëhuë. Toá xo toa jamëri ca yoba yoacanaibo. Toá xo toa Ibo Jesucristo Chani nicamixëneria cabo. Chahahuacanaibo yoba quinia ma xo toa ja yoacanaina pë. ⁴ Jamë shinamixëni ca cahëtimaxëneria ca xo iquia. Joi mëramixëni ca xo pë. Jato iqui tsi tobi yosanahaina, iquinahaina, roamis-haina, mahitsa ca quësocanaina. ⁵ Jënëyamahi quiha rë joi ja icanaina. Tsayahuë. Yoshihuahacani quiha jato shinana. Jabija ca cahëyoitimaxëni ca xo iquia. Ganancia quëshpi roha tsi Dios Chani yoacascani quiha pë.

⁶ Jama, rico-ricoria ca xo chahahuacanaibo iquia. Jato ganancia tsi xo toa ja rani-ranicanaina. ⁷ Tsayahuë. ¿Mëquëya tsi naa mai qui no joyamani cohas na? Jasca, ¿jahuë boxëhi ni noa ra rësoxo na? Yama ra. ⁸ Jatsi oriquiti, sahuëti, tihi cabo pi jayahi tsi no ranixëti xo. ⁹ Jama, jocha qui paquëceni quiha ricocascanaibo. Trampa jascaria tsi xo toa rico ca iquiina. Parata iqui tsi yoi ca jahuë bo quiri bësocani quiha pë. Jatsi yoshihuahacacani quiha, yoi ca ó ja quëëhai cató no. ¹⁰ Quiniaxëhuë. Jatiroha ca yoi ca qui noqui mëpihi quiha parata noihaina ra. Ja iqui tsi Dios quima huësti ca casoni quiha parata noihi na. Jaboqui cohuëria xo jato shinana.

Raquëxoma tsi Dios Chani yoahaina

¹¹ Dios joni-joniria xo mia, Timoteó. Ja quëshpi tsi jatiroha ca yoi ca basihuë. Jia ca ati ó mi quëëno. Jatsi mëstëxëni ca jabi jayahaina, Dios noihaina, Ibo qui chitimihaina, nohiria noihaina, ishima iquiina, tihi cabo tsi xo toa jiaría cabo. Mi tocaxëti xo iquia. ¹² Jasca, bamahaxma tsi Ibo bax nianata. Mia ja quënani quiha bëboti, bëso-bësopaoxëti. Jabi toca tsi mi chitahëni quiha, chahahuacanaibo bësojo xo tsi mi chahahuani ca mi yoaniquë no. ¹³ Dios bësojo xo tsi, naa jatiroha ca Bësomati Ibo bësojo xo tsi mia yobaquia. Jasca, Jesucristo bësojo xo tsi, naa Poncio Pilato qui jabija ca chaninish ca bësojo xo tsi mia yobaquia: ¹⁴ Ibo Jesucristo manapama tsi jatiroha ca yoba bo nicana iquia. Quësohacatimaxëni mi ino Ibo jisiquixëquë no iquia. ¹⁵ Xaba jia cató tsi jahuë Cristo jisiquimaxëhi quiha Dios ra, naa jiaría ca Chama-chamaria. Jatiroha ca maí ca chama bo, chama-chamaria bo, tihi cabo oquëria ca tsi xo naa huësti ca Dios ra. ¹⁶ Ja huësti ca tsi xo toa rësotimaxëni cato. Jasca, anomaria tsi xo toa jahuë bajra-bajrahai ca oquë. Ja qui basimatimaxëni xo noa ra. Jasca, yama tsi xo toa Jahëpa Dios jisish cato, jisnoma ca ja nori iqui na. Toa Dios no oquëhuariano. Jatiroha cabo ja otopaono ra jahuë chama ya. Iquë. Amén.

¹⁷ Jahuë mishni bo jayaria cabo mi yobano. “Mamë shinamixëni iya-macana” ina jato qui. Jato parata qui ja chitimiyamacano ra, naamayamahai ca ja nori quëshpi na. Dios qui ja chitimixëti ca xo. Ja tsi xo toa noqui ranihuati jahuë mishni bo Ati Ibo-iboria. ¹⁸ Toa jahuë mishni jayaria cabo mi yobano tsi “Jia ca acana. Huashiyamacana” i jato qui cana iquia. ¹⁹ Tocapiquí tsi mana ca jahuë mishni bo jayacaxëceni quiha johai ca xabacá no. Jasca, tocapihi tsi nëá tsi bëso-bësoyoicaxëceni quiha iquia.

Jaroha ca yoba

²⁰ Jisa Timoteó. Quiniaxo tsi Diós mi qui ani ca yonoco mi ariano. Anoma ca yoi ca chani nicayamahuë. Toá ca mahitsá ca tiisi jaya cabo chanihai ca

quimahuë. ²¹ Jishopë. Tobi xo toa Ibo quima casonish cabo pë, toa mahitsa ca tiisi ó quëëhi na. Tihi tsi iquia mia yobahi na. Iquë. Diós mia shomahuano.

Segunda Carta Del Apostol San Pablo a Timoteo

Timoteo qui Pablo quënëhina

¹ Pablo, naa Jesucristo yonati tsi xo naa quënëhaina. Diós ëa raani quiha jahuë Chani chitahëhuati ibo iti. Jahuë Jesucristo qui nohiria bo pi chitimino tsi jato bësomapaoxëqui ra. Ja tsi xo noho chani. ² Naa carta mi qui raaquia, Timoteó, noho baquë yoi cató. Noba Jahëpa Dios, noba Ibo Jesucristo, tihí cabá mia shomahuano. Mia ja ranihuacano.

Jesucristo Chani yoahaina

³ Barihani, baquicha, tihí cató tsi bëhoxpama tsi Dios qui “Gracias” iquia mia quëshpi na. Jabi shina jia ca yahi tsi naa Dios-diosria bax yonocoquia, naa noba naborëquëbo ini jascaria. Dios ranihuacatsai ca ëa xo naa. ⁴ Jasca, bëho yaxo tsi mia shina-shinaquia, mi qui cacasquí na. ⁵ Jia tsi xo toa Dios qui mi chitimihaina iquia, naa mi ëhuati Loida, mi ihua Eunice, tihí cabo chitimini jascaria. Tihí tsi xo toa ë shina-shinahaina.

⁶ Dios bax yonocoti tiisi jaya xo mia iquia. Toa tiisi Dios mi qui ani quiha mi nohó mëquë ë jananiquë no. Toa tiisi chamahuahuë iquia ja nocayamano iquish na. ⁷ Jia tsi xo toa Diós noqui acaina. Chamaxëni ca shinana, noiti shinana, nohiria bo rëquënititi shinana, tihí cabo noqui aqui quiha, raquëxëni ca shina ja nomari. ⁸ Ja iqui tsi bërabiyamana Dios Chani yoahi na. Jasca, ë qui bërabiyamana, naa preso qui nanëhacanish cato. Jabi Dios Chani pi yoaquí tsi tënëxëqui mia ri, naa ë tënë-tënëhai jascaria. Tocapijano tsi mia chamahuaxëhi quiha Dios. ⁹ Anomaria tsi xo toa no bax Diós anina iquia. Noqui ja xabahamaniquë ra. Xabahamaxo tsi noqui ja quënaniquë jahuë yonoco mëstëxëni ca ati. Noqui, naa mëquëya ca noitiria cabo ja quënëni quiha jahuë yonoco ati. Shoma xo noa. Mai nëhohuanox pari tsi quiha Diós noqui shomahuaniquë jahuë Jesucristo ini cató no. ¹⁰ Siri tsi Diós acasni ca no cahëyamaniquë. Jama, jaboqui Jesucristo joní cató tsi jahuë planes cahëqui noa ra. Joxo tsi quiha rësoti chama ja quëyoni quiha. Jasca, jahuë Chani jia ca qui no chitimihai cató tsi noqui bëso-bësopaomahi quiha. Tihí ca tsi xo toa no cahëhaina jaboqui. ¹¹ Jasca, ëa Diós biniquë ra, jahuë Chani jia ca ë yoano. Ja iqui tsi jahuë Chani chitahëhuati ibo, carayanabo tiisimati ibo, tihí ca ëa xo naa ra. ¹² Jabi anomaria tsi xo toa ë tënëhaina naa Chani iqui na. Jama, toa Chani qui bërabiyamahai ca ëa xo naa. Jari yoacasquia ra, jahuë rëso qui ëa ja otoxëhai quëshpi na. E nohó bësoxëhi quiha iquia.

¹³ Mia ë tiisimani ca jahuë bo mi shina-bënoyamano. Jesucristo yoba mi chahahuayoino. ¹⁴ Quiniaxëhuë. Anomaria tsi xo toa Diós mi qui ani ca tiisi. Toa tiisi ó mi bësono ra, mi nohó ca bësohai ca Espiritu Santó no. Tihí ca tsi iquia mia yobahi na.

¹⁵ Jabi Asia maí ca chahahuacanaibá ëa jisbërianiquë pë, ë qui bërabiquí na. Jisbëriani quiha Figelo, Hermógenes ri. Ja acani ca cahëqui mia tia. ¹⁶ Jama, ë qui bërabiyamaniquë Onesiforo ra, presó tsi ë nori iqui na. Huëstima tsi ëa ja shinani quiha ëa ranihuaxëna. Jahuë xobó cabo Ibobá shomahuano. ¹⁷ Roma yaca qui cahëxo tsi quiha méri tsi ëa ja mëra-mëraniquë. Mërahax ë qui ja shishoni quiha. ¹⁸ Jaroha ca barí tsi toa joni Diós shomahuano ra. Jasca, Efeso xo tsi ëa ja mëbini quiha. Tihí ca tsi cahëqui mia iquia.

2

Jesucristo soldado jiaxëni cato

¹ Jisa, noho baquë, Timoteó. Mia chamahuati mëtsa xo Jesucristo ra. Jahá tsi mi chamano. ² Nicaparihuë. Jia tsi nohiria bo bësojo xo tsi ë tiisimani ca jahuë bo tēquë mi nicaniquë iquia. Jaboqui tihi ca jahuë bo Dios bax yonococascanaibo qui mi mëano, nohiria huëtsa bo ja tiisimacano iquish na jato ri.

³ Jasca, Ibo bax tēnēcanaibo yaxo tsi mi tēnēno mia ri, Jesucristo soldado iquiria. ⁴ ¿Jabi jahuë comandante ranihuacasyamaha ni soldado? Ja iqui tsi jamëri ca yonoco biyamahi quiha, soldado ja nori iqui na. ⁵ Toca xo deporte i-ihai ca ri. Deporte yoba bo pi nicayamaquí tsi ¿jēnahuaria xo raca premio ja bëbona? ⁶ Jasca, huai ca yonocohai ca ri. Jia tsi copihacaxēhi quiha toa huai ca yonocoxëni cato iquia. ⁷ Tihi ca jahuë bo mi shinano. Shinapimihuano tsi mia mëbixëhi quiha Dios jatiroha ca mi cahëyoino iquish na.

⁸ Jabi naa Chani jia ca mi shina-bēnoyamano, naa ë yoahai cato: Rësonish cabo quima Jesucristo tērohacaniquë iquia. Jaboqui bëso xo ra. Jasca, chama David चाहितखोकोबो ja ini quiha. ⁹ Jabi naa Chani tahēhax tsi preso qui ë nanēhacaniquë, naa yoixēniria cabo jascaria. Ea ti tsi xo toa mëchichó cato, nēxahacatimaxëni Dios Chani nori. ¹⁰ Japi naa Chani qui Diós bini cabo chitimino tsi jēnima tsi xo toa preso xo tsi ë tēnēhaina iquia. E qui jiaria tsi xo toa Jesucristó jato xabahamahaina iquia. Jahuë i-ipahai ca oquë xatēnacaxēcani quiha jato ri. ¹¹ Chahahuahacaxëti xo naa chani: Ja bëta pi noba noma jabi qui rësohi tsi ja bëta bësoxëqui noa.

¹² Tēnēpiquí tsi ja bëta xo tsi yonaxëqui noa.

¹³ Ja, pasomaha pi no chanino tsi noqui pasomaha chanixëqui.

¹³ Jama, janyama pi no cano tsi jari noqui noixëqui, jahuë yora xatē no nori iqui na.

Tihi tsi ñ quiha naa Chani jia cato.

Dios bax yonocoxëni cato

¹⁴ Tihi ca jahuë bo mi nicamano, Timoteó. “Anoma tsi xo toa mahitsa ca chani tahēhax iquinahaina” i nohiria bo qui na Dios jané no. Ja tocatima ca xo. Toca ca chani tsi yoshihuahacahi quiha pë nicacanaibo roha. ¹⁵ Jasca, yonocopama tsi mi aria-ariano mi qui Dios ranino iquish na. Yonati jiaxëni ca mi iti xo, naa jahuë yonoco qui bërabiyamahai cato. Jasca, jabija ca Chani cahëriaxo tsi mi tiisimati xo. ¹⁶ Jasca, mahitsa ca yoyoxëni ca chani quimahuë. Dios quinia quima noqui mëpihi quiha toca ca chani ra. ¹⁷ Microbios pacanahai jascaria tsi xo toa ja tiisimacanaina. Anoma quiha. Toca xo Himeneo, Fileto, tihi cabo. ¹⁸ Jabija ca quinia quima ja casocani quiha, “Tērohacani quiha rësonish cabo” iquiina. Ja yoacani ca iqui tsi huësti huësti ca chahuacanaibo yoshihuahacani quiha rē. ¹⁹ Jama, mohitimaxëni tsi xo Dios Chani ra, naa maxax चाहितखेनि jascaria. Ja cache jahuë xobo ahi quiha Dios. Toa ó tsi quēnhacani quiha jahuë chani ra. “Jahuë-na bo cahëqui Dios” ii quiha. Jasca, “Yoi ca quima casoxëti xo toa “Ibobá-na xo ëa” iqui cabo tēquë.

²⁰ Jatsi nicapa. Rico cato xobó tsi xo huëstima ca jamëri ca plato bo. Huësti huësti ca tsi xo toa oro, plata, tihi cabá tsi acacahax cabo. Huëtsa tsi xo toa jihui, matsaca, tihi cabá acacanihax cabo. Fiesta bari no tsi toa plato copixëni cabo tsēcahi quiha ibo. Bari huëtsa no tsi copiriama cabo tsēcahi quiha. ²¹ Jabi toa plato copixēniria cabo jascariaxëhi quiha toa yoi ca jahuë bo quima casohai cato. Jato bixëhi quiha Ibo ra jahuë oquëria ca yonoco ati.

²² Jasca, shinapayo ba jocha bo quima basihuë. Basixo tsi mështëxëni ca jabi, Dios qui chitimihaina, noihaina, rabënahëquihaina, tihi ca jahuë bo chahahuana. Toca ca jabi mi jayaxëti xo iquia Ibo qui parayamahai ca aracanai bo ya. ²³ Jasca, yoyoxëni ca jahuë bo pi nohiria chanino tsi jato basihuë. Toca ca chani tahëhax tsi caxacaqui nohiria pë, joi mëracsati na. ²⁴ Joi mërayamaxëti xo toa Iboya yonati, ishima tsi nohiria bo mëbihai ca ja nori. Jasca, yosanatimaxëni ca Dios Chani tiisimati ibo ja iti xo, naa Iboya yonati cato. ²⁵ Jahuë chani nicacasyamacanaibo yobapama tsi ishima tsi jato yobati ja cahëxëti xo. Tsayahuë. Toca ca nohiria ba shina Diós rarinamamitsa ra, jabija ca ja cahëyoicano iquish na. ²⁶ Yoshini jocha ca trampa pi paxaqui tsi jabija ca quinia banahuatëquë-caxëcani quiha iquia. Anoma tsi xo toa jato qui tsamihax ca Yoshini ra. Toca ca nohiria tsi xo toa Yoshini shina acaina rë.

3

Xabarëso

¹ Jaha bësohuë. Anomariaxëhi quiha xaba rëso iquia. ² Toatiyá tsi tobixëhi quiha huashicoxëni ca paratá-naxëni ca nohiria bo. Tobixëhi quiha jamë shinamixxëni ca Dios pasomaha cabo ri. Jato nabo qui nicayamacaxëcani quiha pë. Ranitimaxëni ca yoiria ca jabi jaya cabo tsi xo naa ra. ³ Jasca, tobixëhi quiha noitimaxëni cabo, shinacaxa cabo. Tobixëhi quiha roamixxëni ca caxaxëni cabo. Jato qui yoixëhi quiha toa jia cato. ⁴ Jato rabëti bo quima casocaxëcani quiha pë. Shina itsis jaya cabo tsi xo naa bo iquia. Jamë shinamixxëni ca xo. Dios quinia quima casoxo tsi jaha ja quëëcanai ca roha acani quiha pë. ⁵ Tsayahuë. Iglesia qui bocaxëcani quiha pë, Dios chama mëquëya cabo jaca nori. Nëca ca nohiria bo quima basihuë iquia. ⁶ Nëca ca nohiria tsi xo toa nohiria ba xobo qui jicocascana jato yoba yoi ca nicamaxëna. Jicoxo tsi toá ca jocha ihuë ca papihai ca yoxa bo, naa yoyoxëni cabo paracani quiha pë. Yoba paxa ca ó quëëmischëni ca yoxa bo tsi xo naa. ⁷ Jahuëcara paxa ca jabicascani quiha, jabija ca cahëtimaxëni cabo jaca nori. ⁸ Dios jabija ca Chani pasomaha tsi xo nëca ca tiisimacanaibo. Moisés yamaba chani pasomaha inish ca Janes, Jambres, tihi cabo jascaria ca xo. Yoiria tsi xo toa ja shinacanaina iquia. Cristo yoba quima ja casocani quiha. Mahitsa tsi xo toa ja qui ja chitimicanaina iquia. ⁹ Jaha bësopa. Jatiti basima tsi xo toa ja tocacanaina. Bërohuahacaxëhi quiha ja yoyocanaina iquia, naa Janes, Jambres, tihi caba yoyo nohiria bá jisni jascaria.

Pablo jaroha ca yoba Timoteo qui

¹⁰ Toca ca nohiria ë nomari ca cahëqui mia iquia, noho jabi yoi ca mi jisni iqui na. E acatsaina, Ibo qui ë chitimihaina, ë yosanayamahaina, ë noihaina, ë tënëhaina, ¹¹ ë rashahacahaina, tihi cabo mi jisniquë. ¿Antioquba, Iconio, Litra, tihi ca yacata xo tsi nohiria bá ëa acasyamayamani? Tihi cabo quima Ibobá ëa tsëcaniquë ra. ¹² Jaha bësopa. Tënëmahacaxëhi quiha Jesucristo yoba banahuacascanaibo tëquë iquia. ¹³ Jasca, oquënaxëhi quiha yoixëni caba jocha. Huëtsa bo parapama tsi parahacacaxëcani quiha jato ri.

¹⁴ Jama, mi tiisimani ca quinia ó tsi mi rëtsano. Jabija ca quinia ja nori ca cahëqui mia, ëa, naa mia tiisimanish ca mi cahëyoihai iqui na. ¹⁵ Jasca, Quënehacanish cabo mi tiisimahacaniquë, xocobo mi initya rohari. Dios Chani tsi xo toa tiisi-tiisiria ca mia amahaina. Diós noqui xabahamati quinia qui noqui mëpihai ca tsi xo naa, Jesucristo qui no chitimiquë no. ¹⁶ Jatiroha ca Quënehacanish cabo tsi xo toa Dios Chani yoi cato. Espiritu Santo chamá

tsi noqui ja acacani quiha. Jatsi Dios Chaní tsi jabija ca tiisimati mêtsa xo noa. Jahuë Chaní tsi yoi ca yoba bërohuati mêtsa xo noa. Jasca quinia jia cató tsi noqui mëpihi quiha, jabi jia ca no jayano. Jia tsi noqui yobahi quiha jahuë Chaní, mëstë inono. ¹⁷ Toa quiniá tsi rohahuahacaqui noa Dios bax yonocoti. Jaquirëquë jahuëcara ca yonoco jia ca tëquë aapi xo.

4

¹ Dios bësojo xo tsi jatsi Jesucristo, naa bësoyama cabo, bëso cabo, tihi cabo copihí joxëhai ca Chama-chamaria bësojo xo tsi Dios Chani yoahuë iquia. ² Jatiroha ca xabacá tsi jahuë Chaní mi yoano iquia. Xaba jia cato, xaba yoi cato, tihi cabá tsi mi yoaxëti xo. Ja nicascanaí cató tsi Dios Chani yoahuë. Yoaxo Iboha quinia qui jato mi mëpino. Yoaxo jochacanaibo mi yobano. Chahahuacanaibo mi chamahuano. Yosanaxoma tsi mi tiisimano. Tihi ca tsi mi ati xo Dios Chani yoaquí na. ³ Jaha bësopa. Tsëquëxëhi quiha toa jabija ca Chani nohiria bá nicacasyamahai ca xabaca rë. Toatiyá tsi jato ranihuati chani ó quëëcaxëcane quiha pë. Jaha quëëquí tsi tihiria ca tiisimacanaibo catiacaxëcane quiha jato chani nicaxëna. ⁴ Dios jabija ca Chani quima casoxo tsi anoma ca jato mahitsa ca chani chahahuacaxëcaqui. ⁵ Jaha quiniaxëhuë, quinia jia ca bixëna. Nohiria bá pi mia yosino tsi mi raquëyamanó. Dios Chani yoapama tsi Ibo qui nohiria bo mi bëbono. Tihi ca yonoco mi jatihuano, mi yonoco ja nori iqui na.

⁶ Nëca tsi mia yobaquia rësoti basima ë nori quëshpi na. Mana nai qui capaima xo ëa iquia. ⁷ Naama tsi xo toa Ibo bax ë nianahaina. Jatiquë noho yonoco ja bax na. Jasca, jari coshi tsi xo toa ja qui ë chitimihaina. ⁸ Tihi cabo quëshpi tsi premio ó pasoquia Ibo johai ca barí no. Toa barí tsi ë qui toa premio axëhi quiha Ibo, naa noqui Copiti Ibo mëstëxëni cato. Jasca, toa barí tsi copihacaxëhi quiha jaha pasocanaibo ri.

Jaroha cayoba

⁹ Jënimapino tsi mëri tsi ë qui mi jono. ¹⁰ Ea jisbërianiquë Demas rë. Maí ca jahuë mishni bo noihí tsi Tesalónica qui jahari ja caniquë. Jatsi Galacia mai qui Crescente caniquë. Jatsi Dalmacia mai qui Tito caniquë. ¹¹ Jaboqui ë bëta xo Lucas roha. Joopiquí tsi Marcos nëri mi bëno, ëa mëbiti mêtsa ja nori iqui na. ¹² Jasca, yama xo Tíquico. Efeso qui ë raani quiha. ¹³ Joquí tsi noho saco mi bëno. Troás tsi ë jisbëriani quiha, Carpo xobó no. Jasca, toá xo noho libro bo, noho papi bo. Tihi cabo ri mi bëyono.

¹⁴ Alejandro qui quiniaxëhuë, naa metal mëquixëni cato. Ea yosixëni ja ini quiha. Ja ani quëshpi tsi copixëhi quiha Ibo ra. ¹⁵ Toa joni qui quiniaxëhuë noba chani qui caxaxëniiria ja ini quëshpi na.

¹⁶ Jariapari ca xabacá tsi chama bo bësojó tsi ë chaniquë tsi yama ini quiha toa ëa mëbicatsai cato rë, naa ë bëta niicatsai cato. Jabayocaniquë jato tëquë. Ibobá jato copyamano iquia. ¹⁷ Jama, ëa tapai nii ini quiha Ibo yoi. Ea ja chamahuani quiha, raquëxoma tsi carayanabo qui jahuë Chaní ë yoano iquish na. Ja nicayocani quiha. Ibo iqui tsi cama qui ë niahacayamaniquë ra. ¹⁸ Raquëyamahai ca ëa xo naa. Jatiroha ca yoi ca quima ëa mëbixëhi quiha Ibo iquia. Mëbixo tsi jia tsi jahuë mana ca othai ca qui ëa boxëhi quiha. Ja qui oquë i-ipaxëti xo iquia. Iquë. Amén.

Joihuahaina

¹⁹ Prisca, Aquila, Onesiforó-na bo, tihi cabo joihuaquia. ²⁰ Yama tsi xo Erasto nëá no. Corintó tsi ë jisbëriani quiha. Jasca, yama xo Trófimo ri. Mileto

ja chitëni quiha iquihi na. ²¹ Jënimapino tsi nëri mi jono matsitiya jonox pari no. Jasca, mia joihuahi quiha Eubulo, Pudente, Lino, Claudia, nëá ca huëtsa bo tëquë.

²² Mi bëta Ibo Jesucristo ino. Mato tëquë Diós shomahuano. Iquë. Amén.

La Carta Del Apostol San Pablo a Tito

Tito qui Pabló quēnēnina

¹ Dios yonati ca Pablo ca ēa xo naa. Jesucristo Chani chitahēhuati ibo xo ēa ra. Ea Diós raaniquē ra, ja bini ca nohiria bo mēbiti, jabija ca ja cahēcano iquish na. Jabija ca arati quinia ó jato mēpixēhi quiha toa ja cahēhaina iquia. ² Jasca, bēso-bēsopaoti ó pasocaxēcani quiha jabija ca cahēhi na. Jabi siri tsi “Mato bēso-bēsopaomaxēquia” i Dios ni quiha, naa mai nēhohuanox pari. Quiayamaqui Dios. ³ Jatsi ja qui xaba jia ca tsēquēquē tsi Diós jahuē Chani nohiria bo qui jisiquimaniquē ē yoahai cató no. Jahuē Chani ē qui acacani quiha. Ja tsi xo toa Dios Chani yoaquia ra, Dios, naa noba Xabahamati Ibobá ēa raani iqui na. ⁴ Naa carta mi qui quēnēquia Titó, noho baquē yoi cató. Jaharisi tsi xo toa Ibo qui no chitimihaina iquia. Noba Jahēpa Dios, noba Ibo Jesucristo, naa noba Xabahamati Ibo, tihí cabá mia shomahuano. Mia ja ranihuacano.

Yosibo janahaina

⁵ Siri tsi Cretá tsi mia ē jisbērianiquē, mimē xo tsi no acama ca yonoco mi jatihuano iquish na. Toá ca iglesia bá tsi jari janahama ini quiha yosibo, naa pastor bo. Jatsi jatiroha ca yaca ó tsi yosibo mi janano. Janaquí tsi noho yoba mi shina-bēnoyamano. ⁶ Quēsohacatimaxēni ja iti ca xo iquia. Jasca, huēsti ca ahui roha ja jayati ca xo. Jasca, chahuacanaibo, naa yoyoyamahai ca xocobo jayati ca xo. Toca ca pastor bo mi janaxēti xo iquia, ⁷ Dios yonoco yoi jato qui acacani iqui na. Ja iqui tsi quēsohacatimaxēni ca joni bo ja iti ca xo. Jatsi jamē shinamixēni, caxatapihai cato, jēnē-naxēni, iquinacatsai cato, paratá-naxēni, tihí cabo biyamahuē. Ja tocatima ca xo. ⁸ Jama, nohiria bo qui joi amahai ca ja iti ca xo. Jia ca jahuē bo ja noiti ca xo. Jia ca ati ja cahēti ca xo. Mēstēxēni ca jabi ja jayati ca xo. Bamatimaxēni ja iti ca xo. Tihí ca jabi bo ja jayati ca xo iquia. ⁹ Jasca, coshi-coshirixēti ca xo toa Dios rarinatimaxēni ca Chani qui ja chitimicanaina, jia ca quiniá tsi Dios nohiria bo yobati mētsa ja icano iquish na. Jasca, Dios Chani pasomaha pi nohiria bo chanino tsi quēbiti ja cahēxēti ca xo.

¹⁰ Quiniaxēhuē. Tobi huēstima ca Dios Chani nicamixēniria cabo rē, naa jodioba jabí-naxēni cabo. Jato mahitsa ca chaní tsi Dios nohiria bo paracani quiha pē. ¹¹ Ja pasimahacaxēti xo iquia. Anoma tsi xo toa ja yoacanaina. Xobó ca nohiria huēstima cabo yoshihuahai ca nohiria bo tsi xo naa. Jasca, tiisimacani quiha pē parata bixēna.

¹² Jaha bēsopa. Toa Cretá ca nohiria bo ocahuani quiha jato ó ca maestro huēsti cato, naa jato jimibo. “Quiaxēniria tsi xo toa Cretá ca joni bo. Yohina caxa ca iquiria ca xo. Oriquití-naxēni ca chiquixēniria ca xo” i ja ni quiha jahuē jimibo yoati na. ¹³ Jabija tsi xo toa ja yoanina iquia. Ja tsi xo toa jato mi raahati xo, ja tocayamacano iquish na. Jia tsi Ibo qui ja chitimiti ca xo. ¹⁴ Jato pi mi raahayamano tsi jodioba mahitsa ca chani ja nicacamitsa iquia. Jabija ca quima casocanaibá yoahai ca ja nicayamacano.

¹⁵ Masahacanih cabo qui jia tsi xo jatiroha cato. Jama, masahama ca Dios cahēyamacanaibo qui yama tsi xo toa jia cato, jato shina yoshihuahacani quēshpi na. ¹⁶ “Dios cahēqui noa ra” icani quiha pē. Jama, ja acanai cató tsi

jisiquihi quiha jato jabi yoi bo. Yoiria ca nicamixxëniria ca nohiria bo tsi xo naa. Jia ca ati cahëyamacaqui iquia.

2

Yoba jia cato

¹ Dios yoba ixëti xo toa mi tiisimahaina, nohiria yoba ja nomari. ² Jasca, joni yosibo qui chaniquí tsi jia tsi jato yobana: Shinajiaxëni ca yoyoyamacanaibo ja iti ca xo. Jia ca ati ja cahëti ca xo. Coshi ixëti xo toa Ibo qui ja chitimicanaina. Nohiria bo ja noiti ca xo. Mëri tsi ja yosanayamaxëti ca xo. Tocaxëti xo iglesiá ca yosibo iquia. ³ Jasca yoxa yosibo ri. Jia tsi jato ri mi yobano: Dios quinia ó tsi ja bësoti ca xo. Ranimixxëni ca jënë-naxëni ca ja itima ca xo. Jasca, jabi jia ca ja tiisimati ca xo ja acai cató no. ⁴ Tiisimaquí tsi yoxa payo bo ja mëbixëti ca xo, jato bënë bo, jato xocobo, tihi cabo ja noicano iquish na. ⁵ Yoyo-yamahaina, jochayamahaina, xobó ca yonoco acaina, ishima iquiina, jato bënë yoba nicahaina, tihi ca jahuë bo yoxa payo bo ja tiisimaxëti ca xo, Dios Chani pasomaha nohiria bo chaniyamano iquish na.

⁶ Jasca joni shinapayo bo ri. Jato qui chaniquí tsi jia tsi jato yobana, ja yoyoyamacano iquish na. ⁷ Mi acai cató tsi jia ca ati jato ri jismana. Tiisimahi tsi mi yoyoyamano. ⁸ Jia ca chani, naa quësohacatimaxëni ca chani mi yoano, mia pasomaha cabo bërabicano iquish na. Tocapimino tsi noqui ocahuapiyamacaqui iquia.

⁹ Jasca yonati bo ri. Tiisimaquí tsi jia tsi jato yobana. Jatiroha cató tsi jato chama bo ja ranihuati ca xo. Jato chama bo ja ocahuayamano. ¹⁰ Jasca, jato chama ba jahuë bo ja yomayamati ca xo. Jama, shinajiaría cabo jaca nori ca ja jismati ca xo jatiroha ca ja acanaí cató no. Tocapijacano tsi oquëhuahacaxëhi quiha noba Xabahamati Ibo Dios Chani, no tiisimahaina, tihi cabo ra.

¹¹ Jaha bësopa. Jatiroha ca nohiria bo qui Dios noihai ca jismahacaniquë. Noiquí tsi jatiroha cabo xabahamacatsi quiha. ¹² Noqui ja noihai ca iqui tsi Dios pasoma ca jahuë bo, noqui ranihuahai ca jocha, tihi cabo quima no casoxëti xo. Casoxo tsi no yoyoyamaxëti xo. Jasca, naa jochahuaxëni ca maí tsi bësoti tsi Dios quinia ó tsi no bësono ra. ¹³ Tocanoti xo iquia noba Jesucristo manahi na. Jaha pasoqui noa. Jisiquixëhi quiha noqui Xabahamati Ibo, naa noba Dios-diosria. ¹⁴ Jamë no bax ja aniquë ra, jatiroha ca yoi ca quima noqui tsëcaxëna. Noqui rohahuacatsi quiha jahuë-na bo iti. Jochayama ca nohiria bo, naa jia ca acascanaibo noqui manëmacatsi quiha.

¹⁵ Tihi ca jahuë bo tiisimana, Dios nohiria bo yobaquí na. Janyama pi ja bocano tsi mi chamá tsi jato raahatsana, toa yoi ca ja niacano iquish na. Mi qui tsohuëcara nomayamano iquia.

3

Chahahuacanaibo jabi

¹ Chahahuacanaibo yobahi tsi nęcana: Gobierno chama bo ja nicaxëti ca xo, jato yoba axëna. Jatiroha ca xabacá tsi ja rohahuahacaxëti ca xo jia ca ati. ² Jasca, nohiria huëtsa bo ja ocahuayamano. Jama, huëtsa bo ya ja rabë nabëquixëti ca xo. Nohiria bo téquica ja shomahuacano. Tihi ca tsi ja acano.

³ Mi shina-bënoyamano. Chahahuanox pari tsi ¿yoyoxëni ca nicamixxëniria ca nohiria bo no iyamayamani, noqui ri? ¿Toatiyá tsi janyama no mëpilhacayamayamani? Jishopë, toatiyá tsi jatiroha ca jocha yoi cabá noqui

yonapaoniquë, naa yoi cabo ó no quëëni cato. Jocha ó tsi no bësopaoniquë ra. Anoma ini quiha toa no a-apaonina. Huëtsa bo qui caxaxëniria no i-ipaoniquë. Jasca, nomëria ri caxa no i-ipaoniquë, noqui ri. Toca tsi no i-ipaoniquë pë. ⁴ Jama, tocanono tsi quiha maí ca nohiria bo qui Dios, naa noba Xabahamati Ibobá noihai ca jisiquiniquë. ⁵ Noqui noiquí tsi noqui ja xabahamaniquë ra. Xabahamaxo tsi quiha noba yonoco jia cato, noba jabi jia cato, tihí cabo ja bicasyamaniquë. Jama, jënë tsi ashihai jascaria tsi no cotëquënikuë. Espíritu Santo chamá tsi noqui ja paxahuani quiha. ⁶ Anomaria tsi xo toa Diós noqui Espíritu Santo japahaina, noba Xabahamati Ibo Jesucristó no. ⁷ Noiquí tsi noqui ja mështëhuani quiha jahuë xocobo yoi noqui manëmaxëna. Ja iquí tsi bësó-bësopaoti ó pasoqui noa. ⁸ Jabi ja tsi xo naa ë yoahaina iquia.

Tihi ca jahuë bo iglesiá cabo qui mi yoano, Dios chahahuacanaibá jabi jia ca jayano iquish na. Bamaxoma tsi Dios yonoco ja ati ca xo. Tihi ca jahuë bo pí ja acano tsi shomahuahacaxëhi quiha nohiria bo tëquë iquia. ⁹ Jasca, mahitsa ca joi mërähaina, noba naborëquëbá quënëni ca janë lista bo, jodioba jabi bo, tihí cabo quimahuë. Mahitsa ca chanihai ca tsi xo toa bo. Noqui mëbitimaxëni ca xo toca ca chani ra.

¹⁰ Jasca, iglesiá ca nohiria pí tsohuëcaracá bëquëxno tsi dos tsi toca ca joni yobahuë ja jënëno. Yosibo qui pí ja nicayamano tsi toa joni ya ja rabënyamacano. ¹¹ Toca ca nohiria tsi xo toa yoi ca acatsaina. Jochahuaxëni quiha. Ja acai cató tsi bërohuahacahi quiha jahuë jocha iquia.

Acacaxëti ca jaroha ca yoba

¹² Artemas, Tíquico ma ni, naa huësti ca joni mi qui raaxëquia. Mi qui ja cahëno tsi Nicópolis yaca qui mi jono. Toá tsi chitëcasquia matsitiyá no.

¹³ Jasca, Zenas, naa abogadó cato, Apolos, tihi cabo mi mëbino, jia tsi ja bocano, ja narisyamacano iquish na. ¹⁴ Nohiria bo mëbiti jabiti ca xo Dios nohiria iquia. Anoma tsi xo toa no bama-bamahaina, mahitsa ca no acaina.

¹⁵ Mia joihuahi quiha ë bëtá cabo. Jasca, toá ca noqui noihai ca chahahuacanaibo mi joihuano. Diós mato tëquë shomahuano. Iquë. Amén.

La Carta Del Apostol San Pablo a Filemón

¹ Jabi mi qui naa chani raati ibo ca Pablo ca ëa xo naa. Nobë xatë Timoteo yaxo tsi mia joihuaquia, Filemón. Jasca, mia ri tsi xo nobë xatë ri, naa no bëta Dios bax yonocoriabëquihai cato. Jabi Jesucristo tahëhax preso qui ë nanëhacani quiha. ² Jasca, mi xobó ca catihai ca chahahuacanaibo, noba poi maxco Apia, nobë xatë Arquipo, naa no bëta yonocoriabëquihai cato, tihí cabo joihuaquia. ³ Noba Jahëpa Dios, noba Ibo Jesucristo, tihí cabá mato shomahuano. Mato ja ranihuacano ra.

Shinajiaxëni ca Filemón

⁴ Mi bax bëhoxpama tsi Dios qui “Gracias” iroha-irohaquia, mi jabi jia ca yoati ë nicani quëshpi na. ⁵ Jiaria tsi xo toa noba Ibo Jesu, toá ca chahahuacanaibo, tihí cabo mi noihaina iquia. Jasca, anomaria tsi xo toa Dios qui mi chitimihai ri. Tihí tsi nicahax “Gracias” iroha-irohaquia ranihi na. ⁶ Jasca, jaboqui Ibo qui mi chitimihai ca huëtsa bo qui mi yoaxëti xo iquia. Tocapimino tsi noqui Cristó shomahuariahai ca cahëyoicaxëceni quiha jato ri. Tihí tsi nicaquia jaboqui mi bax bëhoxquí na. ⁷ Jasca, mi noihi ca iqui tsi rani-raniquia ra. “Dios nohiria bo mëbi-mëbiriahi quiha Filemón” i ë qui jaca ni quiha ra, ëbë xatë. Jiaria tsi xo toa mi noihaina iquia.

Pabló bënanina

⁸⁻⁹ Noiriahai ca mi nori iqui tsi huësti ca jahuë pistia mia nicacasquia ë bax ati. Jabi Cristo ó ca chama jaya xo ëa, mia yonati, jia ca mia amati. Jishopë. Tocacasyama xo ëa. Jama, mia nicaquia. Shinaparihuë. Huësti ca joni siri cato, naa Jesucristo tahëhax tsi presó nori ca Pablo ca tsi xo naa mia nicahaina. ¹⁰ Néa tsi ë bëta tsi xo ëbë baquë Onésimo, mi jabahuanish ca yonati. Preso xo tsi naa joni ë bëboniquë Ibo qui. ¹¹ Jabi chahahuanox pari tsi quiha mahitsa ja i-ipaoniquë mi qui. Jama, jaboqui ëa mëbiriahi quiha; jasca, jaboqui mia mëbiriapixëhai ca ja nori. ¹² Jatsi jaboqui jahari mi yonati raacasquia. Jabi ja cano tsi cohuëxëquia tia. ¹³ Jasca, mi yonati chitiascasquia ra, mia ja ratino iquish na. Ea mëbiti mëtsaria xo mi yonati, presó tsi ë iquë no, Cristo Chani tahëhax na. ¹⁴ Jama, tocayamaxëquia ra, mi qui jia yama ja imitsa iqui na. Jasca, tocati mia ë nicarohano tsi noihauma tsi “ahuë” i ë qui mi quë aquë iquia. E qui yoi tsi xo toa acaina. Noba xatë bo no mëbixëti xo, noixo na. ¹⁵ Jabi siri tsi mi quima mi yonati jabani quiha. Jama, tanaroha pistia tsi xo iquia, jaboqui mi i-ipaohai ca yonati ja nori iqui na. Shoma ixëqui mia ja bacaquë no. ¹⁶ Bacahax yonati oquë-oquëria ixëhi quiha. Jaboqui mi bë xatë tsi xo ra. Jasca, anomaria tsi xo toa mi yonati ë noihaina. Tsayahuë. Mi yonati yoi jatsi Cristo ó ca xatë, tihí cabo tsi xo toa mi yonati jaboqui ra.

¹⁷ Mi rabëti pi ë no tsi jia tsi mi yonati joihuahuë, ëa mi joihuacatsai jasca cato. ¹⁸ ¿Tonia yoi ca mia pasomaha ja ayamayamani? ¿Mi nohó ca cuenta ja jayamayamani? Tocapijaquë tsi noho cuenta ó tsi janahuë ra. ¹⁹ Jahari mia copixëquia, naa Pablo cato. Jabi noho mëquë yoi tsi naa chani mi qui quënhëquia ra. Jasca, ¿ë nohó ca cuenta jayamani mia ra? Toa nicaquia. Jatsi shinaparihuë. Mi shina yoi ë qui mi axëti xo ra mi bax ë ani quëshpi na. ²⁰ Ja iqui tsi jia tsi jahari mi yonati mi joihuano, ëbë xatë. Jatsi Ibo tahëxo tsi ëa ranihuahuë, mi Cristo ó ca xatë ë nori quëshpi na.

²¹ Jabi tocaxëqui mia tia. Ja iqui tsi raquëxoma tsi naa chani mi qui quënëquia. Tonia mi yonati cahëno tsi mia ë nicahai ca oquë tsi jahari bixëqui mia tonia. ²² Quënëpama tsi ë bax chitëti iti mi shomahuano. Toa mia nicaquia. Preso quima tsëquëti ó pasoquia mi qui caxëna, ë bax mi bëhoxhai ca iqui na.

Chani rëso

²³ Mia joihuahi quiha ë bëtá ca Epafra. Jesucristo tahëhax preso xara xo naa joni ri, ëa jascaria. ²⁴ Jasca, nëá xo ë bëta yonocobëquicanaibo huëtsa bo, naa Marcos, Aristarco, Demas, Lucas. Mato joihuacani quiha tihi cabo ri.

²⁵ Noba Ibo Jesucristó mia shomahuano. Iquë. Amén.

La Carta a Los Hebreos

Jaboqui tsi noqui chanihi quiha Dios jahuë Baquë yoi no

¹ Siri tsi quiha noba naborëquëbo qui Dios chanipaoniquë. Toatiyá tsi quiha joni bo, naa jahuë Chani yoacanaibo ja raapaoniquë nohiria bo qui. Toca tsi Dios Chani nohiria bá nica-nicapaoni quiha toatiyá no. Huëstima ca jato qui ja yoani quiha toca ca quiniá no. ² Jama, jaboqui, naa jaroha ca bari tsi quiha jahuë Baquë yoi Diós raaniquë noqui chaniti. Jabi jahuë Baquë yoi Diós bini quiha jatiroha ca ibohuati. Jasca, jahuë Baquë yoi tsi naa mai, naipa, jahuë bo tēquë, tihi cabo Diós nēhohuaniquë. ³ Jahuë Baquë tsi xo toa Dios oquë-oquëria jismahaina ra. Jasca, Dios jabi yoi, jahuë jaria, tihi cabo jaya ca tsi xo naa. Jahuë chani tsi jatiroha ca otoi quiha. Ja tsi xo toa noba jocha quima noqui bahuënish cato. Noqui bahuëhax tsi quiha jahuë mana ca iti bichi ja caniquë. Jaboqui mana ca Chama-chamaria mēnēcayá tsi tsho xo.

Angel bo oquë xo Dios Baquë

⁴ Jabi ángel bo oquë-oquëria jahuë Baquë acacaniquë ra. Tsayacahuë. ¿Angel ba janë oquë ma ni jahuë janë ra? “Dios Baquë” ja quēnahacani quiha. Toa janë tsi jahuë ángel bo quēnahacapistiayamariani quiha.

⁵ “Noho Baquë yoi xo mia ra:

Jaboqui oquë, chama, tihi cabo mi qui axëquia”

¿i huësti ca ángel qui Dios ni pa? Iyapapistiariajani quiha. Jasca,

“Noho Baquë xo mia ra;

Jaboqui mia oquëhuaxëquia”

¿i huësti ca ángel qui Dios ni pa? Iyamahi quiha. ⁶ Jama, mai qui jahuë baquë yoi raapama tsi,

“Noho Baquë yoi bēsojó tsi mēnixëti xo ángel bo tēquë”

i Dios ni quiha.

⁷ Yonati bo roha ca xo. Jabi ángel bo yoati tsi Dios chanini tsi xo naa:

“Jahuë ángel bo, naa jahuë yonati bo manēmahi quiha Dios, yoshini, chihi, tihi cabo jascaria iti”

ii quiha ángel bo yoati na.

⁸ Jama, nēca tsi jahuë Baquë chama yoati tsi Dios chanini quiha:

“Naama-naamapaoxëhi quiha mi otohaina, Diós,

Mëstë tsi jatiroha cabo yonaxëqui mia ra.

⁹ Jia ca ati noi qui mia ra.

Tsohuëcaracá pi yoi ca ano tsi caxa xo mia.

Ja tsi xo toa mia biquia, naa mi Ipa Dios.

Ja tsi xo toa mi rabëti bo tēquë oquë tsi mia shomahuaquia ra”

i jahuë Baquë qui Dios ni quiha.

¹⁰ Jasca, “Ibo” jahuë Baquë quēnahacani quiha ra, naa,

“Jariapari tsi mai mi nēhohuaniquë, Ibobá”

i ja qui Dios niquë no.

Jasca,

“Naipá ca bari, oxë, huishti bo, tihi cabo mi aniquë mi chamá no.

¹¹ Huësti barí tsi yamatapixëhi quiha mi nēhohuanina.

Jama, chitë-chitëpaohai ca mia xo naa.

Raiti jascaria tsi sirinaxëhi quiha toa mi nëhohuanina.

¹² Toa naipá ca jahuë bo biquirihaxëqui mia ra, naa colcha biquirihacacahai jascaria.

Jama, mia ri tsi xo jaharisiria.

Rarinayamaqui mia.

Yama tsi xo mi año rëso ra”

nëa tsi jahuë Baquë qui Dios nëcani quiha.

¹³ Jasca,

“Noho mënëcayá tsi tsahona”

¿i jëni ca ángel qui Dios ni pa?

“Mi qui caxacanaibo bëboxëquia jato mi yonano”

¿i ángel qui Dios ni pa?

Iyamahi quiha.

¹⁴ Jabi Dios ángel bo tsi xo toa jahuë yonati bo roha. Jahuë Chani bocani quiha. Jasca, noqui ja raahacani quiha, naa noqui mana ca qui bocaxëcanaibo mëbiti.

2

Quiniacaxëcahuë Dios xabahamati quinia quima ma casoyamano

¹ Jabija tsi xo naa ë yoahaina ra. Ja tsi xo toa no tiisimahacani ca jahuë bo no chahahuaxëti xo iquia, jabija ca quima casoyamaxëna. ² Siri tsi Maca Sinaí xo tsi Dios Chani ángel bá yoaquë tsi jabija ca toa Chani ini ca jismahacani quiha. Toatiyá tsi jato copi yoi bini quiha toa Chani nicamixëneria cabo ra. ³ Jatsi shinacahuë. ¿Jënahuariahax Dios copi quima no paxana, jahuë xabahamati Chani yoi ca no chahahuayamaquë no? Jabi jariapari tsi quiha Dios xabahamati Chani Ibo Jesú yoaniquë. Jaquirëquë Jesu Chani nicanish cabá noqui yoaniquë. Yoaxo noqui ja parayamacani quiha. ⁴ Jasca, toatiyá tsi quiha jahuë Chani qui jisti bo Diós manianiquë. Jatsi anomaria ca jisti bo ja acani quiha Dios Chani yoaquí na. Jasca, Espíritu Santo nohiria bo qui Diós aniquë, naa ja qui jia cabo qui.

Joni Jesu manëhina

⁵ Naa mai nëhohuaquí tsi quiha ángel bo qui yonati chama Diós ayamaniquë, naa ixëti nori ca mai yonati. ⁶ Toa chama nohiria bo qui ja ani quiha. Toa noqui jismahi quiha Quënëhacanish cabo ra. Nëcahi quiha:

“Jisa Diós. ¿Noqui nohiria yoi bo shinahai pa?

¿Noqui rësohai ca nohiria bo tëquë otocatsai pa?

⁷ Nohiria nëhohuaxo tsi quiha xaba pistia tsi ángel bo nama noqui nohiria bo mi jananiquë.

Janaxo tsi quiha nohiria bo qui oquë, chama, tihí cabo mi aniquë ra.

⁸ Axo tsi jatiroha ca yonati chama nohiria bo qui mi ani quiha”

ii quiha Quënëhacanish cabo ra. Nicacahuë. Diós nohiria bo aniquë “jahuë bo tëquë yonati”. Toca tsi ii quiha ra. Jasca, “Ja yonacati xo” ii quiha ra. Jama, tsayacahuë. ¿Jatiroha ca yonahi ni nohiria bo ra jaboqui? Ayamacani quiha.

⁹ Jama, tobi xo Jesu ra. Xaba pistia no tsi ángel nama tsi ja janahacani quiha jaa ri, joni ja manëquë no. Ja tsi xo toa jaboqui chama, oquë, tihí cabo jaya cato ra. Jatiroha ca yonahi quiha nohiria bo bax ja rësoni iqui na. Diós noqui noini iqui tsi jatiroha ca nohiria Jesu ratiniquë jato bax nati.

¹⁰ Jabi huëstima ca baquë yoi bo mana Diós bëcasniquë. Bëcatsi tsi jariapari tsi quiha jahuë Baquë yoi Diós rohahuaniquë nohiria bo Rëquëniniti Ibo-iboria iti. Tocaniquë jatiroha ca Nëhohuanish ca Ototi Ibo-iboria ra. Jabi

tënëmahai cató tsi jahuë Baquë ja rohahuani quiha. Ja tsi xo toa nohiria bo Xabahamati Ibo-iboria manëti mëtsa jahuë Baquë ini quiha. ¹¹ Jabi Jesu tsi xo toa jocha quima noqui nohiria bahuëhai cato. Noqui tsi xo toa mëstëhuahacahax cabo. Jatsi Jesu, noqui nohiria bo, tihi caba Jahëpa yoi tsi xo Dios. Jasca ca Jahëpa jaya xo noa, naa Jesu, noqui nohiria bo tëquë ra. Ja tsi xo toa noqui bërëbiyamahi quiha Jesu, noqui jahuë noma bo quënati.

¹² Quënëhacanish cabo ó tsi nëcahi quiha noqui yoati na:

“Mi jabi yoi yoati tsi chanixëquia noho noma bo qui, Díos.

Chahahuacanaibo xërëquë xo tsi mia oquëhuaxëquia”

i Dios qui Jesu ni quiha.

¹³ Jasca, iti huëtsa ó tsi

“Noho noma bo yahax tsi Dios qui chitimixëquia ëa ri”

i Jesu ni quiha. Jasca,

“Nëá xo ëa ra, ë qui Díos ani ca xocobo ya”

i ja ni quiha.

¹⁴ ¿Tsayacanaí? Dios xocobo yoi bo xo noa ra, naa noqui nohiria bo. Jabi nami, jimi, tihi cabá tsi no acacani iqui tsi noqui nascaria tsi quiha Jesu ri manëniquë joni manëhi na. Jasca, noba jabi ja biniquë. Toca tsi joni manëhi tsi rësoti mëtsa ja ini quiha. Jabi rësoyamarohapixo tsi quiha çjënahuariaxo raca Yoshi ja quëyoquë ani? Toca tsi rësomati ibo-iboria chama quëyoti mëtsa Jesu ini quiha. ¹⁵ Rësoxo tsi quiha nohiria bo ja paquëmaniquë, rësohai ca qui ja raquëyamacano iquish na. ¹⁶ Tsayacahuë. Noqui chitimicanaibo, naa Abraham yamaba chahitaxocobo yoi bo mëbihi Jesu joniquë, ángel bo mëbiti ja nomari. ¹⁷ Ja tsi xo toa joni Jesu manëni quiha jahuë noma bo jaharisi ixëna. Japi joni manëyamarohahax çjënahuariahax nohiria bo noihai ca mëbicansai ca Arati Ibo-iboria ja manëni? Jaboqui jia tsi Dios yonoco ahi quiha. Tocaniquë Jesu, ja rësohai cató tsi nohiria ba jocha copihacaxëno iquish na. ¹⁸ Ja tënë-tënëni quiha. Jasca, jochati ja tanamahacani quiha. Jama, ja jochayamaniquë. Ja tsi xo toa noqui nohiria mëbiti mëtsa xo ra, no jochayamano, noqui jascaria ja tanamahacani iqui na.

3

Moisés oquë xo Jesu

¹ Jisa ëbë chahahuahai ca xatë bá, naa mato Dios quënahacanish cabá. Jesu shinaparicana ra. Ja tsi xo toa Díos noqui raani cato, naa noba Arati Ibo-iboria iti. ² Jia tsi quiha ja qui Díos ani ca yonoco ja aniquë, siri tsi Moisés Dios yonoco ani jascaria. Toatiyá tsi jia tsi Dios arati jabi Moisés otóni quiha nohiria bo xërëquë xo na. ³ Jabi Dios arati jabi obëso ca roha Moisés ini quiha. Ja tsi xo toa Moisés oquë-oquëria xo Jesu, Dios arati jabi chitahëhuati Ibo-iboria ja nori quëshpi na. ⁴ Jabi chitahëhuati ibo jaya xo jatiroha ca arati quinia. Jama, jatiroha ca nëhohuanish ca tsi xo Dios, naa noba Jesu. ⁵ Siri tsi quinia jia cató tsi quiha jahuë nohiria bo Moisés yamabá otóniquë. Toatiyá tsi quiha rëquë ixëti nori ca jahuë bo nohiria bo qui ja chaniniquë. Chanipama tsi Dios yonati roha Moisés ini quiha. ⁶ Jama, Moisés oquë xo Cristo, Dios Baquë yoi ja nori iqui na. Yonati ma xo ra, nohiria bo Obësoti Ibo-iboria ja nori. Noqui, naa Dios xocobo ó bësoriahi quiha. Jabi noqui otoxëhi quiha jahuë rëso qui, noba Ibo qui no chitimiquë no. Jatsi jaha no pasohai ca quima no casoyamano ra.

Jahuë nohiria bo joimacatsi quiha Dios

⁷ Oquë-oquëria ca Jesu nori iqui tsi ja qui no nicaxëti xo ii quiha Espiritu Santo Quënëhacanish caba ó no:

“Jaboqui jahué joi pi nicahi tsi

⁸ ja quima casoyamacana naa Dios quima mato naborëquëbo casoni jascaria. Toatiyá tsi nicamixëñiria ja icani quiha, xabacha xo tsi ëa ja yosanamacanicquë.

⁹ ‘Toa xo tsi ëa yosanamaquí tsi quiha ëa ja chahahuacasyamacanicquë rë’ ii quiha Dios.

Ja tocanicquë rë, cuarenta ca año no tsi jato ë mëbihai ca ja jiscaquë ri.

¹⁰ Ja tsi xo toa toa nohiria bo qui ë caxanicquë.

Caxahax,

‘E quima casoroha-casorohacani quiha pë.

Noho yoba bo banahuacasyamaca xo’ i ë niquë.

¹¹ Caxahi tsi,

‘Jato bax ë shomahuani ca joiti iti qui jicopistiyamariaxëhi quiha naa nohiria bo ra’ i ë niquë”

nëa tsi Espiritu Santo nëcane quiha Quënëhacanish cabo ó no. ¹² Japi quinia-caxëcahuë, ëbë xatë bá, yoixëni ca chahahuatimaxëni ca shina ma jayamano. Bëso-bësohai ca Dios quima mato casomaxëhi quiha toca ca ma shinahai ca tonia. ¹³ Jama, tobi xo xabaca ra, Dios joiti iti qui jicoti iquia. Japi jatiroha ca barí tsi quiha, naa jaboqui mëbinacana, jochá mato parayamano iquish na. Paramixëñiria xo jocha ra. Dios quima noqui casomacatsi quiha. ¹⁴ Jabi Cristo yahax tsi Dios jahué bo xatëmaxëqui noa, jia tsi jahué rëso qui ja qui chitimipihí na, naa bëbo no chitimini jascaria. ¹⁵ Jaboqui tsi xo toa Dios joiti iti qui jicoti xabaca iquia. Toca tsi noqui yobahi quiha Quënëhacanish cabo.

“Jaboqui jahué joi nicahi tsi,

Ja quima casoyamacana naa Dios quima mato naborëquëbo casoni jascaria” ii quiha. ¹⁶ Jatsi mato nicacasquia. ¿Tsohuë Dios joi nicani? ¿Tsohuë ja quima casoni? Jabi tocane quiha toa Egipto mai quima ax Moisés yamabá mëpini ca nohiria bo iquia. ¹⁷ Jasca, ¿tsohuë qui cuarenta año no tsi Dios caxa ini? Toa xabachá ca jochahuaxëñiria ca jodio ca nohiria bo iquia. Jabi toá tsi jato xao bo jishëriahacani quiha. ¹⁸ Jatsi, ¿tsohuë qui Dios chanini, “E shomahuani ca joiti iti qui jicopistiyamariaxëhi quiha naa nohiria bo ra” i ja niquë no? Ja quima casonish ca jodiobo yoati tsi chanihi ja iniquë ra. ¹⁹ Jatsi tsayacana. Toa joiti iti qui jicotimaxëni toa nicamixëñiria ca nohiria bo iniquë, Dios qui ja chitimiyamacani iqui na.

4

¹ Jabi noqui parayamaquí Dios ra. “Mato bax joiti iti ë shomahuaquë” i jodio ca nohiria bo qui Dios quë tsi quiha noqui ri toa chani acanicquë jaa ri. Niahacayamani quiha toa chani ra. Toa joiti iti qui noqui ri jicomacatsi quiha Dios iquia. Japi quiniacaxëcahuë, jicoti ma caniyamano. ² Dios Chani no nicaniquë ra, toa jodiobá nicaní jascaria. Jama, jato qui mahitsa toa Chani ini quiha rë. Mëbihacayamani quiha toa Chani nicanish ca nohiria bo rë, Diós yoani ca ja chahahuacasyamacani iqui na. ³ Jama, noqui chahahuacanaibo tsi xo toa Dios joiti iti qui jicohaina. Toa chahahuayamacanai ca jodiobo ratiqui noa ra, naa noqui chahahuacanaibo. Jabi toca tsi chanihi quiha Dios: “Jato iqui tsi ë caxanicquë.

Caxahí tsi,

‘Noho joiti iti qui jicopistiyamaria-caxëcane quiha naa nohiria ra, ë bëta joixëna’ i ë ni quiha”

iquiina. Jabi jatiroha ca nēhohuacaquē tsi quiha jatiniquē Dios yonoco ra. Nēhohuahax ja joini quiha. ⁴ Joixo tsi jaboqui noqui manahi quiha jahuē joiti iti qui no jicono. Tsayacana.

“Séptimo barí tsi Dios joiniquē, jahuē yonoco jatihuahax na”

ii quiha. ⁵ Joixo tsi quiha mahitsa ca toa jodio nohiria bo ja manamananiquē. Dios joiti iti qui ja jicopistiyamariacanicuē rē, “Jicopistiyamariacaxēcani quiha”

i Dios ni quēshpi na. ⁶ ¿Tsayacana? Dios joiti iti qui jicoyamaniquē toa jariapari ca Dios Chani nicacanicabo rē. Nicamisxēniria ja icani quiha. Jama, nohiria bo jari joimacatsi quiha Dios. Ja tsi xo toa jato ratihax toa iti qui jicoxēhi quiha nohiria huētsa bo. ⁷ Jatsi jicoti toa nicamisxēniria cabo caniaquē tsi quiha xaba huētsa Diós jananiquē nohiria huētsa bo bax na, ja jicocano iquish na. “Jaboqui” toa xaba quēnahacani quiha. Naama tsi quiha, naa Josué quirēquē David yamabá tsi toa xaba Diós janatēquēni quiha, “Jaboqui ēa nicacana.

E quima casoyamacana”

i ja niquē no. Toca tsi ii quiha Quēnēhacanicabo ó no. ⁸ Jabi toa jodio nohiria bo pi Josué yamabá joimarohano tsi quiha jaquirēquē ca jicoti xaba huētsa yoati tsi chaniyamaquē Dios aniquē iquia. ⁹ Jabi tobi xo toa Dios joiti iti huētsa jahuē nohiria bo bax na ra, naa séptimo barí tsi Dios joini jasca cato. ¹⁰ Jabi rani-ranicaxēcani quiha Dios nohiria, jahuē iti qui jicohax na. Jicohax tsi jato yonoco quima joicaxēcani quiha, Dios joini jascaria. ¹¹ Jatsi no bamayamano ra, toa joiti iti qui cahēti. Jabi Dios joiti iti qui cahēti toa jodio nohiria bá narisnicuē rē. Jatsi quiniacaxēcahuē ma tocayamano mato ri ra.

¹² Jabi bēso xo Dios Chani ra. Chama jaya quiha. Bēquēx-bēquēx ca quēnoxēni ca saipi oquēria ca tsi xo toa jahuē quēno ra. Noba shina qui nacoria tsi xo ra. Jatiroha ca jonē ca no shinahai ca bērohuahi quiha. Jasca, jatiroha ca ó no quēēhai ca tanamahi quiha. ¹³ Jabi Dios qui bēroria tsi xo toa nēhohuahacanicabo tēquē. Yama tsi xo toa ja qui jonē cato ra. Jatiroha ca nais-hi quiha. Jasca, huēsti barí tsi jatiroha ca no aca ca ja qui yoaxēqui noa ra.

Oquē ca arati ibo-iboria xo Jesu

¹⁴ Jabi tobi xo noba arati ibo-iboria, naa mana nai qui canish cato. Noba Jesu, naa Dios Baquē yoi tsi xo naa ra. Jatsi no chitimihai ca no achariano ra. No casoyamano. ¹⁵ Jabi oquē-oguēria ca tsi xo naa noba arati ibo ra. Noba chamayama ca jabi cahēriahi quiha. Jasca, jatiroha ca quiniá tsi ja tanamahacanicuē, noqui jascaria. Jama, ja jochayamaniquē ja tanamahacanicuē no. ¹⁶ Jatsi raquēhaxma tsi noba Dios trono qui no cano. Ja qui no cano tsi noqui noixēhi quiha ra. “Jaboqui” tsi noqui mēbixēhi quiha, noitiria no iquē no.

5

¹ Jabi joni yoi roha, naa noqui jascaria tsi xo toa jodioba arati ibo. Nohiria bo xērēquē quima quēnahacani quiha toa, Dios bax yonocoti. Quēnahacahax tsi ja qui acacahi quiha jahuē nohiria bo mēbiti yonoco, naa Dios ya nohiria bo rabēnamati. Jatsi quiha jahuē nohiria ba jocha quēshpi bo tsi tēpas-hacanicabo ca yohina bo, ofrenda bo, tihí cabo Dios qui aquí quiha nohiria bo bax na. ² Jahuē nohiria ba jabi bo cahēyoiquí tsi jia tsi jahuē nohiria bo, naa Dios yoba cahēyamacanaibo, jochacanaibo, tihí cabo mēbihi quiha. Jabi jochacatsai ca jabi jayaquí tsi jato mēbiyoiti mētsa xo ra. ³ Ja tsi xo toa jahuē jocha yoi quēshpi

bo tsi Dios qui ofrenda aaparihi quiha ra, naa jahuë nohiria bo bax ofrenda anox pari.

⁴ Jasca, toa arati ibo bo qui toa yonoco Diós aniquë. Jamë bax toa yonoco biyamacani quiha jaha quëëquí na. Quënahacaxëti xo arati ibo bo tëquë, naa arati ibo Aarón yamabo quënahacani jascaria. ⁵ ¿Tsayacanai? Toa arati ibo ba yonoco Cristó biyamaniquë jamë bax na. Toa oquë ca yonoco ja qui Diós aniquë ra. Acax ja qui ja chaniniquë:

—Noho Baquë xo mia ra.

Jaboqui mia oquëhuaxëquia —iquiina.

⁶ Jasca,

—Mia biquia ra.

I-ipaohai ca arati ibo-iboria ixëqui mia, naa Melquisedec yamabo ini jascaria —i Jesu qui ja ni quiha. ⁷ Jabi no bëta bësopama tsi quiha Dios qui Jesu bëhox-bëhoxniquë ra. Ja rësohai ca quima xabahamati mëtsaria ca ja bëna-bënariani quiha joi pistiamá no. Ja ara-arani quiha bëho ya. Jatsi ja bëhoxhai ca Diós nicaniquë ra, jahuë Jahëpa yoba banahuacatsai ca ja ini iqui na. ⁸ Dios Baquë yoi iqui ri tsi quiha jahuë Jahëpa yoba nicati Jesu jabiniquë ra ja tënë-tënëhai cató no. ⁹ Nicati jabiyoihax tsi nohiria bo Xabahamati Ibo-iboria ja manëniquë ra. Jaboqui jahuë Chani nicacanaibo tëquë bësopaomati mëtsa xo ra, xabahamaxo na. ¹⁰ ¿Tsayacanai? Diós jahuë Baquë biniquë Arati Ibo-iboria iti, naa Melquisedec yamabo ini jascaria.

Dios quima casocanaina

¹¹ Jari huëstima tsi xo toa ë yoacatsaina rë, noba arati ibo-iboria yoati na. Bëronoma tsi xo toa mato ë cahëmahaina iquia, mëriyama ma jabihai iqui na. ¿Jabicasyamacanai sa? ¹² Jaboqui Dios Chani cahëxëni cabo ma iti iquë ra, jari xocobo ma nori. Jishopë. Jari ma tiisimahacaxëti xo iquia. Dios Chani ca bëroria ca jahuë bo ma tiisimahacatëquëxëti xo rë. Jari bëroria ca tiisi, naa xoma jasca ca mato qui acacaxëti xo rë, tiisi-tiisiria ca xëanoma ma nori iqui na. ¹³ Jabi jari xocobo tsi xo toa chocho acai cato ra. Jia ca ati jari cahëyamahi quiha. ¹⁴ Jama, piti coshi, naa tiisi-tiisiria ca bicascani quiha shinacoshi cabo. Jia ca, yoi ca, tihí cabo cahëti ja jabicani quiha.

6

¹ Jatsi rëquë canomani shinacoshi bá. Toa bëro-bëroria ca Cristo yoba no jisbëriano ra. Huëstima tsi quiha toa jariapari ca bëroria ca yoba ma tiisimahacani quiha. Rëquë capama tsi toa mahitsa ca xabahamatimaxëni ca jabi bo quima no casono. Cristo qui chitimihax rëquë no cati xo ra. ² Jishopë. Jari tobi toa ashimahacati yoba, chahahuacanaibo ó tsi mëquë janati yoba, rësonish cabo bësotëquëxëhai ca chani, Diós nohiria bo copixëhai ca chani. Tihí cabo ma jisbëriati xo iquia ra, siri tsi toa jahuë bo ma tiisimahacani iqui na. ³ Jisbëria tsi ¿Dios tiisi-tiisiria ca bichi canomani? Toa axëqui noa tia, Dios qui jiapino.

⁴ Nicacahuë. Tobi xo toa Cristo quima casonish cabo rë, naa Dios Huëa ó tsi i-ipaonish cabo. Huëa iqui tsi quiha mana ca jahuë bo ja tanacaniquë iquia. Jasca, Espíritu Santo ja bicaniquë jato ri. ⁵ Jato qui jia i-ipaoni quiha Dios Chani ra. Jasca, tsëquëxëhai ca xabaca chama ja cahëcaniquë. ⁶ Tihí ca tsi cahëqui ri tsi quiha jari Cristo quima ja casocaniquë rë. Tocapijacano tsi çjënahuariaxo raca jahari Dios qui toca cabo no bëna? Ja casocanai cató tsi cruzó tsi Dios Baquë tooxayoicani quiha rë. Jasca, jaboqui nohiria bësojo xo tsi Dios Baquë shirahuacani quiha rë. ⁷ Quiniacaxëcahuë. Dios nohiria yoi bo tsi xo toa banahaca ca huai jascaria, naa oi bichii cato. Jabi Ibo bax banahaca

ca bëro saino tsi jiaria xo ra. Diós shomahuaha ca xo. ⁸ Jama, naa Dios quima casonish ca nohiria tsi xo toa masa saihuahai ca huai jascaria. Yoiria tsi xo ja saihuacanaina. Yoshihuahacati basima ca xo. Mëshahacaxëti xo toca ca huai ra.

Chahahuacanaiba jabi yoi

⁹ Nëca tsi mato yobapama tsi oquë ca jahuë bo ma ati xo iquia, ëbë xatë bá. Dios quima casocanaibo jascama xo mato ra. Ma chahahuacuë rohari tsi jia ca jahuë bo ma saihuahai ca jisquia ra. ¹⁰ Jasca, mëstë xo Dios. Ja bax ma ani ca shina-bënoyamaxëhi quiha. Jabi anomaria ini quiha toa chahahuacanaibo ma mëbihaina, jato ma noihaina. Noixo tsi jari Dios chahahuacanaibo mëbiqui mato ra. Tihi ca ma acai ca cahëhi quiha Dios iquia. ¹¹ Jatsi ma acai ca jënëyamacana. Jaha ë quëehai ca tsi xo toa ma rëtsahaina jahuë rëso qui. Tocapíquí tsi jaha ma pasohai ca copi bixëqui mato ri tia. ¹² Jasca, ma chiquishyamano. Dios bax yonocopama tsi yosanatimaxëni ca chahuayoicanaibo jascariacana. Toca pi bësoquí tsi Diós mato qui acatsai ca jahuë bo bixëqui mato ra. Parayamahi quiha Dios.

¹³ Abraham yamabo no tsayaparino. Ja qui chanipama tsi quiha parayamaniquë Dios ra. “Mia shomahuaxëquia” i ja qui ja ni quiha. Shomahuapama tsi “Mia parayamaquia iquia ëmë no” i ja qui Dios niquë. “Iquia ëmë no” i Dios ni quiha ra. Tocajaquë tsi yama ini quiha toa oquë ca jurar-ati cato, naa ja bax chaniti cato. ¹⁴ “Iquia ëmë no” ipama tsi “Mia shomahuaxëquia. Chahitaxocobo jayaxëqui mia ra” i Abraham yamabo qui Dios niquë. Toca tsi Abraham yamabo qui Diós jurar-aniquë. ¹⁵ Jatsi yosanaxoma tsi quiha jahuë baquë coti xaba Abrahám mana-mananiquë. Jarohapa tsi jahuë baquë coní quiha, ja qui Diós yoani jascaria. ¹⁶ Jabi toca tsi chanihi quiha nohiria bo ri jabija ca yoacatsi na. Ja parayamacanai ca jismacaspíhi tsi oquë ca janë tsi chanicaní quiha. Jatsi toa chani chahahuacani quiha nohiria. Nohiria ba jabi tsi xo toa. Tocapíjicano tsi jato bëta joi mërayamaxëhi quiha nohiria huëtza bo, ranixo na. ¹⁷ Jabi tocaniquë Dios ri, ja parayamahai ca Abraham chahitaxocobo jismaxëna. Rarinatimaxëni ca Dios ja ini ca ja jismacasní quiha. ¹⁸ Ja tsi xo toa dos ca chani ja ani quiha rarinatimaxëni ría ca quiyamahai ca Dios ja ini ca jismaxëna. Jariapari tsi quiha “Mia shomahuaxëquia” i Dios ni quiha. Jaquirëquë “Parayamaquia iquia ëmë no” i ja ni quiha. ¿Tsayacanai? ¿Jënahuariaxo raca Diós noqui quiana ra? ¿Dos ca chani noqui ja ayamayamani? Ja tsi xo toa Dios qui rani-raniqui noa, naa noqui Dios qui jabanish cabo. Quiyamaqui Dios iqui noa. Noqui xabahamaxëhi quiha ra, noqui ja yoani jascaria. Toa ó pasohi tsi shina-huëjënayamaqui noa. ¹⁹ Jënima ca jënë ca barco, naa mai achahai ca ancla jaya ca barco jascaria xo noa. Dios qui, naa jahuë iti-itiria qui noqui mëpihi quiha no chahahuahaina. ²⁰ Jabi noqui rëquë toa iti-itiria qui noba Jesu jiconiquë no bax na. Jicohax Arati Ibo-iboria ja manëniquë, naa Melquisedec yamabo ini jascaria.

7

Arati ibo-iboria Melquisedec yamabo

¹ Jabi Salem icanai ca yacata xo tsi rey Melquisedec yamabá yonapaoniquë. Jasca, Dios arati ibo-iboria naa joni ini quiha. Toatíyá tsi quiha jahuë joni bo ya Abraham yamabo nianahi caniquë, huëtstima ca rey bo, jato soldado bo, tihi cabo pasomaha. Jato ja bëbocaquë tsi quiha Melquisedéc Abraham bëchaniquë bahi xo na. Bëchaxo tsi quiha Abraham ja shomahuaniquë arati ibo ja ini iqui na. ² Jatsi Melquisedec qui ofrenda, naa

huësti ca décima, naa ja bëboni ca jahué bo quima ca décima Abrahám aniquë. Anomaria naa naa Melquisedec ini quiha. Noba joi tsi “Mëstë” ii quiha jahué janë ra. Rey “Mëstë” ja quënahacani quiha. Jasca, “Rani-ranitiya” jahué yaca quënahacani quiha, naa ja yonani cato. ³ Jasca, Melquisedec jahëpa, jahué jahëhua, jahué naborëquë bo, jahué chahitaxocobo, tihì cabo cahëyoiyamaqui noa. Jasca, ja conì bari, ja rësoni bari, tihì cabo cahëyamaqui noa, naa Dios Baquë jascaria iquiina. I-ipaoxëhai ca arati ibo tsi xo naa iqui noa.

⁴ Jabi anomaria naa arati ibo Melquisedec iniquë. Jariapari tsi quiha ja qui ofrenda, naa huësti ca décima noba naborëquëbo Abraham yamabá ani quiha toa rey bo bëboxo na. ⁵ Tsayacahuë. ¿Jahuë jimibo qui toa ofrenda Abraham yamabá ani? Ayamahi quiha, carayanaba arati ibo Melquisedec ini quëshpi na. Jabi tocayamaniquë Abraham chahitaxocobo ofrenda bo aquí na. Jato jimiba arati ibo bo qui roha jato ofrenda bo ja acani quiha. Jabi jato jimibo qui, naa Leví icanai ca maxo qui Moisés yoba ani quiha, ofrenda, naa huësti ca décima jato nohiria bo quima ja bicano Ibo bax na. ⁶ Jama, carayana Melquisedec ini quiha. Abraham jimibo ma quiha. Carayana ca ja ino ri tsi quiha jari ja qui Abrahám yamabá ofrenda aniquë ra, oquë-oquëria ca arati ibo ja ini iqui na.

Jaquirëquë quiha Melquisedéc Abraham yamabo shomahuaniquë. Jabi Dios parayamahi ca chani binish ca Abraham tsi xo naa. ⁷ Jasca, noba jahëpa Abraham yoi oquë-oquëria Melquisedec iniquë iquia. ¿Shomahua-hacanish ca oquë-oquëriayamahi ni shomahuati ibo ra? ⁸ Jasca, noba Leví maxo ca arati ibo bo oquë-oquëria ca Melquisedec iniquë. Rësoyocani quiha ra noba ofrenda bichì ca arati ibo bo. Jama, jari bëso ca Melquisedec nori ca yoahacaniquë. ⁹ Jasca, naa arati ibo-iboria Melquisedec qui noba Leví yoi yamabá ofrenda bo aniquë jaa ri iqui noa, naa noba arati ibo ba naborëquëbo. Ja qui ofrenda bo ja ani quiha, naa, noba ofrenda bo binish ca Leví yamabo pa. Melquisedec qui jahué chahita Abraham yamabá ofrenda aquë tsi quiha Leví yamabá ani ca yoi jascaria iniquë toa ja acaina iqui noa. ¹⁰ Toatiyá tsi Melquisedéc Abraham bëchaquë tsi jari cohama Leví ini quiha. Jari Abraham coxëti ca chahita ja ini quiha. Ja tsi xo toa Melquisedec qui ofrenda bo noba Leví yoi aniquë iqui noa, jahué chahita ja ini iqui na.

¹¹ Jabi mato qui Moisés yamabá Dios yoba aniquë. Ja tahëxo tsi oquë-oquëria ca arati quinia ja nori ca quëscahuaqui mato rë. Mato nicaparicasquia. ¿Mato arati quiniá tsi nohiria bo mëstëhuariahacani? Jabi mato pi mëstëhuati mëtsa toa arati quinia iirohano tsi ¿jëniriexo tsi Arati Ibo-iboria paxa ca, naa Melquisedec jasca ca Diós raani sa? Arati ibo-iboria Aarón oquë ca tsi xo naa arati ibo paxa cato iquia. ¹² Jasca pi nohiria ba arati quinia rarinamahacano tsi rarinamahacaxëti xo toa jato arati yoba ri. Ratihi quiha yoba paxa cato. ¹³ Tsayacahuë. Tocajaniquë ra, Arati Ibo-iboria iti Cristo joniquë no. Toa arati quinia paxa ca ja chitahëhuani quiha. Jasca, johax tsi quiha Leví maxo quima ma ja iniquë, Judá maxo quima ja nori. Jabi altar xo tsi arati yonoco ayamapistiariapaoni quiha toa Judá maxo ra. ¹⁴ Jama, toa Judá maxo quima Cristo joni ca cahëqui jatiroha cabo. Jasca, toa Judá maxo qui arati yonoco Moisés yamabá ayamani quiha. Jaha tsi ratihi quiha Cristo yoba ra.

¹⁵ Jabi noqui bëroria tsi xo toa Diós anina. Jisiquiniquë Arati Ibo-iboria paxa cato, naa Melquisedec jasca cato. Jisiquihax toa quinia siri Jesu ratiniquë. ¹⁶ Jasca, maí ca arati ibo ba maxo quima ja joyamaniquë. Toca tsi ja coyamani quiha. Jama, naa Arati Ibo-iboria yonoco ja qui Diós aniquë,

bëso-bësopaohai ca ja nori iqui na. Quëyohacatimaxëni ja ini quiha. ¹⁷Jabi jasca ca yoahi quiha Quënëhacanish cabo ri:

“I-ipaohai ca Arati Ibo-iboria xo mia, Melquisedec yamaba chama jascaria ca jayahi na”

iquiina. ¹⁸Jabi toa arati yoba siri yoba paxa ca Jesú ratimaniquë. Mahitsa, chamayama, toa jariapari ca quinia ini quiha. ¹⁹Nohiria bo mësëthuati mësama Moisés yoba ini quiha. Jama, toa yoba siri ratini quiha oquë-oquëria ca xabahamati quinia paxa cato. Naa quinia iqui tsi Dios qui basimati mësä ca noa jaboqui ra.

²⁰Jasca, Arati Ibo-iboria Cristo manëquë tsi quiha “I-ipaohai ca Arati Ibo-iboria ixëqui mia ra” i jahuë Baquë qui Dios niquë. Jabi toca tsi arati ibo huëtsa bo qui Dios chaniyamani quiha, jato yonoco ja chitahëhuacaquë no.

²¹Jama, Arati Ibo-iboria Jesu manëquë tsi quiha Dios nëcaniquë:

“Noho janë tsi mia parayamaquia.

Rarinamahacatimaxëni xo noho shinana ra.

I-ipaohai ca Arati Ibo-iboria ixëqui mia ra”

i Jesu qui ja ni quiha. ²²Tsayacahuë. “Noho janë tsi mia parayamaquia” i jahuë Jesu qui Dios ni quiha. Toa Chani iqui tsi oquë-oquëria ca xabahamati

quinia otohí quiha Jesu ra. Mahitsa ma xo ra. ²³Jasca, huëstima ca arati ibo bo toa jariapari ca quinia jayaniquë, ja rëso-rësocanacani iqui na. Huësti arati Ibo

siri rësoquë tsi ratini quiha huëtsa, jahuë yonoco rëtsaxëna. ²⁴Jama, i-ipaoxëhi quiha Jesu ra. Jahuë iti ratiyamaxëhi quiha huëtsa ra. ²⁵Ja tsi xo toa nohiria bo xabahamati mësaria xo Jesu ra. Narisyamahi quiha jahuë xabahamati

chama ra, bëso-bësopaohai ca ja nori quëshpi na. Jatiroha ca Dios qui bëcanaibo mëbi-mëbipaohi quiha.

²⁶¿Jatsi tsayacanai? Jesu tsi xo toa oquë-oquëria ca arati ibo ra, naa noqui mëbiti cato. Yama xo jahuë jocha ra. Jasca, quësohacatimaxënia xo. Yama tsi xo toa yoi ca ja acana ra. Jochacanaibo quima ja aquëquëmahacani quiha.

Jasca, oquë-oquëria ca iti ja qui acacani quiha mana. ²⁷Jasca, noba maí ca arati ibo bo quirima xo. Jabi jatiroha ca barí tsi jahuëcara ca ofrenda Dios

qui acani quiha noba arati ibo bo. Tocacani quiha jato jocha yoi, jato nohiria ba jocha, tihi cabo quëshpi na. Jama xo Cristo ra. Huësti ca ofrenda roha

Dios qui ja aniquë ra, jamë yoi ja aniquë no, nati. ²⁸Jasca, toa jariapari ca quiniä tsi chamayama ca jochahai ca arati ibo bo janahacaniquë nohiria

bo mëbiti. Jama, oquë-oquëria ca Arati Ibo Diós janani quiha, “Noho janë tsi parayamaquia” i ja quë no. I-ipaohai ca oquëria ca Arati Ibo-iboria ca tsi xo

naa ra.

8

Xabahamati quinia paxa ca abogado xo noba Jesucristo

¹Jabi ë yoacatsai ca tsi xo naa ra. Jaboqui mana, naa Chama-chamaxënia ra ca Dios trono mënëcayä tsi tsaho xo Jesu ra. Toä xo noba Arati Ibo-iboria ra.

Oquë-oquëria ca iti tsi xo toa ja jayahaina. ²Toa roa ca iti-itiria xo tsi noqui mëbiriahi quiha. Naa maí ca iti-itiria ca oquë quiha. Jabi naa jabija ca iti-itiria

roa ca Diós aniquë, joni bo nomari. ³Jabi Dios qui ofrenda bo, tëpshacanih ca yohina bo, tihi cabo axëti xo noba maí ca arati ibo bo. Jato yonoco quiha.

Jascaria tsi jahuëcara ofrenda jayati nori iniquë noba Arati Ibo-iboria Jesu ri Dios qui ati. ⁴Mana xo tsi Dios qui jahuë ofrenda Jesú ani quiha. Maí ma xo

noba Arati Ibo-iboria ra. Mana quiha. Jabi maí tsi irohapihi tsi Arati Ibo yoi ja iyamaquë aquë iquia. Jama, noba maí ca nohiria bo bax Dios qui ofrenda

bo ati ibo bo tsi xo toa Leví maxó ca arati ibo bo. Toa maxo quima ma xo

Jesu ra. ⁵ Jasca, maí ca iti-itiria xo tsi yonococani quiha naa maí ca arati ibo bo. Jahué jaria-jaria ma xo toa ja acanaina. Jasca, jahué jaria-jaria ma xo toa jato iti-itiria ri. Macana xo tsi quiha jato arati iti-itiria planes, naa jahué jaria-jaria Diós jismaniquè Moisés qui. Jatsi toa arati tapas Moisés anox pari no tsi Diós yobaniquè: “Macana ax tsi jatiroha ca mi jismahaca ca jaria-jaria mi ano ra” iquiina.

Jatsi tsayacahué. Jahué oquè-oquèria ca jaria tsi xo toa mana cato iquia. ⁶ Jasca, toa oquè-oquèria ca jaria Jesu qui acacanicuè ototi ra. Moisés yamabo, Leví maxo, tihi cabá otoni ca oquè-oquèria tsi xo toa Jesú otohaina. Jasca, oquè ca xabahamati quinia otohí quiha, oquè ca chani tsi ja chitahèhuahacani iqui na.

⁷ Jabi toa jariapari ca xabahamati quinia pi oquè iirohano tsi ratiyamaquè aniquè toa quinia paxa cato. ⁸ Jama, Dios qui oquè-oquèriama ini quiha toa jariapari ca arati quinia. Toa quinia yoati tsi Dios nècaniquè: “Jaha bèsocana.

Tsèquèxèhi quiha arati quinia paxa ca Chani ra.

Toa barí tsi quiha Israël ca nohiria bo, Judá maxo, tihi cabo qui naa xabahamati quinia paxa ca Chani axèquia.

⁹ Jamèrixèhi quiha naa xabahamati quinia Chani paxa cato;

naa jato nabòrèquèbo qui è ani ca chani jamèri cato.

Jabi toa jariapari ca xabahamati quinia Chani jato qui è aniquè, Egipto mai quima jato mèpixo na.

Toa Chani ja bicasyamacani quiha.

Jaha tsi jato è jisbèrianiquè rè.

¹⁰ Jama, tobi xo toa xabahamati quinia ca Chani paxa cato, naa noho Israël ca nohiria bo qui è acaina.

Toa bari tsèquèno tsi jato shina qui noho yoba bo nanèxèquia.

Jato shina ó tsi toa yoba bo quènèxèquia, noho Chani ja shina-bènoyamacano iquish na.

Jatsi toa barí tsi jato Dios yoi ixèquia.

Jasca, noho nohiria yoi icaxècani quiha jato ri.

¹¹ Toatiyá tsi jahué xatè yoi tiisimayamaxèhi quiha nohiria, èa ja cahèyoicaxècanai iqui na.

Jasca, ‘Ibo mi cahèti xo ra’ iyamacaxècani quiha èa yoi ja cahècaxècanai iqui na.

Toatiyá tsi èa cahècaxècani quiha nohiria bo tèquè, naa yonati bo, chama bo ri.

¹² Toatiyá tsi jato jocha masaxèquia.

Masaxo tsi jato jocha bo shina-bènoxèquia ra”

nèa tsi Israël ca nohiria bo qui Dios nècani quiha. ¹³ Jatsi nicaparicana. Toa Moisés arati quinia siri ratixèti nori ini quiha nohiria bo xabahamati quinia paxa cato i Dios ni quiha. Sirinani quiha toa jariapari ca arati quinia. Nati basima xo.

9

Mana ca arati quinia paxa cato

¹ Jabi toa jariapari ca xabahamati quinia no tsayaparino. Yoba bo, arati jabi bo, arati iti, tihi cabo toa jariapari ca quinia jayaniquè. ² Tobi ini quiha jahué arati tapasa. Tapas xara tsi quiha dos ca naquètè bo iniquè. Toa jariapari ca naquètè tsi quiha candelero, mesa, Dios qui acacani ca mapari, tihi cabo iniquè. “Arati iti” toa naquètè quènahacani quiha. ³ Jatsi naquètè huètsa ó tsi, naa rotamè ca raiti oquèri ca iniquè toa Dios iti-itiria. Roa toa iti

ini quiha. ⁴ Toa naquëtë tsi oro ca altar, incienso mëshati, Dios Chani jaya ca caja-cajaria, tihi cabo iniquë. Jabi oró tsi naa caja-cajaria rabahacani quiha. Jasca, jaxara ini quiha oro ca pitëxti, naa mana ax paquënish ca mapari jaya cato. Jasca, caja xara ini quiha Aarón yamaba coti jihui, naa nihipëhi joconi cato. Jasca, jaxara ini quiha toa dos ca maxax para bo, naa Dios yoba jayanish cabo. ⁵ Jatsi caja cacha nii iniquë ángel jisiria ca querubine bo, naa Dios iti obëso cabo. Jocha masahacahai ca iti maxëni ini quiha jato mëstë ca pëhi bo. Jabi toca tsi ja iniquë toa arati tapasá no. Yama xo xabaca tëxë bo yoati rë.

⁶ Toca tsi quiha jatiroha ca jahuë bo janahacanicuë toa arati tapasá no. Jatsi jatiroha ca barí tsi quiha toa jariapari ca naquëtë qui arati ibo bo jiconiquë jato nohiria bo bax jato yonoco ati. ⁷ Jama, toa rotamë ca raiti oquëri ca naquëtë huëtza qui jiconiquë toa arati ibo-iboria roha. Jatiroha ca barí tsi ja jicoyamani quiha. Xënipá ca huëtzi ca barí tsi quiha jamë tsi ja jiconiquë. Jicoxo tsi quiha Dios qui acacani ca jimi ja boniquë jahuë jocha, jahuë nohiria ba jocha, tihi cabo quëshpi na. ⁸ Toatiyá tsi toa iti-itiria roa ca qui jicotimaxëni nohiria bo iniquë. Roa quiha. Jabi Dios qui basimatimaxëni ja icani quiha rë. Dios qui no basimati mëtsanox pari no tsi toa jariapari ca arati xobo, jahuë yoba bo, jahuë jabi bo, tihi cabo jatihuahacati nori iniquë ra. Tihi ca tsi noqui jismahi quiha Espiritu Santo. ⁹ Jabi jisti-jistiria roha tsi xo toa jariapari ca arati iti-itiria. Arati quinia paxa ca qui noqui mëtohi quiha ra. Jabi toa siri ca quiniá tsi ofrenda bo, tëpas-hacanish ca yohina bo, tihi cabo Dios qui axo tsi quiha jari jato jocha nohiria bá shina-shinanicuë rë. Bahuëhacahama jato shina ini quiha rë. ¹⁰ Jabi Dios arati quinia paxa ca jonox pari no tsi noqui jënima ini quiha toa jabi bo, naa oriquiti, jënë ashimahaina, tihi cabo. Jama, jaboqui niahacaxëti xo toa jabi bo iquia, xabahamati quinia paxa ca joni iqui na.

¹¹ Joniquë noba Arati Ibo-iboria Jesucristo ra. Joxo tsi quiha noba arati quinia paxa ca ja chitahëhuanicuë. Toa quinia banahuaqui noa ra jaboqui. Jatsi nëa mai xo tsi jahuë yonoco jatihuahax tsi quiha mana ca oquë ca iti-itiria ca qui ja jiconiquë, naa joni bá acama ca qui. ¹² Jicoxo tsi quiha huëtzi roha tsi Dios iti-itiria qui Jesu jiconiquë. Jatini quiha jahuë yonoco ra. Jasca, jicopama tsi cabrito jimi, vaca baquë jimi, tihi cabo ja boyamani quiha, naa mai ca arati ibo-iboriá boni jasca cato. Jama, jahuë jimi yoi ja boniquë ra. ¹³ Jabi toa jariapari ca arati quiniá tsi quiha cabrito jimi, vaca baquë jimi, mëshahaca ca vaca baquë tsistë, tihi cabá tsi nohiria bo ashimahacanicuë jato bahuëti. Toca tsi jato yoi ca mëbihacani quiha. ¹⁴ Jabi toatiyá tsi jënima pi toa jabi bo irohano tsi jaboqui oquë-oquëria iyamayamahi ni Cristó noqui mëbihaina, ja rësoni cató no? Espiritu Santó tsi Dios qui jamë ja aniquë ra. Oquëria ca ofrenda ja ini quiha. Jasca, jocha yama ja ini quiha. Anomaria tsi xo toa no bax ja rësonina iquia. Ja tsi xo toa noba shina ó ca noqui rësomahai ca yoi ca jahuë bo bahuëti cato. Tocahi quiha jahuë jimi ra, bësohai ca Dios bax no bësone iquish na.

¹⁵ Jatsi tsayacahuë. Oquë ca xabahamati quinia paxa ca otohí quiha Jesu ra. Otopama tsi noqui, naa Diós quënani cabo bësopaoma-xëqui, jahëpa Diós yoani jascaria. Noqui xabahamati quinia paxa ca Ototi Ibo-iboria tsi xo naa ra, nohiria ba jocha quëshpi ja rësoni iqui na. Toca tsi toa jariapari ca xabahamati quinia namá ca jochacanaibo ja paquëmani quiha. ¹⁶ Nicapáricana. Nohiria ba jabi tsi xo toa testamento icaná ca papi huishahaina rësonox pari. Toca tsi jato jahuë bo tëquë acani quiha tsohuëcara qui. Nohiria ba jabi quiha. Jabi rësoparixëti quiha nohiria, jahuë jahuë bo acacanox pari no.

¿Rësojaha? Toa nicaqui noa. ¹⁷ Rësoyamapijano tsi mahitsa copiyama tsi xo toa ja quënëni ca papi, naa testamento cato. Chama yama. Jama, ja rësopino tsi chama jaya xo toa ja quënënina. Jaquirëquë jahuë jahuë bo bichi quiha nohiria. ¹⁸ Jascaria ca quiniá tsi yohina tēpas-hacani quiha toa jariapari ca xabahamati quinia chitahëhuahacanox pari no. Rësoti pari ini quiha yohina. ¹⁹ Jariapari tsi quiha nohiria bo qui Dios yoba tēquë Moisés yoaniquë. Yoaxo tsi quiha cabrito, vaca baquë, tihì cabo ja tēpasniquë. Rësoniquë yohina bo ra. Jaquirëquë jënëpaxa roihacacanish ca jimí tsi nohiria bo, Diós quënëhacani ca yoba bo, tihì cabo ja ashimaniquë. Lana shini, mëshi pistia, tihì cabá tsi jato ja ashimani quiha. ²⁰ Ashimahax tsi quiha “Naa jimí tsi chitahëxëhi quiha Diós noqui xabahamati yoba ra” i nohiria bo qui ja niqüë. ²¹ Jaquirëquë jato arati tapas ja ashimani quiha jimí no. Jasca, jaxara ca jahuë bo tēquë ja ashimani quiha. ²² Jabi jimí tsi ashimahacaxëti nori iniquë toa jahuë bo tēquë. Jabi jimí yama tsi bahuëhacatimaxëni xo jocha ra.

Noba jocha masahi quiha Cristo jimí

²³ Jabi toca tsi quiha toa arati tapasá ca jahuë bo, arati ibo bo, nohiria bo, tihì cabo roahuahacanicuë yohina jimí no. Dios jaria-jaria ca jahuë bo jismanish ca jisti roha ini quiha toa jariapari ca arati quinia iquia. Jahuë jaria-jaria ma quiha. Jahuë jaria-jaria quinia tsi xo mana. Jahá tsi xo toa noba oquë-oquëria ca ofrenda ra. ²⁴ Jabi naa maí ca joni bá ani ca arati iti qui Cristo jicoyamani quiha, naipá ca yoi ca iti qui nori. Jahuë jaria-jaria ca qui ja jiconiquë ra. Toa mana ax no bax Dios bësojó tsi jisiquihi quiha noqui mëbiti cato. ²⁵ Jicoxo tsi jamë Dios qui tēquëroha-atēquëroha-yamaha quiha, naa maí ca arati ibo bá Dios qui ofrenda bo aaroa-aarohani jascaria. Jatiroha ca xënipá tsi jato iti-itiria roa ca qui jicohi quiha jato arati ibo-iboria. Huëstima, naa tocanoma tsi yohina jimí bohi quiha. ²⁶ Jama, tocayamaniquë Cristo ra. Huëstima pi jicorohahi tsi huëstima tsi ja namëhacati nori iquë ani quiha, naa maí nëhohuahacanituya rohari. Jama, huësti roha tsi Cristo jisiquiniquë, naa xaba rëso no. Nati jamë ja acai cató tsi quiha jocha chama quëyohi ja joniquë ra. ²⁷ Jasca, huësti tsi xo toa nohiria bo rësöxëhai ri. Jaquirëquë tsëquëxëhi quiha nohiria ba copiti bari iquia. ²⁸ Jascaria, huësti roha tsi Cristo namëhacanicuë huëstima ca nohiria ba jocha mëbixëna. Jasca, jotëquëxëhi quiha manacanaibo bixëna, jocha bax namëhacatëquëti nomari.

10

¹ Jabi noba jaria-jaria tsi xo toa no bax Cristó acaina. Jahuë jaria-jaria ma xo toa noba jodioba yoba bo. Toa yoba bo tahëhax tsi quiha jatiroha ca xënipá tsi yohina bo tēpas-hacanicuë nohiria ba jocha quëshpi na. Jatihuahacayamani quiha toa yohina bo ja tēpascanaina. Yama jahuë rëso ini quiha. Jasca, toa jabí tsi masahacatimaxëni ini quiha toa Dios qui aracanaiba jocha ra. ² Jabi jato jocha pi masahacayoirohano tsi quiha jato shina ó ca yoi ca jahuë bo ja shina-bënoquë acanicuë iquia. Jatsi jaticuë ani quiha jocha quëshpi yohina bo ja tēpascanaina iquia. Jasca, yama jato shina ó ca yoi ca jahuë bo iquë ani quiha jato qui quësoti ra. ³ Jama, jatiroha ca xënipá tsi quiha yohina bo ja tēpascanicuë. Tēpasxo tsi jari jato jocha yoi ja shina-shinacani quiha. ⁴ Jabi cabrito jimí, vaca bënë jimí, tihì cabá tsi masahacatimaxëni xo nohiria ba jocha ra.

⁵ Ja tsi xo toa mai qui jopama tsi quiha Dios qui Cristo nëcaniquë: “Tēpas-hacanicuë ca yohina bo, ofrenda bo, tihì cabo bicasyama xo mia ra. Jama yora yoi ë bax mi shomahuaquë.

⁶ Nohiria ba jocha quëshpi bo tsi yohina bo pi tēpas-hacano tsi ja mēshahacacano tsi raniyamaqui mia.

⁷ Jatsi, 'Nēá xo ēa, Diós.

Jaha mi quēēhai ca axēquia ra, naa mi libro ó ca quēnēni ca jascaria' ” nēa tsi Cristo nēcani quiha jahuē Jahēpa qui. ⁸ Jatsi tsayacahuē. “Tēpas-hacanih ca yohina bo, ofrenda bo, tihi cabo Diós bicasyamaniquē” ii quiha. Jasca, “Nohiria ba jocha quëshpi tēpas-hacanih ca yohina bo, mēshahacanih ca yohina bo, tihi cabo bicasyama xo” i Cristo ni quiha. ⁹ Jatsi, “Nēá xo ēa, Diós. Jaha mi quēēhai ca axēquia ra” i ja ni quiha. Toca tsi quiha toa jariapari ca arati quinia Cristó jatihuaniquē. Ja ratini quiha. ¹⁰ Ratixo tsi quiha jahuē yora ja aniquē jocha quëshpi na. Huēsti roha tsi jamē ja mēani quiha tēpas-hacati. Jatsi jatiniquē jocha quëshpi yohina bo ja tēpascanaina ra. Jaha tsi Dios shina Jesú aquē tsi quiha jocha quima no bahuēhacaniquē ra.

¹¹ Jabi jatiroha ca bari tsi jato yonoco aqui jodioba arati ibo bo tēquē. Jocha quëshpi bo tsi yohina bo tēpasroha-tēpasrohacani quiha. Jatiyamahi quiha toa ja tēpascanaina ra. Jasca, nohiria ba jocha masatimaxēniria tsi xo toa Dios qui ja acanana. ¹² Jama, huēsti roha tsi quiha nohiria ba jocha quëshpi bo tsi jamē Cristó aniquē namēhacati. Atēquēyamahi quiha. Axo tsi quiha Dios mēnēcayá tsi ja tsahoniquē yonaxēna. ¹³ Jaboqui manahi quiha tojo xo na. Jahari ja jonox pari no tsi ja namá tsi ja pasomaha cabo tēquē janaxēhi quiha Dios, yonahacati. ¹⁴ ¿Tsayacanaí? Nohiria ba jocha quëshpi bo tsi huēsti roha tsi ja namēhacani quiha. Ja ini cató tsi jocha quima xabahamahacanih cabo tēquē ja oquēhuanianiquē ra. Jocha quima jato ja aquēquēpaomani quiha. ¹⁵ Jabi jabija tsi xo naa ē quēnēhaina iquia. Jascaria ca yoahi quiha Espíritu Santo ri:

¹⁶ “Chani paxa ca tsi xo naa jato qui ē acaina.

Toa bari tsēquēno tsi jato shina qui noho yoba bo nanēxēquia” iquiina.

¹⁷ Jaquirēquē,

“Jato jocha bo shina-bēnoxēquia ra”

i Espíritu Santo ni quiha. ¹⁸ ¿Tsayacanaí? Nohiria ba jocha Diós shina-bēnoniquē ra. Ja tsi xo toa jaboqui yohina bo tēpasyamaqui noa noba jocha quëshpi na. Mahitsa tsi xo toa acaina ra.

Dios qui no basimati xo

¹⁹ Jaboqui shomaria xo noa, ēbē xatē bá. Jaboqui Dios iti-itiria qui jicoti mētsa xo noa, Jesu ini cató no. ²⁰ Jicoti quinia paxa ca tsi xo naa ra. Jaboqui yama tsi xo toa noqui quētiahaina, naa arati xobó ca rotamē ca raiti jasca cato. Naa noqui bēsomati quinia paxa ca Cristó japēcaniquē, namēhacati jahuē yora ja aniquē no. ²¹ Jatsi jaboqui Arati Ibo-iboria jaya xo noa ra. Noqui iglesiá ca chahahuacanaibo tēquē otoi quiha ra. ²² Ja iqui tsi Dios qui no basimati xo. Jahuē iti qui jicoti mētsa xo noa ra, shina jia ca no jayahai iqui na. ¿Dios qui no chitimiyoyama-yamani? ¿Jahuē baquē jimí tsi noba shina bahuēhacayamayamani? Jasca, ¿noba jocha masahacayamayamani? ²³ Ja tsi xo toa Cristó noqui xabahamaxēhai ca ó pasoqui noa ra. Parayamahi quiha Dios iqui noa ra. “Mato shomahuariaxēquia” ¿i noqui ja yamayamani? ²⁴ Jatsi no mēbinati xo, noiti, jia ca ati. ²⁵ Arati chahahuacanaibo caticano tsi mato xobó tsi chitēyamacana. Jabi tocacani quiha huēsti huēsti cabo pē. Jama, chamahuacana aranabēquiti. Jabi tsēquēti basima xo Ibo bacahai ca bari ra. Ja iqui tsi oquē tsi no chamahuabēquinano iglesia qui cati.

²⁶ Jabi tobi xo toa Cristo quima casocanaibo rë. Jabija ca cahëhax tsi jari jochacani quiha, yoi ca ó quëëhi na. Nicaparicana. Cristo quima pi no bësoyoicasno tsi yama tsi xo toa noba jocha masahacati quinia huëtta ra. Jasca, mahitsa tsi xo toa jato jocha quëshpi bo tsi yohina tëpas-haina ra. Jahuësti ca quinia tsi xo Cristo ra. ²⁷ Copiti bari ó roha pasohi quiha toa Cristo quima casocanaibo iquia. Dios nicamixëneria cabo mëshahacahai ca shina-shinacaxëcane quiha. Raquëria tsi xo toa copi ra. ²⁸ Jabi Moisés tiya tsi quiha nohiria bo copihacaniquë jato jocha quëshpi na. Noixoma tsi Moisés yoba nicamixëneria cabo namëhacani quiha, dos, tres, tihi cabo jato qui quësoniquë no. ²⁹ Jama, çjënahuariaxëhi ni Dios ra, jahuë Baquë nohiria shirahuacquë no? Oquë-oquëriaxëhi quiha jahuë copi ra. Tocapiquë tsi nohiria ba jocha masati Cristo jimi, Dios xabahamati quinia, tihi cabo niahi quiha toca ca nohiria rë. Ja qui mahitsa xo. Jasca, noqui shomahuahai ca Espiritu Santo ocahuahi quiha rë. ¿Copihacayamayamaxëhi ni toca ca nohiria ra? ³⁰ Jatsi quiniacaxëcana. “Ea yoi tsi xo toa nohiria bo Copiti Ibo-iboria. Copihacaxëhi quiha jochacanaibo ra” çi Dios yamayamani? Jasca, “Jahuë nohiria bo copixëhi quiha Ibo Dios” ii quiha. ³¹ Jatsi quiniacaxëcahuë. Raquëria tsi xo toa bësohai ca chamaxëneria ca Dios copi bichiina iquia.

³² Jama, Dios huëa bixo tsi huëstima tsi ma tënë-tënëniquë Dios bax na iquia. Toa ma shina-bënoyamano. Toatiyá tsi chahahuabëna cabo ma i-ipaoniquë. ³³ Jasca, toatiyá tsi nohiria bo bësojo ax tsi ma shirahuahacaniquë. Nohiria bá mato yosipaoni quiha. Jasca, tënëmahacani ca huëtta bo ya ma niiniquë, jascaria tsi nohiria bá jato yosiniquë no. ³⁴ Jasca, cárcel qui namëhacani ca chahahuacanaibo ma shina-shinaniquë. Jasca, mato jahuë bo Dios cahëyamacanaibá mëbiyoquë tsi quiha ma caxayamaniquë pa, oquë ca naama-naampaohai ca jahuë bo ó pasohi na. Tihi cabo tsi shinacana iquia ra. ³⁵ Tihi cabo shinapama tsi Jesu qui ma chitimihai ca janacayamano. Tobixëhi quiha mato copi-copi jiaria cato ra. ³⁶ Jatsi yosanayamacana. Dios shina ma ati xo ra. Tocapiquë tsi mato bax ja acatsai ca, naa ja yoani ca bixëqui mato ra. ³⁷ Jabi Dios tocani quiha Quënëhacani cabo ó no: “Mëri tsi tanapistia rohano tsi joxëhi quiha joxëhai cato. Bamayamaxëhi quiha.

³⁸ Ja jono tsi bësocaxëcane quiha ja qui chitimicanaibo, naa mëstëhuahacahax ca nohiria bo. Jama, tsohuëcara pi ë quima casono tsi ja qui raniyamaxëquia” i Dios ni quiha. ³⁹ Jama, toa quëyohacaxëti ca casocanaibo ma xo noa ra. Noqui ri tsi xo toa xabahamahacaxëti cabo, naa Jesu qui chitiminish cabo ra.

11

Chitimiti iboria cabo

¹ Chitimiquë tsi jaha no pasohai ca bixëti cahëqui noa ra. “Tocaxëti xo” iqui noa ra, Dios Chaní qui chitimihai na. ² Jabi chitimiyoiniquë noba naborëquëbo ri. Ja chitimicanai ca iqui tsi jato qui Dios rani-raniniquë.

³ Jabi Dios qui no chitimihai cató tsi Dios Chaní tsi jatiroha ca nëhohuacani ca cahëqui noa ra. No jisonoma cató tsi jatiroha ca acacani quiha, naa noqui bëroria ca jahuë bo.

⁴ Chitimiyoiniquë Abel yamabo. Ja chitimihai cató tsi quiha ofrenda jia ca Dios qui Abél aniquë, naa jahuë rëquëmë Caïn oquë cato. Ja iqui tsi mëstë ja tocacaniquë, jahuë ofrenda qui Dios raniquë no. Jaboqui bësoyama ja no

ri tsi jari noqui bēso xo ja anina ra. Jari Dios qui ja chitimiyoini ca shina-bēnoyamaqui noa. Noba shina ó bēso xo ja anina iquia. Jasca, no tocaxēti xo noqui ri.

⁵ Chitimiyoiniquē Enoc yamabo ri. Ja chitimihai cató tsi Enoc mana Diós boniquē. Ja rēsoyamani quiha. Ja yopahacanicuē, Diós bini iqui na. Jabi mana canox pari tsi quiha Enóc Dios ranihuaniquē. ⁶ Jasca pi Dios qui chitimiyamaquí tsi Dios ranihuayamapistiaria-xēqui noa, noqui ri. Jabi bēso xo Dios ra. Jia tsi mēracanaibo copixēhi quiha ra. Tihi ca tsi chahahuayoiti xo toshuēcara ca Dios qui johai cato.

⁷ Chitimiyoiniquē Noé yamabo ri. Ja chitimihai cató tsi quiha Dios yobayobaria ja nicaniquē. Joxéhai ca jēñē nicaxo tsi quiha Dios ja chahahuaniquē. Chahahuaxo tsi quiha barco jahēhuaxéniria ca ja aniquē, jahuē-na bo xabamati. Ja ani cató tsi janyama toa chahahuayamacanaibo ini nori ca ja jismani quiha. Toca tsi mēstē Noé tocachanicuē, Dios qui ja chitimihai cató no.

⁸ Jatsi chitimiyoiniquē Abraham yamabo ri. “Mai huētsa qui cata” i ja qui Dios quē tsi quiha ja caniquē ra Dios qui chitimihí na. Jahuē mai jisbēria tsi quiha jahuē quinia ja cahēyamanicuē, Diós ja qui acasni ca mai qui caquí na.

⁹ Dios qui chitimihí tsi toa carayana ca mai tsi ja raca-racanicuē. Shishohai ca jascaria ja ini quiha. Tapasá roha tsi quiha ja raca-racanicuē. Jasca, toca tsi racani quiha Isaac yamabo, Jacob yamabo ri. Dios Chani ja bicani quiha jato ri, naa Abrahám Dios Chani bini jascaria. ¹⁰ Toca tsi Abrahám raca-racapaoni quiha oquē ca yaca ó pasohi na. Diós acai ca yacata, naa naamapaohai ca yaca ó ja quēēni quiha.

¹¹ Jatsi Dios qui chitimiyoiniquē Sara yamabo ri. Ja chitimihai ca iqui tsi tohayati mētsa ja iniquē, sirixēni ja iquē ri. Jatsi baquē ja comanicuē ra. Diós parayamani ca Sará cahēni quiha. ¹² Ja iqui tsi Abraham yamabo quima, naa rēsopaimaria inish ca quima tihiria ca nohiria bēcaniquē ra. Tocanoma xo jahuē chahitaxocobo iquia. Naipá ca huishti bo, ia quēmapó ca mashēñē, tihi ca jascaria ca xo.

¹³ Jabi Dios qui chitimipama tsi quiha naa nohiria tēquē rēsoyoniquē, naa jato qui Diós ani ca Chani jatihuahacanox pari no. Basi xo tsi quiha Diós jato qui yoani ca jahuē bo jatihuahacaxēti nori ó ja pasocanicuē. “Maí ca carayana ca bohocanaibo roha xo noa. Noba racati yoi ma xo naa mai ra” i jaca ni quiha. ¹⁴ Jabi jato iti yoi mēra-mēracani quiha toca ca chanicanaibo ra.

¹⁵ Jato mai yoi jisbēria tsi quiha jahari ja bocasyama-canicuē. Tsayacahuē. Jato mai pi ó quēērohahi tsi jahari ja bocaquē aniquē iquia. ¹⁶ Jama, oquē ca mai ó ja quēēcanicuē, naa mana ca mai. Ja tsi xo toa bērabiyamáhi quiha Dios, jato Dios quēnahacati, jato bax yaca-yacaria yoi ca ja shomahuani quēshpi na.

¹⁷ Jasca, Abraham yamabo Diós tanamaquē tsi quiha jia tsi Dios yoba ja nicaniquē, ja qui chitimiquí na. Dios qui jahuē baquē yoi ja aniquē tēpas-hacati. Jahuē baquē yoi tēpas-paimaria naa Dios Chani nicanish ca joni ini quiha. ¹⁸ Tsayacahuē. Toa huēsti ca baquē yoi tēpasti ja iniquē ra, “Mí bax huēstima ca chahitaxocobo saihuaxēqui mi baquē” i ja qui Dios niquē no ri. ¹⁹ Jabi jahuē baquē Isaac tēpas-rohapiquí tsi jahuē baquē bēsotēquēmati chama Diós jayani ca ja cahēni quiha. Rēsoti jahuē baquē nori ca ó ja pasoni quiha. Jama, jahari Abraham yamabo qui jahuē baquē Diós aniquē ra. Bēsotēquēmahaca-nish ca jascaria jahuē baquē iniquē iqui noa.

²⁰ Jasca, Dios qui chitimiyoiniquē Isaac yamabo ri. Chitimiquí tsi quiha jahuē baquē bo, naa Jacob, Esaú, tihi cabo bax Isaac bēhoxnicuē, Diós jato

shomahuaxëno iquish na. ²¹ Jasca, chitimiquí tsi quiha José baquë bo bax Jacob yamabo bëhoxniquë, Diós jato shomahuaxëno iquish na. Rësonox pari tsi quiha nii tsi jato bax ja bëhoxniquë jahuë coti jihui rëso quëpi. ²² Jasca, rësonox pari tsi quiha “Egipto mai jisbëriaxëhi quiha Israel ca nohiria bo” i José niquë, Dios qui ja chitimini iqui na. Jasca, jahuë jimibo ja yobaniquë jahuë xao bo ja bocano, Egipto ja jisbëriarohacaxëcaquë no. Toá tsi ja maihuahacacasyamani quiha.

²³ Jasca, chitimiyoiniquë Moisés yamaba nabo ri. Dios qui chitimiquí tsi quiha tres ca oxë no tsi jato cobëna ca baquë ja jonëcaniquë. Toa Egipto rey qui ja raquëyamacanicuë, oquë-oquëria ca jato baquë ini ca jisi na.

²⁴ Jatsi shinahacax tsi quiha Dios qui Moisés yamabo chitiminiquë jaa ri. Ja qui yoi ini quiha toa “Egipto rey jahini baquë” ja quënëhacahaina. ²⁵ Ja qui oquë ini quiha toa Dios nohiria bo ya ja tënë-tënëhaina. Ranihua-hai ca janacahai ca jocha quima ja casoniquë jato bëta xo tënëxëna. ²⁶ Ja qui oquë-oquëria ini quiha toa joxëhai ca Xabahamati Ibo bax ja tënëmahacahaina ra. Rëquë ca joxëhai ca copi ó ja pasoni quiha. Ja tsi xo toa ja qui yoi toa Egipto ca copixëni ca jahuë bo ini quiha.

²⁷ Jaquirëquë Egipto mai Moisés jisbërianicuë Dios qui chitimiquí na. Jisbëria tsi quiha toa chamaxëniria ca rey qui Moisés raquëyamanicuë. Jahari ja cacasyamani quiha jisnoma ca Dios ja jisni iqui na. ²⁸ Dios qui chitimiquí tsi quiha toa pascua fiesta Moisés chitahëhuaniquë. Egipto ca mai jisbërianox pari tsi jimí tsi jato xobó ca caiti bo ja ashimacanicuë, Diós raani ca Namëti Angél jato jariapari ca baquë motsayamano iquish na. ²⁹ Jisbëria tsi quiha Ia Shini Israel ca nohiria bə shitanicuë, Dios qui chitimiquí na. Mai shiná toa napata ini quiha. Jama, nëachiyoni quiha toa shitacasnish ca Egipto bo tēquë, jasca ca tanahi na.

³⁰ Jatsi yaca Jericó ax tsi quiha chitimiyoiniquë Israel ca nohiria bo ri. Siete bari no tsi toa yacata panëhua ja tëamëcaniquë. Dios qui ja chitimiyoini iqui tsi poxoniquë toa panëhua ra.

³¹ Dios qui chitimiyoiniquë toa yacatá ca joni mëtsaxëniria ca carayana ca Rahab yamabo ri. Toa barí tsi quiha Dios nicamixxëniria cabo ya ja quëyohacayamicuë, jia tsi toa jotamiscanaí ca Israel ca joni bo ja joihuani iqui na.

³² Jabi tobi ini quiha huëstima ca Dios qui chitiminish cabo ra. Narisqui xabaca rë jatiroha cabo yoati. Tobi quiha Gedeón, Barac, Sansón. Tobi quiha Jefe, David, Samuel, Dios Chani yoanish cabo. Tihí cabo Dios qui chitimiyoiniquë. ³³ Dios qui chitimihí tsi quiha chamaxëni ca país ca nohiria bo bëboti mëtsa ja icanicuë. Jia ini quiha toa ja acanina. Jatsi Diós jato shomahuaniquë rëquë jato ja yoani jascaria. Dios qui Daniel chitimini iqui tsi japëquëtimaxëni toa cama bo ini quiha, pixëna. ³⁴ Chihí tsi quëyohacatimaxëni huëtsa bo ini quiha. Saipí tsi acatimaxëni Dios Chani yoanish cabo ini quiha. Coshinariani quiha toa coshiyama ca nohiria bo ra. Raquëhaxma tsi ja nianacani quiha. Carayanaba soldado bo ja bëbocani quiha. ³⁵ Jasca, chitimiyoiniquë jato yoxa bo ri. Chitimicano tsi quiha jato bax jató-na bo bësotëquëmahacanicuë.

Rësoniquë huëtsa bo tënëmahacahax na. Ja paquëmahacacanaí ca oquë ini quiha ja rësocanaina Ibo bax na. Oquë ca bësohai ca ó ja pasocani quiha, bësotëquëhax na. ³⁶ Huëtsa bo maihuahacanicuë. Huëtsa bo rashahacanicuë. Huëtsa bo nëxahacanicuë. Huëtsa bo preso qui nanëhacanicuë. ³⁷ Huëtsa bo namëhacanicuë maxaxá no. Rësquëhatí tsi quiha huëtsa bo yëjehacanicuë.

Saipí tsi quiha huëtsa bo namëhacanicuë. Xobo yama huëtsa bo iniquë. Yohina bichi sahuëti tsi ja bohocanicuë. Parata yama ja icanicuë. Ja tènë-tënëcani quiha. Yosihacani quiha huëtsa bo. ³⁸ Yoiria ja icani ca Dios cahëyamacanaibá quëscahuani quiha, jato oquë-oquëria jaca nori. Paxahi tsi xabaca, macabo, maiquini bo, tihí cabo qui racahi ja bocanicuë. ³⁹ Jabi Dios qui ja chitimicacuë tsi quiha jato qui Dios raniniquë. Jama, Diós jato bax acasni ca jahuë bo jari ja biyamacani quiha toatiyá no. ⁴⁰ Jabi oquë ca iti jato bax acatsi quiha. Jasca, noqui rëquë Diós jato shomahuacasyamani quiha. No shomahuahacabëquioxëti xo ra.

12

Jesucristo no banahuaxëti xo

¹ Jabi noqui tëamë jascaria tsi xo toa Dios qui chitimiyoinish cabo. No bësocanai ca tsayacani quiha ra. Ja tsi xo toa noqui quëtiyahai ca jahuë bo, naa noqui tsamicatsai ca jocha no niaxëti xo. Niaxo tsi jabanacanaibo jascaria tsi Dios yonoco no ariaxëti xo bëbocasquí na. No yosanayamano. ² Rëquë ca Jesu qui no tsayaxëti xo. Ja tsi xo toa noba Rëquënimiti Ibo-iboria. Noqui Tiisimati Ibo-iboria ca tsi xo naa ra. Jabi Dios qui ja chitimiyoini quiha jaa ri. Bërabiria toa cruzó tsi ja rësohai ini quiha. Jama, bërabihaxma tsi cruz qui ja caní quiha, rëquë ca ranihuahai ca jahuë bo tsayahí na. Jaboqui Dios mënëcayá tsi tsaho xo ra. Toa xo tsi yonahi quiha.

³ Jesu tènëni ca shinacahuë. Anomaria ini quiha toa ja qui jochahuaxëni cabo caxahaina ra. Ja yosanayamani quiha. Jabi toca tsi shinapihi tsi yosanayamaxëqui mato ri. Toca tsi coshihuahacaxëqui mato iquia. ⁴ Jabi iriama tsi xo toa ma tènë-tënëhaina iquia. Jocha pasomaha nianapama tsi çnamëhacahi ni mato pa? Iyamaqui mato ra. ⁵ Tonia mato qui Dios chanini ca ma shina-bënoniquë iquia. Xocobo qui jahëpa chanihai jascaria tsi xo toa ja nëcanina.

“Mato yoi ca quëshpi tsi Ibobá mato copino tsi chahahuacana, noho baquë. Mato ja raahano tsi yosanayamacana.

⁶ Jabi jatiroha cabo, naa jahuë-na bo tëquë jabihuahi quiha Ibo ra. Jasca, jatiroha ca jahuë baquë bo, naa ja bichii cabo rashahi quiha ra”

ii quiha. ⁷ Jatsi yosanayamacana ma tënëquë no. Jënima tsi xo toa ma tënëhaina iquia. Toca tsi mato oquëhuaxëhi quiha mato jahëpa Dios, jahuë baquë bo ma nori iqui na. Jabi yama tsi xo toa jahuë baquë yoi jabihuayama-hai ca jahëpa ra. Jato baquë bo jabihuacani quiha jahëpa bo tëquë iquia.

⁸ Jabi toca pi Diós mato jabihuayamarohano tsi çjënahuariahax jahuë baquë bo ma iquë ana? Yoma bo roha ma iquë aquë iquia. ⁹ Jabi tobi xo noba maí ca jahëpa bo. Noqui ja rashacano tsi çmëri tsi jato chahahuayamayamahi ni noa ra? Jatsi noba maí ca jahëpa bo chahahuacá tsi oquë tsi noba mana ca Jahëpa no chahahuayoixëti xo iquia, bëso-bësoxëna. ¹⁰ Jabi no shinahanox pari no tsi noba maí ca jahëpa bá noqui rashapaonicuë. Jato qui yoi ca pi no aquë tsi noqui ja copipaoni quiha. Jascaria tsi noqui copihí quiha noba mana ca Jahëpa ri noqui mëbicatsi na. Noqui jabihuahi quiha, jahuë mëtëxëniria ca jabi no xatënano iquish na. ¹¹ Jabi tanapistiarohano tsi cohuë xo noa, no copihacaquë no. Noqui yoi tsi xo toa noqui ja rashacanaina. Jama, jaquirëquë mëtëxëniria ca jabi jayaxëqui noa ra. Oquë tsi bësoxëhi quiha toa jabihuahacahax cato iquia.

Dios yoba nicamis-haina

¹² Quiniacaxëcahuë. Mato ó ca chamayama ca rëquë bocasyamacanaibo chamahuacana. Mato ó ca mëmë-mëmëcanaibo cosihuacana. ¹³ Jatsi rëquë Dios quinia ó tsi bocahuë. Jasca, toa quinia rohahuacana chamayama ca chitimicanaibo bax na, ja paquëyamacano iquish na. Ja chamanacano ra.

¹⁴ Jasca, jatiroha ca joni bo ya jia tsi rabënabëquiti ó quëëcana. Jasca, mështëxëni ca jabi ó quëëcana. Jabi Ibo jisyamacaxëcani quiha toa mështëhuahacahax ca jabi jayama cabo. ¹⁵ Jasca, mëbinacana, Dios shomahuahai ca quima tsohuëcaracá mato casomayamano. Jasca, quiniacaxëcahuë mato xërëquë tsi pahëria ca jascaria ca nohiria shinahayamano. Shinahaxo tsi mato chahahuacanaibo yosicaxëcani quiha pë jato sëmë no. Anoma quiha. ¹⁶ Quiniacaxëcahuë. Chotamixxëniria ca tsohuëcara ma manëyamano ra. Mai ca jahuë bo shinamixxëniria ca, naa Esaú ini jasca ca manëyamacana. Huësti ca piti quëshpi tsi jahuë rëquëmë chama, naa jahuë jahëpa jahuë bo ibohuati chama ja inianiquë jahuë noma qui. Anoma ini quiha toa ja anina iquia. Mahitsa toa ibohuati chama ini ca ja quëscahuani quiha. ¹⁷ Jaquirëquë toa ibohuati chama jahari ja bicasniquë. Binoma ja ini quiha. Jatsi ara-arapama tsi jahuë jahëpa ja bënariani quiha shomahuahacati. Jahuë jahëpa shina rarinamatixëni ja ini quiha. Toca tsi jahuë xaba ja nianiquë pë.

¹⁸ Jatsi quiniacaxëcahuë. Chitimihai cató roha tsi Dios cahëpiqui noa ra. Mamëhacatima-xëni ca jisnoma ca Dios jahuë bo qui chitimiqui noa. Tocama ini quiha toa jariapari ca arati quinia jahuë bo. Moisés tiyá tsi quiha Maca Sinaí ca ririhai ca chihí, jahuë chëquë, jahuë tsëmo, toá ca xotohai ca yoshini, tihí cabo noba naborëquëbá jisniquë jato bëró no. ¹⁹ Toá ca trompeta pacotsa, Dios joi-joiria, tihí cabo ja nicacaniquë jato pahoquí no. Nicaxo tsi Dios ja bënacani quiha pasiti. Raquëria toa joí ini quiha. ²⁰ Jasca, raquëria iniquë Dios yoba ri, naa “Acacaxëti xó toa tsohuëcara ca naa maca motsati cato. Acacaxëti xó motsahai ca chaxpa bo ri” i Dios ni quiha toatiyá no. ²¹ Raquëria ini quiha toa ja tsayacanai ri. Ja tsi xo toa “Raquëhi tsi mëmë-mëmëquia rë” i Moisés ni quiha.

²² Jama, Dios iti-itiria, naa Maca Sion icanai ca qui basimati mëtsa xo mato ra. Noba bësohai ca Dios yaca-yacaria tsi xo naa ra. Mana ca Jerusalén quiha. Jasca, jahá ca ángel tirixëni cabo, ²³ iglesiá ca chahahuacanaibo yoi bo, naa mana ca quënëhacani ca janë jaya cabo, tihí cabo qui basimati mëtsa xo mato ra. Jasca, Dios, naa jatiroha ca nohiria bo copiti ibo-iboria qui basimati mëtsa xo mato ra. Jasca, mana ca mështëhuahacaniish ca chahahuacanaiba shina bo qui basimati mëtsa xo mato ra. ²⁴ Jasca, tobi Jesu, naa noba xabahamati quinia paxa ca ototi ibo. Ja qui ri basimati mëtsa xo mato ra. Jabi toa arati quinia paxa ca chitahëhuahacani quiha jahuë ashimahai ca jimí no. Tëpas-hacaniish ca Abel jimí oquë quiha. Nohiria bo xabahamati mëtsa xo ra. Jabi tihí cabo qui basimati mëtsa xo mato jaboqui ra.

²⁵ Jatsi quiniacaxëcahuë. Mato qui Dios chanino tsi nicacana. Jabi Dios chani Moisés yamabá yoaquë tsi quiha nicayamaniquë toa nohiria bo rë. Ja iqui tsi Diós jato copiniquë. Ja paxayamacani quiha. Jatsi, çjënahuariahax noqui chanihai ca mana ca Dios quima no paxana, ja quima casohi na? ²⁶ Moisés tiyá tsi quiha toa mai Dios joí yajohaniquë ra. Jaha bësopa. “Naa mai yajohatëquëxëquia. Jasca, toa barí tsi mai, naipá ca jahuë bo, tihí cabo tëquë yajohaxëquia ra” ii quiha Dios. Parayamahi quiha. ²⁷ Jatsi toa barí tsi jatiroha ca acacani ca jahuë bo yajohaxëqui Dios ra. Yajohaxo tsi jatiroha ca yoi ca mëbixëhi quiha. Jatsi chitëxëhi quiha toa yajohacatimaxëni ca jahuë bo

roha, naa Ibobá yonahaina. ²⁸ Jabi yajohacatimaxëni tsi xo toa ja yonahaina ra. Jasca, noqui ri jahuë chama axëhi quiha Dios, no yonano noqui ri. Ja iqui tsi no rani-ranixëti xo. Jasca, jia tsi Dios qui no araxëti xo jahuë chama yoi cahëhi na. ²⁹ Quëyohai ca chihi jascaria tsi xo noba Dios ra.

13

Dios ranihuati quinia

¹ Mabë xatë bo noi-noicana. Noiti jënëyamacana ra. ² Jasca, mato bëroma ca xatë bo orihuacana mato qui ja shishocaquë no. Cahëxoma tsi quiha çángel bo noba naborëquëbá orihuayamayamani?

³ Jasca, presó ca xatë bo shinacana, naa jato bëta ma iquiria. Jasca, yosihacacanaibo mëbicana, jato bëta tënëquí ri.

⁴ Jabi ahui ya jobonati tsi xo jënima; huëtsa ya jobonahai ca tsi xo anoma ra. Jabi chotamixëni riria cabo copixëhi quiha Dios. Jasca, ahui niacanaibo, bënë niacanaibo, tihi cabo copixëhi quiha.

⁵ Parata ó quëemisyamacana ra. Mato jahuë bo ya ranicana, “Mato jisbëriayamaxëquia” i Dios ni quëshpi na. Jasca, “Mato otoxëquia” i noqui ja ni quiha ra. ⁶ Ja tsi xo toa raquëhaxma tsi nëcaqui noa:

“Ea mëbi-mëbiriaxëhi quiha noho Ibo ra.

Jatsi raquëyamaxëquia.

çjënahuariaxo joni bá ëa yoshihuana ra?” iquiina.

⁷ Jasca, mato rëquëninini ibo bo, naa Dios Chani mato tiismanish cabo shinacana. Dios bax ja acacani ca jahuë bo shinacana. Shinahax tsi jato jabi jia ca jascacana chitimih na.

⁸ Jasca, rarinatimaxëni xo Jesucristo ra. Jatiroha ca bari jaharisi tsi xo, jaboqui, huëaquë, xëni huëtsá no. ⁹ Ja iqui tsi jamëri ca chaní tsi janyama mëpiahacayamacana, naa piti yoati na. Óquë tsi xo toa Dios noihai cató tsi chamahuahacahaina iquia. Noba piti yoi tsi xo toa ra. Jama, tobi xo toa piti yoba mahitsa ca banahuacanaibo. Toca ca yobá tsi mëbihacapistiyamariacaxëcani quiha iquia. ¹⁰ Jabi altar jaya xo noa, noqui Cristo banahuacanaibo ri, naa Jesu acacani ca crúz. Ja tsi xo toa noqui chamahuahaina, piti yoi ja nomari. ¹¹ Jabi toa jodioba quiniá tsi yohina tëpas-hi quiha aratí ibo-iboria. Axo tsi toa iti-itiria roa ca qui jahuë jimi bohi quiha nohiria ba jocha quëshpi na. Jatsi yaca cache ca nabiri xo tsi toa tëpas-hacanish ca yohina yora bo mëshahi quiha. ¹² Jascaria tsi yaca cache xo Jesú tënëniquë jaa ri, jahuë jimi tsi jato jocha quima nohiria bo bahuëxëna. ¹³ Jatsi noba mahitsa ca yoba bo, jabi bo, tihi cabo no jisbëriano Jesu qui caxëna. Caxo tsi ja bërabihi ca no xatënano noqui ri. ¹⁴ Jabi naa maí tsi yama tsi xo noba racati-racatiria ra. Noba mana ca iti-itiria ó quëëqui noa naa rëquë cato. ¹⁵ Jatsi Jesucristó tsi jia tsi Dios no ocahuano iquia, noba janá no. Dios qui no acái ca ofrenda quiha. Jasca, noba janá tsi Dios oquë nohiria huëtsa bo no cahëmati xo. ¹⁶ Jasca, jia ca ati shina-bënoyamacana. Huëtsa bo mëbicana. Tihi cabo tsi xo toa Dios no ranihuahai ca ofrenda bo iquia. Tëpas-hacanish ca yohina bo ó quëëyamahi quiha.

¹⁷ Jasca, mato rëquëninicanaibo nicacana. Mato pi ja yobacano tsi nicacana. Jia tsi mato shina ó bësocani quiha ra. Jabi Dios qui jatiroha ca jahuë bo ja bërohuacaxëcanai ca iqui tsi anomaria tsi xo toa mato ó ja bësocanaina. Jatsi jato yoba pi ma banahuano tsi ranixo tsi jato yonoco acaxëcani quiha. Jama, jato yoba pi ma nicayamano tsi cohuëcaxëcani quiha. Tocapimano tsi çjënihuariaxo mato ja mëbicana ra?

¹⁸ No bax bëhoxcana. Jaboqui yama tsi xo toa noba shina ó ca jahuë bo noqui quësohaina iquia. Jatiroha cató tsi jia ca roha acasqui noa. ¹⁹ Jasca, Díos qui bëhoxcana, mëri tsi jahari mato qui ë jono.

Joihuahaina

²⁰ Jabi noba Jesucristo Díos bësotëquëmaniquë ra. Ja ini iqui tsi no noho Bësoti Ibo-iboria ja manëni quiha. Jasca, jahuë jimí tsi toa i-ipaohai ca xabahamati quinia paxa ca chitahëhuahacani quiha. ²¹ Jatsi nohiria bo ranihuahai ca Díos mato shomahuano, jia tsi jahuë shina ma ano iquish na. Jahuë Jesucristó tsi noqui ja jabihuano ra ja qui jia ca iti. Jasca, Jesucristo ocahuahacano ra. Iquë. Amén.

²² Jabi tëtëcariama xo naa ë quënëhana, ëbë xatë bá. Jia tsi naa chani ma nicano ra. ²³ Jasca, preso quima Timoteo paquëmahacahi-taquë ra. Mëri pi ja jono tsi bëxëquia mato qui ë shishoquë no. ²⁴ Mato rëquëninicanaibo, toá ca chahahuacanaibo, tihi cabo joihuaquia. Jasca, mato joihuahi quiha nëá ca Italia maí ca xatë bo ri. ²⁵ Díos mato tëquë shomahuano.

La Carta De Santiago

¹ Santiago tsi xo naa mato joihuahaina. Dios, Ibo Jesucristo, tih caba yonati ca éa xo naa. Jabi néama ca pacanamahacani ca jodiobo, naa chahahuacanaibo qui naa carta raaquia.

Dios quima ca tiisi

² Ranicana, ebé xaté bá, ma tanamahacaqué no. Huéstima tsi xo toa jaméri ca tanamahacahaina iquia. ³ Ma chitimihai ca tanamahacano tsi oquénaxéhi quiha mato ténéti chama iquia. ⁴ Mato ténéti chama ani-aniriano ra. Toca tsi jiaxéni ca jabi-jabiria jayaxéqui mato. Toca tsi rohahuariahacaxéqui mato, Dios yonoco ati.

⁵ Tiisi pi naris-hi tsi Dios qui béhoxcana. Jatiroha cabo qui tiisi axéqui Dios, huashiyamahai ca ja nori quéshpi na. Mato raahayamaxéhi quiha, ma bénaqué no. ⁶ Jama, béhoxhi tsi ja qui chitimiyoicana, mato qui ja ati ca ó pasohi na. Jaha pasoyamahai ca tsi xo toa yoshini tsi nia-niahacahai ca iané ca choca jascaria. ⁷⁻⁸ Toca ca joni tsi xo rabé ca shina jaya cato. Jahué quinia cahétimaxéni ca tsi xo naa pé. Ibo Dios quima jahuécara biti ó pasoyamati xo toca ca joni iquia.

⁹ Jabi ranixéti xo toa noitiria ca chahahuahai cato, Dios bésojo ax ja oquéhuahacani quéshpi na. ¹⁰ ¿Jénahuariahax raca rico ca ranina, Dios bésojo ax tsi mahitsa ca ja nori ca ja jismahacani iqui na? Huinocaxéhi quiha rico cato, nihi joa jascaria. ¹¹ Matoroco bari no tsi anomaria tsi xo bari huao. Joa méshahi quiha. Jatsi mai qui paquéhi quiha joa. Yama tsi xo. Jabi toca tsi quéyohacaxéhi quiha rico ca ri, yonocohi na.

¹² Shoma tsi xo toa ténéhai ca joni, ja tanamahacaqué no. Ja tanamahacaqué tsi toa joni oquéhuaxéhi quiha Dios. Premio, naa corona jasca ca béboxéhi quiha. Noicanaibo bésoimaxéhi quiha Dios, ja yoani jascaria. ¹³ Jabi jochati pi tanamahacahi tsi “Ea tanamahi quiha Dios ré” iyamacana. Yoi ca ati ninihacatimaxéni tsi xo Dios ra. Jascaria, nohiria tanamayamahi quiha jochati. ¹⁴ Jama, jochati tanamahacahi quiha nohiria, yoi ca ó ja quééqué no. Toca tsi ninihacahi quiha yoi ca ati. Jatsi ja qui jianahi quiha toa yoi ca ja acaina ré. Ja tsi xo toa noqui jochamahaina. ¹⁵ Jatsi anih quiha toa yoi ca ja acatsaina ré. Jatsi jochamahi quiha ré. Anixo tsi naméxéhi quiha. Toca tsi Dios quima aquéquéhi quiha ré.

¹⁶ Ma parahacayamano, é noihai ca xaté bá. ¹⁷ Mana quima ax johi quiha jatiroha ca noqui acacani ca jahué jia cabo. Naa shoma bo noqui aqúi Dios ra, naa naipá ca huishiti bo, oxé, bari, tih cabo néhohuanish cato. Rarinatimaxéni tsi xo Dios; jahué jabi quiha. Bari, oxé, tih cabo tsi xo rarina-rarinahaina, baquish-huahaina. Jama xo Dios. Rarinayamahi quiha. Mésté xo. ¹⁸ Jabi jahué shinaná tsi jahué xocobo Dios noqui manémaniqué ra, jahué jabija ca Chaní no. Toca tsi jahué xocobo paxaria cabo manéqui noa, jahué-na bo ixéna. Ja néhohuani ca jahué bo téqué oqué xo noa, Dios qui no acacani iqui na.

Jabija ca chahahuacanaibo

¹⁹ E yoahai ca ma cahéno, ebé xaté bá. Méri tsi Dios Chani nicati xo jatiroha cabo iquia. Shinahaxma pari tsi chaniyamacana. Caxatapiyamacana. ²⁰ Caxapiquí tsi ¿jénahuariaxo raca Dios jabi jia ca ma jayana? ²¹ Japi jatiroha

ca jabi yoi cato, jatiroha ca jocha, tihi cabo niacana. Niaxo tsi Dios Chani ma bino, naa mato shina ó banahacaniish cato. Ishimaxo tsi toa Chani ma biti xo. Mato shina xabahamati Chani tsi xo naa ra.

²² Dios Chani nicaxo tsi ja yoahai ca acahuë. Mamë paraqui mato pë, jahuë yoba ma ayamaquë no, nicaxo na. ²³ Mahitsa bëisiti tsayahai ca jascaria tsi xo toa toca ca nicahai cato. Jahuë bëmana tsayahi quiha. ²⁴ Tsayaxo tsi jahuë jaria yoi ca shina-bënotapihi quiha pë. ²⁵ Jama, rani-ranixëhi quiha toa Dios Chani tsayahai cato, naa jahuë yoba acai cato. Jocha quima paquëmahai ca tsi xo Dios Chani ra. Toa yoba no nicati xo. Nicaxo tsi no shina-bënoyamano.

²⁶ Jabi “Chahahuariaquia” i nohiria mitsa. Jama, yoi ca pi chaniquí tsi jamë parahi quiha. Mahitsa tsi xo ja chahahuahaina iquia. ²⁷ Jia pi chahahuahi tsi bënë imanish cabo, yoma bo, tihi cabo ó bësoxëqui noa tia, ja biniacaquë no. Jia pi chahahuahi tsi quiniaxëqui noa, jochahuaxëni cabá noqui yoshihuayamano iquish na.

2

Oquë tsi rico cabo ó bësoyamacana

¹ Nohiria bo pi mëbiquí tsi jato oquëxhuayamacana, nohiria huëtsa oquë ja nori quëscahuquí na. ¿Jënahuariahax raza ma tocana, Jesucristo, naa noba Ibo-iboria chahahuahi na. Anoma quiha. ² Jabi mato arati xobo qui rico ca jicomitsa. Oro ca mëquëraati, sahuëti jiaría cato, tihi cabo sahuë johi quiha. Jasca, ja bëta noitiria ca joni jicomitsa jaa ri, naa raiti chëquë jaya cato. ³ Ja jicoaquë tsi sahuëtiria jaya ca ma otocasmitsa, oquë ja nori quëscahuquí na. Jaha tsi “Naa oquë ca tsahoti tsi tsahotsina” iqui mato pë. Jama, “Toá tsi tsahohuë ra. Napatá tsi tsahohuë” iqui mato rë noitiria ca qui. ⁴ Tocapiquí tsi ¿rabë ca maxo bo, naa huësti ca oquë cato, huësti ca iriama cato, ayamayamacanai? ¿Anoma ni toca ca ma acatsaina? Anoma quiha.

⁵ Ea nicaparicahuë, ëbë xatë bá. ¿Noitiria cabo Díos biyamayamani, oquëhuaxëna? Dios qui copixëni tsi xo toa ja chahahuacanaina iquia. Díos jato biniquë ra. Ja otohái cató ca jahuë bo jato qui acatsi quiha ibohuati, “Tocaxëquia ëa noicanaibo bax na” i ja ni quëshpi na. ⁶ Jama, naa noitiria ca joni bërabihuaqui mato pë. Mato nicaquia. ¿Tsohuë ni toa mato qui yosicanaibo ra? ¿Chama bo qui mato boyamayamacahi ni toa rico cabo? ¿Mato qui quësoyamamacahi ni? ⁷ Jasca, jato tsi xo toa Cristo janë, naa ma banahuahai ca janë pasomaha chanicanaibo iquia.

⁸ Jaha bësopa. Quënëhacaniish cabo ó ca yoba oquëria ca ma ati xo iquia. Toa yoba pi ma nicano tsi anomariaxëhi quiha ma acaina. Jabi “Mabë xatë bo noicana, mamë ma noihai jascaria” ii quiha toa yoba ra. ⁹ Jama, oquë tsi huësti ca nohiria pi otohí tsi jochaqui mato. Tocapimano tsi mato qui quësohi quiha Dios Chani. “Jocha tsi xo toa” ii quiha. ¹⁰ Tsayacahuë. Jatiroha ca Dios yoba pasomaha jochahi quiha toa Díos huësti roha ca yoba nicayamahai cato. ¹¹ ¿Jasca, yoba Ibo pasomaha jochayamayamahi ni? “Joni ayamahuë” inish ca tsi xo toa “Joni huëtsa ahui biyamahuë” inish ca jasca cato. Jabi joni huëtsa ahui ma biyamamitsa. Jama, joni pi aqui tsi Dios pasomaha jari jochahi quiha. ¹² Jatsi quiniacaxëcahuë. Jia ca chanicana iquia. Jia ca acana, Dios yobá tsi ma copihacaxëhai quëshpi na. Jocha quima noqui paquëmahai ca yoba tsi xo naa. ¹³ Jabi ma noipiyamano tsi mato noiyamariaxëhi quiha Díos ri, nohiria bo ja copixëquë no. Jama, ma noipino tsi mato shinaxëhi quiha Díos. Díos copi qui raquëyamaxëqui mato ra.

Jabi jia ca jayahaina

¹⁴ Jatsi quiniacaxëcahuë. Jia ca pi ma ayamano tsi mahitsa tsi xo ma chahahuahaina iquia, ëbë xatë bá. Mahitsa tsi xo “Chahahuahua” i ma aina. ¿Jënahuariaxo raca Diós mato xabahamana, toca tsi ma chahahuahua no? ¹⁵⁻¹⁶ Jabi noitiria ca xatë ma bëchamitsa, naa raiti yama cato, paxnahai cato. Toa nohiria pi ma mëbiyamano tsi ¿mahitsa ma ni mato chani, naa “Jia tsi catá. Mimë yohohuë. Mimë sëyahué” i ja qui ma quë no? ¹⁷ Jascaria, mahitsa tsi xo Dios qui ma chitimihaina, nohiria ma mëbiyamaquë no. Toca ca chitimihai ca tsi xo bësoyama, mahitsa quiha.

¹⁸ Jabi ¿jënixëhi ni mai ca nohiria bo toca ca chahahuahai ca tsayahax na. “Mia tsi xo toa chahahuaharohaina pë. Ea ti tsi xo toa nohiria bo mëbihaina ra” iyamayamacaxëcahi ni? “Chahahuahai ca ë nori ca mato jismaxëquia, nohiria bo ë mëbihai cató no. ¿Mato tsa ni? ¿Jënahuariaxo raca chahahuahai ca ma nori ca ma jismana, nohiria bo mëbiyamapiquí na” icaxëceni quiha. Jabi tocacaxëceni quiha pë, mëbiyamahai ca chahahuahai ca yoati na ra. ¹⁹ “Huësti ca Dios yoi chahahuahua noa ra” ¿ii ni mato sa? Jabi jënima tsi xo toa ma yoahaina. Raquëhi tsi focacani quiha yoshi bo ri iquia, mahitsa ja yoacani ca nori. ²⁰ Jisa yoyoxëni ca cahëtimaxëni cabá. Mahitsa tsi xo toa Dios qui ma chitimihaina ra, jia ca ma ayamaquë no. Anoma quiha. ²¹ Noba naborëquëbo Abraham no tsayano ra. Altar ó tsi jahuë baquë Isaac ja janani quiha, acacati, naa Diós bënëni jascaria. Jabi toca tsi Abraham mëstëhuahacani quiha, ja ani cató no. Dios qui jia ini quiha ja anina iquia. ²² ¿Tsayayamacani? Altar ó tsi jahuë baquë ati janapama tsi jia tsi Dios qui ja chitimiquë. Toca tsi yonoconabëquiniquë ja chitimihaina, ja acaina, tihí cabo. Ja ani cató tsi jatihuahacani quiha Dios qui ja chitimihaina. ²³ Ja tsi xo toa “Dios qui Abraham chitimiquë. Ja chitimihai ca iqui tsi mëstë ja tocachanicuë” i Quënëhacani cabo niquë. “Dios rabëti” ja quënëhacani quiha.

²⁴ Jisi. Ja acai cató tsi mëstë tocachacahi quiha nohiria, ja chitimihai ca roha ja nomari. ²⁵ ¿Japa Rahab yamabo, naa joni mëtsaxëniacia cato? ¿Ja ani cató tsi mëstë ja tocachaca-yamani? Dios qui jia ini quiha toa ja anina ra, naa Josué yamabá raani ca jotamiscanaibo ja jonëmanina. Jonëmaxo tsi quiha quinia huëtza tsi jahari jato ja raaniquë, ja acacayamacano iquish na. ²⁶ Japi jia ca ma ayamano tsi bësoyama ca mahitsa tsi xo toa ma chitimihaina iquia. Shina yama ca yora jaharisi tsi xo toca ca chitimihaina; chamayama.

3

Noba jana bo

¹ Ichariama ixëti xo mato ó ca tiisimacanaibo iquia, ëbë xatë bá, nohiria bo oquë tsi noqui rëquëninicanaibo Diós copixëhai quëshpi na. ² Noba janá tsi jochaquí noa rë, noqui tëquëta. Huëstima tsi xo toa noba jana jochahaina rë. Jahuë janá pi yoi ca yoayamahi tsi jochayamahai ca mëstëxëniacia ca nohiria tsi xo toa iquia. Jahuë yora xatë bo tëquë chitiati mëtsa xo, jochayamati. ³ Jabi caballo jana xara freno, naa rëboohati janaqui noa. Toca tsi jahuë yora rëboohabonaqui noa, naa no cacatsai ca quiniá no. ⁴ Jasca, barco ri. Pistiama tsi xo toa jahuë yora. Chamaxëni ca yoshiní tsi raahacahi quiha. Jama, chiboohati pistiá tsi rëboohaquí quiha ibo, ja cacatsai ca quiniá no. ⁵ Jasca, pistiaria tsi xo toa noba jana ri, chama jaya ca racana ra. ⁶ ¿Japa chihi jana? Anomaria ca xabaca ca chihi tsamiti mëtsa tsi xo toa chihi jana pistia iquia. Toca xo noba jana yoi ri. Anoma quiha. Noba jabi tëquë yoshihuati mëtsa xo ra. Noba yora xatë bo oquë tsi xo toa ja yoi ca acaina, tënëtiya quima jahuë chama ja bichi iqui na. ⁷ Jabi yohina raëhuati mëtsa xo joni bo. Jasca, isa bo,

rono bo, sanino, tihí cabo raëhuati mëtsa ca xo. Ja raëhuahacayocani quiha. ⁸Jama, yama tsi xo toa jahuë jana raëhuati mëtsa cato iquia. Yoixëni tsi xo toa noba jana ra. Pasimahacatimaxëni quiha. Pahëxëni ca rono jana jascaria tsi xo toa ja acaina. ⁹Noba janá tsi Dios oquëhuaqui noa. Jasca, noba janá tsi noba xatë, naa Dios jariá tsi nëhohuahanish ca ocaguaqui noa pë. ¹⁰Jasca ca janá tsi yoi cato, jia cato, tihí cabo chaniqui noa pë. Anoma quiha. No to cayamano, ëbë xatë bá. ¹¹¿Paó tsi huahuabëquinahi ni jënë jia, jënë yoi cato? Iyamahi quiha. ¹²¿Jënahuariaxo raca dos ca bimi jamëri ca jihuí saihuana, ëbë xatë bá? Jahuë noma bimi roha saihuahi quiha. Jasca, jihuí bimi saihuatimaxëni tsi xo uva nishi ri. Jascaria, paó tsi huahuabëquinayamahi quiha jënë jia cato, jënë yoi cato ra. Japi noba janá tsi yoi ca chanihi tsi ¿jënahuariahax jia tsi no chanina?

Jabija ca tiisi

¹³¿Toá tsi mato xërëquë ma ni tiisi-tiisiria cato? Jatsi jahuë jabi jia ca ja jismano, jia ca ja acái cató no. Jahuë tiisi tsi ishima tsi nohiria bo ja mëbixëti xo iquia. ¹⁴Jama, caxahax pi mato xatë bo qui yosanahi tsi “Tiisi xo noa” iyamacana ra. “Oquë xo noa” iipiquí tsi jabija ca tiisi jayama xo mato ra. Quiahai ca tsi xo toa. ¹⁵Dios quima joyamahi quiha toca ca tiisi ra. Nohiria ba tiisi roha xo toa. Mato noma jabi quima johí quiha. Yoshi tsi xo toca ca tiisi ibo iquia. ¹⁶Anoma tsi xo mabë xatë bo qui yosanahaina. Jasca, anoma tsi xo mamë ma oquëhuahaina. Tocapimano tsi anomariaxëhi quiha toa mato xërëquë ca iquinahaina, jatiroha ca yoi ca acái ri. ¹⁷Jama, Dios mana ca tiisi tsi xo yoi yama. Jayapihi tsi iquinayamaxëqui mato. Ishima ixëqui mato. Toa tiisi pi jayaquí tsi Dios yoba nicaxëqui mato. Nohiria noixëqui mato. Huëtsa bo mëbixëqui mato. Shina rarinamahai ca iyamaxëqui mato. Paraxoma tsi Dios Chani yoayoixëqui mato. ¹⁸Jasca, jia tsi xo toa nohiria rabënahacanaibo. Jato iqui tsi jia tsi racanabëquiti mëtsa xo nohiria bo ra. Jatsi oquë tsi xo toa nohiria jia ca acaina jabë xatë bo bax na.

4

Mai ca jabi ya rabënahaina

¹¿Jënihax tsi iquinabëquicanai rë? ¿Jënixo tsi joi mëracanai rë? Mato noma jabi tahëhax tsi huëstima tsi xo toa jaha ma quëëhaina iquia. ²Binoma ca jahuë bo ó quëëqui mato pë. Jatsi jahuë ibo acasqui mato pë bixëna. Nohiria huëtsa ba jahuë bo ó quëëmishëni xo mato. Biyamapiquí tsi joi mëratsaqui mato rë, bicasquí na. Jama, jaha ma quëëhai ca biyamaqui mato, ma bëhoxyamahai iqui na. ³Jasca, Dios ma nicano tsi mato qui ayamahi quiha, anoma ca ó ma quëëhai iqui na. Mato noma jabi quëshpi roha tsi bicasqui mato pë; mamë ranihuahacati roha nori. ⁴Maí ca jabí-naxëni xo mato pë, naa joni huëtsa ya jobonacatsai ca ahui jascaria. Maí ca jabi pi noihi tsi Dios pasomaha xo mato. Maí ca jahuë bo, maí ca jabi bo, tihí cabo pi noihi tsi ¿jënahuariahax raca Dios rabëti bo imana? ⁵Quiniacaxëcahuë. “Ranoxëni tsi xo toa no nohó ca bësohai ca Espíritu Santo” ii quiha Quënehacanish cabo. Yoi ca pi ma ano tsi cahëhi quiha. ⁶Jasca, yoi ca ó pi no quëëno tsi jahuë chamá tsi noqui mëbihi quiha Dios no jochayamano iquish na. “Jamë oquëhuaxëni cabo pasomaha xo Dios; jama, noitiria cabo mëbiti nori” ii quiha Quënehacanish cabo. ⁷Jatsi Dios qui mamë mëacana. Yoshi pasomahacana. Tocapimano tsi mato quima jabaxëhi quiha. ⁸Dios qui basimacana. Ja qui pi ma basimano tsi mato qui basimaxëhi quiha jaa ri. Mato jabi yoi ca bahuëcana, dos ca shina jaya cabá. Jia ca ó roha

quëëcana. ⁹ Cohuëcana, yoi ca ma ani quëshpi na. Aracahuë. Huinicaahuë. Jasca, aracanaibo manëxëti xo toa tsiricanaibo. Cohuëxëni cabo manëxëti xo toa ranicanaibo iquia. ¹⁰ Ibo Dios bësojó tsi mahitsa ca ma manëno tsi mato oquëhuaxëhi quiha Dios. Mato mëbixëhi quiha.

Mabë xatë bo ocahuahaina

¹¹ Mabë xatë bo ocahuayamacana, ëbë xatë bá. Jabi Dios yoba pasomaha chaniqui mato rë, mabë xatë bo ma ocahuacquë no. Dios yoba ocahuahi quiha jabë xatë ocahuahai cato iquia, “Noinacana” i jahuë yoba ai iqui na. “E qui yoi tsi xo toa yoba” iipiquí tsi Dios yoba ocahuacqui mato ra. Tocapiquí tsi nicayamaqui mato. Toca tsi “Dios yoba oquë xo noa” iqui mato pë. ¹² Huësti ca roha tsi xo toa nohiria bo qui yoba anish cato ra. Jasca, huësti ca roha tsi xo toa nohiria bo Copiti Ibo-iboria, naa noqui xabahamati mëtsa cato. Jahuësti tsi xo toa nohiria quëyoti mëtsa cato. Jatsi quiniacaxëcahuë. ¿Jënahuarixaxo raca mabë xatë bo ma ocahuana?

Jaboqui — huëaquë — bari huëtsa

¹³ “Jaboqui, huëaquë ma ni, naa yaca qui caqui noa ra, yonocohi na” ¿ii ni mato pa? “Toa xo tsi huësti año raaxëqui noa parata bixëna” ¿icanai sa? Ea nicaparicahuë, tocacanaibá. ¹⁴ ¿Jënahuarixaxo ma ashariti ca ma cahëna? Cohi jascaria xo noa ra. Jisiquihax tsi yamatapihi quiha. Toca xo no bësohai ri. ¹⁵ Jama, Ibo Dios qui pi jiano tsi “Tocaxëquia, nëcaxëquia, bësopihi na” i no ti xo. Jënima tsi xo toa no yoahaina. ¹⁶ Jama, mamë oquëhuaqui mato pë, “Nëca tsi axëquia ra” i ma qué no Dios shinahaxma. Toca ca chanihai ca tsi xo anoma iquia. ¹⁷ Jabi jia ca pi ati cahëhi tsi jochaqui mato ma ayamaquë no.

5

Noitixëhi quiha rico cabo

¹ Ea nicaparicahuë, mato rico ca nohiria bá. Aracahuë iquia. Huini-huinicahuë iquia. Tsëquëti basima tsi xo toa ma tënëhaina ra. Noitiria xo mato. ² Jaboqui mahitsanahi quiha mato parata. Mahitsa tsi xo toa mato sahuëti copixëni cabo, naa jotoró pini ca sahuëti jascaria. ³ Pohinahi quiha mato plata, mato oro ri. Toa pohi tsi jismahacaxëhi quiha mato huashicoxëni ca jabi iquia. Parata jascaria quëyohacaxëqui mato ra. Jasca, ma catiahai ca copixëni ca jahuë bo tahëhax tsi copihacaxëqui mato ra. Jaroha ca bari tsi anomariaxëhi quiha toa mato pasomaha catiaha ca copi iquia. ⁴ Mato yonati ba saldo bo chitiaqui mato pë. Mahitsa mato bimi bëro tësacani quiha ra. Jato joi nicacahuë. Mato qui quësocani quiha ra. Jabi jato joi nicahi quiha Ibo-iboria ca Dios ra. ⁵ Rani tsi huëstima ca año bo raaqui mato nëa mai xo na. Jaboqui narisyamaqui mato. Huëstima tsi xo toa mato ranihuti jahuë bo. Xoaxëni ca chancho jascaria xo mato. Mamë roha shinaqui mato pë. Jaha bësopa. Chancho jascaria tsi xoaqui mato, tëpasti bari quëshpi na. ⁶ Mato ti tsi xo toa shinajiaxëni ca acascanaibo. Mato ti tsi xo toa jato ati ibo bo iquia. Chamayamaca xo rë, mato jënëmaxëna.

Yosanayamahaina — Bëhoxhaina

⁷ Yosanayamacana, ëbë xatë bá. Basima tsi xo noba Ibo johaina iquia. Huai ibo tsayacahuë. Yosanayamaqui tsi tësatiya manahi quiha. Jasca, oi ó pasohi quiha banahax na. ⁸ Yosanayamacana. Chamacana, basima tsi Ibo johai ca nori quëshpi na. ⁹ Jasca, quësonabëquiyamacana, ëbë xatë bá, Diós mato copiyamano. Tsëquëti basima xo toa ja copihaina ra. ¹⁰ Jabi Dios Chani yonish caba jabi tsayacahuë. Tënëpama tsi ja yosanayamacani quiha. ¹¹ Ma

shina-bēnoyamano. Shomahuahacahax cabo tsi xo toa tēnē-tēnēhax cabo iqui noa. Jabi tēnēniquē Job yamabo. Tēnēhi tsi ja yosanayamani quiha. Jarohari tsi Diós toa joni shomahuaniquē. Tihi ca jahuē bo cahēqui mato iquia. Ja iqui tsi shinajiaxēni ca xo Dios iqui noa. Noiquí tsi Job yamabo ja shomahuariani quiha.

¹² Jasca, mahitsa tsi Dios janē iyamacana, ēbē xatē bá. Chanihi tsi “Dios bēsojo xo tsi mia parayamaquia ra” iyamacana. Naipa, mai, jahuēcara ca huētsa cato, tihi cabá tsi jurar-ayamacana chaniquí na. “Aquia” iquí tsi mato joi ma jatihuati xo. “Ayamaquia” iquí tsi mato joi ma jatihuati xo. Tocapihi tsi quēsohacayamaxēqui mato.

¹³ ¿Tsohuē ni toa tēnēhai cato? Dios qui ja bēhoxti xo. ¿Tsohuē ni toa ranihai cato? Ja quēquēno. Dios ja oquēhuano. ¹⁴ ¿Toá ma ni mato iquicanaibo? Tsohuēcara pi iquiyoino tsi yosibo ja bax quēnacana, ja bax bēhoxti. Bēhoxquí tsi ja qui xēni japacana Ibobá janē no. ¹⁵ Ma chitimipino tsi jēnimahuahacaxēhi quiha toa iquihai cato, naa ma bēhoxhai cato. Jasca, masahacaxēhi quiha toa ja ani ca jocha bo ri. ¹⁶ Jatsi mato jocha bērohuanacana. Bēhoxcana jēnimahuahacati. Chamaxēni tsi xo toa mēstēxēni ca joni bēhoxhaina. ¹⁷ Jabi noqui jascaria Elías yamabo iniquē. Dios qui ja bēhoxrianiquē oi iyamano. Jatsi tres año y medio no tsi yama oi ini quiha. ¹⁸ Jatsi ja bēhoxtēquēniquē. Jatsi anomaria oi ini quiha. Saitēquētsi bimi ni quiha.

¹⁹⁻²⁰ Jabija ca quima pi mato ó ca huēsti ca casono tsi toa nohiria mēbiriaxēti xo toa jahuē jocha quima casomapihai cato. Jahuē yoi ca quinia bo quima pi jochahai ca bēsomaquí tsi toa nohiria xabahamahi quiha. Tēnētiya qui cayamaxēhi quiha ra. Toca tsi masahacaxēhi quiha jahuē huēstima ca jocha.

Primera Carta Del Apostol San Pedro

¹ Naa chani quënëhai ca Pedro ca ëa xo naa. Ea Jesucristó biniquë jahuë Chani yoati ibo iti. Jasca, naa chani raaquia carayanaba mai ó ca chahahuacanaibo qui, naa Ponto, Galacia, Capadocia, Asía, Bitinia, tihí ca mai qui pacanamahacaniish cabo qui. ² Jabi jahuë shinaná tsi Diós mato biniquë ra. Bixo tsi mato ja mështëhuaniquë Espíritu Santó no. Ja tocani quiha jahuë baquë Jesucristo ma nicanu iquish na. Jasca, jahuë Baquë jimí tsi mato bahuécatsi quiha. Ma shomahuahacano ra. Jia tsi ma rani-raniriano.

No xabahamahacahaina

³ Dios, naa noba Ibo Jesucristo Jahëpa qui “Gracias” i no ti xo ra. Anomaria tsi xo toa noqui ja noihaina. Noqui ja xabahamaniquë rësonish caba iti quima jahuë Jesucristo ja tëroni cató no. Ja iqui tsi mahitsa ma xo toa ja qui no chitimihaina. ⁴ Jasca, bësopama tsi noba copi jia ca ó pasoqui noa, ibohuaxëna. Quëyohacatimaxëni ca janacatimaxëni ca copi-copiria tsi xo naa. Naipá tsi xo ra. Jasca, toá tsi mato copi ó bësóhi quiha Dios mato bax na. ⁵ Jasca, ja qui ma chitimihai cató tsi jia tsi mato otóhi quiha Dios jatiroha ca barí no. Jatsi xaba rëso tsëquëno tsi mato bixëhi quiha. Toa barí tsi jisiquimahacaxëqui jatiroha ca no bax Diós rohahuahaina ra.

⁶ Ranitsicana no bax ja acai ca iqui na. Jaboqui pistia cohuë ma imitsa, chahahuayamacanaibá mato tënëmaquë no. ⁷ Jama, jënima tsi xo toa mato ja yosicanaina iquia. Toca tsi jismahacaxëhi quiha mato jia ca jabi yoi cato ra. Ja tsi xo toa jaboqui tanamahacahi quiha Dios qui ma chitimihaina, ma parayamahai ca jismahacano iquish na. Chihí tsi tanamahacahai ca oro jascaria tsi tanamahacahi quiha mato ri. Jaquirëquë mato oquëhuaxëhi quiha Dios ra. Jahuë baquë Jesucristo jono tsi jia tsi mato ocahuaxëhi quiha. Jasca, toa barí tsi mato qui chama axëhi quiha.

⁸ Jasca, anomaria tsi xo toa Jesucristo ma noihai ri, mato bëroma ja iquë ri. Tsayahaxma ri tsi ja qui chitimiriaqui mato ra. Ja iqui tsi rani-raniqui mato. Yoanoma tsi xo toca ca no ranihaina iquia. ⁹ Jatsi ranihi tsi jahuë rëso ó pasoqui mato ra, naa ma xabahamahaca-xëquë no. Jabi tocaqui mato ra, ja qui ma chitimihai iqui na.

¹⁰ Nicapáricana. Siri tsi quiha noba naborëquëbá, naa Dios Chani yoati ibo bá Quënëhacaniish cabo tsaya-tsyaniquë, noqui xabahamaxëhai ca xaba cahëcasquí na. Tsaya-tsayaxo tsi quiha toa xaba yoati tsi ja quënëcaniquë, cahëyoixoma. ¹¹ Jatsi, Cristó tënëxëhaina, jaquirëquë ja bësotëquëxëhaina, tihí cabo ja quënëcani quiha, jato shina qui Cristo shina chanini nori iqui na. Ja iqui tsi “Jënipixëhi ni naa sa?” i jaca ni quiha shinahi na. ¹² Tsayaxo tsi quiha mato bax ja cahëcani ca ja quënëcaniquë mato mëbixëna, jató-na nomari. Tihí ca tsi Diós jato jismani quiha quënëti. Jasca, jaboqui toa jasca ca jahuë bo mato yoahi quiha Dios Chani jia ca yoati ibo bo ri. Nai ax raahacaniish ca Espíritu Santó tsi mato qui ja chanicani quiha. Jabi naa jahuë bo cahëcascani quiha ángel bo ri.

No quënëhacaniina mështë ca jabi no jayano iquish na

¹³ Toa iqui tsi mato shina rohahuacana jia ca ati. Jaha bësocana. Mato shomahuaxëhi quiha Dios ra, jahuë baquë Jesucristo jisiquixëquë no. Toa ó

ma pasoxëti xo ra. ¹⁴ Jasca, quiniacaxëcahuë. Dios cahënox pari tsi yoi ca jabi ma jayapaoniquë. Jama, jaboqui jabija ca cahëqui mato. Jaha tsi toa quinia siri qui jahari bësoyamacana. Dios ma nicaxëti xo, jaboqui jahuë xocobo ma nori iqui na. ¹⁵ Jabi mështë tsi xo Dios ra, naa mato quënanish cato. Jatsi jatiroha ca ma acai cató tsi mështë ca jabi jayacana mato ri. ¹⁶ Jasca, “Mështë icana, mështë ë nori quëshpi na” ii quiha Dios Quënëhacanish cabo ó no.

¹⁷ Jatsi quiniacaxëcahuë. Nohiria bo copixëhi quiha Dios ra jahuë mështëxëni ca quiniá no. Copihacacaxëceni quiha jatiroha ca ja acanai ca quëshpi na. Jatsi ja qui ma chahahuaxëti xo, naa mai tsi bësóqui na. Jasca, ja qui ma raquëxëti xo, “Jahëpá” i ja qui ma quë no. ¹⁸ Shinaparicana. Anomaria ini quiha toa mato quëshpi tsi Diós copinina ra, naa mato ja xabahamaniquë no. Mato naborëquëbá jabimani ca mahitsa ca jabi bo quima mato ja paquëmani quiha. Paquëmaxo tsi yoinahai ca parata, oro, tihí cabo ja ayamani quiha mato copixëna. ¹⁹ Jama, oquëria ca Cristo jimi ja ani quiha. Rësopama tsi Dios qui acacanish ca oveja ofrenda jascaria jahuë Cristo ini quiha, naa chëquëpistia yamaria inish ca oveja jascaria. Yama ini quiha jahuë jocha ra. ²⁰ Jabi mai nëhohuahacanox pari no tsi Diós jahuë baquë Cristo bini quiha noqui ja shomahuano iquish na. Jaboqui jisiquihi quiha naa jahuë bo tēquë, xaba rësó no. ²¹ Ja iqui tsi Jesu bësotëquëmanish ca Dios qui chitimipiqui mato ra. Jaboqui Cristo oquëhuanish ca Dios qui roha chitimiqui mato ra.

²² Tsayacahuë. Jabitihuahacanicuë mato jabi, jabija ca ma nicani iqui na. Ja iqui tsi mahitsa ma xo toa mabë xatë bo ma noiha. Jaha tsi mato shinaná tsi noinacana paraxoma. ²³ Tsayacahuë. Jaboqui jabi paxa ca jaya xo mato ra, ma cotëquëni iqui na. Mato qui toa jabi paxa ca mato rësóhai ca nabá ayamani quiha. Jama, ma jabitihuahacani quiha, Dios i-ipaohai ca Chaní no. ²⁴ Jabi tocahi quiha Quënëhacanish cabo ri:

“Jatiroha cabo tsi xo huasi jascaria.

Chonihí quiha.

Ririquihi quiha jahuë joa ri.

²⁵ Jama, Iboha Chani tsi xo toa i-ipaohaina ra.”

Jabi naa Chani tsi xo toa mato qui yoahacanish ca Chani Jia cato ra.

2

¹ Dios Chani iqui tsi ma acai ca yoi ca niacana ra. Ma parayamano. Dos ca jabi bo jayamacana, naa huësti ca jia, huëtsa yoi, tihí ca bá tsi nohiria bo paraxëna. Anoma quiha. Jasca mato huëtsa jahuë bo ó quëëmisyamacana. Jasca, ranimisyamacana. Tihí cabo tsi xo anoma cato. ² Jama, Dios Chani ó quëëcana, naa cobëna ca baquë xoma ariacatsai jasca cato. Dios Chani tsi xo toa noqui shinahamayoiha ina iquia. ³ Jabi toca tsi Diós mato shomahuayamayamani?

Noba maxax tsi xo Cristo

⁴ Ibo qui bëcahuë, naa noqui xabahamati Maxax icanai cato. “Mahitsa tsi xo toa Maxaxa” ii quiha nohiria bo rë tétiahi na. Jama, naa Maxax Diós biniquë ra. Ja qui copixëniria xo. ⁵ Jabi maxax bo jascaria xo noqui chahahuacanaibo ri. Noqui ri bicatsi quiha Dios ra, naa maxax xobo acai ca joni jascaria. Oquë ca maxax bo bixo tsi huësti ca maxo-maxoria acatsi quiha Dios, naa xobo-xoboria acacahai jascaria. Noqui rohahuacatsi quiha jahuë arati ibo ba maxo iti. Toca tsi ja qui oquë-oquëria ca ofrenda bo aapixëqui noa, noba Jesucristó no. Ja iqui tsi jaboqui Dios qui basimapiqui noa ra. ⁶ Jabi toca ca noqui yoahi quiha Quënëhacanish cabo ra:

“Sion xo tsi oquë-oquëria ca Maxax janaquia jahuë papoto aquí na.

Copixēniria tsi xo naa Maxaxa ra.

Bērabipistiyamariaxēhi quiha naa Maxax qui chitimicanaibo” ii quiha.

⁷ Jabi naa Maxax icanai ca ó quēēriacani quiha chahahuacanaibo, jama, chahahuayamacanaibo qui mahitsa ja nori rē.

“Oquēria ca maxax ja iqui quiha naa yosibá niaha ca Maxaxa ra”

ii quiha Quēnēhacanish cabo. ⁸ Jasca,

“Nohiria bá yoshihuahai ca Maxax tsi xo naa” ii quiha.

Ja yoshihuahacacani quiha ra, Dios Chani ja nicasyamacani iqui na. Jato shinari ja ini quiha.

⁹ Jama, Diós mato biniquē ra, oquēria ca nohiria bo iti, naa arati ibo ba maxo iti. Ma aquēquēmahacani quiha Dios mēstē ca nohiria bo iti. Jasca, ma aquēquēmahacani quiha Diós acai ca jiaria ca jahuē bo nohiria bo yoati. Jabi tsēmo quima mato tsēcanish ca Dios tsi xo naa ra. Huēa ó ca mato jananish ca ma oquēhuano. ¹⁰ Dios nohiria bo ma iyamapaoniquē; jama, jaboqui jahuē nohiria bo ma nori. Dios noihai ca ma cahēyamapaoniquē, jama, jaboqui shomahuahacahax cabo ma nori.

Dios bax no yonocoxēti xo

¹¹ Mato yobaparcasquia, ēbē xatē bá. Naa maí tsi bēsopama tsi carayanabo roha xo noa. Noba iti yoi ma xo ra. Ja iqui tsi mato shina pasomaha nianahai ca jocha quima basicana. Anoma quiha. ¹² Jasca, chahahuayamacanaibo ya racanabēquiquí tsi jabi jia ca jayacana. Jatsi mato pi ja ocahuacano tsi jato qui bēroriāxēhi quiha jia ca ma acana ra. Jasca, Cristó jono tsi ma acai ca quēshpi tsi Dios qui “Gracias” icaxēcani quiha jato ri ra toa barí no.

¹³ Jasca, Ibo iqui tsi gobierno yoba tēquē nicacana. Maí ca chama-chamaria ma nicaxēti xo. Jatiroha ca ó bēsohi quiha. ¹⁴ Jasca, ja raahai ca prefecto bo ma nicaxēti xo. Ja raahacacaquē yoyocanaibo copiti, jia cabo mēbiti.

¹⁵ Jatsi jato yoba nicacana. Dios jaha quēēhai ca tsi xo toa. Tocapimano tsi pasicaxēcaqui. Mato ocahuapiyamaxēhi quiha toa yoyohai ca joni bo, jia ca roha ma acana ca quēshpi na. ¹⁶ Jabi huēsti roha tsi xo toa mato yonati ibo yoi cato, maí ca chamabá-na ma nomari. Jama, tsēquēma xo mato, mato maí ca chama bá yoba chahahuayamati, yoyoti. Dios yonati yoi bo ma nori iqui tsi quiniacaxēcahuē jabi jia ca jayaxēna. ¹⁷ Jatiroha ca joni bo noicana. Mabē xatē bo noiyoicana. Dios qui raquēcana. Maí ca chama-chamaria chahahuacana. Tihi ca tsi iquia yobahi na.

Chama bo qui nicahaina

¹⁸ Mato chama bo nicacana, yonati bá. Jabi bēro tsi xo toa mato chama bo chahahuahaina, shinajaxēni cabo ja icaquē no. Jama, jato chahahuacana ra, yonamixxēniria ja icaquē ri. ¹⁹ Mahitsa pi mato ja tēnēmacano tsi mato shomahuaxēhi quiha Dios, jahuē shina ati ó ma quēēquē no. ²⁰ Jama, yoi pi ma ano tsi, ¿jēnahuariāxo Diós mato shomahuana, mato ja tēnēmacaquē no? ²¹ Tēnēti Diós mato quēnani quiha, mato bax Cristó tēnēni iqui na. Anomaria ca quiniā noqui ja ani quiha banahuati. Jatsi no tocaxēti xo noqui ri. ²² Jochapistiyamariajaniquē. Quiapistia-yamariajaniquē. ²³ Noba Ibo ja ranicaquē tsi quiha ja quēbiyamaniquē. Tēnēquí tsi ja roamisyamaniquē. Jama, Jahēpa Dios qui ja chitimiyoiniquē, naa mēstēxēni ca Copiti Ibo-iboria cato. Tihi ca tsi ja ini quiha. ²⁴ Jasca, jamē xo tsi jahuē yorá tsi noba jocha ja boyoniquē cruzo xo na, jocha qui no rēsono iquish na, mēstēxēni ca jabi no jayano iquish na. Ja tsacahacani cató tsi no jēnimahuahacaniquē ra. ²⁵ Jabi bēnohai ca jānyama ca bocanai ca oveja jascaria tsi ma i-ipaoniquē. Jama, jahari mato Obēso ca qui ma bēcaquē, naa mato shina Obēsoti Ibo qui.

3

Ahui bo jatsi bënë bo

¹⁻² Jasca ca quiniá tsi jato bënë bo ahui bá nicaxëti xo ra. Tocapijacano tsi jato jabi jia ca tsayacaxëcani quiha jato bënë bo. Jasca, jato qui chanixoma tsi Ibo qui jato Dios Chani chahahuayamacanai ca bënë bo bëbocaxëcani quiha, tocaquí na. Jato qui jia ca jato ahui bá acanai ca tsayahax tsi ranicaxëcaqui. ³ Jasca, quiniacaxëcahuë, ahui bá, ma jianaquë no. Mato boo ma jiahuahaina, mato moyo bo, parata bo, raiti bo, tihi cabá tsi jianayamacana iquia. Sahuëti ca jahuë bo roha tsi xo naa. ⁴ Jama, jianahi tsi oquë tsi xo toa mato shina ma jiahuahaina. Oquë tsi xo toa ishima ca shina jiaxëni ca jabi jayahaina iquia. Toca ca jabi tsi xo toa Dios qui copixëneria cato, ahui bá. ⁵ Toca tsi noba naborëquëbo yamabo jianapaoni quiha, naa Dios qui chitiminish ca yoxa bo. Toca tsi jianaxo tsi quiha jia tsi jato bënë bo ja nica-nicapaocaniquë. ⁶ Jabi toca tsi Sara yamabo i-ipaoni quiha. Jahuë bënë Abraham yamabo ja nicanicani quiha. Nicañax “Noho ibobá” i ja qui ja paoni quiha, ja qui chanihi na. Jatsi jahuë chahitaxocobo yoi bo xo mato, jia ca pi ma ano tsi, Dios, mato bënë bo, tihi cabo qui ma raquëpiyamano. ⁷ Jasca, mato ri joni bá. Jia tsi mato ahui bo mëbicana, jato bëta racabëquinaquí na. Tsayacana. ¿Joni bo jaharisihi ni jato coshi pa? Iyamahi quiha. Jama, mato bëta jaharisi tsi xo toa Dios quima ja bicanaina, naa Diós mato noihaina, mato ja bësomahaina. Jatsi jato mëbicana, ma bëhoxhai ca quëtiahacayamano iquish na.

Jia ca acanai iqui tsi ma tënëmitsa

⁸ Jarohari tsi jia tsi racanabëquicana. Mabë xatë bo noicana. Mamë shinamixëni iyamacana. ⁹ Mato pasomaha pi tsohuëcaracá yoi ca ano tsi ja bëta i-ibëquiyamacana. Mato pi ja ranino tsi jahari ranimisyamacana. Jama, toca cabo ma mëbixëti xo iquia. Tihi ca tsi xo jia ca ati. Jia ca ati ma quënahacani quiha, mato yoi Diós shomahuaxëno iquish na. ¹⁰ Dios Chani shinaparicana:

“Quiniacaxëcahuë, bësyoicatsai cabá.

Mato jana ó bësocana, yoi ca chaniyamaxëna.
Jasca, ma quiayamano.

¹¹ Yoi ca quima ma casoxëti xo jia ca axëna.

Mato huëtsa bo ya rabëñati ó ma quëxëti xo.

Tihi ca tsi axëti quiha toa huëstima ca año bo bësocasanaibo.

¹² Jatsi quiniacaxëcahuë.

Mëstëxëni cabo ó bësohi quiha Ibo Dios.

Ja bëhoxcano tsi nicahi quiha ra.

Jasca, yoi ca acanaibo qui caxaxëneria xo”.

Tihi tsi ii quiha Quënëhacanish cabo ra.

¹³ ¿Jëñahuariaxo raca nohiria bá mato yoshihuana, jia ca ma acasquë no ra? ¹⁴ Jama, jia ca ma acai iqui tsi tënëpihi tsi ma ranixëti xo. Tënëti qui raquëyamacana. Jasca, shina-huëjënayamacana. ¹⁵ Tënëpiquí tsi Cristo chahahuacana, mato Ibo yoi ja nori iqui na. Jasca, “¿Jëñixo tsi Cristo chahahuahai sa?” i mato qui tsohuëcara pi no tsi iticatomano jia tsi jato quëbixëna. ¹⁶ Quëbiquí tsi ishima tsi quinia jia cató tsi quëbicana caxaxoma. Jasca, mato shina qui yoi ca iyamacana. Toca pi imano tsi bërabixëhi quiha nohiria bo, mato pasomaha ja chanicauë no. Mahitsa ca chani ja nori ca jismahacaxëhi quiha ja yoacanaina ra. ¹⁷ Shinaparicana. Oquë tsi xo toa Cristo iqui tsi ma tënë-tënëhaina ra, Dios shina pi ja ino. Jama, yoi ca quëshpi tsi ma tënëpino tsi mato shina ri tsi xo. Anoma tsi xo toa ra. Oquë

tsi xo toa jia ca quëshpi tsi ma tènèhaina iquia. ¹⁸ Nicaparicana. ¿Tènèhai ca quima Cristo paxani pa? Iyamahi quiha. Jochacanaibo quëshpi tsi ja tènèni quiha, jochayama ja iquè ri. Huèsti roha tsi ja nani quiha Dios qui mato boxèna. Ja acacaniquè. Jama, Espiritu Santó tsi ja bèsomahacatèquèniquè ra. ¹⁹ Jasca, Espiritu Santó tsi presó ca rësonish cabo qui ja cani quiha Dios Chani yoaxèna. ²⁰ Jabi Noé tiyá tsi quiha Dios Chani nicamíxëniria ca rësonish cabo tsi xo toa ja canina. Siri tsi yosanaxoma tsi Diós jato mana-manani quiha mahitsa rë. Toatiyá tsi Noé noti chahitaxèni ca ani quiha. Ja aquè tsi ocho ca nohiria bo roha paxani quiha jènè quima. ²¹ Jatsi ¿jahuè noqui jabimahi ni toa jènè ra? Ashimati jènè jascaria xo iquia. Jatsi jaboqui toa jènè nacoqui noa xabahatiya qui jicoxèna. No acai ca yoi ca bahuèyamahi quiha toa jènè iquia. Jama, noba shinaná tsi Dios no parayamahai ca jismahi quiha. Jatsi noqui xabahamahi quiha Dios, jahuè Jesucristo bësotèquèni cató no. ²² Bësotèquèhax nai qui ja jiconiquè. Jaboqui tsi Dios mènècayá xo. Toa xo tsi ángel bo tèquè, mana ca chama bo, tihi cabo yonahi quiha.

4

Tiisi noqui acacanina Dios baxyonocoti

¹ Shinaparicana. Anomaria Cristó tènèhai iniquè ra. Ja iqui tsi ja shinani jascaria tsi ma shinaxèti xo mato ri iquia. Jabi jocha chama quima paxaha nori quiha toa tènèhai cato ra. ² Tènèhax tsi maí ca jabi yoi bo ó quèèriyamahi quiha bèsahi na. Jama, Dios shina ó quèèxèhi quiha axèna. ³ Jabi chahahuanox pari tsi Dios cahèyamacanaiba quinia yoi bo ma ó quèèpaoniquè banahuaxèna. Bèrabiria ca jahuè bo ma a-apaoniquè ra. Jasca, toatiyá tsi anomaria ini quiha toa jènè ma a-abèquinahaina. Mā pahèpaoni quiha. Jasca, mahitsa ca dios bo qui ma ara-arapaoniquè. Tihi tsi xo toa ma a-apaonina iquia. ⁴ Jatsi toa quinia yoi bo ma niahai iqui tsi ratèhi quiha nohiria bo, jato bèta ma bohoyamaquè no, yoyoxèna. Jatsi mato ranicani quiha pè. ⁵ Jama, huèsti ca barí tsi Copiti Ibo-iboria bèsajo xo tsi quèbicaxècani quiha, jatiroha ca ja acana ca quëshpi na. Bèsocanaibo, jasca, rësonish cabo, tihi cabo copixèhi quiha ra. ⁶ Ja tsi xo toa rësonish cabo qui ri Dios Chani Jia ca yoahacanicquè, naa jocha quëshpi rësoyonish ca nohiria bo qui. Jatsi jato qui Dios Chani yoahacani quiha, Dios shina ja nicacanaí cató tsi ja xabahamahacacano iquish na jato ri.

⁷ Jatsi quiniacaxècahuè. Basima tsi xo jahuè rëso. Ja iqui tsi jaha bèsocana. Jia tsi shinacana jahuècara anox pari. Tihi ca tsi ma atí xo oquè tsi bèhoxèna. ⁸ Jasca, noinabèquiriacana. Oquèria ca jabi tsi xo naa. Noiyoiquí tsi jochahuaxèni cabo noipixèqui mato. ⁹ Jasca, jia tsi mabè xatè bo mato xobo qui jicomacana, yosanaxoma. ¹⁰ Jabi mato tèquè qui tiisi bo acacani quiha mabè xatè mèbiti. Diós mato shomahuani iqui tsi tocacana, naa othai ca empleado jascaria. ¹¹ Jia tsi Dios quima ca chani yoaxèti xo toa chanipihai cato. Toa tiisi jaya quiha. Jia tsi nohiria bo mèbixèti xo toa mèbipihai cato, naa ja qui Diós acai ca chamá no. Ja tocacano ra, jatiroha ca quiniá tsi Dios oquèhuahacano iquish na, jahuè baquè Jesucristó no. Jabi ja qui oquè, chama, tihi cabo acacapaoxèti xo. Amén.

Ja tènècanaina Cristó-na bo jaca nori iqui na

¹² Ratèyamacana, èbè xatè bá, tènètiya ma nacoquè no. Tènèti ó no pasoyoxèti xo iquia. ¹³ Tènèpihi tsi rani-ranicana, Cristo jascaria tsi ma tènèpihai iqui na. Tocapimano tsi anomariaxèhi quiha ma rani-ranihaina Cristo oquè

jisiquixëquë no. ¹⁴ Jahuë janë iqui pi nohiria bá mato ranino tsi shoma xo mato, oquëria ca Espíritu Santo mato ó nori iqui na. Mato ó tsi xo Dios Shina-shinaria ra. ¹⁵ Jasca, tobi xo toa jato jocha quëshpi bo tënëcanaibo ri. Tobi quiha ati ibo bo, yomacanaibo, anoma ca acanaibo, yobamixëni cabo. Tihi ca quëshpi bo tsi ma tënëyamao ra. Ma tocamaxëti xo. ¹⁶ Jasca, Cristó-na bo ma nori iqui tsi tënëhi tsi bërabiymacana. Toca pi tënëhi tsi Dios qui “Gracias” icana, “Dios baquë” ma quënahacaha quëshpi na.

¹⁷ Nicaparicana. Tsëquëquë nohiria bo copiti chitahë xabaca ra. Jariapari copihacaxëhi quiha Dios nohiria yoi bo. Jabi noqui chahahuacanaibo pi Diós copino tsi çjënahuariahax Dios copi jahuë Chani chahahuayamacanaibo paxana? ¹⁸ Jasca, bëro yama pi mësëxëni cabo xabahamahacano tsi çjënahuariahax raca toa jochahuaxëni cabo xabahamahacana? ¹⁹ Ja quëshpi tsi Dios, naa jatiroha ca Nëhohuati Ibo shinajiaxëni ca chahahuayoixëti xo toa Dios bax tënëcanaibo. Tënëpama tsi jia ca ja acaxëti xo.

5

Chahahuacanaibo qui acacani ca yoba

¹ Mato iglesiá ca yosibo pari yobacasquia, naa yosi ë nori cato. Cristó tënëni ca ë jisniquë ra. Jasca, jahuë oquë jisiquino tsi jahuë chama xatënëxëquia ra.

² Jatsi nicaparicana. Jia tsi mato qui Diós ani ca xatë bo otocana, naa oveja obëso ca jascaria. Yosannahaxma tsi toa yonoco ati ó ma quëëti xo, ranihi na. Tocacana, Dios jaha quëëhai ca ja nori iqui na. Parata quëshpi roha tsi ayamacana; ma acatsai ca ja nori iqui na. ³ Otopama tsi mato qui acacaniish ca xatë bo yonamisyamacana. Jama, mato jabi jiaxëni ca jato jismacahuë banahuati. ⁴ Jatsi Pastor-pastoria jono tsi chonitimaxëni ca oquëria ca chaha bixëqui mato ra, ma acai ca quëshpi na.

⁵ Jisa joni xocobá. Mato yosiba yoba nicacana. Ishimaria ca jabi ma sahuëti xo mato huëtsa mëbipixëna. Jabi,

“Jamë shinamixëniira cabo pasomaha xo Dios ra.

Jama, shinajiaxëni cabo mëbihi quiha”

ii quiha Quënëhacanish cabo. ⁶ Jatsi Dios chama bësojó tsi mënicana. Tocapi-mano tsi mato oquëhuaxëhi quiha Dios, ja qui jia ca xabacá no. ⁷ Jasca, ja qui bocana, shina-huëjënahi na. Jatiroha ca yoacana iquia. Mato mëbicatsi quiha ra. ⁸ Jasca, rajinayamacana. Jaha bësocahuë. Cama jascaria tsi cohi quiha Satanás tsohuëcara picatsi na. ⁹ Mato ja acasno tsi jabayamacana. Ja pasomaha iquinapama tsi jia tsi Dios qui chitimicana. Jasca ca quiniá tsi mahë xatë bá tënëyoni quiha jato ri. Toa ma shina-bënoyamano. ¹⁰ Jaboqui tanaroha pistia tsi xo toa ma tënëhaina iquia. Jaquirëquë mato jabitihuaxëhi quiha Dios, naa mato shomahuacatsai ca quënanish ca Dios. Jabi ma quënahacani quiha, jahuë i-ipaohai ca oquë, jahuë chama, tihi cabo xatënati jahuë Jesucristo yahax na. Jatsi jabitihuaxo mato chamahuaxëhi quiha. Mato mëbixëhi quiha. ¹¹ I-ipaohai ca chama jaya ca tsi xo naa ra. Amën.

Chani rëso

¹² Jabi chani pistia mato qui quënëquia, mato chamahuacasquí na. Paraxoma tsi Dios jabija ca quiniá yoati quënëquia. Jabi mato mëbixëti xo Dios, ë quënëhai ca yoba jabija ca quima ma casoyamano iquish na. Jatsi naa yoba ó tsi niicana. Jasca, naa chani mato qui boxëhi quiha Silvano, naa ëbë xatë shinajiaxëni cato.

¹³ Jasca, mato joihuacatsi quiha toa Babiloniá ca chahahuacanaibo. Jabi Dios xocobo iti ja quënahacani quiha jato ri, naa ma quënahacani jascaria.

Jasca, mato joihuahi quiha ëbë baquë Marcos ri. ¹⁴Jasca, jia tsi mato huëtsa joihuacana, jato noiquí na. Mato Cristó-na bo rani-ranino. Iquë.

Segunda Carta Del Apostol San Pedro

¹ Simón Pedro, Dios Chani yoatí raahacanish ca ëa xo naa, naa Jesucristo yonati cato. Ea ti tsi xo toa naa carta raati ibo. Nobë xatë bo, naa noqui chahahuanish ca jasca cabo qui raahacahi quiha naa chani. Noba Dios, noba Xabahamati Ibo Jesucristo, tihi caba mëstë tsi ma xabahamahacanicuë mato ri. ² Mato ja shomahuacano. Noba Dios, noba Ibo Jesu, tihi cabo ma cahëhai cató tsi ma rani-raniriano.

Chahahuacanaibo jabi bo

³ Jahuë chamá tsi noqui jatiroha ca jahuë bo Diós aniquë mëstë ca jabi no jayano iquish na, jia tsi no bësono iquish na. Ja tocani quiha noqui quënanish ca yoi ca no cahëyoino iquish na. Tsayacahuë. Jahuë oquë, jahuë mëstëxëni ca jabi, tihi cabo no bëta xatënacatsi quiha ra. ⁴ Tobi xo toa no bax ja acatsaina. Parayamahi quiha. Noqui jahuë jabi-jabiria acatsi quiha, no ani ca jocha quima no paxapino iquish na. Jabi noqui quëyocatsi quiha toa maí ca quinia bo rë. ⁵ Tihi tsí cahëqui mato ra. Ja iqui tsi jaboqui jia ca ma ati xo, ja qui chitimixo na. Jianaxo tsi Dios jahuë bo ma cahëyoixëti xo. ⁶ Cahëhax mato shina mëquiti ma jabixëti xo. Mëquihax tënëti ma jabixëti xo. Jabixo Dios jabi-jabiria ma sahuëxëti xo. ⁷ Sahuëxo mabë xatë bo ma mëbixëti xo. Mëbihax jato noiti ma jabixëti xo. ⁸ Tihi tsi xo toa ma jabixëti cato iquia. Toca ca jabi bo pi ma jabino tsi anomariaxëhi quiha ma acaina. Tihi tsi xo toa noba Ibo Jesucristó mato cahëmayoihaina. ⁹ Jama, bëco tsi xo toa naa jabi bo naris-hai ca nohiria. Jahuë quinia cahëyamayoihi quiha. Ja ani ca jocha masahacani ca shina-bënohi quiha rë.

¹⁰ Jatsi nicaparinana, ëbë xatëbá. Mato Diós quënaniquë ra, jahuë-na bo iti. Ja iqui tsí aria-ariacana toa ma nori ca jismaxëna. Tihi ca pi ahi tsi jocha qui paquëyamaxëqui mato iquia. ¹¹ Tocapihi tsi jia tsi noba Ibobá ototopaohai ca qui jicopixëqui mato. Jasca, jia tsi mato joihuaxëhi quiha noba Xabahamati Ibo Jesucristo, ma jicoquë no.

¹² Tihi ca ë quënëhai ca cahëyoiqui mato iquia. Jama, no bax Ibobá acatsai ca jahuë bo mato nicatequëmaquia, ma shina-bënoyamano iquish na. ¹³ Bësopama tsi noho yonoco tsi xo toa naa jahuë bo mato chahahuamahaina, ma shina-bënoyamano iquish na. ¹⁴ Tocaquia ra, tsëquëti basima ë rësoxëhai ca nori iqui na. Tihi tsi noba Ibo Jesucristó ëa yoani quiha. ¹⁵ Ja tsi xo toa quinia-quiniaquia jatiroha ca mato yoaxëna. Jabi ë rësono tsi naa jahuë bo ma shina-bënoyamano ra.

Cristo oquë Pedró jinsina

¹⁶ Jia tsi noba Ibo Jesucristo chama, ja joxëhaina, tihi cabo mato no yoaniquë. Mahitsa ca chani ma xo toa mato no yoanina ra. Noba bëro yoi tsi Jesu chama no jisniquë ra. ¹⁷ Maca cacha ax tsi ja oquëhuahacani quiha. Toa xo tsi ja qui chama Jahëpa Diós aniquë. Tihi ca tsi ja bax acacani quiha, naipá ca Dios joi ja qui chaniniquë no. Anomaria toa joi ini quiha, naa “Noho baquë yoi tsi xo naa. Ja qui rani-raniquia ra” i ja qui joi quë no. ¹⁸ Jabi toa chani, toa joi, tihi cabo no nicayoniquë ra, toa maca-macaria ó tsi ja bëta xo na.

¹⁹ Tihi cabo tsayaxo jabija ca Dios Chani yoati ibo bá quënëni ca nori ca cahëyoiqui noa. Ja parayamacani quiha. Ja iqui tsi ja quënëceni ca

chahahuacana. Tsēmoria ca ití ca huahuahai ca lamparina jascaria xo toa ja quēnēcanina. Ma chahahuapino tsi mato shina ó tsi huahuaxēhi quiha Huishti Bēroshini icanai cato. ²⁰ Jasca, Quēnēhacanish cabo tsayapama tsi nomē xo tsi Dios Chani cahētimaxēni xo noa. Yama tsi xo toa jamē xo bērohuapilai cato iquia. ²¹ Jama, noqui mēbihi quiha Espiritu Santo, no cahēyoino iquish na. Jabi Dios bax joni bo chaniquē tsi quiha Espiritu Santó jato mēbiniquē. Toca tsi Dios Chani yoi ca ja yoacani quiha.

2

Mahitsa ca jabimacanaibo Judas 4-13

¹ Quiniacaxēcahuē. Mato xērēquē tsi xo huēsti huēsti ca quiaxēni ca maestro bo iquia, naa siri tsi Israél ca xērēquē tsi Dios Chani yoahi mari quiaxēni cabo ini jascaria. Ishima tsi mahitsa ca chani, naa Dios pasomaha ca chani, yoacaxēcani quiha pē. Jato Copinish ca Ibo quima ja casocani quiha pē. Casoxo mēri jamē quēyocaxēcani quiha. ² Jama, jato bērabiria ca quinia banahuacaxēcani quiha huēstima cabo rē. Jatsi jato tahēhax tsi yoshihuahacaxēhi quiha Dios jabija ca quinia rē. ³ Parata ó quēmíxēniria ca nohiria ca xo. Ja quēshpi tsi mēri mato yobacascaxēcani quiha. Jama, jato copi jaboqui rohahuahi quiha Copiti Ibo-iboria. Siri tsi jato qui Dios quēsoni quiha. Joti basima xo jato copi ra.

⁴ Quiniacaxēcahuē. Dios copi quima paxayamaniquē toa jochanish ca ángel bo. Tēnētiya qui jato Diós nianiquē. Baquish nēpax tsi jato ja janani quiha nēxaxo na. Toa xo tsi Dios copiti bari-bariria mana-manacani quiha. ⁵ Jasca, Noetiyá ca nohiria bo ri. Dios copi quima ja paxayamacaniquē jochahax na. Diós jato copiniquē ra, jēnē चाहितaxēni ja raani cató no. Noé roha, naa mēstē ca chani yoanish cato, jahuē siete cabo, tihí cabo roha xabahamahacani quiha toatiyá no. ⁶ Jasca, yaca Sodoma, yaca Gomorra, tihí cabo ri Diós quēyoniquē chihí no. Mishpo ja manēyocani quiha. Toca tsi Diós jato copiniquē, ixēhai ca nohiria bá jahuē copi-copiria cahēyoino iquish na. ⁷ Jama, copinox pari tsi Lot yamabo, naa shinajiaxēni ca joni Diós tsēcániquē. Jabi toá ca jochahuaxēniria ca nohiria bo qui Lot yosanani quiha. ⁸ Jatiroha ca bari jato naxērēquē tsi toa shinajiaxēni ca joni racaracapaniquē. Anomaria ini quiha toa ja tsayanina ja nicanina iquia. Tsayahax ja cohuēnariani quiha. ⁹ Jatsi ¿tsayacanai? Jahuē xocobo yoi cabo tsēcati cahēqui Dios ra, jochahuaxēni cabo ja copixēquē no. Jasca, jahuē copiti bari quima paxayamaxēhi quiha maí ca yoixēni cabo ra, toa bari quēshpi tsi jato Diós janahai iqui na.

¹⁰ Toa bari tsi anomariaxēhi quiha chotamíxēniria caba copi ra. Jasca, anomariaxēhi quiha toa Dios yoba niacanaiba copi ri, naa mahitsa ca maestro ba copi. Jamē shinamíxēniria ca nohiria bo tsi xo naa maestro bo iquia. Raquēxoma tsi iglesiá ca yosibo ocahuacaqui pē. ¹¹ Jisna. Toca tsi iyamacani quiha toa Dios bēsojó ca jato oquēria ca ángel bo ri. Ja pasicani quiha. Jama, anomaria tsi xo toa maestro ba jabi ra. ¹² Cahēxoma tsi nohiria bo ocahuacani quiha pē. Caxaxēniria ca acacati ca yohina jascaria ca xo ra. Jama, yohina bo jascaria tsi quēyohacaxēcani quiha jato ri iquia. ¹³ Tsayacahuē. Anomaria tsi xo toa chahahuacanaibo ja tēnēmanina ra. Ja quēshpi tsi copihacaxēcani quiha. Jasca, jato qui jia tsi xo barihaní boho-bohocanaina. Mato bēta yoyocascani quiha pē. Anoma quiha. Bērabiria tsi xo toa ja acanaina iquia. ¹⁴ Yoxa bo tsayamíxēniria ca xo. Jochati jēnētímaxēni ca xo. Shinahama ca

cahëyoyama ca xatë bo paracani quiha pë. Jasca, parata ó quëëmíxëniria ca xo. Tihi tsi xo toa jato jabi quiha. Jabi toca ca nohiria bo copixëhi quiha Dios ra. ¹⁵ Dios quinia jia ca ja jisbayacanicuë. Jisbaya tsi ja bëno-bënocanicuë. Jishopë. Yobati ibo Balaam yamabo, naa Beor yamaba baquë quinia jasca ca ja banahuacani quiha jato ri rë. Jabi parata ó quëëmíxëniria ca toa Balaam yamabo ini quiha. Parata quëshpi tsi yoi ca ja ani quiha pë. ¹⁶ Jatsi jahuë jocha bërohuahacanicuë. Ja yoyohai ca jahuë burro yoi bërohuani quiha, joni joí tsi Balaam yamabo qui chanicuí na. Jahuë ibo toa burró raahani quiha. Ja iqui tsi ja rëtsayamani quiha.

¹⁷ Nicaparicana. Mato xërëquë ca maestro bo tsi xo jënë yama ca pao jascaria iquia. Yoshini raahai ca tsëmo jascaria tsi raahacacani quiha. Jato bax tsëmoria ca iti-itiria shomahuahi quiha Dios ra, jato copixëna. ¹⁸ Chanijacano tsi mahitsa tsi xo toa jato chani. Jasca, yoyocanaibo quima paxabëna ca chahahuacanaibo paracani quiha pë. Parahax “Jënima tsi xo toa jaha noba noma jabi quëëhaina” i jato qui cani quiha pë. ¹⁹ “Tsëquë ixëqui mato, jahuëcara ó ma quëëhai ca axëna” i jato qui cani quiha pë, jocha yonati bo jaca nori. Jabi yonati tsi xo toa jahuë jochá tsi yonahacahai cato ra. ²⁰ Jabi noitiria tsi xo toa jahari jochahuaxëneria ca quinia qui bacahai cato rë, naa noba Xabahamati Iboha quinia jabinish cato. Tanaroha pistia tsi toa quinia yoixëni ca quima paxahi quiha. Jama, jahuë noma jabi qui pi ja bacano tsi oquë-oquëriaxëhi quiha toa ja yoyoxëhaina iquia. ²¹ Jabi anoma tsi xo toa Dios mëstëxëni ca yoba quima casohaina ra, toa yoba bo jabihax na. Oquë tsi naa nohiria iquë aquë ra toa yoba cahëyamayoi-rohapihí na. ²² Jabi, “Janahax jahari cahí quiha inaca, ja janaha ca pixëna. Jasca chancho ri. Jahuë ashítí tsi robihi quiha ashíhax na” tihi ca tsi ñ quiha noba yosiba yoba. Jabi jascaria tsi xo toa ja acanaina rë.

3

Ibo Jesu johai ca bari

¹ Jisa ëbë xatë bá. Noho segundo ca carta tsi xo naa mato qui ë raahaina. Tihi ca chaní tsi mato mëbicasquia. Jabija ca nori ca jahuë bo mato shinamacasquia ra. ² Siri tsi Dios Chani yoanish cabá yoani ca chani ma shina-bënoyamano iquia. Jasca, Iboha rabëti bá mato yoahai ca ma shina-bënoyamano. Jabi toa yoba jato qui noba Xabahamati Ibobá ani quiha yoahacati.

³ Jariapari ca yoba tsi xo naa: Xaba rësó tsi bëcaxëcani quiha mato osacanaibo, naa jato noma jabi noixëni cabo. ⁴ Johax, “‘Joxëquia’ ¿i Jesu yamayamani? ¿Japa? ¿Jahuënia ni sa?” i mato qui caxëcani quiha. Jasca, “Maihuahaca-niquë noba naborëquëbo. Jari yama ra. Noba mai nëhohuahanitiyá rohari tsi jaharisi tsi xo” icaxëcani quiha pë. ⁵ Mëri tsi Diós ani ca jahuë bo shina-bënocani quiha toca ca nohiria bo. ¿Jahuë Chaní tsi noba mai Diós nëhohuayamayamani? Jënë tsi naa mai ja ani quiha. ⁶ Jasca, jënë tsi naa mai ca nohiria bo ja quëyoniquë, jënë चाहितaxëni ca ja raanicuë no. Tihi cabo tsi shina-bënocani quiha naa maestro bo pë. ⁷ Jama, chanitëquëxëqui Dios ra. Toa jasca ca Chaní tsi quëyohacaxëhi quiha noba mai, naipa ri. Jaboqui tsi janahacacani quiha copihacaxëti. Jatsi toa copiti barí tsëquëno tsi copihacaxëhi quiha Dios cahëyamacanaibo ra. Anomariaxëhi quiha jato copi iquia.

⁸ Jasca, tobi xo toa huësti ca yoba ma shina-bënoyamaxëti cato, ëbë xatë bá. Huësti bari tsi xo toa Dios qui mil año bo jascaria. Jasca, mil año bo tsi

xo huësti ca bari jaharisi ja qui. ⁹ Ja iqui tsi naamayamahi quiha noba Ibo, ja yoani ca jatihuaxëna. Jasca, nohiria quëyocasyama xo Dios ra. Jama, jato jocha quima nohiria bo casoyohai ca ó quëëhi quiha. Ja tsi xo toa ja bama-bamahaina iquia.

¹⁰ Jama, quiniacaxëcahuë. Tsëquëxëhi quiha Ibo johai ca bari ra. Yomaxëni ca jascaria ixëhi quiha toa ja johaina. Toa barí tsi pacots-pacotsariá tsi yamatapixëhi quiha naipá ca huishti bo. Chihí tsi quëyohacacaxëcani quiha. Jasca, noba mai, maí ca jahuë bo ri. Mëshoyocaxëcani quiha.

¹¹ Jabi toca tsi quëyohacaxëhi quiha jatiroha cato. Ja iqui tsi çjari yoyocas-canai pa? Mëstëxëniria ca jabí ma jayaxëti xo bësoquí na ra. ¹² Jasca, toa Dios copiti bari ó ma pasoxëti xo. Manapama tsi ma aria-ariaxëti xo ra, mëri tsi toa bari Díos raano iquish na. Toa barí tsi chihí tsi quëyohacaxëhi quiha naipá ca jahuë bo tëquë. Anomariaxëhi quiha toa huaó. Jahuë huaó tsi payoxëhi quiha metal jahuë bo tëquë, jënë manëhi na. ¹³ Jama, noqui ri tsi xo toa nai paxa, maí paxa, tihi cabo ó pasocanaina, naa noqui ja yoani cato. Jahá tsi yamaxëhi quiha yoi cato ra.

¹⁴ Jatsi jisa, ëbë xatë bá. Toa bari manapama tsi jocha yama ca jabí ó ma quëëxëti xo. Quësohacatimaxëni cabo imati xo. Jasca, jatiroha cabo ya jia tsi ma racanabëquino. Toca tsi ma iti xo ra, ja joquë no. ¹⁵ Jatsi shinaparicana. Mëri pi Ibo joyamano tsi jari xaba jayaxëqui nohiria bo ra, xabahamahacati. Jënima tsi xo toa. Jabi toca tsi mato qui nobë xatë Pabló quënëniquë jaa ri, Díos ja qui ani ca tiisí no. ¹⁶ Jaharisi tsi xo toa ja quënëni, tihi ca jahuë bo yoati ja chaniquë no. Jama, tobi xo toa huësti huësti ca bëronoma ca chani ja quënëni, tihi ca jahuë bo yoati ja chaniquë no. Toa chani jomihí quiha toa cahëtimaxëni ca nohiria bo rë, naa Dios Chani huëtsa bo ja jomicanai jascaria. Ja acanai ca quëshpi tsi quëyohacacaxëcani quiha iquia.

¹⁷ Jatsi quiniacaxëcahuë, ëbë xatë bá, jato mahitsa ca chaní tsi ma parahacayamano iquish na. Jaboqui jabija ca cahëqui mato iquia. Jama, toa yoyoxëni ca joní bo pí qui ma nicano tsi jaxcamëna xëhi quiha mato shinana iquia. Jaquirëquë jabija ca cahëtimaxëni cabo ixëqui mato tia. ¹⁸ Jama, Dios quinia ó tsi ma shinahati xo. Ma shinahano tsi oquëxëhi quiha ma noihaina, noba Xabahamati Ibo Jesucristo ma cahëhai ri. Ja tsi xo toa no oquëhuapa oxëti cato. Jaboqui maí xo na, jasca, huëaquë mana xo na, tihi cato xo tsi noba Ibo oquëhuaxëqui noa ra. Iquë. Amén.

Primera Carta Del Apostol San Juan

¹ Jesucristo, naa Chani nori ca yoati tsi quënëquia. Noqui bësomati Ibo-iboria tsi xo naa ra. Rèquë rohari tsi ja i-ipaoni quiha. Jahuë chani è nicaniquë ra, no bëtajaniquë no. Noho bëro yoi tsi è jisniquë ra. Jasca, è motsaniquë ra, noho mëquënë no. ² Jabi naa Bësomati Ibo-iboria jisiquiquë tsi è tsaya-tsyaniquë. Quënëquí tsi mato parayamaquia. Noqui Bësomati Ibo-iboria tsi xo naa iquia ra. Jariapari tsi Jahëpa Dios ya ja i-ipaoniquë. Jatsi Diós jahuë Baquë noqui jismaniquë. ³ Jabi noba Jahëpa Dios, jahuë Baquë Jesucristo, tihi cabo ya rabënaqui noa. Ja tsi xo toa è jisnina, jahuë chani è nicanina, tihi ca jahuë bo mato yoacasquia, no bëta ma rabënano iquish na mato ri. ⁴ Jatsi naa chani mato qui raaquia, no bëta ma rani-raniyoino iquish na mato ri.

Huëa xo Dios

⁵ Ja yoani ca chani è nicaniquë. E nicani ca roha mato qui è yoahai ca tsi xo naa: “Huëa xo Dios: tsëmo yama xo” i ja ni quiha. ⁶ Jatsi quiniacaxëcahuë. “Jahuë Baquë ya rabënaqui noa” iipihit tsi quiaqui noa pë, jari tsëmo ó pi bësohi na. Anoma quiha. ⁷ Jama, huëa ó pi bësohi tsi, naa huëa ó tsi ja iquiria tsi, nobë xatë bo ya rabënayoiqui noa iquia. Jasca, jahuë Baquë jimí tsi bahuëhacaxëqui noa. Noba jocha tëquë masahi quiha.

⁸ “Jochayamahai ca ëa xo naa” iipiquí tsi nomë paraqui noa pë. Jabija ca basi xo noa. ⁹ Jama, noba jocha pi no bërohuano tsi toa jocha shina-bënoxëhi quiha Dios, jahuë chani jatihuahai ca ja nori ca quëshpi na. No ani ca yoi ca tëquë bahuëxëhi quiha. ¹⁰ Jama, “Jochayamahai ca ëa xo naa ra” iipiquí tsi Dios quiahuaqui noa pë. Noba shina ó ma xo jahuë Chani ra.

2

Noqui mëbihai ca abogado

¹ Naa cartá ca chani mato qui raaquia, jochayamamano iquish na, ëbë xatë bá. ² Jama, tsohuëcara pi jochano tsi tobi noqui mëbiti ibo ra, naa noba abogado yoi cato. Jahëpa Dios qui no bax chanihai ca tsi xo Jesucristo, naa mëstëxëni cato. Ja tsi xo toa noba tëpas-hacanish ca ofrenda noba jocha masati. Noba jocha yoi bo, jatsi jatiroha ca maí ca nohiria jocha, tihi cabo bax ja acacani quiha.

³ Dios yoba pi nicaquí tsi Dios cahëyoiqui noa iquia. ⁴ Jabi tobi xo toa “Dios cahëyoiquia” iquii cabo. Tsayacahuë. Jahuë yoba pi nicayamahi tsi quiaqui toa ra. Jabija ca basi xo toa rë. ⁵ Jama, Dios yoba pi no nicano tsi no nohó tsi oquënëhi quiha ja noihaina. Toca tsi Diós-na bo no nori ca cahëyoiqui noa. ⁶ Jatsi mëstë bësoxëti xo toa “Dios ó ca ëa xo naa” iquii cato. Jesu jascariaxëti quiha.

Dios yoba paxa cato

⁷ Yoba paxa ma xo naa mato qui è quënëhaina iquia, ëbë xatë bá. Yoba siri tsi xo. Naa yoba ma jayapaoni quiha rèquë no. Jabi naa yoba siri ca tsi xo toa jaboqui ma nicahai ca chani jasca cato. ⁸ Jama, paxa ca jisiria ca naa mato qui è quënëhai ca imitsa, siri ca ja nori. Tsayacahuë. Naa yoba Jesús nicani

quilha. Jasca, noiquí tsi naa yoba aqui mato ri ra. Toca xo ra, jaboqui huëa yoi ca huahuahai iqui na. Ja iqui tsi huinocahi quilha jocha tsëmo.

⁹Jari tsëmo ó tsi xo toa jabë xatë qui caxahai cato. Mahitsa tsi xo toa “Huëa ó tsi bësquia” i ja aina iquia. ¹⁰Jama, jahuë xatë noihai ca tsi xo toa huëa ó bësohai ca yoi cato. Jasca, yama tsi xo toa yoi ca ja acaina, naa jahuë xatë jochamati cato. ¹¹Jama, tsëmo ó tsi bësohi quilha toa jahuë xatë qui caxahai cato. Jahuë quinia cahëyamahai ca tsi xo toa pë. Tsëmo iqui tsi bëco xo ra.

¹²Mato qui quënëquia, noho xocobá, Jesucristo tahëhax mato jocha masahacani iqui na. ¹³Mato qui quënëquia, jahëpa bá, jariapari tiya rohari cahëcanaibo ma nori iqui na. Jasca, mato qui quënëquia, joni xocobá, Yoshiyoshiria ma bëboni iqui na. Toca tsi mato qui quënëquia.

¹⁴Mato qui quënëquia, xocobá, Jahëpa Dios ma cahëyoihai iqui na. Jasca, mato qui quënëquia, jahëpa bá, rëquë ó i-ipaonish ca ma cahëyoihai iqui na. Jasca, mato qui quënëquia, joni xocobá, coshi ma nori iqui na. Mato ó bësohi quilha Dios Chani iquia. Jasca, Yoshiyoshiria ma bëboniquë.

Maí ca jabi bo no noiyamahaina

¹⁵Maí ca jabi bo, maí ca jahuëmishni bo, tihi cabo tsi noiyamatsacana. Tihi cabo pi noiquí tsi noba Jahëpa Dios noiyamaqui mato ra. ¹⁶Jabi maí ca jabi tsi xo naa: Yoxa mëtsahaina, joni mëtsahaina, noba bëro qui jia ca biriacatsaina, jamë shinamixëni iquina. Dios quima joyamahi quilha naa jabi bo, maí ca nohiria bo quima ca jaca nori. ¹⁷Huinocahi quilha maí ca jahuë bo. Huinocahi quilha nohiria bo jaha quëëhaina. Jama, bësö-bësopaoxëhi quilha toa jaha Dios quëëhai ca acái cato.

Cristo pasomaha cato

¹⁸Quiniacaxëcahuë, ëbë xatë bá. Basima tsi xo xaba rëso iquia. Cristo pasomaha cabo joxëhai ca ma yoahacani quilha. Tsayacahuë. Jaboqui jisiquihi quilha huëstima ca Cristo pasomaha ca nohiria rë. Ja iqui tsi basima tsi xo jahuë rëso iqui noa ra. ¹⁹Noba maxo ó ma xo naa nohiria bo. Ja tsi xo toa noqui ja jishayacanina iquia. Noba maxo ó pi iirohahi tsi no bëta ja chitëquë acaniquë. Jama, ja boyocani quilha. Ja iqui tsi noqui bëroria tsi xo toa noba maxo ó ja iyamacanaina.

²⁰Toca ma xo mato ra. Espiritu Santó tsi ma ashimahacanicuë. Jabija ca Chani cahëyoiqui mato tëquë iquia. ²¹Toa jabija ca Chani mato cahëmacasyama xo ëa, quënëquí na, jabija cato, janyama cato, tihi cabo cahëyoihai ca ma nori quëshpi na. Jato pasomaha mato yobacasquia.

²²¿Tsohuë ni toa oquëria ca quiaxëni cato? Quiaxëniria ca tsi xo toa “Dios raahacanish ca ma xo Jesu” iquii cato. Cristo pasomaha ca tsi xo toa. Dios baquë pi niaquí tsi Jahëpa Dios ri niaqui ra. ²³Jabi Jahëpa niahai ca tsi xo toa jahuë Baquë biyamahai cato. Jama, jahuë Baquë bichii ca tsi xo toa Jahëpa yoi ya rabë nabëquihai cato.

²⁴Siri ma tiisimani ca jahuë bo chahahuacana. Tocapihi tsi jia tsi Jahëpa Dios, jahuë Baquë, tihi cabo ya rabë nabëqui-xëqui mato ra. Jato ó bësö xo mato iquia. ²⁵Jasca, “Mato bësö-bësopaomaxëquia” ¿i Cristo yamayamani? Axëqui ra.

²⁶Quënëquí tsi mato yobacasquia, janyama mato mëpicascanaibo yoati na. ²⁷Toca ma xo mato. Mato ti tsi xo toa Espiritu Santó tsi ashimahacanish cabo. Ja iqui tsi çjënahuariaxo mato ë tiisimapina? Mato tiisimati ibo-iboria tsi xo toa, naa Espiritu Santo. Jabija tsi xo toa ja tiisimahaina. Quiyamahi quilha. Jatsi Cristo ó tsi chitëcana iquia, naa Espiritu Santó tiisimani jascaria.

²⁸ Jatsi Cristo ó tsi chitëcana, noho xocobá. Jia ja bêta ma rabënano. Tocapihi tsi raquëyamaxëqui mato ja jisiquixëquë no. Ja quima casoyamaxëqui mato bêrabihî na. ²⁹ Mëstë ca Cristo nori ca pi cahëquí tsi Dios xocobo yoi bo cahëxëqui mato iquia. Ja tsi xo toa jia ca acai cato.

3

¹ Shinaparicana. Anomaria tsi xo toa Jahëpá noqui noihaina. Noqui noiquí tsi jahuë xocobo yoi bo noqui quënahî quiha. Jahuë xocobo yoi bo xo noa ra. Jama, noqui cahëyamaqui maí ca nohiria bo, Jahëpa Dios cahëyamaquí na. ² Nicacana, ë noi cabá. Jaboquí Dios xocobo yoi bo xo noa iquia. Jama, no ixëti ca jari cahëyamaquí noa. Noqui bêronoma quiha. Jama, Jesucristo jisiquino tsi jahuë jaria-jaria jayaxëqui noa ra, ja nori ria ca yoi ca jisi na. ³ Jabi jochacasyamaxëhî quiha toa jahuë jaria bichi ó pasohai cato. Jatsi Jesu iquí ria no iti xo iquia.

⁴ Dios yoba pasomaha tsi xo toa jochamixëni cabo. Jabi jocha tsi xo toa Dios yoba nicayamahaina. ⁵ Nicacana: Cristo jisiquiniquë jocha quëyoxëna. Jasca, jochayamahai ca tsi xo naa. ⁶ Jasca, Cristo ó bêsocanaibo tsi xo toa jochayamahaina. Jato jabi ma quiha. Jasca, Cristo cahëyamayoihi quiha toa jochacatsai cato. Tihi ca jahuë bo ma nicaniquë. ⁷ Jatsi quiniacaxëcahuë, noho xocobá. Nohiria bá mato parayamano. Mëstëhuahacanish ca tsi xo toa jia ca acai cato. Cristo jabi jaya quiha. ⁸ Jama, Yoshi-yoshiriá-na tsi xo toa jochamis-hai cato. Jahuë jabi quiha. Ja tsi xo toa Dios baquë jisiquiniquë, Yoshi-yoshiria yonoco quëyoxëna.

⁹ Jaha bêsopa. Jocha-jochapaocasyama xo Dios baquë iquia, jahá tsi Dios jabi nori iqui na. Dios jahuë jahëpa yoi nori iqui tsi jochayamahi quiha. ¹⁰ ¿Tsayacanaí? Jamëri tsi xo Dios xocobo iquia. Jasca, jamëri tsi xo Yoshini xocobo ri. Jënica jaca nori ca cahëqui noa jato jabi tsayaxo na. Dios baquë ma xo toa yoi ca acai cato iquia. Jasca, Dios baquë ma xo toa jahuë xatë noiyamahai cato.

No noinabëquino

¹¹ Ma nicanî ca chani, naa rëquë ca chani tsi xo naa: No noinano ra. ¹² ¿Japa Caín? Yoshini baquë ja ini quiha. No tocayamano iquia. Jahuë yoshini jabi iqui tsi jahuë noma ja aniquë pë. Jiaxëni jahuë noma jabi ini ca ja cahëni quiha. ¹³ Jasca, mato qui pi naa maí ca nohiria bo caxano tsi ratëyamatsicana, ëbë xatë bá. Jato jabi quiha. ¹⁴ Jabi toa namëhai ca quinia quima no tsëchacanicuë ra. Noqui tsi xo toa bêso-bêsopaoxëhaina iquia. Tihi ca jahuë bo cahëyoiqui noa, nobë xatë bo no noihai iqui na. Jama, bêsoyama tsi xo toa jahuë xatë noiyamahai cato. ¹⁵ Jabi ati ibo jascaria tsi xo toa jahuë xatë qui caxahai cato iquia. Jasca, ati ibo tsi xo toa bêso-bêsopaoyamaxëhai cato. Toa cahëqui mato iquia.

¹⁶ Cristo no tsayano. Ja ini cató tsi noqui ja noihai ca ja jismaniquë. No bax ja rësoni quiha. Jascaria tsi nobë xatë bo bax no rësoxëti xo noqui ri. ¹⁷ Shinaparicana. Tobi xo toa oriquiti, sahuëti, jahuëmishni bo, tihi cabo jaya cato. Jasca, tobi quiha toa noitiria ca naris-hai ca xatë. Jabi toa noitiria ca xatë mëbiyamapiquí tsi ¿Dios noiyoihi ni toa jahuëmishni jaya cato? ¿Jëniiriahax toa joni ó tsi Dios bêsona? ¹⁸ Jisa, noho xocobá. Noba chaní tsi no noiyamano. Dios noiyoiquí tsi nobë xatë bo no mëbiti xo iquia.

Dios qui no raquëyamano

¹⁹ Nobë xatë bo mëbipíquí tsi Dios xocobo no nori ca cahëqui noa. Jasca, no mëbihai iqui tsi noqui quësoyamaxëhî quiha noba shinana iquia, Dios bêsojó

tsi no niixëquë no. ²⁰ Jama, mahitsa pi noqui noba shina quësono tsi no raquëyamano. Noqui oquë xo Dios, jatiroha ca no acai ca ja cahëhai quëshpi na. ²¹ Jisa, ë noi cabá. Dios bësojo joti ma raquëyamano, mato qui mato shina quësoyamano. ²² Raquëxoma tsi no nicaxëti xo bëhoxquí na. Jahuë yoba pi no nicano tsi, ja qui jia ca no ano tsi, no bënhai ca noqui axëqui ra. ²³ Jabi Dios yoba tsi xo naa: “Noho baquë Jesucristo qui chitimicana. Jatsi noinacana. Tihí cabo acana mato ë yoani jascaria” ii quiha. ²⁴ Jahuë yoba pi nicahi tsi Dios ó tsi bëso xo noa. Jasca, no nohó bësohi quiha jaa ri. Noqui ja ani ca Espiritu Santó tsi no nohó bëso ja nori ca cahëqui noa ra.

4

Mahitsa ca chani yoacanaibo

¹ Quiniacaxëcahuë. Chahahuahacatima xo jatiroha ca chani. Tobi xo toa huëstima ca mahitsa ca Dios Chani yoacanaibo ra. Ja iqui tsi jatiroha ca chani tanaparicahuë, jabija ca ja nori ca cahëxëna. ² ¿Jënahuariaxo Espiritu Santo quima jato chani pi nori ca cahëxëhi ni noa? Jabi nëca tsi cahëyoixëqui noa tia: “Jesucristo joni manëniquë” i pi jaca no tsi Dios quima johi quiha toa chani iquia. Espiritu Santo jaya quiha. ³ Jama, “Joni Dios baquë manëyamaniquë” i pi jaca no tsi mahitsa tsi xo toa ja yoacanaina. Espiritu Santo jayama ca xo. Cristo pasomaha ca tsi xo toca ca ja chanicanaina ra. Jabi nëca ca yoi ca chani joxëhai ca yoati tsi ma yoahacani quiha. Tsayacahuë. Jaboqui nëá tsi coqui rë.

⁴ Jisa noho xocobá. Mato ti tsi xo Dios xocobo ra. Toa mahitsa ca chani yoacanaibo ma bëboniquë mato ó ca Espiritu Santó no. Jesucristo pasomaha cabá chama oquë-oquëria tsi xo toa mato ó cato ra. ⁵ Chanihi tsi maí ca jahuë bo yoati tsi chanicani quiha, maí ca nohiria ba jabi jaya jaca nori iqui na. Jasca, jato chani nicacascani quiha maí ca nohiria bo. ⁶ Jama, noqui ri tsi xo toa Dios baquë bo. Noba chani nicahi quiha Dios cahëcanaibo ra. Jasca, Dios Chani no yoano tsi toa Chani nicasyama xo Dios cahëyamacanaibo. Dios Chani iqui tsi noqui bëroria tsi xo toa dos ca jamëri ca maxo bo, naa jabija ca banahuacanaibo, yoi ca banahuacanaibo.

Noiti Ibo-iboria xo Dios

⁷ No noinano, ë noi cabá, noiti ibo-iboria Dios nori iqui na. Jabi Dios baquë yoi tsi xo toa noihai cato iquia. Dios cahëhi quiha. ⁸ Noiti ibo-iboria xo Dios ra. Noiyamapiquí tsi ¿jënahuariaxo raca Dios tsohuëcaracá cahëna? Cahëyamahi quiha noiyamahai cato. ⁹ Anomaria tsi xo toa Dios noihaina. Noiquí tsi jahuë jahuësti ca baquë mai qui ja raaniquë noqui bësomaxëna. Toca tsi noqui ja noihai ca ja jismani quiha. ¹⁰ ¿Tsayacanaí? Anomaria tsi xo toa no bax ja anina. Noqui tsi xo toa noiti cahëyamahaina. Jama, noqui noiquí tsi jahuë baquë ja raaniquë noba jocha quëshpi tēpas-hacati.

¹¹ Jisa, ëbë xatë bá. Anomaria tsi xo toa Diós noqui noihaina iquia. Jatsi no noinati xo noqui ri. ¹² Jabi yama tsi xo toa Dios jisish cato. Jama, no pi noinano tsi no nohó bëso xo Dios. Jasca, no nohó anixëhi quiha ja noihaina. ¹³ Parayamaquia. Dios ó tsi bësoqui noa. Jasca, no nohó bëso xo Dios ri. Toa cahëqui noa, noqui jahuë Espiritu Santo ja ani iqui na. ¹⁴ Jasca, Diós jahuë baquë raaniquë nohiria bo Xabahamati Ibo iti iqui noa, Cristo no jisni iqui na. ¹⁵ Jatsi, “Dios baquë xo Cristo” i tsohuëcara pi no tsi jahá bëso xo Dios. Jasca, Dios ó tsi bësohi quiha jaa ri. ¹⁶ Tihí cabo iqui tsi “Anomaria tsi xo toa noqui Diós noihaina” iqui noa.

Noiti Ibo-iboria xo Dios. Jasca, Dios ó tsi bēsohi quihā toa noiyoihai cato. Jasca, jahá bēso xo Dios ri iquia. ¹⁷ Jasca, no nohó tsi anihī quihā Dios noihaina, copiti bari-baririá tsi no raquēyamano iquish na. Toa bari tsi raquēyamaxēqui noa tia, Cristo jabi no jaya ca iqui na. ¹⁸ Noipihī tsi ζjēnahuariahax raca Dios qui no raquēna? Raquēhai ca tsi xo toa Dios copi ó pasohai cato rē. Raquēpiquí tsi jari noiti cahēyamahī quihā toa iquia. ¹⁹ Jatsi no noixēti xo, noqui jariapari Diós noini iqui na. ²⁰ Jabi quiaxēniria tsi xo toa jahuē xatē qui caxahai cato, naa “Dios noiquia” iquī cato. ζjēnahuariaxo raca toa jisnoma ca Dios ja noina, jahuē xatē yoi pi noiyyamaquí na? ²¹ Nicacahuē. Cristó noqui ani ca yoba tsi xo naa: “Jahuē xatē noixēti xo toa Dios noihai cato ra” i ja ni quihā.

5

¹ Dios baquē yoi tsi xo toa Xabahamati Ibo Jesu nori ca chahahuahai cato iquia. Jasca, Dios noiyoihai ca tsi xo toa jahuē baquē noihai cato. ² Dios pi noiyoiquí tsi jahuē yoba pi nicayoiquí tsi nobē xatē bo ri noiyoixēqui noa iquia. ³ Jasca, noipiquí tsi jahuē yoba bo nicaxēqui noa. Yosayama tsi xo toa jahuē yoba bo no acaina. ⁴ Jasca, maí ca jocha bēboti mētsa tsi xo Dios xocobo tēquē. Bēboqui noa ra, ja qui no chitimihai cató no. ⁵ Jatsi, ζtsohuē ni toa maí ca jocha bēbopihai cato? Jaroha ca tsi xo toa Dios baquē Jesu nori ca chahahuahai cato ra.

Jesucristo chani

⁶ Jesucristo tsi xo toa mai qui jonish cato ra. Ja joquē tsi quihā jēnē tsi ja ashimahacanicuē. Jatsi jahuē jimi acacanicuē ja rēsoni cató no. Jasca, tocapijaquē tsi quihā quiaiyamahai ca Espiritu Santó Dios baquē ocahuaniquē naipá ca joí no. ⁷ Jabi tres tsi xo toa Dios baquē ocahuacanaibo iquia. ⁸ Ocahuahi quihā Espiritu Santo. Ocahuahi quihā toa jēnē. Ocahuahi quihā toa jahuē jimi yoi ri. Tihi ca tsi xo toa Dios baquē ocahuahaina. ⁹ Juez bēsojó pi nohiria chani tsi jahuē chani chahahuáqui noa. Jama, oquē-oquēria tsi xo toa Diós ocahuacanaibo. Ja iqui tsi Diós pi jahuē baquē ocahuano tsi jahuē chani no chahahuaxēti xo. Quiaiyamahī quihā. ¹⁰ Jahuē shinaná tsi Dios baquē Jesu nori ca cahēhi quihā toa jahuē baquē qui chitimihai cato. Jama, Dios quiahuaqui toa Diós yoani ca chahahuayamahai cato. “Noho Baquē tsi xo naa” i noqui ja ni quihā. ¹¹ Jasca, “Mato bēso-bēsopaomaxēquia. Noho Baquē ó tsi xo toa bēsohaina ra” i Dios ni quihā. Tihi cabo tsi xo toa Diós noqui yoanina. ¹² Jabi bēso-bēsopaoxēhi quihā Dios baquē jaya cato. Jama, bēsoyoitimaxēni tsi xo toa Dios baquē yama cato.

Jaroha ca yoba

¹³ Naa chani mato qui quēnēquia, Dios baquē qui chitimicanaibá, ma bēso-bēsopaohai ca ma cahēno iquish na.

¹⁴ Parayamaquia. Jahuē shina qui jahuēcara jia ca pi no bēnana tsi noqui nicaquí Dios. ¹⁵ Jasca, noqui pi nicaquí tsi no bēnaha ca noqui axēqui iquia.

¹⁶ Namēyamahai ca jocha nobē xatē acai ca pi jisi tsi Dios qui no bēhoxti xo, ja xabahamano. Namēyamahai ca jocha pi ja aarohano tsi toa xatē bēsomaxēhi quihā Dios. Tobi xo toa namēhai ca jocha iquia. Toca ca jocha pi ja acano tsi “ja bax no bēhoxti xo” iyamaquia. ¹⁷ Jatsi quiniacaxēcahuē. Jocha tsi xo toa jatiroha ca anoma ca no acaina. Jasca, noqui namēyamahī quihā jatiroha ca jocha iquia.

¹⁸Jochapaoyamahi quiha Dios xocobo iquia. Jahá bēsōhi quiha Dios baquē yoi. Ja quēshpi tsi Dios xocobo motsatimaxēni tsi xo Yoshinihua. ¹⁹Dios xocobo no nori ca cahēqui noa. Jama, maí ca nohiria bo yonahi quiha Yoshinihua.

²⁰Mato parayamaquia. Mai qui Dios baquē joniquē ra. Joxo tsi noqui chama ja aniquē, jabija ca Dios no cahēno iquish na. Jabija ca Dios ó xo noa, Jesucristo ó no nori jascaria. Jesucristo tsi xo toa Dios yoi, naa noqui bēsō-bēsopaomati Ibo ra. ²¹Jatsi quiniacaxēcahuē, noho xocobá. Tobi xo toa mahitsa ca dios bo iquia.

Segunda Carta Del Apostol San Juan

¹ Juan yosi tsi xo naa chani quënëti ibo. Diós bini ca yoxa-yoxaria, jahué xocobo, tihi cabo qui naa carta raaquia. Mato tēquē noiquia. Jasca, mato noicani quiha chahahuacanaibo yoi bo ri. ² No nohó ca i-ipaohai ca Chani yoi iqui tsi mato noiquia iquia. ³ Noba Jahēpa Dios, jahué baquē Jesucristo, tihi cabá noqui shomahuano. Noqui ja noicano. Noqui ja rani-ranihuacano iquia.

⁴ “Jabija ca quinia ó tsi bēsoqui mi xocobo” icani quiha ra, naa noba Jahēpa noqui yobani jascaria. Jato jabi jia ca iqui tsi rani-raniquia. ⁵ Quënēpama tsi yoba paxa ca mi qui acasyama xo ëa, caí. Jama, quënēquia noqui ani ca rēquē rohari ca yoba mato shinamaxēna. No noinati xo iquia.

⁶ Dios pi noiyoiquí tsi jahué yoba bo axēqui noa ra. Siri tsi toa yoba mi nicaniquē iquia. Jatsi mi noixēti xo iquia.

Cristo pasomaha cabo

⁷ Nohiria bo xērēquē tsi xo toa huēstima ca paracanaibo iquia. “Joni Jesucristo manēnique” iyamacani quiha pē. Paramisxēniria ca xo. Cristo pasomaha ca xo. ⁸ Jatsi quiniacaxēcahuē. Janyama pi mato ja mēpicano tsi mato copi jia ca ma bēnomitsa. Mato yonoco quēshpi tsi copi jia ca ma bixēti xo iquia.

⁹ Dios yama tsi xo toa Cristó tiisimani ca yoba ó tsi chitēyamahai cato, naa Cristo yoba bo chahuayamahai cato. Jahēpa Dios, jahué baquē, tihi cabo jaya cabo tsi xo toa Cristó tiisimani ca chahuayoihai cato. ¹⁰ Tsohuēcaracá pi jamēri ca chani mato qui bēno tsi mato xobo qui jato jicomayamacana. Toca cabo joihuayamacana iquia. ¹¹ Joihuapihi tsi jato yoixēni ca yonoco xatēnaqui mato ra.

Jaroja ca yoba

¹² Jari tobi xo toa huēstima ca ë quënēcatsaina rē. Jaboqui naa papí tsi quënēnoma xo. Oquē tsi xo toa mato qui ë shishohaina iquia. Mato bēta chanihi cacasquia ra, no rani-raniriano noqui tēquēta.

¹³ Mia joihuahi quiha mi noma xocobo, naa Diós bini cabo. Iquē. Amén.

Tercera Carta Del Apostol San Juan

¹ Juan yosi tsi xo naa chani quënëti ibo. Mia joihuaquia, noho rabëti Gayó. Mia noiquia Jesucristo tahëxo na. ² ¿Jënima ni mia? Mi bax bëhoxquia, jia tsi mi bësono, mi jënimariano, naa jënima mi shina nori ca jascaria. ³ Mia ë nicahitaquë, toá ca xatë bo huësti huësti cabo cahëquë no. Cahëxo tsi quiha mi Ibo qui chitimiriahaina, jabija ca quinia ó tsi mi bësohaina, tihi cabo yoati ëa ja yoacahitaquë. Nicahax ë rani-ranihitaquë. ⁴ Jabija ca quinia ó tsi noho xocobo bësono tsi rani-raniquia nicahax na. Yama tsi xo toa ëa ranihuahai ca oquë cato iquia.

⁵ Jia tsi xo toa nobë xatë bo, naa mi bëroma ca xatë bo mi mëbihaina iquia, ëbë xatë. ⁶ Mi mëbihai ca iqui tsi noqui, naa nëá ca iglesia qui bëroria tsi xo toa mi noihaína. Jasca, Dios qui jia ca quiniá tsi jia tsi toa xatë bo jari mi mëbino, ja narisyamacano ja bocaquë no. ⁷ Bohocani quiha Cristo bax yonocohi na. Yonocohax tsi Dios cahëyamacanaibá jato mëbihai ca ó pasoyamacani quiha. ⁸ Ja tsi xo toa toca cabo no mëbixëti xo jia tsi Dios Chani ja yoacano iquish na. Tocapihi tsi jato yonoco xatënaqui noa jato bëta.

Diótréfes jabi yoi cato

⁹ Toá ca iglesiá ca chahahuacanaibo qui carta ë raaniquë jato yobaxëna. Jama, ë yoahai ca chahahuayamahi quiha toá ca Diótréfes rë, naa toá ca xatë bo yonacatsai cato. ¹⁰ Anoma quiha. Joquí tsi noqui ja ocahuahaina, ja quiahaina, tihi cabo nicamaxëquia pë. Jasca, raniyamaquí tsi no raani ca xatë bo joihuayamahi quiha pë. Jasca, iglesiá cabo quëtiahi quiha rë, jato chani ja nicayamacano iquish na. Jatsi jato chani nicascasanaibo raahi quiha pë iglesia quima.

¹¹ Jisa, ëbë xatë. Anoma tsi xo toa joní acaina iquia. Mi tocyamano ra. Oquë tsi xo toa quinia jia ca mi banahuahaina. Jia ca acái ca tsi xo toa Dios baquë yoi. Jama, yoi ca pi aquí tsi Dios cahëyamaquí toa iquia.

Demetrio jabi jia cato

¹² Demetrio yoati tsi nohiria bo chanino tsi jia tsi xo toa ja yoacanaina. Jabija tsi xo toa jia ca ja acaina iquia. Shinajiaxëni ca joni tsi xo naa ra. Jabija ca ë yoahai ca nori ca cahëqui mia tia.

Jaroha ca yoba

¹³ Jari tobi huëstima ca ë yoacatsaina rë. Jaboquí papí tsi quënënomá xo. ¹⁴ Mi qui shishoti ó pasoquia. Toatiyá tsi jia tsi chaninabëquixëqui noa.

¹⁵ Mi rani-ranino. Mia joihuahi quiha nëá ca rabëti bo. Jasca, toá ca noba rabëti bo tëquë ë bax mi joihuano. Iquë. Amén.

La Carta Del Apostol San Judas

¹Naa papi quënëhai ca Judas ca ëa xo naa, naa Jacobo noma cato. Jesucristo yonati xo ëa ri. Quënëhacanis cabo, naa Jahëpa Dios noi cabo, Jesucristo ó bëso cabo, tihi cabo qui naa chani raaquia. ²Diós mato shomahuano ra. Ma rani-ranino. Ma noinabëquiriano ra.

Quiaxëni ca maestro bo

³No xabahamahacahai ca yoati tsi mato qui quënëcasquia rë, ëbë xatë bá, jaboqui quënënoma ja nori. Jariapari tsi yoba huëtsa mato yoaparcasquia: Jahuë nohiria bo qui Diós ani ca Chani bax ma nianaxëti xo iquia. Huësti roha tsi toa Chani noqui acacani quiha. ⁴Tihi ca jahuë bo quënëquia ra, mato naxërëquë ca qui paramixëniiria ca nohiria bo jiconi iqui na. Jonë xo toa yoi ca ja acanaina iquia. Paraxo Diós noqui noihai ca Chani jomicani quiha pë, jato quinia yoixëni ca mato banahuacasquí na. Jato qui yoi xo Jesucristo ra, naa noba Chama, noba Ibo yoi cato. Jabi siri tsi jato copi yoati tsi no yoahacaniquë. “Copihacacaxëcati xo naa nohiria ra” ii quiha Dios Chani iquia.

⁵Jatsi Diós copini ca mato nicamacasquia. Shinaparcana. ¿Egipto mai quima Israel ca nohiria Ibobá tsëcayamani? Tsëcaxo tsi quiha ¿toa chahahuayamanish cabo ja quëyoyamayamani? Ja copihacayocani quiha iquia. ⁶Jasca toa chama jayapaonish ca ángel bo ri. Jato iti ja jishëriayocaniquë, Dios nicacayamaquí na. Jaboqui tsëmoria ca nëpax ca xo. Ja nëxahacani quiha. Toá tsi jato Diós jananiquë toa bari-baririá tsi copixëna. I-ipaoxëhi quiha jato copi iquia. ⁷Jasca, yaca Sodoma, yaca Gomorra, jato tëamë ca yaca mishni bo ri. Anoma ini quiha toa ja chotacanaina, ja yoyocanai ri. Jatsi quiniacaxëcahuë iquia. Jaboqui i-ipaochai ca chihi ó tsi tënë-tënëcani quiha jato ri, ja yoyocanai quëshpi na. Tihi cabo iqui tsi noqui bëro xo Diós copihaina ra.

⁸Jishopë. Tocacani quiha pë toa mato qui bëcanish cabo ri. Nama-namacanaibo jascaria ca xo. Jochapama tsi jato yora bo yoshihuacani quiha. Jato qui yoi xo Dios yoba. Jasca, mana ca ángel bo ocahuacani quiha pë. Tihi tsi xo toa ja acanaina rë. ⁹¿Japa? ¿Yoshi-yoshiria oquëria ca ángel Miguél ocahuani pa? Ja tocayamaniquë iquia Moisés yora tahëhax ja bëta nianahi tsi ja quinia-quiniyaniquë. Quiniapama tsi “Mia Ibobá raahano ra” i Yoshihua qui ja ni quiha. ¹⁰Jama xo naa mato xërëquë ca nohiria bo. Jahuëcara ca ja cahëyoiyamahai ca jahuë bo ocahuacani quiha pë; mahitsa. Cahëtimaxëniiria ca yohina jascaria ca xo. Tocapihi tsi quëyohacacaxëcani quiha jato ri iquia.

¹¹Anomariaxëhi quiha jato copi ra. Caín yamaba quinia yoi banahuacani quiha. Parata quëshpi tsi yoyocani quiha, Balaam yamabo ini jascaria. Dios yoba pasomaha ca xo, Moisés yoba pasomaha Coré yamabo ini jascaria. Tihi ca quëshpi tsi quëyohacacaxëcani quiha, Coré quëyohacani jascaria. ¹²Bërabiria tsi xo toa mato bëta ja rabënacana shiati ma aquë no. Bohocani quiha yoyohi na. Bërabiriama xo toa ja acanaina rë. Jamë shinaquí tsi huëtsa bo mëbitimaxëniiria ca xo. Yoshini raahacahai ca tsëmo jascaria ca xo. Yama xo jahuë oi nohiria bo mëbiti. Bimi saihuayamahai ca mëxohacahax ca jihui jascaria ca xo. Mahitsa ca bësoyama ca xo. ¹³Raëtimaxëni ca iahuá ca choca jascaria ca xo. Bacox jisiquihai ria tsi noqui bëroria xo toa ja yoyocanaina.

Mahitsa boho-bohocani quiha paquëhai ca huishti jascaria. Jato copi Diós shomahuaniquë ra, naa baquish-baquish itiria cato. I-ipaohai ca copi ixëhi quiha toa ra.

¹⁴ Jasca, jato yoati tsi quiha Enoc yamabo, naa Adán quirëquë ca chaniniquë jaa ri. “Tihiria ca ángel bo ya tsi joxëhi quiha Ibo-iboria” i ja ni quiha. ¹⁵ Jatsi, “Joxo tsi jatiroha ca nohiria bo copixëhi quiha. Yoi ca ja acana, ja pasomaha ja yoacanaina, tihí cabo quëshpi tsi copihacaxëhi quiha toa Dios pasomaha ca jochahuaxëni cabo” i Enoc ni quiha. ¹⁶ Jabi yoyomixëni ca ranimixëni ca nohiria bo tsi xo naa ra. Jato noma jabí tsi yonahacacani quiha rë. Chani-chanipama tsi “Jia tsi xo toa no acaina” icani quiha pë, mahitsa jaca nori. Jasca, nohiria huëtsa bo chahahuariacani quiha pë, jahuëcara ó ja quëëcanai ca bixëna. Tihi tsi xo toa jato jabi yoi cato pë.

Chahuacuanaibo qui acacani ca yoba

¹⁷ Shinaparicana, ëbë xatë bá. Jia tsi xo toa noba Ibo Jesucristo rabëti bá, naa Chani chitahëhuati ibobá mato yoanina. ¹⁸ “Xaba rëso tsëquëno tsi jisiquixëhi quiha mato osacanaibo. Jato noma jabí tsi yonahacacanaibo tsi xo naa” i mato qui jaca ni quiha. ¹⁹ Anoma ca nohiria bo tsi xo naa. Chahuacuanaibo oquëxnamacani quiha. Jato noma jabí tsi mëpilhacacani quiha pë. Jasca Espíritu Santo jayama ca xo iquia. Tihi tsi xo toa jato jabi iquia.

²⁰ Jama, mamë chamahuacana, ëbë xatë bá. Chamanahax Dios Chani jabiriacana. Jasca, Espíritu Santo chamá tsi ma bëhoxti xo. ²¹ Jasca, Dios noihai cato ó tsi chitëcana, Ibo Jesucristo manahi na. Joxo tsi mato bësopaomaxëhi quiha mato noiquí na. ²² Jasca, cahëtimaxëni ca rabë ca shina jaya cabo mëbicana. ²³ Mëbixo tsi huëtsa bo mëbicana, chihi quima tsohuëcara tsëcahai jascaria. Jasca, tobi xo toa Dios cahëyamacanaibo. Quiniaxo tsi jato noicana. Noihax jato jocha qui caxacana. Toa yoshihuahai ca jocha jaquimacana.

Dios no oquëhuahaina

²⁴ Anomaria tsi xo toa jocha quima mato xabahamapihai cato ra. Anomaria tsi xo toa jocha yama tsi mato jismapihai cato. Oquëria tsi xo toa mato ranihuayoipihai cato ra. ²⁵ Dios yoi, jahuë Jesucristó tsi noqui xabahamahai ca no oquëhuariaxëti xo. Ja qui oquë-oquëria, chama-chamaria, tihi bo acacaxëti xo ra. I-ipaonish ca jaboqui nori ca i-ipaoxëhai ca tsi xo naa. Iquë. Amén.

Apocalipsis o Revelacion a San Juan

Juan qui Jesucristó jahuë bo yoanina

¹ Jahuë Cristo qui naa ë quënëhai ca jahuë bo pari Diós jismaniquë, noqui, naa jahuë yonati bo ja yoano iquish na. Basima ca ixëti nori ca jahuë bo noqui cahëmacatsi quiha. Jasca, noqui cahëmacatsi quiha jahuë Cristo ri. Jatsi jahuë ángel ë qui Jesucristó raaquë naa jahuë bo cahëmati. ² Jatsi jatiroha ca ë jisi ca ë quënëquë. Quënëpama tsi Dios Chani, Jesucristo Chani, tihi caba Chani tsi xo naa ë quënëhaina iquia. Noqui parayamacani quiha. Jabija ca tsi xo naa ra. ³ Jasca, shomahuahacaxëhi quiha naa Chani tsayahai cato. Jasca, shomahuahacaxëhi quiha ë quënëha ca chani nicahai cato, nëã ca yoba chahahuapihi na. Tsayacahuë. Tsëquëti basima tsi xo naa ixëti nori ca jahuë bo iquia ra.

Siete ca iglesia bo qui Juan carta raahacanina

⁴ Jabi naa carta raati ibo ca Juan ca ëa xo naa. Asia maí ca siete ca iglesia bo qui naa chani raaquia. Jasca, noba oquë-oquëria ca Diós mato shomahuano. Mato ja ranihuano. I-ipaonish ca, jaboqui nori ca, i-ixëhai ca Ibo-iboria tsi xo naa ra. Jasca, jahuë trono bësojo cató ca Espíritu Santó mato shomahuano, naa siete ca jabi bo jaya-jayaria cato. ⁵ Jasca, Jesucristó mato chamahuano jaa ri. Dios Chani jisiquimati Ibo-iboria tsi xo naa. Jasca, jariapari ca bësotëquënish ca tsi xo toa noba Ibo ra. Jatiroha ca maí ca chama-chamaria bo oquë-oquëria xo. Ja tsi xo toa no oquë-oquëhuahaina. Noqui noi-noiriah quiha. Noiha no bax ja rësoniquë jocha quima noqui paquëmaxëna. ⁶ Jasca, chama bo, arati ibo-iboria bo, tihi cabo noqui ja manëmaniquë, jahuë Dios, naa jahuë Jahëpa yoi bax no yonocono iquish na. Jatsi oquë-oquëhuahacaxëti xo noba Cristo ra. I-ipaoxëti xo jahuë chama ra. Jaha tsi xo. ⁷ Cristo tsi xo toa tsëmo ó ca joxëhaina. Ja jono tsi tsayayocaxëcane quiha jatiroha cabo. Tsayacaxëcane quiha jodiobo ri, naa Jesu acanish cabo. Jatsi aracaxëcane quiha maí ca carayanabo tëquë, jahuë copi qui raquëhi na. Parayamaquia. Toca tsi ixëhi quiha ë yoahaina ra. Jaha tsi xo.

⁸ “Jahuë chitahë, jahuë rëso, tihi ca ëa xo naa ra” ii quiha noba Ibo Dios. Toca tsi chanihi quiha naa i-ipaonish ca, jaboqui nori ca, i-ixëhai ca Ibo-iboria. Noba Chama-chamaria tsi xo naa iquia.

⁹ Mabë xatë ca Juan ca ëa xo naa. Ibo iqui tsi mato bëta xo tënëquia ëa ri. Jasca, mato bëta xo tsi yonaxëquia ëa ri Diós yonahai cato xo na. Tënëhi tsi yosanayamaqui noa ra. Jabi naa Patmos icanai ca tëmisco qui ë raahacane quiha racati rë, Dios Chani, Jesú anina, tihi cabo ë yoani quëshpi na. ¹⁰ Nëã ca tsi Iboha barí tsi Espíritu Santó ëa ibohuaquë. Jatsi noho casojó ca jamë ca joi ë nicaquë. Chamaxëniria ca joi ja iqui quiha ë nicahana; naa trompeta jascaria cato. ¹¹ Jatsi ë qui joi nëcaquë:

—Huësti ca libro ó tsi mi quënëxëti xo mi tsayahai ca yoati na. Quënëxo tsi siete ca iglesiá ca chahahuacanaibo qui naa Chani raahuë, naa Efeso, Esmirna, Pérgamo, Tiatira, Sardis, Filadelfía, Laodicea. Tihi ca iglesia bo qui naa chani raahuë —i ë qui joi quë.

¹² Nicaax ë chihoriquë ë qui chanihai ca jisxëna. Chihorixo tsi vela acha cabo, naa siete ca candelero icanai ca ë jisquë. Oro ca ja icanai quiha.

¹³ Toa candelero bo naxërequë ó ca Jesu jisiria ca ë jisquë. “Nohiria Baquë”

ja quēnahacaha quiha. Jasca, tētēcaria jahuē sahuēti iqui quiha. Oro ca shitaramēti sahuē ja iqui quiha. ¹⁴ Jahuē mapó ca boo joxoria iqui quiha, naa joxoria ca huaxmē jisiriā cato. Jasca quiha jahuē bēro ri; chihi rēxquēria ca iqui quiha. ¹⁵ Jasca quiha jahuē tahē bo ri bajrahaina. Chihi quima bichiquihax ca bajratiaria ca bronze metal jascaria jahuē tahē iqui quiha. Jasca, pao boxtoro pacotsa jascaria jahuē joi iqui quiha. ¹⁶ Jahuē mēnēcaya ca mēquēnē tsi siete ca huishti bo acha ja iqui quiha. Jahuē jana quima tsēquēhi iqui quiha rabē ca quēno jaya ca manē tētēcaria. Jasca, bari bajrahai jascaria jahuē bēmana iqui quiha. Tihi ca tsi ē jisquē tsayaxo na.

¹⁷ Tsayahax mai qui ē paquēquē. Bēsoyama ca jascaria ē iquē ra. Jatsi jahuē mēquē mēnēcayá tsi ēa ja motsaquē.

—Raquēyamahuē. Jahuē chitahē, jahuē rēso, tihi ca ēa xo naa. Ea ti tsi xo toa Bēsoti Ibo-iboria. ¹⁸ E rēsoniquē. Jama, tsayapa. Jaboqui bēso xo ēa ra. Bēso-bēsopaohai ca ēa xo naa ra. Ea roha tsi xo toa namēti chama jaya cato. Ea roha tsi xo toa rēsonish cabo iti caiti llave jaya cato ra. ¹⁹ Jatsi mi tsayahana, mi tsayahaxhaina, jasca, toa ixēti nori ca jahuē bo, tihi cabo mi quēnēno. ²⁰ Jabi noho mēnēcayá ca mēquēnē ca huishti bo, jasca, toa siete ca candelero bo, tihi cabo yoati nohiria bá cahēyamani quiha. Jato qui bērohuahama ja ini quiha. Jama, jaboqui mi bax bērohuaxēquia, ja cahēcanao iquish na. Nicapa: Siete ca huishti bo tsi xo toa siete ca iglesia bo obēsocanaibo. Jatsi toa siete ca candelero bo tsi xo toa iglesia yoi bo ri.

2

Efesó ca chahahuacanaibo qui Dios Chani raahacanina

¹ Efesó ca chahahuacanaibo obēso ca qui naa chani quēnēhuē. “Ea ti tsi xo toa chani mato qui raati ibo-iboria, naa siete ca huishti bo jahuē mēnēcayá ca mēquēnē tsi acha cato. Chaniquia ra, naa oro ca candelero bo naxērēquē ó tsi nii cato. ² E bax ma ani ca yonoco cahēquia ra. Yonocopama tsi ma yosanayamaniquē ra. Jasca, mato qui yoi ini quiha toa jochahuaxēni ca nohiria bo. Jasca, mato qui bēcani quiha toa mahitsa ca Dios Chani yoacanaibo, ‘Dios Chani yoati ibo bo xo noa’ iquiina. Jatsi jia tsi toa paracanaibo ma tanamaniquē ja quiacanai ca jismaxēna. ³ Jasca, ma shinapēniniquē. Ea iqui tsi tēnēpama tsi ma yosanayamaniquē iquia. Tihi ca tsi cahēquia mato yoati na. ⁴ Jama, tobi xo toa huēsti ca yoi cato rē. Rēquē ó tsi ēa ma noiyoipaoniquē. Jama jaboqui mahitsa tsi xo toa ma noihaina rē. ⁵ Shinaparicana. Nēma tsi xo toa ma paquēhana. Anomaria i-ipaoni quiha ma noihaina iquia. Jama, jaboqui ēa basi xo mato rē. Jatsi mato jocha quima casocana iquia ra. Ma ani jascaria ma atēquēno. Ma tocapiyamano tsi mēri tsi joxēquia mato iti ó ca candelero mēbixēna. Jatsi yamaxēhi quiha ē bax ma yonocoxēhaina ra. ⁶ Jatsi quiniacaxēcahuē. Jari shoma xo mato ra. Mahitsa ca Dios qui aracanaibo, naa nicolaítabo icanai cabo qui ma shinapēniyama-niquē ra. Jēnima quiha. Ja acanai ca tahēhax jato qui caxaquia ēa ri. ⁷ Toca tsi iglesia bo qui chanihi quiha Espiritu Santo ra. Jatsi nicacana pahoqui quini jaya cabá. Premio axēquia ra bēbocanaibo qui. Dios mana ca iti-itiria ca jihui bimi, naa “Bēsomati jihui” icanai ca bimi jato pimaxēquia. Jatsi bēso-bēsopaocaxēcani quiha ra”.

Esmirná ca chahahuacanaibo qui Dios Chani raahacanina

⁸ Esmirná ca chahahuacanaibo obēso ca qui naa chani quēnēhuē. “Ea ti tsi xo toa chani raati ibo, naa jahuē chitahē, jahuē rēso, tihi cabo nori cato. Rēsonish ca bēsotēquēnish ca ēa xo naa ra. Jabi ē yoacatsai ca tsi xo naa: ⁹ Jatiroha ca cahēquia ra mato yoati na. Anomaria ini quiha ma

tênêhaina. Noitiria xo mato; jama, rico yoi bo ma nori iquia. Jasca, tobi xo toa mato osacanaibo rê, naa 'Jodio yoi bo xo noa' icanaibo; Dios xocobo jaca nomari ra. Satanás maxo ó ca xo toa bo iquia. ¹⁰ Jabi mato tènêmapaimaria xo Dios cahëyamacanaibo. Tocajacano tsi ma raquëyamano. Preso qui mato huësti huësti ca nanêxêhi quiha Satanás, mato tanamaxëna. Diez ca bari no tsi tènêxëqui mato iquia. E quima casoyamacana, mato ja acasno ri. Tocapimano tsi premio jia ca mato qui axëquia. Mato bëso-bësopaomaxëquia ra. ¹¹ Toca tsi iglesia bo qui chanihi quiha Espíritu Santo ra. Jatsi nicacana pahoqui quini jaya cabá. Raquëyamariacaxëceni quiha toa bëbocanaibo, Dios quima jochacanaibo aquëquëmahacaxëquë no”.

Pergamó ca chahuacanaibo obëso ca qui Dios Chani raahacanina

¹² Pergamó ca chahuacanaibo obëso ca qui naa chani quênêhuë. “Ea ti tsi xo naa chani raati ibo-iboria, naa rabë ca quëno jaya ca manë jaya cato. ¹³ Jatiroha ca cahëhai ca ëa xo naa. Satanás yonahai cato ó tsi racaqui mato rê. Jasca, jia tsi xo toa ë qui ma chitimiyoihaina iquia. Jabi noho Chani yoanish ca Antipas namêhacaquë ri tsi ë quima ma casoyamaniquë ra. Mato yacata ax tsi naa Satanás bësohai cato ax tsi ja namêhacani quiha. Tihi ca tsi cahëquia mato yoati na. ¹⁴ Jama, tobi xo toa huësti huësti ca ë qui yoi cato. Mato ó tsi xo toa Balaam yoba banahuacanaibo rê. Jabi chama Balac qui yoba yoi Balaam yamabá ani quiha pë, Israél cabo jochamaxëna. Toatiyá tsi ídolo bo qui acacanish ca namí piti, carayana ca yoxa bo ya rabënati, tihi ca tsi Israel cabo ja jabimani quiha ra. ¹⁵ Jasca, mato ó tsi xo toa nicolaítaba yoba, rê, naa yoba yoi ca ó quëcëcanaibo. Anoma quiha. ¹⁶ Jatsi mato jocha quima ë quiri bësocana iquia. Ma tocapiyamano tsi méri tsi mato qui caxëquia. Caxo toa nohiria bo axëquia ra noho jana ó ca huajahai ca rabë ca quëno jaya ca manë no ra. ¹⁷ Toca tsi iglesia bo qui chanihi quiha Espíritu Santo ra. Jatsi nicacana pahoqui quina jaya cabá. Premio axëquia bëbocanaibo qui. Mana ca mapari jato pimaxëquia. Jasca, jato qui huësti ca maxax joxo ca axëquia. Toa maxax ó tsi quênêhacaxëhi quiha jato janë paxa cabo. Toa janë paxa ca cahëxëhi quiha maxax ibo roha”.

Tiatirá ca chahuacanaibo qui Dios Chani raahacanina

¹⁸ Tiatirá ca chahuacanaibo obëso ca qui naa chani quênêhuë. “Dios baquë tsi xo naa chani raati ibo, naa chihi rëxquëria ca bëro jaya cato. Chaniquia, naa bajratiaria ca bronce metal jascaria ca tahë jaya cato. ¹⁹ Jatiroha ca cahëquia mato yoati na. Huëstima tsi xo toa jia ca ma anina. Jasca jia tsi xo Dios, nohiria bo, tihi cabo ma noihaina. E qui jia tsi xo ma chitimihaina. Jia tsi xo ma yosanayamahai ri. Jasca, jaboqui oquë tsi acasqui mato ra. Tihi ca jia ca jahuë bo cahëquia mato yoati na. ²⁰ Jama, tobi xo toa huësti huësti ca ë qui yoi cato rê. Nicacahuë. Mato ó tsi xo toa jochahuaxëni ca yoxa Jezabel jasca cato. Toa yoxa tènëqui mato rê. Anoma xo jahuë chani ra. ‘Dios Chani yoahai ca ëa xo naa’ ii quiha pë, yoiria ca ja jabimahai ca nori. Yoi ca chotahaina, ídolo bo qui acacanish ca jahuë bo pihaina, tihi ca tsi noho yonati bo jabimahi quiha pë. ²¹ Toa yoxa qui xaba ë aniquë jahuë jocha quima ja casono iquish na. Jahuë jocha jisbëriacasyama xo ra. Jahuë jabi quiha. ²² Ja tsi xo toa jaboqui naa yoxa iquimaxëquia jahuë oxati ó no. Jasca, jahuë pëhi acanaibo ri tènêmaxëquia. Toa yoxa quima pi ja casoyamacano tsi tocaxëquia jato qui. Jatsi tènëriacaxëceni quiha jato ri. ²³ Jasca, jahuë xocobo, naa jahuë yoba nicacanaibo quëyoxëquia ra. Tocahëno tsi ëa cahëyoicaxëceni quiha jatiroha ca iglesiá ca chahuacanaibo. Jatsi nohiria bá shinahai ca tëquë naispihai ca ë nori ca cahëcaxëcaqui. Jatiroha ca

nohiria bo copixëquia ra, ja acanai ca quëshpi na. ²⁴ Jama, tobi xo mato Tiatira ó ca nohiria huëtsa bo, naa toa yoxa yoba yoi biyamacanaibo. Toa Satanás yoba-yobaria jabiyamaqui mato ra. Jënima quiha. Jaboqui yama tsi xo toa yoba huëtsa mato qui ë acatsaina. ²⁵ Ma jaya ca yoba roha ma chahahuariano ëa manaquí na. Jaha bësopa. Joquia ra. ²⁶ Cahëxo tsi bëbocanaibo, naa jahuë rëso qui yonocanaibo qui yonati chama axëquia. Jatsi maí ca nohiria bo yonacaxëceni quiha. ²⁷ Jabi toa yonati chama noho Jahëpä ë qui ani quiha. Jato ë mëbihai ca iqui tsi coshixëhi quiha toa maí ca nohiria bo ja yonacanaina ra. Maí ca nohiria bo naxërëquë ó ca jochahuaxëni cabo choshacaxëceni quiha, naa chomo choshahacahai jascaria. ²⁸ Jasca, jato qui oquë axëquia, naa huishti bëro shini oquë jascaria cato. ²⁹ Toca tsi iglesia bo qui chanihi quiha Espíritu Santo ra. Jatsi nicacana pahoqui quini jaya cabá”.

3

Sardís ca chahahuacanaibo qui Dios Chani raahacahaina

¹ ‘Sardís ca chahahuacanaibo obëso ca qui naa chani quënëhuë. “Ea ti tsi xo naa Chani raati ibo, naa Dios siete ca jabi-jabiria bo jaya ca Espíritu Santo jaya cato. Chaniquia, naa siete ca huishti bo acha cato. E yoacatsai ca tsi xo naa: Jatiroha ca cahëquia mato yoati na. Dios bax ariacanaibo ma nori ca quëscahuacani quiha nohiria bo pë, mahitsa ma nori. ² Jatsi bëpëquëcana. Jatipaima xo mato mëstë ca jabi jiaxëni cato rë. Toa jabi chamahuacana. Jasca, mato tsayapama tsi yama tsi xo toa jia-jiaría ca ma acaina iquia. Jënahuariahax, ‘Jia tsi xo ma acaina’ i mato qui noho Dios na? Mahitsa tsi xo iquia. ³ Jariapari ca ó ca ma jabihuahacani ca yoba chahahuacana. Toa yoba nicacana. Jasca, mato jocha quima Dios quirí bësocana. Bëpëquëyamapimano tsi mëri tsi mato qui caxëquia. Yomaxëni ca johai ca jascaria tsi mato qui joxëquia. Toa hora ó pasoyama-xëqui mato. Toa hora yoayamaxëquia. ⁴ Jama, tobi xo toa Sardis ó ca huësti huësti ca yoshihuahama ca jabi jaya cabo. Chëquëhuahama ca raiti jayaria cabo jascaria ca xo. E bëta bohocaxëceni quiha naa nohiria ra mëstëxëni jaca nori quëshpi na. Raiti joxo ca sahuëcaxëceni quiha. ⁵ Jasca, toca tsi sahuëmahacacaxëceni quiha bëbocanaibo ri. Jasca, jato janë bo, naa bësocanaibo libro ó ca quënëni ca janë bo masayamaxëquia. Jama, noho Jahëpa, jahuë ángel bo, tihi cabo bësojo xo tsi jato janë yoaxëquia ra, ‘Nohó-nabo xo naa’ iquiina. ⁶ Toca tsi iglesia bo qui chanihi quiha Espíritu Santo ra. Jatsi nicacana pahoqui quini jaya cabá”.

Filadelfiá ca chahahuacanaibo qui Dios Chani raahacahaina

⁷ ‘Filadelfiá ca chahahuacanaibo obëso ca qui naa chani quënëhuë. “Ea ti tsi xo naa Chani raati ibo, naa mëstëxëni ca parayamamai cato. Chaniquia, naa Diós otoi ca qui jicoti llave jaya cato. David yamaba llave jascaria quiha. Jabi caiti ë japëcano tsi yama tsi xo toa nohiria huëtsá toa caiti japahaina ra. Jasca, ë japo tsi yama tsi xo toa japëcaina. ⁸ Jabi jatiroha ca cahëquia mato yoati na. Tsayacahuë. Mato bësojó tsi caiti ë japëcaquë. Yama tsi xo toa caiti japahaina ra. Jasca, iriama tsi xo toa Dios yonoco ma acatsaina iquia. Coshiriyama xo mato rë. Jama, noho yoba nicayoicasqui mato ra. Jënima quiha. Jasca, yama tsi xo toa ë quima casocanaibo mato ó no. ⁹ Nicacahuë. Tobi xo toa mato pasomaha ca mahitsa ca jodiobo. ‘Jodiobo yoi xo noa’ icani quiha pë; quiaxëni cabo jaca nori. Satanás maxo ó cabo ca xo. Mato tahë ó tsi jato mënimaxëquia. Mënihax, ‘Mato noi-noiriahí quiha Dios ra’ i mato qui caxëceni quiha ra. ¹⁰ Jasca, jia tsi xo toa noho yoba bo ma chahahuahaina

iquia. Ma yosanayamaniquë. Ja iqui tsi mato otoxëquia, maí ca nohiria bo qui tēnētiya joxëquë no. Toatiyá tsi tanamahacacaxëcāni quihā maí ca bēsocāni ca nohiria ra. ¹¹ Jatsi quiniacaxëcahuë. Cati basima xo ëa ra. Ma jaya ca jahué bo achariacana, mato premio jia ca tsohuëcaracá mato quima mëbiyamano iquish na. ¹² Premio axëquia ra bëbocānaibo qui. Noho Dios arati xobo ó ca iti jato qui axëquia. Toá tsi chinichiti jascaria icaxëcāni quihā. Toca tsi Dios iti ó tsi i-ipaocaxëcāni quihā ra. Jasca, jato ó tsi noho Dios janë, noho Dios yacata janë, noho janë paxa yoi cato, tihi cabo quënëxëquia jato ó no. Jabi toa Dios yaca-yacaria tsi xo toa Jerusalén paxa cato, naa Dios quima ax mai qui botëxëhai cato. ¹³ Nëca tsi iglesia bo qui chanihi quihā Espíritu Santo. Jatsi nicacana pahoqui quini jaya cabá”.

Laodiceá ca chahahuacānaibo qui Dios Chani raahacahaina

¹⁴ Laodiceá ca chahahuacānaibo obëso ca qui naa chani quënëhuë. “Ea ti tsi xo naa Chani raati ibo-iboria, naa jabija ca yoati ibo-iboria. Parayamahai ca ëa xo naa ra. Jasca, Diós nēhohuani ca jahué bo chitahëhuati ibo-iboria ca ëa xo naa ra. E yoacatsai ca tsi xo naa: ¹⁵ Jatiroha ca cahëquia mato yoati na. Dios Chani pasomahama xo mato iquia; jasca Dios Chani noiyoihai cabo ma nomari. Matsi ma xo mato; itsis ri ma nomari rë. ¹⁶ Jishopë. Mato tsi xo huaha roha. Anoma quihā. Ja iqui tsi noho jana quima mato michoxëquia ra. ¹⁷ Jasca, ‘Rico xo noa. Anomaria tsi xo noba parata ra. Narisyamahai ca noqui xo naa’ tihi ca tsi iqui mato pë. Jënima ca ma nori ca quëscahuāqui mato rë, noitiria ca ma nori. Bëco xo mato ra. Jasca, tsoboco ca ma nori ca cahëyamaqui mato rë. ¹⁸ Jatsi quiniacaxëcahuë. Jariapari tsi noho yoba-yobaria bicahuë. Chihí tsi rohahuahacāni ca oro jascaria xo noho yoba ra. Bichí tsi rico-ricoria ca manëyoixëqui mato. Jasca, bërabiria tsi xo toa ma yoyohaina iquia. Tsoboco ca jascaria xo mato rë. Jatsi raiti joxo, naa jabi mëstë ca bicana. Bixo sahuëcana jianaxëna. Jasca, jabija ca taisyamaqui mato iquia, bëco ma nori iqui na. Jatsi bëro chëxati bicahuë taisyoixëna. Tihi ca tsi xo toa ë yoacatsaina ra. ¹⁹ Ea ti tsi xo toa ë noicānaibo raahacāina. Jato yobaquia ra jato noiquí na. Jatsi quiniacaxëcahuë. Mato jocha quima ma bësono ra. ²⁰ Tsayacapa. Caiti ó tsi niiquia. Toa xo tsi quënaquia. Tsohuëcaracá noho joi nicāno tsi ë bax pi caiti ja japëcāno tsi jicoxëquia. Jicohax ja bëta oriquixëquia. Jatsi oriquirequinoxëqui noa. ²¹ Jasca, premio axëquia bëbocānaibo qui. Noho yonati chama jato bëta xatënoxëquia. Jatsi noho trono ó tsi jato tsahomaxëquia ë bëta xo ja yonacāno. Jabi bëboxo tsi noho iti ë biniquë ëa ri, noho Jahëpa trono ó cato. ²² Nëca tsi iglesia qui chanihi quihā Espíritu Santo. Jatsi nicacana pahoqui quini jaya cabá. Jabi tihi ca tsi xo toa Ibobá ë qui yoahana”.

4

Naipá ca trono

¹ Naa quirëquë ë tsayatëquëquë. Toá tsi ëa bësojó iqui quihā naipá ca japëcāhaca ca caiti. Tobi iqui quihā toa jasca ca joi-joiria, naa trompeta pacotsa jascaria. E qui ja nëcaha quihā:

—Nëá tsi inahuë. Jahuëcara mia jismacasquia, naa ixëti nori ca rëquë ca joxëhai ca jahué bo —iquiina.

² Jatsi Espíritu Santó ëa ibohuatapiquë. Ea bësojó tsi nii iqui quihā naipá ca tronoria. Jahá tsaho tsohuëcara iqui quihā. ³ Anomaria jahué jaria

iqui quiha, naa bajrahai ca maxaxa, naa jaspe, cornalina, tihi cabo bajra-bajrahai ca maxax bo jascaria. Jasca, tobi iqui quiha nahuabahi trono tēamē cato. Esmeralda maxax jascaria tsi bajra-bajrajaquē jaa ri. ⁴ Jasca, trono tēamē iqui quiha veinticuatro ca yonati trono huētsa bo. Jahá tsaho iqui quiha veinticuatro ca yosibo, naa raiti joxo sahuē cabo. Jasca, oro ca chaha tēquē ja jayacana quiha jato mapó no. ⁵ Jasca, toa trono quima tsēquēha quiha bajrahai ca canapa ra. Jahanahax huajaha quiha tērē-tērēhai ca pacotsa. Jasca, toa trono bēsojō tsi nii iqui quiha siete ca ririhai ca jotati bo. Toa jotati bo tsi xo toa Dios Espiritu Santo, naa siete ca jabi-jabiria jaya cato. ⁶ Jasca, trono bēsojō tsi iqui quiha ianē, naa bēisiti jisi cato. Shērēria ja iqui quiha.

Jasca, nēpax tsi naa tronoria tēamē tsi mani iqui quiha cuatro ca niilai ca jahuēcara ca bēsocanaibo. Bēro tirixēniria ja jayacana quiha, naa ja bēsojō no, ja casojō no. ⁷ Jabi toa jariapari ca bēsohai ca tsi xo cama jisiria cato. Jatsi jaquirēquē ca tsi xo toa toro jisiria cato. Jatsi jaquirēquē ca tsi xo toa joni bēmanaria jisiria cato. Jatsi jaquirēquē ca tsi xo toa noyahai ca tētēpahua jisiria cato. ⁸ Jasca, seis ca pēhi bo jayacana quiha naa cuatro ca bēsohai ca jahuēcara bo. Jato tēa tsi huēstima ca bēro sahuē ja icana quiha, jato pēhi nama jaca nori. Jasca, barihani, baquicha, tihi tsi ja quēquēcaquē. Jēnēhaxma tsi ja nēcacana quiha:

“Aquēquē, aquēquē, aquēquēria tsi xo Ibo Dios Chamaxēni cato ra.

I-ipaonish ca jaboqui nori ca i-ixēhai ca Ibo-iboria tsi xo naa ra” iquina.

⁹ Jia tsi quiha tronoriá ca tsahohai ca bēso-bēsopaohai ca ja ocahuariacaquē, naa cuatro ca bēsohai ca jahuēcara bo. Toa tsahohai ca ja oquēhuacana quiha. Jasca, “Gracias” i ja qui jacana quiha, ja ani quēshpi na. ¹⁰ Tocajacaquē tsi quiha ja bēsojō tsi toa veinticuatro ca yosibo mēni-mēniquē. Mēnihax Bēso-bēsopaohai ca qui ja ara-aracaquē jato ri. Araxo tsi quiha trono bēsojo xo tsi jato oro ca chaha bo ja janacaquē. Janahax ja nēcacaquē:

¹¹ “Noba Ibo, noba Dios xo mia ra.

Jia tsi xo toa oquē, chama, tihi cabo mi bichiina.

Tocaxēti xo, jatiroha ca jahuē bo mi nēhohuani iqui na.

Mi shinaná tsi ja nēhohuahacaniquē.

Mia iqui tsi iicani quiha ra”

i veinticuatro ca yosibo a quiha tronó tsaho ca qui.

5

Quēnē-quēnēria, jatsi Cordero, tihi cabo

¹ Tronó ca tsahohai ca tsayapama tsi quēnē jaya ca tēto ca papi ē jisquē, naa jahuē mēquē mēnēcayá cato. Papi xara, jasca, papi cacha, tihi cato ó tsi toa quēnē iqui quiha. Jasca, siete ca sello bo jayaha quiha toa quēnē quēbēti.

² Jaquirēquē huēsti ca ángel chamaxēni ca ē jisquē ra. Joi pistiamá tsi ēa ja quēnaquē:

—¿Tsohuēcara ni toa naa tēto ca papi huishquirimati mētsa cato, naa oquē jaya cato ra? ¿Tsohuēcara ni toa jahuē sello bo noshati mētsa cato? —i ē qui ja a quiha.

³ Jabi yama iqui quiha toa papi huishquirimati mētsa cato rē. Naipá tsi yama. Maí tsi yama. Bēsoyama caba ití tsi yama. Tihi cabo ó tsi yama iqui quiha toa tēto ca papi huishquirimati mētsa cato rē, jahuē quēnē noqui nicamati. ⁴ Jatsi ē araconaquē. Yama iqui quiha toa oquē ca nohiria toa papi huishquirimati rē. Yama iqui quiha toá ca chani noqui nicamati mētsa cato ra. ⁵ Jatsi ē qui huēsti ca toá ca yosi ca chaniquē:

—Arayamahuë. Tobi xo toa Judá maxo ó ca Cama jascaria cato, naa David yamaba chahitaxocobo. Bëbo-bëborianish ca tsi xo naa. Toa papi sello bo noshaxëhi quiha huishquirimaxëna. Ati mëtsa xo ra —i ë qui yosi ca a quiha.

⁶ Jatsi Cordero ë jisquë. Trono ó tsi nii ja iqui quiha. Jasca, ja tëamë iqui quiha toa cuatro ca bësocanaï ca jahuëcara bo. Toa iqui quiha yosibo ri. Acacanish ca iquiria ja iqui quiha. Siete ca mahui bo ja jayaha quiha. Jasca, siete ca bëro ja jayaha quiha. Jabi naa siete ca bëro bo tsi xo toa siete ca jabi-jabiria bo jaya ca Espíritu Santo ra. Jatiroha ca mai qui ja raahacani quiha.

⁷ Jatsi tronó ca tsaho ca qui Cordero caquë. Caxo tsi quiha jahuë mëquë mëncayá ca tëto ca papi ja biquë. ⁸ Ja biquë tsi quiha ja bësój tsi mënicaniquë toa cuatro ca bësohai ca jahuëcara bo. Mënicacuë toa veinticuatro ca yosibo ri. Jabi música ati arpa icanai ca ja jayacana quiha toa yosibo tëquë. Jasca, oro ca cochopi bo ja achacana quiha, naa Dios nohiria bëhoxhai rëamë cabo. Jabi Dios qui incienso jascaria tsi xo toa ja bëhoxcanaina. ⁹ Jatsi quëquëti paxa ca naa yosibo quëquëquë:

“Mia ri tsi xo oquë-oquëria tëto ca papi biti, jahuë sello bo noshati.

Mi acacani quiha.

Mi jimí tsi nohiria bo mi copiniquë Dios bax na.

Jatiroha ca maxo ó ca nohiria bo, jatiroha ca joi ó ca nohiria bo, jatiroha ca pais ó ca nohiria bo, tihì cabo mi copiniquë ra mi rësohai cató no.

¹⁰ Copixo tsi quiha arati ibo, chama bo, tihì cabo jato mi manëmaniquë ra, Dios bax yonocoti, jahuë mai ja yonacano”.

Tihì tsi ja icana quiha quëquëhi na.

¹¹ Jatsi ë tsyatëquëquë. Tsayapama tsi huëstima ca ángel bo ë jisquë. Tocanoma ja icana quiha ra. Jatsi jato joi ë nicaquë. Trono, bësohai ca jahuëcara bo, yosibo, tihì cabo tëamë tsi ja manicana quiha. ¹² Joi pistiamá tsi ja quëquëcaquë jato ri.

“Oquë-oquëria ca tsi xo toa acacanish ca Cordero ra.

Chama, jahuëmishni bo tëquë, tiisi, coshi, tihì cabo ja bino ra.

Jasca, nohiria bá oquëhuano.

Ja qui nohiria bo arano”

i ángel bo a quiha quëquëhi na.

¹³ Jatsi joi huëtsa ë nicaquë. Chanihi iqui quiha jatiroha ca bësocanaibo. Chaniha quiha naipá ca bësocanaibo tëquë. Chaniha quiha maí ca bësocanaibo tëquë. Chaniha quiha bësoyama caba ití ca bësoyamacanaibo tëquë. Chaniha quiha ianë ca bësocanaibo tëquë. Tihì cabo quëquëhai ca ë nicaquë.

“Oquëhuahacapaoxëti xo toa tronó tsaho cato ra.

Oquëhuahacapaoxëti xo toa Cordero ra.

Jato qui jatiroha cabo arano ra.

Chama, oquë, tihì cabo ja jayapaono ra”

nëa tsi jatiroha ca bësocanaibo nëcaha quiha quëquëhi na.

¹⁴ Jatsi,

—Iquë. Amén —i toa cuatro ca bësohai ca jahuëcara bo quë.

Jatsi yosibo mëniyoquë, tronó ca tsaho cato, Cordero, tihì cabo qui araxëna.

6

Siete ca sello bo Corderó noshahana

¹ Jatsi Cordero ë tsayacuë. Toa siete ca sello jaya ca tëto ca papi ja jayaha quiha. Jariapari ca sello ja noshaha quiha. Ja noshaquë tsi quiha cuatro ca bësohai ca jahuëcara ó ca huëstitá quënaquë. Tërë-tërëhai ca jascaria jahuë joi iqui quiha.

—Johuë —i ja a quiha.

² Jatsi jisiquitapiquë caballo joxo. Ja cacha tsaho iqui quiha jahuë ibo; canati acha. Jatsi ja qui chaha acacaquë. Bichi tsi quiha ja jabaquë bëbo-bëboxëna.

³ Jatsi toa sello segundo ca Corderó noshaquë. Noshajahuquë tsi quiha bësohai ca jahuëcara ó ca segundo cató quënaquë:

—Johuë —iquiina.

⁴ Tocaquë tsi quiha huajatapiquë caballo huëtsa, naa shini-shiniria cato. Jahuë ibo qui chama acacaha quiha, maí ca nohiria bo iquinamati, jia tsi ja racanabëquiyamacano iquish na. Ja iqui tsi jato huëtsa nohiria bá aca quiha. Jasca, ja qui saipihua acacaha quiha nohiria bo ati.

⁵ Jatsi sello tercer ca Corderó noshaquë tsi quiha toa bësohai ca jahuëcara ó ca tercer cató quënaquë:

—Johuë —iquiina.

Jatsi jisiquitapiquë caballo chëquë cato. Balanza acha jahuë ibo iqui quiha. ⁶ Jatsi toa cuatro ca bësohai ca jahuëcara ca naxërequë ó ca joi ë nicaquë tonia.

—Biniacaxëcani quiha nohiria. Jatsi huësti ca bari sueldo quëshpi tsi iniahacaxëti xo harina trigo, naa huësti ca kilo cato. Jasca, huësti ca bari sueldo quëshpi tsi iniahacaxëti xo cebada icanai ca bëro tres kilo cato ra. Jama, xëni precio, vino precio, tihi cabo inamayamahuë —nëa tsi caballo ibo qui joi nëcaha quiha.

⁷ Jatsi sello cuarto ca Corderó noshaquë tsi quiha toa bësohai ca jahuëcara ó ca cuarto cató quënaquë:

—Johuë —iquiina.

⁸ Jatsi jisiquitapiquë caballo pajoxo cato. Rësomati ibo-iboria jahuë ibo quënahacaha quiha. Jasca, ja cho bocana quiha rësohax cabo tëquë. Jatsi jato qui chama acacaha quiha maf ca nohiria bo, naa huësti cuarto cabo ati. Nohiria bo nianamahaina, nohiria biniahuahaina, banahaca ca bëro, bimi, tihi cabo yoshihuahaina, nohiria bo yohiná pihaina, tihi cabo ati mëtsa ángel iqui quiha nohiria bo axëna.

⁹ Jatsi sello quinto ca Corderó noshaquë tsi quiha altar namá ca rësonish cabo ë jisquë. Dios Chani ja yoacanai ca tahëxo tsi ja acacani quiha.

¹⁰ Jatsi joi pistiamá tsi ja quënaquë:

—Mia ri tsi xo chamaxëniria ca Ibo-iboria. Mia ri tsi xo jabija ca mëstëxëni cato ra. ¿Jëmino tsi noxí acanish cabo copixëhai ra? Mi bamayamano ra. Toa maí ca nohiria bo copihuë —nëa tsi ja nëcacana quiha.

¹¹ Jatsi jato qui raiti joxo acacaquë sahuëti. Jatsi, “Yosanayamacana. Acacati basima xo ra. Jariapari tsi jari rësoxëti xo mabë xatë huëtsa bo, naa ma acacani jascaria. Jari jatihuahama xo toa número ra” i jato qui Cordero quë.

¹² Jatsi sello sexto ca Corderó noshaquë tsi quiha yajo-yajoriaquë mai. Jatsi tsëmonaquë bari, naa raiti chëquë jascaria. Jatsi xabacarianaquë oxë. Jimi jisiria ja iqui quiha. ¹³ Jatsi naipa ax mai quiri huishti bo paquëyoquë, naa jihuí ca bimi mai qui paquëhai jascaria yoshi-yoshiria xotoquë no. ¹⁴ Jatsi yamatapiquë naipa. Ja tsiboha quiha papi tëto jascaria. Maí ca tëmachi bo, ianë ca tësëbë, bo tihi cabo yajohacacaquë. Jato iti quima ja mohimahacacani quiha. ¹⁵ Jatsi paxacasquë nohiria bo tëquë. Jabayoha quiha maí ca chama bo, comandante bo, rico cabo, empleado bo, yonati bo, joni bo chama yama cabo. Tëmachí ca quini bo qui tihi cabo jabayoha quiha jonëxëna. ¹⁶ Jabaxo tsi quiha tëmachi bo, maxax bo, tihi cabo qui ja quënaquë. Quënahax,

—Noqui cacha paquëcahuë. Toa mana ca tronó ca tsaho ca quima noqui jonëmahuë. Jasca, caxaxëniria tsi xo toa Cordero ra. Ja quima noqui jonëmahuë —i jaca na quiha.

¹⁷ Joquë toa bari ra. Jaboqui jisiquihi quiha jato qui ja caxa-caxacanaina ra. Yama tsi xo toa paxahaina.

7

Dios yonati bo xabahamahacahaina

¹ Toa quirëquë cuatro ca ángel bo ë jisquë. Maí ca cuatro ca papoto ó tsi nii ja icana quiha. Toa xo tsi quiha mai quiri yoshi xotohai ca ja quëtiacaquë. Ja iqui tsi mai, jënë, jihui, tihi cabo ó tsi yoshi xotoyamaquë. ² Jatsi ángel huëtsa ë jisquë. Bari johai ca ax ja joquë. Jasca, bësohai ca Dios jisti ja jayaha quiha. Joxo tsi quiha toa cuatro ca ángel bo, naa mai, jënë, tihi cabo yoshihuacanaibo ja quënaquë:

³ —Jari mai, jënë, tihi cabo yoshihuayamacahuë. Noba Dios yonati ba bëpara ó tsi jisti no quënëparixëti xo —i jato qui ja a quiha.

⁴ Jatsi ciento cuarenta y cuatro mil cabo iqui quiha, naa toa Dios jisti tsi quënëhacahax cabo. Israel cabo tëquë ja icana quiha, naa doce ca maxo quima cabo. ⁵ Quënëhacaha quiha doce mil ca Judá ca maxo ó ca nohiria. Quënëhacaha quiha doce mil ca Rubén ca maxo ó ca nohiria. Jatsi quënëhacaha quiha doce mil ca Gad ca maxo ó ca nohiria. ⁶ Jatsi quënëhacaha quiha doce mil ca Asér ca maxo ó ca nohiria. Jatsi quënëhacaha quiha doce mil ca Neftalí ca maxo ó ca nohiria. Jatsi quënëhacaha quiha doce mil ca Manasés ca maxo ó ca nohiria. ⁷ Jatsi quënëhacaha quiha doce mil ca Simeón ca maxo ó ca nohiria. Jatsi quënëhacaha quiha doce mil ca Leví ca maxo ó ca nohiria. Jatsi quënëhacaha quiha doce mil ca Isacar ca maxo ó ca nohiria. ⁸ Jatsi quënëhacaha quiha doce mil ca Zabulón ca maxo ó ca nohiria. Jatsi quënëhacaha quiha doce mil ca José ca maxo ó ca nohiria. Jatsi quënëhacaha quiha doce mil ca Benjamin ca maxo ó ca nohiria. Tihi cabo quënëhacaha quiha.

Raiti joxo sahuë cabo

⁹ Naa quirëquë huëstima ca nohiria ë jisquë. Tocanoma ja icana quiha. Jamëri, jamëri tëquë, naa jatiroha ca pais, jimí, maxo, joi, tihi cabo quima ax ja icana quiha. Jasca, toa trono, Cordero, tihi cabo bësojó tsi maní ja icana quiha. Jasca, raiti joxo sahuë, xëpamë pëhi acha, tihi ca tsi jaya ja icaquë.

¹⁰ Jatsi joi pistiamá tsi ja quënëacaquë:

—Noqui Xabahamati Ibo-iboria tsi xo toa tronó tsaho cato ra. Jasca xo Cordero ri —i jaca na quiha quënëahi na.

¹¹ Jatsi trono bësojo ó tsi mëniyoquë ángel bo tëquë. Yosibo, cuatro ca bësohai ca jahuëcara cabo, tihi cabo tëamë ja niicana quiha. Mënihax Dios qui ja aracaquë. ¹² Arahax ja nēcacana quiha:

“Jia ra. Noba Dios nohiria bo oca-ocapaono ra.

Ja oquëhuahacapaono ra.

Tiisi ja jayano ra.

Jasca ‘Gracias’ i Dios qui nohiria bo paono ra.

Jasca, chama, coshi, tihi jaya ca tsi xo noba Dios ra.

Jaha tsi xo. Amén”

nēca tsi jaca na quiha.

¹³ Jatsi huësti ca yosi ca ë qui chaniquë:

—¿Tsohuë ni naa raiti joxo ca sahuë cabo? ¿Jahuëniahax tsi ja bëcana? ¿Cahëhai mia ri? —i ë qui ja a quiha.

¹⁴ Jatsi,

—Cahëyamaquia, taitá. Mia ri tsi xo toa cahëhaina —i ja qui ë quë.

Jatsi,

—Tënëtiyaria quima ax bëcanax cabo tsi xo naa. Cordero jimí tsi jato raiti ja joxohuacani quiha, chocohaxo na. ¹⁵ Ja iqui tsi Dios trono bësojó tsi mani-manicani quiha. Toá tsi Dios aratí xobo-xoboria xo tsi mëbi-mëbiriacani quiha, barihani, baquicha tëquë. Jasca, jato ó bësoxëhi quiha toa tronó ca tsaho cato ra. ¹⁶ Ja iqui tsi paxnatëquë-yamacaxëceni quiha ra. Tëshinatëquëyamacaxë-cani quiha. Jasca, bari huaó cahëyamacaxëceni quiha. ¹⁷ Rani-ranicaxëcaqui, Cordero, naa trono ó ca jato obëso ca nori quëshpi na. Bëso-bëso ca jënë iti qui jato mëpixëhi quiha. Jasca, jato bëró ca bëhono tëquë masaxëhi quiha Dios —i ë qui huësti ca yosi ca a quiha.

8

Sello séptimo cato

¹ Jatsi toa sello séptimo ca Corderó noshaquë. Noshaquë tsi quiha medio hora no tsi naipá cabo pasiyoquë. ² Jatsi siete ca ángel bo ë jisquë, naa Dios bësojó ca nii cabo. Jato qui siete ca trompeta bo acacaha quiha. ³ Jaquirëquë joquë ángel huëtza. Oro ca incienso mëshoti cochopi bëhi ja iqui quiha. Johax trono bësojó tsi ja niuquë. Jatsi incienso misco ca ja qui acacaquë, Dios nohiria bo bëhox-hai qui maniatí. Jatsi toa oro ca altar xo tsi, naa trono bësojó ó ca nii ca altar xo tsi quiha tihi cabo ja mëshaquë. ⁴ Jatsi Dios iti bësojó tsi mëshohai ca incienso ca cohini tëronoquë Dios nohiria bo bëhoxhai ya. ⁵ Jatsi oro ca cochopi ángel biquë. Bixo tsi quiha altár ca chihi rëxquë tsi ja rëaquë. Rëaxo tsi quiha mai qui ja niaquë. Niajahuaquë tsi quiha huëstima ca tërëhai ca iquë. Choshi-choshiquë canapa. Yajo-yajoquë mai. Tihi tsi ja iqui quiha.

Trompeta bo

⁶ Jatsi toa siete ca angel bá jato trompeta bo xoohati shinama tsi iticato-caquë. ⁷ Jatsi jariapari ca ángel jahuë trompeta xoohaquë. Xoohajahuaquë tsi quiha oiroxaya, jimi ya jaxcamëna ca chihi, tihi cabo mai qui niahacaquë. Jatsi mëshoquë mai ca tercer ca xatë cato. Mëshoquë mai ca jihui bo, huasi, naa jato tercer ca xatë cato. Tihiria ca tsi mëshoquë ra.

⁸ Jaquirëquë segundo ca ángel jahuë trompeta xoohaquë. Xoohajahuaquë tsi riri-ririhai ca témachi chahitaxëni ca jisiria ca quiha iahua qui niahacaquë. Jatsi jënë jimi manëquë, naa tercer ca jënë xatë cato. ⁹ Jatsi rësoyoquë iahúa ca bësohai ca jahuë bo, naa tercer ca xatë cato. Jasca, quëyohacaquë tercer ca jënë ca barco bo ri. Tihi tsi quëyohacaquë ra.

¹⁰ Jatsi tercer ca ángel jahuë trompeta xoohaquë. Xoohajahuaquë tsi quiha huishti-huishtiria, naa riri-ririhai ca jotati jisiria ca paquëquë nai ax na. Ani bo, toroco bo, tihi cabo qui ja paquëha quiha. ¹¹ “Mocahua” naa huishti quënahacaha quiha. Jatsi mocanaquë jënë, naa tercer ca xatë cato. Rësoquë huëstima ca nohiria bo acax na.

¹² Jatsi cuarto ca ángel jahuë trompeta xoohaquë. Xoohajahuaquë tsi quiha bari, oxë, huishti bo, tihi cabo nocacasquë. Jatsi tsëmonaquë jato tercer ca xatë cato. Ja iqui tsi iriama iqui quiha barihani bari huëahaina. Jasca, iriama iqui quiha baquichá oxë, huishti bo, tihi cabo huëahaina. Jabi toca tsi ja iqui quiha.

13 Jatsi tsayapama tsi naipá ca noyahai ca tètëpahua è nicaquë. Joi pistiamá tsi quënahi ja iqui quiha.

—Jishorama. Raquëria xo. Aquërama. Noiti-noitixëhi quiha maí ca nohiria bo tëquë, naa tres ca trompeta huëtsa bo xooahacaquë no. Jato xoohapaimaria xo naa tres ca choo ca ángel bo ra —i tètëpahua a quiha.

9

1 Jatsi quinto ca ángel jahuë trompeta xoohaquë. Xoohajahuaquë tsi quiha nai ax maí quiñi paquëhai ca huishtimahua è jisquë. Ja qui llave acacaha quiha rësonish caba iti pëcati. 2 Toa iti ja japëcaquë tsi quiha toa quiñi ax huajaquë chihicohini. Anomaria toa cohini iqui quiha, naa boyo ax huajahai ca cohini jascaria. Jatsi ja tsëmonaquë. Jisnoma bari iqui quiha. 3 Jatsi quiha tsëmo quima huajaquë chapo-chaporía bo. Jato qui pahëria ca chama acacaha quiha, naa nibo chama jasca cato. 4 Jatsi ja yoahacacaquë, huaí ca bimi, jihui, tihí cabo yoshihuayamaxëti. Jama, jënima iqui quiha toa bëpará ca Dios quënë jayama ca nohiria bo ja yoshihuahaina. 5 Jato namëtima ja icana quiha, tënëmati nori. Jatsi cinco ca oxë no tsi toa chahahuayamacanaibo ja tënëmaquë. Nibo pahë jascaria iqui quiha toa pahë ra. 6 Tocajacano tsi rësocasxëcani quiha nohiria ra, rësonoma jaca nori.

7 Nianati shomahuaha ca caballo jisiria ca toa chapohua bo iqui quiha. Jahuëcara ca, naa oro ca chaha bo sahuë ja icana quiha. Jasca, jato bëmana, joni bá-na jisiria ja icana quiha. 8 Jato boo, yoxa ba boo jisiria quiha. Jato xëta, camano xëta jisiria quiha. 9 Jasca, manë ca shipati quiniamati bo sahuë ja icana quiha. Noyapama tsi anomaria iqui quiha jato pëhi ba pacotsa, naa nianati caballo carro bo jabahai jascaria cato. 10 Jasca, jato jina ó ca nibo chishquë bo ja jayacana quiha. Anomaria toa jato chishquënë pahë iqui quiha, naa cinco ca oxë no. 11 Jasca, tobi iqui quiha jato rëquëniniti ibo; naa rësocanaibo iti obëso ca ángel. “Quëyomixëneria” ja quënahacaha quiha, naa jato obësoti chama. (Hebreo joi tsi jahuë janë tsi xo “Abadón”; carayana joi tsi “Apolión” ja nori.)

12 Toca tsi huinocaquë toa jariapari ca nohiria bá tënë-tënëhaina ra. Jama, tobi iti xo dos ca tënëtiya huëtsa bo. Jari acama quiha.

13 Jatsi sexto ca ángel jahuë trompeta xoohaquë. Xoohajahuaquë tsi quiha joi huëtsa è nicaquë. Dios trono bësojo ó ca altar oro ca quima toa joi huajaha quiha, naa jahuë cuatro ca mahui naxërëquë ax na. 14 Sexto ca trompeta jaya ca ángel qui toa joi chaniquë:

—Eufrates icanaí ca ani-aniria ó tsi xo cuatro ca nëxahacanish ca ángel bo. Jato pëcahuë —i ángel qui joi a quiha.

15 Naa hora yoi, naa bari, naa oxë, naa xënipa, tihí cabo quëshpi tsi ja janahacacani quiha. Jaboqui tsi ja paquëmahacayaquë tercer ca maí ca nohiria bo ati. 16 Jasca, huëstima ca soldado bo, naa caballo jaya cabo ja jayacana quiha. Doscientos millones toa è nicaha ca número iquë ra.

17 Tsayapama tsi toa caballo bo, jato ibo bo, tihí cabo è jisquë. Huëstima ca color bo jaya quiha ja sahuëcanai ca manë ca shipati quiniamati bo. Tobi iqui quiha shini-shiniria, niaba, amarillo, tihí cabo color bo. Jato caballo bo tsi xo camano mapo jasca ca jaya. Jasca, jato jana quima huajaquë chihi, chihicohini, azufre, tihí cabo. 18 Jato jana huajahai ca chihi, cohini, azufre, tihí cabá tsi nohiria bo acacana quiha. Jatsi rësoyoquë, naa tercer ca maí ca nohiria bo ra. 19 Chamaxëneria toa caballo jana bo iqui quiha nohiria bo ati. Jasca, chama jaya quiha jato jina bo ri. Rono bo jascaria ja icani quiha. Jato

jina bo ó tsi iqui quiha tēxēmīxēniria ca mapo bo. Toca tsi nohiria huēstima ca ja pahēhuacana quiha.

²⁰Jama, jato yoi ca jahuē bo quima casocasyamaquē toa rēsoyamanish cabo. Jari yoshi qui ja aracaquē pē. Jasca, jato ídolo bo, naa oro, plata, bronce, maxaxa, jihui, tihi cabá tsi acacanish ca ídolo bo quima ja casoyamacana quiha. Jato qui jia iqui quiha toa nicayamahai ca taisyamahai ca ídolo bo pē.

²¹Jato jochahuaxēniria ca jabi niatimaxēni-riacana. Jari nohiria bo ja acaquē pē. Jari ja yoshihuacaquē yobēxo na. Jari anoma ca chotahai ja acaquē. Ja yoma-yomacaquē jaari. Jari jasca pi ja icaquē ra, tihi ca tsi áqui na.

10

Tēto ca papi pistia jaya ca ángel

¹Jatsi chamaxēniria ca ángel huētsa ē jisquē, naa nai ax botēhai cato. Tsēmo rabaha ca ja iqui quiha. Jasca, jahuē mapo cacha nahuabahi iqui quiha. Bari jisiria jahuē bēmana iqui quiha. Ririhai ca chinichiti jisiria jahuē huico iqui quiha. ²Jasca, tēto ca papi pistia ca ja achaquē jahuē mēquēnē no. Huishquirimahama toa papi iqui quiha. Jatsi ianē tsi jahuē tahē mēnēcaya ca ja janaquē. Jatsi jahuē tahē huētsa, naa mēxojó ca maí tsi ja botēmaquē.

³Toca tsi niihax ja quēnaquē. Camanó mērahai ca joi jascaria jahuē joi iqui quiha. Ja quēnaquē tsi quiha tobi iquē siete ca tērēti ibo-iboria bo tērēhaina.

⁴Ja tērēcaquē tsi quiha ē quēnēcascuē. Jama, naipá ca joi ē nicaquē:

—Quēnēyamahuē. Toa siete ca tērēti ibo-iboria bá yoaha ca nohiria bá cahēyamano ra —i ē qui joi quē.

⁵Jatsi toa ianē, maí, tihi cató ca niihai ca ángel ē jisquē. Nai qui jahuē mēnēcaya ca mēquē ja tēroha quiha. ⁶Jahuē mēquē tērohax ja chani-chaniquē. Bēso-bēsopaohai ca Dios janē, naa naipa, maí, iaha, tihi cató ca jahuē bo tēquē nēhohuati iboba janē tsi ja chaniquē, ja parayamahai ca jismaxēna. Ja nēcaquē:

—No bamayamano ra. ⁷Siete ca ángel jahuē trompeta xohacano tsi jatihuahacaxēhi quiha Díos acasnina, naa jahuē planes siri cato. Jabi toa planes nohiria bá cahēyamayoini quiha, naa jahuē Chani yoati ibo bo qui ja yoani cato —nēa tsi ángel nēcaquē.

⁸Jatsi toa joi ē nicatēquēquē, naa naipá ca ē qui chanihai ca joi.

—Toa iahua maí, tihi cató ca niihai ca ángel qui cata. Ja acha ca tēto ca papi pistia bita —i ē qui joi quē.

⁹Jatsi ángel qui ē caquē. Caxo ē bēnaquē. E biquē tsi,

—Bihuē. Pitsahuē. Mi poco xara ja no tsi monēxēhi quiha toa quēnē. Jama, bata manēxēhi quiha mi jana ó no —i ē qui ángel quē.

¹⁰Jatsi ángel quima toa tēto ca papi ē biquē. Bixo tsi ē xēhaquē. Bata tēē jascaria ja iqui quiha noho jana ó no. Jama, ē piyoquē tsi mocanaquē noho poco. ¹¹Jatsi ē yobahacatēquēquē:

—Jaboqui Dios Chani mi yoatēquēxēno ra. Jamēri ca nohiria bo, jamēri ca maí bo, joi bo, chama bo, tihi cabo yoati mi chanixēti xo —i ē qui ángel quē.

11

Dos ca Dios Chani yoati Ibo-iboria bo

¹Jatsi medida jihui ē qui acacaquē, naa tahua jisiria cato.

—Cata. Dios arati xobo, jahá ca altar, tihi cabo tanamata. Jasca, toá ca aracanaibo tocahuē. ²Jama, arati xobo cacha ca huēnē tanamayamahuē.

Dios cahëyamacanaibo qui toa iti acacaquë. Cuarenta y dos ca oxë no tsi Dios yaca-yacaria yoshihuacaxëcane quiha rë. ³Toatiyá tsi dos ca Chani yoati ibo-iboria bo raaxëquia noho Chani yoati. Jatsi mil doscientos sesenta ca bari no tsi Dios Chani yoacaxëcane quiha, cohuë ca raiti sahuëxo na.

⁴Jabi naa dos ca Chani yoati ibo-iboria bo tsi xo toa mai Ibo bësojó ca nii ca dos ca olivo jihui bo. Jasca, toa mai Ibo bësojó ca mani ca candelero bo jascaria ca xo naa dos ca Chani yoati ibo bo. ⁵Anomariaxëhi quiha ja yoacanaina. Jato jana ax huajahai ca chihi jascariaxëhi quiha jato chani. Bëroria tsi jato pasomaha cabo quëyocaxëcane quiha. Jabi tsohuëcaracá jato acasno tsi toa chihí tsi jato acaxëcane quiha. ⁶Jasca, nai quëbëti chama jayacaxëcane quiha, oi iyamano iquish na. Jatsi iyamaxëhi quiha oi, Dios Chani ja yoacaquë no. Jasca, jënë jimi manëmapicaxëcane quiha. Jasca, jatiroha ca quiniá tsi maí ca nohiria bo tënëmapicaxëcane quiha jaha quëëquí na. ⁷Jatsi Dios Chani ja yoacano tsi rësonish cabo iti ax huajaxëhi quiha toa yohina-yohinaria yoixéniria cato. Huajaxo tsi jato bëta nianaxëhi quiha. Jato bëboxëhi quiha. Bëboxo tsi jato axëhi quiha. ⁸Jatsi yaca-yacariá tsi naa Sodoma, Egipto, tihi tsi icanai cató ca bahi-bahiria ó tsi jato yora bo janacaxëcane quiha nohiria bo tsayamaxëna. Jabi toa yacata ax tsi noba Ibo acacane quiha jaa ri. ⁹Jabi tres y media ca bari no tsi toa dos ca yora bo tsaya-tsayaxëhi quiha maí ca nohiria bo. Tsayacaxëcane quiha maí ca nohiria bo tëquë, naa jatiroha ca maxo bo, joi bo, pais bo, tihi cabo. Jato yora bo maihuacasyamacaxëcane quiha ranixo na. ¹⁰Jasca, ranixo tsi jato huëtsa qui jahuëmishni bo, naa regalo bo acaxëcane quiha. Tocacaxëcane quiha, toa dos ca Chani yoati ibo bo acacana iqui na. Jato iqui tsi anomaria iqui quiha ja tënë-tënëcanaina. ¹¹Jama, tres y media ca bari huinocaquë tsi Diós jato bësomaquë. Ja joi tapicaquë ra. Jatsi raquëyoquë tsayahax cabo. ¹²Tsayapama tsi naipá ca pistiama ca joi toa dos ca joni bo qui chanihai ca ja nicaaquë. “Nëa bëcahuë” i joi a quiha. Jatsi tsëmó tsi nai qui ja tëronocaquë. Tsaya-tsayacaquë jato qui caxacanaibo. ¹³Jatsi ja tëronocaquë tsi quiha yajoyajoquë maí. Anomaria toa yajohai ca iquë ra. Toatiyá tsi poxoquë yacatá ca xobo bo, naa décima ca xatë. Jasca siete mil ca nohiria bo acacaquë. Jatsi naipá ca Dios qui ara-aracaquë nohiria tëxë, mëmëhi na.

¹⁴Toca tsi segundo ca tënëtiya huinocaquë. Ja cho jopaimaria xo huëtsa, naa tercer ca tënëtiya.

Séptima ca trompeta

¹⁵Jatsi quiha toa séptima ca angél jahuë trompeta xoohaquë. Xooha-jahuaquë tsi quiha naipá ca quënahai ca joi bo ë nicaaquë. —Jaboqui mai xo tsi yonati chama biqui noba Ibo ra, naa Diós mai qui raani cato.

Yona-yonapaoxëhi quiha ra —i jaca quë.

¹⁶Tocajacaquë tsi quiha Dios trono bësojó ca veinticuatro ca yosibo joicaquë jato tsahoti bo ax na. Joihax ja mënicaquë bëmana mai quiri. Jatsi Dios qui ja aracaquë:

¹⁷—Mi qui “Gracias” iqui noa, noba Ibo Dios chamaxëni cató.

Mia ri tsi xo toa i-ipaonish ca jaboqui nori cato ra.

“Gracias” iqui noa ra, jaboqui mi yonati chama mi bichi iqui na.

Jaboqui chitahëhi quiha mi yonahaina ra.

¹⁸Mi qui caxaxënia xo nohiria bo ra, naa jato copiti bari tsëquëha iqui na.

Jasca, tsëquëquë rësonish cabo copiti xaba ri.

Copihacaxëhi quiha mi yonati bo, naa mi Chani yoacanaibo.

Copihacaxëhi quiha chahahuacanaibo, naa mi qui aracanaibo.
 Copihacaxëhi quiha chahahuahai ca chama bo, chamayama cabo tēquē.
 Tsēquēquē ra mai yoshihuacanaibo quēyoti bari ra —nēa tsi veinticuatro ca yosibo nēcaquē.

¹⁹ Jatsi Dios mana ca arati xobo japēquēquē. Jaxara iqui quiha caja roa cato, naa Dios quēnēni ca chani jaya cato. Japēquēquē tsi quiha canapa choshiquē. Tērē-tērējaquē. Yajoquē mai. Jasca mai qui paquēquē oiroxaya chahitaxēni cabo.

12

Quēshi-quēshiria jatsi yoxa

¹ Jatsi naipá tsi jisiquiquē jisti-jistiria. Toá tsi yoxa iqui quiha, naa bari sahuē cato. Oxē cacha nīi quiha. Jasca, jahuē mapo cacha chaha iqui quiha, naa doce ca huishtimá tsi acacanish ca chaha. ² Jasca, tohoya ca ja iqui quiha. Comapama tsi ja araquē, baquē comahai ca pahē iqui na. ³ Jatsi naipá tsi jisiquiquē jisti huētsa. Toá tsi iqui quiha shini ca quēshi-quēshiria; naa chahitaxēni cato. Siete ca mapo bo, diez ca mahui bo, tihi cabo ja jaya quiha. Jasca, jahuē mapo bo cacha chaha bo sahuē ja iqui quiha. ⁴ Jasca, jahuē jina ri. Naipá ca huishti bo tercer cabo jahuē jiná biquē. Bixo tsi quiha mai qui ja niaquē. Jatsi baquē comapaimaria ca yoxa bēsojó tsi quēshi-quēshiria mēni iqui quiha jahuē cohai ca baquē pixēna. ⁵ Jatsi baquē yoxá comaquē. Joni jahuē baquē iqui quiha. Jatiroha ca maí ca nohiria bo toa baquē yonaxēti iqui quiha, chama ya. Ja coquē tsi quiha mēri tsi Dios, jahuē trono, tihi cabo qui baquē mēbihacaquē. ⁶ Tocajaquē tsi quiha jamé ca xaba qui toa yoxa jabaquē, naa ja bax Diós rohahuaha ca iti qui. Toá tsi quiha mīl doscientos sesenta ca bari no tsi ja otohacaquē.

⁷ Jaquirēquē quēshi-quēshiria ya tsi quiha Miguel, jahuē ángel bo, tihi cabo nianaquē. Jahuē yoiria ca ángel bo ya tsi nianaquē quēshi-quēshiria ri. ⁸ Jatsi quēshi-quēshiria, jahuē ángel yoi bo, tihi cabo bēbohacaquē. Nai ax ja raahacacana quiha. ⁹ Cacha toa quēshi-quēshiria niahacaquē mai qui. Yoshini, Satanás, tihi ca tsi xo toa ronoxēni jané ra, naa quēshi-quēshiria. Mai qui ja niahacaha quiha, naa maí ca nohiria bo parahax cato. Niahacaha quiha jahuē ángel bo ri.

¹⁰ Jatsi naipá ca joi-joiria ē nicaquē:

—Tsēquēquē Dios bēboti xabaca ra.

Jahuē chama ja jismaquē.

Jasca, yonahi quiha jahuē Cristo ri.

Mai qui niahacaquē noba xatē bo qui quēsomixēni cato ra, naa barihani, baquicha, tihi cató tsi Dios bēsojo ax tsi jato qui quēsohai cato.

¹¹ Cordero jimi, acacanish cabá yoanina, tihi cabá tsi ja bēbohacaquē.

Jabi rēsohai ca qui ja raquēyamacana quiha.

Toa cordero bax ja acacacana quiha.

¹² Jaha tsi raniyocana, mato naipá ca raca cabá.

Jama, cohuēnacana mato mai, iahua, tihi cabá tsi raca cabá.

Mato qui botēquē Satanás ra.

Jaboqui caxaxēniria xo, jatiti basima jahuē xaba nori iqui na.

Toa cahēhi quiha ra —nēa tsi naipá ca joi nēcaquē.

¹³ Mai qui Satanás niahacaquē ra. Caxaxo tsi quiha baquē comahax ca yoxa ja chibaquē. ¹⁴ Jatsi yoxa qui tētēpahua pēhi acacaquē, jahuē xabachá

ca iti qui noyati. Toa ax tsi quiha tres y medio ca año no tsi otohacati yoxa iqui quiha. ¹⁵ Jatsi quiha quëshi-quëshiriá janaquë. Ja janaquë tsi quiha jahuë jana quima huajaquë jënë. Ani tio ja huajahai ca jënë iqui quiha, yoxa jëtëquëmati. ¹⁶ Jatsi quiha mai japëquëquë toa quëshi-quëshiriá janaha ca jënë xëaxëna. Yoxa ja mëbiba quiha. ¹⁷⁻¹⁸ Jatsi yoxa qui caxariaquë quëshi-quëshiria. Caxahax tsi quiha ja caquë yoxa ba चाहिताखोबो पासमहा नानाखेना. Dios yoba nicacanaibo, Jesu Chani yoacanaibo, tihi cabo acatsi quiha.

13

Dos ca yoiria ca yohinahua

¹ Iahua quëmapó tsi ë niino tsi jahuëcara ca, naa yohinahua, jënë ax huajaquë. Diez ca mahui bo, siete ca mapo bo, tihi cabo jaya quiha. Jasca, jahuë mahui cacha bo mani iqui quiha diez ca chaha bo. Jasca, jahuë mapo ó tsi Dios pasomaha ca chani quënëhacaha quiha. ² Jasca, cama jisiria ca naa yohinahua iquë ra. Jahuë tahë, oso tahë jascaria iqui quiha. Jahuë jana, camano jana jascaria iqui quiha. Jatsi quiha yohinahua qui jahuë yonati chama, jahuë trono, tihi cabo quëshi-quëshiriá aquë. Tihi ca tsi ë jisquë ra. ³ Jasca, jahuë mapo huësti ca ë tsayaquë. Namënish ca jisiria ca quëësi ja jaya quiha, jahuë mapo ó no, naa taponish ca quëësi. Toa mapo bësotëquëquë tsi quiha maí ca nohiria bo ratëyoquë. Ratëxo tsi quiha yohinahua ja banahuacaquë. ⁴ Jasca, quëshi-quëshiria bësójó tsi nohiria bo mëniyoquë, yohinahua qui chama ja acana quëshpi. Mënihax tsi quiha, —¿Tsohuë ni toa yohinahua oquë cato ra? ¿Tsohuë ni toa ja pasomaha nianapihaina sa? —i nohiria bo quë yohinahua yoati na.

⁵ Jatsi cuarenta y dos ca oxë no tsi Dios pasomaha yohinahua chanipiquë. Toatiyá tsi quiha chama ja qui acacaquë yonati. ⁶ Jatsi Dios, jahuë janë, jahuë iti-itiria, jahá cabo, tihi cabo pasomaha ja chaniquë. ⁷ Jasca, maí ca chahahuacanaibo ya ja nianapiquë. Nianaxo tsi quiha jato ja bëbopiquë. Jatsi ja qui chama acacaquë jatiroha ca nohiria bo, jatiroha ca joi bo, jatiroha ca mai bo, tihi cabo yonati. ⁸ Jabi ja qui aracaxëcani quiha maí ca nohiria bo tëquë, naa acacanish ca cordero libro ó ca quënëhacayamacanish cabo tëquë. Toa libro ó tsi quënëhacani quiha bëso cabo roha. Mai nëhohuahacanox pari no tsi toá tsi jato janë bo quënëhacani quiha.

⁹ Jatsi nicacana, pahoqui quini jaya cabá. ¹⁰ Preso qui nanëhacaxëti xo toa nanëhacaxëti cabo tëquë. Jasca, saipí tsi tēpas-hacaxëhi quiha toa saipí tsi tēpas-hacaxëti cabo tëquë. Toatiyá tsi Dios nohiria bo huëna-huënyamano. Jia tsi Dios qui ja chitimicano ra.

¹¹ Jaquirëquë yohinahua huëtisa ë jisquë ra, naa mai ax huajahai cato. Dos ca mahui pistia ca ja jaya quiha, naa cordero mahui jascaria. Jasca, anomaria ca raquëria jahuë joi iqui quiha, naa quëshi-quëshiria chanihai jascaria. ¹² Huajaxo tsi quiha jariapari ca yohinahua ja mëbiquë, jahuë yonati ja iqui quëshpi na. Mëbixo tsi quiha toa jariapari ca yohinahua qui maí ca nohiria bo tëquë ja aramaquë. Ja iqui tsi toa acacahax ca bësotëquëmahacahax ca yohinahua qui aracaxëcani quiha nohiria bo tëquë. ¹³ Jasca, mëbipama tsi quiha huëstima ca jisti bo ja aquë. Axo tsi quiha naipá ca chihí ja paquëmaquë nohiria bo bësójo xo na, ja tsayacano iquish na. ¹⁴ Toca tsi nohiria bo ja parapiquë, toa jariapari ca yohinahua bax ja aca ca jisti bo iqui na. Paraxo tsi quiha estatua, naa yohinahua jaria-jaria ca ati nohiria bo ja yoaquë. Jatsi acacahax ca jaboqui bësó ca yohinahua bax estatua nohiria

bá aquë. ¹⁵ Jaquirëquë ja acacana ca estatua, naa toa jariapari ca yohinahua jaria-jaria ca ja bësomaquë ra, toa ati chama ja qui acacani iqui na. Jatsi chaniquë toa estatua ra. Jasca, ja qui aracasyamacanaibo tëquë ati mëtsa ja iquë ra. ¹⁶ Jasca, jatiroha ca nohiria bo, naa chama bo, chama yama cabo, rico cabo, noitiria cabo, patrón yama cabo, yonati bo, tihi cabo ja amaquë jahuë jisti biti. Jatsi nohiria ba bëpara, jato mëquë mënëcaya, tihi cabo ó tsi jahuë janë quënëhacaha quiha. ¹⁷ Jaquirëquë yoba paxa ca ja aquë nohiria bo qui. Jatsi iniati, copiti, tihi tsi ati inox pari no tsi nohiria bo quënëhacati iqui quiha jahuë janë, jahuë número, tihi cabá no.

¹⁸ Tiisi ma jayacano ra. Yohinahua número cahëti mëtsaxëhi quiha toa tiisi jaya cato ra. Jahuë número tsi xo seiscientos sesenta y seis, naa nohiria ba número-númerora.

14

Cordero rabëti bo

¹ Jatsi ë tsyatëquëquë. Tsayapama tsi Cordero ë jisquë. Maca Sión cacha nii ja iqui quiha. Jasca, ja bëta iqui quiha ciento cuarenta y cuatro mil ca nohiria bo. Jahuë janë, jahuë Jahëpa janë, tihi cabá tsi ja quënëhacacani quiha jato bëpara ó no. ² Tsayapama tsi naipá ca joi ë nicaquë. Anomaria toa joi iqui quiha, naa huahuahai ca jënë pacotsa, tërë-tërëhaina, tihi cabo jascaria. Bëroria toa joi iqui quiha, naa jato arpá tsi música acanaibá acai jascaria. ³ Toá tsi quiha trono, toa cuatro ca bësohai ca jahuëcara bo, veinticuatro ca yosibo, tihi cabo bësojó tsi quëquëti paxa ca quëquëhi ja icaquë, naa nohiria tirixëni cabo. Ciento cuarenta y cuatro mil ca nohiria bo ja icana quiha. Toa quëquëti paxa ca jabiti mëtsa iqui quiha toa maí ca copihacanish cabo roha. ⁴ Yoxa bo ya jochayamanish cabo tsi xo naa. Jabi mëstëxëni ca jabi-jabiria ca ja jayacana quiha naa ciento cuarenta y cuatro ca mil cabo. Cordero banahuacani quiha ja cahai cató no. Jasca, nohiria bo quima ja copihacacana quiha, Dios, Cordero, tihi cabo qui jariapari ca acacanish ca ofrenda iti. ⁵ Quiayama-canaibo, quësohacatimaxëniria cabo, tihi cabo tsi xo naa.

Tres ca ángel bá yoahana

⁶ Jatsi ángel huëtsa ë jisquë. Basi nai nëpax tsi noyahi ja iquë. Ja raahacaha quiha Dios i-ipaohai ca Chani Jia ca maí ca nohiria bo qui yoati. Jatiroha ca nohiria bo, jimi bo, joi bo, maxo bo, tihi cabo toa Chani ja yoaha quiha.

⁷ Yoapama tsi quiha joi pistiamá tsi ja quënaquë:

—Dios qui raquëcaxëcahuë. Dios oquëhuacaxëcahuë ra. Tsëquëquë nohiria bo copiti xabaca ra. Naipa, maí, iahua, jatiroha ca huahuahai ca jënë iti, tihi cabo Nëhohuanish ca qui aracaxëcahuë —i ángel quë.

⁸ Jatsi ja cho segunda ca ángel joquë. Jopama tsi quiha ja quëna-quënaquë jaa ri:

—Huinocayaquë Babilonia yacata chama ra. Jaboqui yama tsi xo jahuë chama ra. Jahuë cahuí tsi quiha jatiroha ca maí ca nohiria bo ja pahëhuaquë yoyoti, jochati —i ja a quiha.

⁹ Jaquirëquë tercer ca ángel joquë. Joxo tsi quiha joi pistiamá tsi ja quënaquë jaa ri:

—Copihacaxëti xo yohinahua, jahuë estatua, tihi cabo bësojó mënicanaiibo. Jato mëquënë, jato bëpara, tihi cabo ó tsi jahuë janë tsi ja quënëhacacani quiha.

¹⁰ Dios copi-copiria bicaxëcani quiha ra. Jato qui caxaxëniria xo Dios. Dios vino acaxëcani quiha ra, naa Dios copi-copiria. Chihi, azufre, tihi cabo ó tsi

tënëmahacacaxēcani quiha ra. Tocaxēhi quiha Dios, jahuē mēstēxēniria ca ángel bo, Cordero, tihi cabo bēsojó xo na. ¹¹ Jatsi mana tērono-tēronopaoxēhi quiha jato chihicohini. Barihani, baquicha, tihi tsi tēnē-tēnēpaocaxēcani quiha toa yohinahua, jahuē estatua, tihi cabo qui aracanax cabo. Joitimaxēni icaxēcani quiha. Tēnēyocaxēcani quiha toa jahuē janē tsi quēnēhacanish cabo ra. ¹² Tihi cabo iqui tsi huēna-huēnayamaxēti ca xo chahahuacanaibo, naa Dios yoba acanaibo ra. Jesu qui chitimicanaibo huēna-huēnayamano ra.

¹³ Jatsi quiha naipá ca joi ē nicaquē:

—Naa quēnēhuē. Jaboqui shoma xo toa Ibo qui chitimicanaibo rēsoxēhaina iquia. Jato yonoco quimá joi-joipaocaxēcani quiha. Toca tsi jia ca ja acanaí ca quēshpi tsi copihacaxēcani quiha —i ē qui joi quē.

Tēsa-tēsatiyaria

¹⁴ Jatsi tsēmo joxo ca ē tsayaquē. Ea bēsojó ja iquē. Jasca, ja cacha joni, naa Nohiria Baquē icanai ca tsaho iqui quiha. Oro ca chaha sahuē ja iqui quiha. Jasca, jahuē mēquēnē tsi tēsati manē achá ja iqui quiha. ¹⁵ Jatsi quiha Dios iti-itiria quima ax ángel huētsa joquē. Joxo tsi quiha tsémó ca tsahohai ca qui ja quēnaquē:

—Mi tēsati manē bihuē. Mi tēsano ra. Tsēquēquē tēsati xabaca ra. Shini-shiniria tsi xo toa maí ca tēsahacati cato ra —i ja qui ángel quē.

¹⁶ Jatsi quiha tsémó ca tsahohai cató jahuē manē raaquē. Raaxo tsi quiha maí ca shini ca ja tēsayaquē.

¹⁷ Jatsi quiha Dios iti-itiria quima ax ángel huētsa joquē. Quēnoxēni ca tēsati manē ja jaya quiha jaa ri. ¹⁸ Jasca, tobi iqui quiha ángel huētsa, naa altár ca chihi ototi ibo. Altar ax joxo tsi quiha toa quēnoxēni ca manē jaya ca ángel qui ja quēnaquē joi pistiamá no.

—Mi tēsati manē raahuē. Toa maí ca nishí ca bimi tēsahuē. Shini tsi xo toa jahá ca bimi ra —i ja qui ángel quē.

¹⁹ Jatsi quiha angél jahuē tēsati manē raaquē mai qui. Raaxo tsi quiha toa maí ca shini ca bimi ja tēsayaquē. Tēsaxo tsi quiha Dios trapichi qui ja niaquē nētsiti. Dios copi tsi xo toa. Jato qui caxahi quiha. ²⁰ Yaca cacha ax tsi ja nētsihacacaquē. Anomaria iqui quiha jato jimi huajahaina. Caballo freno tana tsi ja iqui quiha. Jasca, nēama tsi quiha toa jimi pacanaquē ra, naa trescientos ca kilómetros.

15

Jaroha ca siete ca tēnēti bo

¹ Jatsi naipá ca anomaria ca jisti huētsa ē jisquē. Tsayapama tsi ē ratēquē. Tobi iqui quiha siete ca ángel bo. Tēnēti bo ja jayacana quiha. Jaroha ca tēnēti bo tsi xo naa, nohiria bo qui Dios caxahai ca rēso quiha. Tihi tsi ē jisquē ra.

² Tsayapama tsi vidrio jisiria ca ianē, naa chihi ya jaxcamēna ca ē jisquē. Jasca, toá tsi mani iqui quiha yohinahua bēbocanax cabo. Jahuē estatua, jahuē janē, tihi cabo pasomaha ja nianacana quiha. Bēbohax ia quēmapó tsi ja niicaquē, jato qui Diós aca ca música ati arpa bo acha. ³ Niihax ja quēquēcaquē. Dios yonati Moisés yamaba quēquēti, Cordero quēquēti, tihi cabo quēquēti ja icaquē.

—Anomaria tsi xo toa jatiroha ca mi acaina ra, noba Ibo Dios Chamaxēni cató.

Mēstē ca jiaría ca tsi xo toa mi acaina ra, maí ca nohiria bo Chama-chamariá.

⁴ Mi qui raquēcani quiha jatiroha cabo ra, iqui noa, noba Ibobá.

Mia oquēhuacaxēcani quiha nohiria bo tēquē.

Mia roha tsi xo toa mēstēxēni cato.

Mi qui bocaxēcani quiha jatiroha ca maí cabo, mia bēsojó tsi mēnixēna. Tocaxēcani quiha ra, mi acai ca mēstēxēni ca ja jiscana iqui na —tíhi tsi ja icaquē quēquēhi na.

⁵ Naa quirēquē naipá ca Dios iti-itiria japēquēquē. Toá tsi nohiria bo qui Díos ani ca yoba-yobaria iqui quiha. ⁶ E tsayano tsi toa nahax siete ca ángel bo páquēquē siete ca tēnēti bo jaya. Raiti joxoria ca sahuē ja icana quiha. Jasca, oro ca shitaramēti bo ja jayacana quiha jato shipati ó no. ⁷ Jatsi quiha joquē huēsti ca bēsohai ca jahuēcara ca. Joxo tsi quiha toa siete ca ángel bo qui siete ca oro ca cochopi bo ja aquē. I-ipaohai ca Dios caxa rēamē tsi ja icana quiha. ⁸ Jatsi toa cochopi bo ax chihicohini tēronoquē. Dios chama, jahuē oquē, tíhi cabo ja jismani quiha. Jatsi rēamēquē Dios iti-itiria ra. Chihicohini rēamēquē tsi quiha jaxara jiconoma nohiria bo iquē ra. Jabi toa siete ca tēnēti bo jatihuaxēti ángel bo iquē jariapari.

16

Cochopí ca tēnēti bo maí qui japahacahaina

¹ Jatsi Díos iti-itiriá ca joi ē nicaquē. Toa siete ca ángel bo qui toa joi quēnaquē:

—Bocata. Toa siete ca cochopí ca tēnēti bo japacata, Dios caxa nohiria bá cahēyoino iquish na —i jato qui joi quē.

² Jatsi quiha toa jariapari ca ángel caquē jahuē cochopí ca tēnēti maí qui japaxēna. Japajahuquē tsi quiha pahéria ca bishi bo, roco-rocoria, tíhi cabo nohiria bá biyoquē, naa yohinahua janē tsi quēnhacahax cabo. Biyoquē jahuē estatua qui aracanaibo ra.

³ Jaquirēquē segundo ca ángel jahuē cochopí ca tēnēti japaquē iahua qui. Jatsi jēnē jimi manēquē, naa rēsohax cato jimi jasca cato. Ja iqui tsi rēsoyoquē iahua ca bēsohai ca jahuē bo tēquē.

⁴ Jaquirēquē tercer ca ángel jahuē cochopí ca tēnēti japaquē, ani, boxtoro, tíhi cabo qui. Jimi ja manēcaquē jato ri. ⁵ Jatsi maí ca jēnē obēsoti ángel ē nicaquē.

—Mēstē tsi xo toa mi copihaina ra, Ibo Dios mēstēxēni cató.

Mía ri tsi xo toa jaboquí nori ca i-ipaonish cato ra.

⁶ Tsayahuē. Chahahuacanaibo, Dios Chani yoacanaibo, tíhi cabo ja acani quiha rē.

Ja acacani ca yoi ca quēshpi bo tsi jia tsi xo toa jato mi copihaina ra.

Ja japacana ca jimi jato qui mi aquē ra, ati —nēa tsi ángel nēcaquē.

⁷ Jatsi altár ca joi huētsa ē nicaquē.

—Jabija tsi xo toa mi copihaina ra Ibo Dios Chamaxēni cató.

Mēstē tsi xo toa mi acaina ra —i joi quē.

⁸ Jatsi quiha cuarto ca ángel jahuē cochopí ca tēnēti japaquē bari qui. Jatsi bari qui chama acacaquē chíhí tsi nohiria bo mēshati. Anomaria toa bari huaó iqui quiha. ⁹ Jahuē huaó tsi quiha nohiria bo mēshoyoquē. Mēshohax tsi quiha Dios pasomaha ja chanicaquē, toa tēnēti bo raati ibo ja iqui iqui na. Jishopē. Jari jato jocha quima ja casocasyamaquē Dios oquēhuaxēna.

¹⁰ Jatsi quinto ca ángel jahuē cochopí ca tēnēti japaquē yohinahua trono, ja yonahaina, tíhi cabo qui. Ja japaquē tsi quiha tsēmonaquē yohinahua yonahai ca tēquē. Jatsi jato jana nohiria bá tēxacaquē raquēquí na. ¹¹ Jatsi naipá ca Dios pasomaha ja chanicaquē jato ri, ja tēnē-tēnēcanaí ca iqui na. Ja acani ca yoi ca quima Dios quiiri ja bēsocasyamaquē rē.

¹² Jatsi sexto ca ángel jahuë cochopí ca tēnēti japaquë ani-aniria Eufrates qui. Ja japaquë tsi quiha shinayoquë jahuë jēnē. Toca tsi shitati quinia acacaquë bari johai ca jo ca chama bo bax na. ¹³ Jaquirëquë tres ca yoshi yoixēni cabo ē jisquë; naa bēxco jisiria cabo. Quēshi-quēshiria, yohinahua, quiahai ca chani yoati ibo, tihí caba jana bo quima ax naa tres ca yoshi yoixēni cabo huajaha quiha. ¹⁴ Jatsi jisti bo ati chama ja jayacana quiha. Huajahax jatiroha ca maí ca chama bo qui ja bocaquë jato quētsohuaxēna, Ibo Dios bari-bariria tsi Dios pasomaha nianaxēna.

¹⁵ Jatsi,

—Nicaparıcana. Yomahai ca johai ca jascaria tsi joxëquia. E noho pasoyamaxēhi quiha maí ca nohiria bo. Jama, rani-ranixēhi quiha ēa manacanaibo, naa ē noho pasocanaibo. Bērabiyamacaxēcani quiha, jamē ja rohahuacani iqui na. Tsoboco jascaria ca iyamacaxēcani quiha toa barí no —i ē qui Ibo quë.

¹⁶ Jatsi quiha toa maí ca chama bo toa tres ca yoshi yoixēni cabá quētsohuacquë huēsti ca iti ó no, naa Hebreo joí tsi “Armagedón” ıcanai cato ó no.

¹⁷ Jatsi séptimo ca ángel jahuë cochopí ca tēnēti japaquë nahuëa qui. Ja japaquë tsi quiha Dios iti-itiriá ca joí quēnaquë trono xo na.

—Iquë ra —i joi quë.

¹⁸ Jatsi canapa choshi-choshiquë; huēstima. Tērē-tērējaquë. Yajo-yajoquë maí. Anomaria toa maí yajohai ca iqui quiha. Joni nēhohuanitiyá rohari tsi jisiquipistiyamariani quiha toca ca yajo-yajohaina. ¹⁹ Jatsi pērësiquë toa yaca-yacaria ra; tres matoxi quiha. Jasca, poxoha quiha maí ca yaca bo ri. Jatsi toa yaca-yacaria Babilonia Díos shinaquë. Anomaria tsi toa yaca-yacaria ja copiha quiha ja qui caxa-caxaquí na. ²⁰ Jatsi jētëquëha quiha jatiroha ca iahuá ca tēsēbē. Parahuahacaha quiha maca bo tēquë. ²¹ Jatsi nai ax tioboria ca oiroxaya nohiria bo qui paquëquë, naa cuarenta ca kilo ihuë cabo. Oiroxaya iqui tsi Dios pasomaha nohiria bo chaniquë. Tihí tsi ē jisquë ra. Anomaria toa copı iqui quiha.

17

Babilonia copıhacahaina

¹ Jatsi toa siete ca cochopi bo jaya ca ángel bo quima huēsti ca ángel ē qui joquë ē qui chanixēna. Johax,

—Nēá johuë. Anomariaxēhi quiha toa jochahuaxēniria ca yoxa copi ra, naa ani bo, iahua, boxtoro bo, tihí cabá tsaho cato. Ja copıhacaxēhai ca mia jismaxëquia. Yoyohi quiha. ² Jasca, naa yoxa yaxo tsi yoi ca ayocana quiha maí ca chama bo ri. Maí ca nohiria bo ja pahēhuacquë rē, ja yoyohai cató no —i ē qui ángel quë.

³ Chanixo xaba qui ēa ángel boquë Espıritu Santo chamá no. Toa xo tsi toa yoxa ē jisquë, naa shini ca yohinahua catē ó tsi tsaho cato. Yohinahua yora ó tsi quiha huēstima ca Dios pasomaha ca chani quēnēhacaha quiha. Jasca, siete ca mapo bo, diez ca mahui bo, tihí cabo jaya quiha toa yohinahua shini cato.

⁴ Jatsi copıxēniria ca raiti shini sahuë toa yoxa iqui quiha. Oro, copıxēniria ca maxax mishni bo, perla bo, tihí cabá tsi ja jianaha quiha. Jasca, oro ca cochopi ja achaquë, naa ja yoyohai ca jochahuaxēniria ca jabi jaya cato. ⁵ Jatsi jahuë bēpara ó tsi tobi iqui quiha quēnēhacani ca bēronoma ca chani. “Yaca-yacaria ca Babilonia ca ēa xo naa ra. Yoyocanaibo, jatiroha ca maí ca jabi yoixēni cabo, tihí cabo saihuati ibo-ıboria ca ēa xo naa” i toa quēnē quë.

⁶ Chahahuacanaiba jimí tsi toa yoxa pahēni quiha, naa Jesu iqui tsi acacanish caba jimí no. Tihi tsi tsayahi tsi ē ratēquē. ⁷ Jatsi ē qui ángel chaniquē:

—¿Jēniriahax mi ratēha pa? Tsohuē toa yoxa nori cato, jasca, tsohuē toa ja tsahohai ca yohinahua nori cato, naa siete ca mapo bo, diez ca mahui bo, tihi cabo jaya cato, tihi ca tsi mia yoaxēquia. ⁸ Jatsi toa mi jisi ca yohinahua pari mia cahēmaxēquia. Jabi bēsopaoni quiha toa yohinahua; jaboqui bēsoyama ja nori. Jama, jari jisiquitēquēxēhi quiha. Quinhua ax tsēquēpaimaria xo. Tsēquēhax nohiria bo quēyohi caxēhi quiha rē. Jatsi ratēxēhi quiha maí ca nohiria bo, bēso ja nori jisi na. Tihi ca jahuē bo qui ratēxēhi quiha toa bēsocanaiba libro ó ca huishahama ca janē jaya cabo ra. Siri tsi, naa mai nēhohuachanaxo pari no tsi toa Diós-na ba janē bo huishahacani quiha. ⁹ Jatsi shina-shinahuē. Jahuē siete ca mapo bo tsi xo toa siete ca maca bo. Jato cacha tsaho xo yoxa. ¹⁰ Jasca, toa siete ca mapo bo tsi xo siete ca chama bo ri. Huinocaniquē cinco cabo. Jaboqui yonahi quiha huēstita. Joxēti xo chama huētsa. Ja jono tsi mēri tsi huinocaxēhi quiha ja yonahaina. ¹¹ Jasca, toa bēsopaonish ca yohinahua, naa jaboqui bēsoyama ca tsi xo toa chama octavo cato. Jasca, toa siete ca chama ba maxo ó ca tsi xo. Quēyohacaxēti xo toa octavo cato ra. ¹² Jasca, toa diez ca mahui bo tsi xo joxēhai ca chama huētsa bo. Jari jato qui acama tsi xo toa jato yonati chama. Chama bixo tsi huēsti ca hora roha no tsi yohinahua yaxo tsi yonacaxēcaqui. ¹³ Yonocobēquinacaxēcani quiha yohinahua mēbixēna. Mēbixo tsi yohinahua qui jato yonati chama acaxēcani quiha pē. ¹⁴ Jatsi Cordero ya nianacaxēcaqui. Jama, jato bēboxēqui Cordero, Ibo-iboria ca Chama-chamaria ca ja nori iqui na. Jato pasomaha Cordero yahax tsi nianaxēhi quiha ja qui chitiminish ca quēnahacanish cabo ri —nēa tsi ē qui ángel nēcaquē.

¹⁵ Jatsi ē qui ángel chanitēquēquē.

—Toa ani bo, iahua bo, boxtoro bo, tihi cabá tsi toa yoxa tsaho iquí ca tsi xo toa jatiroha ca nohiria bo, maxo bo, mai bo, joi bo. ¹⁶ Jatsi toa yoxa qui caxaxēni quiha toa diez ca mahui bo, naa yohinahua mapo ó cabo. Caxaquí tsi toa yoyoxēni ca yoxa yoshihuacaxēcani quiha. Tsobocoahuacaxēcani quiha. Jatsi jahuē nami picaxēcaqui. Píxo tsi toa pihama ca mēshacaxēcaqui. ¹⁷ Jabi tocaxēcani quiha toa diez ca chama bo. Jama, Dios tsi xo toa toca ca jato shinamati ibo-iboria. Jahuē shina axēhi quiha Dios. Ja iqui tsi yohinahua qui jato yonati chama acasaxēcani quiha ra. Jabi toca tsi jatixēhi quiha Dios Chani tēquē. ¹⁸ Jasca, toa yoxa tsi xo toa yaca-yacaria, naa jatiroha ca maí ca chama bo yonati ibo-iboria.

18

Babilonia yaca quēyohacahaina

¹ Naa quirēquē naipa ax botēhai ca ángel huētsa ē jisquē. Ja qui huēstima ca chama acacaquē. Anomaria jahuē oquē iqui quiha. Toa oquē iqui tsi huēanaquē mai tēquē. ² Botēxo tsi quiha joi pistiamá tsi ja quēnaquē.

—Quēyohacaquē Babilonia ra. Quēyohacaquē toa yaca-yacaria ra. Yoshini iti-itiria ja manēquē pē. Jahá racahi quiha jatiroha ca isa yoixēni cabo.

³ Ja iqui tsi pahēyoquē maí ca nohiria bo tēquē, ja yoyohai cató no. Ja bēta yoyoquē maí ca chama bo tēquē ri. Jasca, riconaquē jahuē comerciante bo ja yoyohai ca iqui na —i ē qui ángel quē.

⁴ Jquirēquē naipá ca joi huētsa ē nicaquē.

—Toa yaca quima tsēquēcahuē, noho nohiria bá. Jahuē jocha bo ma xatēnayamano. Tsēquēcahuē iquia. Jahuē copi-copiria ma xatēnayamano iquish

na. ⁵ Nai tana tsi xo jahuë jocha maá cato ra. Jaboqui jahuë jocha shinahi quiha Dios. ⁶ Jatsi toa yoxa copihuë, Diós, naa ja acani jascaria. Rabë ca copi ja qui amahuë ra, jatiroha ca yoi ca ja ani ca quëshpi na. Huësti ca cochopí ca copi-copiria ja bax roihahuë amati, naa huëtsa bo qui ja roihani jascaria. ⁷ Jamë oquëhuahi quiha pë. Anomaria tsi xo toa ja raca-racahaina iquia. Ja quëshpi bo tsi toa yoxa tënëmahuë. Cohuëhuahuë iquia. “Chama-chamaria ca ëa xo naa. Noho trono ó tsaohoquia” ii quiha pë. Jasca, “Bënë imahax ca ma ëa xo naa. Tënëpistiayamariaxëquia” i jamë i quiha. ⁸ Jatsi huësti ca bari roha tsi copi-copiriahacaxëhi quiha iquia. Tobixëhi quiha ja rësohaina. Araraxëhi quiha jahá ca nohiria bo. Jasca, paxnacaxëcani quiha. Toa barí tsi chihí tsi quëyohacaxëhi quiha. Toa yoxa copixëhi quiha Ibo Dios, anomaria jahuë chama nori iqui na —nëa tsi ë qui naipá ca joi nëcaquë.

⁹ Quëyohacaxëhi quiha toa yoxa ra. Ja quëyohacaquë tsi araconacaxëcani quiha maí ca chama bo, naa ja bëta yoyobëquinacanaibo. Huini-huinicaxëcani quiha jahá racacanaibo ja mëshohai ca tsayahax na. Jahuë chihicohini tsayacacëcaqui. ¹⁰ Ja tënëhai ca qui raquëhi tsi basi ax tsi manicaxëcani quiha araxëna.

—Aquërama. Noitiria xo mia ra, chamaxëniria ca Babiloniá. Oquë-oquëria ca mi iquë rë. Huësti ca hora roha tsi mi quëyohacaquë rë —icaxëcani quiha toa mani cabo.

¹¹ Jatsi araxëhi quiha comerciante bo tëquë, toa yaca shinahax na. Jaboqui yama tsi xo toa jato jahuëmishni bo copicanaina. ¹² Yama tsi xo toa jato oro, plata, maxax copixëni cabo, perla bo, tihí cabo copihaina. Yama tsi jato corte bo copixëni cabo, jato corte shini cabo, tihí cabo copihaina. Jahuë jahuë bo, naa marfil, jihui, bronce, mármol, tihí cató ca acacanish ca jahuë bo copiyamacaxëcani quiha. ¹³ Jasca, tobi quiha jato yochi, perejome, jënëria, xëni, moto, tihí cabo. Tobi quiha vaca, oveja, caballo, carita bo, yonati bo, tihí ca jahuë bo iniahacati. Tihí cabo ja jayacana quiha iniati. Mahitsa quiha.

¹⁴ Nëcacaxëcani quiha toa yaca-yacaria yoati na:

—Aquërama. Quëyohacaquë jaha mi quëëhai ca ganancia bo ra. Janacaquë mi parata, mi jahuëmishni bo. Bitëquënoma xo rë —ixëhi quiha comerciante bo.

¹⁵ Ja tënëhai ca qui raquëhi tsi basihax manicaxëcani quiha toa gananciabo anish ca comerciante bo. Basi ax araconacaxëcani quiha. Anomariaxëhi quiha ja huini-huincanaina. Huiniahax,

¹⁶ —Aquërama. Jishopë. Noitiria xo noba yaca-yacaria rë. Jahuë corte copixëni cabo, jahuë corte shini cabo, jahuë oro, jahuë copixëniacia ca maxax bo, jahuë perla bo, tihí cabá tsi ja jianapaoha quiha rë. ¹⁷ Huësti ca hora roha tsi jahuë jahuë-jahuëria bo tëquë quëyohacaquë rë —icaxëcani quiha toa comerciante bo.

Jatsi basi xo tsi tsaya-tsayacaxëcani quiha barco ba capitán bo, jato yonati, jato pasajero bo. ¹⁸ Yaca mëshohai ca chihicohini tsayapama tsi quënacaxëcani quiha jato ri:

—Aquërama. Yama tsi xo naa yaca jasca cato rë. Jahuësti ca tsi xo naa ra —iquina.

¹⁹ Araconapama tsi jato mapo qui mai niacacëcaqui cohuëriaquí na. Anomariaxëhi quiha ja huini-huincanaina.

—Aquërama. Jishopë. Noitiria tsi xo noba yaca-yacaria ra. Toa xo tsi ganancia-gananciariabo jahuë barco bo ibobá ayoquë ra. Toanahax ja riconariacaquë. Huësti ca hora roha tsi ja quëyohacaquë rë —icaxëcani quiha toa barco ibo bo.

²⁰ Jama, rani-ranicana, naipá ca mani cabá, ja quëyohacaha quëshpi na. Ranicana chahuacanaibá. Ranicana Dios Chani chitahëhuati ibobá. Ranicana Dios Chani yoanish cabá. Mato ja tënëmaha ca quëshpi tsi Diós toa yaca copiquë ra.

²¹ Jatsi ángel chamaxëni cató huësti ca maxax चाहितaxëni ca topiquë, naa rënëti tio cato. Topixo tsi quiha ia qui ja niaquë. Niahax,

—Jabi nëca tsi mai qui niahacaxëqui Babilonia yaca-yacaria. Jisiquipistiyamaria-tëquëxëqui ra. ²² Mato calle ó tsi yamatëquëxëhi quiha arpa, pacahua, trompeta, tihí cabá tsi música acanaibo ra. Jato música nicatëquëyamariaxëhi quiha nohiria bo ra. Yamaxëhi quiha jahá ca yonocanaibo. Yamaxëhi quiha moto timacanaí ca pacotsa, jahá no. ²³ Jaha tsi jisiquiyamariaxëhi quiha xobó ca ririhai ca lamparina bo ri. Jasca, ahui paxa ca yahai ca joni joi nicayamacaxëcane quiha. Rico-ricoria mi nohó ca comerciante bo igui quiha, naa maí ca oquë-oquëria iguish cabo. Mi parahai ca chani tsi maí ca nohiria bo tëquë janyama mëpiqui mia ra —nëa tsi ja qui ángel nëcaquë.

²⁴ Toa yaca ax tsi Dios Chani yoacanaibo, chahuacanaibo, tihí cabo acacaniquë. Jahuë shina ri tsi xo ra. Ja igui tsi maí ca chahuacanaibo tëquë acacaniquë iquia.

19

¹ Naa quirëquë naipá ca quëna-quënahai ca ë nicaquë, naa tirixëneria ca quëquëhai ca nohiria bo jascaria.

—Aleluya. Bëboquë noba Dios ra. Noba Chama-chamaria tsi xo naa. Oquë-oquëria xo. ² Jabija tsi xo toa ja shinahaina. Mëstë tsi xo toa ja copihaina. Toa jochahuaxëneria ca yoxa ja copiquë ra, naa maí ca nohiria bo ja yoyohai cató tsi yoshihuahax cato. Dios yonati bo ja tënëmaha ca quëshpi tsi ja copihacaquë ra —i jaca na quiha quëquëhi na.

³ Jatsi ja quëquëtëquëcaquë.

—Aleluya ra. Tërono-tëronopaoxëhi quiha jahuë chihicohini ra —i jaca na quiha.

⁴ Ja quëquëcaquë tsi quiha tronó ca tsaho ca Dios bësojó tsi mëniyoquë veinticuatro ca yosibo. Mëniyoquë toa cuatro ca bësocanaí ca jahuëcara cabo ri. Ja qui arahax,

—Amén. Aleluya —i jaca na quiha.

⁵ Jatsi trono ax johai ca joi ë nicaquë:

—Noba Dios qui “Gracias” icahuë, mato jahuë yonati nori cabá. “Gracias” icahuë, ja qui raquëcanaibá, naa chama bo, yonati bo, tihí cabo tëquëtá —i joi quë.

Cordero fiesta-fiestaria

⁶ Jaquirëquë tirixëneria ca nohiria ba joi bo ë nicaquë. Anomaria toa joi bo igui quiha, naa huahuahai ca jënë, tërë-tërëhai ca naipa, tihí cabo jascaria.

—Aleluya ra. Chitahëquë noba Chamaxëni ca Ibo Diós yonahaina ra. ⁷ No rani-ranino. “Oquë-oquëria xo” i ja qui nono. Tsëquëquë Corderó jahuë ahui yahai ca xabaca ra. Jasca, jianaquë bënë biti cato. ⁸ Anomaria ca raiti joxo ja qui acacana quiha jianati. Jabi chahuacanaibá mëstëxëni ca acai ca jahuë bo tsi xo toa jahuë sahuëti joxo ra —nëa tsi ja nëcaquë.

⁹ Jatsi ángel chaniquë.

—Naa tsi quënëhuë. Shoma-shomaria tsi xo toa Cordero fiesta qui cati joi bichish cabo, naa jahuë ahui ja bixëquë no —i ë qui ja quë. Chanihax,

—Parayamaquia. Dios jabija ca Chani tsi xo naa ra —i ja quë.

¹⁰ Jahuë chani nicahah ja bësojó tsi ë mëniquë ja qui araxëna. Jama,

—Tocayamatsihuë. Dios qui arahuë ra. Mi yonati roha ca ëa xo naa ra. Mibë xatë bo, Jesú jismani ca Chani nicacanaibo, tihí cabo mëbiti iboria ca ëa roha xo naa —i ë qui ángel quë.

Jabi Jesu jabija ca Chani tsi xo toa noqui chamahuahaina nohiria huëtsa bo toa Chani yoati.

Caballo joxo ca ibo

¹¹ Jatsi nai japëquëhai ca ë jisquë. Toa nahax jisiquiquë caballo joxo cato. Ja cacha tsaho iqui quiha jahuë ibo. “Parayamaí cato, Jabija-jabijaria” ja quënahacaha quiha. Mëstë tsi xo toa ja copihaina. Mëstë tsi xo ja nianahai ri.

¹² Jahuë bëro tsi xo chihi rëxquë jascaria. Huëstima ca chaha bo jaya quiha jahuë mapo ó no. Jasca, jahá tsi quënëhacani quiha huësti ca janë jonë cato. Jahuësti ca tsi xo toa janë cahëhaina. ¹³ Jasca, jimí tsi jahuë raiti moosahacaniquë. Jahuë janë huëtsa tsi xo “Dios Chani”. ¹⁴ Ja cho banahuacaquë

naipá ca soldado tirixëni cabo, jato caballo joxo bo ya. Sahuëti joxo, naa chëquëyama ca tsi sahuë ja icana quiha. ¹⁵ Jato Chama jana ax tsëquëhi iqui quiha manë quënoxëni cato, maí ca chahahuayamacanaibo tëpasti. Tëpasxo tsi chamá tsi jato yonaxëqui. Copixo tsi jato tima-timaxëqui, trapichí nëtsihai jascaria. Jato qui caxaxëneria xo Dios Chamaxëni cato ra. ¹⁶ Jasca, jahuë sahuëti, jahuë bamisco, tihí cabo ó tsi huësti ca janë quënëhacaquë. “Chama-chamaria, Ibo-iboria” ja quënahacaha quiha.

¹⁷ Jatsi ángel huëtsa ë jisquë, naa bari huëa ó tsi niihai cato. Joi pistiamá tsi naipá ca noyahi ca isa bo ja quënaquë:

—Bëcahuë. Mato orihuaxëhi quiha Dios. Anomariaxëhi quiha ma pihaina ra. ¹⁸ Tobixëhi quiha chama ba nami piti. Tobixëhi quiha general bo, soldado bo, caballo bo, jato ibo bo, tihí caba nami piti. Tobixëhi quiha patron yama cabo, yonati bo, cahëxëni cabo, iriama cabo. Tihí tsi pixëqui mato ra —i isa bo qui ángel quë.

¹⁹ Jatsi yohinahua, maí ca chama bo tëquë, jato soldado tirixëni cabo, tihí cabo ë jisquë. Ja quëtrocana quiha caballó ca Ibo, jahuë soldado bo, tihí cabo pasomaha nianaxëna. ²⁰ Bëbohacaquë toa yohinahua ra. Achiquiquë jahuë mahitsa ca chani yoati ibo, naa yohinahua bësojo xo tsi jisti acax cato. Jabi jahuë jistí tsi yohinahua janë jaya cabo, jahuë estatua bësojó mënihax cabo, tihí cabo ja parani quiha. Jatsi chihi ca iahua, naa azufre ririhai ca qui yohinahua, jahuë chani yoati ibo, tihí cabo niahacaquë. Bëso ja icana quiha. ²¹ Nohiria tëxë bo acacani quiha caballo iboba manë no, naa jahuë jana huajahai cató no. Ja acacacaquë tsi quiha sëyacaquë isa bo jato nami pihax na.

20

Mil ca año bo

¹ Jatsi nai ax botëhai ca ángel ë jisquë. Rësonish caba iti pëcati llave, nëxati cadena, tihí cabo acha ja iqui quiha. ² Quëshi-quëshiria, naa toa ronoxëni ca ja bëboquë. Toa yoshini, naa “Satanás” i no ai ca ja nëxaquë ra. Mil ca año no tsi nëxë ja iti quiha. ³ Nëxaxo tsi quiha nahuëa qui ángel niaquë. Nixaxo tsi jahuë caiti ja japaquë. Jia tsi toa quini ja quëbëquë, maí ca nohiria bo Satanás parayamano iquish na. Jariapari tsi huinocaxëti xo mil ca año bo. Jatsi mil ca año bo huinocaquë tsi pëchacaxëti xo tana roha pistia no.

⁴ Jatsi trono bo ë jisquë. Jahá tsaho cabo qui chama acacaquë nohiria bo copiti. Jatsi maxtiahacahax caba shina bo ë jisquë. Jesu Chani ja yoacanaina, Díos Chani, tihí cabo tahëxo acacanish cabo tsi xo naa. Yohinahua, jahuë estatua, tihí cabo bësojó tsi ja mëniyamacani quiha. Jato bëmana, jato mëquënë, tihí cabo ó tsi yohinahua janë ja biyamacani quiha. Jatsi ja bësetëquëcaquë. Bësoxo tsi mil ca año no tsi ja yonacaquë Cristo yaxo na. ⁵ Jabi jariapari ca nohiria bo bësetëquëxëhai ca tsi xo naa. Jari bësetëquëyamahi quiha tëxë ca rësonish cabo. Jariapari huinocaxëti xo mil ca año bo. ⁶ Jabi shomaria tsi xo toa jariapari ca bësetëquënai ca rësonish cabo. Díos quima aquëquëtimaxëni ca xo. Jahëpa Díos, Cristo, tihí cabá-na arati ibo-iboria icaxëcaqui. Jasca, mil ca año no tsi Cristo yaxo tsi yonacaxëceni quiha.

⁷ Jatsi mil ca año bo huinocaquë tsi pëquëmahacaxëhi quiha Satanás. ⁸ Huajahax caxëhi quiha jatiroha ca maí ca nohiria bo paraxëna. Caxo tsi Gog jatsi Magog, tihí ca icanai ca nohiria bo paraxëhi quiha. Jato quëtsohuaxëhi quiha nianaxëna. Tocanoma iqui quiha toa soldado bo, naa ianë ca mashënë jascaria. ⁹ Quëtsohax maí tsi ja pacanacaquë chahahuacanaiba oxti tëaxëna. Jabi jato oxti tsi xo toa Díos noihai ca yaca-yacaria. Jatsi nai ax paquëxëhi quiha chihi. Paquëhax jato quëyoxëhi quiha ra. ¹⁰ Jatsi azufre chihi ca iahua qui niahacaxëqui Yoshini, naa jato parati ibo-iboria. Jabi toa chihi qui niahacana quiha yohinahua, jahuë mahitsa ca chani yoati ibo. Toá tsi tënë-tënëpacaxëceni quiha, barihani, baquicha tëquë. Yama xo jahuë rëso.

Jaroha ca copi

¹¹ Jatsi trono joxo cato, jahá tsaho cato, tihí cabo ë jisquë. Jahuë iti quima jabaquë mai, naxëa, tihí cabo. Yamatapijacaquë. ¹² Jatsi rësonish cabo, naa chama bo, iriama cabo, tihí cabo ë jisquë. Trono bësojó tsi ja manicaquë. Manijacano tsi quiha mapëcahacaquë libro bo. Jatsi libro huëtza, naa “Bësocanaiba libro” icanai ca mapëcahacaquë. Jatsi copihacana quiha toa rësonish cabo ja acacani ca quëshpi na. ¹³ Jaquirëquë rësonish cabo tëquë iahua mëaquë copihacati. Jatsi rësocanaiba iti quima ax paquëquë rësonish cabo tëquë ri. Jatsi jatiroha cabo copihacaha quiha, ja acani ca quëshpi ra. ¹⁴ Jatsi quëyohacaquë rësoti chama. Quëyohacaquë rësocanaiba iti ri. Chihi ca iahua qui ja niahacacaquë ra. Jabi segundó ca Díos quima nohiria bo aquëquëmahacahai tsi xo naa. ¹⁵ Jatsi toa iahua qui niahacaquë toa bësocanaiba libro ó ca quënëhacahama ca janë jaya cabo.

21

Paxa ca naipa, jatsi paxa ca mai ri

¹ Jaquirëquë nai paxa cato, mai paxa cato, tihí cabo ë jisquë. Huinocaha nori iquë toa jariapari ca naipa, mai, tihí cabo. Jasca, yama iahua iqui quiha. ² Tsayapama tsi Yaca Mëstëxëni, naa naipá ca Jerusalén paxa ca Díos quima ax botëhai ca ë jisquë. Jiaria ja iqui quiha, bichiquihai ca jianahax ca yoxa jascaria. ³ Jatsi tronó ca joi pistiama ca ë nicaquë.

—Tsayahuë. Jaboqui nohiria bo ó racahi quiha Díos ra. Jato bëta racabëquinaxëhi quiha. Jahuë nohiria yoi bo icaxëcaqui, jato Díos yoi ja nori quëshpi na. ⁴ Jato bëhono masayoxëhi quiha. Jasca, yamaxëhi quiha ja rësocanaina. Yamaxëhi quiha arahaina, cohuëhai ri. Yamaxëhi quiha pahëhai ri. Huinocaquë toa maí ca rëquë ca i-ipahai ca tëquë —i tronó ca joi quë.

⁵ Jatsi tronó ca tsaho ca chaniquë:

—Tsayahuë. Jatiroha ca jahuëmishni bo paxahuaquia ra —iquiina.

Jatsi,

—Naa tsi quēñhuē. Parayamaquia. Naa Chani qui mi chitimiti xo —i ē qui joi quē.

⁶Jatsi,

—Jatihuahacaquē noho Chani ra. Jahuē chitahē, jahuē rēso, tihī ca ēa xo naa, naa letra bō A y Z jascaria. Copixoma tsi tēshinacanaibo qui jēñēpaxa axēquia, naa bēso jēñē itī cato. ⁷Naa jēñēpaxa bitī mētsa xo toa bēbohāi cato. Ja qui axēquia. Jatsi jahuē Dios ixēquia; jasca, noho baquē manēhi ja nori. ⁸Jama, copi huētsa bicaxēcāni quiha toa ēa banahuacasyamaacanaibo, chahahuayamaacanaibo. Tobi xo toa yoyoxēniria cabo, ati ibo bo, yoi ca jabī tsi chotacanaibo, yobē bo, mahitsa ca Dios qui aracanaibo, quiaxēniria cabo. Tihī cabo tsi xo toa azufre chihi iahua qui niahacahaina. Toca tsi Dios quima aquēquēmahacapaocaxēcāni quiha —i tronó ca tsaho ca quē.

Jerusalén paxa cato

⁹Jatsi toa siete ca ángel ó ca huēsti ca ángel ē qui joquē, naa siete ca cochopí ca tēñēti rēso cabo jayahax cato. Johax,

—Nēri johuē. Cordero ahui ti ca mia jismacasquia —i ē qui ja quē.

¹⁰Jatsi Espiritu Santó ēa ibohuatapiquē. Ibohuaxo tsi quiha maca चाहितaxēniria ca cacha ēa ja boquē. Toa xo tsi Jerusalén, naa Dios quima ax botēhax ca naipá ca yaca mēstēxēni ca ēa ja jismaquē. ¹¹Anomaria ja bajra-bajrahāi ca iquē ra. Dios oquē ja huahuaha quiha. Copixēniria ca jaspe icānai ca maxax jascaria ja bajra-bajrahāi iqui quiha. ¹²Jasca, toa yaca cacha tēamē tsi panēhua tētēcāria iquē. Jatsi panē ó ca doce ca caiti bo iquē. Jatiroha ca caiti ó tsi huēsti ca ángel nii iqui quiha. Jasca, toa caiti bo cacha quēñēhacani quiha Israel ca doce ca maxo ba janē bo. ¹³Tobi quiha tres ca caiti bo, naa bari johai ca jo cabo. Tobi quiha tres ca caiti nortē jo cabo. Tobi quiha tres ca caiti sur jo cabo. Tobi quiha tres ca caiti oeste jo cabo. ¹⁴Jasca, toa doce ca maxax cacha nii iqui quiha yacata panēhua. Janē jaya quiha toa maxax bo tēquē. Jahá tsi quēñēhacani quiha Corderó-na doce ca Chani yoati ibo ba janē bo.

¹⁵Jasca, ē qui chanihax ca ángel oro ca siti jaya quiha, toa yacatá ca caiti, panēhua, tihī cabo tanamati. ¹⁶Jabi cuadrada, naa cuatro ca jaharisi ca quēpē ya toa yaca iqui quiha. Jahuē napata tana, tihī cabo jaharisi iqui quiha. Jatsi ángel yaca tanamaquē jahuē siti no. Dos mil doscientos ca kilómetro bo jahuē napata tana iqui quiha, jasca, jahuē tētēca, jahuē mana tana. Jaharisi quiha.

¹⁷Jatsi jahuē panēhua oti ángel tanamaquē. Sesenta y cuatro metros ja iqui quiha jahuē tanamati no.

¹⁸Anomaria jahuē panēhua iquē ra, jaspe icānai ca maxax bá tsi ja acacani quēshpi na. Anomaria quiha ja xara ca xobo bo ri. Oro tēquēta, naa shērēmē ca botella jascaria cató tsi ja acacani quiha. ¹⁹Anomaria iquē jahuē yacata napata ri. Doce ca maxax copixēniria cató tsi ja acacani quiha. Jariapari tsi xo jaspe; segundo ca tsi xo zafiro; tercer ca tsi xo ágata; cuarta ca tsi xo esmeralda; ²⁰quinto ca tsi xo ónice; sexta ca tsi xo cornalina; séptima ca tsi xo crisólito; octava ca tsi xo berilo; novena ca tsi xo topacio; décima ca tsi xo crisoprasa; undécima ca tsi xo jacinto; duodécima ca tsi xo amatista. Tihī cabá tsi jahuē napata acacani quiha. ²¹Jasca, anomaria iquē jahuē doce ca caiti bo ri, naa perla bá tsi ja acacani quēshpi na. Huēsti huēsti ca caiti tsi xo huēsti ca perla ra. Anomaria iquē jahuē calle ri, shērēmē ca oro tēquē, naa botella jascaria cató tsi ja acacani quēshpi na.

²²Yama tsi xo toa yacatá ca arati xobo ra, Ibo Dios Chamaxēni cato, Cordero, tihī cabo arati xobo jaca nori quēshpi na. ²³Jasca, yama tsi xo bari,

ja qui Dios oquë huëahai nori quëshpi na. Yama tsi xo oxë ri, Cordero jahuë lampara nori quëshpi na. ²⁴ Ja huëahai cató tsi bohocaxëceni quiha maí ca nohiria bo. Ja qui jato jahuëmishni bo, parata, tihí cabo bocaxëceni quiha maí ca chama bo. ²⁵ Barihaní tsi mapahacatimaxëni ixëhi quiha jahuë caiti bo. Yamaxëhi quiha jahá ca baquicha. ²⁶ Toa yaca qui jato jahuëmishni bo, jato parata, tihí cabo boyocaxëceni quiha maí ca nohiria bo ri. ²⁷ Jama, ja qui jicotimaxëni riria tsi xo toa jocha jaya cabo. Jicoyamacaxëceni quiha quiacanaibo, yoyoxëni cabo ri. Ja qui jicocanaibo tsi xo toa xabahamahacaniš caba libro ó ca quënëhacaniš ca janë jaya cabo.

22

¹ Jaquirëquë toá ca xabahamahai ca aní ca jënë ángel ëa jismaquë. Shërëmëria toa jënë iqui quiha. Dios, Cordero, tihí caba trono quima ax ja joquë. ² Johax calle-calleriá ca nëpax tsi quiha toa jënë huahuaquë. Jasca, aní quëmapó tsi xabahamahai ca jihui bo mani iquë. Jatiroha ca oxë bimi paxa ca saihuacani quiha. Jasca, jahuë pëhi bo ri tsi xo toa maí ca nohiria bo jënimahuahaina. ³ Toa yaca qui jicoyamaxëhi quiha jahuëcara ca yoshihuahacahax cato. Yacatá tsi ixëhi quiha Dios trono, Cordero trono ri. Jatsi Cordero qui aracaxëceni quiha jahuë yonati bo. ⁴ Toa ax tsi xoama tsi Dios bëchinayocaxëcaqui. Jato bëpara ó tsi quënëhacaxëhi quiha jahuë janë. ⁵ Jasca, toa yamaxëqui tsëmohaina. Pëxë baayamacaxëceni quiha, Dios jato qui huahuahei ca nori quëshpi na. Bari yopayamacaxëceni quiha. Toa xo tsi yonapaocaxëceni quiha chahahuacanaibo ra.

Basima tsi xo Jesucristo johaina

⁶ Jatsi ë qui ángel chaniquë.

—Jabi ja tsi xo naa ë yoahana. Ja qui mi chitimiti xo. Jabi ëa Ibo Diós, naa Dios Chani yoapaonish cabo chamahuanish cató raaquë jahuë yonati bo jahuë Chani yoati. Tsëquëti basima ca jahuë bo jato ë jismaxëti xo ra —i ë qui ángel quë.

⁷ Jatsi,

—Jaha bësopa. Basima tsi xo ë johaina ra. Shoma tsi xo toa naa libro ó ca quënëhacahax ca chani nicacanaibo ra —i ë qui Ibo quë.

⁸ Jatsi tihí tsi ë nicaquë. Tihí tsi ë tsayaquë naa Juan icanai cato. Tsayahax naa jahuë bo jismahax ca ángel bësojó tsi ë mëniquë ja qui araxëna. ⁹ Jama, ë qui ángel chaniquë:

—Tocayamatsihuë. Dios qui mi arati xo ra. Mi yonati roha ca ëa xo naa. Mibë xatë bo, naa Dios Chani yoati ibo bo, naa libro ó ca quënëhacahax ca nicacanaibo tëquë, tihí cabo mëbiti ibo ca ëa xo naa ra —i ë qui ángel quë.

¹⁰ Jatsi ja nëcaquë:

—Yoahacaxëti xo naa libro ó ca quënëhacahax ca Chani ra, tsëquëti basima ja nori quëshpi na. ¹¹ Jatsi jochacanaibo jënëyamacana. Rarinatimaxëni ca jabi jayacani quiha pë. Yoi ca shinacanaibo quëtiayamacana. Rarinatimaxëni ca xo jato ri pë. Jama, jari jia ca axëti xo toa jia ca acai cato. Mëstë ca jabi jari jayaxëti xo toa mëstëxëni cato. ¹² Jaha bësopa. Basima tsi xo ë johaina ra. Johax premio bo boxëquia jatiroha cabo qui ati, ja ayocana quëshpi na. ¹³ Jahuë chitahë, jahuë rëso, tihí cabo xo ëa ra, naa letra bo A y Z jascaria. ¹⁴ Shoma tsi xo toa chochacacahax ca sahuëti jaya cabo. Xabahamati jihui bimi piti iipicaqui. Jasca, toa caiti nacopicaqui yaca qui jicoti. ¹⁵ Yaca cacha tsi xo toa jochahuaxëni riria cabo, naa, yobë bo, chotamixëni cabo, ati ibo bo,

mahitsa ca dios bo qui aracanaibo, quiaxēni cabo, paracanaibo. Tihí cabo tsi xo toa jicoyamahaina —i è qui ángel quē.

¹⁶ Jatsi,

—Noho ángel mi qui raati ibo ca ëa xo naa, iglesiá ca chahahuacanaibá naa chani cahēno iguish na. Ea ti tsi xo David yamaba chahitaxocobo yoi cato. “Huishti Bēro Shini” quēnahacahai ca ëa xo naa ra —i è qui Jesu quē ra.

¹⁷ Jaquirēquē Espíritu Santo, Cordero ahuini, tihí cabo è qui chaniquē:

—Bēcahuē —iquiina.

—Bēcahuē —iiyocani quiha nicacanaibo ri.

Jatsi tēshinapihi tsi bēcana. Copixoma tsi xabahamati jēnē bicana. Jaha quēēcanaibo qui acacaxēti xo.

¹⁸ Jatiroha cabo, naa libro ó ca Dios Chani nicacanaibo yobaparicasquia. Quiniacaxēcahuē. Tsohuēcaracá naa libro ó ca Chani qui mániano tsi ja qui naa libro ó ca tēnēti bo mániaxēqui Dios ra. ¹⁹ Jasca, tsohuēcaracá pi naa libro ó ca Chani jahuēcara ca másano tsi jahuē naipá ca premio mēbixēhi quiha Dios ra. Toa xabahamati jihui bimi piyamaxēhi quiha. Yaca-yacaria qui jicopistiyamariaxēhi quiha. Tihí ca libro ó ca jahuē bo xatēnayamaxēhi quiha rē. Tihí ca tsi iquia, naa chani quēnēti ibo.

²⁰ Jarohari tsi,

—Parayamaquia. Basima tsi xo è johaina ra —ii quiha è quēnēha ca jahuē bo obēsoti ibo.

Jatsi,

—Jaahuē. Mi jono ra, Ibo Jesús —iqui noa noqui ri.

²¹ Jia noba Ibo Jesús mato shomahuano ra. Amén.